


Jusiñamui uai:
Jusiñamui jito rafue
illa rabenico



New Testament in Huitoto, Murui (PE:huu:Huitoto, Murui)

Jusiñamui uai: Jusiñamui jito rafue illa rabenico
New Testament in Huitoto, Murui (PE:huu:Huitoto, Murui)

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

Contents

MATEO	1
MARCOS	61
LUCAS	97
JUAN	156
HECHOS	197
ROMANOS	245
1 CORINTIOS	267
2 CORINTIOS	293
GÁLATAS	307
EFESIOS	315
FILIPENSES	323
COLOSENSES	328
1 TESALONICENSES	333
2 TESALONCENSES	337
1 TIMOTEO	340
2 TIMOTEO	346
TITO	350
FILEMÓN	353
HEBREOS	355
SANTIAGO	375
1 PEDRO	381
2 PEDRO	388
1 JUAN	392
2 JUAN	397
3 JUAN	398
JUDAS	399
APOCALIPSIS	402

MATEO JESUCRISTO ENIRUEMO ILLA RAFUE CUAFUE

Jesucristo ie usumatiai

(Lc 3.23-38)

¹ Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori. ² Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori. ³ Judá micori jitodi Fares micori. Jiaie jitodi Zara micori. Iaimaiai micori eidi Tamar micori. Fares micori jitodi Esrom micori. Esrom micori jitodi Aram micori. ⁴ Aram micori jitodi Aminadab micori. Aminadab micori jitodi Naasón micori. Naasón micori jitodi Salmón. ⁵ Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isaí micori. ⁶ Isaí micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiñona ollena, David micori Urías micorina jobaimemo orede. Jobaimemo naimie fiodailla mei, naiñaiñona ote. ⁷ Salomón micori jitodi Roboam micori. Roboam micori jitodi Abías micori. Abías micori jitodi Asa micori. ⁸ Asa micori jitodi Josafat micori. Josafat micori jitodi Joram micori. Joram micori jitodi Uzías micori. ⁹ Uzías micori jitodi Jotam. Jotam micori jitodi Acaz. Acaz micori jitodi Ezequías micori. ¹⁰ Ezequías micori jitodi Manasés. Manasés micori jitodi Amón. Amón micori jitodi Josías. ¹¹ Josías micori jitodi Jeconías micori. Jeconías micori amatiai micoriai jiai itimaci. Naie facaiseconi Babilonia railla nairai dine naie nairai soldaduai cai cominina uitimaci. ¹² Naie meinomo Jeconías micori Salatiel micorina comuitate. Salatiel micori jitodi Zorobabel micori. ¹³ Zorobabel micori jitodi Abiud micori. Abiud micori jitodi Eliaquim micori. Eliaquim micori jitodi Azor micori. ¹⁴ Azor micori jitodi Sadoc micori. Sadoc micori jitodi Aquim micori. Aquim micori jitodi Eliud micori. ¹⁵ Eliud micori jitodi Eleazar micori. Eleazar micori jitodi Matán. Matán micori jitodi Jacob micori. ¹⁶ Jacob micori jitodi José micori. José micoridi María ini. Naiñaiñodi Jesús ei. Naimie mameci jiaicidi Cristo.

¹⁷ Abraham micori illa facaisemona David micori jeicia facaisemo Jesús ie catorce nanoramaci mameci jai ite. David micori facaisemona Babiloniamoo ite nairai anamo cai jaiagai illa facaisemo catorce nanoramaci mameci jiai ite. Babiloniamoo ite nairai anamo cai jaiagai illa facaisemona Jesús jeicia facaisemo catorce nanoramaci mameci jiai ite.

Jesús jeicia rafue

(Lc 2.1-7)

¹⁸ Jesucristo comuilla rafuena lloiticue. Jesús eidi María. Naiñaiñona jicanotimiedi José micori. Naimie micori diga naiñaiño nia iñenia, Jesiñamui Joreño ie uaido naiñaiñona uruesitate. ¹⁹ José micori maremie. María jai uruesillana naimie micori fidianona, naiñaiñona meidaitañellena jira, naiñaiñona bainino dotaacade. Jiaimie diga illamona urueside raillanona comecina facajanona, naiñaiñona dotaacade. ²⁰ Naimie micori comecina iemo facaia, naimie micori nicairillanona, naimie micorimo Jusiñamui jaienici bairiano raite:

—José, David micorí jito, Maríana jaciruiño ono, o aina illena. Jusiñamui Joreño naiñaiñoa jai uruesitate. ²¹ Himana jocoite. Ie comini naimaci jeacinomona naimie jilloitajaibilla jira, Jesúna o jitalle naimie mamecidi —raite. ²² Bie rafue suide, Jusiñamuidi ie lloraima micorí jaie llotataga uaina suillena. ²³ Jaie llotatate:

Himana uiñoñediñaiñoa comuite uruedi.

Himana jocoite.

Emanuel ie mameci jitalle.

Bie mameci oni dobaiñuamona raite: “Jusiñamui cai diga ite”.

²⁴ José micorí casidemo, Jusiñamui jaienici lloga uaina finode. Maríana ote, ie aina illena; ²⁵ iadedi nai jitona naiñaiño nia jocoñenia, naiñaiño diga naimie micorí nia iniñede. Naiñaiño jito jeicia mei, José micorí jítade naimie mamecina Jesúna.

2

Monamo ite ramo comeciaina facauidino rafue

¹ Judea railla eniruemo Jesús jeiciga. Naimie jeicianodi Belén. Naie facaiseconi ite illaimadi Herodes micorí. Monamo ite ramo comeciaina facauidino naie facaiseconi Jerusalémo jítoma billafo dina bitimaci. Jerusalémo itinomo jicanotimaci:

² —¿Ninomo como jeiciga omoi judíuai illaimadi? Jítoma bisoillafomo como bairede ucuduna ciodicai. Naiemona naimie jeiciana jai uiñoticaí. Naimiemo iobillacinona fecallena biticai.

³ Herodes micorídi naicinona cacajanona, ie comeci jarire ite. Jiamie naimie meifomo illana jitañede. Jerusalémo itinodi jiai jarire itimaci. ⁴ Ie facaise Herodes micorí judíuai illaicomina uaiduanona, naimacimo Cristo raillamie jeiciana jicanote. ⁵ Uai otimaci:

—Judea railla eniruemo. Belémo. Iena Jusiñamui facaina micorídi jaie cuega:

⁶ Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla comina sedaite.

Iemona Belén nairai Judea illaicomini baifemo faite

cuega. ⁷ Iena cacaja mei, Herodes micorídi monamo ite ramo comeciaina facauidino bainino uaidote. Naie ucudu bairia facaise raise uiñollena jicanote.

⁸ Naimacina Belémo orede. Llote:

—Naie uruena raise jeno. Naimiena omoi cúa mei, cuemo lluaibi, naimie dine cue jaillesa. Naimiemo iobillacinona jiai fecaacadicue —llote.

—Jii —fairiotimaci. ⁹⁻¹⁰ Iena naimie micorí llua mei, jaidimaci. U cuduna naimaci dane cuamona, eo iobidimaci. Naimaci cúa ucududi naimacina ifuanona, monamo naie urue afemo ride. ¹¹ Fo jaillano uruena, ie ei María diga, ciodimaci. Naimiemo iobillacinona fecallena, caiñici ifodona rainadatimaci. Naimaci bolsas sebiñuanona, naimiemo rana jamai fecadimaci. Oro fecadimaci. Caimare sorirede rana jiai fecadimaci.

¹² Naimaci inia anamo naimaci nicairillanona, Jusiñamui llote:

—Herodes dine abido jaiño —llote. Ie jira Jerusalémo jaiño abido naimaci eniruemo jaidimaci.

Egiptomo Jesús jailla rafue

¹³ Naimaci jailla mei, José micorí inia anamo nicairite. Nicairillanona, Jusiñamui jaienici naimiemo bairiano raite:

—Egiptomo nai o urue diga, ie ei diga, mai jai. Omo cue llua dinori nainomo i. O abido billirui lloiticue. Herodedi nai uruena jenoite, naimiena meinellena —raite.

¹⁴ José micori raire casillano, nai urue diga, Jesús ei diga, Egiptomo naiona jaide. ¹⁵ Herodes micori fiodable dinori nainomo ite. Ie muidona Jusiñamui ie facaina lloraima micori llotataga uai jai suide. Jaie lloga: “Egiptomona cue Jitona jai uaidoticue”.

Mena años itisaia dierisedena faia rafue

¹⁶ Egiptomo Jesús jaillana Herodes micori fidiñede. Monamo ite ramo comeciaina facauidino naimaci eniruemo abido jaillana naimie micori jiai fidiñede. Naimie micori dine naimaci abido biñena jira, naimie micorina naimaci jifua jira, naimie micori eo icirite. Ie jira mena años itisaia dierisedena faetate. Nana Belémo ite isaia diese faetate. Belén ecimo itino uruaina jiai faetate. Naie ucudu mena años jaie nano bairena jira, mena años itisaia dierisedena faetate. ¹⁷ Raquel micori jaie eia isoi, Belén itino birui eedimaci. Jeremías micori iena jaie cueda:

¹⁸ Ramá railla nairai dinena Raquel micori eo eiana cacadicue.

Cai usuño Raquel micori eede.

Naiñaiño micori uruiai micoriai facaina eede.

Jiaie cominimona firaduacinona jitañede, naiñaiño uruiai micoriai jai fiodable jira.

¹⁹ Digarui illanona, Herodes micori fiodable mei, Egiptomo José micori dane nicairillanona, Jusiñamui jaienici naimiemo bairede. ²⁰ Llote:

—O comini eniruemo na o urue diga, ie ei diga, abido mai jai. Nai o uruena meineiacadimie jai fiodaite.

²¹ Ie jira ie eniruemo naie urue diga, ie ei diga, abido jaide. ²² Herodes micori jitodi ie moo ifomo jai illana José micori fidiano, jaciruite. Herodes micori jito mamecidi Arquelao. Nainomo José jaiacaiñede. José micori dane nicairillanona, Jusiñamuidi Galilea railla eniruemo naimie jaillana naimiemo llote. ²³ Nazaret railla nairai dine jaide, nainomo illena. Iemona Jusiñamui facaina lloraini micoriai jaie cuedafua jai suide. Cristona jaie cuetimaci: “Naimiedi Nazaret imie”.

3

Jofue iñenanomo Juan Bautista micori illa rafue

(Mr 1.1-8; Lc 3.1-9, 15-17; Jn 1.19-28)

¹ Diga años illanona, Juan Bautista raillamie micoridi jofue iñenanomo illanona, cominina dafaifia, Jusiñamui rafuena naimacina llofueuide. ² Comini naimie micori dine billanona, naimacimo llote:

—Omoi jeacinona fainonocaida, omoi comeciai iuailai meido. Jusiñamui dibeimo omoi i. Naimie anamo omoi illana naimie jitailla jira, omoi iena lloiticue —llote. ³ Isaías micoridi Jusiñamui facaina lloraima. Juan Bautista micori nia iñenia, Isaías micoridi naimie micorina jaie cuede:

Jofue iñenanomo damie jidai-jidaillana cacadicue.

Naimie llote: “Cai Nama biite.

Naimie naiso atona raise fino” llote.

Iese llote; iadedi naimie uaina naimaci feiñollena, naimaci comeciai marena finuana ñaite. ⁴ Juan micoridi camello itiraiaie ie nilla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite. ⁵ Diga comini naimie micori dine jai jaisoidimaci. Jerusalémona, nana Judeamona, nana Jordán fuemona jai jaisoidimaci. ⁶ Jusiñamuimo naimaci jeacinona naimaci llua meino, naimacidi Juan micori bautizaga. ⁷ Bautizallena, diga

fariseuai, diga saduceuai, naimie micori dine bitimaci; iadedi naimaci billana naimie micori ciuano llote:

—Maraiñede rafuena finocana omoi jailla jira, jaio nairai isoidomoi. ¿Niese Jusiñamui rícaillifuemona jilloitomoi? Cue dine omoi billena, ¿bu omoi mo llua? ⁸ Omoi comeciai iuailai meido. Omoi jeacinona fañonocai. Iemona Jusiñamui jitaillacinona fino. Mare rafuena finocana jai. Naiemona omoi comeciai iuailai meiduana uiñoiticaí. Ie mei omoi bautizallomoi. ⁹ Omoi comeciaina facañeno: “¿Bue ñellena o llua isoi finoiticaí? Jusiñamui Abraham micorina jaie eo raise nabaide. Abraham micori cai moo illamona, Jusiñamui rícaillifuemona jilloiticaí”. Ero, omoi mo lloiticue: Cue llua isoi omoi finoñenia, naimie rícaillifuemona jilloñeitomoi. Abraham micori uruiadomoi; iadedi Jusiñamui jitaillacinodo jaiacañedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comuitarede. ¹⁰ Ero, llisiñede riarar tiedomoi. Tíia mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoi na jai duere finoacade. Ie rícaillafue anamo jai itomoi. Omoi comeciai iuai omoi meidoñenia, omoi na duere finoite. ¹¹ Jusiñamui díbeimo omoi comeciai iuai omoi meidoia, jínui diga omoi na bautizaiticue. Cue baífemo faítimie bie facaise biite. Naimie cue ifo meidoite. Jamai bue cue isoilla jira, naimiena cue canuana uiñoñedicue. Naimie bia, naimie díbeimo omoi jaillamona, Jusiñamui Joreño omoi mo itataite. Omoi comeciai iuai omoi meidoñenia, omoi na duere finoite. ¹² Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, comeciai iuailai meidotinona ie moo illanomo naimiedi ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

Jesús bautizaja rafue

(Mr 1.9-11; Lc 3.21-22)

¹³ Juan micori Jordán dine nia ia, Galileamona Jesús bite. Naimiena bautizallena, Juan micori dine bite. ¹⁴ Juan dinena naimiemo llote:

—Bautizallena cuemo bitio; ia dama ite. Cuen a o bautizaia, cuemona mare.

¹⁵ Jesús uai ote:

—Cuen a mai o bautiza. Nana Jusiñamui jitailla rafue coco finoia, mare.

Juan:

—Jee —raite. Ie facaise naimiena bautizade. ¹⁶ Jesús bautizaja mei, jínui mona bite. Mona bojodena ciode. Jusiñamui Joreño, ucugi isoi, naimie emodomo ana billana ciode. ¹⁷ Ie facaise monamona Jusiñamui llote:

—Bimie cue eo isirui ga Jito. Naimieri iobidicue.

4

Jesúna Taife ramo faia rafue

(Mr 1.12-13; Lc 4.1-13)

¹ Naie facaise nainomo naimiena ramo Taife faillena, jofue iñenanomo Jusiñamui Joreño Jesúna uite. ² Cuarenta dígarui Jesús guiñede. Naie facaise fuilla mei, guiñeno illamona, aimetaite. ³ Ie facaise Taife naimie dine bite. Jesús aimetaillana naimie uiñuamona llote:

—Jusiñamui Jitodiodena, naimiemo llono: “Ore Moo, cue guillesa, bie nofici llomenicon a jaita”. ⁴ Jesús uai ote:

—Dama ite. O llua na finoñeiticue. Jusiñamui facaina lloraíma micori iena jaie cueda: “Jiaie rafuedi llomenico guilla baífemo faite. Dama guillemo

comecina facañeno; iadedi Jusiñamui lloga uaimo cai começi facajamona, ie uaido cai jailla” cuega.

⁵ Ie mei Jerusalémo Jusiñamui jofo muidomo Taife Jesúsna uite. ⁶ Raite:

—Jusiñamui Jitodiødena, eniruemo mai ana uai. David micori ona jaie cuega:

Ona eenollena, Jusiñamuidi ie jaienisaimo lloite.

Eniruemo o uaiñellena, o abi bofedaiñellena, ona feiñoitimaci cuega. Naie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

⁷ Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uiñoiticue. Jamai ebena naimiena facaciñeiticue. O llwana finoñeiticue.

⁸ Ie mei a ite anedumo Taife naimiena uite, naie anedumona nana nairaiaina cioillena. Naie nairaiái eo ebire eruaiide. ⁹ Naimiemo llote:

—Nana bie nairaiái cue anamo birui illamona, cuena o sedaia, nana bie nairaiái omo iiticue. O caiñici ifodo ana rainada, cuemo iobillacino o fecallena.

¹⁰ Jesús uai ote:

—Dama ite. Ona sedañeiticue. Ie cominimo Moisés micori jaie cuega: “Cai Nama Jusiñamuina seda. Dama naimiemo iobillacinona feca”. Taife, mai cuemona oni jai. ¹¹ —Ie facaise naimiemonona Taife jaide. Naimie jailla mei, Jusiñamui jaienisai Jesús dine bitimaci. Naimiena ecallena bitimaci.

Galileamo Jesús illa rafue (Mr 1.14-15; Lc 4.14-15)

¹² Naie facaise Juan Bautista micorina Herodes gaitajana naimie fidiano, Galilea railla eniruemo Nazaretmo Jesús jaide. ¹³ Nainomo rilla mei, Capernaumo jaide. Capernaum nairai jorai fuemo ite. Nainomo Zabulón railla enirue ite. Neftalí railla enirue jiai ite. ¹⁴ Nainomo Jesús jailla jira, Isaías micori jaie cuezafuiai jai suide. ¹⁵ Naimie micori naie cominina jaie cuega: Bie eniruemo diga nairai ite.

Zabulón ite. Neftalí ite.

Monailai fuemo nairai ite. Jordán ruicafebeimo nairai ite.

Galileamo nairai jiai ite. Nainomo judíuaiñedino jai itimaci.

¹⁶ Jeacino anamo naimaci illamona, naga naie eniruemo ite comini jitiredinomo itimaci isoidimaci

Jusiñamuina uiñoñeno fiodaicana jaidimaci; iadedi eo mare rafue birui ca-caitimaci.

Naie rafue naimaci começaina lligaiñoite. Naie rafuena uitimie bairenite cuega. Jusiñamuina naimaci uiñoñena jira, naimacina iese cuega. Jesús nainomo birui llofuia jira, mare rafuena jai cacadimaci. ¹⁷ Galileamo rilla mei, Jesús llocana jaide. Llofuate:

—Jusiñamui dibeimo illena, omoi jeacinona fañonocaida, omoi começiai iuaina meido. Ie cominina omoi jaillena birui jitaide.

Ie llofueoicaiganona jaillena, Jesúsdi nagaamagamiena fetua rafue (Mr 1.16-20; Lc 5.1-11)

¹⁸ Jiairuido Galilea railla jorai fuemo Jesús macaritemo, menamiena ciode. Naga ie ama iaiaiaiai. Damie Simón. Jiaici naimie mameçidi Pedro. Ie ama Andrés diga ite. Lloijina fairaima iaiaiaiai. Iese jaca naie iaiaiaiaidi maijuidiaiaiaiai. ¹⁹ Iaiaiaiamo llote:

—Cue diga omico jaiocaillena, cue diga mai bi. Cue llofueganona omico jaillena jitaídícue. Lliciaína birui ocabítomíco; iadedí comínina oítomíco, cue díbeimo naimací illena.

²⁰ Iena cacajanona, ieconi iaímaiaí llojina fainonocaida, naimíe diga jaidíiaímaiaí. Ie llofueganona jaillena, jaidíiaímaiaí. ²¹ Lliaí baí Jesús jaidemo, jiaíe menamiéna cíode. Naga íe ama íaímaiaí. Damíe Jacobo. Jiaímíe Juan Íaímaiaí moodí Zebedeo. Naimíe diga botemo itíiaímaiaí. Llojina sigaidímáci. Jesús íaímaiaína uaidote, naimíe llofueganona jaillena. ²² Ieconi íaímaiaí mooná fainonocaida, botemona arí billanona, Jesús diga jaidíiaímaiaí.

*Jesús ailluena comínina llofua rafue
(Lc 6.17-19)*

²³ Nana Galileamo Jesús jaide. Judíuaí ofiracuáimo llofueuide. Naimíe anamo comíní illana Jusiñamuí jitaílla jira, Jesúsdí Jusiñamuí díbeimo naimací comeciaí íuaina meiduana llofúete. Ie comínina naimací illena llofúete. Naga isoide duiconá duidínona jillótate. ²⁴ Iemona nana Siria raílla eníruemo naimíe mamecí soríde. Naíe comíní naga isoide duiconá duidínona naimíe díne atídímáci. Abí ísiredínona atídímáci. Jananíaí anamo ílla comínina atídímáci. Naíllidínona atídímáci. Niráidanidínona atídímáci. Nana naimacína jillótate. ²⁵ Ailluena comíní naimíena racadímáci. Galileamona, Decápolimona, Jerusalémóna, Judeamona, Jordán ruica díbeimona comíní bitímáci.

5

*Anedumo naimíe ía, Jesús lloga rafue
(Lc 6.20-23)*

¹⁻² Ailluena comínina Jesúsna racadímáci. Naimacína Jesús cíuanona, aneduo muidomo jaide. Ie llofueoícaígano naimíe diga jaidímáci. Nainomo ana raíta, Jesús naimacímó llote:

—Omoína Jusiñamuí íe comínina sedaacána rafuena ja llofueítícue. Naimíe anamo naimací illena llofueítícue. ³ Ero, Jusiñamuí naimíena jitaídínona sedaíte. Comeciaína facadímáci: “Naimíe jitaíllacínona daní fínónídícaí; ía naimíe cáina canuanona, íena fínóítícaí”. Naimíe comínina naíe ísoídíno íllamona, naimíe naimacína canoíte. Iemona cáimare íítímáci. ⁴ Jusiñamuí sunaitínona sedaíte. Ailluena comíní jeacínó fínocána jaidímáci. Iena uíñuamona, damíerie sunaitímáci. Naimíe comínina naíe ísoídíno íllamona, Jusiñamuí naimací comeciaína ocuíñótáite. Iemona cáimare íítímáci. ⁵ Jusiñamuí abína íedoñédínona sedaíte. Naimíe comínina naíe ísoídíno íllamona, Jusiñamuí nana enírué naimacímó íite. Eníruemo comínina íco cue sedaía, íese íite. Iemona cáimare íítímáci. ⁶ Jusiñamuí naimíe jitaíllacínó fínodínona sedaíte. Jusiñamuí mare rafuena naimací fínuaína canoíte. Iemona cáimare íítímáci. ⁷ Jusiñamuí comínina duenaitínona sedaíte. Naimacína naimíe duenaíllamona, Jusiñamuí naimacína íco duere fínóñeíte. Iemona cáimare íítímáci. ⁸ Jusiñamuí jeaníde comecíredínona sedaíte. Naimíe comínina naíe ísoídíno íllamona, naimíe diga jaca íítímáci. Iemona cáimare íítímáci. ⁹ Jusiñamuí naimíe diga urí ítínona sedaíte. Naimíe comínina naíe ísoídíno íllamona, jiaíe comínina urí ítataítímáci. Naíe ísoídíno naimíe comínina jaca mamecírenítímáci. Iemona cáimare íítímáci. ¹⁰ Jusiñamuí jitaíllacínona fínuaína, damíerie duere sefúítímáci. Jusiñamuí naíe ísoídínona sedaíte. Naimíe comínina naimací íllamona, naimíe sedajanomo jaca jaínaíatímáci. Iemona cáimare íítímáci. ¹¹ Cuemo omóí duía, duere sefúítomóí. Jiaíe comíní omóína jeare ñaítímáci. Omóína duere

finoitimaci. Omoï joreña tainona lloitimaci. Duere sefuitomoi; iadedi Jusiñamui omoïna caimare itataite. ¹² Omoï isoi omoï jaiagaimona Jusiñamui facaina lloraini micoriai jaie duere sefuidimaci. Iena omoï uiñuamona, monamo Jusiñamuimona ailluena ibana ico omoï feiñua jira, birui omoï duere sefuia, iocire omoï jai.

Jesús comini illa rafue
(Mr 9.50; Lc 14.34-35)

¹³ Jesús llote:

—Jusiñamui ie cominina sedaacalle rafue nia llofueiticue. Llicisi rifaia, jai marañede. Iena rifaiñellena, llicisimo sal joneticai. Sal isidomoi. Jusiñamui jitailla isoi omoï illamona, jaie comini marañede rafuena eo finoñedimaci. Sal ie caimano jai iñenia, ¿niese dane nibaiamona caimarenite? Jai marañede. Jitaiñena jira, iena oni faiga. Ie isoide. Jusiñamui jitailla isoi omoï iñenia, naimie omoïna duere finoite.

¹⁴ 'Cuemo omoï duilla jira, jaie cominina Jusiñamuina omoï uiñotajamona, lligaiñora isidomoi. Anedumo ite nairai jaca bairede. Ie illanona jaca uiñoticaï. Jusiñamui jitailla isoi omoï illamona, jaie comini naimiena uiñoitimaci. ¹⁵ Lamparín unia mei, cirigai anamo buna rainañega. Jaca ie rainarafomo rainaca, nana jofo jeraina lligaiñollena. ¹⁶ Ie isoide. Cue rafuena jamaiñeno; iadedi omoï marena illamona, cominina Jusiñamuina uiñota. Omoï marena illamona, comini omoï mare finoca rafuena uiñoitimaci. Iemona: "Jusiñamui maremiēna" raitimaci.

Jesúdi Moisés micorina llofuia rafue

¹⁷ Jesús llote:

—Jusiñamui ie cominina sedaacalle rafue nia llofueiticue. Iena cue llofuia jira, omoïmona damerie comecina facade: "Bimie Moisés micori lloga rafuedo jaiñede". Ero: "Moisés micori llogacinuai marañede" raiñedicue. "Jusiñamui facaina lloraini micoriai jaie llogacinuai marañede" jiai raiñedicue; iadedi omoïna naie llogacinaina raise uiñotaacadie. ¹⁸ Biero omoï comeciaina faca. Mona, enirue diga, nia ia, nana naie llogacinuai jaca suite. ¹⁹ Omoï einamacï raitimaci: "Dajerie llogacino jaie llogacino baifemo faite". Cue raiticue: Naga llogacino omoï ñnoñenia, naga omoï llofueñenia, nana Jusiñamui jitaillacinona finoñedomoi. ²⁰ Ero, Jusiñamui jitailla rafuedo judíuai illaicomini baifemo omoï jaiñenia, Jusiñamui sedajanomo jaca iñeitomoi. Naimaci naie jaie llogacinuai uiñoitimaci; iadedi naimaci comeciari Jusiñamui dibeimo iñedimaci.

Jesúdi iciriñena llofuia rafue
(Lc 12.57-59)

²¹ Jesús llote:

—Omoï llofuerañimona bie jai cacadomoi. Moisés micori omoï jaiagaimo llote: "Comena meineñeno. Comena bu meineia, jeacino jai finode. Naimie fiodaillena juez llua". ²² Naie llogacino jai jaicabidomoi. Omoïmo birui jaie rafue lloiticue. Jiaimie diga bu iciria, jeacino jai finode. Naimie duere sefuillena, juez dine naimie uiga. Jiaimiena bu jeare ñaia, jeacino jai finode. Naimie duere sefuillena, illaicomini dine naimie uiga. Jiaimiena bu faidoia, jeacino jai finode. Jusiñamui naimiena duere finoite. Iraimo jaite.

²³⁻²⁴ 'Jerusalémo Jusiñamui jofomo omoï jeacino facaina naimiemo ra fecallena omoï jaia, omoï comini diga uri nano i. Jiaimie omoï diga icirillana omoï uibiñoia, omoï ra fañonocaida, naimie dine nano mai jai. Naie rafue raise finollena, naimie dine jai. Ie mei Jusiñamuimo omoï rana feca.

²⁵ Omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina oretaite. ²⁶ Nana raise ibañenia, juez llua isoi, jino jaiñeitomoi. Iese omoimo suiñellena, jiaimie diga rafuena comuitañeno. Jeacino finoñellena, jiaimie diga iciriñeno.

Jesúdi iima ie aiñede riño diga illa llua rafue

²⁷ Jesús llote:

—Omoi llofuerañimona bie jai cacadomoi. Moisés micori jaie llote: “Omoi aiñede riñoniai diga iñeno. Omoi iniñede iñiaai diga iñeno”. “Iena bu finoia, jeacino jai finode” raitomoi. ²⁸ Jiaie rafue birui lloiticue. Ie aiñede riñomo eruaillamona naiñaiñona bu nicidoia, naiñaiño diga jamai iniacananona naimie comeci facajamona, jeacino jai finode. Naiñaiño diga iñede; ia naiñaiño diga jamai iniacananona naimie comeci facajamona, jeacino jai finode. ²⁹⁻³⁰ Biena ñaiticue. Nie isoide rafue omoina jeacino finotaia, iemo eruañeno. Iena linoñeno. Iemo comecina facañeno. Omoi cúa rana jira, omoi jitaillamona jeacino finodomoi. Rana omoi jetaja jira, omoi jitaillamona jeacino finodomoi. Omoi abina omoi namatañenia, omoi uisina juicono. Omoi onolli jaita. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jeacino finoñeno.

Jesúdi iima ie aina dotaja llua rafue

(Mt 19.9; Mr 10.11-12; Lc 16.18)

³¹ Jesús llote:

—Omoi llofuerañimona bie jai cacadomoi. Moisés micori jaie llote: “Ie aina bu dotaacania, naiñaiñomo dotajacanabena fecaja”. Iedo jai jaicabidomoi. Iena bu finoia, omoimona mare. ³² Jiaie rafue birui lloiticue. Jiaimie diga naiñaiño iñenia, ie aina bu dotajia, maraiñede. Jiairuido jiaimie diga naiñaiño ia, nanodi ie ini muidona naiñaiño jeacino jai finode. Dotaca riñona ie aina illena bu ua mei, naimiedi jeacinona jai finode. Jeacino finoñellena, aina dotañeno.

Jesúdi Jusiñamui mameci jamai ebena linoñenana llua rafue

³³⁻³⁵ Jesús llote:

—Omoi llofuerañimona bie jai cacadomoi. Moisés micori omoi jaiagaimo llote: “Taino lloñeno; ia Jusiñamuimo omoi lloga uaina fino”. Iedo jai jaicabidomoi. Omoi lloga uai omoi finollena jiaie comini uiñollena, Jusiñamui mamecina llinotomoi. “Iena cai linoia, cai lloga uaina cai finoñenia, Jusiñamui caina duere finoite” raitomoi. Jusiñamui mameci omoi linoñenia, omoi lloga uai omoi finoñenia, omoimona mare. “Jusiñamui caina duere finoñeite” raitomoi. Iemono monamo ite ra mamecina jamai ebena llinotomoi. Eniruemo ite ra mamecina jamai ebena llinotomoi. Jerusalén railla nairai mamecina jamai ebena llinotomoi. Omoi ifogi mamecina jamai ebena jiai llinotomoi. Jusiñamui mamecina jamai ebena linoñedomoi; ia jiaie ra mamecina jamai ebena llinotomoi. Ero, monamo ite ra mamecina omoi linoia, Jusiñamui mamecina jiai llinotomoi, nainomo ie illano illa jira. Eniruemo ite ra mameci omoi linoia, iena Jusiñamui finua jira, iena naimie sedaja jira, naimie mamecina jiai llinotomoi. Jerusalén railla nairai mamecina omoi linoia, Jerusalén naimie nairaina jira, naimie mamecina jiai llinotomoi. ³⁶ Omoi jitirede ifotiraina usere omoi jaitanina jira, omoi userede ifotiraina jitire omoi jaitanina jira, omoi ifogi mameci jiai linoñeno. Dama Jusiñamui iena usere itataja jira, dama naimie iena jitire itataja jira, ifotirai mamecina omoi linoia,

Jusiñamui mamecina jiai llinotomoi. ³⁷ Ie jira Jusiñamui mameci jamai ebena llinoñeno. Jiaie ra mameci jamai ebena llinoñeno; iadedi nie isoide rafuena omoi finoia, omoi lloga uaina taino lloñeno fino. Uanaicinona jaca lloño. Uanaicinona omoi lloñenia, Taifemona omoi uaina otomoi.

Jesúdi iba oñenana llofuia rafue
(Lc 6.29-30)

³⁸ Jesús llote:

—Omoi llofuerañimona bie jai cacadomoi. Moisés micori jiaie llote: “Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni tainoia, juez naimie isidona oni tainuana llua. Jiaimie ona duere finoia, o duere sefuilla isoi, juez naimiena duere finua”. Iedo birui jai jaicabidomoi; ³⁹ iadedi birui omoimo lloticue: Ibana oñeno. Maraiñede rafue finodimimona omoi abina riidoñeno. Omoi cacaina naimie dutaia, naimie diga iciriñeno. Enefebeimo omoi uieco dobaiño, enefebei omoina naimie dutallesa. Naimie omoina duere finoia, ibana oñeno. ⁴⁰ Omoi iniroi bairollena omoina bu llogidoia, juez nia omoimo lloñenia, naimie jitailla iniroi baifemo naimiemo feca. ⁴¹ Daje kilómetro naimaci raruaia omoina uillana illacomini ocua, iena uiño. Nibai omoi comeci jitañede; ia naimacina canollena, iena mena kilómetros uiño. Naimaci ocuilla baifemo uiño. ⁴² Omoimo ite rana bu jicaia, iena caidiñeno. Omoi rana bu jamai jicuaño uia, abido atillena, iena caidiñeno feca.

Jesúdi omoina gaiñenano isiruillena llua rafue
(Lc 6.27-28, 32-36)

⁴³ Jesús llote:

—Omoi llofuerañimona bie jai cacadomoi. Llotimaci: “Omoi cominina isirui; iadedi omoi nairaiñedinona enoi”. Iedo jai jaicabidomoi. ⁴⁴ Omoimo birui lloticue: Omoi nairaiñedinona isirui. Omoi gaiñenanona isirui. Omoina duere finodino facaina Jusiñamuimo jii. Naimaci comeci iuai meiduana naimiemo jicano. ⁴⁵ Jusiñamui cominina omoi illamona, naimaci facaina jii. Ero, Jusiñamui nana cominina daje isoi canode. Nana cominina daje isoi isiruilla jira, naimiedi jitomana maraiñedinona lligaiñotade. Mareuidinona jiai lligaiñotade. Maraiñedino dine noci deitate. Mareuidino dine jiai noci deitate. ⁴⁶ Naimie comini omoi illamona, nana comini daje isoi isirui. Omoina isiruitinona omoi isiruia, mare; iadedi omoina gaiñenanona omoi isiruiñenia, Jusiñamui omoina: “Mare” raiñeite. Maraiñede finoraini naimacina isiruitinona isiruitimaci. Nana cominina omoi isiruiñenia, maraiñede finoraini baifemo faiñedomoi. Naimaci isoi itomoi. ⁴⁷ Dani omoi cominina omoi uaidoia, mare; ia omoina gaiñenanona omoi uaidoñenia, naimaci baifemo faiñedomoi. Jusiñamuina iinoñedino baifemo faiñedomoi. Naimaci isoi itomoi. ⁴⁸ Iena omoi uiñuamona, omoi Moo Jusiñamui finua isoi, mare rafuena finocana omoi jai.

6

Jesúdi mare rafue finuana llua rafue

¹ Jesús llote:

—Omoina nia llofueiticue. Jiaie comini iena cioillena, mare rafuena omoi finoiadedi, omoina: “Mareuidinodimaci” naimaci raillena, Jusiñamuimona ibana feiñoñeitomoi. Ie jira mare rafuena finoñeno, iena jiaie comini jamai cioillena. Iena ja ñaiticue. ² Dueredinomo rana omoi jamai fecaia, iena uainino feca. Jiaie cominimona iobillacinona omoi feiñollena, iena fecañeno. Ofiracomo maredinona abi caitadino isoi omoi iñeno. Naisomo maredino

abi caitadino isoi iñeno. Iena comini cioillena, dueredinomo rana marefodo fecacabidimaci. Cominimona naimaci iobillacino birui jai feiñotimaci. Jusiñamuimona ico feiñoñeitimaci. ³ Dueredinomo rana omoi fecaia, jiaie cominimo iena lloñeno. ⁴ Iena bainino feca. Bainino iena omoi fecaia, Jusiñamui iena uiñote. Naimiemona ibana feiñoitomoí. Omoína: “Mare” raite.

*Jesús Jusiñamuimo jüa rafue
(Lc 11.2-4)*

⁵ Jesús llote:

—Jusiñamuimo omoi jüia, maredinona abi caitadino isoi omoi iñeno. Ofiracomo naimacina comini cioillena, marefodo jüidimaci. Jüicabilla fa-
caiseconi naisomo naimaci ia, naimacina comini cioillena, marefodo jiaie
jüidimaci. Naimacina: “Jusiñamuina eo sedadimaci” comini raillana ji-
taidimaci. Cominimona iobillacinona birui jai feiñotimaci. ⁶ Omoi jüacania,
omoi jofomo fo jai. Nainomo Jusiñamuimo anado omoi jüi. Iena Jusiñamui
uiñuamona, omoi jicaca rafue naimiemona feiñoitomoí.

⁷ Jusiñamuimo omoi jüia, naimiena ünoñedino isoi jamaicinona ñaiñeno.
Naimaci comecina facadimaci: “Daje jüiracinona diga icaiño cai jüa jira, ja
muidomo cai Moo caína raise cacaita”. ⁸ Naimaci isoi iñeno. Nia omoi
jicañenia, naimie omoi jitaillé rafuena uiñote. ⁹ Naimiemo omoi jüacania, iese
jüi:

Ore Moo, monamo itio.

Comini ori iobidesa.

¹⁰ O illaimana jira, nana cominina o anamo raire itata.

O jaienisaí o jitaillacinona finua isoi, cominina o jitaillacinona finota.

¹¹ Nagarui guille caimo itata.

¹² Caína jeare jiaíno finoia, iena caimona feilla isoi, cai jeacinona omona feilla
jira, cai jeacinona oni dota.

¹³ Caimo ramo bu faia, caína cano, iena cai ünoi raillano. Jeacinona
finuamona caína jillota.

Iese omoi jüi. ¹⁴ Omoína jiaie comini jeare finoia, iena omoi feitaia, omoi
monamo ite Moo omoi jeacinona iena faitajanona, jiaie oni dotaite; ¹⁵ iadedi
jiaie comini finoca jeacinona omoi feitañenia, omoi Moo Jusiñamui omoi
jeacinona feitañeite. Iena oni dotañeite.

Jesús guiñenaruina llua rafue

¹⁶ Jesús llote:

—Omoína nia llofueiticue. Raitomoí: “Jusiñamuina eo raise cai seda-
janona, birui cai guiñeiticai. Iemona naimie caína eo duenaite” raitomoí.
Iese Jusiñamuina omoi sedajia, sunaiñeno, mareuidinona abi caitadino isoi.
Sunaitimaci. Naimaci uieco finobicabiside. Naimaci guiñenarui facaise
illana comini uiñollena, naimacina comini cioillena, iese itimaci. Naimacina:
“Mare” comini raillamona, iobillacinona birui jai feiñotimaci. Jusiñamuimona
ico iena feiñoñeitimaci. ¹⁷ Ero, naimaci isoi omoi iñeno; iadedi omoi
guiñenarui ia, omoi abiaí raise fino. ¹⁸ Iemei cominidi omoi guiñenarui illana
uiñoñeitimaci. Naimacimona iobillacinona feiñoñeitomoí. Dama Jusiñamui
iena uiñoite. Bainino omoi finoca rafue naimie uiñua jira, naimiemona iba
feiñoitomoí.

*Jesúdi Jusiñamuimo comecina facaja rafue
(Lc 12.33-34)*

¹⁹ Jesús llote:

—Omoï jofomo ailluena rana eenocana uiñeno. Giireco iena guicabite. Dajerie ra nemuide. Omoï jofomona jiaie comini iena fiacadimaci. Ailluena ra eenuamo omoï comeciaina facañeno; ²⁰ iadedi Jusiñamui dine monamo omoï ra illa isoi, iemo omoï comeciaina faca. Naimiemo comeciaina cai facajamona, nainomo cai iobillacino iite. Giirecuaimona, nemuillamona, firirainimona, iena nainomo faifiñeitomoi. ²¹ Aillue ra omoïmo ia, Jusiñamuimo comeciaina facañedomoi; iadedi naimie jitaillacinona omoï finoia, naimiemo comeciaina facadomoi.

Jesús cai comeciina llua rafue

(Lc 11.34-36)

²²⁻²³ Jesús llote:

—Cai uisi diga rana ciodicai. Cai uisi marañenia, rana raise cioññedicai. Ie isoide. Cai comeci marañenia, maraññedinona finocana jaidicai. Jusiñamuina uiññedicai. Ie rafuena jiaï uiññedicai. Naimiena nabaiññedicai.

Jesús raruiaina llua rafue

(Lc 16.13)

²⁴ Jesús llote:

—Mena patrones diga daruido buna jaca maijinide. Mena diga bu maijiacania, damiena jiaimie baiñfemo gaiite. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiaï ollemo comeciina omoï eo facaia, Jusiñamui jitaillacinomo comeciina raise facañeitomoi.

Jesúdi Jusiñamui cai sedajana llua rafue

(Lc 12.22-31)

²⁵ Jesús llote:

—Jusiñamui jitaillacinomo omoï comeciina facaia, omoï illamo omoï comeciina jarire facañeitomoi. Bue omoï guillemo jarire comeciina facañeno. Omoï jitalle iniroimo jarire comeciina facañeno. Jusiñamui omoïna itataja muidona, guille omoïmo iite. Naimie omoï abi finua muidona, iniroidi omoïmo iite. ²⁶ Silliñaimo comeciina faca. Buena riññedimaci. Nie isoide guillena eenoññedimaci; iadedi omoï Moo Jusiñamui naimacina sedajamona, naimaci guille ite. Naimaci baiñfemo omoï faia jira, naimie omoïna canoite. ²⁷ Omoïmona, ¿bu ie comeci jarire facajamona a sairite? Iese jaca buna a sairine. Dama Jusiñamui omoïna a sairitarede. ²⁸ ¿Bue ñellena iniroimo jarire comeciina facadomoi? Safiamo omoï comeciina faca. ¿Niese sicodimaci? Maiññedimaci. Iniroina tifornedimaci; ²⁹ iadedi Salomón micori naimaci isoi jaie iñede. Naimie illaimana jira, naimie micori iniroi eo ebirede; iadedi safia naimie iniroi baiñfemo ebire eruaide. ³⁰ Jusiñamui safiana ebiretacabide. Dallu facaise illanona, safiadi duide. Safia baiñfemo omoï uaila jira, Jusiñamuidi iniroina omoïmo jaca iite. Safiana naimiedi ebiretaja muidona, omoïmo iniroidi jaca iite. Omoï ra omoïmo illena, naimiena ñno. ³¹ Omoï comeci jarire finoñeno. “¿Buena guiticai? ¿Buena jitaíticai?” raiñeno. Iemo comeciaina eo facañeno. ³² Jusinamuina ñnoñedino iemo comeciina facacabidimaci. Nana omoï jitaillacinona omoï Moodi uiñua jira, naimaci isoi iñeno. ³³ Jusiñamui anamo raise omoï i. Naimie jitaillacinona finocana omoï jai. Naimiemo omoï comeci facaia, omoï illamo omoï comeciina jarire facañeitomoi. Iemona guille omoïmo iite. Iniroi omoïmo iite. ³⁴ Jusiñamui omoï birui jitailla ra omoïmo iite. Iena uiñuamona, jiairuido sulle rafuemo jarire comeciina facañeno. Ico omoï jitailla ra omoïmo jiaï iite.

7

*Jesúdi jiaie cominina mameriñenana llua rafue**(Lc 6.37-38, 41-42)*¹ Jesús llote:

—Omoína nia llofueiacadicue. Jiaie cominina mameriñeno. Jiaie cominina omoí mameria, omoímo ite maraiñede rafue facaina Jusiñamui omoína duere finoite. ² Jiaie cominina omoí mamerilla diese Jusiñamui omoína duere finoite. ³ Omoí ecimo itimiemo janore maraiñedicino illana omoí uiñoia, iemo comecina facañeno; iadedi omoímo ailluena ite maraiñedicinomo nano omoí comecina faca. ⁴ Omoímo maraiñedicino illamona, ¿niese omoí ecimo itimiema mameritomoí? ⁵ Omoímo ite maraiñedicinomo omoí comecina facacaiñena jira, maredinona abi caitadinodomoí. Omoí comeciaina nano raise fino. Iemei omoí ecimo itimiema canorenitomoí. Naimie comecina raise canorenitomoí.

⁶ 'Ero, eo mare rana omoí jiconiaimo fecañeno. Eo raifide rana omoí chanchuaimo fecañeno. Naimacimo omoí fecaiadedi, iena feiñoñeitimaci. Omoína gaiñenamona, jiconiai omoína ainitimaci. Chanchuai iena jamaillamona, iena saitaítimaci. Ie isoide. Damierie Jusiñamui uaina uaitacabitimaci. Iena naimaci jaca feiñoñena jira, naie rafue naimacimo llocabiñeno. Naimacimo omoí llocabia, omoína duere finoítimaci. Omoí rafuena jamaitimaci.

*Jesúdi cai jitailla ra jicaja llua rafue**(Lc 6.31; 11.9-13)*⁷⁻⁸ Jesús llote:

—Daje ra omoí faifia, iena jenodomoí. Raise jenoia, iena baitomoí. Damiena omoí jenoia, naimie illanomo jaidomoí. Nainomo naimiena baillamona, omoína feiñoite. Ie isoide. Buena omoí jitaia, Jusiñamuimo jica. Iena omoí jicaja jira, iena naimie cacajamona, omoímo iite. ⁹ Ero, omoímona naimiemo llomenicono ie moomo ie jito jicaia, noficina fecañede. ¹⁰ Lliciaina jicaia, jaiona fecañede. ¹¹ Jeacinona finocabidomoí; iadedi mare ra omoí uruiaimo fecacabillana uiñotomoí. Cai Moo Jusiñamuidi jaca mareuidimie. Cai baifemo naimie faite. Ie muidona naimiemo jicanotinomo mare rana fecaite.

¹² 'Jusiñamui jitaillacinona omoí finuamona, jiaie cominina marena fino. Jiaie comini omoína finuana omoí jitailla isoi, naimacina fino. Naimaci omoína marena finuana omoí jitaia, naimacina marena fino. Naimaci omoína maraiñeno finuana omoí jitaia, naimacina ie isoi maraiñeno fino. Moisés micori ie isoidicinona jaie llofujete. Jusiñamui facaina lloraini micoriai ie isoidicinona jaie jiai llofuetimaci.

*Jesúdi Jusiñamui dine rille llua rafue**(Lc 13.24)*¹³⁻¹⁴ Jesús llote:

—Jusiñamui dine omoí rillena, janorede naisodo omoí jailla isoi isoilla. Naisomo ite nasedi janorede isoide. Naimie dine naie rilla jira, naiedo omoí jai. Nainomo jaidino jaca iítimaci. Naimie dine rillena eo sefuirena jira, janore comini naiedo jaidimaci. Jiaie naiso ite. Naie naisodi aillue. Naie naisomo ite nasedi jiai aillue. Naiedo jaidino faifitimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

*Jesúdi abi caitadinomona abi rairuillana llua rafue**(Lc 6.43-44)*¹⁵ Jesús llote:

—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoi raise jaiñellena, omoina jifueiacadimaci. Naimaci llofuiacinodo omoi jaia, Jusiñamui rafuedo raise jaiñeitomoi. ¹⁶ Naimaci lloga rafuemona naimaci Jusiñamui llorainiñenana uiñoitomoi. Ero, eecuaimona uvas railla riarra oñega. Eecuaimona higos railla riarra jia oñega. ¹⁷ Mare riararamona mare llisilla comuide. Maraiñede riararamona maraiñede llisilla comuide. ¹⁸ Mare riararamona maraiñede llisilla comuiñede. Maraiñede riararamona mare llisilla comuiñede. ¹⁹ Mare llisilla comuitañena jira, naga maraiñede riarra jaitaca, iena jobaillena. ²⁰ Ie isoide. Naimaci finoca rafuemona ñe isoide lloraini naimacina uiñoitomoi. Jusiñamui llorainidena uiñoitomoi. Jusiñamui lloraiñedinodena uiñoitomoi. Naimaci maraiñena jira, Jusinamui naimacina duere finoite.

Jesúdi ie Moo ie comini sedajanomo ille llua rafue

(Lc 13.25-27)

²¹ Jesús llote:

—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi dama cue Moo jitaille rafue finodimiedi nainomo iite. ²² Cominimo juez isoi Jusiñamui ico llua facaiseconi, diga cominidi cuemo lloitimaci: “Nama, caina o oretatio cai raillamona, o rafuena llocabiticai. O uaido jananiaina oni oredicai. O uai diga siño rafuena finodicai” lloitimaci. ²³ Uai oiticue: “Omoina uiñoñedicue. Cue cominiñedomoi. Jeacino omoi comecimo nia illa jira, cuemona oni omoi jai. Cue Moo ie comini sedajanomo jaca iñeitomoi”.

Jesúdi naimiëna ñnuana ñaia rafue

(Lc 6.47-49; Mr 1.22)

²⁴ Jesús llote:

—Cue lluaana cacadomoi; iadedi omoimona nana ñnoñedomoi. Cue lluaana ñnotimiedi abi uiñotimie. Jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite. ²⁵ Noci deidemo, eo jinuidemo, jofomo ille toia, aifi bitemo, jofo raise finua jira, jofo goiñede. Iena faifiñede. Ie isoide. Cue lluaana ñnotimie faifiñeite. ²⁶ Cue lluaana ñnoñedimiedi abi uiñoñedimie. Jofona raise finoñedimie isoide. Jofona raise finoñedimiedi ie jofona finodemo, conillie emodomo iena finode. Ana raiñede. ²⁷ Noci deidemo, eo jinuidemo, jofomo ille toia, aifi bitemo, jofo goillamona, jai eo judaisite. Iena faifide. Ie isoide. Cue lluaana ñnoñedimie faifite —llote.

²⁸⁻²⁹ Moisés micori rafue uiñoraini isoi naimie llofueñena jira, illaimamo ite uai itimie isoi naimie llofua jira, nainomo ite cominidi naimie lluari rajicaidimaci.

8

Jesúdi efonaitimieña jillotaja rafue

(Mr 1.40-45; Lc 5.12-16)

¹ Naimie llofua mei, anedumona Jesús ie llofueoicaigano diga ana bite. Ailluena comini naimiëna racadimaci. ² Efonaitimie naimie ñne billanona, naimiëna raise uaiduamona, caiñici ifodo ana rainadate. Raite:

—Maestro, o jitaiededi, cuena jillotaredio.

³ Jesús ie onolli naimiemo oni ñnitajanona, naimiëna jetade. Raite:

—Ona jillotaiacadie. Mai o jillo. —Ieconí naimie jillode. ⁴ Jesús naimiemo llote:

—O jilluana bummo lloñeno; iadedi Jerusalémo, Jusiñamui jofomo, Jusiñamui diga ñairaima ñne mai jai. O jilluana comini raise uiñollena, naimiemo o

abina acatajai. Moisés micori jaie lloga rana Jusiñamuimo feca. —Iemei Jesús oni jaide.

Jesúdi capitán mullaimana jillotaja rafue
(Lc 7.1-10)

⁵ Capernaum railla nairaímo Jesús ria, capitán raillamie naimie dine bite. Naie capitán Roma railla nairai imie. Judíuñedimie. Billanona, duere llote:

⁶ —Maestro, cuena cano. Cue jofomo cue mullaima ite. Ie abina niraídanide. Naimie abi eo isirede. Naimiena jillota.

⁷ Jesús uai ote:

—Naimie dine jaiticue, naimiena cue jilloitallena.

⁸ Naie capitán dane llote:

—Jaiño. Jamai bue isoidicue. Iemo, ¿niese cue jofomo biitio? O uaido bene lluanona cue mullaima jilloite. ⁹ Jiaie illaicomini anamo iticue. Naimaci lloga uaina inoticue. Cue anamo jiaie soldaduai illanona, cue uaina inotimaci. Cue anamo cue mullaima illa jira, naimiedi cue uaina inote. O anamo naie duico illa jira, o uaina o lloia, cue mullaima jilloite.

¹⁰ Iena cacajanona, Jesús raijicaide. Naimie diga jaidinomo llote:

—Bie isoi cue uaina inotimiena jaca baiñedicue. Cai judíuai cominimona biesedimiena jaca iñede. ¹¹ Ero, Jusiñamui ie cominina sedajanomo naimaci illena, diga judíuaiñedino cue llua uaina inoitimaci. Naga nairaíamona inoitimaci. Jusiñamui cominina Abraham micori, Isaac micori, Jacob micori illamona, naimaci diga Jusiñamui ie cominina sedajanomo bie judíuaiñedino iitimaci. Nainomo caimare nabaitimaci. ¹² Ailluena judíuaiñedino inoitimaci. Jusiñamui ie cominina sedajanomo duillanodi omoi judíuai. Naimiena omoi inoñena jira, omoi ona oni dotaite. Dotaja mei, eo duere sefuillamona eit-omoi.

¹³ Capitámo Jesús llote:

—Mai jai. Cue uai siñonana o inua jira, o jitailla rafue omo jai suide. —Ieconí naimie mullaima jillode.

Jesús Pedro jifaiño jillotaja rafue
(Mr 1.29-31; Lc 4.38-39)

¹⁴ Oni jaillanona, Pedro jofomo Jesús ridemo, Pedro jifaiño duillana ciode. Naiñaiño abi cuaride. ¹⁵ Naiñaiño dine jaillanona, naiñaiño jetade. Jetajamona ieconí naiñaiño jillode. Abi cuariñede. Naiñaiño naidacaillanona, guille finuanona, ie jofomo itinona ecade.

Jesúdi ailluena duidinona jillotaja rafue
(Mr 1.32-34; Lc 4.40-41)

¹⁶ Naie naiona naimie dine comini ailluena jananiai anamo itinona atidimaci. Ie uaido naimiedi jananiaina oni oretate. Nana atica duidinona jiai jillotate. ¹⁷ Naimacina Jesús jillotajamona, Isaías micori jaie ciegafuiai iese jai suide. Naimie micori jaie cuela: “Caina jilloitajanona, cai duiconi oni oretate”.

Jesús ie llofuegamiena damie jaillana ie rafue
(Lc 9.57-62)

¹⁸ Ailluena comini naimie ecimo illana Jesús cianona, ie llofueoicaiganomo ruica dine jaillana llote. ¹⁹ Ieconí Moisés micori rafue llofueraima naimie dine billanona, llote:

—Maestro, o jaillinomo o diga jaiacadicue. O llofuegamiena jaiacadicue.

²⁰ Jesús uai ote:

—Janorede ocainai idi joforedimaci. Silliñiai jillainiaredimaci; iadedi jofonidicue. Monamona billanona, imana jaidicue; iadedi buenidicue. Jofonidicue. Cue diga o jaiacania, bue isoidena cuemona oñeitio. Iemo o comecina raise faca.

²¹ Ie facaise jiaie llofuegamie Jesúmo llote:

—O diga jaiticue; ia cue moo nia fioldañena jira, o diga nia jaiñeiticue.

²² Jesús naimie uai ote:

—Cue diga idai mai bi. Cuena inoñedinodi o moona canoredimaci. Naimie fioldaa, naimiena naimaci raille. Cue rafue jiaie rafue baifemo faite. Cue diga mai bi.

Jesúdi joraina llucaitaja rafue

(Mr 4.35-41; Lc 8.22-25)

²³ Naie llofuegamie diga Jesús ñaia mei, ruica dine jaillena, botemo jaide. Ie llofueoicaigano jiai jaidimaci. ²⁴ Botemo jailla mei, Jesús inide. Bai jorai motomo jaidimacimo, eo riire aifi billamona, joraidi eo bagode. Baguamona botemo jinui a uaide. Bote oruiacana jira, ²⁵ jaciruillamona, Jesúsna casitatimaci. Raitimaci:

—Maestro, caina cano. Jai buisaidicai. Jai corobaisaidicai.

²⁶ Jesús uai ote:

—¿Bue ñellena jacinaitomoi? Cuena raise inoñedomoi. Jacinaiñeno.

Iemei Jesús naidacaillano, aifina lletade. Joraina jiai llucaitade. Ieconi llucaide. Bagoñede. ²⁷ Naimie llofueoicaigano iemona rajicaidimaci. Iemona raitimaci:

—Bimiedi, ¿nie isoidimie? Aifi naimie uaina inote. Jorai naimie uaina jiai inote.

Bai jaillanona, ruica dine ridimaci.

Jesúdi Gadara railla eniruemo illa rafue

(Mr 5.1-20; Lc 8.26-39)

²⁸ Ruica dine naimaci ridemo, Gadara railla eniruemo sijidimaci. Ieconi menamie Jesús dine bitiaimaiaia. Jananiai anamo ite iaimaiaia. Comini raioillanomo nofie moto ifuaimona bitiaimaiaia. Nai iaimaiaia eo riirena jira, jaca bu nainomo jainide. ²⁹ Jesúsna iaimaiaia ciua facaise jananiai iaimaiaina cuirioitate:

—Jusiñamui Jitodio. ¿Niese cocona nibaiacadio? Coco duere sefuelle facaise nia ñede; iadedi birui cocona duere finuaibidio —cuirioidiaimaiaia.

³⁰ Naie bai iaie ailluena chanchuai guillano itimaci. ³¹ Jananiai Jesúmo duere llotimaci:

—Oni caina o oretajanona, chanchuai abimo caina oreta.

³² Jesús uai ote:

—Mai jai.

Ieconi nai iaimaiaimona jananiai oni jaillanona, chanchuai abimo jaide. Iemona iconiido chanchuai joraimo aisicana jaillanona, corobaiside.

³³ Iena ciuanona, chanchuai sedaraini imaci nairai dine aisicana jaidimaci. Nana naie rafuena llotimaci. Jaive jananiai anamo illa iaimaiaia rafuena llotimaci. ³⁴ Ie jira ailluena comini Jesús dine bitimaci. Naimiena ciuano, naimiemo duere llotimaci, naimaci illanomona naimie jaillena. Naimaci jitailla jira, Jesús oni jaide.

9

Jesús tsitaitimiena jillotaja rafue

(Mr 2.1-12; Lc 5.17-26)

¹ Botemo ie llofueoicaigano diga Jesús jaillano, ruica dine abido jaide. Capernaumo ie illanomo ride. ² Nainomo rilla mei, naimie dine comini ie biramo biide tisitaitimiena atide. Naimiena atidinodi Jesús naimiena jillotajana inote. Iena Jesús uñuanona, tisitaitimie mo llote:

—Moo, o comecina ocuiño. O jeacino cue feitaja jira, iena jai oni dotadicue. Ie facai ibana jai oñeiticue.

³ Jesús dine ofidinomona dajerie Moisés micori llogacinona llofueraini itimaci. Jesús llua naimaci cacajano, Moisés micori llogacinona llofueraini comecina facadimaci: “Dama Jusiñamui jeacina dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”.

⁴ Naimaci comecina facajacinona Jesús uñuamona, Jesús dinena jicanote:

—¿Bue ñellena omoi comecina jeare facadomoi? ⁵ Bimie mo: “O jeacina jai oni dotadicue” cue lloia, cue uai siñonana uñoñeitomoi; ia bimie mo: “Mai naidacaillanona macari” cue lloia, cue uai siñonana uñoitomoi. ⁶ Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uñollena, tisitaitimie mo lloiticue: “Mai naidacai. O bira ferianona, o jofomo mai jai”.

⁷ Iese naimie raillamona, tisitaitimie jillode. Naidacaida, ie jofomo jaide.

⁸ Comini iena ciuanona, jacinaitimaci. Bimie mo ie uaina Jusiñamui fecajana naimaci uñuamona, Jusiñamuimo iobillacinona fecadimaci.

Jesúdi Mateona fetua rafue

(Mr 2.13-17; Lc 5.27-32)

⁹ Jesús bai macaritemo, cuena ucubena oranomo cue raillana ciode. Mateodicue. Gobierno ucube oraimadicue. Jesús cuemo llote:

—Cue llofuegamiena o jaillena, cue diga bi.

Naidacaida, naimie diga jaidicue.

¹⁰ Nailli cue jofomo Jesús ie llofueoicaigano diga guite. Diga gobierno ucube oraini jiai guisaibitimaci. Diga Moisés micori llogacinodo jaiñedino jiai guisaibitimaci. ¹¹ Nainomo fariseuai comini jamai bitimaci. Moisés micori llogacinodo eo jaidimaci. Jesúsna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Moisés micori llogacinodo ucube oraini raise jaiñenamona, naie isoidino diga, fariseuai comini nabairiñena jira, iese jicanoitimaci.

¹² Iena cacajano, Jesús llote:

—Ecairedinodi médicono jitañedimaci; ia duidinodi médicono jitaidimaci. Ie isoide. Mareuidino cuena jitañedimaci; ia maraiñedino cuena jitaidimaci. ¹³ Jusiñamui facaina lloraima micori jaie cueda rafuemo omoi comecina faca: “Jusiñamui llote: ‘Rana cuemo omoi fecajana jitañedimaci; ia cominina omoi dueruillana jiai jitañedimaci’ llote”. Cominina cue dueruilla jira, Jusiñamui dibeimo naimaci illena, mareuidinona itatajaibitidicue; iadedi Jusiñamui dibeimo naimaci illena, maraiñedinona itatajaibitidicue. Omoi mona maraiñedino diga nabairitidicue; ia naimacina uaibitidicue.

Jesús dine Juan Bautista llofueoicaigano billa rafue

(Mr 2.18-22; Lc 5.33-39)

¹⁴ Naie facaise Juan Bautista llofueoicaiganodi Jesús dine bite. Naimie mo llote:

—Cai einamac i llua isoi, Jusiñamuina cai raise iobitallena, guñenaruillai illa facaiseconi guñedica. Cai jeacino facaina sunaicabitica. Fariseuai comini

jiaí guñedimaci; iadedi o llofueoicaigano guitimaci. Cai einamací llogacínodo jaidicái. ¿Bue ñellena o llofueoicaigano iedo jaiñedimaci?

¹⁵ Jesús uai ote:

—Jiaíe rafuedo iena lloiticue. Coniruedi ie aina uarui ia, iobilla jira, ie nabaiñiaí sunaiñedimaci. Iobillamona guitimaci. Jiaíruido jai aireiacade conirue naimaci diga iñenia, naimaci comeci sunaillamona, naimaci jitaia, guñenaruillaídi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci. ¹⁶ Jiaíe rafuedo iena lloiticue. Nia jocoñega comue iniroidi jacaie iniroimo jilliñega. Jilliadi, jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. ¹⁷ Jacagomona finoca bolsa como finoca vino joneñega. Jonegadena, mairiñena jira, sirillamona, igoí raíre cuararite. Vino faífite. Igoí jiaí faífite. Como finoca vino comogomo jonelle. Iemei iena faífiñeite. Ie isoide. Omoí einamací rafue ifomo jiaíe rafue birui ite. Iena omoímo llocabiticue. Iedo jaidicái —llote.

*Jesúdi mena duide riñona jillotaja rafue
(Mr 5.21-43; Lc 8.40-56)*

¹⁸ Juan Bautista llofueoicaigano diga Jesús llotemo, jiaímie naimie dine bite. Naimiedi judíuai ofiraco sedaraíma. Jesúna duere jicanollena, caiñici ifodo rainadacaida llote:

—Cue jisa como fodaite. O onolli naiñaiñomo o jonellesa, naiñaiño jillollesa, cue jofomo cue diga mai bi.

¹⁹ Iena cacajano, Jesús naimie diga jaide. Ie llofueoicaigano jiaí jaidimaci. ²⁰ Bai jaillanona, duidiñaiño jinafona jaide. Naimie iniroina jetallena, naimie dine bite. Ie jeraimona doce años jaca diaide. Billanona naimie iniroina jetade. ²¹ “Naimie iniroi cue jetajamona jilloiticue” comecina facajamona, naiñaiño naimie iniroina jetade. ²² Ieconí Jesús dobaidacaida, abído erodatemo, naiñaiñoña ciode. Raite:

—Ñoo, o comecina ocuiño. Cuená o ñnua jira, jai jillodio.

Ieconí naiñaiño jillode.

²³ Ofiraco sedaraíma jofomo Jesús rillano, naie jofo nama jisa jai fiodailla jira, comini merire fillana cacade. Ailluena failliñailana cacade. ²⁴ Jesús dinena raite:

—Jofomona nana omoí jino jaillana jitaídícue. Cuemona biñaiño fiodaíñedesá. Jamái iníde.

Iena cacajano, naiñaiño jai fiodaite uíñuamona, Jesúri jaisitimaci. ²⁵ Comini jino oretaja mei, naiñaiño onollina naimie llinuano, fiodaillamona naiñaiño jillode. Jillua mei, naiñaiñodi naidacaide. ²⁶ Naie rafue nana naie enirue itinomo llocana jaide.

Jesúdi uisínide iaímaiaína jillotaja rafue

²⁷ Ofiraco sedaraíma jofomona Jesús bai jaidemo, uisínide iaímaiaí naimie jinafona jaidiaímaiaí. Jesúna ado uaidotíiaímaiaí:

—Cai illaíma David micorí jitodio. Jusiñamuimona o billa jira, cocona duenai.

²⁸ Uai oñeno Jesús Capernaumo jaide. Naimie fo jailla mei, naimie dine bitiaímaiaí. Iaímaiaímo Jesús jicanote:

—¿Omicóna cue jillotajana ñnotómico?

Faíriotíiaímaiaí:

—Jí.

²⁹ Iaímaiaí uisína Jesús jetajano raite:

—Cuená omíco ñnua díese jilloitómico.

³⁰ Ieconi iaímaiaí uisídi cíode. Jesús naie rafuena llwana eo janotade.

—Bumo lloñeno —llote; ³¹ iadedi iena llocana jaidíiaímaiaí. Iemona Jesús mameci nana naie eniruemo itinomo soride.

Jesús ñaiñedimíena jillotaja rafue

³² Capernaumona Jesús bai jaidemo, naimie díne Janaba anamo illamíena jiaíe comíni atídímaci. Janaba anamo naimie illa jira, naimie ñainide. ³³ Jesús Janabana oni orede. Oretaja mei, naie íma ñaite. Nainomo ite comíni raijicaillanona raitímaci:

—Cai comíni díne bie isoide íma jillwana jaca cíoiñedícaí.

³⁴ Ie jira fariseuai comíni dínenona raitímaci:

—Taife díbeimo Janaba illamona, Jesúsdi Taife uaido Janabana oni orede —raitímaci.

Jesúdi comínina duenaila rafue

³⁵ Díga nairaíaimo ie llofueoicaigano díga Jesús llocana jaide. Nainomo judíuai ofiracuaimo llofueuide. Naimie anamo comíni illana Jusíñamui jitailla jira, Jesúsdi Jusíñamui díbeimo naimaci comeciaí iuaina meidwana llofueite. Ailluena duidínona jillotate. Naga isoide duicomona jillotate.

³⁶ Naimacina duenaite. Naimaci comeciaí iticino oni duiñoitimie íñena jira, naimacina duenaite. Ailluena comínina cíode. Toíca llaudaiaí isoi ebe isoi jaidímaci. Naimaci comeciaí ocuiñoñidímaci. Jusíñamui naimacina sedaacana uíñoñedímaci. ³⁷ Naimacina duenailamona, ie llofueoicaiganomo llote:

—Illimo ailluena trigo ia, iena ollena, ailluena maíjirainina jitailla. Ie isoide. Ailluena comíni ite naimacimo Jusíñamui rafuena cai lllollena; iadedi naie rafuena lloraini eo íñedímaci. ³⁸ Ie rafue naimaci lllollena, ailluena comínina raire naimie oretallena Jusíñamuimo jícano.

10

Jesúdi ie doce llofueoicaiganona fetua rafue

(Mr 3.13-19; Lc 6.12-16)

¹ Ie doce llofueoicaiganona Jesús uaiduanona, naimacimo ie uai íñonocaide, jananiaí anamona comínina jilloitallena. Duiconona oni oretallena, iena jiaí íñonocaide. ² Ie llofueoicaiganodi íese mamecíredímaci: Simón. Naimie mameci jiaicídi Pedro. Andrés. Naimiedi Simón ama. Jacobo. Juan. Iaimaiaí Zebedeo jito iaímaiaí. ³ Felipe. Bartolomé. Tomás. Cuenajiaí uaidote. Mateodícue. Gobierno ucubena oraímadícue. Jiaíe Jacobo. Naimiedi Alfeo jito. Tadeo. ⁴ Jiaíe Simón. Naimiedi cananista comíni facaisemo duide. Judas Iscariote micorí. Naimiedi Jesúsna gaitatate.

Jesúdi ie llofueoicaiganona oretaja rafue

(Mr 6.7-13; Lc 9.1-6)

⁵ Jesús ie llofueoicaiganona oni oretajanona, raite:

—Judíuaiñedíno díne jaiñeno. Samaritano railla comíni díne jaiñeno; ⁶ ia cai judíuai comíni díne jai. Naimacimona ailluena comíni Jusíñamui rafuena nia íñoñedímaci. Faíficana nia jaidímaci. ⁷ Omoi jaillanona, comínimo llono: “Jusíñamui facaina jaie lloraini micoriaí llogamie jai bene ite. Naimie anamo omoi illana Jusíñamui jitailla jira, naimie díbeimo omoi comeciaí iuaina meido”. ⁸ Duidínona jillota. Fiodaitínona jillota. Efonaitínona jillota. Jananiaína oni oreta. Cue uaina jamai omoi feíñua jira, comínina jilloitajana íbatañeno. ⁹ Ucubena uíñeno. Guille ifo meidollena, rana uíñeno. ¹⁰ Ailluena rana omoi uíñellena, bolsana uíñeno. Abí meidolle íniroina uíñeno. Meidolle zapatona uíñeno. Omoi abí ríidollena, jíguidana uíñeno. Jiaíe comínina omoi canua isoi, omoína naimaci canua. Naimacimona omoi

jitailla rana omoï ono. Ie jira ailluena rana uiñeno. ¹¹ Nie nairaimo omoï ria, omoï rafuena jitaïdimiëna jeno, naimië jofomo omoï illena. Naie jofomo omoï i, naie nairaimo omoï ille ðinori. ¹² Naie jofomo omoï rillanona, naie cominina marena uaido. ¹³ Omoïna naimaci raise feiñoia, naimaci uri illena, naimacimo marecinona lloño; iadedi omoï rafuena naimaci jitaïñenia: “Jusiñamui omoïna canoite” naimacimo lloñeno. ¹⁴ Omoïna bu feiñoiacaiñenia, omoï uaina bu cacarefiacaiñenia, naie nairaimona omoï jaillanona, omoï eilliaimo ite jearacuaina jaidino. Maraiñede rafuena naimaci finuana naimaci uiñollena, omoï eilliaina jaidino. ¹⁵ Omoïmo uanaicinona lloticue. Omoïna naimaci feiñoñenia, Jusiñamuidi naimacina duere finoite. Sodoma railla nairai jaie jeacinona eo finodimaci. Gomorra railla nairai jaie jeacinona eo finodimaci. Ie jira Jusiñamui naimacina jaie duere finode. Omoïna comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

Jesús duere sefuillifueña llua rafue

¹⁶ Jesús ie llofueoicaiganomo nia llote:

—Naimacina janallari fañellena, naimaci duere sefuiñellena, toica llaudaiaï raise sedajana jitaïdimaci. Ie isoide. Eo maraiñede comini motomo omoïna oretaiticue. Omoïna duere finoacanitimaci. Raise sedajana jitaïdomoi. Jaio fiodañellena, aiside. Naimiëna bu meineñellena, ie abina eenollena, jaio aiside. Ie isoi omoï abi uiñocana omoï jai. Ucugidi buena jeare finoñede. Ie isoi omoï illa. Jeacino finuamona eneno omoï i. ¹⁷ Abina rairui. Dajerie omoïna llogidoitimaci. Omoïna gaitaja mei, naimaci ofiracomo omoïna faitimaci. ¹⁸ Cue rafue omoï llua muidona, omoïna gaitajanona, illaicomini ðine omoïna uitimaci. Omoïna llogidoitinomo cue rafuena lloïtomoi. Naie illaicominimo iëna jiaï lloïtomoi. ¹⁹ Naie illaicomini ðine omoï ia, omoï rïdöllicinomo omoï comeciaina jarire facañeno. Naie facaise omoï ñaillicinona uiñoïtomoi. ²⁰ Dani omoï comeciï icinodo ñaiñeitomoi; ia Jusiñamui Joreño uaido ñaitomoi. ²¹ Cuen a ñnotomoi; ia ailluena cuena ñnoñeitimaci. Cuen omoï ñnua jira, omoïna enoitimaci. Iëmona dajerie ie amana meinetallena, naimiëna llogidoite. Dajerie moodi ie uruena meinetallena, naimiëna llogidoite. Dajerie uruiaïdi naimaci moonna, naimaci eina meinetallena, naimacina llogidoitimaci. ²² Cue muidona ailluena comini omoïna enoitimaci; iadedi cue uaina faïnonocaiñedimie cue Moo ðiga monamo ja muidomo jaca iite. Naimiëna jillotaiticue. ²³ Cue rafue naimaci jitaïñenamona, omoïna nie nairai duere finoia, ðinomona cue rafuena llollena, jiaie nairaimo raïre jai. Cue rafuena omoï llollena, ðiga judúaï illanuaïmo nia jaitomoi. Nana naie comini nia ñnoñenia, Jusiñamui ðinena dane abido biiticue. ²⁴ Ero, ie llofueraïma duere sefuia, ie llofuegamie daje isoi duere sefuite. Ie eci illamie duere sefuia, ie mullaïma daje isoi duere sefuite. ²⁵ Ie isoide. Cue cominina omoï jaillamona, cue duere sefuia, jiaï duere sefuitomoi. Taïfe mameci jiaïci llinuanona, “Beelzebúðio” jiaïno cuena raitimaci. Iëse cuena naimaci jeare ñaïa jira, cue cominina omoï illa jira, omoïna jiaï jeare ñaitimaci.

Jesúði jaciruiñeno llofuia rafue

(Lc 12.2-9)

²⁶ Jesús nia llote:

—Cuen a ñnoñedino omoïna jeare ñaitimaci; ia nana cue rafuena llorcana omoï jailla jira, naimacina jaciruiñeno. ²⁷ Omoïmo rafuena anado jai lloticue. Iëna nana cominimo marefodo lloño. Ado lloño. ²⁸ Omoï abina meineredimaci; ia omoï joreña meinenidimaci. Omoïna naimaci

meineia, omoi joreño Jusiñamui dine jaite. Iena uiñuamona, omoi meineia-cadinona jaciruiñeno. Cue rafuedo omoi raise jaiñenia, Jusiñamuina jacirui. Naimiedi omoi abina, omoi joreño diga, iraimo dotarede. ²⁹ Omoina duere finoacadinona jaciruiñeno. Ero mena janorede sillina fecadomoina, eo janore ibaca; iadedi cai Moo Jusiñamui jitaiñenia, naimacimona daje fioldaiñede. ³⁰ Ero, niga ifotirai omoimo illana Jusiñamui uiñote. ³¹ Naimiedi omoina sedajana jiai uiñote. Silliñiai baifemo Jusiñamui isirugaomoi. Omoi duere finoacadinona jaciruiñeno. Jusiñamui jitaiñenia, omoimo jaca buena suiñeite.

Jesús naimiena janoñenana llofuia rafue
(Lc 12.8-9)

³² Ie llofueoicaiganomo Jesús nia llote:

—Cue rafuena omoi llumona, jiaino omoina duere finoitimaci. Cuen birui omoi janoñenia, nana comini Jusiñamui uicomo ico ia, nainomo omoina janoñeiticue. “Cue cominidomoi” omoina raiticue. ³³ Cuen birui omoi janoia, nana comini Jusiñamui uicomo ico ia, nainomo omoina janoiticue. “Cue cominiñedomoi” omoina raiticue.

Jesús muidona nana comini uri iñena rafue
(Lc 12.51-53; 14.26-27)

³⁴ Ie llofueoicaiganomo Jesús nia llote:

—Nana cominina uri itatallena enruemo biñedicue. Cuen a ñnoñedinodi cuena ñnotinona enoitimaci. Enoillamona cuena ñnotinona duere finoitimaci. ³⁵ Cue lloga rafuena damerie ñnua muidona, ie moo illa ñbeimo ie jito iñeite. Ie ei illa ñbeimo naiñaiño jisa iñeite. Ie jifaiño illa ñbeimo naiñaiño mio iñeite. Iese cominina uri itatañedicue. ³⁶ Omoi comini coninina enoitomoi. Iemona duere sefuitomoi. ³⁷ Ero, ie moon cue baifemo bu isirua, ie eina cue baifemo bu isirua, cue jitailla ra naimie finoacaiñena jira, cuemo raise ñiñede. Ie uruai cue baifemo bu isirua, cuemo raise ñiñede. ³⁸ Cue facaina bu fioldaiacaiñenia, cuemo raise ñiñede. Naimiedi cue comini naimiena lloiacaiñedicue. ³⁹ Cue facaina fioldaiacaiñedinie ja muidomo faifite. Cue diga jaca iñeite; iadedi cue facaina fioldaitimie monamo cue diga jaca iite.

Jesús Jusiñamuimona ibana feiñua llua rafue
(Mr 9.41)

⁴⁰ Jesús llote:

—Cue rafuena omoi llocana jaja, diga jofuemo riitomoi. Cue cominina omoi illamona, omoina feiñotino cuena jiai feiñotimaci. Omoina bu feiñoia, cuane jiai feiñote. Cuen feiñotimiedi cuena oretatimiena jiai feiñote. ⁴¹ Naimie cue comini illamona, damerie Jusiñamui facaina lloaimana feiñotimaci. Jusiñamui facaina lloaimana bu feiñoia, Jusiñamuimona ibana feiñoite, naie lloaima Jusiñamuimona feiñua isoi. Cue jitaillacinona finodinona bu feiñoia, naimaci Jusiñamuimona feiñua isoi, Jusiñamuimona ibana feiñoite. ⁴² Cue ñbeimo itinona bu janore canoia, Jusiñamuimona ibana feiñoite. Naimacimo ñibai jamai jinuina fecade; iadedi naimacina canuamona, Jusiñamuimona ibana feiñoite —llote. Iemei Jesús ie llofueoicaiganona, ie rafuena llolena, orede.

11

Jesús dine Juan Bautista micori ie llofueoicaiganona oretaja rafue
(Lc 7.18-35)

¹ Ie doce llofueoicaiganona Jesús oretaja mei, iairei ite comini illanuaimo naimiedi ie rafuena llocana jaide.

² Ie facaiseconi cárcelmo Juan Bautista micori Jesús finoca rafuena fidiano, iena raise uñollena, Jesús dine ie llofueoicaiganona orede. ³ Jesús mo llotimaci:

—Juan Bautistamona biticai. Jofue iñenanomo navui naimie ia, “Jusiñamumona damie biite” naimie llofuecabite. Juan llofuegamiena o illana uñoiacadicaí. Imieñedi odena, jiaimie billemo nia ocuridicaí.

⁴ Jesús uai ote:

—Cue llwana cacadomoi. Cue finoca rafuena ciodomoi. Juan dine abido omoi jaillanona, iena naimiemo llono. ⁵ “Uisnidino jai ciodimaci. Ñujañujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillamona damierie jai jillodimaci. Dueredino mare rafuena jai cacadimaci” naimiemo llono. ⁶ Jiai llono: “Ñibai nana cue rafuena raise cacaiñedio; ia cuena jaca nia inocana o jaia, caimare iitio”.

⁷ Juan llofueoicaigano abido jailla mei, naimie ecimo ailluena ite cominimo Jesúsdi Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoiñede. Nie isoide rafue naimiemo ia, cue rafuena llocana jaide. ⁸ ¿Bue ñellena naimie dine jaidomoi? Mare iniroina jitadimiena cioiñedomoi. Mare iniroina jitadinona omoi cioacaniadedi, illaicomini dine jaidomoi. ⁹ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira. ¹⁰ Malaquías micori naimiena jaie cueba:

Jusiñamui raite: “Ero, o uicodo cue rafuena lollena, damiena oretaiticue, comini comeaiina marecinona duiñollena” cueba. Malaquías Juan Bautistana cuete. ¹¹ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofue; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioiñede. Iemona naimie baifemo faitomoi. ¹² Juan llofui tañiamona ailluena comini cue rafuena inuamona, Jusiñamui dibeimo birui duere iacadimaci. ¹³ Nana Jusiñamui facaina lloraini micoriadi cue billena jaie llotimaci. Moisés micori iena jiai jaie llote. Juan facaise naie llogacino jai suide. ¹⁴ Jusiñamui facaina lloraima jaie llote: “Bie rafue suille facaise Elías isoidimie biite”. Naimie rafuena inotomoidena, Juandi naimiena uñotomoi. ¹⁵ Omoi jeforena jira, raise fueollena, cue llamo cacarei.

¹⁶ Jesús nia llofue:

—Ero, omoina ñaiticue. Jifanote urui ai isoidomoi. Urui ai jifanoiacania, naimaci nabaiñiaina uaiduanona, raitimaci: ¹⁷ “Omoi diga jifanoiacadicaí; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedicai” raitimaci. ¹⁸ Ie isoidomoi. Juan jirorainide. Caimare guiñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uarico isoi ite” raitimaci. ¹⁹ Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cuena jiai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino

diga nabairitimidio”. Iese raitomoi; iadedi Jusiñamuina ñnotinodi cue finoca rafuena marenana uiñotimaci.

*Dajerie nairai Jesúsna ñnoñena rafue
(Lc 10.13-15)*

²⁰ Ailluena comini Jesús dina nia ia, naimacimo ie navui jailla nairaiaina ñaite. Naimie siño finoca rafuena uiñotimaci; iadedi naimaci comeciai iuai meidoñedimaci. Ie jira naimacina ñaite. ²¹ Llote:

—Omoimona damerie Corazín railla illanomona bitomoi. Omoimona damerie Betsaida railla illanomona bitomoi. Cue rafuena omoi ñnoñena jira, duere sefuitomoi. Omoi dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comeciai eo isinotaillamona, naimaci comeciai iuai meidotimaci. Naimaci comeciai iuaina meiduana uiñotallena, ebinide iniroina jitajanona, naimaci ifogiamo jusefona jonetimaci. ²² Jusiñamui uicomo nana comini ico ia, Tiro nairai baifemo duere sefuitomoi. Sidón nairai baifemo duere sefuitomoi. ²³ Omoimona damerie Capernaum railla illanomona bitomoi. Birui abina iedoiacadomoi; iadedi jairuido sunaitomoi. Omoi dine navui cue siño finoca rafuena Sodoma railla nairaimo jaie finodicuena, naie nairaidi birui niadedi nia ite. Omoi comeciai iuai omoi meidoñenia, monamo cue Moo diga jaca iñeitomoi; iadedi naimie omoina duere finollemona sunaitomoi. ²⁴ Jusiñamui uicomo nana comini ico ia, cue rafuena omoi ñnoñena jira, Sodoma railla nairai baifemo duere sefuitomoi —llote.

*Jesús ie Moo diga ñaia rafue
(Lc 10.21-22)*

²⁵⁻²⁶ Ie facaiseconi Jesús ie Moo diga ñaianona raite:

—Ore Moo, oca mona Namadio. Oca enirue Namadio. Abina uiñotinona bie isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo feaacadicue. Mai.

²⁷ Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitaille diese omoina naimiena uiñotadicue. Ie muidona naimiena uiñotomoi. ²⁸ Omoi jeacinomona omoi jillobillena, duere jaidomoi. Omoi comeciai marena uri illena, cue dibeimo mai omoi i. ²⁹ Cue llucino anamo omoi i. Cue rinina jira, cuemona omoi fueo. Iemei omoi comeciai marena uri iite. ³⁰ Omoina cue canua jira, cue llucino anamo omoi iacanano ia, sefuinide. Omoina cue canolle jira, cue llucino finuana sefuinide.

12

*Sábadoruimo Jesús llofueoicaigano maija rafue
(Mr 2.23-28; Lc 6.1-5)*

¹ Ie rafue llumona, ie llofueoicaigano jai abido bitimaci. Ie facaiseconi sábadoruimo Jesús ie llofueoicaigano diga, trigo motodo joide naído jaide. Ie llofueoicaigano aimetailla jira, trigona tijiano, golluano, guicana jaidimaci.

² Dajerie fariseuai iena ciuano, llotimaci:

—Ero, o llofueoicaigano rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Iese cai abimo jeacinona jai finodimaci.

³ Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. ⁴ Jusiñamuimo fecaca llomenicono

uanona, guitimaci. Jamai bue isoidino naie llomeniconna guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiaí diga David micori iena guite; ia Jusiñamui naimacina duere finoñede. ⁵ Moisés micori llogacinomo jiaí raise comeciaina facañedomoi. Moisés micori jaie llua isoi, sábadoruimo Jusiñamui jofomo Jusiñamui diga ñairaini maijuidimaci. Jusiñamuina naimaci sedallena, ocainana fatimaci. Iraina bonodimaci. Iese maijuidimaci; iadedi Jusiñamuimona jeacino finoñedimaci. Moisés micori jaie cuezafuiaína raise cacañedomoi. Iena raise facañedomoi. ⁶ Omoimo nia lloiticue. Jusiñamui jofomo finoca rafue baifemo faiticue. ⁷ Jusiñamui facaina lloiraíma iena jaie cuezga: “Cuemo rana omoi fecajana jitaídícue; ia omoi jitaillamona, jiaie cominina omoi duenaillacinodi rana cuemo fecajacino baifemo faite”. Iena omoi uiñotomoidena, cue llofueoicaiganomo: “Maraiñedicinona finodomoí” lloñedomoi. Cuemona cue llofueoicaigano jeacino finoñedimaci. ⁸ Monamona billanona, imana jaidícue. Ie muidona sábadoruimo finolle rafuena rairuiredícue. Nairuimo finoñelle rafuena jiaí rairuiredícue.

Jesúdi onollina idisarodimiena jillotaja rafue

(Mr 3.1-6; Lc 6.6-11)

⁹ Bai jaillanona, nairai dine rillanona, naimaci ofiracomo Jesús fo jaide. ¹⁰ Nainomo onollina idisarodimie illanona, fariseuai dinena Jesúsomo jicanotimaci:

—¿Sábadoruimo bimiena o jilloitajana mare? —jicanotimaci. Sábadoruimo duidimiena bu jillotaia, naimacimona naimie jai maijide. Uai uanona: “Mare” Jesús raiadedi, naimacimona naimie jai maijiacana jira, naimiena llogidoiacadimaci. ¹¹ Jesús uai ote:

—Sábadoruimo omoimona damie ie toica llauda ifomo uaidena, nairuido ari iena ote. Naimiemo buena lloñedomoi. ¹² Ero, cominidi llauda baifemo faite. Sábadoruimo mare rafuena finuadi mare. Bimiena cue jillotaia, mare rafuena finodícue.

¹³ Onollina idisarodimie lloite:

—O onolli mai oni ñuita.

Iena ñuitajamona jillode. ¹⁴ Iena cuanona, fariseuai jino jaidimaci. Naimiena meinellena, coniniri siadotimaci.

Isaías micori jaie Jesúna ñaia rafue

¹⁵ Naimiena naimaci meineiacanana Jesús uiñuamona, nainomona oni jaide. Diga comini naimie diga jaidimaci. Naimacimona nana duidinona jillotate.

¹⁶ —Cuenallocana jaiñeno —naimacimo lloite. Naimie mameci are sorillana jitaíñede. Fariseuai diga ie uai uaitaiacaiñede. ¹⁷ Iemona Isaías micori jaie cuezafuiaí jai suide. Jusiñamui Isaías micorina jaie cuetataga:

¹⁸ Ero, cue fetoca mullaíma ite.

Naimiedi cue isiruigamie. Naimieri iobidícue.

Cue Joreño naimiemo cue fecajanona, judíuaiñedinomo naimacina cue jilloitaacanana lloite.

¹⁹ Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

²⁰ Comeciái ocuinidinona canoite.

Dueredinona canoite. Naimacina duere finoñeite; ia naimacina canoite.

Ie mare rafue lluamona, naimiena inotinona canoite.

Nana comini naimie anamo ille dinori iese naimie canoite.

²¹ Naimaci jillobillena, ie rafue cacajanona, ailluena judíuaiñedinoma naimiena inoitimaci.

*Fariseuai Jesúna jeare ñaia rafue
(Mr 3.19-30; Lc 11.14-23; 12.10)*

²² Jesús dine damieriedi Janaba ie anamo illamiena atidimaci. Janaba anamo naimie illa jira, naie aticamiedi cioñede. Jiai ñaiñede. Jesús Janabana oni oretajanona, naimiena jillotate. Naimie uaina botade. Ñaite. Cíode.

²³ Naiena cíodino rajjicaillanona raitimaci:

—Ñibai bimiedi David micorí jito. Cai illaimana naimie illena, naimie micorí jitomo ocuridicai.

²⁴ Iena damierie fariseuai cacajano, raitimaci:

—Beelzebúdi Janaba comini. Beelzebú anamo naimie illamona, Beelzebú uaido Janaba illa cominimona Jesús Janabana oni oretate —raitimaci.

²⁵ Naimiena naimaci enoillana Jesús uiñuanona, naimacimo llote:

—Daje isoi comeciaina lloillamo daje nairai facañenia, danomo maijinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci. ²⁶ Ie isoide. Beelzebú uaido jananiaina omoi lua isoi cue oretai, Janaba ie dibeimo itino diga jai nabairiñede. Iemona naimie comini danomo iñeitimaci. ²⁷ Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uiñollena. Iemei cue finoca rafuena uaitañeitomoi. ²⁸⁻²⁹ Ero, maridimie ie jofomo ite rana ñibai fiñacadomoi. Iena fiñllena, naimiena nano raise omoi maiga. Raise maia mei, ie rana fiñredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui Joreño uaido naimiena anafefitaticue. Iemona Jusiñamui rafuena cue lluana jai uiñotomoi. ³⁰ Cue dibeimo iñedimie cuena enoide. Cue dibeimo cominina itañedimiedi naie cominina cuena iñotañede. ³¹ Ie jira omoimo lloiticue: Jusiñamuidi nana comini jeacinona dotarede. Naimiedi comini marañedicinona dotarede; iadedi naimiedi ie Joreñoña jeare ñaiacinona dotañeite. ³² “Jusiñamui Joreño uaido siño rafuena finoñedio; ia Janaba uaido siño rafuena finodio” cuena raitomoi. Jusiñamui mona biticue. Cuena omoi jeare ñaia, Jusiñamui iena feitarede; iadedi naimie Joreñoña omoi jeare ñaia, Jusiñamui iena birui feitañeite. Iena íco jaca feitañeite.

*Jesúdi riará llisilla lua rafue
(Lc 6.43-45)*

³³ Jesús llote:

—Llisillamona ñie isoide riará illana uiñoticaí. Amena ie llisilla llillamona, amena marena uiñoga. Llillamona, amena marañenana jiai uiñoga. ³⁴ Ie isoide. Omoi ñaiamona omoína uiñoticaí. Cuena omoi marañeno ñaia jira, omoi comeciái iticinona uiñoticaí. Omoi marañena jira, jaió nairaidomoi isoidomoi. ³⁵ Mareuidimie mare ie comecimona ñaite; iadedi marañedimie marañede ie comecimona ñaite. ³⁶ Jamai ebena birui omoi ñaia, Jusiñamui uicomo nana comini íco illa facaiseconi Jusiñamui iba oite. ³⁷ Omoi jeare ñaiaconi duere sefuitomoi; iadedi omoi mare ñaiaconi duere sefuiñeitomoi. Ie jira Jusiñamui dibeimo omoi comeciái iuai meido.

*Dajerie Jesús siño rafuena finuana jitailla rafue
(Mr 8.12; Lc 11.29-32)*

³⁸ Naie facaiseconi dajerie Moisés micorí llogacinona llofueraini dajerie fariseuai diga Jesúmo llotimaci:

—Maestro, o lloga uaina cai ñnollena, siño rafuena o finuana cioacadicaí.

³⁹ Jesús uai ote:

—Maraiñedicinona finocabidomoi. Jusiñamui dibeimo iacaiñedomoi; iadedi siño rafuena cioacadomoi. Iena omoi jamai cioillena, siño rafuena finoñeiticue. Ero, Jonás micori jaie ite rafuena uiñotomoi. Naiemo omoi comeciaina omoi faca. ⁴⁰ Darui amani aillue lliciai jeraimo naimie illamona jillode. Ie isoite. Cue fiodailla mei, darui amani raiafomo iiticue. Iemei naiemona jilloiticue. ⁴¹ Lliciai jeraimona naimie jillua mei, Nínive railla nairai dine Jonás micori jaide. Nainomo Jusiñamui rafuena llote. Naie comini iena cacajano, naimaci comeciai icinuaina meidotimaci. Cue rafuena omoi cacajamona, omoi comeciai icinuaina birui omoi meidoñena jira, Jusiñamui uicomo ico nana comini illa facaiseconi: “Cue cominidomoi” omoina raiñeiticue. Jonás micori baifemo birui uaidicue; iadedi cuena ñnoñedomoi. ⁴² Ero, Saba railla nairai ie illaiño micoridi Salomón micori dine jaie aarena jaide. Naimie micori uiñuacinona naiñaiño micori cacareillena, aarena jaide. Salomón micori baifemo birui uaidicue; iadedi cuena ñnoñedomoi. Omoi comeciai icinuaina birui omoi meidoñena jira, Jusiñamui uicomo nana comini ille facaiseconi naiñaiño micori omoina ico ñaite: “Naimiedi siño rafue finuana ciodomoi. ¿Bue ñellena naimiena ñnoñedomoi?” omoina ico ñaite.

Janaba anamo illamie rafue
(Lc 11.24-26)

⁴³ Jesús naimacimo nia llote:

—Birui bene ite maraiñede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide; iade baiñede. ⁴⁴ Baiñena jira, naimie comecina facade: “Navui cue anamo illamie dine abido jaiticue”. Abido naimie bia, naie ima comeci namanidena naimie baite. ⁴⁵ Iemei oni jaillanona, jiaie siete jananiaina naimie diga atide, naimaci anamo naie ima illena. Naie siete jananiai naimie baifemo maraiñedicimaci. Iemona naie ima eo fodo jaide. Ie isoide birui ite maraiñede comini. Cue rafue naimaci ñnoñenia, eo fodo jaitimaci.

Jesús ie comini
(Mr 3.31-35; Lc 8.19-21)

⁴⁶ Jofomo comini diga Jesús nia ñaia, naimie ei, ie amatiai diga, bite. Naimie diga ñaiacanano, jino naidaide. ⁴⁷ Damie Jesús mo llote:

—O ei, o amatiai diga, jino ite. O diga ñaiacade.

⁴⁸ Naimiemo Jesús dinena jicanote:

—¿Bu cue ei? ¿Bu cue amatiai?

⁴⁹ Ie llofueoicaigano dine ie onolli ñuitajanona, raite:

—Jadi, cue ei, cue amatiai. ⁵⁰ Cue Moo monamo ite. Naimie jitaillacinona finodimiedi cue amana, cue miriñona, cue eina. Imaci ua cue cominina.

13

Trigo judaidimie rafue
(Mr 4.1-9; Lc 8.4-8)

¹ Nai jofomona nairui Jesús jaillanona, jorai fue dine jaide. ² Ailluena comini nainomo ofilla jira, botemo Jesús jaillano, ana raide; iadedi comini jorai fuedo itimaci. ³ Ailluena rafue naimacimo llote:

—Jusiñamui omoina sedaacana omoi fueollena, bie rafuena lloiticue. Damie trigona judaiaide. ⁴ Naimie judaiaimona, naisomo janore iduai juide. Naimie bai jailla mei, silliniiai iena guisaibitimaci. Ie jira sicoñede. ⁵ Nofiemo jiaie iduai juide. Nainomo enirue raise iñede. Sicode; iadedi enirue raise iñena jira, ⁶ raise jainañena jira, ecasillamona duide. Ie jira llisiñede. ⁷ Eecuai illanomo jiaie iduai juide. Eecuai sicuamona, riarai eecuai ibaica. Ie jira

llisiñede. ⁸ Mare eniruemo jiaie iduai juide. Sicode. Llisillamona danademo cien diga llisillana ote. Jiaenamona sesenta diga llisillana ote. Jiaenamona treinta diga llisillana ote. ⁹ Omoi jeforena jira, raise fueollena, cue lluamo cacarei. Iena ñino.

Jesús ie como lloga rafuena llofuia rafue

(Mr 4.10-12; Lc 8.9-10)

¹⁰ Ie llofueoicaigano Jesúmo jicanuaibiside:

—¿Bue ñellena bie isoide rafuedo cominina llofuetio?

¹¹ Uai ote:

—Jusiñamuidi omoina ie sedaacana rafuena jai uiñotade. Jiaie iena uiñoñedomoi. Jiaie cominina iena nia uiñotañede. ¹² Jusiñamuina ñnotimie Jusiñamui rafuena ñnocana jaite. Jusiñamui naimiena uiñotaite; iadedi Jusiñamuina ñnoñedimie Jusiñamui rafuena uiñoñecana jaite. ¹³ Ie jira bie isoidicinodo naimacimo lloticue. Cue siño finoca rafuena cioidimaci; iadedi iena naimaci ñnoñena jira, uiñoñeno jaitimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci.

¹⁴ Isaías micori naimacina jaie cuega rafue birui jai suide. Jiaie raite:

Jusiñamui llote: “Cue rafuena cacaitomoi; iadedi iena cacaiñeitomoi.

Rafuena ciotomoi; iadedi iena uiñoñeitomoi.

¹⁵ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaacaiñedomoi.

Jai uisnidomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue dibeimo iacaiñedomoi, omoina cue jilloitai raillanona”.

Isaías micori Jusiñamuina ñnoñedinona iese jaie cuete; ¹⁶ iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi ñnua jira, ni ua omoi marena ille jillaci. ¹⁷ Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie ñnotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

Jesúdi trigo judaidimiena llua rafue

(Mr 4.13-20; Lc 8.11-15)

¹⁸ Jesús llote:

—Ero, omoina trigo iduaina judaidimie rafuena llofueiticue. ¹⁹ Dajerie iduai naisomo juide. Dajerie comini comeciai naie naiso isoidimaci. Jusiñamuidi ie cominina sedaja rafuena cacadimaci; iadedi iena cacaiñedimaci. Ie jira Taifedi naimaci comeciamo cacaja uaina ñnotañede.

²⁰ Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci. ²¹ Nofiemo riga iduai jainaonidedi raise sicoñede. Naie comini janore ñnua jira, ie isoidimaci.

Dallu nano ñnotimaci. Jusiñamui uai muidona duere naimaci sefuia, abido danomo uaidimaci. ²² Jiaie iduai eecuai illanomo juide. Naie iduai sicua mei, iena eecuai ibaila jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciamo itabiñede. Jusiñamui jitaille rafuena finocana jaiñedimaci. ²³ Jiaie iduai mare eniruemo juide. Dajerie comini comeciai naie enirue isoidimaci.

Jusiñamui uaina cacajano, iena raise cacadimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci.

Dajerie eo jaidimaci. Dajerie ua eo raise jaidimaci. Iese omoi jai.

Raiticiai trigo motomo illa rafue

²⁴ Jesús jiaie rafuena llote:

—Jusiñamui ie cominina sedaacana rafuena lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie trigona judaiaide. Ie illimo mare iduaina judaide. ²⁵ Naimie inia mei, ie enoidimie trigona eruaide raiticiaina bainino judaiaide. Iemei oni jaide. ²⁶ Trigo sicuamona lliside. Naie facaise naie raiticiai como raise bairede. ²⁷ Judaidimie maijiraini iena ciuanona, naimiemo llote: “Mare iduai navui ritio. ¿Niesedeta raiticiai eo sicode?” ²⁸ Uai ote: “Cuen a enoidimie iese finoca”. Naie maijiraini naimiemo jicanotimaci: “¿Birui nai raiticiai cai raitiana jitaideo?” ²⁹ Uai ote: “Dama ite. Raiticiai omoi raitia, trigona jiai jaitaitomoi. Dama iesede. ³⁰ Danomo sicoite. Ua facaiseconi cue maijirainimo lloiticue: “Raiticiai nano jaita. Danomo ofita, jobaillesa. Trigo uanona, cue jofomo atianona, eeno”.

Jesúdi mostaza ido llua rafue

(Mr 4.30-34; Lc 13.18-19)

³¹ Jesús jiaie rafue llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Damie mostaza idona rillamona, naiemona eo aillue riar a sicode. ³² Mostaza ido eo janorede; iadedi sicua mei, eo aillue riar a jaillamona, nainomo sillini ai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

Jesús siritate rana llofuia rafue

(Mr 4.33-34; Lc 13.20-21)

³³ Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

³⁴ Naie isoide rafuedo Jusiñamui ie cominina sedaacana rafuena cominimo Jesús llote. Jiaie rafuedo iena lloñede. ³⁵ Jusiñamui facaina lloñeima micori iena jaie cuega:

Jusiñamui llote: “Jiaie isoide rafuedo cominimo lloiticue.

Comini nia uiñoñega rafuena lloiticue. Enirue finua facaisemona jaca bu iena uiñoñede.

Birui naimaci uiñoñella, iena lloiticue”.

Jesús trigo motomo riga raiticiaina llofuia rafue

³⁶ Comini jino faionocaida, Jesús ie risoilla jofomo abido jaide. Ie llofueoicaigano naimiemo llotimaci:

—Iena raise cai uiñoñella, trigo motomo riga raiticiai rafuena caimo llono.

³⁷ Uai ote:

—Mare iduai judaidimiedi cue. Jusiñamui rafuena lloticue. ³⁸ Naie illidi nana comini. Mare iduaidi Jusiñamui duide comini. Raiticiaidi Taifemo duide comini. ³⁹ Naie marañede iduai judaidimiedi Taife. Ua facaisedi cue abido bille facaise. Trigo otinodi Jusiñamui jaienisaí. Trigodi cuena inotino. ⁴⁰ Jobaillena raiticiai ofitaja isoi, ico abido cue bia, daje isoi iite. ⁴¹ Cue jaienisaína oretaiticue, nana jeacinona finoraini diese ofitallena, cue illanomona iraimo dotallena. ⁴² Nainomo eo duere sefuillamona, eetitimaci. Subcaitimaci. ⁴³ Iemei jitoma lligaiñua isoi, Jusiñamui sedajanomo naimiena inotinodi marena bairenitimaci. Omoi jeforena jira, raise fueollena, cue llamo cacarei. Bie isoi omoi duere sefuiñellena, cue lluna ino.

Jesúdi eniruemo isiruiga reica rana llofuia rafue

⁴⁴ Jesús llote:

—Jusiñamui díbeimo comini jailla rafuena lloiticue. Jiaie uaido iena omoimo lloiticue. Eniruemo isiruiga raifide ra bu baia, ie nama jai iñena jira, naie eniruena uainino ibaacadé, naie ra ollena. Ucube ollena, naie rari iobilla jira, nana naimiemo ite raruiaina fecaite. Iemei eniruena ibaite. Ie isoide. Jusiñamui illanomo omoi illena, jiaie rafue uanona jaiñeno. Dani Jusiñamui rafuena uanona jai. Dani iemo omoi comeciaina faca.

Perlas railla rafue

⁴⁵ Jesús llote:

—Jusiñamui díbeimo comini jailla rafuena lloiticue. Iena omoi raise uiñollena, perlas railla rana ibaraimana lloiticue. Eo mare perlas iballena jenocabide. ⁴⁶ Eo raifide perla naimie baia, naie perlana iballena, nana ie raruiaina fecaite. Ie isoide. Jusiñamui ie cominina sedaacaja rafuena omoi cacaja jira, iena ocana jai.

Jesús lloijina ñaia rafue

⁴⁷ Jesús llote:

—Jusiñamui díbeimo comini jailla rafuena lloiticue. Iena omoi raise uiñollena, lloijina lloiticue. Joraimo lloijina comini faianona, naga isoide lliciaina otimaci. ⁴⁸ Ari sonua mei, mare lliciaí diese fetodimaci. Marañede lliciaí diese oni faitimaci. ⁴⁹ Ie isoide. Ico abido cue bia, iese iite. Jusiñamuina inotinomona naimiena inoñedino diese oni fetollena, Jusiñamui jaienisai biitimaci. ⁵⁰ Iemei iraimo Jusiñamuina inoñedinona dotaitimaci. Nainomo eo duere sefuillamona eeditimaci. Subicaitimaci.

Jesús llofueoicaiganodi mare rafuena jai uiñua rafue

⁵¹ Ie llofueoicaiganomo Jesús jicanote:

—¿Nana cue llua na cacadomoi?

Uai otimaci:

—Jii, nana cacadicaí.

⁵² Naimacimo llote:

—Ie jofomo comini bia, naimacina raise nafuellena, naimacina caimare itatallena, jofo nama ie mare raruiaimona naimaci jitailla ra naimacimo fecade. Comini comeciaina lloticue. Jusiñamui facaina lloraini micoriai llogacinona uiñotomoi. Cuemona Jusiñamui ie cominina sedaja rafuena fueocana jiaí jai jaidomoi. Comini comeciaina caimare itatallena, birui llofueredomoi.

Nazaretmo Jesús illa rafue

(Mr 6.1-6; Lc 4.16-30)

⁵³ Naie rafuena Jesús llua mei, nainomona Nazaretmo jaide. ⁵⁴ Ie eniruemo rillanona, Nazaretmo ite ofiracomo llofue. Naiemona cominidi rajicaillamona raitimaci:

—¿Ñiese naimiedi eo abina uiñote? ¿Ñiese siño rafuena naimiedi finode? Naimiedi jamai bue isoidimie. ⁵⁵ Naimie amederaima jito. Naimie eidi María. Naimie amatiaidi Jacobo, José, Simón, Judas. ⁵⁶ Naimie miriñotiaidi cai motomo jiaí ite. Naimaci diga nagarui nabairiticaí. Naimieori cai nabairicabilla. Ie jira, ¿ninena ie siño uaina ote?

⁵⁷ “Cai comena naimie ite” raillanona, naimie uaina jamaidimaci. Jesús naimacimo llote:

—Naga illanomo cominidi Jusiñamui facaina lloraíma uaina feiñotimaci; iadedi naimie nairaímo naimie ia, ie risoilla jofomo naimie ia, ie comini

naimie uaina feiñoiacasiñede. Jamaisite. Ie isoide. Cue cominidomoina jira, cue uaina ñnoñedomoi.

⁵⁸ Naimie uaina naimaci ñnoñena jira, Jesús ailluena siño rafue finoñede.

14

Juan Bautista micori fiodailla rafue

(Mr 6.14-29; Lc 9.7-9)

¹ Naie facaiseconi Herodes railla gobernador Jesús mamecina cacade.

² Naimie ecimo maijuidinomo llote:

—Fiodaillamona Juan Bautista micori jai jillode. Jesús raillamiedi naimie. Ie jira naimiedi siño rafuena finocabide.

³⁻⁴ Iese raite, Herodes Juan micorina navui meinetaja jira. Juan Bautista micorina nia meinetañenia, Herodedi ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

Herodes Juan micori lluaña gaiñenano, naimiena duere finode. Herodes Juan micorina gaitatajanona, cárcelmo jonetade. ⁵ Naimie micorina meinentaacade; iadedi Herodes dinena cominina jaciruite. Juan micoridi Jusiñamui facaina lloraimana naimaci raillanona, naimie micorina jaciruite. ⁶ Iemei Herodes cumpleaños ie rafuena finode. Nainomo jiaie cominina uaidote. Rafuemo Herodías jisa naimaci uicomo saillamona, Herodena iobitade. ⁷ Ie jira naiñaiñomo llote:

—Ñie isoide rana o jitaiadedi, omo iiticue. Illaíma uai cuemo illa jira, iena ua finoiticue.

⁸ Naiñaiño ei naiñaiñomo lluañona, naiñaiño uai ote:

—Juan Bautista ifogi bandejamo jonecaida, cuemo ine.

⁹ Iena cacajano, naimie sunaite; iadedi naimie jino ie llua uaina jira, nainomo naimie uaidogano jiai jai cacaja jira, Juan micorina meinetajana llote. ¹⁰ Ie lloga uaina finollena, cárcelmo soldadona orede. Nainomo Juan micori ifogina jaitade. ¹¹ Bandejamo naimie micori ifogi jonecaida, soldado atiano, Herodías jisamo fecade. Ieconi ie eimo fecade. ¹² Iena fidianona, Juan micori llofueoicaigano naimie micori abina uaibitimaci. Iena naimaci raia mei, Jesúsno lluaidimaci.

Jesús cinco mil iñiaína ecaja rafue

(Mr 6.30-44; Lc 9.10-17; Jn 6.1-14)

¹³ Juan micori meiniana Jesús fidiano, nainomona comini iñenanomo ie llofueoicaigano diga botedo jaide; iadedi naimie jaillana comini fidiano, naimiena racadimaci. Diga comini illanuaimona eillido bitimaci. ¹⁴ Eniruemo Jesús sijia, ailluena cominina dafaifide. Naimacina ciuanona, naimacina duenaillanona, duidinona jillotade. ¹⁵ Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade. Cominina mai abido oreta. Ianori ite nairaimo naimaci guille ollena, naimacina oreta.

¹⁶ Uai ote:

—Naimacina oretañeiticue. Naimacina omoi eca.

¹⁷ Uai onaisite:

—Dani caimo ite cinco llomenico, mena lliciai diga.

¹⁸ Uai ote:

—Iena cuemo ati. ¹⁹ Raitie illanomo comini ana raillesa llono —raite.

Naie cinco llomenicono naie mena lliciai diga uanona, monamo eruailanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. ²⁰ Nana guillanona

monidimaci. Monillamona, fiebide guillena iraidimaci. Doce cirigaiaimo oruitatimaci. ²¹ Cinco mil iñiaie diese guitimaci. Naimaci aitiai jiaie guitimaci. Naimaci uruiaie jiaie guitimaci.

Jesús jinui emododo macarilla rafue

(Mr 6.45-52; Jn 6.16-21)

²² Guilla mei, botedo ie llofueoicaigano ruica dine jaillena llote. Naie facaiseconi naimie cominina nia facadote. ²³ Cominina facadua mei, ane-duaimo dane jaide, Jusiñamui diga ñaillena. Jitibicaidemo nainomo dama ite. ²⁴ Naie facaiseconi ie llofueoicaigano jorai motomo itimaci. Aifi billamona, eo bagode. Naimacimo riire aifi rilla jira, riire jaitimaci. ²⁵ Nia monañedemo, jinui emododo naimaci dine Jesús bite. ²⁶ Naimiena naimaci ciuanona, jacinaillamona, raitimaci:

—¿Bu joreño caimo billana ciodicai? —Jacinaillamona cuiroidimaci. ²⁷ Naie dacaño Jesús naimacimo llote:

—Omoi joreñonicaiñeno. Cuesa. Jaciruiñeno.

²⁸ Pedro uai ote:

—Uanaie cai Namadio. O dine cue billesa cuemo llono.

²⁹ Jesús uai ote:

—Cue dine bi. —Ie jira botemona jinui emodo Jesús dine Pedro macarite;

³⁰ iadedi aifi billana naimie ciuanona, jacinaite. Jinuimo anabaiacade. Ado cuiριοide:

—Nama, cuena cano.

³¹ Jesús ie onolli oni ñuitajanona, naimiena llinuanona, raite:

—Eo janore cue uaina ñnotio. ¿Bue ñellena eo ñnoñedio? Cuena ñnotiodena, jinui emododo cue dine niadedi ridio.

³² Botemo a iaiaiaie jaillamona, ie facaise aifi llücaide. ³³ Ie jira botemo itino Jesúmo iobillacinona fecadimaci.

—Odi ua Jusiñamui Jitodio —raitimaci.

Jesúdi duidinona Genesaret eniruemo jillotaja rafue

(Mr 6.53-56)

³⁴ Ruica dine jaillanona, Genesaret railla eniruemo ridimaci. ³⁵ Jesúna nainomo itino uiñuamona, naimie dine duidinona atillena, nana nairaimo jiaie cominina oredimaci. ³⁶ Naimie dine billanona, dani ie ñiroi fuedamo jutadallena naimiemo jicanotimaci. “Naimie ñiroimo cai jutadallemona jilloiticaie” raillamo comeciaina facadimaci. Nana jutadate diese jillodimaci.

15

Jesúdi comini comeciaina ñaia rafue

(Mr 7.1-23)

¹ Jerusalémona fariseuai comini Jesús dine bitimaci. Moisés micori llogacinona llofueraini jiaie bitimaci. ² Naimiemo jicanotimaci:

—¿Bue ñellena o llofueoicaigano cai einamacie rafuedo jaiñedomoi? Naimaci guiacania, naimaci onolli cai einamacie llua isoi raise jocoñedomoi. Ie jira cai abimo jeacino finodomoie.

³ Jesús uai ote:

—¿Bue ñellena nana Jusiñamui llogacinodo jaiñedomoi? Omoi einamacie llogacinodo jaidomoi; iadedi nana Jusiñamui llogacinodo raise jaiñedomoi.

⁴ Jusiñamui jaie llote: “O moo uai ñnuanona, naimiena cano. O ei uai ñnuanona, naiñaiñona cano. Ie moori jeare ñaitimie, ie eiri jeare ñaitimie meinelle”. ⁵ Iese Jusiñamui llote; iadedi omoi einamacie llotimaci: “Jusiñamuimo cai ucubena cai fecajamona, cai moonna, cai eina jai

canonidicaí”. ⁶ Iese omoi finocabilla jira, omoi einamaci llogacinodo omoi jaillamona, Jusiñamui uaina jamaidomoi. ⁷ Mareuidinona abi caitauidinodomoi. Isaías micori omoína jaie raise llote. Naimiedi Jusiñamui llua cuete:

⁸ Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruticaí” llotimaci. “Ona sedadicaí” llotimaci.

Jamai ñaitimaci. Naimaci comeciai cue dibeimo raise iñede.

⁹ Cue uai itena, jamai comini llucanona naimaci llofuecabilla jira, tainona cuena sedadimaci.

¹⁰ Fariseuai diga iese llua mei, naimie ecimo ailluena comini dane ofllanona, naimacimo llote:

—Iena raise omoi uiñollena, cue llua mo cacarei. ¹¹ Omoi einamaci isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoi. Omoi guigamona, omoi onollina jocuamona, Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciai jearena jira, jeacinona finocabidomoi.

¹² Ie llofueoicaigano naimiemo lluaibitimaci:

—O llua muidona, fairseuai cominina icidio.

¹³ Naimie dinena uai ote:

—Dama ite. Nana cue Moomona oñega rafuedi jai ieconi duite. Naimaci rafue cue Moomona oñenia, ja muidomo ieconi duite. ¹⁴ Naimacina fañonocai. Uanaicinona naimaci uiñoñena jira, uisnidino isoidimaci. Jaimiena uisnidimie ifoia, dafomo uaidiaimaia. Ie isoide. Uanaicinona fariseuai uiñoñena jira, uanaicinona llofuenidimaci. Uanaicinodo jaiñedimaci. Ja muidomo faifitimaci.

¹⁵ Pedro naimiemo llote:

—Aillinano o llua caimo raise llono.

¹⁶ Uai ote:

—¿Ñiese cue llua jiai nia cacaiñedomoi? ¹⁷ Ñie isoide ra guitomoina, omoi jebemo jaide. Ie mei omoi abiaimona jino bite; ¹⁸ iadedi omoi comeciaino iticinomona jearedena ñaitomoi. Omoi comeciai jearena jira, jearede rafuena finocabidomoi. ¹⁹ Omoi comeciai jearena jira, jeare comeciaina facacabidomoi. Comena meinecabitomoi. Omoi aiñede riño diga icabitomoi. Omoi iniñede ima diga icabitomoi. Fñricabitomoi. Tainona llogiricabitomoi. Jiaie comini joreña jeare ñaicabitomoi. ²⁰ Bie isoidicinuai omoi comeciaino illa jira, jearede rafuena finocabidomoi; iadedi omoi einamaci llua isoi, omoi onolli jocoñenamona jeacino comuiñede.

Jesúdi judío iñaiñoñediñaiñoña jillotaja rafue

(Mr 7.24-30)

²¹ Genesaret railla eniruemona ie llofueoicaigano diga Jesús jaillanona, Tiro railla eniruemo jaide. Sidón railla eniruemo jiai jaide. ²² Ie facaiseconi naie eniruemona judiñediñaiñodi billanona, raite:

—Maestro, David micori jitodio. Jusiñamuimona o billa jira, cuena duenai. Cue jisa Janaba anamo ite. Naiñaiño eo duere sefuicabide.

²³ Jesús uai oñede. Ie jira ie llofueoicaigano naimie dne billanona, duere llote:

—Naiñaiñoña abido ie jofomo oreta. Caimo duere jicanuaibitesa.

²⁴ Jesús uai ote:

—Faificana jaillana naimaci jai jailla jira, dani cai judiuaí cominimo cue Moo cuena oretate. Naimiedi judiñediñaiñoño cuena oretañede.

²⁵ Ie facaise naimie dne naiñaiñoña billanona, naimiemo iobillacinona fecalena, caiñici ifodo ana rainada raite:

—Maestro, cuena cano.

²⁶ Judíuainēdinona naimie canoñenana naiñaiño uiñollena, naiñaiño mo Jesús llote:

—Uruiaí guillamona jiconiaina ecadicaidena, maraiñede.

²⁷ Naiñaiño dinena uai ote:

—Jii, maestro; iadedi jiconiaidi imaci nama guillamona fiebide guillemona guitimaci. —Iese llote; ia jiaie rafuemo comequina facade. Uruiaína llote; iadedi judíuaimo comequina facade. Jiconiaina llote; ia judíuainēdinomo jiaí comequina facade. Comequina facade: “O cominimo o rafue duide; ia cai Namana o illa jira, nibai o rafue caimo janore duide”.

²⁸ Jesús uai ote:

—Cue uaina o ñnua jira, o jitailla rafuena finoiticue. —Ieconí naiñaiño jisa jillode. Janaba naiñaiñomona oni jaide.

Jesús ailluena duidinona jillotaja rafue

²⁹ Nainomona Jesús bai jaillanona, Galilea railla jorai fuedo jaide. Iemei aneduaimo jaillanona, nainomo ana raide. Nainomo rilla mei,

³⁰ ailluena comini naimie dine bitimaci. Ailluena duidinona atidimaci. Ñuja-ñujacaida macaritinona, onollina idisaruidinona, uisnidinona, uainidinona atidimaci. Diga duidinona naimie dine atidimaci. Iemei naimacina jillotate.

³¹ Ailli uainidino jai ñaiana cacajamona, ailli onollina idisaruidino onolli jai marenana illana ciuamona, ailli ñuja-ñujacaidino macaritino jai marena macarillana ciuamona, ailli uisnidino jai ciuana ciuamona, nainomo ite comini eo rajicaidimaci. Cai Jusiñamuimo iobillacinona fecadimaci.

Jesúdi cuatro mil iñiaina ecaja rafue

(Mr 8.1-10)

³² Jesús ie llofueoicaigano naimie dine uaiduanona, raite:

—Bie comini darui amani bene cue diga illa jira, naimacimo guille jai iñede. Naimacina aimeri oretaiacaiñedicue, naisomo naimaci bai raillanona. Naimacina cue duenailla jira, naimacina canoacadice.

³³ Jicanotimaci:

—¿Ninomona guille oiticaí, naimacina cai ecallena? Ailluena comini ite; iadedi jofue iñenanomo iticaí.

³⁴ Jesús jicanote:

—¿Niga llomenico omoimo ite?

Uai otimaci:

—Siete. Janorede llicisiriaí caimo jiaí ite.

³⁵ Comini ana raillena Jesús llote. ³⁶ Naie llomenico llicisiriaí diga uanona, Jusiñamuimo iobillacino fecade. Tailluanona, ie llofueoicaiganomo fecade, naie cominimo fecallena. ³⁷ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. ³⁸ Nainomo cuatro mil iñiaí guitimaci. Naimaci añaí jiaí guitimaci. Naimaci uruiaí jiaí guitimaci. ³⁹ Iemei cominina naimaci jofuemo orede. Naimacina oretaja mei, botedo Magdala railla eniruemo Jesús jaide.

16

Fariseuai comini Jesús mo siño rafuena finuana jicanuano billa rafue

(Mr 8.11-13; Lc 12.54-56)

¹ Dajerie fariseuai comini Jesús dine bitimaci. Naimiena facacillena, dajerie saduceuai comini jiaí bitimaci. Siño rafuena naimie finuana jicaacadimaci. Iena naimie finoñedena, naimie ie llua isoi iñenana uiñoitimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

² Jesús uai ote:

—Jitoma sojicaidemo, mona jiairenia, raitomoi: “Ico are maremonanite”.

³ Jiai raitomoi: “Jitiramo mona jiairenia, ja noci deite”. Monamo omoi eruaiillamona, marena monaillana uiñotomoi; iadedi birui cue finoca rafuena raise uiñoiacaiñedomoi. Omoi motomo birui suide rafuena raise cacaiñedomoi. Abina uiñotinona abi caitadomoi. ⁴ Jeacinona finocabidomoi. Jusiñamui dibeimo raise iacaiñedomoi. Siño rafuena finoñeiticue. Jonás micorimo jaie suide rafuena uiñotomoi. Jusiñamui naimiemo siño rafuena finode. Naiemo comeciaina omoi faca. Fiodaillamona naimie jillode. Ie isoi cue jiai jilloiticue. —Ie llua mei, naimacimona Jesús ie llofueoicaigano diga oni jaide.

Jesús siritate rana llofuiia rafue

(Mr 8.14-21)

⁵ Ruica dine naimaci rillanona, ie llofueoicaigano llomeniconna feillana uibiñotimaci. ⁶ Iena naimie uiñuamona, naimacimo Jesús llote:

—Fariseuai siritate ramona abina rairui. Saduceuai siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite. ⁷ Jesús iese llua jira, iena naimaci raise cacaiñena jira, dani coninari siadotimaci:

—Llomeniconna cai atiñena jira, caimo iese llote.

⁸ Naimaci siaduana Jesús uiñua jira, naimie llua naimaci nia raise cacaiñena jira, naimacimo llote:

—Cue uaina nia raise ñnoñedomoi. Omoína canoredicue. ¿Bue ñellena dani omoi llomenico iñenana siadotomoi? ⁹ ¿Ñiese ñnoñedomoi? ¿Ñiese cue navui siño finoca rafuemo comeciaina facañedomoi? Navui cinco mil iñiaí cinco diganicodemo guitimaci. Monillamona, guigamona fiebillamona, doce cirigaiaimo iraidomoi. ¹⁰ Jiaicaiño cuatro mil iñiaí siete diganicodemona guitimaci. Monillamona guigamona fiebillamona, siete cirigaiaimo iraidomoi. ¹¹ Omoína cue ecallena, ¿ñiese cuena birui ñnoñedomoi? Llomeniconna ailli ñaññedicue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaiticue.

¹² Ie facaise naimie llua jai cacadimaci. Llomenico siritate rana naimie ñaññede; iadedi fariseui llofuiacinomona naimaci abina rairuillena ñaite. Saduceuai llofuiacinomona naimaci abina rairuillena ñaite.

Pedro Jesúsna llua rafue

(Mr 8.27-30; Lc 9.18-21)

¹³ Cesarea Filipo railla enruemo Jesús jaidemo, ie llofueoicaiganomo jicanote:

—¿Ñiese jiaie comini cuena raitimaci?

¹⁴ Uai otimaci:

—Damierie raitimaci: “Odi Juan Bautista micoridio”. Damierie raitimaci: “Odi Elías”. Jiaino raitimaci: “Jeremías micoridio”. Jiaino raitimaci: “Jusiñamui facaina lloraina micoridio”.

¹⁵ Jesús dane jicanote:

—¿Ñiese omoi cuena raitomoi?

¹⁶ Pedro uai ote:

—Odi cai jilloitaraimadio. Cristodio. Jusiñamui facaina lloraini micoriai o billena jaie llotimaci. Cai cajede Jusiñamui Jitodio.

¹⁷ Jesús dinena uai ote:

—Simón Pedro, Jonás jitodio. Marena llotio. Comini ona iena uiñotañede; iadedi cue Moo Jusiñamui ona iena uiñotade. ¹⁸ Pedro, o comeciaina uiñotitue. Cuena como o lloga uaina meidoñeitio. Bie rafuena jiaie cominimo o llua amona, jiai ñnoitimaci. Cuena ñnuamona, cue cominina jaitimaci. Cue

dibeimo iñedino iena itatanidimaci. ¹⁹ Ailluena cominimo Jusiñamui ie cominina jailla rafuena nano lloraimana jaitio. O llucinodo jaitino cue cominina jaitimaci. O llucinodo jaiñeitino cue cominina jaiñeitimaci

²⁰ Iena llua mei, ie llofueoicaiganona rairuide:

—Cue Cristonana bumo nia lloño.

Jesús ie fodaillena llofuia rafue

(Mr 8.31–9.1; Lc 9.22-27)

²¹ Naie facaisemona ie llofueoicaiganomo Jerusalémo naimie jaillena marefodo llote:

—Nainomo cai judíuai illaicomini cuena eo duere finoitimaci. Cuena meineitimaci; iadedi darui amani illanona, fodaillamona jilloiticue.

²² Pedro dinena lletade:

—Nama, ¡Jusiñamui iena jitaiñede! Bie isoide rafue omo suiñeite.

²³ Jesús jinafo dine naimiemo erodate. Raite:

—Cuemona oni jai. Iese ñaiño, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio. Iese o comecina facañeno.

²⁴ Ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fodaite. Bu iese jaiacania, cue dibeimo naimie iite. ²⁵ Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jaia, jaca faifñeite. ²⁶ Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿niese cue Moo dine riite? Nainomo naimie riño faifite. ²⁷ Cue jaienisaí diga cue Moo dinena monamona ico biiticue. Cue Moo uai cuemo illanona, ebirena biiticue. Nagamie imaci finoca rafue diese cue iba ollena biiticue. Cue cominiñedinona duere finoiticue. ²⁸ Uanaicinona omoimo lloiticue. Omoimona dajerie nia fioidañeitomoimo, illaimana cue bairellena cioitomoí.

17

Jesús abi meidocaila rafue

(Mr 9.2-13; Lc 9.28-36)

¹ Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobona jiai uite. Jacobo ama, Juan, jiai uite. Jiaie llofueoicaiganona uiñede. ² Nainomo rilla mei, naimaci uicomo naimie abi meidocaide. Jitoma isoi naimie uieco bairecaide. Naimie iniroi naie daciaño eo userecaide. ³ Naie facaise naimacimo Moisés micori joreño, Elías diga bairede. Elíadi Jusiñamui facaina jaie lloraima. Jesús diga ñaitiaimaiai.

⁴ Jesúmo Pedro llote:

—Nama, bene cai illana mare. O jitaia, daje amani bisaini finoiticue. Daje oue; jiaie Moisés micori ie; jiaie Elías ie.

⁵ Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruiga Jito. Naimieri iobidicue. Naimie llamo cacareillanona, iena ñino —llote. ⁶ Jesús llofueoicaigana iena cacajanona, eo jaciruillanona, naimaci uieco dinena ana bitadatimaci. ⁷ Jesús naimaci dine billano, naimacina jetajanona, raite:

—Mai jaciruiño naidacai.

⁸ Naimaci erorillamona, dama Jesúna cioidimaci. ⁹ Anedumona bitimacimo, naimacimo Jesús llote:

—Omoi ailli cúa rafuena bumo lloño, cue fodaillamona cue jillua dinori.

¹⁰ Naimiemo llotimaci:

—Moisés micorí llogacínona llofueraini birui raicabitimaci: “Elías raillamie dane biite. Ie mei cai Jilloitaraíma biite” raitimaci. Jusiñamuimona o billana ñnoticai. Odi cai Jilloitaraímana ñnoticai. Odi cai Jilloitaraímadíomo, ¿bue ñelli iese raitimaci?

¹¹ Uai ote:

—Raise ñnotomoi. Elías isoidímie jai bite, nana Jusiñamui jitailla rafue raise lollena. Jusiñamui díbeimo naimaci illena, comíni imaci comecíai meiduana llote. ¹² Ero, naimie jai bite; iadedí bie comíni naimiena raise uiñoñedímaci. Naimaci jitailla jira, naimiena jai meinetimaci. Ie isoide. Naimacimona duere sefuitícue. Monamona bitícue, íimana cue jaillena; iadedí duere sefuitícue.

¹³ Ie muidona Jesús llofueoicaigano naimiedí Juan Bautista micorína ñaiana jai uiñotimaci.

Jesúdi Janaba anamo itímiena jillotaja rafue

(Mr 9.14-29; Lc 9.37-43)

¹⁴ Ie jiaie llofueoicaigano díne Jesús abido ria, nainomo ailluena comíni itimacímoo ride. Jesús díne damíe billanona, naimiena raise uaiduanona, caiñíci ífodo rainadacáida raite:

¹⁵ —Maestro, cue jítóna duenai. Janaba anamo naimie ite. Iemona naillicabide. Duere sefuide. Uai-uacabide. Jiaicaiñodedí iraimo uaillanona, uside. Jínuimo jiaí uaillanona, niadedí corobaite. ¹⁶ Naimiena jilloitallena o llofueoicaigano díne naimiena atídícue; iadedí naimiena jillotanidímaci.

¹⁷ Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Cue mare rafuedo nia raise jaiacaiñedomoi. Omoi díga are itícue. Raise omoi ñnollena, ¿nie dínorí omoi díga íitícue?

Naie duidímie moomo llote:

—O jito cue díne mai atí.

¹⁸ Naimiena atíamona, Jesús naimiemo Janaba illana uiñote. Janabana Jesús lletaja jira, naie uruemoná Janaba oní jaide. Ieconí naie urue jillode.

¹⁹ Ie mei ie llofueoicaigano Jesúmo anado jícanotimaci:

—¿Bue ñellena Janabana oní oretanídícai?

²⁰ Uai ote:

—Raise nia omoi ñnoñena jira, uanaicínona omoímoo lloítícue. Janaba oní oretallena, cue uai navuí omoímoo itícue. Biruí raise cuena omoi ñnoñena, bie Janaba oní oretanidomoi. Jusiñamuina eo janore ñnotomoidena, díga rana finodomoi. “Oní baí jai” bie anedumo llotomoidena, omoína naimie canuamona, bie anedu oní lliáí baí jaite. Jusiñamuina omoi ñnoía, naga rana finoredomoi. ²¹ Jusiñamuimo omoi comecíaina facallena omoi guiñenamona, Jusiñamui díga omoi ñaíamona, bie isoide Janabana oní oretaredomoi.

Jesús ie fodaillena dane llofuia rafue

(Mr 9.30-32; Lc 9.43-45)

²² Galileamo ie llofueoicaigano díga danomoo ítemoo, Jesús naimacímoo llote:

—Monamona billanona, íimana jaidícue. Jusiñamui jitailla jira, cuena jiaie comíni gaitajanona, illaicomínímo fecaitimaci. ²³ Naie illaicomíní cuena meineitimaci; iadedí daruí amani illamona, cue Moo cuena jillotaite. —Iena cacajanona, ie llofueoicaiganodí sunaitimaci.

Jesúmo Jusiñamui jofo facaina damíe íbataja rafue

²⁴ Capernaumo naimaci rilla mei, Jusiñamui jofo ucube orainí Pedro díne jícanuaíbite:

—Moisés micori llua isoi, ¿o llofueraima Jusiñamui jofomo ucubena fecacabide?

²⁵ Pedro ñinena uai ote:

—Jii, fecacabide. —Ucube oraini jailla mei, jofomo Pedro billanona, Jesúmo iena nia lloñedemo, Jesús ñinena naimiemo jicannote:

—Simón Pedro, ¿niесе o comecina raitio? ¿Bumona illaicominiidi imaci ucubena ocabitimaci? Imaci jitoniamona ocabiñedimaci; ia naimacimo duide cominimona otimaci.

²⁶ Uai ote:

—Raise llotio. Naimacimo duide cominimona ocabitimaci.

Ie jira Jesús raite:

—Naimaci jitoniamona ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa jira, naimie jofo facaina naimie cuena ibatañede; ²⁷ iadedi Jusiñamui jofo ucube orainina coco iciñellesa, ucubena jenuai. Joraimo aimajaitiosa jai. Nano o olle lliciai fuena jibui. Nainomo ucubena baitio. Iena uanona, Jusiñamui jofomo coco facaina feca. —Pedro iena finode.

18

Jesús ie llofueoicaigano moto imiena ille rafue

(Mr 9.33-37; Lc 9.46-48)

¹ Naie facaiseconi naimie ñine ie llofueoicaigano jicannuaibitimaci:

—Jusiñamui ie cominina sedajanomo ico cai ia, ¿bu cai moto imiena ille?

² Iena cacajanona, Jesús daje urue uaiduanona, naimaci motomo jonete.

³ Uai ote:

—Uanaicinona omoimo lloiticue. Jusiñamui ñibeimo omoi illena, jeacinona omoi fañonocaiñenia, bie urue isoi omoi moto imieñedimiena illanona, Jusiñamui sedajanomo iñeitomoi. Cue cominina omoi ia, bie urue isoi iitomoi.

⁴ Bie urue isoi abi iedoñedimiedi Jusiñamui ie cominina sedajanomo imie moto naimiena ille. ⁵ Bie isoidimie cuemo duillamona, naimiena feiñotimiedi cuena jai feiñote; ⁶ iadedi cuena ñnotimiena jeacinona finotaiacadimie iena finoñellena, jeacinona finotaiacadimie cimaimo aillue nofici maianona joraimo corobaillena, naimiena dotacadena, cuemona mare.

Jesúdi jeacinona finoñenana llofua rafue

(Mr 9.42-48; Lc 17.1-2)

⁷ Jesús llote:

—Ramo faitino duere sefuillesa. Diga ramo omoi faicana uitinomo riitomoi; iadedi Jusiñamui omoi ramo faitimiena duere finoite. ⁸⁻⁹ Biena ñaiticue. Nie isoide rafue omoina jeacino finotaia, iena linoñeno. Naie rafue ñine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacino finodomo. Omoi abina omoi namatañeniadedi, omoi onolli jaita. Omoi uisina juicono. Iemona jeacinona finoñellena, Jusiñamui ñine daje onolli diga, daje eilli diga, daje uisi diga riitomoi; ia jeacinona omoi finoia, iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jeacino finoñeno.

Jesúdi naimiena ñnotinomona damie faifillana jitaiñena rafue

(Lc 15.3-7)

¹⁰ Jesús llote:

—Urue isoi omoi illena como lloticue. Iena dane lloiticue. Cue Moo naimacina uñua jira, bie urue isoidinona jamaiñocaiñeno. Monamo cue Moo

ecimo naimaci jaienisaí jaca ite, naimacina canollena. ¹¹ Jusiñamuimona cue billanona, naimiena ñnoñedinona naimaci jeacinomona jilloitallena biticue. ¹² Ero, omoimo iena jiaie rafuedo lloiticue. Damiemo cien diga toica llauda ite. Naiemona daje feiraite. Iena faifiñellena, jiaie llaudaiaina faionocaida, iena jenuaite. ¹³ Iena baillanona, ieri iobite. Baillari oni jaiñedinori baifemo iobite. ¹⁴ Ie isoide. Jusiñamui naimiena ñnotinomona damie faifillana jitañede. Ie jira naimacina jeacinona finotañeno.

*Jesús omoí ecimo itimie omoína jeare finuana llofuia rafue
(Lc 17.3)*

¹⁵ Jesús nia llote:

—O ecimo itimie ona jeare finoia, naimie dine iena lluai. Daímaiaí iena omico llono. O uai naimie fairioia, naimie o díbeimo jai iite. ¹⁶ O uai naimie fairioñenia, jiaí menamiena uíño, o lluomo íaímaiaí cacareillesa. ¹⁷ O uai naimie fairioñenia, omoí ofiracomo bicabitinomo iena llono. Naimaci uai naimie fairioñenia, Jusiñamuina ñnoñedimiena omoí nabaiñena isoi, Moisés llogacínodo raise jaiñedino omoí nabaiñena isoi, naimiena nabaiñeno. Omoí ofiracomo naimiena feiñoñeno. ¹⁸ Iese omoí finoia, omoí comeciaí daje isoi lloillamona, Jusiñamuimona mare.

¹⁹ Omoimo nia lloiticue. Daje isoi comecina cue Moo Jusiñamuimo jícallena menamaiaí facajamona, cue Moomo íaímaiaí jíanona, cue Moo íaímaiaí jitaílle rafuena finoite. ²⁰ Menamie cue díbeimo illamona, damie amani cue díbeimo illamona, naimaci motomo iticue.

²¹ Pedro naimiemo jícanuaíbite:

—Nama, cue ecimo itimie cuena jeare finoia, ¿níga ícaíño íbana cue oñeno iena feítaiticue? Níbaí siete dígacaiño.

²² Jesús dínena uai ote:

—“Níbaí siete dígacaiño” raitio. Ona jeare finodimie ie finoca rafuena naga ícaíño feita. Iena omoí raise uíñollena, bie rafuena lloiticue.

²³⁻²⁴ Jusiñamui ie díbeimo itinona iese sedaite: Daje nairaí illaimadí ie maíjiraínina uaidote, naimaci cuentas íballena. Damie eo debede. Díez mil ucubena debede. ²⁵ Naimie ucube íñena jira, naie illaimadí ie cuenta íballena, naimie aí, ie uruiaí díga, nana ie raruiaí díga, fecallena llote. ²⁶ Iena cacajano, ie illaima uicomo caíñici ífodo raíta duere jícade: “Nama, dama ite. Fecuisse omo íbaiticue”. ²⁷ Naimie duenaillamona, naie illaima llote: “Íbatañeíticue. Cuemo jai debeñedio. Maí jai”. ²⁸ Ie meí naimie jaide. Baí jaíllanona, jiaie maíjiraíma díga dafafide. Jai debeñedimie mo janore debede. Cien ucubena debede. Jai debeñedimie dínena ie cimáona llínuana llote: “O debia cuemo maí íba”. ²⁹ Ie jira debedimie caíñici ífodo ana rainadacaida, duere jícade: “Ucube cuemo íñede; íadedí cuena duenai. Fecuisse omo íbaiticue”. ³⁰ Uai ote: “Ja raíre jítaídícué”. Naimiena duenaiñena jira, cárcelmo naimiena jonetade, ie cuenta íballe dínoí. ³¹ Naimie nabaiñiaí iena fidiana, sunaitimaci. Ie jira naimaci illaima díne nana naie rafuena lluaídímaci. ³² Naie illaimadí nano debedimiena abído uaiduano, naimiemo llote: “Maraiñedio. Navui o cuentana íbatañedícué, cuemo o duere jícanua jira. ³³ ¿Bue ñe o nabaina duenaiñedio, ona cue duenalla isoi?” ³⁴ Ícírillamona, naie illaima naimiena cárcelmo jonetade, nainomo duere sefuíllena, nana ie cuenta íballe dínoí. ³⁵ Ie isoide. Cue Moo Jusiñamui omoína duere finoite, omoí comeciaí jítaíllamona omoí ecimo itimie ie maraiñede finoca rafuena omoí feitañenia —llote.

19

*Jesús iima ie aina dotaja rafuena llofuia rafue
(Mr 10.1-12; Lc 16.18)*

¹ Ie llofueoicaigano diga Galileamona jaillanona, Jordán railla ille ruica dibeimo Judeamo Jesús jaide. ² Ailluena comini naimiena racadimaci Nainomo duidinona jillotate. ³ Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio? ¿Ñie isoide rafue muidona damie ie aina dotarede?

⁴ Jesús dinena uai ote:

—Moisés micori jaie cuete: “Enirue finua facaiseconi Jesiñamuidi come iaímaiaína finode. Imana finode. Riñona jiai finode”. ⁵ Ie jira Jusiñamuidi jaie llote: “Ie ai diga illena, iima ie moona faínonocaite. Ie eina jiai faínonocaite. Ie ai diga illamona, menade comedi daamiena jai jaide” llote. ⁶ Menade come jai damiena jai ite. Jusiñamui iese iaímaiaína itataja jira, iima ie aina dotañellesa. Riño ie inina dotañellesa.

⁷ Dane jicanotimaci:

—¿Bue ñe Moisés micori cuete: “Iima ie aina dotaacania, dotalle rabena nano cueite. Ie mei naiñaiñona dotaite”?

⁸ Jesús uai ote:

—Jusiñamui uaina raise omoi inoñena jira, Moisés micori iima ie aina dotajana rairuiñede; iadedi nano dofoconi iese iñede. ⁹ Jiaie riño diga naimie illena, ie aina bu dotaia, jiaie iima diga naiñaiño iñenia, naimiedi jeacinona jai finode. Ie aina dotajana rairuidicue.

¹⁰ Naimiemo ie llofueoicaigano dinena llotimaci:

—Iese ia, cai jitaillamona aina jamai cai dotanina jira, damamei ainidicai.

¹¹ Naimacimo Jesús llote:

—Nana comini omoi como llucacino jainidimaci. Dani Jusiñamuina jitaídino iedo jairedimaci. ¹² Dajerie naimaci jeiciamona aireiacaiñedimaci. Dajerie naimaci abina diamona aireiacaiñedimaci. Dajerie Jusiñamuina eo sedaacanano aireiacaiñedimaci.

*Jesúdi naimie dine uruiai billana jitailla rafue
(Mr 10.13-16; Lc 18.15-17)*

¹³ Jesús dine comini naimaci jesanidena atisite. Ie onolli naimacimo naimie joniamona, naimaci facaina naimie Moo diga naimie ñaillena atisite. “Naimacina raise cano” ie Moomo lollena jitaídimaci. Ie llofueoicaigano iena rairuidimaci; ¹⁴ iadedi Jesús raite:

—Uruiai cue dine billesa. Naimacina rairuiñeno. Cuen a bie isoide inotínodi Jusiñamui ie cominina sedajanomo jainaiaídimaci.

¹⁵ Ie jira ie onolli naimacimo jonete. Naimie facaina Jusiñamui diga ñaite, naimaci marena illena. Ie mei ie llofueoicaigano diga naimie oni jaide.

*Ucuberedimie Jesús diga ñaia rafue
(Mr 10.17-31; Lc 18.18-30)*

¹⁶ Jesús oni jaillanona, conirue Jesús dine bite. Jicanote:

—Maestro, Jusiñamui diga cue jaca illena, ¿ñie isoide mare rafuena finoiticue?

¹⁷ Jesús dinena uai ote:

—¿Bue ñe cuemo mare rafuena finuana jicanotio? Dama damie maremie. Naimiedi Jusiñamui. Naimiemo jicano; ia jaca o illena, Jusiñamui jai llogacinuaina inocana jai.

¹⁸ Uai ote:

—¿Ñie llogacínuaína ñnoiticue?

Jesús dinena uai ote:

—Comena meineñeno. O añede riño diga iñeno. Fiiñeno. Jiaimiena o llogidoia, tainona lloñeno. ¹⁹ O moo uaina ñno. O ei uaina ñno. O abina o isiruilla isoi, nana cominina isirui.

²⁰ Naie conirue uai ote:

—Nana iena jai ñnoticue. ¿Ñie isoide rafuena nia finoiticue?

²¹ Jesús dinena uai ote:

—Jusiñamui jitaillacínodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cuen a o ñnuamona, monamo ico jaca iitio. Cue llofuegamiena o illena, mai cue diga bi.

²² Iena naimie cacajano, sunaite. Naimiemo eo ailluena ra illa jira, iena fecaacaiñede. ²³ Jesús ie llofueoicaiganomo llote:

—Uanaicínona omoimo lloiticue. Ucuberedimiedi Jusiñamui cominina jaillena eo sefuiruite. ²⁴ Iena nia lloiticue. Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

²⁵ Iena ie llofueoicaigano cacajano, Jusiñamui cominina ucuberedino raise jainina jira, “¿Ñiese dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, raitimaci:

—Nana comini rana jitailla jira, buca jillobiti.

²⁶ Naimacimo eruailanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁷ Pedro uai ote:

—Ero, o llua isoi nana cai rana fañonocaida, o diga jaicabidicai. ¿Ñiese Jusiñamuimona ibana feiñoiticai?

²⁸ Jesús dinena uai ote:

—Illaimana ico cue ia, eo ebirede illanomona cominina sedaiticue. Cue diga omoi jaicabilla jira, nainomo omoi illanuai jiai iite, nainomona omoi judíuai doce nairaiaina omoi sedallena. ²⁹ Cuen a naimie isiruillamona, ie jofona bu fañonocaia, ie amatiaina bu fañonocaia, ie miriñuaina bu fañonocaia, ie moon bu fañonocaia, ie eina bu fañonocaia, ie uruiaina bu fañonocaia, ie enruena bu fañonocaia, Jusiñamuimona ailluena ibana feiñoite. Monamo ico caimare iocire jaca iite. Nainomo benomo baifemo iocire caimare iite. ³⁰ Jamai bue isoidomoi. Omoimona jiaino jamai bue isoinedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

20

Jesús Jusiñamui ie cominina sedaacana llua rafue

¹ Jesús llote:

—Jusiñamui dibeimo comini jailla rafuena lloiticue. Naimie cominina naimaci jaillamona, Jusiñamuimona nana naimie comini daje isoidimaci. Iena raise omoi uiñollena, bie rafuedo iena lloiticue. Jitiramo daje patrón ie illimo maijillena, maijuidinona jenuaide. ² Dajeriena baillanona, “Omoimo daberie ibaiticue” llote. “Jee” raitimaci. Ieconie ie illimo maijillena, naimacina orede. ³ Jitoma nia oni daidemo, mercadomo naimie jiaionona ciodo. Jamai itimaci. ⁴ Ie jira naimacimo llote: “Cue illimo maijiai. Raise ibaiticue” llote. ⁵ Ie mei jaidimaci. Jitoma naidai ia, jiaionona cianona, naimacimo maijillena llote. Jitoma oni caidemo, jiaionona cianona, naimacimo maijillena jiai

llote. ⁶ Jitoma jasici muido itemo, jiaínona ciuanona, jicanote: “¿Bue ñellena namonana jamai itomoi?” ⁷ Uai otimaci: “Jaca caimo maijille rana budi lloñede”. Ie jira naimacimo llote: “Mai. Cue illimo maijiai” llote. ⁸ Jitoma edaciidemo, naie patrón ie mullaímamo llote: “Maijirainina uaido. Jinafona maijiaidinona raire nano iba. Ie mei jitiramo maijiaidinona jinafo iba” llote. ⁹ Ie jira jinafona maijiaidinona nano ibade. Dabe ibade. ¹⁰ “Naimaci baifemo feiñoiticaí” raillamo jitiramo maijiaidino comeciaina facadimaci; iadedi iese feiñoñedimaci. Nana daberie feiñoitimaci. ¹¹ Ie jira naie patrón joreña jeare ñaitimaci. ¹² “Jinafona maijiaidino dallu maijidimaci. Ecasilla facaise maijiñedimaci; iadedi namonana maijidicaí. Dani cai ibaja isoi ibadio” ñaitimaci. ¹³ Naimacimona damiemo naie patrón llote: “Ero, ona jeare finoñedicue. ‘Omo daberie facaiticue’ omo lloticue. O dinena: ‘Jee’ raitio. ¹⁴ O ucubena jai o feiñua jira, mai jai. Cue jitailla jira, da o ibaja isoi dallu maijidinona ibadicue. ¹⁵ Cue ucubena jira, cue jitaille isoi cue ibaia, ¿nese cuena jeare ñaitomoi? Jiaínona cue duenailanona, ¿bue ñellena uradoidomoi? Mai jai” llote. Jusiñamui ie cominina sedaacana omoi raise uiñollena, bie rafue jai lloticue. ¹⁶ Jamai bue isoidomoi. Omomona jiaíno jamai bue isoiñedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

Jesúdi ie fiodaillena dane llua rafue

(Mr 10.32-34; Lc 18.31-34)

¹⁷ Jerusalémo ie llofueoicaigano diga Jesús jaidemo, dani naimaci diga ñaillena, naimacina oni uite. ¹⁸ Raite:

—Ero, Jerusalémo jai jaidicaí. Monamona billanona, imana jaidicue; iadedi omoi illaicomini cuena gaitaitimaci. Gaitaja mei, cue meinel-lena lloitimaci. ¹⁹ Judíuaiñedino illaicominimo cuena fecaitimaci. Cueri jifanoitimaci. Cuena faitimaci. Ie mei cuena coraitimaci; iadedi cue fiodailla mei, darui amani illanona, Jusiñamui cuena jillotaite.

Jesús dine Jacobo Juan iaímaiaí ei billa rafue

(Mr 10.35-45)

²⁰ Naie facaise Jesús dine Jacobo, Juan iaímaiaí ei diga, bitiaímaiaí. Iaímaiaí moodi Zebedeo. Jesús dine iaímaiaí ei rillanona, naimiena raise uaidollena, caiñici ifodo ana rainadacaida llote:

—Omo daje rafue jicanoiacadicue.

²¹ Naiñaiño mo Jesús dinena jicanote:

—¿Bue ñiaíbitio?

Naiñaiño uai ote:

—Illaímana o jailla mei, cue jito iaímaiaí o ecimo illana o llua jitaídicue. Damie o nabeimo. Jiaímie o jarifebeimo. —Jiaíno baifemo iaímaiaí illena, naiñaiño iese llote. ²² Naimacimo eruailanona, Jesús dinena uai ote:

—O jitaillacinona raise uiñoñedio. Cue duere sefuiticue.

Naiñaiño jito iaímaiaímo jicanote:

—¿Ie isoi duere sefuiacadomico?

Uai otiaímaiaí:

—Jii.

²³ Jesús dinena raite:

—Cue isoi duere sefuitomico; iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

²⁴ Iena jiaíe llofueoicaigano cacajano, naie iaímaiaíri iciritimaci. ²⁵ Jesús nana naimacina uaiduanona, raite:

—Nana illaicomini naimaci anamo itinona ocuicabidimaci; ²⁶ iadedi omoi dine iese iñena. Omoimona bu imiēna iacania, omoi mullaimana naimie jaisoillasa. ²⁷ Omoimona bu imiēna iacania, omoi naimie canocana jaisoillasa. ²⁸ Cuemona fueo. Biñedicue cominina cue ocuillena; iadedi cominina canuaibidicue. Cue jitailla jira, nana comini facaina fioidaisaibiticue. Naimaci jeacinomona naimaci jillobillena, fioidaisaibiticue. Ailluena comini cuena inuamona jilloitimaci. Coninina omoi canua —llote.

Jesús mena uisini diaimaiaina jillotaja rafue

(Mr 10.46-52; Lc 18.35-43)

²⁹ Jericó railla naira imona jaidimacimo, ailluena comini naimaci jinafona racadimaci. ³⁰ Ie facaiseconi mena uisini diaimaiaia nai fuemo raidiaimaiaia. Jesús naiedo jaillano cacajano, naimiēna ado uaidotiaimaiaia:

—David micori Jitona o illamona, Jusiñamuimona o billa jira, cocona duenai. Cocona cano.

³¹ Iaimaiaia llicuillena, Jesús diga jaidino iaimaiaina lletade; iadedi eo cuirioidiaimaiaia:

—Maestro, David micori Jitona o illamona, cocona duenai.

³² Iaimaiaina Jesús cacajano, ieconi naidadajanona, iaimaiaina uaidote. Jicanote:

—¿Niese omicono cue nibaiana jitaidomico?

³³ Uai otiaimaiaia:

—Maestro, coco uisina o cioitajana jitaidicoco.

³⁴ Iaimaiaina duenaillanona, iaimaiaia uisina jetade. Ieconi iaimaiaia uisidi ciode. Iaimaiaia jai cuanona, ie llofueganona iaimaiaia jaillena, Jesús diga jaidiaimaiaia.

21

Jesús illaima isoi Jerusalémo jailla rafue

(Mr 11.1-11; Lc 19.28-40; Jn 12.12-19)

¹ Oni jaillanona, Jerusalémo iaieicaidimacimo, Betfagé railla naira imo Jesús ie llofueoicaigano diga ridimaci. Olivos railla anedumo ite. Ie llofueoicaiganomona Jesús menamiēna orede. ² Raite:

—Bie naira illa uicomo mai omico jai. Nainomo cuinaca burrana baitomico. Ie ecimo ie uruena baitomico. Naie iaimaiaina suiñuano bene ati. ³ Omicomo “¿Bue ñellena bie suiñodomico?” bu jicanoia, llono: “Coco Nama naie iaimaiaina jitaide. Nailli naimie iaimaiaina raie abido oretaite” —raite.

⁴ Jusiñamui facaina lloraima micori jaie llua isoi, bie rafue suide. ⁵ Naimie micori jaie cuete:

Jerusalén itinomo llono:

“Ero, omoi illaima omoi na sedallena biite.

Abi iedoñoeno biite.

Burra urue emododo naimie biite”

cuete. ⁶ Iaimaiaia jaillanona, Jesús llua isoi finodiaimaiaia. ⁷ Burra ie urue diga atidiaimaiaia. Burra urue emodomo naimie llofueoicaigano naimaci iniroina jobianona, ie emodomo Jesús rainadate. ⁸ Naimiēna iobitallena, illaima isoi naimie jaillena, ailluena comini imaci iniroi diga, naiso motomo jobedimaci. Jiaino raforono uanona, naiso motomo jobedimaci. ⁹ Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai Jilloitaraima billa! ¡Naimiedi David micori Jito! ¡Jusiñamui mamecido bitimie eo mare! ¡Jusiñamui caina jilloitajasa!

¹⁰ Jerusalémo naimie ridemo, nana nainomo itino naie rafuena uiñoiacadimaci.

—¿Buta bite? —jicanotimaci. ¹¹ Jesús diga bitino dinena uai otimaci:

—Jesús bite. Naimiedi Jusiñamui facaina lloraima. Galileamo ite Nazaret imie.

Jesúdi Jusiñamui jofomona damieriena dotaja rafue
(Mr 11.15-19; Lc 19.45-48; Jn 2.13-22)

¹²Jerusalémo Jesús rilla mei, Jusiñamui jofomo naimie jaide. Naie jofo eo ail-lue. Diga cuartos nainomo ite. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiai diga, damierie fecauidimaci. Iena Jesús ciuanona, naimaci mesaiaina oni caicode. Ucugina fecauidino rairacuai jiai oni caicode. ¹³Naimacimo llote:

—Ie facaina lloraima Jusiñamui llogacino jaie cuega: “Cue jofo ite, nainomo cuemo comini jillena” cuega. Ero, ailluena omoi ibataja jira, naimie jofona firiruidino jofona omoi finoca.

¹⁴Ie facaise uisnidino Jusiñamui jofomo naimie dine bitimaci. Nujajacaida macaritino jiai bitimaci. Naimaci billanona, Jesús naimacina jillotote. ¹⁵Nainomo Jesúdi diga mare rafuena finode. Diga cominina jillotote. Iena ciuanona, nainomo ite uruiadi ado cuiriisite:

—David micori Jitori iobidicai. Jusiñamui lloraini micoriai jaie llua isoi, cai Jilloitarama jai ite.

Iena ciuanona, iena cacajanona, judíuai illaicomini iciritimaci.

¹⁶Naimiemo jicanotimaci:

—¿Bie uruiadi cuiriillana cacadio?

Jesús dinena uai ote:

—Jii, cacadicue. David micori iena jaie cuete. ¿Niese iena cacaiñedomoi? Naimie cuete:

Naimiemo Jusiñamuidi uruiaina mare iobillacinona fecataite.

¹⁷Naimacina fañonocaida, Betaniamo Jesús jaide, nainomo inillena.

Jesús higuera railla riarana faidua rafue
(Mr 11.12-14, 20-26)

¹⁸Ie areruido Jerusalémo abido ie llofueoicaigano diga Jesús bia, aimetaite.

¹⁹Nai fuemo higuera railla riarana ciuanona, iena jibuide. Naiemo naie llisilladi iñede. Dama ie ibena cide. Ie jira naie amenana llote:

—Biemona jaca llisiñeite. —Iese railla dacaiño naie riaradi duide. ²⁰Ie llofueoicaigano iena ciuanona, rajicaillamona raitimaci:

—¿Niese naie riarara raire duide?

²¹Jesús dinena uai ote:

—Uanaicinona omoimo lloiticue. Cue Moona raise omoi inoia, bie isoide rafuena finoitomo. Raise omoi inoia, omoi comeci igireñenia, bene ite anedumo omoi lloia: “Monailaimo o illena, benomona mai jai”, Jusiñamui o jitaille rana finoite. ²²Naimie iena finuana omoi inuamona, nie isoide rafue cue Moomo omoi jicajia, iena naimie finoite.

Jesúdi ie siño uaina llua rafue
(Mr 11.27-33; Lc 20.1-8)

²³Jerusalémo rillanona, Jusiñamui jofomo Jesús fo jailla mei, nainomo ite cominina llofue. Judíuai illaicomini naimie dine billanona, jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁴Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue. ²⁵Juan Bautista micoridi cominina

navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori lluana ñnoñedomoi?” ²⁶ “Comini” cai fairioia, bene itino caina nibai meineitimaci, Juan micoridi Jusiñamui facaina lloraíma naimaci railla jira.

²⁷ Ie jira fairiotimaci:

—Uiñoñedicaí.

Jesús dinena raite:

—Ie muidona cuemo nie isoide uai illana omoimo lloñeiticue.

Jesúdi mena jito iaímaiaí illa llua rafue

²⁸ Judíuai illaicominimo Jesús llote:

—Bie rafuemo omoi comeciaina faca. Damiemo mena jito ite. Nano doforamiemo llote: “Moo, cue illimo birui maijiaí”. ²⁹ Uai ote: “Jaiacaiñedicue” llote. Dally illanona, ie comecina dane facajano, maijiaide. ³⁰ Jiaie jitomo daje isoi llote. Naimie uai ote: “Jii, maijiaiticue” llote. Iese llote; iadedi maijiaíñede. ³¹ ¿Nie jitoca ie moo jitailla rana finode? —jicanote.

Uai otimaci:

—Nano doforamie.

Jesús dinena naimacimo llote:

—Uanaicinona omoimo lloiticue. Omoína ñaiticue. Omoimona marañedimaci; iadedi Jusiñamui cominina naimaci jaillamona, gobierno ucube oraini Jusiñamui illanomo iitimaci. Callirediñaiñuaidi nainomo jiaí iitimaci; iadedi nainomo jaca iñeitomoi. ³² Marena omoi comeciaina itatallena, Juan micori navui bite; iadedi naimie micorina ñnoñedomoi. Ucube oraini naimie micori rafuena ñnotimaci. Callirediñaiñuái naimie micori rafuena ñnotimaci. Iena uiñotomoi; iadedi omoi comeciái iuaillaina meidoiñedomoi. ñnoñedomoi.

Jesúdi marañede maijiraíni rafuena llua rafue

(Mr 12.1-12; Lc 20.9-19)

³³ Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona jiaínomo fecade. Ie mei jiaie eniruemo jaide. ³⁴ Uvas jai einailla facaise riaraiaina sedaraini dine naie patrón janore mullaíaina orede, naimie facaise iedinona naimie feiñollena; ³⁵ iadedi naie sedarainidi ie mullaíaina duere finosite. Daje mullaímana fatimaci. Jiaimiena meinetimaci. Jiaimiena noficina fairinotimaci. ³⁶ Ie mei patrón jiaie mullaíaina orede. Naimacina jiaí duere finodimaci. ³⁷ Ja muidomo ie jitona orede. “Cue jitona jaciruitimaci. Naimie uaina ñnoitimaci” comecina facade. ³⁸ Riaraiaina sedaraini naimiena ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci. ³⁹ Naimiena jino dotajanona, naimiena meinetimaci. ⁴⁰ Naie illi nama ico abido bille mei, ¿nie isoide rafuena naimie naie illina sedarainina finoite? Cuemo llono —llote.

⁴¹ Judíuai illaicomini uai otimaci:

—Naie marañedinona dueruiñeno meineite. Ie mei jiaie cominimo naie illi fecaite, iena sedallena, naiemona riarana feiñollena.

⁴² Naimacimo Jesús llote:

—Naie illi sedaraini isoidomoi. Jusiñamui facaina lloraíma micori omoína jiaie cuete. Ie ciegafuena raise facañedomoi. Naimie micori cueba: Jofa finoraini jitaiñena noficidi nana naie jofomo ite nofici baífemo jai uaide.

Jusiñamui iena finotate.

Iena cai uñuamona, “Eo mare” raiticai cuega. Jusiñamui cominina damierie jaillana naimie micori cuete. Jusiñamui oretagamiena damierie jitañenamona, naimie cominina jaiñeitimaci; iadedi Jusiñamui oretagamiena ailluena ñnuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitañena jira, naimie cominina jaiñeitomoi. ⁴³ Jusiñamuidi ie cominina sedajanomo omoina itatañeite; iadedi jiaie cominina nainomo itataite, naimie jitailla rafuena naimaci finua jira.

⁴⁴ Jesús llote:

—Naie noficina dane ñaiticue. Noficimo bu eicaitaia, bofedaite; ia naie nofici bumo ana uai, naimiena saitaite. Ie isoide. Cue llwana omoi jamaia, duere sefuitomoi. Iena omoi ñnoñenia, ja muidomo faifitomoi.

⁴⁵ Jesús llwana naie judíuai illaicomini cacajanona, naimiedi naimacina ñaiana jai uñotimaci. ⁴⁶ Icirillamona, naimiena gaitacadimaci; iadedi cominina jaciruitimaci, cominidi naimie Jusiñamui facaina lloraimana railanona.

22

Jesúdi illaíma ie jito aína ua llua rafue

¹ Jusiñamui jofomo Jesús nia illanona, nainomo itinona llofute:

² —Jusiñamui díbeimo comini jailla rafuena omoimo lloiticue. Iena omoi uñollena, bie rafuedo iena lloiticue. Illaimadi ie jito ai ua rafue finode. ³ Naimie ie mullaini orede, rafuemo llogano uaidollena; iadedi nai llogano biacaiñedimaci. ⁴ Dane jiaie mullaini oretajano llote: “Nai lloganomo llono: ‘Rafue guille jai finocasa. Iretaiaí, farediretaiaí díga, jai faga. Jai nana fuite. Rafuemo mai bi’ ”. ⁵ Naimaci cacarefiacaiñede. Damie ie illimo jaide. Jiamie ie chinganamo jaide. ⁶ Jiaíno mullainina gaitadimaci. Gaitajanona naimaciri jifanotimaci. Ja muidomo naimacina meinetimaci. ⁷ Ie jira naie illaíma eo icirite. Naimie soldaduai oretate, naimie mullaini meinetinona meinellena. Naimie naimaci illano jobaitate. ⁸ Ie meinoconi ie fiebide mullainimo llote: “Rafue guille jai nana finoca; ia llogano marañedimaci. ⁹ Naiso bojicaillanomo jai. Nana o cíolle díese llono: ‘Rafuemo bi’ llono”. ¹⁰ Ie jira ie mullaini jai naisona jaide. Marañedino baillanona díese ofitatimaci. Jiaí maredino díese ofitatimaci. Rafue finua jofa naie llogano díga oruide. Illaíma nainomo fecaca ñniroina jítadimaci. ¹¹ Illaíma fo bia, mesamo itino jibuillena, díno daje ñima rafue ie mare ñniroina jitañenana cíode. ¹² Naimiemo jicanote: “Nabai, ¿ñiese bene rafue ie mare ñniroina jitañeno bitio?” jicanote. Naimie uainicaide. ¹³ Ie jira naie illaíma ie mullaíaimo llote: “Naimie cuena ñnoñena jira, naimie onolli dajemo nitaicaida maino. Ie eillina daje isoi maino. Cuemona naimie jino dota. Nainomo itino díga duere sefuite. Jiaí sunaite” llote. ¹⁴ Ero, naie rafuemono omoi fueo. Illaíma ailluena uaidote; ia nana biñedimaci. Ie isoide. Jusiñamui ailluena cominina uaidote; iadedi naimacimona janore fetode.

Jesúmo gobiernomo ucubena fecajana jicanua rafue (Mr 12.13-17; Lc 20.20-26)

¹⁵ Naimacimo Jesús llua mei, fariseuai comini abido jaillanona, coniniri siadotimaci. Naimie raise uai oñedena, naimiena duere finollena, Jesúsna facaciacadimaci. ¹⁶ Ie jira naimie díne naimaci cominimona dajerie oredimaci. Herodianuai raila cominina jiaí jaidimaci. Jesús díne rillanona, raitimaci:

—Maestro, uanaicinona llofuecabitio. Jusiñamui rafuedo cai marena jailana raise llofuetio. Nana comini dauaido llofuetio. Cominina iobitallena llofueñedio. ¹⁷ Omo rafuena jicanoiacadica. Dani Jusiñamuina sedadica; iadedi romanos railla nairai anamo birui cai illa jira, ¿naimaci illaima Césarmo ucubena cai fecajana rairuidio? Caimo llono —llotimaci.

¹⁸ Naimaci comeciaina marañedicinona facajana Jesús uifnuamona, uai ote: —¿Bue ñellena cuena facacitomo? Maredinona abi caitadomo. ¹⁹ Ucube cuemo acata —llote. Ie jira acatatimaci.

²⁰ Jesús dinena jicanote:

—¿Bu ie joreño nainomo ite? ¿Bumo jainaiade bie cuela radi?

²¹ Uai otimaci:

—César.

Jesús dinena raite:

—César iena itedi Césarmo ille. Jusiñamui iena itedi Jusiñamuimo ille —raite.

²² Naimie lluaana cacajano, rajicaidimaci. Naimie jeare uai oñena jira, naimie dinomona oni jaidimaci.

Jesús dine saduceuai railla comini billa rafue

(Mr 12.18-27; Lc 20.27-40)

²³ Naie facaise saduceuai railla comini naimie dine bitimaci. Fiodaillamona jaca buna jilloñellena inotimaci. Jesúmo llotimaci:

²⁴ —Maestro, Moisés micori jaie cuela: “Iima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuela. ²⁵ Ero, cai motomo siete amatiai ite. Nano doforamie ie aina ote. Naimie nia uruiainide fiodailla. Ie emodo imie ie ama feciño ote. Uruiainide jiai fiodailla. ²⁶ Naie siete digamiedemona iese sefuide. ²⁷ Ja muidomo naie riño jiai fiodaite. ²⁸ Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

²⁹ Jesús uai ote:

—Moisés micori cuela fuaiaina raise omoi uifnoñena jira, Jusiñamui uaina raise omoi uifnoñena jira, bie isoide rafuena raise uifnoñedomo.

³⁰ Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisa aiñidimaci. Ininidimaci. Ie isoi iitimaci.

³¹ Fiodaitino jilluana omoimo lloiticue. Jusiñamui omoi jaiagaimo jaie llogacinona inoñedomo. Naimie llote: ³² “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite —llote. ³³ Nainomo ite comini iena cacajano, naimie llofuari rajicaidimaci; ia saduceuai dinena uainicaidimaci.

Jesús nanoca llogacinona llofua rafue

(Mr 12.28-34)

³⁴ Saduceuai comini uainicaillana fariseuaidi jai fidiano, Jesús dine ofidimaci. ³⁵ Naimacimona damiedi Moisés micori jaie llogacinona eo uifnote. Jesúna facacillena, naimiemo jicanote:

³⁶ —Maestro, Moisés micori jaie llogacinuaimona, ¿nie llogacino ua nanoca llogacinona?

³⁷ Jesús dinena uai ote:

—Moisés micori jaie cuela: “Omoi jitailla jira, nana omoi comecimona cai Nama Jusiñamuina isirui. Naimiemo omoi comeciina eo faca”. ³⁸ Bie ua nanoca llogacino. ³⁹ Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. ⁴⁰ Bie mena llogacinomona

nana jiaie llogacínuaí comuide. Nana Moisés micorí llogacínuaí naiemona comuide. Nana Jusiñamui facaina lloraini micoriai llogacínuaí naiemona comuide —llote.

Jesús dinena fariseuai cominimo jicanua rafue

(Mr 12.35-37; Lc 20.41-44)

⁴¹ Naimie dine nia fariseuai comini ia, Jesús naimacimo llote:

⁴² —Jusiñamui lloraini micoriai jaie raitimaci: “Jusiñamuidi Cristo railamiena oretaite, ie cominina sedallena”. ¿Ñiese naimiena raitomoi? ¿Bu jito naimiedi?

Uai otimaci:

—David micorí jito. David micorí isoi Cristo ie cominina sedaite.

⁴³ Jesús dinena jicanote:

—Naimiedi David micorí isoidena, ¿bue ñellena David micorí “Cristodi cue Nama” llote? Jusiñamui Joreñodi David micorí ñaitatajanona, David micorí llote:

⁴⁴ Jusiñamuidi cue Namamo llote:

“Illaimana o illamona, cue nabei dine ana rai.

Ona ñinoñedino o anamo itataitícue”.

⁴⁵ “Cristodi cue Nama” David micorí raite. Iese naimie micorí railla jira, Cristo David micorí afemo faite. Naimiedi jamai David micorí jitoñede; ia jiaí ie Nama.

⁴⁶ Uaina onidimaci. Naie facaisemona Jesús ie uaina dane uaitañedimaci.

23

Jesúdi judíuaí illaicomínina ñaia rafue

(Mr 12.38-40; Lc 11.37-54; 20.45-47)

¹ Jusiñamui jofomo Jesús nia illanona, naimie dine ailluena comini bitimaci. Ie llofueoicaigano nainomo jiaí illanona, nana naimacimo llote:

² —Moisés micorí llogacínuaína llofuerañidi naie rafuedo jai jaicabidimaci. Fariseuai comini iedo jiaí jaicabidimaci. ³ Naimaci llofuiacínodo omoi jai. Naimaci llofuiana omoi cacarefi; iadedi naimaci illa isoi omoi iñeno, naimaci llofuiacínodo naimaci jaiñena jira. ⁴ Omoi einamací llogacínuaído raise omoi jaillena, diga rafuena omoi finuana jitaídímaci; iadedi iedo omoi jaillena, omoína jaca canoñedimaci. “Jusiñamuina eo raise sedadicaí” comecina facadimaci. Iemo naimaci comecina facajamona, ⁵ iena omoi cioillena, nana naimaci finua rafuena marefodo finodimaci. Jiaie cominimo ite Jusiñamuimo jirabe baífemo faitibena uiacacabidimaci. Iniroi fuedadi aillofena jonegana gaidimaci. ⁶ Rafue ia, naimaci jamai bue isoiñedinomo comecina facajanona, rafue nama ecimo raíacadimaci. Ofiracomo uicomo raíacadimaci, comini naimaciri acarillena. ⁷ Nine naimaci jaia, nana comini naimacina uaiduana gaidimaci. Maestrodicinona uaiduana jiaí gaidimaci. ⁸ Jusiñamuina eo raise naimaci sedajana omoi uiñuana jitaídímaci. Naimaci isoi iñeno. Omoi damacina jira, omoimona damie omoi baífemo faíamo comecina facañeno. Naimiena maestrona raiñeno. Omoi baífemo cue illanona, omoi maestrodícue. ⁹ Omoi Moo Jusiñamui monamo illanona, dama naimiena seda. Jiaimiena sedaño. Jusiñamui isoi jiaimiena “Moo” raiñeno. ¹⁰ Omoi damacina jira, omoimona damiena “Cai illaima” raiñeno. Omoi illaimana jai itícue. ¹¹ Omoimona bu imiena jaiacania, omoi mullaimana naimie nano jaillamona, omoína naimie canua. ¹² Jusiñamuidi “Jiaíno afemo itícue” raillano comecina facadimiena jamai bue isoidimiena itataite; ia Jusiñamuidi “Jiaíno afemo iñedícue” raillano comecina facadimiena jamai bue isoiñedimiena itataite.

¹³ Naie facaise Moisés micori llogacinona llofuerainidi fariseuai comini diga illanona, Jesús naimacimo llote:

—Jusiñamui omoina duere finoite. Mareuidinona abi caitadinodomoí. Jusiñamui díbeimo comini illana jitaiñedomoí. Naimie díbeimo omoí illana jiai jitaiñedomoí. Ie muidona Jusiñamuimona duere sefuitomoí. ¹⁴ “Jusiñamuina eo sedadimaci” omoimo comini comeciaina facajana jitaidomoí. Ie jira are jiidomoí; iadedi iese iñedomoí. Maraiñede rafuena finocabidomoí. Jifuianona feciñuai rana bairocabidomoí. Ie jira Jusiñamui omoina eo duere finoite. ¹⁵ Damiena omoí díbeimo itatallena, omoí isoi Jusiñamui rafuedo naimie jaillena, diga rafuena finodomoí. Omoí díbeimo illa mei, omoí baífemo omoí einamací llogacinodo naimie jaillana jitaidomoí. Omoí diga íco naimie ua faífite. Cominina uanañedicinodo jaitatomoí. Iese omoí illa jira, duere sefuitomoí.

¹⁶ ‘Omoí llofuiacino diga cominina canoñedomoí. Mareuidinona abi caitadinodomoí. Raicabitomoí: “Cai lloga uai cai finollena jiai comini uiñollena, Jusiñamui jofomo ite oro mamecina llinotícaí; iadedi Jusiñamui jofomamecina cai llinoia, cai lloga uaina cai finoñenia, caimona mare. Jusiñamuimona duere sefuiñeíticai” raicabitomoí. ¹⁷ Abi uiñoñedomoí. Omoí llofuiacino diga cominina canoñedomoí. Jusiñamui jofomo naie oro jainaiaila jira, naie orodí mare; iadedi naie oro naie jofomabaífemo uaiñede. Abina omoí uiñoñena jira, Jusiñamui omoina duere finoite. ¹⁸ Jiai raitomoí: “Jusiñamuimo faga toíca ocaina jobaisoillano mamecina cai llinoia, cai lloga uaina cai finoñenia, caimona mare; iadedi Jusiñamuimo fecaca toíca ocaina mamecina cai llinoia, cai lloga uaina jaca finoíticai”. ¹⁹ Abi uiñoñedomoí. Omoí llofuiacino diga cominina canoñedomoí. Naie jobaisoillanomo naie ocaina illa jira, naie ocaina mare; iadedi naie ocaina naie jobaisoillano baífemo uaiñede. ²⁰ Ero, Jusiñamuimo ocaina jobaisoillano mamecina omoí llinoia, nainomo ite ocaina mamecina jiai llinotomoí. ²¹ Jusiñamui jofomamecina omoí llinoia, Jusiñamui nainomo illa jira, naimie mamecina jiai llinotomoí. ²² Monamo ite ra mamecina omoí llinoia, Jusiñamui illano nainomo illa jira, nainomona cominina naimie sedaja jira, naimie mamecina jiai llinotomoí. Omoí llua rafuena omoí finoñenia, Jusiñamui omoina duere finoite.

²³ ‘Mareuidinona abi caitadinona omoí illamona, omoímo nia lloíticue. Nana omoí illimo ite ramona, nana omoímo ite ucubemona Jusiñamuimo janore jisa fecacabidomoí. Nana comini omoí isoi illena jitaidomoí. Mare; iadedi nanoca rafuena jaca finoñedomoí. Jiaie cominimo omoí comeciaina facañedomoí. Jiaie cominina duenañedomoí. Omoí lloga uaina finoñedomoí. Nana naie isoide rafuena omoí jiai finua. Iena omoí finoñenia, Jusiñamui omoina duere finoite. ²⁴ Abina uiñoñedomoí. Jallecima jiroracomo ía, iena oni faíga; ía aillue ra nainomo ía, iena cioíñeno namo gutadomoí. Ie isoide. Omoí llofuiacino diga cominina canoñedomoí. Jusiñamui íe eo jitailla rafuedo comini jaillana llofueñedomoí. Nanocafueñededo comini jailla rafuena llofuetomoí. Nanoca rafuedo comini jaillana llofueñedomoí.

²⁵ ‘Omoímo nia lloíticue. Omoí einamací llogacinodo eo jaidomoí; iadedi omoí comeciaina raise finoñedomoí. Eo fiidomoí. Jifuianona comini rana bairodomoí. Jeacinona finocana jaidomoí. ²⁶ Abina uiñoñedomoí. Da pocillos jinafo, da platos jinafo jocodino isoidomoí. Pocillos jerai, platos jerai jocoñedino isoidomoí. Omoí abina finodomoí; iadedi omoí comeciaina raise finoñedomoí. Nano omoí comeciaina raise fino. Mare rafue finocana jai. Omoí einamací rafuemo comeciaina facañeno; ía Jusiñamui rafuemo comeciaina faca. Iese omoí jaiñenia, Jusiñamui omoina duere finoite.

²⁷ 'Omoimo nia lloiticue. Marena finoca raiáfo isidomoi. Jinofe marena eruaide; iadedi nainomo mare ra iñede. Comini illaici jamai ite. Jai maraiñede. ²⁸ Ie isidomoi. Marena eruaidomoi; iadedi maredinona abi eo caitadomoi. Omoi comeciai eo maraisiñede. Omoi comecina raise omoi finoñenia, Jusiñamui omoína duere finoite.

²⁹ 'Omoimo nia lloiticue. Naimacimo birui omoi comeciaina raise facallena, Jusiñamui facaina lloraini micoriai raiáfona marena eruaillena finodomoi. Mareuidino micoriai raiáfo emodo marena eruaillena finodomoi, ³⁰ raillano: “Cai jaiagai Jusiñamui facaina lloraini micoriaina meinetimaci. Naie facaisec-
oni iticaidena, naimaci isoi finoñedicaí. Cai jaiagai isoi birui iñedicaí” rait-
omoi; ³¹ iadedi omoi llumona Jusiñamui facaina lloraini micoriai meinetino
uruaí omoína uiñoticaí. ³² Omoi jitailla jira, omoi jaiagai isoi jeacinona
eo finocana mai jai. Naimaci jai taineca rafuena mai omoi finocana jai.
³³ Omoi maraiñena jira, jaio nairai isidomoi. Ja muidomo iraimona jil-
lobiñeitomoi. Nainomo duere sefuitomoi. ³⁴ Cue rafuena llollena, cue
facaina llorainina omoi dine oretaiticue. Cue rafuena eo uiñotinona omoi
dine oretaiticue. Cue rafuena omoi raise uiñollena, llofueraini omoi dine
jiai oretaiticue. Dajeriena meineitomoi. Naimacina coraitomoi. Omoi
ofiracomo dajeriena faitomoi. Diga nairaimo naimacina duere finoitomoi.
³⁵ Abel micori jaie ite. Naimie maremie. Ie ama naimiena meinete. Naimie
facaisemona omoi jaiagai ailluena mare cominina meinetimaci. Ie mei
omoi jaiagai Zacariana meinetimaci. Naimiedi Berequías jito. Jusiñamui
jofomo Jusiñamuimo toica ocaina jobaisoillano ecimo naimiena meinetimaci.
³⁶ Uanaicino omoimo lloiticue. Naimacina omoi jaiagai meinia muidona,
omomona Jusiñamui birui ibana oite. Naimaci isoi maraiñede rafuena
finocana jaidomoi. Jusiñamui omoína duere finoite.

Jesús Jerusalémo itinomo llua rafue
(Lc 13.34-35)

³⁷ Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoína cue sedallena, atava ie uruaí sedaja isoi, diga icaíño cue anamo omoína uaidoiacadícue; iadedi omoi dinena cuena jitaiñedomoi. ³⁸ Iemona Jusiñamuidi omoi illanona jai faínonocaide. ³⁹ Cue Moo dine jaiticue. Cue jailla mei, cuena cioiñeitomoi. Ico abido cue bia, omoi comini cuena lloitimaci: “Jusiñamui oretagamie eo mare. Naimiedi cai Nama” lloitimaci

24

Jesúdi Jerusalémo ite Jusiñamui jofo judaiana llua rafue
(Mr 13.3-23; Lc 17.22-24; 21.5-24)

¹ Jusiñamui jofomona ie llofueoicaigano diga Jesús jino jaidemo, Jesúsna nai jofona eruaítatimaci. ² Jesús dinena llote:

—Bie jofona ciodomoi. Uanaicinona omoimo lloiticue. Nana bie jofomo ite noficiái ico judaísite —llote. ³ Ie mei Olivos railla anedu dine rillanona, Jesús naie muidomo raidemo, ie llofueoicaigano naimiemo iena anado llotimaci:

—Jusiñamui jofo judaiana omo jicanoiacadicaí. ¿Niruido iena suite? Caimo llono. O abido billirui iaírei ia, ¿nie isoide rafue suite, o abido billiruina cai uiñollena?

⁴ Uai ote:

—Omoína bie rafuena bu jifueñellena, omoi abina rairui. ⁵ Ailluena comini cue mamecido billanona: “Cristodicue” raitimaci. Diga cominina

jifueitimaci. Iemona omoi abina rairui. ⁶ Jobaimiai illena fiditomoi; iadedi jaciruiño. Iese suite; iadedi abido nia biñeiticue. ⁷ Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo comini aime gutimaci. Diga illanuaimo ñuisañuai suite. ⁸ Iese suia, omoi duere sefuillifue omoimo suite.

⁹ 'Cuen a ñnoñedino omoina gaitatajanona, omoina meineitimaci. Cue cominina omoi illamona, nana nairai omoina enoitimaci. ¹⁰ Naie facaise cue dibeimo itinomona ailluena abido danomo jaitimaci. Iemona duere omoi sefuillena, omoina janoñeitimaci; iadedi omoina enoillamona, omoina llogidoitimaci. ¹¹ Naie facaise diga comini raitimaci: "Jusiñamui facaina llorainidica"; iadedi Jusiñamui facaina llorainiñedimaci. Uanaicinona lloñeitimaci. Diga comini naimaci dibeimo itataitimaci. ¹² Jeacino eo comucana jailla jira, ailluena comini conini isiruiñeitimaci; ¹³ iadedi cuena fañonocaiñedimie ja muidomo monamo jaca iite. Naimiena jillotaiticue. ¹⁴ Diga cominidi Jusiñamui dibeimo comini ille rafuena nana nairaimo lloitimaci, nana nairai iena cacaillena. Ie mei abido biiticue.

¹⁵ 'Cue llamo cacarei. Daniel micori Jusiñamui facaina lloraima. Naimie micoridi jiamie jearede rafue finollena jaie llote. Naie rafue suia, Jusiñamui jofomo Jusiñamuina sedañeitomoi. Nainomo naie jearede rafue finuana omoi ciuanona, ¹⁶ naiemona omoi jillobillena, duere omoi sefuiñellena, Judeamo omoi illamona, aneduai dine omoi aisi. ¹⁷ Jofo emodomo omoi ia, ana billanona, aneduai dine raire rillena, jofomo jaiño. Nainomo ite rana omoi diga uiño. ¹⁸ Aneduai dine raire rillena, illimo omoi ia, abido jofomo biño, omoi iniroi omoi diga uillena. ¹⁹ Naie rafuemona jillobillena, naie facaise urueside riño duere sefuite. Uruena nia jirode riñodi jiaie duere sefuite. ²⁰ Eo duere sefuiñellena, Jusiñamuimo omoi jicano, rollime facaiseconi bie rafue suiñellena. Moisés micori sábadomo are jaillana jaie rairuide. Sábadoruimo bie rafue suiñellena, Jusiñamuimo jicano. ²¹ Naie facaise comini eo duere sefuitimaci. Enirue finua facaisemona iese comini nia duere sefuiñedimaci. Ico iese eo duere sefuiñeitimaci. ²² Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

²³ 'Ie facaise omoimo bu raia: "Jadi, Jusiñamui facaina lloraima benomo birui bairede. Naimiedi Cristo", iena ñnoño. Jiamie raia: "Oni batine Cristo birui bairede", iena ñnoño. ²⁴ Cristona abi caitadino biitimaci. Jusiñamui facaina llorainina abi caitadino jiaie biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. ²⁵ Ero, bie rafue nia suiñenia, iena omoimo jai lloticue. ²⁶ Omoimo naimaci raia: "Ero, batine jofue iñenanomo Cristodi ite", nainomo jaiño. Naimaci raia: "Ero, bene bie jofomo Cristo ite", iena ñnoño. ²⁷ Mona borillamona mona jillacidi usare cide. Nana cominimo bairede. Ie isoide. Cue abido bia, nana comini iena uiñoitimaci. ²⁸ Urujaisai rifaide ramo ofillana uiñua isoi, nana cuena ñnotino cue billena uiñoitimaci.

Jesús abido ie bille rafue

(Mr 13.24-37; Lc 17.26-30, 34-36; 21.25-33)

²⁹ Jesús llote:

—Naie duere sefuilla facaise meinoconi jitoma lligaiñoñeite. Fivui jiaie lligaiñoñeite. Monamona ucuaie llujite. Nana naie radi jaidisite. ³⁰ Ie mei monamo baireiticue. Ieconina nana nairai jarire iitimaci. Jacinaitimaci. Uillie motodo cue billena cioitimaci. Ebire biiticue. Naimacina cue sedallena, illaimana biiticue. ³¹ Cue jaienisaia cue ecimona oretaiticue. Ado trompeta ficiretajano, cue fetocano diese naganomona ofitaitimaci.

32 'Higuera railla riarazona omoi fueo. Bie eniruemo naie riaru firuillazona, fiemona raire illana uiñotomoi. 33 Ie isoide. Bie rafue ico sua, cue billirui iairei illena uiñoitomoi. 34 Uanaicinona omoimo lloiticue. Nana bie rafue sulle facaiseconi bie nairai nia iite. 35 Mona enirue diga fuite; iadedi cue lloga uai jaca suite. 36 Cue abido billirui jaca bu uiñoñede. Jusiñamui jaienisaí iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote. 37 Abido cue billirui iairei ia, Noé micori facaiseconi itino isoi comini iitimaci. Naimaci duere sefuillemo Noé micori facaise itinodi comeciaina facañedimaci. 38 Naie facaiseconi nia eo noci deiñenia. Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. 39 Nia noci deiñenia, Noé micori lloga uaina ñoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue. 40 Naie facaiseconi menamie illimo danomo iitiaimaiaí. Damie Jusiñamui dine jaite. Jaiimie fiebillazona, Jusiñamuimona duere sefuite. 41 Mena riño danomo doberitiaiñuai. Dañaiño Jusiñamui dine jaite. Jaiñaiño fiebillazona, Jusiñamuimona duere sefuite. 42 Cue billirui omoi uiñoñena jira, iemo ocuiri. 43 Bie rafuemo omoi comeciaina omoi faca. Jofo namadi firiraima nie naiona billena uiñotena, ie rana faifiñellena, ie jofona raise sedade. 44 Ie isoi cue billemo ocuiri. Monazona ico abido biiticue. Omoi ocuiriñena facaisemo riiticue. Ie jira cue billemo nagarui ocuiri.

*Jesúdi patrón ie mullaimana ie jofona sedataja llua rafue
(Lc 12.41-48)*

45 Jesús llote:

—Cue billena omoi raise cacaillena, jiaie rafuedo iena lloiticue. Patrón daje mullaimana ie jofona sedatate. Naie mullaima ñnogamie. Abina uiñotimie. Nainomo itinona raise ecacabide. Naie mullaimana ie jofona sedataja mei, naie patrón oni jaide. 46 Patrón ico abido bia, ie jofona ie mullaima raise sedaia, mullaimari naimie iobillazona, ie mullaima marena iite. 47 Iobillazona, patrón ie mullaimana nana ie raruiaina sedatataite; 48 iadedi ie mullaima marañenia, ie comecina facaite: “Cue patrón are biñeite. Naimie lloga uaina finoñeiticue”. 49 Ie comecina iese facaja jira, naimie anamo ite mullaiaina faite. Ie jitailla rafue finuazona, jifairuidino diga jirocabite. Naimacina nabaillazona, naimaci diga guite. Naimaci isoi jearede rafuena finoite. 50 Ie ocuiriñena facaise ie patrón abido billazona, naimiena duere finoite. 51 Ie isoide. Cue abido bia, cuena ñnotinori iobiticue; ia cuena ñnotinona abi caitadino dine cuena ñnoñedinona dotaiticue. Nainomo duere sefuillano eetimaci.

25

Jesúdi diez jitañuaina llua rafue

1 Jesús llote:

—Abido cue bia, Jusiñamui ie cominina sedaite. Cue billemo ocuiritinona sedaite. Naie facaise ite cominidi diez jitañuaimo ite rafue isoidimaci. Naiñaiñuai lamparíniai llinuazona, ima ie aina ua meinomo finoca rafuemo jaiacadimaci. 2-4 Lamparíniai unellena, farena naiñaiñuai uilla jira, cinco diga abina uiñotimaci. Farena naiñaiñuai uiñena jira, cinco diga abina uiñoñedimaci. 5 Ima diga ie rafue dine jaillemo ocuiridimaci. Ima are biñena jira, inidimaci. 6 Daje dberuisse damie ado lluana cacadimaci. Llote: “Jadi, naie imadi jai bite. Mai bi, naimie uicomo naimiemo cai dafaifillesa”.

7 Casillanona, naie jitañuui lamparíniai unedimaci. 8 Abi uiñoñediñaiñuui dinena abi uiñotiñaiñuui mo jicadimaci: “Farena caimo feca. Cai lamparíniai boacaiñedesa”. 9 Uai otimaci: “Fecaacaiñedicai. Omoimo cai fecaiadedi, caimo baiñeite. Omoi jitaia, chinganomo ibajai”. 10 Naiñaiñuui ibajaila mei, naie ima ride. Naimiemo ocuiridiñaiñuui diese naimie diga nainomo guillena, rafuemo jaidimaci. Naimaci fo jaila mei, nase naie ima ibaide. 11 Ie mei naie farena ibajaidiñaiñuui abido billano, raitimaci: “Nase econo”. 12 Naie ima uai ote: “Uanaicinona omoimo lloiticue. Omoina uiñoñedicue. Econoñeiticue”. 13 Ie isoide. Cue billiruina omoi uiñoñena jira, nagarui cuemo omoi ocuiri.

Jesúdi patrón ie mullaiaimo ucubena fecaja llua rafue

14 Jesús llote:

—Abido cue bia, Jesiñamui ie cominina sedaite. Naie facaise ite comini daje patrómo ite rafue isoide. Patrón jiaie enirue jaiacana jira, ie mullaiaina ie ucubena eenotade. 15 Damiemo cinco diga ucubena fecade. Jiaimie mo menacubena fecade. Jiaimie mo dacubena fecade. Nagamie ie maijille dinori fecade. Ie mei oni jaide. 16 Cinco diga ucubena feiñotimie jailanona, iena fecallena, rana ibade. Iemona jiaie cinco diga ucubena ote. 17 Menacubena feiñotimie iena fecallena, rana ibade. Iemona jiaie menacubena ote. 18 Daucubena feiñotimie eniruemo naie ucube eenote. Iena fecallena, rana ibañede. Iemona buena oñede. 19 Digarui illanona, naie patrón abido bite. Naimaci cuentas siadollena, ie mullaiaina uaidote. 20 Cinco diga ucubena feiñotimie bite. Ie ucube atiano raite: “Patrón, cinco diga ucubena cuemo fecadio. Jiaie cincona oticue”. 21 Patrón uai ote: “Raise marena maijidio. Eo mare mullaimadio. Janore ucube o raise sedaja jira, ona ailluena rana sedataiticue. Cue diga caimare jaca iitio”. 22 Menacubena feiñotimie bite. Raite: “Patrón, cuemo menacubena fecadio. Iemona jiaie menacube oticue”. 23 Naimie patrón uai ote: “Raise marena maijidio. Eo mare mullaimadio. Janore ucube o raise sedaja jira, ona ailluena rana sedataiticue. Cue diga caimare jaca iitio”. 24 Daucubena feiñotimie bite. Raite: “Patrón, o riirenana uiñoticue. O mullaiaia maijiamona ganacabidio. 25 Ucubena cue faifiñellena ona jaciruiticue. Ie jira eniruemo o cuemo iga ucubena eenoticue. Jadi, iena jai abido atidicue”. 26 Patrón uai ote: “Maraiñedio. Rairaiedio. Cue mullaiaia maijiamona cue ucube uana uiñotio. 27 Bancomo naie ucubena jonetiodena, naie ucubemona jiaie ucube janore uamona, abido cue bia, iena feiñoticue”. 28-30 Ie mullaiaimo llote: “Naimiemona ie ucubena bairo. Diez ucube illamie mo iena feca. Bie maraiñede mullaiaima jitioredinomo cuemona oni dota. Nainomo comini duere sefuillanona eetitimaci”. Jusiñamui ie jitailla rafuena finodinona: “Mare” raite; iadedi ie jitailla rafuena finoñedinona duere finoite. Jusiñamui omoina duere finoñellena, cue abido billirui omoi uiñoñena jira, Jusiñamui jitaillacinona finocana omoi jai.

Jesúdi cominina duere finolle llua rafue

31 Jesús llote:

—Omoina nia llofueiticue. Abido cue bia, nana cue jaienisaia diga biiticue. Illaimana ico cue bia, illaima illa ifomo iiticue. Eo siño uaido biiticue. 32 Cue uicomo nana nairaiia ofitimaci. Toica llaudaiaia sedaraima ie chivos motomona ie llaudaiaia oni fetua isoi, naimacina fetoiticue. 33 Cue jitaillacinona finodino diese cue fetuanona, cue nabeimo itataiticue. Cue jitaillacinona finoñedino diese cue fetuanona, cue jarifebeimo itataiticue. 34 Cue illaimana jira, cue nabeimo itinomo lloiticue: “Cue Moo omoiri iobillanona, omoina jai caimare itatate. Cue Moo cominina omoi illa jira, cue sedajanomo mai bi. Nainomo duidomoi. 35 Cue jitaillacinona omoi

finuamona navui aimetaiticueмо, cuena ecadomoi. Jiroacadicuemo, jinui cuemo fecadomoi. Omoi nairai dine cue macaria, cuena omoi uiñoñoeno omoi jofomo cuena feiñotomoi. ³⁶ Iniroinidicuemo, iniroi cuemo fecadomoi. Duidicuemo, cuena canollena, cuena jibuisaibidomoi. Cárcelmo iticuemo, cuena canollena, cuena jibuisaibidomoi”. ³⁷ Cue jitaillacinona finodino dinena cuemo jicanoitimaci: “Nama, ¿Niruido aimetaitiomo, ona ecadicai? ¿Niruido jiroacadiamo, jinui omo fecadicai? ³⁸ ¿Niruido ona ciodicai, cai jofomo ona feiñollena? ¿Niruido iniroina omo fecadicai? ³⁹ ¿Niruido duidiomo, ona jibuisaidicai? ¿Niruido cárcelmo itiomo, ona jibuisaidicai?” ⁴⁰ Uai oiticue: “Uanaicinona omoimo lloiticue. Cuena inotinomona jamai bue isoidimiena canodomoi, cuena jiai canodomoi” lloiticue.

⁴¹ 'Iemei cue jarifebeimo itinomo lloiticue: “Cuemona oni mai jai. Cue cominiñedomoi. Jai faifidomoi. Duere omoi sefuillena, iraimo mai jai. Naie irai jaca duiñede. Jusiñamuidi naiena Taife iena jai finode. Jusiñamuidi Taife comini iena jiai jai finode. ⁴² Cue jitaillacinona omoi finoñenamona, navui aimetaiticuemo, cuena ecañedomoi. Jiroacadicuemo, jinui cuemo fecañedomoi. ⁴³ Omoi nairai dine cue macaria, omoi jofomo cuena feiñoñedomoi. Iniroinidicuemo, iniroi cuemo fecañedomoi. Duidicuemo, cuena canollena, cuena jibuisabiñedomoi. Cárcelmo iticuemo, cue canollena, cuena jibuisabiñedomoi”. ⁴⁴ Cuemo jicanoitimaci: “¿Niruido aimetaitiomo, ona ecañedicai? ¿Niruido jiroacadiamo, jinui omo fecañedicai? ¿Niruido ona ciodicai, cai jofomo ona feiñollena? ¿Niruido iniroinidiamo, omo fecañedicai? ¿Niruido duidiomo, ona jibuisaiñedicai? ¿Niruido cárcelmo itiomo, ona jibuisaiñedicai?” ⁴⁵ Uai oiticue: “Uanaicinona omoimo lloiticue. Diga comini cuena inotimaci. Naimacimona jamai bue isoidimiena omoi canoñena jira, cuena canoñedomoi” lloiticue. ⁴⁶ Naimaci jaca isi cacaitimaci; iadedi cue jitaillacinona finodino cue Moo sedajanomo jaca iitimaci.

26

Judíuai illaicomini Jesúna gaitallena siadua rafue

(Mr 14.1-2; Lc 22.1-2; Jn 11.45-53)

¹ Ie llofueoicaiganona llofuia mei, naimacimo Jesús llote:

² —Pascua railla rafue illena, menarui fiebide. Iena uiñotomoi. Monamona jaie cue billamona, imana jaidicue. Cue fiodaillena cue Moo cuena oretate. Illaicomini cuena coraillena, birui cuena gaitaitimaci —llote. ³ Naie facaisecononi Jusiñamui diga nanoca ñairainidi, jiaie illaicomini diga, nanoca ñairaima jofomo ofidimaci Nanoca ñairaimadi Caifás. ⁴ Jesúna jifuiano gaitallena coniniri siadotimaci. Naimiena meinellena jiai siadotimaci. ⁵ Raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuititimaci. Nia sedaiticai.

Jesúmo riño caimare soride ra totaja rafue

(Mr 14.3-9; Jn 12.1-8)

⁶ Betania railla nairaimo Jesús jaillanona, Simón jofomo jaide. Simódi jaie efonaitimie. ⁷ Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide. ⁸ Jesús llofueoicaigano iena ciuanona, iciritimaci. Coniniri dani ñaitimaci:

—Naie caimare soride ra jamai dotade. Jai faifide. ⁹ Iena fecacadena, eo ailluena raifide. Naie ucube dueredinomo fecadena, caimona mare.

¹⁰ Naimaci ñaiana Jesús uiñua jira, naimacimo llote:

—¿Bue ñellena naiñaiñoña jeare ñaitomoi? Mare rafuena cuemo finode. ¹¹ Omoi diga dueredino jaca itimaci; iadedi omoi diga jaca iñeiticue. ¹² Cue abimo bie caimare soride ra naiñaiño totajamona, cue fiodaillirui facaina naiñaiño iese finode. ¹³ Omoimo uanaicinona lloiticue. Ninomo cue mare finoca rafuena bu lloia, naiñaiñoña uibiñollena, nana cominimo naiñaiño finoca rafuena lloite.

Judas micori raillamie Jesúna gaitataiacana rafue
(Mr 14.10-11; Lc 22.3-6)

¹⁴ Ie facaise Jesús llofueoicaiganomona Judas Iscariote micori raillamiedi Jusiñamui diga nanoca ñairaini dine jaide. ¹⁵ Naimacimo jicanote:

—Omoimo Jesúna cue fecaia, ¿niga ucubena cuemo fecaitomoi? —jicanote. Naimaci siadua mei, treinta ucubena naimiemo fecadimaci. ¹⁶ Naie facaisecanimona Jesúna gaitatalliruimo naimie ocuiride.

Jesúdi ie fiodaille rafuena llua rafue
(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Pascua railla rafue ia, siritaga rana guiñedimaci. Dani llomenicono guitimaci. Egiptomona cai jaiagai jillobillana começillena, naie rafue ite. Naie rafue tainiaruimo ie llofueoicaigano Jesús dine billano, jicanotimaci:

—¿Ninomo pascua railla rafue ie guille finuana jitaideo?

¹⁸ Uai ote:

—Jerusalémo omoi jaillanona, omoimo cue llogamiena omoi ciuanona, naimiemo llono: “Cai llofueraima fiodaille facaise iairei ite. O jofomo ie llofueoicaigano diga pascua rafuena finoacade” llono.

¹⁹ Ie muidona ie llofueoicaiganodi ie lluaana finodimaci. Pascua railla rafue guille finodimaci. ²⁰ Nairui jitema ana itemo, Jesús ie doce llofueoicaigano diga nainomo guisaide. ²¹ Naimaci mesamo guitimacimo, Jesús llote:

—Omoimona damie cuena gaitataite —llote. ²² Iena cacajanona, eo sunaitimaci. Damierie naimiemo jicanoside:

—¿Cuena ñaitio?

²³ Uai ote:

—Omoimona damie bie platomo cue diga llomenico diga mutade. ²⁴ Jusiñamui facaina lloraíma cuega isoi, monamona jai billamona fiodaiticue; iadedi cuena gaitataitimie eo duere sefuite. Naimie jeicifnegadena, cuemona mare.

²⁵ Jesúna gaitataitimiedi Judas micori. Naimie jicanote:

—Maestro, ¿ona iese finotaiticue?

Uai ote:

—Jii, iese finotaitio.

²⁶ Naimaci nia guitimacimo, llomenicono Jesús llinuanona, Jusiñamuimo iobillacinona fecaja mei, llomenicono tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi começina facajano, iena guiño.

²⁷ Ie mei naimie jiroracona jiai llinote. Jusiñamuimo iobillacinona llua mei, naie jiroracomo jai totaca vino naimacimo fecajano, raite:

—Biemona nana omoi jiro. ²⁸ Cue fiodaillamona, dama cue diaillamona, naimaci jeacino anamona ailluena biruimona jilloitimaci. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. Cue llua isoi bie vinona omoi jiruamona, cue fiodaillamo omoi começi. ²⁹ Omoína bene dane iese caimare nabaiñeiticue. Cue Moo sedajanomo omoi diga cue ia, nainomo omoína dane iese caimare marena nabaiticue. —Iena jirodimaci.

*Jesúdi Pedro naimiena januana llua rafue
(Mr 14.26-31; Lc 22.31-34; Jn 13.36-38)*

³⁰ Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci. ³¹ Jesús naimacimo llote:

—Cuemo suille rafue muidona, ja naio cuena fainonocaitomoi. Jusiñamui facaina lloraíma micori iena jaie cuega: “Toica llaudaíai sedaraimana meine-taiticue. Naimie toíniai uaficaída jaitimaci” cuega. Naimie micori caina cuete. ³² Ero, fiodaillamona cue jillua mei, omoi uicodo Galileamo jaiticue, nainomo omoi diga dafaifillena.

³³ Pedro uai ote:

—O finolle rafue muidona nana jiaíno ona fainonocaia, ona jaca fainonocaiñeíticue.

³⁴ Jesús dinena raite:

—Uanai omo lloiticue. Ja naio itava nia ñaiñenia, dacaiño amani cuena janoitio.

³⁵ Pedro uai ote:

—O diga cue fiodaiadedi, ona janoñeíticue.

Nana ie llofueoicaigano daje uaido jiaí raitimaci.

*Jesúdi Getsemanímo Jusiñamuimo jia rafue
(Mr 14.32-42; Lc 22.39-46)*

³⁶ Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoímona oni bai janore jaiticue. Cue Moo diga ñaillena, jaiticue.

³⁷ Pedrona uite. Zebedeo ie jito iaímaiaína jiaí uite. Naimie sunaicaide. Ie comeci uri iñede. ³⁸ Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi jii.

³⁹ Naimie janore bai jaillanona, eniruemo bitadate. Jii de:

—Ore Moo, o jitaia, cuena duere finoñeno; iadedi cue comeci jitaillacinona finoñeno. Cuemo o jitaillacino fino —jii de. ⁴⁰ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—¿Ni ese raire inidio? daje hora nia iñedemo. ⁴¹ Iniñeno. Tai fe ramo omoina fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci daní ocuiñoñede. Ie muidona Jusiñamuimo jii, omoina naimie ocuiñotallena —llote. ⁴² Ie mei dane jii llena jaide. Raite:

—Ore Moo, o jitaia, cue duere sefuillamona cuena jillota. Cue fiodaillana o jitaia, o jitailla rafuena finoiticue.

⁴³ Ie llofueoicaigano dine dane billanona, naimaci uisi llirioilla jira, naimaci inisitemo ride. ⁴⁴ Abido jaillanona dane jii de. Ailli daje isoiduaido jii de. ⁴⁵ Ie mei ie llofueoicaiganomo dane billanona, llote:

—Nia inidomoi. Jafaici nia otomoi. Monamona jaie billanona, imana jaidicue; ia ja fiodaiticue. Cuena ja gaitajanona, Jusiñamui jitailla jira, naimiena inoñedino anamo ja iiticue. ⁴⁶ A naidacai. Maiña. Cue gaitaitimie jai bite.

*Jesúna gaitalle rafue
(Mr 14.43-50; Lc 22.47-53; Jn 18.2-11)*

⁴⁷ Jesús nia ñaitemo, ieconi Judas micori bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jiaí atidimaci. Jusiñamui diga nanoca ñairainimona bitimaci. Einamací dinena

jiaí bitimaci. ⁴⁸ Jesús dine naimaci nia riñenia, Judas micorí naimie diga bitinomo jai llote:

—Jesúna omoi uñollena, naimiena libanoiticue. Ie mei naimiena gaita — llote. ⁴⁹ Jesús dine naimaci rillanona, Judas micorí Jesús dine raire jaide. Naimiena uaidote:

—Maestro, jai biticue. —Ieconí naimiena libanote. ⁵⁰ Jesús dinena raite:

—¿Bue ñiaíbitio?

Ie mei Judas micorí diga bitinodí Jesúna gaitadimaci. ⁵¹ Iena ciuanona, Jesús diga itinomona damie ie lloebi llinuanona, Jusiñamui diga nanoca ñairaima ie mullaíma jefona jaíbonote. ⁵² Jesús naimiemo llote:

—O fuiriacania, o jiaí fiódaitio. O lloebi dane eeno. Cue riíduanona, fuiriñeno. ⁵³ Cuena riídollena, cue Moomo cue jicaia, eo ailluena jaienisaí cue dine naimie oretaite; ⁵⁴ iadedí iese cuena riídoia, Jusiñamui facaina llorainí micoriaí ciegafuiaí suiñeite. Cue fiódaille rafuena cuetimaci —llote. ⁵⁵ Ieconí naimie dine bitinomo Jesús llote:

—Omoi butaralluna uitomoi. Omoi lloebi diga jiaí bitomoi. Fñiriraimadicueta cuena omoi gaitajaíbillá. Jusiñamui jofomo nagarui llofuecabiticue; iadedí cuena gaitañedomoi. ⁵⁶ Nana bie rafue suide, Jusiñamui facaina llorainí micoriaí ciegafuiaí suillena —llote. Ie facaise nana naimie llofueoicaigano naimiena faínonocaillano, aisídímaci.

Jesúdí judíuáí illaícominí dine illa rafue

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesúna gaitadinodí Caifás jofomo Jesúna uitimaci. Caifás Jusiñamui diga nanoca ñairaima. Naimie jofomo jiaíe illaícominí jai ofidímaci. Moisés micorí llogacinona llofuerainí ofidímaci. Einamací jiaí ofidímaci. ⁵⁸ Jesús jinafona Pedro aarena jaide. Caifás jofo nairaíbírímo jaide. Naie rafue fuiduana naimie uñollena, nainomo ite jofomo maíjirainí diga raide.

⁵⁹ Naimiena meinellena, nana naie illaícominí Jesúmo nicino illana uñoiacadímaci. ⁶⁰ Iena coniníri siadotímaci; iadedí naimiemo jaca nie isoide marañede rafue illana uñoiñedímaci. Diga cominí Jesúna ñaitímaci; iadedí taino llotímaci. Ie mei menaimie bitíiaímaiaí. ⁶¹ Raitíiaímaiaí:

—Bimie llote: “Jusiñamui jofona judaíredícue. Judaía mei, darui amani illanona, iena dane finoredícue” —lloíiaímaiaí.

⁶² Jusiñamui diga nanoca ñairaima Jesúmo jícanote:

—¿Ñiese iaímaiaí uai oitio? ¿Nie isoide rafue ona llogídotíiaímaiaí?

⁶³ Jesús uai oñede. Naie ñairaima dinena llote:

—Caí Jusiñamui cajede. Naimie caína uñua jira, uanaicinona caí lloñenia, caína duere finoite. Uanaicinona caímo llono. “¿Odí Cristodí?” omo jícanotícue. “¿Odí Jusiñamui Jitodí?” omo jícanotícue.

⁶⁴ Jesús dinena uai ote:

—Jíí, naimiedícue. Iena raise llotio. Monamona jaie cue billamona, íimana jaidícue; iadedí íco jiaíruido illaímana cue illena, Jusiñamui ecímo cue raíllana omoi nairaí cioítímaci. Mona uillie motodo cue abído billena jiaí cioítímaci.

⁶⁵ Iena cacajanona, naimiemoná Jusiñamuina Jesús jeare ñaía jira, naie nanoca ñairaima dama ie iníroina cuaranote. Raite:

—Naimiedi Jusiñamuina jeare ñaíte. Jiaíe naimiena llogídotinona jai jítaíñedícaí. Ie ñaíamona dama naimie abina llogídote. ⁶⁶ ¿Ñiese naimiena raitomoi?

Jiaí illaícominí dinena uai otímaci:

—Naimie fiódaillesa.

⁶⁷ Ie mei naimie uiecona tuallaitimaci. Naimiena ducoidimaci. Jiai bucoidimaci. ⁶⁸ Raitimaci:

—O Cristodiodena, ¿bu o bucoia? caimo llono.
Jesús uai oñede.

Pedro: Jesúsna janua rafue

(Mr 14.66-72; Lc 22.56-62; Jn 18.15-18, 25-27)

⁶⁹ Naie facaise Pedro naie jofo nairaibirimo ite. Naie jofo nama mullaiño naimie dine billanona raite:

—Galileamona Jesús bite. Odi ie cominidio. Naimie diga jaicabidio —raite.

⁷⁰ Nana nainomo itinomo Pedro llote:

—O lluana uiñoñedicue.

⁷¹ Nase fuemo Pedro jaidemo, naimiena jiaie mullaiño ciuanona, nainomo itinomo llote:

—Bimiedi Nazaret ie Jesús comini imie.

⁷² Pedro uai ote:

—Uanaicinona cue lluana Jusiñamuidi uiñote. O llogamiena uiñoñedicue.

⁷³ Dallu illanona, nainomo itino Pedro dine billano, naimiemo llotimaci:

—Ua Jesús comini imiedio, o uai bairia jira. Naimie isoi ñaitio.

⁷⁴ Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uiñote. Ero, Jesúsna uiñoñedicue. —Ieconí itava ñaite. ⁷⁵ Iena cacajano, Pedro Jesús lluana uibiñote. Jaive Jesús Pedromo llote: “Itava nia ñaiñenia, dacaiño amani cuena janoitio” llote. Iena uibiñuanona, Pedro jino jaillano, sure eede.

27

Pilato dine Jesús illa rafue

(Mr 15.1; Lc 23.1-2; Jn 18.28-32)

¹ Monaidemo, nana Jusiñamui diga nanoca ñairainidi, nana einamaci diga, Jesúsna siadotimaci. Naimiena meinellena siadotimaci. ² Siadua mei, Jesúsna maianona, Poncio Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

Judas micori fiodailla rafue

³ Judas micori Jesúsna jai gaitatate. Naie illaicomini Jesúsna meiniana lluana naimie micoridi uiñuamona, ie comeci iuaina meidote. Illaicominimo ie treinta diga ucubena abido atide. ⁴ Raite:

—Jesús marañede rafuena jaca finoñede. Naimie fiodañeite. Naimiena cue gaitatajmona, marañedicinona jai finodicue.

Uai otimaci:

—¿Bue ñe caimo lluaibitio? O rafue caimo duiñede.

⁵ Ie mei Judas micori Jusiñamui jofo jeraimo naie ucubena fo jamai faite. Jino jaillanona, oni jaide. Dama naimie abina meinellena, cimao llirinote raona. ⁶⁻⁷ Jusiñamui diga nanoca ñairaini naie ucubena irai mei, iena siadotimaci. Coniniri raitimaci:

—Naie isoide ucube nainomo joniana Moisés micori jaie rairuilla jira, Jusiñamui jofomo ite ucube ocabiranomo jonenidicai. Naie ucube diga damie meinellena ibadicaí. —Ie jira naie ucube diga eniruena ibadimaci. Naie illanodi jiñora ouilla enirue. Jiaie nairaímona bu bia, naimie fiodaia, naie eniruemo naimiena raillena, iena ibadimaci. ⁸ Naie ucube muidona damie fiodailla jira, birui naie enirue mamecidi dirue ie enirue. ⁹ Iemona Jeremías micori jaie cueda rafue jai suide. Naimie micoridi Jusiñamui facaina lloraíma. Naimie micori cueda: “Cai Israel railla cominimona damerie railla jira,

naimiēna meinellena, treinta ucubena fecaitimaci. ¹⁰ Naie ucube diga jiñora ocabilla eniruena ibaitimaci, cai Nama Jusiñamui llua isoi” cuega.

Pilato dine Jesús illa rafue

(Mr 15.2-5; Lc 23.3-5; Jn 18.33-38)

¹¹ Pilato railla gobernador uicomo Jesúsna atia mei, Pilato Jesúsno jicānote:
—¿Judíuai comini illaimadio?

Jesús uai ote:

—Jii. Raise llotio.

¹² Ie mei Jusiñamui diga nanoca ñairainidi, einamací diga, naimiēna llogidote; iadedi naimiē dinena uai oñede. Ie abina riidoñede. ¹³ Ie muidona Pilato naimiēmo llote:

—Diga rafuena ona llogidotimaci. ¿Niēse uai oñedio?

¹⁴ Jesús nia uai oñede. Ie jira Pilato uainicaide.

Pilatodi Jesús fiodaillana llua rafue

(Mr 15.6-20; Lc 23.13-25; Jn 18.38–19.16)

¹⁵ Naga año pascua railla rafue facaiseconi cárcelmo itinomona Pilatodi comini jicacamiēna jamai jino orede. ¹⁶ Bie año cárcelmo Barrabás raillamiē ite. Naimiē mameci eo are soride. ¹⁷ Naie rafue illa jira, ailluena comini naimiē dine ofillano, naimacimo Pilato jicānote:

—Bie año cárcelmona, ¿bumiē jino cue oretajana jitaídomoi? Barrabás raillamiē ite. Jesús raillamiē jiaí ite. Naimiēdi Cristona jiaí mameciēde.

¹⁸ Iese jicānote; iadedi naimiēdi Jusiñamui diga nanoca ñairaini Jesúsri uradoillana uiñote. Naimaci Jesúsna meineiācanana jiaí uiñote. ¹⁹ Ie maijiracomo naimiē nia illanona, naie facaise Pilato ai naimiē dine rabe orede. Cuete: “Bimiēdi maraiñede rafuena jaca finoñede. Naimiēna duere finoñeno. Jaive naiō cue nicairillano, naimiē muidona cue comeci jarire ite”.

²⁰ Ailluena comini Pilato dine ofillanona, Jusiñamui diga nanoca ñairainidi, einamací diga, cominimo llotimaci:

—Pilato caimo jicānoia, Barrabás jino oretallena jica. Jesús meinellena jica—llotimaci. ²¹ Comini ofilla mei, naimacimo Pilato dane jicānote:

—¿Nimiē cue jino oretajana jitaídomoi?

Uai otimaci:

—Barrabás.

²² Pilato dinena jicānote:

—¿Niēse Jesúsna cue finuana jitaídomoi? Naimiēdi Cristona jiaí mameciēde.

Nana uai otimaci:

—Naimiēna cruzmo corai.

²³ Pilato dane jicānote:

—¿Niē isoide maraiñede rafuena finode?

Naimaci dinena ado ibi llonoidimaci:

—Naimiēna corai.

²⁴ Jesúsna jino oretajana jitaíñedimaci. Iena Pilato uiñuamona, comini jai uri iñenana naimiē cianona, jinui diga ie onollina jocuanona raite:

—Bimiē fiodaillana cue muidonañede. Bie rafue cuemo jai duiñede. Naimiē fiodaite omoi muidona.

²⁵ Uai otimaci:

—Dama iesede. Naimiē fiodaite cai muidona. Jiaí cai uruiaí muidona.

²⁶ Ie mei Pilatodi Barrabás naimaci jitailla jira, jino orede; iadedi Jesúsna sechedotajanona, naimiēna coraillena orede. ²⁷ Dajerie soldaduaídi Pilato jofomo Jesúsna uite. Nana soldaduaí nainomo ofidimaci. ²⁸ Naimiē iniroi duiñuano, naimiēmo jiduirede iniroina jitaídimaci. ²⁹ Eecuaimona

niga nuiciraina naimie ifogimo jitadimaci. Ie nabeillimo radosina jonete, illaimana naimie illa isoi. Caiñici ifodo raidimaci, illaimana naimie illa isoi. Raitimaci:

—Jadi, judíuai illaima. —Iese raillanona naimiena jifanododimaci. ³⁰ Naimiena tuallaitimaci. Naimie onollimo ite radosina naimaci llinocaida, naiedo naimie ifogina buta-butadimaci. ³¹ Jesúsna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jitadimaci. Ie mei naimiena coraillena oni uitimaci.

Jesúna coraia rafue

(*Mr 15.21-32; Lc 23.26-43; Jn 19.17-27*)

³² Jerusalémona naimaci jaillanona, Cirene railla eniruemona bitimie mo dafaifidimaci. Naimie mameci Simón. Naimiena Jesús uiga cruzna rocatatimaci. ³³ Gólgota raillanomo jaidimaci. Ifocoraina eruaila jira, iese mameciredede. ³⁴ Nainomo rillanona, ie abi isirena cacaiñellena, vinomo eriredede rana faianona, naimiemo fecadimaci; iadedi iena naimie facajano, iena jiroñede. ³⁵ Naimie coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uñollena, jifanododimaci. ³⁶ Ie mei ana raidimaci, naimiemo eruailena. ³⁷ Naimie ifogi afebeimo ie llogiduafuena jonetimaci. Iese cuega: “Bimiedi Jesús. Judíuai comini illaima”. ³⁸ Ie mei mena firiruide iaiaiaia coraidimaci. Damie Jesús nabeimo coraica. Jiamie Jesús jarifebeimo coraica. ³⁹ Naisodo jamai jaidino Jesúsna mameritimaci. Mamerillamona, ifogiaia jaididimaci. ⁴⁰ Raitimaci:

—Navui raisoidio: “Jusiñamui jofona judaíticue. Darui amani illanona, iena dane finoiticue” raisoidio. Ie muidona dama o abina mai jilloita. Jusiñamui Jitodiodena, cruzmona ana bi.

⁴¹ Ie facaise Jusiñamui diga nanoca ñairaini naimiena mameritimaci. Moisés micori llogacino llofueraini naimiena jiai mameritimaci. Einamaci naimiena jiai mameritimaci. Raitimaci:

⁴² —Jiaie comina jillotate; iadedi dama naimie abina jilloitanide. Naimiedi cai judíuai comini illaima raillamiedena, cruzmona naimie ana niade billasa. Ie mei naimiena inoiticaí. ⁴³ “Jusiñamui Jitodicue” naimie railla jira, naimiedi Jusiñamuina ja inotena, Jusiñamui jitaia, Jusiñamui naimiena jillotaite. —Iese naimiena mameritimaci. ⁴⁴ Naimie diga coraica iaiaiaia daje isoi naimiena mameritiaiaiaia.

Jesús fodailla rafue

(*Mr 15.33-41; Lc 23.44-49; Jn 19.28-30; Heb 9*)

⁴⁵ Jitoma naidai itemona, daje amani horas mona jitibicaide. ⁴⁶ Ie meinomo judíuai railla uaido Jesús ado jidaioide:

—Elí, Elí, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena fañonocaidio?” raite.

⁴⁷ Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraima Elíana uaidote —raitimaci.

⁴⁸ Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade. ⁴⁹ Ieconi jaino raitimaci:

—Ina nai. Dallu seda. Elías naimiena jilloitajaibillena sedaiticaí.

⁵⁰ Ieconi Jesús dane ado cuirioita, fodaite.

⁵¹ Naie facaise Jusiñamui jofomo ie fetaca iniroife ana anaba jillacimo motodo menafe cuararide. Ieconi ñuisaño suide. Iemona nofie oni bojode.

⁵² Diga raiafuaie econote. Jesús jillua mei, raiafomona, fodaillamona, ailluena Jusiñamuina inotinodi jillodimaci. ⁵³ Ie mei Jerusalémo naimaci jaillanona, diga comini naimacina ciodimaci. ⁵⁴ Nainomo ite capitán, ie soldaduai diga,

Jesús fiodaillana eruaidimaci. Ñuisaño ñuillana cacadimaci. Nana suide rafuena ciuanona, eo jacinaillamona, naimie raite:

—Uanai bimiedi Jusiñamui Jito.

⁵⁵ Ailluena riñoniai naie rafuena aarena cioidimaci. Naimiena canollena, Galileamona Jesús diga navui bitimaci. ⁵⁶ Naimaci motomo María Magdalena ite. Jiaie María jiaie ite. Naiñaiñodi Jacobo ei. Naiñaiño jiaie José ei. Zebedeo uruiaie ei jiaie ite.

Jesús raiafomo jonia rafue

(Mr 15.42-47; Lc 23.50-56; Jn 19.38-42)

⁵⁷ Jitoma ana itemo, eo ucuberedimie Pilato dine jaide. Naimiedi Arimatea nairai imie. Naimie mameci José. Jesús dibeimo jaidimie. ⁵⁸ Jesús abina jicallena, Pilato dine jaide. Pilato “Jee” raillanona, Jesús abina naimie ollena llote. ⁵⁹ Ie mei Jesús abina cruzmona ana José uanona, jeanide mare userede iniroi diga naimie abina ferinote. ⁶⁰ Nofici ie raiafomo jonete. Naie raiafo dama José jaie finoca, naimie iena. Jesús abi nainomo jonia mei, José naifomo noficina ñuitade. Naifo ibaide. Ie mei oni jaide. ⁶¹ María Magdalena raiafo uico dine jiaie María diga rainadatiaiañuaie.

Soldaduai Jesús raiafo sedaja rafue

⁶² Ie areruido, pascua railla rafue illarui, dajerie judúuaie illaicomini Pilato dine jaidimaci. ⁶³ Raitimaci:

—Ero, naie abi caitadimie nia fiodaiñenia, navui llote: “Cue fiodaillamona, darui amani illanona, jilloiticue”. ⁶⁴ Ie jira o uai oreta, darui amani raifi naie raiafo raise ibaillena, naimie llofueoicaigano nainomo jaillanona, naimie abi ari oi raillano. Naimie abina naimaci fñanona lloitimaci: “Naimie jai jillode”. Iese sua, cominina eo jifueitimaci.

⁶⁵ Pilato uai ote:

—Soldaduai omoïdo oreiticue, naie raiafo raise sedallena.

⁶⁶ Ie jira jaidimaci. Raona nitajano, raiafo raise ibaidimaci. Naiena sedallena, soldaduaïna nainomo fainonocaidimaci.

28

Jesús fiodaillamona jillua rafue

(Mr 16.1-8; Lc 24.1-12; Jn 20.1-10)

¹ Sábado fuilla mei, monaiacania, María Magdalena, jiaie María diga, raiafona jibuisaidiaiañuaie. ² Ieconï ñuisaño suide. Monamona billanona, Jusiñamui jaienici raiafomo ibaica noficina oni ñuitade. Naie noficimo raide. ³ Eo queniredena eruaide. Naimie iniroi eo userede. ⁴ Nainomo ite soldaduai naimiena eo jacinaillamona, abi docaidimaci. Iemona fiodaitino isoi dallu itimaci. ⁵ Ie facaise naie jaienici di dinena naie riño iaiañuaïmo llote:

—Jaciruiño. Coraica Jesúna omuiño jenuana uiñoticue. ⁶ Naimie bene iñede. Naimie llua isoi, fiodaillamona naimie jai jillode. Naimie ifo jeraimo billano mai jibuisaibi. ⁷ Ie mei ie llofueoicaigano dine raire omuiño jai. Fiodaillamona naimie jilluana naimacimo llono. “Galileamo omoï uicomo naimie jaite” llono. Bie rafue omuiño jai lloticue —llote. ⁸ Ie jira raiafomona raïjcaïllanona, eo iobïllanona, raïre jaidiaiañuaï. Ie llofueoicaigano dine aisidiaiañuaï. ⁹ Ie llofueoicaigano dine iaiañuaï nia riñenia, Jesús iaiañuaïmo dafaïfillano, raite:

—Itomuiño. —Naimie dine iaiañuaï rïllanona, naimiena sedallena, naimie eïllina llinotiaiañuaï. ¹⁰ Jesús dinena raite:

—Jaciruiño. Cue llofueoicaiganomo llono: “Galileamo jai. Nainomo omoïna cioiticue” llono.

Soldaduai raiafona sedademo suide rafue

¹¹ Jaidiaiañuaimo, nainomo ite soldaduai mona dajerie Jerusalémo jaide, nanoca Jusiñamui diga ñairainimo nana naimacimo suide rafue lollena.

¹² Iena cacajano, einamací diga iena siadotimaci. Ie mei naie soldaduai mo ucubena fecadimaci. ¹³ Raitimaci:

—Jiaie cominimo llono: “Cai inia mei, ie llofueoicaigano ie abina fiano uitimaci” llono. ¹⁴ Iena cai gobernador fidiia, naimie diga ñaiticai, omoina naimie duere finoñellena —raitimaci. ¹⁵ Ie jira naie ucubena feiñuanona, cominimo illaicomini llua isoi llotimaci. Naie rafue uiñocana jaide. Birui nia iena uiñocana jaide.

Jesús ie llofueoicaiganomo iraicaiño lloga rafue

(Mr 16.14-18; Lc 24.36-49; Jn 20.19-23)

¹⁶ Ie mei Galileamo naie once llofueoicaigano jaidimaci. Jesús lloga anedumo jaidimaci. ¹⁷ Naimiena naimaci ciuanona, naimiena sedadimaci; iadedi dajerie Jesús jilluana raise nia ñinoñedimaci. ¹⁸ Jesús dinena raite:

—Cue Moo cue uai cuemo iga, monamo cue jitailla rafue cue finollena, eniruemo cue jitailla rafue cue finollena. ¹⁹ Ie jira naga nairaimo jai, cue dibeimo naie cominina itatallena. Cue dibeimo naimaci jailla mei, cue Moo dibeimo naimacina illamona, naimaci cue dibeimo illamona, ie Joreño anamo naimaci illamona, naimacina bautiza. ²⁰ Nana omoimo cue lloga rafuena naimaci iena ñnollena, llofue. Nia abido cue biñenia, omoina canollena, omoi diga cue Joreño jaca iite —llote. Mai. Macaibaite. Mateodicue.

MARCOS JESUCRISTO ENIRUEMO ILLA RAFUE CUIAFUE

Jofue iñenanomo Juan Bautista micorì illa rafue

(Mt 3.1-12; Lc 3.1-9, 15-17; Jn 1.19-28)

¹⁻² Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micorì Jusiñamui facaina jaie llumona, Juan Bautista micorì llofuellena llote. Iena suillamona, Jesucristo eniruemo ite rafue tainede. Iena nano lloiacadicue. Isaías micorì cuete:

“Ero, o uicodo cue rafuena llolena, damiena oretaiticue” Jusiñamui raite.

³ Jofue iñenanomo damie jidai-jidaillana cacadicue.

Naimie llote: “Cai Nama biite. Naimie naiso atona raise fino” llote.

Naisona llote; iadedi naimie uaina naimaci feiñollena, naimaci comeciái marena finuana ñaite.

⁴ Isaías micorì llua isoi, Juan Bautista raillamie micorìdi Jusiñamui rafuena jofue iñenanomo llofuecana jaide. Cominina dafaifia, naimacimo llote:

—Omoi jeacinona faionocaida, Jusiñamui dibeimo omoi comeciái iuaillai meido. Iemona omoi jeacinona feitaite. Omoi comeciái iuaillai omoi meidoia, cominina iena uiñotallena, mai omoi bautizallomoi.

⁵ Diga comini naimie micorì dine jai jaisoidimaci. Jerusalémona, nana Judeamoná, nana Jordán fuemona jai jaisoidimaci. Jusiñamuimo naimaci jeacinona naimaci llua meino, naimacidi Juan micorì bautizaga.

⁶ Juan micorìdi camello itiraíai ie nilla iniroina jitade. Igoi iena ie moiligaina jitade. Fioduaina rite. Ciifona mete. Jamai rana guite. ⁷ Cominimo llote:

—Cue baifemo faitimie bie facaise biite. Jamai bue cue isoilla jira, naimiena cue canuana uiñoñedicue. ⁸ Jusiñamui dibeimo omoi illamona, jinui diga omoína bautizadicue; ia naimie bia, naimie dibeimo omoi jaillamona, Jusiñamui Joreña omoimo itataite.

Jesús bautizaja rafue

(Mt 3.13-17; Lc 3.21-22)

⁹ Jordán dine Juan micorì nia ia, Galileamoná, Nazaretmoná naimie dine Jesús bite. Nainomo Jesúsdi Juan bautizaga. ¹⁰ Bautizaja mei, jinui mona billanona, ieconi mona bojodena ciode. Jusiñamui Joreño, ucugi isoi, naimie emodomo ana billana ciode. ¹¹ Monamoná Jusiñamui llote:

—Cue isiruiga Jitodio. Ori iobidicue.

Jesúna Taife ramo faia rafue

(Mt 4.1-11; Lc 4.1-13)

¹² Jesús bautizaja mei, Jusiñamui Joreño jofue iñenanomo naimiena uite. ¹³ Comini nainomo iñede. Difai ocainaiái itimaci. Nainomo cuarenta digarui ite. Ie facaise Taife naimiena ramo faite; ia Jusiñamui jaenisaí naimiena sedadimaci.

Galileamo Jesús illa rafue

(Mt 4.12-17; Lc 4.14-15)

¹⁴ Naie facaise Juan Bautista micorìna Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide. ¹⁵ Llote:

—Jusiñamui birui omoína sedaacade. Ie cominina omoi jaillena birui jitaide. Jusiñamui dibeimo illena, omoi jeacinona faionocaida, omoi comeciái iuaina meido. Bie rafuena mai omoi ñino.

*Ie llofueoicaigano jaillena, Jesúsdi nagaamagamiena fetua rafue
(Mt 4.18-22; Lc 5.1-11)*

¹⁶ Jiairuido Galilea railla jorai fuemo Jesús macaritemo, menamiena ciode. Naga ie ama iaímaiaí. Damie Simón. Jiaímie Andrés. Lloijina fairaíma iaímaiaí. Iese jaca naie iaímaiaídi maijuidiaímaiaí. ¹⁷ Iaímaiaímo llote:

—Cue diga omíco jaoicaillena, cue diga mai bi. Cue llofueganona omíco jaillena jitaídícue. Lliciaína birui ocabitomíco; iadedí comínina oitomíco, cue díbeimo naimaci illena.

¹⁸ Iena cacajanona, ieconi iaímaiaí lloijina faínonocaida, naimie diga jaidiaímaiaí. Ie llofueganona jaillena, jaidiaímaiaí. ¹⁹ Lliaí baí Jesús jaidemo, jiaíe menamiena ciode. Naga ie ama iaímaiaí. Damie Jacobo. Jiaímie Juan. Iaímaiaí moodí Zebedeo. Botemo iaímaiaí lloijina sigaidiaímaiaí. ²⁰ Jesús iaímaiaína uaidote, ie llofueganona jaillena. Ie maijiraíni diga iaímaiaí mooná faínonocaida, botemona ari billanona, Jesús diga jaidiaímaiaí.

*Jesúdi Janaba anamo itímie jillotaja rafue
(Lc 4.31-37)*

²¹ Baí jaillanona, Capernaumo ie llofuegano diga Jesús ride. Nainomo naimie ia, sábadoruimo judíuaí ofiracomo jaide. Nainomo llofue. ²² Moisés micorí llogacino llofueraíni isoi llofueñede. Illaíma uai isoi naimie llofuia jira, nainomo ite comíni naimie llofuíamona raíjicaídímací. ²³ Janaba anamo illamie nainomo ite. ²⁴ Jesús llofuiana cacaita, Janabadi íimana ado cuirioitate:

—Odi Nazaret ie Jesús. ¿Bue ñeacadio caí diga? Caina duere finuaíbidío. Ona uíñotícue. Odi Jusíñamui ie mare fetocamiedío.

²⁵ Jesús naimiena lletade:

—Llicai. Naimiemona oni jai.

²⁶ Janaba naimiena docaitajanona, ado cuirioillanona, naimiemona oni jaide. ²⁷ Iena cíanona, nana nainomo itíno raíjicaídímací. Coniníri siadotímací:

—¿Ñiese ite? Bímie jiaíe uaido llofue. Janabamo naimie llua mei, íimamona Janaba oni jaide. Janaba Jesús uaina ínote.

²⁸ Iemona nana Galilea eníruemo Jesús mamecí are soride.

*Jesús Pedro jifaiñoña jillotaja rafue
(Mt 8.14-15; Lc 4.38-39)*

²⁹ Ofiracomona Jesús jaillanona, ie llofuegano diga, Simón jofomo jaide. Andrés nainomo jiaí jaínaiaíde. Jacobo, Juan diga jiaí fo jaide. ³⁰ Ie facaise Simón jifaiño duide. Abí cuaride. Nainomo itíno Jesúmo naiñaiño duillana llote. ³¹ Iena cacajanona, naiñaiño díne jaillanona, Jesús naiñaiño onollina llínote. Naiñaiñoña naidacaitade. Ieconi abí cuarilla faínonocaide. Guille finuanona, ie jofomo itínona ecade.

*Jesúdi ailluena duidínona jillotaja rafue
(Mt 8.16-17; Lc 4.40-41)*

³² Navuida, jítibicaídimo, Jesús díne comíni ailluena duidínona atídímací. Janaba anamo itínona jiaí atídímací. ³³ Nana Capernaum comíni naie jofonasemo ofídímací. ³⁴ Jesúsdi diga duiconá ailluena duidínona jillotate. Ailluena comíni Janaba anamona jillotate. Naimiena jananaí uíñua jira, Jesús naimaci ñaiana rairuide.

*Galileamo Jesús llofuia rafue
(Lc 4.42-44)*

³⁵ Ie areruido nia monaiñenia, Jesús casillanona, Capernaumona comini iñenanomo Jesús jaide. Nainomo Jusiñamuimo jiiide. ³⁶ Monaia, casidemo, jofomo Jesús iñena jira, Simón, ie nabaiñiaia digá, Jesúsna jenuaide. ³⁷ Baillanona, raite:

—Nana comini ona jenodimaci.

³⁸ Jesús uai ote:

—Jiaie nairaiaia dine mai cai jailli. Nainomo llofueiacadicue. Ie jira Capernaumona jino biticue.

³⁹ Nana Galileamo Jesús jaide. Judíuái ofiracuaimo llofuecana jaide. Ailluena cominimona jananiaina oni oretate.

Jesúdi efonaitimiena jillotaja rafue
(Mt 8.1-4; Lc 5.12-16)

⁴⁰ Ie facaise efonaitimie Jesús dine billanona, naimiena raise uaiduamona, caiñici ifodo ana rainadate. Raite:

—O jitaiadedi, cuena jillotaredio.

⁴¹ Naimiena duenaillamona, Jesús ie onolli naimiemo oni ñuitajanona, naimiena jetade. Raite:

—Ona jillotaiacadícue. Mai o jillo. ⁴² —Ieconí naimie jillode. ⁴³ Ie facaise Jesús naimiena oretaiacanano, naimiemo riire llote:

⁴⁴ —O jilluana bumo lloñeno; iadedi Jerusalémo Jusiñamui jofomo Jusiñamui digá ñairaiaia dine mai jai. O jilluana comini raise uiñollena, naimiemo o abina acatajai. Moisés micori jaie lloga rana Jusiñamuimo fecá.

⁴⁵ Iese Jesús naimiemo llote; iadedi Jesús finoca rafue llocana eo uite. Ie muidona ailluena comini Jesúsna cioacana jira, Jesús marefodo comini illanomo jaisoiñede; ia comini iñenanomo jaisoide. Iese jaisoide; ia naganomona naimie dine biñoidimaci.

2

Jesús tisitaitimiena jillotaja rafue
(Mt 9.1-8; Lc 5.17-26)

¹ Nigarui illanona, Capernaumo Jesús dane abido ride. Comini iena fidianona, ² ie risoillacomo naimie dine ofidimaci. Ailluena billa jira, fo illino iñede. Nasemo jiaia eo ofidimaci. Jesús naimacimo Jusiñamui rafuena llofue. ³ Cominina Jesús llofuetemo, naimie dine nagaamagamie ie bñiramo bñide tisitaitimiena atidimaci. ⁴ Ailluena comini illa jira, Jesús dine naimaci rinidimaci. Naie jofo bibanilla jira, jofo emodomo a jaidimaci. Jofo beicimo ite tidabacuideo a jaidimaci. Jofo emodo econuano, Jesús ecimo naimiena ie bñiramo bñide digá, rao digá, ana ñuitadimaci. ⁵ Iena Jesús cñuanona, tisitaitimie jilluana naimaci ñnuana Jesús uiñote. Tisitaitimie llote:

—Nabai, o jeacino cue feitaja jira, iena jai oni dotadicue. Ie facai ibana jai oñeiticue.

⁶ Nainomo itinomona damierie Moisés micori llogacinona llofuerañini nainomo raidimaci. Comecina facadimaci: ⁷ “¿Ñiese bimiedi iese llote? Dama Jusiñamui jeacina dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”. ⁸ Naimaci comeciá facajacinona Jesús uiñuanona, naimacimo jicanote:

—¿Bue ñellena omoi comeciaina iese facadomoi? ⁹ Bimiemo: “O jeacina jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona, o bñira ferinocaida, mai macari” cue lloia, cue uai siñonana uiñoitomoi. ¹⁰ Monamona jaie cue billanona, ñimana jaidicue. Ie jira jeacino

oni dotaja uai cuemo ite. Iena omoi uifollena, tisitaitimie lloiticue: ¹¹ “Mai naidacai. O bira ferianona, o jofomo mai jai”.

¹² Iese naimie raillamona, tisitaitimie jillode. Naidacaida, ie bira feria mei, naimacimona jino jaide. Nana nainomo itino rajicaidimaci. Iemona Jusiñamuimo iobillacinona fecadimaci. Raitimaci:

—Bie isoide siño comena jaca cioñedical.

Jesúdi Levína fetua rafue
(Mt 9.9-13; Lc 5.27-32)

¹³ Jiairuido jorai fuemo Jesús dane jaide. Ailluena comini naimie dine ofillanona, naimacina llofuede. ¹⁴ Llofuia mei, Jesús bai macaritemo, Leví raillamiena cide. Levídi Alfeo jito. Gobierno ucube ouillanomo naimie maijuide. Nainomo raidena Levína cide. Naimiemo llote:

—Cue llofuegamiena o jaillena, cue diga bi. —Naidacaida, Jesús diga jaide.

¹⁵ Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacinodo raise jaiñedino jiai guisaibitimaci. ¹⁶ Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúna cianona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci.

¹⁷ Iena cacajano, Jesús llote:

—Ecairedinodi médicono jitaiñedimaci; ia duidinodi médicono jitaiddimaci. Ie isoide. Mareuidino cuena jitaiñedimaci; ia maraiñedino cuena jitaiddimaci. Jusiñamui dibeimo mareuidinona uaibiñedicue; iadedi maraiñedino uaibiticue. Omoimona maraiñedino diga nabairiticue; ia naimacina uaibiticue.

Jesúmo comini guiñenana jicanua rafue
(Mt 9.14-17; Lc 5.33-39)

¹⁸ Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jiai guiñenaruillai ite. Jesús dine comini billanona, naimiemo llote:

—Cai einamací llua isoi, Jusiñamuina naimaci raise iobitallena, guiñenaruillai illa facaiseconi Juan Bautista llofueoicaigano guiñedimaci. Naimaci jeacino facaina sunaicabitimaci. Fariseuai llofueoicaigano iedo jiai jaidimaci; ia o llofueoicaigano jaca gutimaci. ¿Bue ñellena cai einamací rafuedo jaiñedimaci?

¹⁹⁻²⁰ Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillamona gutimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

²¹ Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. ²² Jacagomona finoca bolsa como finoca vino joneñega. Jonegadena, mairiñena jira, sirillamona igoi raire cuararite. Vino faifite. Igoi jiai faifite. Como finoca vino comogomo jonelle. Iemei iena

faifñeite. Ie isoide. Omoi einamací rafue ifomo jiaie rafue birui ite. Iena omoimo llocabiticue. Iedo jaidicai —llote.

Sábadoruimo Jesús llofueoicaigano maijia rafue
(Mt 12.1-8; Lc 6.1-5)

²³ Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijano, guicana jaidimaci.

²⁴ Dajerie fariseuai iena ciuano, llotimaci:

—Rairuica rana finosite. Moisés micorí rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Iese cai abimo jeacinona jai finodimaci.

²⁵ Ie llofueoicaiganona ríduano, Jesús uai ote:

—Cuemona jeacino finoñedimaci. David micorí jaie finoca rafuemo omoi comeciai raise facañedomoi. David micorí guille iñenia, naimie aimetaia, ie nabaiñiai diga, Jusiñamui jofomo fo jaide. ²⁶ Naie facaise Jusiñamui diga nanoca ñairaimadi Abiatar. Jusiñamui jofomo naimaci fo jailla mei, Jusiñamuimo fecaca llomeniconona uanona, guitimaci. Jamai bue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga, David micorí iena guite; ia Jusiñamui naimacina duere finoñede. ²⁷ Jusiñamui sábadona finuamona, sábadó ite, nairui illamona comini caimare illena; ia omoi llofuiamona, iese iñedimaci. Nairuimo rairuica rana finoñellena, comini iese illena llofuecabitomoi. ²⁸ Monamona cue billamona, imana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiaie rairuiredicue. Ie jira nairuimo cue jitailla rafuena finoredicue.

3

Jesúdi onollina idisarodimiena jillotaja rafue
(Mt 12.9-14; Lc 6.6-11)

¹ Jiaie sábadoruimo judíuai ofiracomo Jesús dane jaide. Ie facaise onollina idisarodimie nainomo ite. ² Nainomo itino Jesús eruaidimaci, sábadoruimo Jesús naimie raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Sábadoruimo bu maijia, naimacimona jeacino finode. ³ Onollina idisarodimie mo Jesús llote:

—Cue ecimo mai bai bi.

⁴ Jesús nainomo itinomo jicanote:

—¿Nie isoide rafue sábadoruimo finuadi mare? Bimie birui cue jillotaiadedi, birui mare rafuena finodicue. Cuena birui omoi meineiadedi, birui marañede rafue finodomo. Sábadoruimo, ¿nie isoide rafue finuana rairuidomoi?

Comini dinena uai oñedimaci. ⁵ Naimie uaina naimaci ñinoñena jira, rícaillanona, Jesús naimacimo erodate. Duidimie mo llote:

—O onolli mai oni ñuita.

Iena oni ñuitajamona jillode. ⁶ Iena ciuanona, fariseuai jino jaidimaci. Naimiena meinellena, illaima Herodes díbeimo itinona baillanona, naimaci diga coniniri siadotimaci.

Jorai fuemo Jesúsdi ailluena cominina llofuiia rafue

⁷ Naie nairaimona jorai fuemo Jesús, ie llofueoicaigano diga, oni jaide. Galilea raila eniruemona ailluena comini naimie dine bitimaci. Judeamona jiaino bitimaci. ⁸ Jerusalémoma, Idumeamona, Jordán ruicafebellomona, Tiro jinofemo ite eniruemona, Sidón jinofemo ite eniruemona ailluena bitimaci. Nana naimie siño finoca rafuena cacajanona, naimiena

ciocadimaci. ⁹ Comini naimiena meetasi raillanona, ie llofueoicaiganomo daje botemo naimie jaillena eenogana llote. ¹⁰ Ailluena duidinona naimie jai jillotaja jira, nana duidino naimiemo riacadimaci. Jilloillena naimiena jetaacadimaci. Iemona naimie illa bote eenuana jitaide. ¹¹ Jananiai anamo itino Jesúna cioia, Jesús uicomo ana bitadajanona, jananiai naimacina ñaitatajamona, raitimaci:

—Jusiñamui Jitodio. ¹² —Ia Jesús naimiena naimaci llwana rairuide.

Jesúdi ie doce llofueoicaiganona fetua rafue

(Mt 10.1-4; Lc 6.12-16)

¹³ Naie facaise anedumo Jesús jaide. Ie jitaillano diese naimie dine uaidote. Naimie dine billa mei, ¹⁴ doce digamiena fetode. Naimie diga jaicabillena, naimacina fetode. Ie rafuena lollena, naimacina oretaiacade. ¹⁵ Janaba anamo itinomona Janabana oni oretallena, ie uai naimacimo ite. ¹⁶ Iese mameciredimaci: Simón; naimie mameci jiaicidi Jesús jítaca Pedrona. ¹⁷ Jacobo, Juan; iaimaiai Zebedeo jito iaimaiai. Jiaie mameci iaimaiaina Jesús jonete Boanergesna. Naie mameci oni dobañuamona mona guruama. Iciriruilla jira, iese mamecirediaimaiai. ¹⁸ Andrés, Felipe, Bartolomé, Mateo, Tomás, jiaie Jacobo; naimiedi Alfeo jito. Tadeo, jiaie Simón; naimiedi cananista comini facaisemo duide. ¹⁹ Judas Iscariote micori; naimiedi Jesúna gaitatimie.

Fariseuai Jesúna jeare ñaia rafue

(Mt 12.22-32; Lc 11.14-23; 12.10)

²⁰ Ie llofueoicaiganona fetua mei, ie risoilla jofomo naimaci diga Jesús abido jaide. Ailluena comini naimie dine billa jira, naimie guillena, naimie abi juanide. ²¹ Naimiena ie comini fidiano: “Naimiedi jai uairico isoi iacade” raillanona, comecina facadimaci. Ie jira naimiena ie ei jofomo isaibiacadimaci. ²² Jerusalémoma Moisés micori llogacinona llofueraini naie facaise billanona, raitimaci:

—Beelzebúdi Janaba comini. Beelzebú anamo Jesús illamona, Beelzebú uaido Janaba illa cominimona Jesúdi Janabana oni oretate —raitimaci.

²³ Naimaci raillana naimie cacajanona, naimie dine Jesús naimacina uaidote. Llote:

—Janaba díbeimo Beelzebú illamona, dama ie abina oretanide. ²⁴ Ero, daje isoi comeciaina lloñenamo daje nairai facañenia, danomo maijinidimaci. Oni jaidimaci. ²⁵ Daje isoi comeciaina lloñenamo daje jofomo itino facañenia, danomo jainaiainidimaci. Oni jaidimaci. ²⁶ Ie isoide. Beelzebú uaido jananiaina omoi lua isoi cue oretaia, Janaba ie díbeimo itino diga jai nabairiñede. Iemona naimie comini danomo iñeitimaci. Ie uai ieconi saite. ²⁷ Ero, maíridimie ie jofomo ite rana nibai fiíacadomoi. Iena fiíllena, naimiena nano raise omoi maiga. Raise maiga mei, ie rana fiíredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. ²⁸ Ie jira bie omoimo lloiticue. Jusiñamui nana comini jeacinona dotarede. Naimiedi naimaci jeare ñaiacinona dotarede; ²⁹ iadedi naimiedi ie Joreñoña jeare ñaiacinona jaca dotañeite. Jusiñamui iena jaca feitañeite —llote.

³⁰ —Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode —Jesúna raitimaci. Iese naimaci railla jira, “Jusiñamui naie isoide ñaiacinona jaca dotañeite” iese Jesús llote.

Jesús ie comini

(Mt 12.46-50; Lc 8.19-21)

³¹ Jesús comini naimie dine rillanona, naimie diga ñaiacanano jino naidaidimaci. ³² Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

—O ei, o amatiai diga jino ite. O diga ñaiacade.

³³ Jesús dinena uai ote:

—¿Bu cue ei? ¿Bu cue amatiai?

³⁴ Naimie ecimo itinomo erodajanona, llote:

—Jadi, cue ei, cue amatiai. ³⁵ Jusiñamui jitaillacinona finodimie cue amana, cue miriñona, cue eina. Imaci ua cue cominina.

4

Jesúdi trigona judaidimiena llua rafue

(Mt 13.1-9; Lc 8.4-8)

¹ Jiairuido jorai fuemo dane jaillanona, ailluena comini naimie dine ofillamona, Jesús naimacina llofuate. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci. ² Ailluena rafuena naimacina llofuate. Raite:

³ —Omoi fueollena, bie rafuemo raise cacarei. Damie trigona judaiaide.

⁴ Naimie judaiamona, naisomo janore iduai juide. Naimie bai jailla mei, silliñiai iena guisaibitimaci. Ie jira sicoñede. ⁵ Nofiemo jiaie iduai juide. Nainomo enirue raise iñede. Sicode; iadedi enirue raise iñena jira, ⁶ raise jainañena jira, ecasillamona duide. Ie jira llisiñede. ⁷ Eecuai illanomo jiaie iduai juide. Eecuai sicuamona riarra eecuai ibaica. Ie jira llisiñede. ⁸ Mare eniruemo jiaie iduai juide. Sicode. Llisillamona danademo treinta diga llisillana ote. Jiañamona sesenta diga llisillana ote. Jiañamona cien diga llisillana ote. ⁹ Omoi jeforena jira, raise fueollena, cue lluomo cacarei. Iena iño.

Jesús ie como lloga rafuena llofuiia rafue

(Mt 13.10-23; Lc 8.9-15)

¹⁰ Ailluena cominimona jailla mei, naimie diga jaisoidinodi, ie doce llofueoicaigano diga, Jesúmo ie llofuiiana jicanotimaci. ¹¹ Uai ote:

—Jusiñamuidi omoina ie sedaacana rafuena jai uiñotade. Jaie iena uiñoñedomoi. Jiaie cominina iena nia uiñotañede. ¹² Ie jira bie isoidicnodo naimacimo lloticue. Cue siño finoca rafuena ciodimaci; iadedi iena naimaci iñoñena jira, uiñoñeno jaitimaci. Cue llofuiiana jamai cacadimaci; iadedi naimaci iñoñena jira, raise cacaiñedimaci. Uiñoñedimaci. Jusiñamui dibeimo naimaci jaiacaiñena jira, Jusiñamui naimaci jeacinona oni dotañeite. Iena feitañeite. ¹³ Cue como llofuiacinona omoi raise cacaiñenia, dane cue llofuiia, iena jiai raise nibai cacaiñeitomoi; ¹⁴ ia iena omoina llofueiticue. Trigona judaidimiedi Jusiñamui rafue lloraíma isoide. ¹⁵ Dajerie iduai naisomo juide. Dajerie comini comeciai naie naiso isoidimaci. Jusiñamui uaina cacadimaci; ia Taife naimaci comeciaino cacaja uaina iñotañede. ¹⁶ Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci. ¹⁷ Nofiemo riga iduai jinaonidedi raise sicoñede. Naie comini janore iñua jira, ie isoidimaci. Dallu nano iñotimaci. Jusiñamui uai muidona duere naimaci sefuiia, abido danomo uaidimaci. ¹⁸ Jiaie iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. Iñotimaci; ¹⁹ iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaile rafuena finocana jaiñedimaci. ²⁰ Jiaie iduai mare eniruemo juide. Dajerie comini comeciai naie enirue isoidimaci.

Jusiñamui uaina cacajano, iena raise feiñotimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Jesúdi lamparina ñaia rafue

(Lc 8.16-18)

²¹ Jorai fuedo Jesúdi cominina nia llofujete:

—Jai uneca lamparín jiaie illanomona atia mei, jiaie ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainade. ²² Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie inotimaci. Damierie inoñedimaci. ²³ Omoi jeforena jira, raise fueollena, cue llamo cacarei. Iena ino.

²⁴ Cue llamo raise cacarei. Omoi cacaja diese Jusiñamui omoina uiñotaite.

²⁵ Iena omoi inoia, Jusiñamui omoina canoite. Omoina uiñocana jaitaite. Jiamie iena janore cacajamona, iena inoñenia, Jusiñamui naimiena faifitaite.

Jesúdi Jusiñamui ie cominina sedaacana llofua rafue

²⁶ Jesús llote:

—Jusiñamui dibeimo comini jailla rafuena nia lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie ie illimo judaiaide. ²⁷ Judaia mei, ie illimo nagarui ie maijicabilla isoi naimie jaide. Niese iduai denuana naimie raise uiñoñede; ²⁸ ia enruemona nano sicode. Monaila mei, lliside. Iemona naicuai comuide. ²⁹ Jai einaia, iena ote. Ie isoide. Jusiñamui rafuena raise cacaiñedomoi; ia iena inocana jaidomoi.

Jesúdi mostaza ido lua rafue

(Mt 13.31-35; Lc 13.18-19)

³⁰ Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. ³¹ Jiaie rafuedo iena omoimo lloiticue. Damie mostaza idona rillamona, naiemona eo aillue riará sicode. Mostaza ido eo janorede; ³² iadedi sicua mei, eo aillue riará jaillamona, ie onogaillai jegairiena jira, icairo anamo manaidinomo sillinai jicaiciana finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

³³ Naie isoide rafuiaido Jesúdi Jusiñamui ie cominina sedaacana rafuena cominimo llote. ³⁴ Naimaci cacaja diese llote. Naimacimo jiaie rafuedo lloñede; ia ie llofueoicaiganomo iena eneno llofujete.

Jesúdi jorai baguana llucaitaja rafue

(Mt 8.23-27; Lc 8.22-25)

³⁵ Ailluena comini llofua mei, jitoma jai sojicaidemo, ie llofueoicaiganomo Jesús llote:

—Ruica enefebeimo mai cai jailli.

³⁶ Cominina faionocaida, botemo naimie jai illamona, naimie lua isoi, oni jaidimaci. Jiaie botes jiai jaide.

³⁷⁻³⁸ Bai jaillanona, jillacimo Jesús inide. Ie ifogi almohadamo biide. Ie facaise aifi eo riire bite. Joraidi eo bagode. Baguamona, botemo jinui a uaide. Oruiacana jira, jacinaillamona, Jesúsna casitatimaci. Raitimaci:

—Maestro, ¿niese itio inoilla? Caina cano. Jai buisaidicai. Corobaisaidicai.

³⁹ Naimie casillano, aifina lletade. Jinui baguana llucaitade. Ieconi aifi llucaide. Bagoñede. ⁴⁰ Ie llofueoicaiganomo jicanote:

—¿Bue ñellena jacinaitomoi? ¿Niese cuena raise inoñedomoi?

⁴¹ Uai oñeno eo rajicaidimaci. Coniniri ñaitimaci:

—Bimiedi ¿nie isoidimie? Aifi naimie uaina inote. Jorai naimie uaina jiai inote. —Bai jaillanona, ruica dine ridimaci.

5

Jesúdi Gadara railla eniruemo illa rafue

(Mt 8.28-34; Lc 8.26-39)

¹ Ruica dine naimaci ridemo, Gadara railla eniruemo sijidimaci. ² Botemona ari Jesús jaidemo, naimie dine damie bite. Naimiedi Janaba anamo itimie. ³ Comini raioillanomo nofie moto ifuaimo naimie i-isoide. Janaba anamo naimie illamona, comini diga marena jaca irainide. ⁴ Diga icaiño lleo diga ie onollidi maiga; iadedi oni ecocaida, lleoona ticonote. Ie eilli jiai maiga; iadedi saitaicaida, lleoona ticonote. Ie jira buna naimiena raise mainide. ⁵ Nagarui nofie motomo ite. Anedumo jaisoide. Cuiricuirisoide. Dama ie abina nofici diga jaidode. Iese naimie isoide. ⁶ Nofiemona Jesúna ciuanona, aisicana Jesús dine bite. Naimiena sedallena, ie caiñici ifodo ana rainadate. ⁷⁻⁸ Jesús llote:

—Janaba, bimiemona oni jai.

Janabadi imana ado llotatate:

—Nanoca Jusiñamui Jitodio. ¿Niese cuena nibaiacadio? Jusiñamui mamecido cuena duere finoño.

⁹ Jesús Janabamo jicanote:

—¿O mameci bu?

Uai ote:

—Aillosiedicai.

¹⁰ Bie illanomona naimacina oretañellena Jesúmo duere jicanotimaci. ¹¹ Naie facaise nainomo ite anedumo ailluena chanchuai itimaci. ¹² Chanchuai abimo naimaci jaillena Jesúmo duere jicanotimaci. ¹³ Jesús dinena:

—Jee —raite. Ieconi ima abimona oni jaillanona, chanchuai abimo jaidimaci. Dos mil chanchuai nainomo itimaci. Iena suidemo, iconi jillacimo joraimo chanchuai aisiano corobaisidimaci.

¹⁴ Iena ciuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. Ie jira diga comini jaide, naie rafuena raise fidillena. ¹⁵ Jesús dine naimaci ridemo, jaive Janaba anamo illamiena Jesús ecimo raillana cioidimaci. Naimie iniroina jai jitade. Naimie jai uairicoñede. Iena ciuanona, Jesúna jaciruitimaci. ¹⁶ Naie rafuena ciodino jaive Janaba anamo illamie jilluana llotimaci. Chanchuaimo suide rafuena jiai llotimaci. ¹⁷ Naie enirue itinodi Jesúmo naimaci eniruemona oni jaillena duere jicanotimaci.

¹⁸ Botemo Jesús jaiacania, jaive Janaba anamo illamie Jesúmo jicanote, naimie diga jaillena; ¹⁹ ia Jesús raite:

—Dama ite. O nabaiñiai dine jai. Nana Jusiñamui omo finoca rafuena naimacimo llono. Jusiñamui ona duenaillana naimacimo llono.

²⁰ Ie jira oni jaide. Nana Decápolis railla eniruemo Jesús nana naimiemo finoca rafuena llocana jaide. Iena cacajamona, nana comini rajicaidimaci.

Jesúdi mena duide riñona jillotaja rafue

(Mt 9.18-26; Lc 8.40-56)

²¹ Ruica ðibeimo ie llofueoicaigano ðiga Jesús abido rilla mei, ailluena comini naimie ðine ofidimaci. Jorai fueo naimie nia ia, ²² Jairona mameciredimiedi Jesús ðine bite. Naimiedi judíuai rafue ofiraco sedarima. Jesúmo ðuere jicanollena, ana bitadate. ²³ ðuere jicanote:

—Cue jisa jai fiodaiacade. Cue jofomo cue ðiga bi, o onolli naiñaiño o jonellena, naiñaiño jilloillena.

²⁴ Iena cacajano, ie llofueoicaigano ðiga, naimie ðiga Jesús jaide. Ailluena comini Jesúmo ñajillanona jaidimaci. ²⁵ Bai jaillanona, ðuidiñaiño Jesús jinafona jaide. Naiñaiño jeraimona doce años jaca ðiaide. ²⁶ ðiga manorainimona ðuere sefuide. Jilloñede; ia fodo jaide. Nana ie ucube jiai fuite. ²⁷ Jesús ðuidinona jilluana naiñaiño fidiamona, jinafo ðinena billanona, naimie iniroina jetade. ²⁸ “Naimie iniroi cue jetajamona jilloitícue” comecina facajamona, naiñaiño naimie iniroina jetade. ²⁹ Ieconí ðiailladi fañonocaide. Ie abi jilluana naiñaiño jai uiñote. ³⁰ Ie abimona ie uai oni jaillana Jesús uiñuanona, dobaicaide. Cominimo jicanote:

—¿Bu cue iniroina jetade?

³¹ Ie llofueoicaigano ðinena uai otimaci:

—Ailluena comini o ecimo jaidimaci. Omo ñajjidinona: “¿Bu cue iniroi jetade?” raitio.

³² Raise uiñollena, Jesús ie ecimo itinomo erodate. ³³ ðuidiñaiño ie jilluana uiñua jira, Jesús ðine jaciruicana bite. Naimie uicomo ana bitadajanona, nana naiñaiño o ite rafuena llote. ³⁴ Naiñaiño Jesús llote:

—Ñoo, cuena o inua jira, jai jilloðio. Mai marena o jai. O ðuicomona jai jillobidio.

³⁵ Naiñaiño ðiga Jesús nia ñaitemo, Jairo jofomona jiaino bite. Jairomo llote:

—O jisa jai fiodaite. Maestrona ñaidoño.

³⁶ Iena cacajano, Jairomo Jesús llote:

—O comeci jarire iño; ia cuena nia ino.

³⁷ Ailluena comini naimie ðiga jaillana rairuide. Dani ðiese jaillana jitaide: Pedro, Jacobo, Juan. Juandi Jacobo ama. ³⁸ Jairo jofomo rillanona, nainomo itino eecuinaillana cacade. Failliñailana cacade. ³⁹ Jesús fo jailla mei, nainomo itinomo jicanote:

—¿Ñiese itomoi eecuinailla? Cuemona naiñaiño fiodaiñedesa. Jamai inide.

⁴⁰ Iena cacajano, naiñaiño jai fiodaite uiñuamona, Jesúri jaisitimaci. Naimacina Jesús jino oretaja mei, nai jitaño moo ðiga, naiñaiño ei ðiga, ie llofueoicaigano ðiga, naiñaiño ecimo Jesús jaide. ⁴¹ Naiñaiño onollina llinocaida, judíuai uaido raite:

—Talita, cumi. —Iena oni ðobaiñuamona: “Jitaibici, mai naidacai” raite.

⁴² Ieconí jilluanona naidacaide. Jai jilluano macarite. Naiñaiño doce años jai ite. Nana nainomo itino ieri eo rajicaidimaci.

⁴³ —Bumo bie rafuena lloño —naimacimo Jesús llote. Guillena naiñaiño eajana jiai llote.

6

Nazaretmo Jesús illa rafue (Mt 13.53-58; Lc 4.16-30)

¹ Naie illanomona Jesús oni jailla mei, ie llofueoicaigano ðiga Nazaretmo ride. ² Rilla mei, sábadoruimo nainomo ite ofiracomo llofue. Iena cacajanona, nainomo itino rajicaidimaci. Raitimaci:

—¿Ñiese eo abina uiñote? ¿Bumona ie uaina ote? ¿Ñiese siño rafuena naimiedi finode? Naimiedi jamai bue isoidimie. ³ Naimiedi amederaima.

María jito. Ie amatiáidi Jacobo, José, Judas, Simón. Naimie miriñotiaidi cai motomo jiai ite. —“Cai comena naimie ite” raillanona naimie uaina jamaidimaci.

⁴ Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina ñnoñedomoi.

⁵ Ie muidona nainomo siño rafuena eo finonide. Damierie duidinona jetajamona, naimacina jillotate; ⁶ ia naimaci ñnoñenari rajjicaide. Ie mei diga nairaimo Jesús llofuecana jaide.

Jesúdi ie llofueoicaiganona oretaja rafue
(Mt 13.53-58; Lc 4.16-30)

⁷ Ie doce llofueoicaiganona Jesús uaiduanona, naimacimo ie uai iñonocaide, jananiai anamona cominina jilloitallena. Ie rafuena lollena, jiaie illanuaimo naimacina menamierie oretaiacade. ⁸ Raite:

—Ailluena rana uiñeno. Omoi abi ruidollena, jiguidana uiño. Llomenicono uiñeno. Ailluena rana omoi uiñellena, bolsana uiñeno. Ucubena uiñeno. ⁹ Zapatona jítajano jai. Abi omoi meidolle ñniroina uiñeno. ¹⁰ Nie nairaimo omoi jai, daacomo omoi ri. Naie nairaimo omoi ille ñnori, daacomo omoi i. ¹¹ Omoina bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina oni jaidino. Maraiñede rafuena naimaci finuana naimaci uiñollena, omoi eilliaina jaidino.

¹² Jesús naimacimo llua mei, jaidimaci.

—Omoi jeacinona fañonocaillanona, Jusiñamui ñibeimo omoi comeciai iuai meiduana omoi jai —llofuecana jaidimaci. ¹³ Janaba anamo ite cominimona Janabana oredimaci. Duidino abimo farena gia mei, naimacina jillotate.

Juan Bautista micori fiodailla rafue
(Mt 14.1-12; Lc 9.7-9)

¹⁴ Jesús mameci are sorilla jira. Herodes railla gobernador Jesús finoca rafuena fidide. Naimie raite:

—Fiodaillamona Juan Bautista micori jai jillode. Jesús raillamiedi naimie. Ie jira naimie siño rafuena finocabide.

¹⁵ Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micori jai jillode.

¹⁶ Jesúsna fidiano, Herodes comecina facade: “Juan micori ie ifogina navui jaitataticue. Fiodaillamona naimie jai jillode”.

¹⁷⁻¹⁸ Iese comecina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

¹⁹ Ie muidona Herodías ñinena Juan Bautista micorina jearuite. Naimiena meinetaiacade; ²⁰ ia finonide, Juan Bautista micorina Herodes jaciruilla jira. Naimiedi Juan micorina mareuidimiena uiñote. Naimie Juan micori Jusiñamui rafuedo jaillana jiai uiñote. Ie muidona naimie Juan micorina raise eenote. Diga icaiño naimie micori llua cacade. Iena gaide; ia iena raise cacaiñede. Ie muidona Herodías naimie micorina meinetanide; ²¹ ia ja muidomo naiñaiño sedallirui ride. Herodes cumpleaños ie rafuena finode.

Ailluena illaicomínina ie rafuemo uaidote. Eo ucuberedinona jiaí uaidote.
²² Rafuemo Herodías jisa saillamona, Herodena iobitade. Ie uaidoganona jiaí iobitade. Iobillamona, Herodes naiñaiño mo lloste:

—O jitailla ra cuemo jica. Iena omo fecaiticue. ²³ Illaíma uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairaí o jicadiodena, atuedo omo iiticue.

²⁴ Iena cacajano, naiñaiño ie ei ñine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

²⁵ Herodes ñine raire abido billanona, lloste:

—Juan Bautista ifogi bandejamo ja jonecaida, cuemo ine.

²⁶ Iena cacajano, Herodes sunaite; iadedi naimie llua jira, nainomo naimie uaidogano jiaí illa jira, ie lloga uaina janoiacañede. ²⁷ Ie facaise ie soldaduaímona Herodes ñine cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade. ²⁸ Bandejamo naimie ifogi jonecaida, iena atiano, Herodías jisamo fecade. Ieconi ie eimo fecade. ²⁹ Iena fidianona, Juan micori llofueoicaigano naimie micori abina uaíbitimaci. Iena raitimaci.

Jesús cinco mil iñiaína ecaja rafue

(Mt 14.13-21; Lc 9.10-17; Jn 6.1-14)

³⁰ Jesús llofueoicaigano abido bia, Jesúmo nana naimaci finoca rafuena llotimaci. ³¹ Ie facaise ailluena comini naimaci ñine biñoidimaci. Ie jira jafaici ollena abi juanide. Guillena jiaí abi juanide. Ie jira Jesús ie llofueoicaiganomo lloste:

—Jafaici cai ollena, eneno oni mai cai jailli. Comini iñenanomo mai cai jailli.

³² Ie muidona botedo comini iñenanomo ñine jaidimaci. ³³ Ailluena comini naimaci oni jaillana cioidimaci. Naimacina uñuamona, diga nairaíamona aisicana jaidimaci. Jesús ñia riñenia, uicodo ie jaillanomo ridimaci. ³⁴ Jesús sijianona, ailluena cominina ciode. Naimacina sedallena bu iñena jira, toica llauaíaina sedaraíma iñena isoi, isoidimaci. Iena uñuamona, Jesús naimacina duenaite. Ailluena rafuena naimacina llofue. ³⁵ Jitoma ana itemo, ie llofueoicaigano naimie ñine lluaíbitimaci. Raitimaci:

—Jofue bene iñede. Jaca buedi iñede. Jai navuiacade. ³⁶ Comini mai abido oreta. Ianori ite nairaíaimo, ianori ite jofuemo naimaci guille ollena, bie cominina abido oreta.

³⁷ Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana ñibaí jitaídio.

³⁸ Naimacimo jicanote:

—¿Ñiga llomenico omoímo ite? Mai jibuisai.

Jibuisailla mei, raitimaci:

—Cinco llomenico mena lliciaí diga.

³⁹ Iena cacajano, cominimo raitie illanomo dajerise ana raillena Jesús lloste. ⁴⁰ Naimaci cien digamierie ana raisite. Jiaíno cincuenta digamierie ana raisite. ⁴¹ Naie cinco llomeniconona, naie mena lliciaí diga, Jesús uanona, monamo eruaíllanona, Jusíñamuimo iobillacinona fecade. Iemei taíllude. Ie llofueoicaiganomo fecade, cominina ecallena. Iese naie mena lliciaí nana cominimo fecade. ⁴² Nana guillanona monidimaci. ⁴³ Monillamona, fiebide guillena iraidimaci. Doce cirigaíaimo oruitatimaci. ⁴⁴ Cinco mil iñiaí diese guitimaci. Naimaci ainiaí, imaci uruiaí diga, jiaí guitimaci.

*Jesús jinui emododo macarilla rafue
(Mt 14.22-27; Jn 6.16-21)*

⁴⁵ Guilla mei, botedo ie llofueoicaigano ruica dñe Betsaidamo jaillena llote. Naie facaiseconi cominina naimie nia facadote. ⁴⁶ Cominina facadua mei, aneduaimo dane jaide, Jusiñamui diga ñaillena. ⁴⁷ Jitibicaidemo, nainomo dama ite. Ie llofueoicaigano jorai motomo jai itimaci. ⁴⁸ Aifi naimacimo riire rilla jira, riire jaitimaci. Iena Jesús cñuanona, jinui emododo naimaci dñe bite. Naimaci ecido naimie jaisaide; ⁴⁹ ia naimiena naimaci cñuanona, comecina facadimaci: “¿Bu joreño caimo billana ciodicai?” ⁵⁰ Naimiena cñuamona, nana jacinaillamona cuiroidimaci. Naie dacaiño Jesús naimacimo llote:

—Omoi joreñonicaiño. Cuesa. Jaciruiño.

⁵¹ Botemo Jesús jaide. Ie facaise aifi llñcaide. Ieri eo raijcaidimaci. ⁵² Janore guillemona ailluena cominina naimie ecajana jaive ciodimaci; ia naimie uai siñonana nia raise uiñoñedimaci. Naimiena nia raise ñnoñedimaci.

*Jesúdi duidinona Genesaret eniruemo jillotaja rafue
(Mr 14.34-36)*

⁵³ Ruica dñe jaillanona, Genesaret railla eniruemo ridimaci. Nainomo sijidimaci. ⁵⁴ Botemona ari jaidemo, nainomo itino Jesúsna uiñotimaci. ⁵⁵ Nana naie eniruemo aisicana jaidimaci, duidino naimie dñe atillena. Naimaci bñira emododo duidinona atisite. Jesús illana naimaci fidiano, iese atuidimaci. ⁵⁶ Diga nairaiamo naimie jaide. Nie nairaimo Jesús ria, naimaci illano motomo duidinona atisite. Jilluana jitaidimaci. Ie ñiroi fueda jetallena naimiemo duere jicanotimaci. Nana naimie ñiroina jetadino ñese jillodimaci.

7

*Jesúdi comini comeciaina ñaia rafue
(Mt 15.1-20)*

¹ Naie facaise fariseuai cominidi Jesús dñe bitimaci. Moisés micori llogacinona llofuerañi Jerusalémona jiai bitimaci. ² Jesús llofueoicaiganomona damerie naimaci isoi guiñenana ciodimaci. ³⁻⁵ Fariseuai ñnena Jesúsno jicanotimaci:

—¿Bue ñellena omoi llofueoicaigano cai einamací rafuedo jaiñedimaci? Naimaci guacania, naimaci onollí cai einamací llua isoi, raise jocoñedimaci. Ie jira cai abimo jeacino finodomoí.

Iese jicanotimaci, naimaci einamací rafuedo naimaci jailla jira. Maraiñede rafue naimacimo suiñellena, iese ailluena judíuai jaidimaci. Naimaci guacania, naimaci einamací llua isoi, onollina diga icaiño jocuano, guitimaci. Mercadomona bia, naimaci einamací llua isoi, abina lleredimaci. Naimaci einamací llua isoi, tazones, ollas, bandejas jiai jocodimaci. Iese jaisoidimaci. Comecina facadimaci: “Iese cai finoia, Jusiñamuimona mare. Iese cai finoñenia, Jusiñamuimona maraiñede. Naimie caina duere finoite”. Jearede rafue naimaci abimo oñellena, iese finouidimaci.

⁶ Jesús uai ote:

—Mareuidinona abi caitauidínodomoí. Isaías micori jaie omoína raise llote. Naimiedi Jusiñamui lluaña cuete:

Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticai” llotimaci.

“Ona sedadicaí” llotimaci.

Jamai ñaitimaci. Naimaci comeciái cue ñibeimo raise iñede.

⁷ Cue uai itena, jamai comini llucanona naimaci llofuecabilla jira, tainona cuena sedadimaci cuete. ⁸ Isaías micori llua isoi itomoi. Jusiñamui llogacinona fainonocaida, omoi einamací rafuedo jaidomoi. ⁹ ¿Bue ñellena nana Jusiñamui llogacinodo jaiñedomoi? Omoi einamací llogacinodo jaidomoi; iadedi nana Jusiñamui llogacinodo raise jaiñedomoi. ¹⁰ Moisés micori jaie llote: “O moo uai ñnuanona, naimiena cano. O ei uai ñnuanona, naiñaiñona cano. Ie moori jeare ñaitimie, ie eiri jeare ñaitimie meinelle”. ¹¹⁻¹² Iese Moisés micori llote; iadedi omoi einamací llotimaci: “Jusiñamuimo cai ucubena cai fecajamona, cai moonna, cai eina jai canonidicai”. ¹³ Iese omoi finocabilla jira, omoi einamací llogacinodo omoi jaillamona, Jusiñamui uaina jamaidomoi. Bie isoide rafuedo jaca jaidomoi.

¹⁴ Fariseuai diga iese llua mei, naimie ecimo ailluena comini dane ofllanona, naimacimo llote:

—Iena raise omoi uñollena, cue lluomo cacarei. ¹⁵ Omoi einamací isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoi. Omoi guillamona, omoi onollina jocuamona. Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciái jearena jira, jeacina finocabidomoi. ¹⁶ Omoi jeforena jira, raise fueollena, cue lluomo cacarei. Iena ñno.

¹⁷ Cominimona oni jaillanona, Jesús ie risoilla jofomo jaide. Nainomo ie llofueoicaigano aillinano ie llua jicanotimaci. ¹⁸ Uai ote:

—¿Ñiese cue llua jiaí nia cacaiñedomoi? Ñie isoide ra guitomoina, omoi comeciáimo jeare ñede. ¹⁹ Omoi comeciáimo jaiñede; ia omoi jebemo jaide. Ie mei omoi abiaimona jino bite.

Jesús llua mona, nana guille radi mare uñoticaí. ²⁰ Jesús llote:

—Omoi comeciái jearena jira, jearede rafuena finocabidomoi. ²¹ Omoi comeciái jearena jira, jeare comeciaina facacabidomoi. Omoi aiñede riño diga icabitomoi. Omoi iniñede ñima diga icabitomoi. Fñricabitomoi. Cominina meinecabitomoi. ²² Jiaí comini rana nicidocabitomoi. Jearede rafuena finocabidomoi. Iena ebiruitomoi. Jifuericabitomoi. Abina uradoicabitomoi. Jiaíe comini joreñona jeare ñaicabitomoi. Abina iedocabitomoi. Ebena jaicabitomoi. ²³ Bie isoidicinuai omoi comeciáimo illa jira, jearede rafuena finocabidomoi; iadedi omoi einamací llua isoi, omoi onolli jocoñenamona jeacino comuñede.

Jesúdi judío ñaiñeñediñaiñona jillotaja rafue
(Mt 15.21-28)

²⁴ Nainomona Jesús jaillanona, Tiro railla eniruemo jaide. Sidón railla eniruemo jiaí jaide. Nainomo jofomo jaillanona, iena buna fidiana jitaiñede; ia iena janonide. ²⁵⁻²⁶ Ie facaise judío ñaiñeñediñaiño daño bite. Naiñaiñodi sirofenicia nairai ñaiño. Ie jisa Janaba anamo ite. Jesúna fidiana, naimie dine bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúmo duere jicade. ²⁷ Judíuainedina naimie canoñenana naiñaiño uñollena, naiñaiño J Jesús llote:

—Uruiaí guillamona jiconiaina ecadicaídena, maraiñede. Uruiaí nano ecadicaí.

²⁸ Naiñaiño dinena uai ote:

—Jii, maestro; iadedi jiconiaídi uruiaí guillamona fiebide guillemona guitimaci. —Iese llote; ia jiaíe rafuemo comecina facade. Uruiaína llote; iadedi judíuáimo comecina facade. Jiconiaina llote; ia judíuainedino jiaí comecina facade. Comecina facade: “O cominimo o rafue duide; ia cai Namana o illa jira, nibaí o rafue caimo janore duide”.

²⁹ Jesús uai ote:

—Raise llotio. O jofomo mai abido jai. O jisamona Janaba oni jaide.

³⁰ Naimie llua isoi jofomo jaide. Ie jisa biramo biden a cide. Janaba naiñaiñomona oni jaillana jai uifnote.

Jesús jefona cacaiñedimiena jillotaja rafue

³¹ Tiro railla eniruemona Jesús oni jaide. Jaillanona, Sidón railla eniruemo jaide. Decápolis railla eniruemo jiai jaide. Ja muidomo Galilea railla jorai fuemo ride. ³² Iena fidiano, naimie dine comini jefona cacaiñedimiena atide. Naimie gogoma. Naimiena jilloitallena, naimiemo ie onolli jonellena Jesús mo jicadimaci. ³³ Ailluena comini naimie dine jai billa jira, jefona cacaiñedimiena eneno oni uite. Nagafebe jefomo onocai ñuitade. Ie onocaimo tuajanona, ima ifena jetade. ³⁴ Jusiñamui dine monamo eruaita, naimiena duenailamona, jafaicina faite. Judíuai uaido naimiemo llote:

—¡Efata! —Oni dobaiñuamona: “¡Ecoricai!” raite.

³⁵ Ieconi ie jefodi ecoricaide. Jai raise cacade. Jai raise ñaite. ³⁶ Cominimo: —Bimie jai jilluana bumo lloño —Jesús diga icaiño llote; ia naimie uaina ñoñedimaci. Iena llocana uitimaci. ³⁷ Naimieri eo rajicadimaci. Coninina naimiena raitimaci:

—Naga rafuena raise finode. Jefona cacaiñedimiena jai jillotate. Gogonaitimiena jai jillotate.

8

Jesúdi cuatro mil iñiaina eaja rafue

(Mt 15.32-39)

¹ Naie facaise naimie dine ailluena comini illanona, naimaci guille jai iñena jira, Jesús ie llofueoicaigano naimie dine uaidote. Raite:

²⁻³ —Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue, naisomo naimaci baii raillano. Naimacina cue duenaila jira, naimacina canoiacadie.

⁴ Jicanotimaci:

—¿Ñiese naimacina bene ecaiticai? Jofue iñenanomo iticai.

⁵ Jesús jicanote:

—¿Ñiga llomenico omoimo ite?

Uai otimaci:

—Siete.

⁶ Comini ana raillena Jesús llote. Naie llomeniconona uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci. ⁷ Naimacimo janore llicisiriai jiai ite. Ie facaina Jusiñamuimo iobillacinona fecaja mei, cominimo fecallena Jesús llote.

⁸ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. ⁹ Nainomo cuatro mil iñiaia guitimaci. Naimaci ainiaia, imaci uruiaia diga, jiai guitimaci. ¹⁰ Guilla mei, coninina naimaci jofuemo Jesús orede. Ie llofueoicaigano diga, botemo jaillanona, Dalmanuta railla eniruemo jaide.

Fariseuai comini Jesús mo siño rafuena finuana jicanuano billa rafuena

(Mt 16.1-4; Lc 12.54-56)

¹¹ Dajerie fariseuai comini Jesús dine bitimaci. Naimie uaina uaitaia-cadimaci. Naimiena facacillena, siño rafuena finuana jicanoiacadimaci. Iena naimie finoñedena, naimie ie llua isoi iñenana uifnotimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

¹² Sunaillanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

¹³ Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica dine Jesús jaide.

Jesús siritate rana llofuia rafue

(Mt 16.5-12)

¹⁴ Ruica dine rilla mei, Jesús llofueoicaigano llomeniconna feillana uibiñotimaci. Naimacimo daje llomenico ite. ¹⁵ Iena naimie uiñuamona, naimacimo Jesús llote:

—Fariseuai siritate ramona abina rairui. Illaima Herodes siritate ramona abina rairui. —Iese Jesús llote; iadedi naimaci llofuiacinomona abi rairuil-lena ñaite.

¹⁶ Jesús iese llua jira, iena naimaci raise cacaiñena jira, daní coniniri siadotimaci:

—Llomeniconna cai atañena jira, caimo iese llote.

¹⁷ Naimaci siaduana Jesús uiñua jira, naimie llua naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Ñiese cuena ñnoñedomoi? Cuemo siño uai illana nia raise cacaiñedomoi. ¹⁸ Uisiredomoi. Jeforedomoi. ¿Ñiese cue navui siño finoca rafuemo comeciaina facañedomoi? ¹⁹ Navui cinco mil iñiaí cinco diga llomeniconna guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Doce.

²⁰ Jesús llote:

—Jiaicaiño cuatro mil iñiaí siete diga llomeniconna guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Siete.

²¹ Jesús dinena jicanote:

—¿Ñiese cuena nia raise ñnoñedomoi? Siño uai cuemo illana nia raise ñnoñedomoi.

Jesús uisidimiena jillotaja rafue

²² Oni macarillanona, Betsaidamo Jesús, ie llofueoicaigano diga, ride. Ie facaise naimie dine comini uisidimiena atide. Naimiena jilloitallena, naimiena jetallena, Jesús jicanote. ²³ Iena Jesús cacajanona, ie onollina llinuanona, nairaí illa jinofemo uisidimiena uite. Ie mei ie uisina tuade. Ie uisina jiaí jetade. Naimiemo jicanote:

—¿Buena ciodio?

²⁴ A eruaillanona, uai ote:

—Comini macarillana ciodicue; ia amena isoi eruaidimaci. Nia raise cionidicue.

²⁵ Ie uisina Jesús dane jetade. Iemona oni erocaillamona, jai jillode. Jai raise ciode. ²⁶ Jai jillua jira, ie jofomo naimiena abido orede. Jesús llote:

—Betsaidamo itino o jilluana lloñeno; ia nainomo jaiñeno o jofomo mai abido jai.

Pedro Jesúsna llua rafue

(Mt 16.13-20; Lc 9.18-21)

²⁷ Cesarea Filipino eniruemo ite nairaiaimo Jesús jaidemo, ie llofueoicaiganomo jicanote:

—¿Ni ese jiaie comini cuena raitimaci?

²⁸ Uai otimaci:

—Damierie raitimaci: “Juan Bautista micoridio”. Damierie raitimaci: “Odi Eliadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

²⁹ Jesús dane jicanote:

—¿Ni ese omoi cuena raitomoi?

Pedro uai ote:

—Odi cai Jilloitaramadio. Jusiñamui facaina lloraini micoriai o billena jaie llotimaci

³⁰ Jesús iena bumo llwana rairuide.

Jesús ie fiodaillena llofuia rafue

(Mt 16.21-28; Lc 9.22-27)

³¹ Ie facaise ie llofueoicaiganona ie duere sefuillena llofuede. Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloitícue.

³² Iena marefodo naimacimo llote. Iena cacajano, Pedro dinena lletade:

—Dama ite. Iese lloñoeno. Bie isoide rafuena lloñoeno.

³³ Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñaiñoeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio.

³⁴ Naimie dine ailluena comini uaidua mei, ie llofueoicaigano nainomo jiai illanona, naimacimo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue dibeimo naimie iite. ³⁵⁻³⁷ Duere sefuillana jaciruillamona, cue cominina bu jaiacaiñenia, ja muidomo faifite; iadedi duere sefuillana jaciruiñenamona, cue cominina bu jaiia, jaca faifiñeite. Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿ni ese cue Moo dine riite? Nainomo naimie riñoeno faifite. ³⁸ Birui ite comini Jusiñamuina jitaiñedimaci. Naimiena jai fañonocaidimaci. Jeacinona finocana jaidimaci. Cuena bu meiruia, cue rafuena bu meiruia, dane cue bia, naimiena meiruitícue. Cuena meiruillamona: “Cristomo duidícue” bu lloiacaiñenia, ico cue bia: “Naimiedi cue comini” lloñeitícue. Jusiñamui jaienisaí diga, cue Moo dinena, monamona ico biitícue. Cue Moo uai cuemo illanona, ebire biitícue.

9

¹ Omoimo uanaicinona llotícue. Omoimona dajerie nia fiodaiñeitomoimo, illaimana ebire cue bairellena cioitomoí.

Jesús abi meidocaila rafue

(Mt 17.1-13; Lc 9.28-36)

² Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobo jiai uite. Juan jiai uite. Jiaie llofueoicaiganona uñede. Nainomo rilla mei, naimaci uicomo naimie abi meidocaide. ³ Naie dacaiño naimie iniroi eo quenirecaide. Eo userecaide. Cai iniroimo jitoma lligaiñuamona ie isoi usere jaca jaiñede. ⁴ Naie facaise naimacimo Moisés micori joreño, Elías diga, bairede. Eliadi Jusiñamui facaina jaie lloraima. Jesús diga ñaitiaimaiaí. ⁵ Iaimaiaí jaiacania, Pedro Jesúsimo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie.

⁶ Eo jaciruilla jira, naimie ñaia rafuena raise uiñoñoeno jamai ebena ñaite.
⁷ Ie facaise uillie billamona, naimacina ibaide. Uilliemona Jusiñamui llote:

—Bimie cue isiruiga jito. Naimie llamo cacareillanona, iena ñno —llote.

⁸ Ieconí oni erodajanona, dama Jesúsna ciodimaci. Jiañona cioñedimaci.

⁹ Anedumona bitimacimo, naimacimo Jesús llote:

—Omoi ailli ciua rafuena bumo lloñoeno, cue fiodaillamona cue jillua ñnori. ¹⁰ Jesús llua isoi ñnodimaci. Iena bumo lloñedimaci; ia fiodaillamona naimie jilluana naimaci raise nia cacaiñena jira, iemo comecina facadimaci.

¹¹ Naimiemo llotimaci:

—Moisés micorí llogacina llofuerañi birui raicabitimaci: “Elías raillamie dane biite. Ie mei cai Jilloitarañima biite” raitimaci. Jusiñamui o billana ñnoticai. Odi cai Jilloitarañimana ñnoticai. Odi cai Jilloitarañimadomo, ¿bue ñelli iese raitimaci?

¹² Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise lollena. Jusiñamui ñbeimo naimaci illena, comini imaci comeciñi meiduana llote. Jusiñamui facaina llorañi micoriai cue eo duere sefuillena cuetimaci. Comini cue jeare ñnollena cuetimaci. Iemo omoi comeciñi jai faca. ¹³ Elías isoidimie jai bite; iadedi Jusiñamui facaina llorañima micorí jaiie cuega isoi, naimaci jitailla jira, naimiñena jai meinetimaci.

Jesúdi Janaba anamo itimieña jillotaja rafue

(Mt 17.14-21; Lc 9.37-43)

¹⁴ Ie jaiie llofueoicaigano ñne Jesús abido ña, nainomo ailluena comini itimacimo ñne. Moisés micorí llogacina llofuerañi ñnena ie llofueoicaigano uaina uaitaside. ¹⁵ Jesús billana comini ciuanona, jacinaisidimaci. Naimiñena feiñollena, naimie ñne aisida jaidimaci. ¹⁶ Moisés micorí llogacina llofuerañimo Jesús jicanote:

—¿Ñiese cue llofueoicaigano uaina uaitatomoi?

¹⁷ Uai oñedimaci; ia cominimona ñamie uai ote:

—Maestro, Janaba anamo cue jito illa jira, o ñne naimiñena atidicue. Cue jito Janaba anamo illamona ñañide. ¹⁸ Nagarui Janaba bille ñese, naimiñena eniruemo uaitate. Iemona fueñi mullede. Ie isidodí murude. Ie abi jaiñe jaiñe. O llofueoicaiganomo jicadicue, Janabana oni oretallena; ia oretanidimaci. Ie jira Moisés micorí llogacina llofuerañi bie rafuena, o llofueoicaigano ñga, uaina uaitatimaci.

¹⁹ Iena cacajanona, Jesús ie llofueoicaiganomo llote:

—Cue uai siñonana ña ñnoñedomoi. Omoi ñga are iticue. Raise omoi ñnollena, ¿ñie ñnori omoi ñga iiticue?

Naie ñuidimie moomo llote:

—O jito cue ñne mai atí.

²⁰ Naie urue Jesús ñne atañona, Janaba naimiñena naillitate. Iemona urue eniruemo uaide. Jabí-jabide. Fue mullede. ²¹ Jesús ñnena naie urue moomo jicanote:

—¿Ñie ñnori o jitodí bie isoi ite?

Uai ote:

—Naimie uruenamona. ²² Janabadi, ñga icaiño iraimo usillena, naimiñena uaitate. Corobaillena, ñga icaiño jinuimo jai uaitate. Janaba oni o oretareña, cocona duenaillamona, cocona cano.

²³ Jesús uai ote:

—“O oretareña” raitio. Ero, o jito jillotaredicue. Cueno o ñnoia, o jito jilloite.

²⁴ Naie urue moo ieconi llote:

—Ona ñnoticue. Raise nia cue ñnoñenia, cuena raise ñnota.

²⁵ Naie facaise ailluena comini naimie dine raire ofillana naimie ciuanona, Jesús Janabana lletade:

—Bie uruena ñaitatañedio. Naimiena cacaitañedio. Naimiemoni oni jai. Naimie dine dane biñeno.

²⁶ Ado cuirioillanona, naimiena eo raire naillitajanona, Janaba oni jaide. Iemoni naie urue fiodaitimie isoi erocaide. Naimiena ciuanona, nainomoi itino raitimaci:

—Naimie jai fiodaite; ²⁷ —ia Jesús naimie onollina llinocaida, naimiena a naidanete.

²⁸ Iemoni oni jaillanona, damie jofomoi Jesús nailli ria, naimiemoie llofueoicaigano anado jicanotimaci:

—¿Bue ñellena Janabana oni oretanidicai?

²⁹ Jesús uai ote:

—Jusiñamuimoi omoi jiamona, naimiena raise omoi ñnuamona, bie isoide Janabana oretaredomoi. Naimiena omoi raise ñnoñenia jira, bie uruemoni Janabana oni oretañedomoi.

Jesús ie fiodaillena dane llofuia rafue

(Mt 17.22-23; Lc 9.43-45)

³⁰⁻³¹ Ie llofueoicaigano diga Jesús oni jaillanona, Galilea railla eniruemo jaide. Ie llofueoicaiganona naimie llofueiacana jira, naimie ie jaillana jiaie comini fidiana jitañede. Naimacimoi llofueoicaigano:

—Monamona billanona, imana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. Naie illaicominimo cuena meinitimaci; iadedi darui amani illanona, jilloiticue.

³² Ie llofueoicaigano iena raise cacaitañedomaci; ia naimiemoie iena jicanuana meiruitimaci.

Jesús ie llofueoicaigano moto imiena ille rafue

(Mt 18.1-5; Lc 9.46-48)

³³ Capernaumo Jesús rilla mei, ie risoilla jofomoi naimie ia, ie llofueoicaigano jicanote:

—Naiona cai bia, ¿nie isoide rafuena coniniri siadotomoi?

³⁴ Uai oñedomaci. Naimaci moto imiena illena, naisodo siadocana bitimaci. Meiruillanona, uai oñedomaci.

³⁵ Naimie ana rainadaja mei, ie ecimoi naimacina uaidote. Raite:

—Omoi moto imiena bu iacania, jamai bue isoidimiena naimie illa. Omoi muillaimana naimie jailla isoilla.

³⁶ Iena naimaci raise uñollena, nainomoi ite cominimona daje urue bai jainanocaida, naimaci motomoi naimiena jonete. Naimiena menioita, naimacimoi llofueoicaigano:

³⁷ —Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiena feiñotimiedi cuena jai feiñote. Cuena feiñotimie Jusiñamuina jiaie jai feiñote, Jusiñamui cuena oretaja jira.

Jesúdi ie dibeimoi itinona llua rafue

(Mt 10.42; Lc 9.49-50)

³⁸ Naie facaise ie llofueoicaiganomona Jesús Juan llofueoicaigano:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

³⁹ Jesús uai ote:

—Naimiena rairuiñeno. Cue mamecido siño rafuena bu finoia, cuena jeare raire ñaiñeite. ⁴⁰ Cai dibeimoi itimiedi cai facaisena ite. ⁴¹ Ero, cuemo omoi duillamona, omoina bu janore canoia, Jusiñamuimona ibana feiñoite. Omoi

nibai jamai jinuina fecate; iadedi omoina naimie canuamona, Jusiñamuimona ibana feiñoite. Ie jira naimie isoidino siño rafuena finuana rairuiño.

Jesúdi jeacinona finoñenana llofua rafue
(Mt 18.6-9; Lc 17.1-2)

⁴² Jesús nia llofue:

—Cueno como inotina jeacinona finotaiacadimie iena finoñellena, naimie cimaimo aillue nofici maianona, joraimo corobaillena naimiena dotacadena, mare. ⁴³⁻⁴⁸ Biena ñaiticue. Nie isoide rafue omoina jeacino finotaia, iena linoño. Naie rafue dine jaiño. Iemo eruaiño. Rana omoi jetaja jira, omoi cúa rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacino omoi finoia, iraimo jaitomoi. Nana omoi abi diga iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Iramo omoi jaiñellena, jeacino finoño. Naimacimo ite aia fioidañena jira, naie irai jaca duiñenamona, nainomo itino jaca duere sefuitimaci.

⁴⁹ 'Ero, birui omoi duere sefuillamona, cue comina jai jaidinona uiñoiticue. ⁵⁰ Guille caimaretallena, sal mare; iadedi ie caimano jai iñenia, iena dane caimaretañedica. Ie isoide. Jeacino omoi finoia, omoi comecia caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

10

Jesús ima ie aina dotaja rafuena llofua rafue
(Mt 19.1-12; Lc 16.18)

¹ Capernaumona ie llofueoicaigano diga, Jesús oni jaillanona, Judea railla enirue dine jaide. Jordán railla ille ruica dibeimo jaide. Ailluena comini naimie dine ofillamona, naimie llofueuilla isoi, naimacina llofue. ² Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio?

³ Uai ote:

—¿Niese Moisés micori llote?

⁴ Uai otimaci:

—Moisés micori jaie cuete: “Iima ie aina dotaacania, dotalle rabena nano cueite. Ie mei naiñaiñoa dotaite”.

⁵ Jesús uai ote:

—Jusiñamui uaina raise omoi inoñena jira, Moisés micori ima ie aina dotajana rairuiñede; ⁶ iadedi nano dofoconi iese iñede. Enirue finua facaiseconi Jusiñamuidi come iaiaiaina finode. Imana finode. Riñoa jiai finode. ⁷ Ie jira Jusiñamuidi jaie llote: “Ie ai diga illena, ima ie moona faionocaite. Ie aina jiai faionocaite. Ie ai diga illamona, menade comedi daamiena jai jaide” llote. ⁸ Menade come jai daamiena jai ite. ⁹ Jusiñamui iese iaiaiaina itataja jira, ima ie aina dotajana rairuidicue. Riño ie inina dotajana rairuidicue.

¹⁰ Jofomo ie llofueoicaigano diga, naimie nailli illanona, naimiemo bie rafuena jicanotimaci. ¹¹ Jesús dinena llote:

—Jiaie riño diga naimie illena, ie aina bu dotaia, naimiedi jeacinona jai finode. Ie aina jeare jiai finode. ¹² Ie inina faionocaillanona, jiaimiena nie riño uamona, naiñaiño jeacino jai finode.

*Jesúdi naimie dine uruiai billana jitailla rafue
(Mt 19.13-15; Lc 18.15-17)*

¹³ Naie facaise Jesús dine comini naimaci jesanide diese atidimaci. Ie onolli naimacimo naimie joniana jitaidimaci. “Naimacina raise cano” ie Moomo lollena jitaidimaci. Ie llofueoicaigano iena rairuidimaci; ¹⁴ iadedi iena cacajano, Jesús icirite. Jesús raite:

—Uruiai cue dine billesa. Naimacina rairuiñeno. Cuen a bie isoi inotinodi Jusiñamui cominidimaci. ¹⁵ Bie uruiai abina iedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeitimaci. Jusiñamui naimiena sedallena, Jusiñamui cominina naimie jaiñeite.

¹⁶ Naie uruiai dasarie meni-menioicaida, naimaci ifogimo ie onollina joneta:

—Jusiñamui omoina canoite —llote.

*Ucuberedimie Jesús diga ñaia rafue
(Mt 19.16-30; Lc 18.18-30)*

¹⁷ Ie llofueoicaigano diga Jesús oni jai jaillanona, aisicana damie naimie dine bite. Naimiena raise uaidollena, ie caiñici ifodo rainadate. Raite:

—Maestro, odi maremedio. Jusiñamui diga ico cue jaca illena, ¿buena finoiticue?

¹⁸ Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano. ¹⁹ Moisés micori llogacinuaina inocana jai. Jaie cuete: “Comena meineñeno. O aiñede riño diga iñeno. Fñeno. Jaiamiena o llogidoia, tainona lloñeno. O moo uaina ino. O ei uaina ino”.

²⁰ Uai ote:

—Maestro, uruena cue illa facaisemona nana bie llogacinuaina inoticue.

²¹ Jesús dinena naimiemo eruaillanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cuen a o inuamona, monamo ico jaca iitio. Cue llofuegamiena o illena, mai cue diga bi.

²² Iena cacajano, naimiedi sunaite. Eo aillue ra naimiemo illa jira, iena naimie fecaacaiñena jira, sure jaide. ²³ Naimie jailla mei, ie llofueoicaiganomo eruaillanona, naimacimo llote:

—Ucuberedinodi Jusiñamui cominina jaillena eo sefuiruitimaci.

²⁴ Iena cacajano, iena naimaci raise cacaiñena jira, Jesús dane llote:

—Cue cominidomoi. Ero, ucuberedimiedi Jusiñamui cominina jaillena eo sefuiruite. ²⁵ Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

²⁶ Iena ie llofueoicaigano cacajano, Jusiñamui cominina ucuberedino raise jainina jira, “¿Ñiese dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, coniniri raitimaci:

—Nana comini rana jitailla jira, ¿buca jillobiti?

²⁷ Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro dinena llote:

—O llua isoi jai finodica. Nana cai rana faionocaia, o diga jai jaicabidica.

²⁹ Jesús uai ote:

—Uanaicino lloiticue. Cuen a naimie isiruillamona, cue rafuena naimie llumona, ie jofona bu faionocaia, ie amatiaina bu faionocaia, ie miriñuaina

bu fañonocaia, ie moona bu fañonocaia, ie eina bu fañonocaia, ie uruiaina bu fañonocaia, ie eniruena bu fañonocaia, ³⁰ Jusiñamuimona birui ailluena ibana feiñoite. Duere sefuite; ia naimie isoi cue cominina ailluena jaillamona, naimie jofue iite. Ie amatiaí, ie miriñuaí, ie eitíai, ie uruíai, ie enirue birui iite. Monamo naimie ico caimare iocire jaca iite. ³¹ Birui damieriemo ailluena ra illamona, Jusiñamuimo eo comecina facañedimaci. Naimacimona jamai bue isoñedimaci; ia Jusiñamuimona ico jamai bue isoitimaci Jiañomo ailluena ra birui iñede; ia Jusiñamuimo comecina facadimaci. Naimacimona jamai bue isoidimaci; ia Jusiñamuimona ico jamai bue isoñeitimaci.

Jesús ie fodaillena dane llua rafue

(Mt 20.17-19; Lc 18.31-34)

³² Jerusalémo nia jaillanona, Jesús uicodo jaide. Nainomo naimie jaciruiñeno jaillamona, ie llofueoicaigano rajicaidimaci. Naimaci diga jaidino jaciruoicaida jaidimaci. Naimacina jiaí meiniana jaciruitimaci. Ie llofueoicaigano diga ñaianona, naimiemo sülle rafuena llote:

³³ —Ero, Jerusalémo jai jaidícaí. Monamona billanona, imana jaidícue; iadedí omoí illaicomíni cuena gaitaitimaci. Gaitaja mei, cue meinel-lena lloitimaci. Judíuainedíno illaicomínimo cuena fecaitimaci. ³⁴ Cueri jifanoitimaci. Cuena tuallaitimaci. Cuena faitimaci. Cuena meineitimaci; iadedí cue fodailla mei, darui amani illanona, jilloitícue —llote.

Jesús dine Jacobo Juan iaímaiaí billa rafue

(Mt 20.20-28)

³⁵ Naie facaise Jesús dine Jacobo, Juan diga bitíiaímaiaí. Iaímaiaí moodí Zebedeo. Raitíiaímaiaí:

—Omo coco jícalle rafue cocoena finuana jítaidíco.

³⁶ Jesús uai ote:

—¿Ñie isoide rafuena jítaidomíco?

³⁷ Uai otíiaímaiaí:

—Illaimana o jailla mei, o ecímo coco illena o llua jítaidíco. Damie o nabeimo. Jiaímie o jarifebeimo. —Jiaíno afemo iaímaiaí illena, iese llotíiaímaiaí.

³⁸ Jesús dínená llote:

—Omíco jicanuana raise uíñoñedomíco. Cue eo duere sefuitícue. Llegí cacaitícue. ¿Je isoí duere sefuiacadomíco? ¿Je isoí llegí cacaiacadomíco?

³⁹ Uai otíiaímaiaí:

—Jíi. Sefuiacadíco.

Jesús dínená raite:

—Cue isoí duere sefuitomíco. Llegí cacaitomíco; ⁴⁰ iadedí cue nabeimo omíco illena, cue jarifebeimo omíco illena itatanidícue. Naie illano jai cue Moo finoca, nainomo íitíno iena.

⁴¹ Iena jiaíe llofueoicaigano cacajano, naie iaímaiaíri icíritimaci. ⁴² Jesús nana naimacina uaiduanona, raite:

—Nana illaicomínidí naimaci anamo ítínona ocuicabidímaci; ⁴³ iadedí omoí díne iese íñena. Omoímona bu ímíena íacania, omoí mullaímana naimie jaisoíllasa. ⁴⁴ Omoímona bu ímíena íacania, omoína naimie canocana jaisoíllasa. ⁴⁵ Cuemona fueo. Bífíedícue, comínina cue ocuillena; iadedí comínina canuaíbidícue. Cue jítailla jira, nana comíní facaina fídaisaíbitícue. Naimaci jeacínomona naimaci jillobillena, fídaisaíbitícue. Ailluena comíní cuena ínuamona, jilloítimaci. Conínina omoí canua —llote.

Jesús dí Bartimeona jillotaja rafue

(Mt 20.29-34; Lc 18.35-43)

⁴⁶ Oni jaillanona, Jericó railla nairaïmo Jesús ride. Naiemona ie llofueoicaigano ðiga jaillanona, ailluena comini Jesús jinafona racaðimaci. Naie facaise nai fuemo uisnidimie raide. Naimie mameci Bartimeo. Timeo jito. Nainomo jamai raide, ucubena jamai jica-jicallena. ⁴⁷ Nazaret ie Jesús jaillana naimie cacajano, ado cuiριοide:

—David micori Jitona o illamona, Jusiñamuimona o billa jira, cuena duenai. Cuena cano.

⁴⁸ Naimie llïcaillena, Jesús ðiga jaidino naimiena lletade; iadedi eo cuiριοide:

—Maestro, David micori Jitona o illamona, cuena duenai.

⁴⁹ Naimiena cacajano, Jesús naidadajanona, llote:

—Naimiena cue ðine uaido.

Bartimeona uaiduanona, raitimaci:

—O começina ocuiño. Mai naidacai. Jesús ona uaidote.

⁵⁰ Iena cacajano, ie emodomo itiroina ðuiñuanona, raire naidacaida, Jesús ðine bite. ⁵¹ Naimiemo Jesús jicanote:

—¿Niese ona cue nibaiana jitaïdio?

Uai ote:

—Maestro, çioacadie.

⁵² Jesús ðinena uai ote:

—Cuena o inua jira, jai jillodio. Mai jai. —Ieconi naimie jai çiode. Jesús ðiga jaidino ðiga naimie jiai jaide.

11

Jesús illaïma isoi Jerusalémo jailla rafue

(Mt 21.1-11; Lc 19.28-40; Jn 12.12-19)

¹ Oni jaillanona, Jerusalémo iaireicaïðimacimo, Betfagé railla nairaïmo ie llofueoicaigano ðiga Jesús ride. Betania nainomo jiai ite. Olivos railla anedumo naga nairaï iaïmaïaï ite. Ie llofueoicaiganomona Jesús menamiena orede. ² Raite:

—Bie nairaï illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati. ³ Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide. Nailli iena raire abido oretaite llote”.

⁴ Naimie llua isoi, jaidiaïmaïaï. Naisomo jofo nasemo burritona bailanona, iena suiñodiaïmaïaï. ⁵ Ie facaise nainomo itino jicanote:

—¿Bue ñellena burritona suiñodomico?

⁶ Jesús llua isoi uai otiaïmaïaï. Ie muidona:

—Jee —raitimaci.

⁷ Burritona atidiaïmaïaï. Ie emodomo naimie llofueoicaigano naimaci iniroi jobianona, ie emodomo Jesús rainadate. ⁸ Naimiena iobitallena, illaïma isoi naimie jaillena, ðiga comini, imaci iniroi ðiga, naiso motomo jobedimaci. Jiaïno nai fuemona raforona uanona, naiso motomo jobedimaci. ⁹ Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai Jilloitaraima billa! Jusiñamui mamecido bitimie eo mare. ¹⁰ Cai illaïma David micori ifomo caina sedallena, ðamie billemo birui ocuridicai. Jusiñamui caina jilloitajasa.

¹¹ Iese Jerusalémo naimie jaide. Nainomo rillanona, Jusiñamui jofomo jaide. Nainomo eruaide. Jitoma ana illa jira, ie doce llofueoicaigano ðiga, Betaniamo inillena jaide.

Jesús higuera railla riarana faidua rafue

(Mt 21.18-19)

¹² Ie areruido Betaniamona Jerusalémo abido ie llofueoicaigano diga Jesús bia, aimetaite. ¹³ Arena higuera railla riarana ciuanona, iena jibuide. Como firuide; ia naie llisilladi iñede. Ie llisilla facaise nia iñede. ¹⁴ Ie jira naie riarana llote:

—Biemona jaca llisiñeite. —Ie llofueoicaigano naimie lluana cacadimaci.

Jesúdi Jusiñamui jofomona damieriena dotaja rafue

(Mt 21.12-17; Lc 19.45-48; Jn 2.13-22)

¹⁵ Jerusalémo Jesús rilla mei, Jusiñamui jofomo naimie jaide. Naie jofo eo ail-lue. Diga cuartos nainomo ite. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiaia diga, damierie fecauidimaci. Iena Jesús ciuanona, naimaci mesaiaina oni caicode. Ucugina fecauidino rairacuai jiaia oni caicode. ¹⁶ Jofo facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide.

¹⁷ Naimacina llofueite:

—Ie facaina lloraima micori Jusiñamui llogacino jaie cuega: “Cue jofo ite, nainomo nana comini cuemo jillena” cuega. Ero, ailluena omoi ibataja jira, naimie jofona firiruidino jofona omoi finoca.

¹⁸ Judíuai illaicomini naimie finoca rafuena fidianona, naimiena meinel-lena, coniniri siadotimaci. Ailluena comini naimie llofuiana ebiruillanona, rajicaidimaci. Ie jira judíuai illaicomini naimiena jaciruillamona, naimiena nia meinenidimaci. ¹⁹ Nairui navuida ie llofueoicaigano diga, Jerusalémona Jesús oni jaide.

Jesús faidoca riaru duilla rafue

(Mt 21.20-22)

²⁰ Ie are ie llofueoicaigano diga, Jerusalén dine Jesús jaillanona, higuera railla riaru duillana cioidimaci. Nana ie jainao diga duillana cioidimaci.

²¹ Jesús navui are lluana Pedro uibiñuanona, naimiemo llote:

—Maestro, ero. O faidoca higuera jai duide.

²² Jesús uai ote:

—Jusiñamuina inocana jai. ²³ Uanaicinona omoimo lloiticue. Jusiñamui lluana raise bu inoia, naimie comeci igireñenia, bene ite anedumo naimie lloia: “Monailaimo o illena, benomona mai jai”, Jusiñamui ie jitaille rana finoite. ²⁴ Nie isoide rafue Jusiñamuimo omoi jicajia, naimie iena finuana omoi inuamona, iena naimie finoite. ²⁵ Jusiñamuimo o jiacania, jiaimie diga o rafue ia iena feita. Ie isoi cai Moo Jusiñamui omoimo ite jeacino jiaia feitaite; ²⁶ iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesúdi ie siño uaina llua rafue

(Mt 21.23-27; Lc 20.1-8)

²⁷ Jerusalémo naimaci rillanona, Jusiñamui jofomo Jesús fo jailla mei, judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamac. Diese billanona, ²⁸ jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁹ Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue. ³⁰ Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

³¹ Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori lluana ñnoñedomoi?” ³² “Comini” cai fairioia, bene itino caina nibai meineitimaci, Juan micoridi Jusiñamui facaina lloraima naimaci railla jira.

³³ Ie jira fairiotimaci:

—Uiñoñedicaí.

Jesús dinena raite:

—Ie muidona cuemo nie isoide uai illana omoimo lloñeiticue.

12

Jesúdi marañede majiraini rafuena llua rafue

(Mt 21.33-46; Lc 20.9-19)

¹ Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiaruido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona, jiaínomo fecade. Ie mei jiaie eniruemo jaide. ² Uvas jai einailla facaise riaraiaina sedaraini dine naie patrón ie mullaimana orede, naie illimona dajerie riará llisilla ollena; ³ iadedi naie sedarainidi ie mullaimana fatimaci. Ie mei naimiemo riará fecañeno naimiema abido oredimaci. ⁴ Ie mei patrón jiaie mullaimana orede. Naimie ifogina bofedimaci. Naimiema jeare finodimaci. ⁵ Ie mei patrón jiaimiena orede. Naimiema meinetimaci. Ie mei ailluena mullaiana orede. Damieriena fatimaci. Damieriena meinetimaci. ⁶ Patrómo ie isiruiga jito ite. “Cue jitona jaciruitimaci. Naimie uaina ñnoitimaci. Naimiema oretaiticue” patrón comecina facade. ⁷ Riaraiaina sedaraini naimiema ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiema cai meinelli, bie illi caimo fiebillesa” raitimaci. ⁸ Naimaci dine naimie rilla mei, naimiema meinetimaci. Ie mei ie abina illimona jino dotadimaci. ⁹ Iena fidia mei, ¿ñiese naie patrón nibaiite? Ero, naimie billanona, ie illina sedarainina fuidoite. Ie mei jiaínona ie illina sedataite.

¹⁰⁻¹¹ Naimacimo Jesús llote:

—Naie illi sedaraini isoidomoi. Jusiñamui facaina lloraima micori omoína jiaie cuete. Ie ciegafuena raise facañedomoi. Naimie micori ciega:

Jofo finoraini jitaíñena noficidi nana naie jofomo ite nofici baífemo jai uaide. Jusiñamui iena finotate.

Iena cai uiñuamona: “Eo mare” raiticaí

ciega. Jusiñamui cominina damierie jaillana naimie micori cuete. Jusiñamui oretagamiena damierie jitaíñenamona, naimie cominina jaiñeitimaci; iadedi Jusiñamui oretagamiena ailluena ñnuamona, naimie cominina jaitimaci. Ero, Jusiñamui facaina lloraima micori caina cuete. Naie jofona finoraini isoidomoi. Naie nofici isoidicue. Cue rafuena omoí jitaíñena jira, naimie cominina jaiñeitomoi.

¹² Judíuai illaicomini iena cacajanona, Jesús naimacina ñaiana naimaci uiñuamona, naimiema gaitacadimaci; ia cominina jaciruitimaci. Ie jira naimiema oni jaidimaci.

Jesúmo gobiernomo ucubena fecajana jicanua rafue

(Mt 22.15-22; Lc 20.20-26)

¹³ Judíuai illaicomini jailla mei, dajerie fariseuai cominina Jesús dine oredimaci. Illaima Herodes díbeimo itinona oredimaci. Naimie raise uai oñenia, naimiema duere finollena, Jesúna facaciacadimaci. ¹⁴⁻¹⁵ Naimiemo llotimaci:

—Maestro, uanaicinona llofuecabitio. Jusiñamui rafuedo cai marena jail-lana raise llofuetio. Nana comini dauaido llofuetio. Cominina iobitallena llofueñedio. Omo rafuena jicanoiacadicaí. Dani Jusiñamuina sedadicaí; iadedi romanuai railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —llotimaci.

Naimaci mareuidinona abina caitadinona naimie uiñuamona, naimacimo llote:

—¿Bue ñellena cuena facacitomoi? Ucube cuemo acata.

¹⁶ Ie jira acatatimaci. Naimacimo jicanote:

—¿Bu ie joreño nainomo ite? ¿Bumo jainaiade bie cuega radi?

Uai otimaci:

—César.

¹⁷ Jesús dinena raite:

—César iena itedi, Césarmo ille. Jusiñamui iena itedi, Jusiñamuimo ille —raite.

Naimie lluaana cacajano, naimie raise uai ua jira, ieri rajicaidimaci. Naimie iese llua jira, naimiena duere finonidimaci.

Jesús dine saduceuai railla comini billa rafue

(Mt 22.23-33; Lc 20.27-40)

¹⁸ Naie facaise saduceuai railla comini naimie dine bitimaci. Fiodaillamona jaca buna jilloñellena inotimaci. Jesúmo llotimaci:

¹⁹ —Maestro, cai facaina Moisés micori jaie cuega: “Íma fiodailla meinonni, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. ²⁰ Bie rafuena uiñoiacadicaí. Siete amatiai ite. Nano doforamie ie aina ote. Naimie nia uruiainide fiodailla. ²¹ Ie emodo imie ie ama feciñona ote. Naimie uruiainide jiai fiodailla. Naie siete digamiedemona iese sefuide. ²² Uruiainide nana fiodailla. Ja muidomo naie riño jiai fiodaite. ²³ Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

²⁴ Jesús uai ote:

—Moisés micori cuegafuaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi. ²⁵ Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisai ainidimaci. Ininidimaci. Ie isoi naie siete amatiai iitimaci. ²⁶ Fiodaitino ico jilloillena omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. ²⁷ Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite. Fiodaillamona jilluana omoi raise uiñoñedomoi —llote.

Jesús nanoca llogacinona llofuia rafue

(Mt 22.34-40)

²⁸ Naie facaise Moisés micori llogacinona llofueraíma Jesús dine billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicanote:

—Moisés micori jaie llogacinuaimona, ¿nie llogacino ua nanoca llogacinona?

²⁹ Jesús dinena uai ote:

—Moisés micori jaie cuega: “Israel comini, bie rafuemo cacarei. Cai Nama Jusiñamui jaca dajede. ³⁰ Omoi jitailla jira, nana omoi comeciái diga, cai Nama Jusiñamuina isirui. Naimiemo omoi comeciaina eo faca”. ³¹ Ie emodomo ite

llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. Bie mena llogacino jiaie llogacinuai baifemo faite.

³² Naie llofueraima dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede.

³³ Cai jitailla jira, nana cai comeciai diga naimiena cai isiruia, naimiemo cai comeciaina eo facaia, cai abina cai isiruilla isoi cai ecimo itinona cai isiruia, Jusiñamuina raise sedadica. Bie rafuedo naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

³⁴ Naimie raise uai ua jira, naimiemo Jesús llote:

—Iese o inocana jaia, Jusiñamui jitailla isoi, ie cominina raire jaitio. —Ie facaisemona buna naimiena facaciaibiñede.

Jesús dinena fariseuai cominimo jicanua rafue

(Mt 22.41-46; Lc 20.41-44)

³⁵ Jusiñamui jofomo Jesús jailla mei, nainomo itinomo jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jitona raitimaci? ³⁶ Jusiñamui Joreñodi David micorina ñaitatajanona, David micori llote:

Jusiñamuidi cue Namamo llote: “Illaimana o illamona, cue nabei dine ana rai. Ona inoñedino o anamo itataiticue”.

³⁷ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama. —Nainomo itino naimie llofuiana iocire cacareidimaci.

Jesúdi judíuai illaicominina ñaia rafue

(Mt 23.1-36; Lc 11.37-54; 20.45-47)

³⁸ Jusiñamui jofomo Jesús nia llofuianona, raite:

—Moisés micori llogacinona llofuerainimona abina rairui. Illaicominina naimaci itimacidená, naimacina comini cioillena, eo mare iniroina jitaacacabidimaci. Níne naimaci macaria, naimaci jamai bue isoñedínona itimacidená, comini naimacina uaiduana gaidimaci. ³⁹ Comini naimacimo acarillena, ofiracomo uicomo raíacadimaci. Rafue ia: “Jamai bue isoñedícaí” raillamo comecina facajanona, rafue nama ecimo raíacadimaci.

⁴⁰ Feciñuaimona rana ocabillanona, naiñaiñuaina duere finodimaci. Naimiena eo sedadimacidená, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

Jesúdi Jusiñamui jofomo duerede feciño ucube fecajana ciua rafue

(Lc 21.1-4)

⁴¹ Jusiñamui jofomo Jesús nia ia, ucube fecarano uicomo ana raide. Nainomo comini ucubena joniamo eruaide. Ailluena ucuberedino ailluena ucubena jonetimaci. ⁴² Ie facaise eo duerede feciño menaruñu jonete. ⁴³ Iena ciuanona, naimie dine ie llofueoicaiganona uaiduanona, naimacimo llote:

—Bie eo duerede feciño nana jiaie comini jonia baifemo jonete.

⁴⁴ Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiñoimo ite ucubena jonete. Ie jira jiaino baifemo jonete.

13

Jesúdi Jerusalémo ite Jusiñamui jofo judaiana llua rafue

(Mt 24.1-2; Lc 21.5-6)

¹ Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúmo damie raite:

—Maestro, bie jofomo ite noficiai co ebirede. Bico eo ebire ciode.

² Jesús d̄inena uai ote:

—Bie jofo birui eo mare; ia nana bie jofomo ite noficiai ico judaisite —llote.

³ Ie mei Olivos railla anedu d̄ine rillanona, Jusiñamui jofo uico d̄ine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

⁴ —Jusiñamui jofo judaisillana omo jicanoiacadica. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁵ Uai ote:

—Omoina bie rafuena bu jifueñellena, omo abina rairui. ⁶ Ailluena comini cue mamecido billemona: “Cristodicue” raitimaci. Diga cominina jifueitimaci. Iemona omo abina rairui. ⁷ Jobaimia illena fiditomo; iadedi jaciruiñeno. Iese suite; iadedi abido nia biñeticue. ⁸ Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo ñuisañuai suite. Diga illanuaimo comini aime gutimaci. Iese suia, omo duere sefuillifue omoimo suite. ⁹ Abina rairui. Dajerie omoina llogidoitimaci. Omoina gaitaja mei, naimaci ofiracomo omoina faitimaci. Cuemo omo duilla jira, omoina gaitajanona, omoina duere finollena, illacomini d̄ine omoina uitimaci; ia naimacimo cue rafuena lloitomoi. ¹⁰ Diga comini cue rafuena nana nairaimo lloitimaci, nana nairai iena cacaillena. Ie mei abido biiticue. ¹¹ Naie illacomini d̄ine omo ia, juez d̄ine omo ia, omo abi riidollicinomo omo comeciaina jarire facañeno. Naie facaise omo ñaillicinona uiñoitomoi. Dani omo comeciaino ñaiñeitomoi; ia Jusiñamui Joreño uaido ñaitomoi. ¹² Cueno ñnotomoi; ia ailluena cuena ñnoñeitimaci. Cueno omo ñnua jira, omo enoitimaci. Iemona dajerie ie amana meinetaillena, naimiena llogidoite. Dajerie moodi ie uruena meinetaillena, naimiena llogidoite. Dajerie uruiaidi naimaci moona, naimaci eina meinetaillena, naimacina llogidoitimaci. ¹³ Cue cominina omo illamona, nana nairai omo enoitimaci; iadedi cuena fainonocaiñedimie ja muidomo monamo jaca iite. Naimiena jillotaiticue. ¹⁴ Cue lluomo cacarei. Jusiñamui facaina lloraimadi jiaimie jearede rafue finollena jaie llote. Naie rafue suia, Jusiñamui jofomo Jusiñamuina sedañeitomoi. Nainomo ite jearede rafue finuana omo ciuanona, naiemona omo jillobillena, duere omo sefuiñellena, Judeamo omo illamona, aneduai d̄ine omo aisi. ¹⁵ Jofo emodomo omo ia, ana billanona, aneduai d̄ine raire rillena, jofomo jaiñeno. Nainomo ite rana omo diga uiñeno. ¹⁶ Aneduai d̄ine raire rillena, illimo omo ia, abido jofomo biñeno, omo iniroi omo diga uillena. ¹⁷ Naie rafuemona jillobillena, naie facaise urueside riño duere sefuite. Uruena nia jirode riñodi jia duere sefuite. ¹⁸ Eo duere sefuiñellena, Jusiñamuimo omo jicano, rollime facaiseconi bie rafue suiñellena. ¹⁹ Naie facaise comini eo duere sefuitimaci. Jusiñamuidi enirue finua facaise mona iese comini nia duere sefuiñedimaci. Ico iese eo duere sefuiñeitimaci. ²⁰ Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

²¹ Ie facaise omoimo bu raia: “Jadi, Jusiñamui facaina lloraima benomo birui bairede. Naimiedi Cristo”, iena ñnoñeno, jiaimie raia: “Oni batine Cristo birui bairede”, iena ñnoñeno. ²² Cristona abi caitadino biitimaci. Jusiñamui facaina llorainina abi caitadino jia biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. ²³ Ie jira omo abina rairui. Ero, bie rafue nia suiñenia, iena omoimo jai lloticue.

*Jesús abido ie bille rafue
(Mt 24.29-35, 42-44; Lc 21.25-36)*

²⁴ 'Naie duere sefuilla facaise meinoconi, jitoma lligaiñoñeite. Fivui jiai lligaiñoñeite. ²⁵ Monamona ucuai ana llujite. Nana naie radi jaidisite. ²⁶ Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. ²⁷ Cue jaienisaia cue ecimona oretaiticue. Cue fetocano diese naganomona ofitaitimaci.

²⁸ 'Higuera railla riaromona omoi fueo. Bie enruemo naie riararuillamona, fiemona raire illana uiñotomoi. ²⁹ Ie isoide. Bie rafue ico suia, cue billirui iairei illena uiñoitomoi. ³⁰ Uanaicinona omoimo lloiticue. Nana bie rafue suille facaiseconi bie nairai nia iite. ³¹ Mona enrue diga fuite; iadedi cue lloga uai jaca suite. ³² Cue abido billirui jaca bu uiñoñede. Jusiñamui jaienisaia iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote. ³³ Abina rairuicana jai. Naimie omoina canollena, Jusiñamuimo jiai jicabi. Cue billirui omoi uiñoñena jira, iemo ocuiri.

³⁴ 'Iena omoi raise uiñollena, bie rafuena lloiticue. Patrón jiaie enruemo jaide. Nia jaiñenia, ie mullaiaina ie jofona sedatate. Nagamie ie maijille ocuide. Jofo nasena sedadimie naimie billemo raise ocuirillena llote. ³⁵ Naie patrón abido billena naimaci uiñoñena jira, naga hora iemo ocuiritimaci. Nibai navuida baife biite. Nibai daferuise biite. Nibai atava ñaia facaise biite. Monaia, nibai biite. ³⁶ Ebena naimie biite. Inidimacimo naimaci baisabi raillanona, naimaci jaca ocuirilla. ³⁷ Ie isoide. Ebena biiticue. Cue abido billirui omoi uiñoñena jira, iemo jaca omoi ocuiri.

14

Judíuai illaicomini Jesúna gaitallena, siadua rafue
(Mt 26.1-5; Lc 22.1, 2; Jn 11.45-53)

¹ Naie facaise pascua railla rafue illena, menarui fiebide. Naie facaise llomenico guille rafue jiai ite. Naie rafue ia, siritaga rana jaca guiñedimaci. Egiptomona naimaci jaiagai jillobillana comecillena, naie rafue ite. Judíuai illaicomini Jesúna jifuiano gaitacadimaci. Naimiena meineiacadimaci. Iena siadua mei, ² raitimaci:

—Pascua railla facaise naimiena nia gaitañeiticaia. Naie facaise naimiena cai gaitataia, iena gaitañenamona, comini cai diga fuititimaci. Nia sedaiticaia.

Jesúmo riño caimare soride ra totaja rafue
(Mt 26.6-13; Jn 12.1-8)

³ Betania railla nairaimo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide. ⁴ Damierie iena ciuanona, iciritimaci. Coniniri dani ñaitimaci:

—Naie ra jamai dotade. Jai faifide. ⁵ Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. — Naiñaiñoña iese ñaitimaci.

⁶ Naimaci ñaiana Jesús uiñua jira, naimacimo llote:

—Dama ite. ¿Bue ñellena naiñaiñoña jeare ñaitomoi? Mare rafuena cuemo finode. ⁷ Omoi diga dueredino jaca itimaci. Niruido o jitaia, naimacina canoredomoi; ia omoi diga jaca iñeticue. ⁸ Cue facaina naiñaiñoño finoacana diese jai finode. Nia fioidañedicue; ia cue fioidaillirui facaina naiñaiñoño iese finode. ⁹ Omoimo uanaicinona lloiticue. Ninomo cue mare finoca rafuena bu lloia, naiñaiñoña uibiñollena, nana cominimo naiñaiñoño finoca rafuena lloite.

Judas micori raillamie Jesúna gaitataiacana rafue
(Mt 26.14-16; Lc 22.3-6)

¹⁰ Ie facaise Jesús llofueoicaiganomona Judas Iscariote micori raillamiedi Jesúsna gaitatallena, Jusiñamui diga nanoca ñairaini dine jaide. ¹¹ Iena cacajano, iobidimaci.

—Iena o finoa, omo ucubena fecaiticai —llo timaci. Iemona Jesúsna gaitatalliruimo Judas ocuiride.

Jesúdi ie fiodable rafuena llua rafue

(Mt 26.17-29; Lc 22.7-23; Jn 13.21-30; 1 Co 11.23-26)

¹² Llomenico guille rafue illanona, judíuai comini toica llaudaiaia fajarui illanona, Jesúsno ie llofueoicaigano jicante:

—¿Ninomo pascua railla rafue ie guille finuana jitaideo?

¹³ Naimacimona menamiena oretajanona raite:

—Jerusalémo omico jaillanona, nogodo jinuina uitimiena cioitomico. Naimiena raca. ¹⁴ Naimie jailla jofo namamo llono: “Coco llofueraima cocona omo jicantode: ‘¿Nimai cue guiraco? ¿Ninomo guiticue, cue llofueoicaigano diga?’ ” ¹⁵ Ie mei omicomo afebebamo ite aillue cuartona acataite. Na raruiaia diga ite. Nainomo cai guille fino.

¹⁶ Jesús llua isoi jaidiaimaiaia. Jerusalémo rilla mei, naimie llua isoi baitiaimaiaia. Pascua rafue guille finodiaimaiaia. ¹⁷ Nairui jitoma ana itemo, ie llofueoicaigano diga, Jesús nainomo guisaide. ¹⁸ Mesamo guitimacimo, Jesús llote:

—Omoimona damie cuena gaitataite. Naimie cue diga bene jai guite.

¹⁹ Iena cacajanona, sunaitimaci. Damierie naimiemo jicanoside:

—¿Cuena ñaitio?

²⁰ Uai ote:

—Omoimona damie bie platomo cue diga llomenico diga mutade.

²¹ Jusiñamui facaina lloaia micori cuega isoi, monamona jai billamona, fiadaiticue; iadedi cuena gaitataitimie eo duere sefuite. Naimie jeiciñegadena, cuemona mare.

²² Naimaci nia guitimacimo, llomeniconona Jesús llinuanona, Jusiñamuimo iobillacinona fecaja mei, llomeniconona taírude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

²³ Ie mei naimie jiroracona jiaia llinote. Jusiñamuimo iobillacinona llua mei, naie jiroracomome jai totaca vino naimacimo fecade. Iemona nana jirodimaci.

²⁴ Naimie raite:

—Cue fiodaillamona, dama cue diaillamona, jeacino anamona ailluena jillotaiticue. Jusiñamui jiaie rafue birui itatajamona, naimaci jeacino oni dotajana jai llote. Bie vinodi naie rafue facai ie. ²⁵ Omoia bene dane iese caimare nabaiñeiticue. Cue Moo sedajanomo omoi diga cue ia, nainomo omoia dane iese caimare marena nabaiticue.

Jesúdi Pedro naimiena januana llua rafue

(Mt 26.30-35; Lc 22.31-34; Jn 13.36-38)

²⁶ Iobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide. ²⁷ Naimacimo llote:

—Cuena fañonocaitomoi. Jusiñamui facaina lloaia micori iena jai cuega: “Toica llaudaiaia sedaraimana meinetimaci. Naimie toinaia uaficaida jaitimaci” cuega. Naimie micori caina cuete. ²⁸ Ero, fiodaillamona cue jillua mei, omoi uicodo Galileamo jaiticue, nainomo omoi diga dafai fillena.

²⁹ Pedro uai ote:

—Nana jiaino ona fañonocaia, ona jaca fañonocaiñeiticue.

³⁰ Jesús dinena raite:

—Uanai omo lloiticue. Ja nairo itava menacaiño nia ñaiñenia, dacaiño amani cuena janoitio.

³¹ Pedro dinena riire llote:

—O diga cue fiodaiadedi, ona janoñeiticue.

Nana ie llofueoicaigano daje uaido jiai raitimaci.

*Jesúdi Getsemanímo Jusiñamuimo jia rafue
(Mt 26.36-46; Lc 22.39-46)*

³² Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena jaiticue.

³³ Naimie diga Pedrona uite. Jacobona uite. Juan jiai uite. Naimie sunaicaide. Ie comeci uri iñede. ³⁴ Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi jii.

³⁵ Naimie janore bai jaillanona, eniruemo bitadate. Naimie duere sefuiñellena, Jusiñamuimo jii de:

³⁶—Ore Moo, nana rana finoredio. Cuena legi cacaitañeno. Cue jitailla isoi cuena finoñeno; iadedi o jitailla isoi cuena fino.

³⁷ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidio? daje hora nia iñedemo. ³⁸ Iniñeno. Taife ramo omoína fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoína naimie ocuiñotallena —llote.

³⁹ Ie mei dane jillena jaide. Ailli naimie jia isoi, dane jii de. ⁴⁰ Ie llofueoicaigano dine dane billanona, naimaci uisi lliroilla jira, naimaci inisitemo ride. Naimacina casitajano, Jesús naimaci diga ñaite; ia naimaci dinena uai uana uiñoñede. ⁴¹ Dane jia mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macaibaite. Cue fiodaille facaise jai ite. Jusiñamui jitailla jira, cuena ja gaitajanona, naimiena inoñedino anamo ja iiticue. ⁴² A naidacai. Maiña. Cue gaitataitimie jai bite.

*Jesúna gaitalle rafue
(Mt 26.47-56; Lc 22.47-53; Jn 18.2-11)*

⁴³ Jesús nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés micori llogacinona llofueraimona bitimaci. Naimaci einamacimona bitimaci. ⁴⁴ Jesús dine naimaci nia riñenia, Judas naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaita. Naimiena raise maianona, naimiena oni uiño.

⁴⁵ Jesús dine naimie rillanona, Judas Jesús dine raire jaide. Naimiena uaidote:

—Maestro, jai biticue. —Ieconi naimiena llibanote. ⁴⁶ Ie jira Jesúna gaitadimaci.

⁴⁷ Iena ciuanona, Jesús diga itinomona damie ie lloebi llinuanona, naimiedi nanoca ñairaima ie mullaíma jefona jaibonote. ⁴⁸ Naimiena gaitadinomo Jesús llote:

—Omoi lloebina atidomoi. Omoi butaralluna atidomoi. Cuená gaitallena, firiraimadicueta cuemo omoi billa. ⁴⁹ Jusiñamui jofomo nagarui llofuecabiticue. ¿Bue ñe nainomo cuena gaitañedomoi? Cuená jai omoi gaitajamona, Jusiñamui facaina lloraini micoriai ciegafuia suite.

⁵⁰ Ie facaise nana naimie llofueoicaigano naimiena fainonocaillano, aisidimaci.

Jesús jinafona conirue racaja rafue

⁵¹ Ie facaise daje conirue Jesús jinafona racade. Jamai abimo iniroi ferinocaida racade. Naimiena ciuanona, comini naimiena gaitadimaci; ⁵² ia ie iniroina fainonocaillanona, taimiena aiside.

Jesúdi judíuai illaicomini dine illa rafue

(Mt 26.57-68; Lc 22.54, 55, 63-71; Jn 18.12-14, 19-24)

⁵³ Jesúna gaitaja mei, Jusiñamui diga nanoca ñairaima dine naimiena uitimaci. Nana judíuai illaicomini itimaci. Nanoca ñairaini itimaci. Einamaci jiai itimaci. Moisés micori llogacinona llofueraini jiai itimaci. ⁵⁴ Pedro naimaci jinafona aarena racade. Jusiñamui diga nanoca ñairaima nairaibirimo jaide. Jofono sedadino diga nainomo ite iraimo agaide.

⁵⁵ Naimiena meinellena, nana naie illaicomini Jesúmo nicino illana uiñoiacadimaci. Iena coniniri siadotimaci; iadedi naimiemo jaca nie isoide marañede rafue illana uiñoñedimaci. ⁵⁶ Diga comini Jesúna llogidotimaci; ia tainona llotimaci. Daje isoi lloñedimaci. ⁵⁷ Damierie billanona, tainona llogiduanona, raite:

⁵⁸ —Bimie lluaana cacadica. Jusiñamui jofona jeare ñaite. Naimie llote: “Jusiñamui jofona comini finodimaci; ia iena cue judaiana, darui amani illanona, jiaie finoiticue. Comini iena finoñeitimaci”. ⁵⁹ —Iese llotimaci; ia daje isoi lloñedimaci.

⁶⁰ Naimaci motomo Jusiñamui diga nanoca ñairaima naidadajanona, Jesúmo jicanote:

—¿Niese uai oitio? ¿Nie isoide rafue ona llogidotimaci?

⁶¹ Jesús dinena uai oñede. Naie ñairaima jicanote:

—¿Odi Cristodio? ¿Odi Jusiñamui Jitodio?

⁶² Jesús uai ote:

—Jii, naimiedicue. Monamona jaie cue billamona, imana jaidicue; ia ico jairuido illaimana cue illena, Jusiñamui ecimo cue raillena, omoi nairai cioitimaci. Mona uilliemmo cue abido billena jiai cioitimaci.

⁶³ Iena cacajanona, icirillanona, naie nanoca ñairaima dama ie iniroina cuaranote. Raite:

—Jiaño naimiena llogidollena jai jitañedica. ⁶⁴ Jusiñamuina naimie jeare ñaiana jai cacadomoi. ¿Niese naimiena raitomoi?

Jiaie illaicomini dinena:

—Naimie fiódaillesa —llotimaci.

⁶⁵ Ie facaise damierie naimiena tuallaitimaci. Ie uiecona ibaila mei, naimiena ducoidimaci. Raitimaci:

—Bu o ducoia caimo llono.

Naimiena gaitadino dinena naimiena jiai ducoidimaci.

Pedrodi Jesúna janua rafue

(Mt 26.69-75; Lc 22.56-62; Jn 18.15-18, 25-29)

⁶⁶ Naie facaise Pedro nairaibirimo ite. Naie nanoca ñairaima mullaiñuaimona dañaiño nainomo billanona, ⁶⁷ Pedro agaillana code. Raite:

—Nazaret ie Jesús cominidio.

⁶⁸ Pedro iena januano, raite:

—O lluana uiñoñedicue. Iena raise cacaiñedicue.
Ie mei nase fueo jaide. Naie facaise itava dacaiño ñaite. ⁶⁹ Naie mullaño naimiena dane cuanona, nainomo jamai itinomo llote:

—Bimiedi Jesús ie llofueoicaigano imie.

⁷⁰ Iena Pedro dane janote. Dallu illanona, nainomo jamai itino Pedromo llote:

—Odi Galilea imedio. Jesús diga jaicabidio.

⁷¹ Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uiñote. Ero, omoi llogamiena uiñoñedicue.

⁷² Ieconi itava dane ñaite. Iena cacajano, Pedro Jesús lluana uibiñote. Jaive naio Jesús Pedromo llote: “Itava menacaiño nia ñaiñenia, dacaiño amani cuena janoitio”. Iena uibiñuamona, Pedro eo eede.

15

Pilato dine Jesús illa rafue

(Mt 27.1, 2, 11-14; Lc 23.1-5; Jn 18.28-38)

¹ Jitiramo monaidemo, judíuai illaicomini danomo siadotimaci. Jusiñamui diga nanoca ñairaini itimaci. Naimaci einamaci jiai itimaci. Moisés micori llogacinona llofueraini jiai itimaci. Siadua mei, Jesúsna maianona, Pilatomo uitimaci. Romanuai railla nairai anamo naimaci illa jira, Pilatodi naimaci gobernador. ² Pilato naimiemo jicanote:

—¿Judíuai comini illaimadio?

Jesús uai ote:

—Jii.

³ Ie muidona Jusiñamui diga nanoca ñairaini Jesúsna llogidotimaci:

—Naimie diga marañede rafuena finode —llotimaci.

⁴ Pilato dinena naimiemo jicanote:

—¿Niese uai oñedio? Ona eo llogidotimaci.

⁵ Jesús nia uai oñena jira, Pilato uainicaide.

Pilatodi Jesús fiodaillana llua rafue

(Mt 27.15-31; Lc 23.13-25; Jn 18.38-19.16)

⁶ Naga año pascua railla rafue facaiseconi cárcelmo itinomona Pilatodi comini jicacamienna jamai jino orede. ⁷ Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meinia jira, cárcelmo ite. ⁸ Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci. ⁹ Pilato jicanote:

—¿Bu jino cue oretallena jitaidomoi? Omoi judíuai railla illaimana nibai jitaidomoi.

¹⁰ Iese jicanote; iadedi naimiedi Jusiñamui diga nanoca ñairaini Jesúsri uradoillana uiñote. Naimaci Jesúsna meiniacanana jiai uiñote. ¹¹ Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci. ¹² Iena cacajano, Pilato naimacimo jicanote:

—¿Niese bimiena cue finuana jitaidomoi? Naimiedi omoi judíuai illaima raillamie.

¹³ Ado llotimaci:

—¡Naimiena corai!

¹⁴ Pilato dane jicanote:

—¿Nie isoide marañede rafuena finode? —Iena cacajano, ado ibi llonoidimaci:

—¡Naimiena corai!

¹⁵ Naimacina iobitallena, naimaci jitailla jira, Barrabás jino orede; iadedi Jesúna sechedotaja mei, naimiena coraillena orede.

¹⁶ Soldaduai naimiena gobernador jofo fo uillanona, nana soldaduai nainomo ofidimaci. ¹⁷ Jiduirede iniroi naimiemo jítadimaci. Eecuaimona niga nuiciraina naimie ifogimo jítadimaci. ¹⁸ Naimiena jifanoduanona, naimiena uaidotimaci:

—¡Jadi, judíuai illaíma!

¹⁹ Radosi diga ie ifogimo buta-butadimaci. Naimiena tuallaitimaci. Naimie illaimana itena, naimiena sedallena, caiñici ifodo raiedimaci. ²⁰ Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jítadimaci. Ie mei naimiena coraillena oni uitimaci.

Jesúna coraia rafue

(Mt 27.32-44; Lc 23.26-43; Jn 19.17-27)

²¹ Jerusalémona naimaci jaillanona, jamai bitimiemo dafaifidimaci. Naimiedi Simón. Cirene railla enirue imie. Naimie jito iaímaiaidi Alejandro iaímaiaí Rufo diga. Jerusalén onifemona naimie billanona, naimiemo dafaifidimaci. Naimiena Jesús uiga cruzna rocatatimaci. ²² Gólgota raillanomo jaidimaci. Ifocoraina eruailla jira, iese mameciredede. ²³ Nainomo rillanona, ie abi isirena cacaiñellena, vinomo eriredede rana faianona, Jesúmo fecadimaci; iadedi naimie iena jiroñede. ²⁴ Ie mei naimie cruzmo coraia mei, cruzna naidania mei, naie soldaduai naimie iniroi daní coninimo fecasite. Naie iniroi bu uille raillanona uiñollena, jifanododimaci.

²⁵ Jitoma nia fuiri daidemo, naimiena coraidimaci. ²⁶ Cruzmo ie llogiduafuena jonetimaci. Jai cuega: “Judíuai comini Illaíma”. ²⁷ Ie mei mena firiruide iaímaiaína coraidimaci. Damie Jesús nabeimo coraica. Jiaimie Jesús jarifebeimo coraica. ²⁸ Iemona Jusiñamui facaina lloaíma micori jaie cuegafue suide. Cuega: “Maraiñedino isoi naimie jai ite”.

²⁹ Naisodo jamai jaidino Jesúna mameritimaci. Mamerillamona, ifogiaína jaididimaci. Raitimaci:

—Navui raisoidio: “Jusiñamui jofona judaíticue. Darui amani illanona, iena dane finoíticue” raisoidio. ³⁰ Ie muidona dama o abina mai jillota. Cruzmona ana bi.

³¹ Ie facaise Jusiñamui diga nanoca ñairaini naimiena jifanododimaci. Moisés micori llogacino llofueraíni naimiena jiai jifanododimaci. Raitimaci:

—Jiaie cominina jillotate; ia dama naimie abina jillotanide. ³² Naimiedi Cristodena, naimiedi cai judíuai comini illaíma raillamiedena, dama niadedi cruzmona ana ie billa. Iena cai cioia, naimiena inoíticai. —Iese naimiena jifanododimaci. Naimie diga coraicamie iaímaiaí naimiena jiai jeare ñaitiaímaiaí.

Jesús fodailla rafue

(Mt 27.45-56; Lc 23.44-49; Jn 19.28-30)

³³ Jitoma naidai itemona, daje amani horas mona jitiñicaide. ³⁴ Ie meinomo judíuai railla uaido Jesús ado jidaioide:

—Eloi, Eloi, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena faínonocaidio?” raite.

³⁵ Iena cacajano, nainomo jamai itinomona damierie raitimaci:

—Naimie jaie Jusiñamui facaina lloaíma Elíana uaidote —raitimaci.

³⁶ Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade. Raite:

—Dallu sedaiticai. Elías naimiena jillotajaíbillena uiñoiacadicaí.

³⁷ Ie facaise ado cuirioita fiodaite. ³⁸ Naie facaise Jusiñamui jofomo ie fetaca iniroife ana anaba jillacimo motodo menafe cuararide. ³⁹ Jesúna sedallena, nainomo capitán ite. Jesúmo eruaillanona, Jesús fiodaillana ciode. Raite:

—Uanai bimiedi Jusiñamui Jito.

⁴⁰ Dajerie riñoniai naie rafuena aarena cioidimaci. Naimaci motomo María Magdalena ite. Jiaie María jiai ite. Naiñaiñodi Jacobo ei. Naimiedi jamamie. Naiñaiñodi jiai José ei. Salomé jiai ite. ⁴¹ Galileamo Jesús navui illa facaise naie riñoniai naimie diga jaisoidimaci. Naimiena canouidimaci. Jerusalémo Jesús billanona, ailluena riñoniai naimie diga jiai bitimaci. Ie fiodaillana jiai cioidimaci.

Jesús raiafomo jonia rafue

(Mt 27.57-61; Lc 23.50-56; Jn 19.38-42)

⁴² Jitoma ana itemo, sábado rille jai iairei illanona, ⁴³ Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie cominina ico sedajanomo illemo ocuride. Ie comecina ocuiñocaida, Pilato dine jaide. Iena raillena, Jesús abina jicade. ⁴⁴ Iena cacajano, Pilato Jesús fiodaillana raise uiñoiacade. Ie fiodaillana nia fidiñede. Jesúna sedade capitána uaiduanona, naimiemo Jesús fiodaillana jicanote.

⁴⁵ —Jesús jai fiodaite —capitán railla mei, Pilato Jesús abina Josémo fecalena llote. ⁴⁶ José mare userede iniroi ibaja mei, cruzmona Jesús abi ana ua mei, naie iniroi diga ie abina ferinote. Nofici motomo finoca raiafomo jonete. Naifona ibaillena, aillue nofici nainomo bai ñuitade. ⁴⁷ María Magdalena, jiaie María diga, naimie raiana ciode. María José ei.

16

Jesús fiodaillamona jillua rafue

(Mt 28.1-10; Lc 24.1-12; Jn 20.1-10)

¹ Sábadoruimo jitoma sojicaidemo, María Magdalena caimare soride rana ibade. Jacobo ei, María jiai ibade. Salomé jiai ibade. Jesús abimo jonellena, ie abina raise finollena naimaci einamací finocabilla isoi, naiñaiñuai iena ibade. ² Domingo jítiramo jitoma como bairedemo, Jesús raiafo dine naiñaiñuai jaide. ³ Jaillanona, coníñuaimo jicanote:

—¿Bu noficina caina oni ñuitalle raiafomona?

⁴ Raiafo dine rillanona, iemo eruaillanona, nofici oni ñuitacana ciode. Naie nofici eo aillue. ⁵ Raiafomo jaillanona, naiñaiñuai coniruena eruaidimiena nabeimo raillana ciode. Naimie are userede iniroina jítade. Naimiedi Jusiñamui jaienici. Naiñaiñuai jacinaite. ⁶ Nainomo itimie dinena raite:

—Jacinañeno. Nazaret ie Jesúna jenodomoí. Naimiena coraidimaci; ia fiodaillamona naimie jai jillode. Bene jai iñede. Naimie jonianomo mai eroda. ⁷ Naimie llofueoicaiganomo iena lluai. Ua Pedromo llono. Galileamo omoí uicomo naimie jaite. Omoímo naimie llua isoi, naimiena cioitomoí.

⁸ Naiñaiñuai jino jaillanona, raiafomona aisicana jaide. Jacinaillamona abi jaidisite. Jaciruillamona, iena bummo lloñede.

Jesús María Magdalenamo bairia rafue

(Jn 20.11-18)

⁹ Domingo jítiramo Jesús jillua mei, María Magdalenamo Jesús nano bairede. Naiñaiño Janaba anamo navui illamona, Jesús naiñaiñomona siete jananiai navui oni orede. ¹⁰ Naiñaiñomo naimie bairia mei, naimie diga jaicabidinomo iena lluaide. Naimacimo iena nia lloñenia, sure eedimaci.

¹¹ —Naimie jai jillode. Naimiena jai ciodicue —naimacimo naiñaño llua mei, iena ñnoñedimaci.

Mena llofueoicaiganomo Jesús bairia rafue
(Lc 24.13-35)

¹² Ie meinoconi Jesús mena llofueoicaiganomo bairede. Naimie eruaisoilla isoi, eruaiñede. Iaimaiaia naisomo macaria, iaimaiaimo bairede. ¹³ Jerusalémo abido iaimaiaia rilla mei, jiaie llofueoicaiganomo iena llotiaimaiaia; ia ñnoñedimaci.

Jesús ie once llofueoicaiganomo bairia rafue
(Mt 28.16-20; Lc 24.36-49; Jn 20.19-23)

¹⁴ Ie once llofueoicaigano danomo guitimacimo, Jesús naimacimo bairede. Naimie jillua mei, damierie naimiena ciuanona, ie llofueoicaiganomo iena llote; ia ñnoñedimaci. Naimaci ñnoñena jira, Jesús naimacimo riire llote.

¹⁵ Naimacimo llote:

—Nana nairaiaimo jai. Nana cominimo cue mare rafue llocana jai.

¹⁶ Cuena ñnuamona, bautizagano diese Jusiñamuimona duere sefuiñeitimaci; iadedi Jusiñamui cuena ñnoñedinona duere finoite. ¹⁷ Cuena ñnotino Janaba anamo itinomona Janabana oni oretaitimaci. Naimaci nia uiñoñega uaido ñaitimaci. ¹⁸ Jaiona naimaci llinoa, naimacina ñiese ñibaiñeite. Bainode ra naimaci jiroia, naimacina ñiese ñibaiñeite. Duidinona naimaci jetajamona, jilloitimaci.

Jesús monamo jailla rafue
(Lc 24.50-53)

¹⁹ Ie llofueoicaigano diga ñaia mei, Jusiñamui cai Nama Jesús monamo uiga. Illaimana Jesús illa jira, Jusiñamui nabeimo naimie raide. ²⁰ Monamo Jesús jailla mei, ie llofueoicaigano, diga nairaiaimo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemona comini ñinena Cristomona naimaci rafue illana uiñotimaci. Macaibaite. Cue cueda rafue jai fuite. Marcodicue.

LUCAS JESUCRISTO ENIRUEMO ILLA RAFUE CUIAFUE

Lucas Teófilomo cartana orede

¹⁻⁴ Teófilo, cue isiruiğa nabai. ¿Nigacino? Omo bie cartana oredicue. Cai motomo birui dıga rafue jai suide. Jesucristo rafuena omo cueticue. Naimie billa mei, dıga comini naimiemo suide rafuena cidımacı. Iena llocana jıai jaidımacı. Naimacımona bie rafue raise uıñoticue. Bie rafuena fidianona, damierie iena jai cuetımacı. Bie rafuena jıai jai cacadıo. Bie rafuena cue raise uıñua jıra, uanaicinona o raise uıñollena, bie cartana jai cueticue. Iese birui cue comeci jitaide.

Jusiñamui jaienici Juan Bautista micori jeicillena lua rafue.

⁵ Jesucristo nia jeiciñenia, Zacarías illa facaise Herodena mameciredede illaimadı. Judea railla eniruena sedade. Zacarías Jusiñamui dıga ñairaima. Abıas raillasie facaimo duillamona, Jusiñamui jofomo maijıuide. Naimie aidi Elisabet. Naiñaiño jaie ite usumadı Aaron micori. Aaron micoridi Jusiñamui dıga nano ñairaima. ⁶ Jusiñamuimona iaımaıai mare, nana naimie lloga uaina raise iaımaıai inua jıra. ⁷ Naiñaiño oiniñona jıra, uruenidiaımaıai. Jıai jai uaicıma iaımaıai.

⁸ Zacarías facai ite comini maijıa facaise ia, Jusiñamui jofo dıne naimie maijıaide. ⁹ Nainomo naimie maijıa, caımare soride ra fo jobaillena, naimiena fetodımacı. Naimaci finouilla isoi, jobaillanona danı Jusiñamui dıga ñairainı naimiena fetodımacı. Iemei naimie fo jaide. ¹⁰ Fo jailla mei, naie caımare soride ra boa facaiseconi, Jusiñamui dıga naimie ñaıano, ailluena comini Jusiñamui jofo ecımo itımacı. ¹¹ Ieconı cai Nama Jusiñamui jaienicıdi naie ra boano nabeımo Zacarıamo bairede. ¹² Naimiena cıuanona, Zacarías jacınaite. ¹³ Jaienici naimiemo llote:

—Zacarías, jacinaıñeno. Jusiñamui o jıacinona jai cacade. Iemona o aı uruesite. İmana jocoite. Juan o jıtalle naimie mamecıdi. ¹⁴ Iemona o comeci caımare iite. İobitıo. Ailluena comini naimie jeicıari iobıtımacı. ¹⁵ Jusiñamuimona naimie jamai bue isoiñeitımiena jaite. Jıfaitate rana jiroñeite. Naimie jeicıamona Jusiñamui Joreño naimiena namataite. ¹⁶ Cai Nama Jusiñamui dıbeımo ailluena Israel comınına naimie itataite. ¹⁷ Jusiñamui jitaillacınona finocana jaite. Elıamo Jusiñamui Joreño jaie sıño uai illa isoi, naimiemo iite. Jusiñamui rafuena naimie lluamona, damierie, naimaci jaiagaı isoi, Jusiñamuina inoitımacı. Ailluena Jusiñamui uaina jai inoñedımacı; ia damierie birui inoitımacı. Naimaci comeciıai Jusiñamui dıbeımo meidoitımacı. Iemona cai Nama Jesucristo bia, naimiena inoitımacı.

¹⁸ Zacarías dınena jıcanote:

—¿Nıese o lua suillena uıñoticue? Jai uaicımadıcoco.

¹⁹ Jusiñamui jaienici dınena uai ote:

—Gabrieldıcue. Jusiñamuimona bitıcue. Cuenıa oretate, bie mare rafuena omo llollena. ²⁰ Ero, cue uaina o inoñena jıra, uainitıo, o jito jeicille dınori. Jıairuido bie rafue suite.

²¹ Jusiñamui jofomo jino itıno Zacarías jino billena sedadımacı. “¿Bue ñellena naimie are bıñede?” comeciına facadımacı. Naimie jino are bıñena jıra, rajıcaıdımacı. ²² Naimie jino bitemo, naimaci dıga jai ñainide. İe onolli dıga facajamona, Jusiñamui jaienici naimiemo jai lluaıa uıñotımacı. Naimie ñaiñeno ite. ²³ Jusiñamui jofomo naimie maijıa facaise fuilla mei, ie jofomo

abido jaide. ²⁴ Digarui illanona, ie aidi urueside. Ie jira jofomo naiñaiño cinco fivui fiebide, comecina facajanona: ²⁵ “Cue uruesilla jira, iena nia buna lloiacaiñedicue. Cue Nama cuena jai duenaillana uiñoticue. Navui cue urue iñena jira, meiruiticue. Jai meiruiñeiticue. Comini cue joreña jai ñaiñeitimaci”.

Jusiñamui jaienicí Jesús jeicillena llua rafue

²⁶⁻²⁷ Elisabet seis fivui uruesilla mei, Jusiñamuidi Galileamo ie jaienicí Gabrielna orede. Nazaretmo María dine naimiena orede. María nia ininide; ia jai José jicanogañaiño. Naimie usumadi David micori.

²⁸ Rillanona, naiñaiño mome llore:

—Itio. Cai Nama Jusiñamui ona eo duenaite. Ona jai fetuamona, nana jiaie riñoniai baifemo naimiedi ona marena itatate.

²⁹ Iena cacajanona, naiñaiño jacinaitaite. Iena naiñaiño raise cacaiñena jira, iemo comecina facade. ³⁰ Gabriel dinena llore:

—Jacinaiñeno. Jusiñamui ona duenaite. ³¹ Birui uruesitio. Imana jocoitio. Naimie mamecina jítaitio Jesúsna. ³² Siño Jitona jaite. Nanoca Itimie Jitona jaite. Ie usuma David micori illaíma illa isoi, Jusiñamuidi naimiena illaímana itataite. ³³ Illaímana illamona, Israel railla nairaina jaca sedaite. Naimie ifomo jiaimie jaca iñeite.

³⁴ María uai ote:

—Íma diga nia iñedicue. ¿Ñiese bie nibaille?

³⁵ Gabriel llore:

—Jusiñamui Joreño omo iite. Ie siño uai diga iena finoite. Jusiñamui marena isoi naimie jiaí marenite. Naimiedi Jusiñamui Jito. ³⁶ O comini iñaiño, Elisabet, ie uaicitaila facaise jiaí jai urueside. Naiñaiño jai jionaide; ia jai seis fivui naiñaiño uruesilla ite. ³⁷ Jusiñamui nana bie isoide rafuena finorede.

³⁸ María uai ote:

—Jee. Jusiñamui anamo iticue. O llucino cuemona mare.

Ie facaise Gabriel naiñaiñomona oni jaide.

Maríadi Elisabet dine jailla rafue

³⁹ Ie facaiseconi María aneduai dine Judea railla eniruemo Zacarías illanomo raire jaide. Elisabetna cioillena, jaide. ⁴⁰ Zacarías jofomo rillano:

—Itio —raillanona, Elisabetna uaidote. ⁴¹ Elisabet naiñaiño uaina cacajano, ieconi naiñaiño jeraimo ite urue iena jiaí uiñuamona, niraide. Ie facaise Jusiñamui Joreño anamo Elisabet jai ite. ⁴² Iese illamona, María uruesillana uiñote. Naiñaiño ado llore:

—Jusiñamui ona eo marena canoite. O uruena marena itataite. ⁴³ Jamai bue isoidicue; ia, odi cue jilloitaraíma ei illanona, cue dine bitio. Iena cuemo nia lloñedio; ⁴⁴ ia, cuena o uaiduanona, iobillamona cue jeraimo ite uruedi niraide. ⁴⁵ Cai Nama omo llotataga uaina suillana o inua jira, Jusiñamui ona eo marena canoite. —Jusiñamui Joreño naiñaiño mome illamona, iena llore.

⁴⁶ María dinena uai ote:

Caiñai Nama eo mare. Naimiemo iobillacinona fecaacadicue.

⁴⁷ Naimiedi cue jilloitaraímana jira, naimieri iobidicue.

⁴⁸ Jamai bue isoidicue; iadedi cuena fetode.

Ie jira biruimona nana comini cuena marena ñaitimaci.

⁴⁹ Naimiedi siño. Naimiedi mareuidimie. Cue facaina eo mare rafuena finode.

⁵⁰ Naimiena inotinona jaca duenaite. Cai jaiagaina jaca duenaite. Caina birui jaca duenaite. Ua nana naimiena inotinona duenaite.

⁵¹ Diga siño rafuena finoite. Abi íedotino comeciai facajacinona llucaitaite.

⁵² Naimiedi illaicomina oni dotaite; ia jamai bue isoidinona jamai bue isoñedinona itataite.

⁵³ Dueredinona eo canoite; ia duenidinomo buena fecañeite.

⁵⁴ Duenailamona, cai Israel cominina feitañeite.

⁵⁵ Cai jaiagamomo naimie jaie llua isoi, birui cana canoite.

Abraham micorimo jaie llote: “Ona duenaiticue. O cominina jaca duenaiticue”

María llote. ⁵⁶ Elisabet diga davui amani naiñaiño fiebide. Ie mei ie jofomo abido jaide.

Zacarías jito jeicia rafue

⁵⁷ Elisabet jocularui jai ridemo, imana jocode. ⁵⁸ Naiñaiño ecimo ite comini, naiñaiño comini diga, iena fidiamona, cai Nama naiñaiñoona eo duenaillana uiñotimaci. Naiñaiño diga iobidimaci. ⁵⁹ Ocho digarui jeicia mei, naimaci finouilla isoi, urue abina dia rafuemo bitimaci. Ie moo mamecina jitaacadimaci; ⁶⁰ iadedi Elisabet llote:

—Dama ite. Jitaiñedicue. Naimie mamecidi Juan cai jitalle.

⁶¹ Uai otimaci:

—¿Bue ñellena iese raitio? O cominimona jaca bu Juan mameciredimienaiñede.

⁶² Jefona cacaiñena jira Zacaríamo onolli diga jicanotimaci, ie jito mamecina jitalle. ⁶³ Onolli diga Zacarías fairuano, rabena jicade. Cuete: “Naimie mamecidi Juan”. Ieri rajicaidimaci. “¿Bue ñelle iena jitade?” comeciaina facadimaci. ⁶⁴ Ieconí Zacarías jai dane ñaite. Ie jira Jusiñamuimo iobillacino fecade. ⁶⁵ Nana iaímaiaí ecimo itino rajicaidimaci.

—Jusiñamui muidona naie rafue suide —llotimaci. Bie rafuena fidiano, nana Judea railla aneduaimo itinodi iena ñaíoidimaci. ⁶⁶ Iena cacajano, comeciaina facadimaci: “Bimie jamai bue isoiñeitimienaiñe”. Cai Nama naimienaiñe marena jaca canua jira, iese llotimaci.

Zacarías Jusiñamuimo iobillacinona fecaja rafue

⁶⁷ Ie facaise Jusiñamui Joreño Zacaríana llotatajanona, Zacarías llote:

⁶⁸ Cai Nama Jusiñamuidi mare.

Cai Israel comini dine biite, cana jilloitallena.

⁶⁹ David micori Jusiñamuina jaie sedade.

David micori cominimona siño Jilloitaraímana cai dine oretaite.

⁷⁰ Ie facaina llorainido naimie jaie llua isoi, cai Jilloitaraímana oretaite,

⁷¹ Taifemona, Janabamona cai jilloillena.

⁷²⁻⁷³ Cai usumatiaí micoriaímo: “Omoína duenaiticue” llote.

Cai usuma Abraham micorimo jaie llogacinona feitañede.

⁷⁴⁻⁷⁵ Taifemona cai jilloillena, cai Jilloitaraímana oretaite.

Nana cai ille dinori Jusiñamuina jaciruiño sedajana jitaide.

Naimie jitailla isoi cai illena, naimie jitaillacinona cai finollena, cai Jilloitaraímana oretaite.

⁷⁶ Cue jito, ona lloiticue. Jusiñamui ie lloraimana jaitio.

Cai Nama uicomo jaitio, comini comeciái o raise finollena.

⁷⁷ Ie cominimo jeacinomona jilluacinona lloitio.

Iena naimaci ñnoia, Jusiñamui naimaci jeacinona feitaite.

⁷⁸⁻⁷⁹ Jeacino anamo jai cai illa jira, jitiñedinomo iticai isoidicai.

Jusiñamuina cai nia ñnoñenia, fiodaillana jaciruiticai.

Naimie cana duenaillamona, cai Jilloitaraímana billena o llofuellena, ona oretaite.

Naimienaiñe cai ñnoia, jitiñedinomo iñeiticai; ia Jusiñamui diga cai comeciái uri iite.

⁸⁰ Zacarías jito sairide. Jusiñamuina ñnocana jaide. Cominimo naimie nia marefodo lloñenia, jofue iñenanomo ite.

2

*Jesús jeicia rafue
(Mt 1.18-25)*

¹⁻² Jesús jeicia facaise César Augusto anamo ailluena nairaiaí ite. Roma-mona naimacina sedauide. Naie facaise Siria railla enirue gobernadordi Cirenio. César Augusto, nie diese comini naga nairaímo illana naimie uiñollena, nana comini mameciaí cuellena ocuide. Jaca bu iese jaie finoñede. ³ Naimaci jaiagai illanomo mameciaí cuiana ocuide. ⁴ Ie jira José Galileamona Nazaretmona jaide. Judeamo Belémo jaide. David micori cominimo naimie jainaiaílla jira, David micori illanomo jaide. ⁵ Ie ai María diga jaide. Naiñaiño fenaí jai eo aillue. ⁶⁻⁷ Belémo iaímaiaí rillanona, naie facaise comini jofomo inillino iñena jira, jurareta jofomo ridiaímaiaí. Nainomo ie doforato jito jeicite. Jocua mei, iniroina naimiena ferinote. Ie jito inillena, jurareta ecaranomo naimiena jonete.

Jusiñamui jaienisaí toíca llaudaiaí sedaraini dine jailla rafue

⁸ Jesús jeicia facaise naie naio Belén ecimo ite pastomo damierie toíca llaudaiaína sedaraini itimaci. Naimaci toiniaína sedadimaci. ⁹ Ieconí cai Nama Jusiñamuimona daje jaienici naimacimo ebena bairede. Jusiñamui ie siño uai diga naimacina quetiñote. Jacinaitimaci. ¹⁰ Jaienici llote:

—Jacinaíño. Mare rafue lloiacadicue. Nana cominina iobitallena, iena lloiacadicue. ¹¹ David micori illanomo damie como jeiciga. Jusiñamui facaina lloraini micoriaí naimie billena jaie lloudimaci. Naimiedi Cristo cai Nama. Naimie omoi jilloitaraima. Jeacinomona omoína jillotaite. ¹² Naimiena jibuisai. Iniroina ferinoga urue jurareta jofomo imaci ecaranomo baitomoi. Iemona cue llua uanaicinona uiñoitomoi —llote.

¹³ Ie facaise naie jaienici dine ailluena jaienisaí bitimaci. Jusiñamuimo iobillacinona fecajano rotimaci:

¹⁴ Monamo Jusiñamui illanona, naimiemo iobillacinona fecaacadicaí. Cominina naimie duenailamona, naimie diga uri iitimaci rotimaci. Ie mei abido jaidimaci.

¹⁵ Monamo jaienisaí jailla mei, toíca llaudaiaí sedaraini coniniri ñaitimaci: —Belémo mai cai jailli, cai Nama caimo como lloga rafuena cai jibuisaillena.

¹⁶ Ieconí raire jaidimaci. María José diga baitimaci. Iaímaiaí urue jurareta ecaranomo billana cioidimaci. ¹⁷ Naimiena ciua mei, nana naimacimo jaienici lloga rafuena llotimaci. ¹⁸ Nana naie rafuena cacadinodi ieri rajicaidimaci. ¹⁹⁻²⁰ Iaímaiaí uruena ciua mei, llaudaiaí sedaraini imaci toiniaí dine abido jaidimaci. Naimacimo jaienici llua isoi naimacimo suilla jira, iobidimaci. Nana naimaci cacaja rafueri, nana naimaci ciua rafueri Jusiñamuimo iobillacinona fecadimaci. María naie rafuena feitañede; ia iena comecina facauide.

Jerusalémo Jusiñamui jofomo Jesúna iaímaiaí uilla rafue

²¹ Ocho digarui illanona, naie urue abina dete. Ie ei jeraimo naimie nia comuiñenia, Jusiñamui jaienici naimie lloga mamecina jítade. Jusiñamui jaienici llua isoi, Jesúna ie mamecina jítade.

²²⁻²⁴ Moisés micori jaie llua isoi Jerusalémo Jesúna uitiaímaiaí. Moisés micori jaie cuete: “Cuarenta digarui jocua mei, Jusiñamuimona riño marena illena, Jusiñamuimo mena ficiri naiñaiño fecaja. Jusiñamui diga ñairaíma iena faja mei, riño facaina Jusiñamuimo jobaica”. Jiaí cuete: “Naga nano doforamiedi Jusiñamui ie. Ie muidona naimie facaina Jusiñamuimo ucubena fecaja”. Ie muidona Jerusalémo Jesús diga jaidiaímaiaí.

²⁵ Naie facaise Jerusalémo Simeón raillamie ite. Jusiñamuimona naimiedi mareuidimie. Jusiñamuina eo inocana jaide. Naimie cominina Cristo jilloitalena, Cristo billemo ocuride. Naie facaise Jusiñamui Joreño anamo naimie ite. ²⁶ Iemona Jusiñamui Joreñodi, naimiena Cristona cioillena, navui uicodo uiñotade. O nia fioidañenia, Cristona cioitio raillanona llote. ²⁷ Jusiñamui jofomo Jusiñamui Joreño naimiena oretate. Jusiñamuimo Jesúna fecallena, Jesús ei, José diga, Jesúna fo uillana Simeón ciode. ²⁸ Naimaci dine jaillanona, Jesúna meniñote. Jusiñamuimo iobillacinona fecajano jide:

²⁹ Nama, o anamo iticue.

Cuemo o lloga uai jai suilla jira, uri fioidaiticue.

³⁰ O oretaga Jilloitaraimana jai cioidicue.

³¹ Naimiena oredio, nana comini jilloillena.

³² Naimiedi judíuainedina uanaicinona uiñotaite.

O cominina iobitaite

jide. ³³ Iena cacajamona, iaimaiai jitona lloga uairi rajicaidiaimaiai.

³⁴⁻³⁵ Simeón iaimaiaimo camaredicinona llote:

—Jusiñamui omoina raise canoite —llote.

Maríamo llote:

—Ero, ie rafuena llollena, Jusiñamui o jitona jai fetode. Naimie illamona, comini comeciina facajacinona uiñotaite. Naimiemo suille rafuemonona o comeci sure iite. Cai cominimona ailluena naimiena jitaiñeitimaci. Ailluena jitaitimaci.

³⁶ Nairuido Jusiñamui jofomo Ana railla feciño ite. Jusiñamui naiñaiño mo lloga rafuena llouide. Naiñaiño moo Fanuel micori. Naiñaiño nairaidi Aser. Jitaiño facaisemona ie ini diga siete años illanona, naimie fioidaite. ³⁷ Naiñaiño jai eo uaiño. Ochenta y cuatro años naiñaiñodi jai ite. Jusiñamui jofomo jaca isoide. Nagarui Jusiñamuimo jianona guicabiño naimiena sedauide.

³⁸ Simeón ñaiana cacajano, naiñaiño Jesús comini dine billano, Jusiñamuimo iobillacinona fecade. Naimie billemo naimaci ocurilla jira, naiñaiño naimaci jilloitaraimana nainomo itinomo llocana uite.

Nazaretmo abido naimaci jailla rafue

³⁹ Moisés micori lloga uai naimaci fuidua mei, Jesúna uillanona, Galileamo Nazaretmo naimaci illanomo abido jaidiaimaiai. ⁴⁰ Nainomo Jesús sairicana mairicana jaide. Eo abina uiñote. Naimieri iobillamona, Jusiñamui naimiena canouide.

Jerusalémo Jusiñamui jofomo Jesús illa rafue

⁴¹ Naga año Jerusalémo pascua railla rafue dine Jesús moo iaimaiai jaisoidiaimaiai. Egiptomona naimaci jaiagai jillobillana comecillena, naie rafue ite. ⁴² Naimiemo doce años illa facaise Jerusalémo iaimaiai jaisoilla isoi, jaidiaimaiai. Naimie doce años illa jira, Jesúna uitiaimaiai. ⁴³⁻⁴⁴ Rafue fuilla mei, abido bitiaimaiai. Ailluena comini jai billa jira, Jesús billana raise uiñoñediaimaiai. “Cai comini diga naimie bite” raillanona comeciina facadiaimaiai; ia Jesús Jerusalémo fiebide. Darui raifi billa mei, iaimaiai cominimo naimiena eo jenodiaimaiai. ⁴⁵ Baiñena jira, inia mei, Jerusalémo darui jaillanona, abido jaidiaimaiai. ⁴⁶ Ie are Jusiñamui jofomo naimiena baitiaimaiai. Moisés micori llogacinona llofueraini motomo naimie ite. Naimaci llofuiana cacade. Iena naimaci diga jai siadote. ⁴⁷ Nana cacadino naimie uiñogacinori rajicaidimaci. Naimie raise siadogacinori jai rajicaidimaci. ⁴⁸ Naimiena iaimaiai baia, rajicaidiaimaiai. Ie ei naimiemo jicanote:

—¿Bue ñellena cocona duere finodio? O moocama diga ona eo duere jenodicoco.

⁴⁹ Naimie uai ote:

—¿Bue ñellena cuena duere jenodomico? Cue Moo jofomo naimie rafuena finodicue. ¿Ñiese bene cue illana uiñoñedomico?

⁵⁰ Naimie llwana raise cacaiñediamaia. ⁵¹ Iemei iaiaiaia diga Nazaretno naimie abido jaide. Iaiaiaia uai ñnuanona, iaiaiaia anamo ite. Ie ei María nana naie rafue ie comecimo facauide. ⁵² Naimie sairicana abina uiñocana jaide. Jusiñamui naimieri iobide. Comini dinena naimiena jiaia gaidimaci.

3

Jofue iñenanomo Juan Bautista micori illa rafue

(Mt 3.1-12; Mr 1.1-8; Jn 1.19-28)

¹⁻² Jofue iñenanomo diga años Juan illanona, Jusiñamuimona ie uaina feiñote. Naimiedi Zacarías jito. Naie facaiseconi Romamo quince años Tiberio Césardi nanoca illaimana jai ite. Judea railla enirue gobernadori Poncio Pilato. Galilea railla enirue gobernadori Herodes. Naimie amadi Felipe. Iturea railla enirue, Traconite railla enirue diga, gobernadori Felipe. Abilinia railla enirue gobernadori Lisantias. Jusiñamui diga nanoca ñairaima iaiaiaiaidi Anás, Caifás diga. ³ Jusiñamui llua jira, nana Jordán fuemo ite comini dine Juan llofuecana jaide. Llote:

—Omoi jeacinona fañonocaida, Jusiñamui dibeimo omoi comeciaia iuai meido. Iemona Jusiñamui omoi jeacinona feitaite. Omoi comeci iuai omoi meidoia, comini iena uiñollena, mai omoi bautizallomoi.

⁴ Isaías micori ie rabemo naimiena jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite. Naimie jaillino atona fino.

⁵ Nana iconi oruita.

Naga aneduai diese eniruena judai.

Neicairuai joide naisona atona fino.

Naimo itaicuai illa diese eniruena oruita, daje facai illena.

⁶ Nana comini Jusiñamui naimacina jillotaiacanana uiñoitimaci”

cuete; ia naimaci comeciaina ñaite. Cai Namana ñnuana ñaite. Abina iedoñenana ñaite. Jeacino finocana jaiñenana ñaite. Cai Nama Jesús bia, Jesús uaina naimaci feiñollena, naimaci comeciaia marena finuana ñaite.

⁷ Naimacina bautizallena, ailluena comini naimie dine bitimaci. Naimacimo llouide:

—Maraiñede rafuena finocana omoi jailla jira, jaio nairaia isoidomoi. ¿Ñiese jilloitomoi? Cue dine omoi billena, ¿bu omoimo lloga? ⁸ Omoi comeciaia iuailaia meido. Omoi jeacinona fañonocai. Iemona Jusiñamui jitaillacinona fino. Mare rafuena finocana jai. Naiemona omoi comeciaia iuailaia meiduana uiñoiticaia. Ie mei bautizallomoi. Omoi comeciaina facañeno: “¿Bue ñellena o llua isoi finoiticaia? Jusiñamui Abraham micorina jaie eo raise nabaide. Abraham micori cai moo illamona, Jusiñamui ricailifuemona jilloiticaia”. Ero, omoimo lloiticue: Cue llua isoi omoi finoñenia, naimie ricailifuemona jilloñeitomoi. Abraham micori uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comuitarede. ⁹ Ero, llisiñede riaratiedomoi. Tiaa mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoina jai duere finoacade. Ie ricaillafue anamo jai itomoi. Omoi comeciaia iuai omoi meidoñenia, omoina duere finoite.

¹⁰ Iena cacajanona, comini dinena naimiemo jicanotimaci:

—Cai bautizaja mei, ¿niese iiticaí? ¿Nie isoide mare rafuena finoiticaí?

¹¹ Juan uai ote:

—Ailluena iniroiredimiedi iniroinidimie mo iniroina feca. Guilleredimiedi guillenidimie mo guillena feca.

¹² Naimacina bautizallena, gobierno ucubena oraini jiaí bitimaci. Jicanotimaci:

—Llofueraíma, cai bautizaja mei, ¿niese iiticaí? ¿Nie isoide mare rafuena finoiticaí?

¹³ Uai ote:

—Gobierno facaina omoi íbataia, cominimona gobierno llua baífemo oñeno.

¹⁴ Naimie dine billanona, soldaduai jicanotimaci:

—Cai bautizaja mei, ¿niese iiticaí? ¿Nie isoide mare rafuena finoiticaí?

Uai ote:

—Cominimona rana bairoñeno. Riicínodo rana oñeno. Tainona llogiduumona, cominimona rana oñeno. Omoi ucube illa diese feiño. Ie baífemo ucubena nicidoñeno.

¹⁵ Juan llofuiamona naie facaise cominidi Cristo bille mo ocurilla jira, “Juandi nibai Cristo” raillanona, Juanmo comeciaina facauidimaci. ¹⁶ Iena fidiano, Juan llote:

—Cristoñedicue. Jusiñamui díbeimo omoi illamona, jinui diga omoina bautizadicue. Cai baífemo faitimie bie facaise biite. Naimie cue ifomo meidoite. Jamai bue cue isoilla jira, naimiena cue canuana uiñoñedicue. Naimie mo omoi duia, naimiedi Jusiñamui Joreño omoi mo itataite. Omoi comeciái iuai omoi meidoñenia, omoina duere finoite. ¹⁷ Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, naimiedi comeciái iuaillai meidotinona ie Moo illanomo ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

¹⁸ Bie isoidicínodo cominimo ie mare rafuena llofueuide. ¹⁹ Naie facaiseconi Herodedi gobernador. Ie ama ai ote, ie aina illena. Naiñaiñodi Herodías. Diga jiaie mariñede rafuena finode. Ie muidona Juan naimiena lletade.

²⁰ Maraiñede rafuena Herodes finocana jaillamona, Juan cárcelmo jonetade.

Juandi Jesúna bautizaja rafue

(Mt 3.13-17; Mr 1.9-11)

²¹ Ailluena cominina Juan bautizaja facaise, Jesúna jiaí bautizade. Bautizaja mei, Jesúsdi ie Moo diga ñaianona, mona bojode. ²² Ieconí Jusiñamui Joreño ucugina eruaillano, naimie emodomo ana bite. Monamona Jusiñamui llote:

—Cue isiruiga Jitodio. Ori iobidicue.

Jesucristo ie usumatiai

(Mt 1.1-17)

²³ Jesús treinta años illamona, Jesús ie maijille rafue tainede. “Naimiedi José micori jito” raillano naimie mo cominidi comeciaina facadimaci. Josédi Elí micori jito. ²⁴ Elídi micori Matat micori jito. Matat micori Leví micori jito. Leví micori Melqui micori jito. Melqui micori Jana micori jito. Jana micori José micori jito. ²⁵ José micori Matatías micori jito. Matatías micori Amós micori jito. Amós micori Nahum micori jito. Nahum micori Esli micori jito. Esli micori Nagai micori jito. ²⁶ Nagai micori Maat micori jito. Maat micori Matatías micori jito. Matatías micori Semei micori jito. Semei micori José micori jito. José micori Judá micori jito. ²⁷ Judá micori Joana micori jito. Joana micori Resa micori jito. Resa micori Zorobabel micori jito. Zorobabel micori

Salatiel micori jito. Salatiel micori Neri micori jito. ²⁸ Neri micori Melqui micori jito. Melqui micori Adi micori jito. Adi micori Cosam micori jito. Cosam micori Elmodam micori jito. Elmodam micori Er micori jito. ²⁹ Er micori Josué micori jito. Josué micori Eliezer micori jito. Eliezer micori Jorim micori jito. Jorim micori Matat micori jito. Matat micori Leví micori jito. ³⁰ Leví micori Simeón micori jito. Simeón micori Judá micori jito. Judá micori José micori jito. José micori Jonam micori jito. Jonam micori Eliaquim micori jito. ³¹ Eliaquim micori Melea micori jito. Melea micori Mainán micori jito. Mainán micori Matata micori jito. Matata micori Natán micori jito. Natán micori David micori jito. ³² David micori Isaí micori jito. Isaí micori Obed micori jito. Obed micori Booz micori jito. Booz micori Salmón micori jito. Salmón micori Naasón micori jito. ³³ Naasón micori Aminadab micori jito. Aminadab micori Aram micori jito. Aram micori Esrom micori jito. Esrom micori Fares micori jito. Fares micori Judá micori jito. ³⁴ Judá micori Jacob micori jito. Jacob micori Isaac micori jito. Isaac micori Abraham micori jito. Abraham micori Taré micori jito. Taré micori Nacor micori jito. ³⁵ Nacor micori Serug micori jito. Serug micori Ragau micori jito. Ragau micori Peleg micori jito. Peleg micori Heber micori jito. Heber micori Sala micori jito. ³⁶ Sala micori Cainán micori jito. Cainán micori Arfaxad micori jito. Arfaxad micori Sem micori jito. Sem micori Noé micori jito. Noé micori Lamec micori jito. ³⁷ Lamec micori Musalén micori jito. Musalén micori Enoc micori jito. Enoc micori Jared micori jito. Jared micori Mahalaleel micori jito. Mahalaleel micori Cainán micori jito. ³⁸ Cainán micori Enós micori jito. Enós micori Set micori jito. Set micori Adán micori jito. Adándi Jusiñamui comuitagamie.

4

Taife ramo Jesús faia rafue (Mt 4.1-11; Mr 1.12-13)

¹ Jusiñamui Joreño anamo Jesús illamona, Jordán railla illemona Jesús jailano, jofue iñenanomo Jusiñamui Joreño naimiena orede. ² Nainomo cuarenta digarui Taifedi naimiena ramo faite. Naie facaiseconi Jesús jaca guiñede. Naie facaise fuilla mei, guiñeno illamona, naimie aimetaite. ³ Jesús aimetaillana Taife uiñuamona, naimiemo llote:

—Jusiñamui Jitodiodena, naimiemo llono: “Ore Moo, bie noficina llomeniconajaita”.

⁴ Jesús uai ote:

—Iena lloñeticue. Jusiñamui facaina lloraima micori iena jaie cuega: “Jiaie rafuedi llomenico guilla baifemo faite”.

⁵ Ie mei a ite anedumo Taife Jesúsna uillano, dallu illanona, naimiemo nana nairaiaina acatate. ⁶⁻⁷ Llote:

—Nana bie nairaiái cue anamo ite. Iena cue iacagamie itataredicue. Cueno o sedajamona, iobillacinona cuemo o fecaia, nana bie nairaiái omo fecaiticue. Bie nairaiái illaimana jaitio.

⁸ Jesús uai ote:

—Dama ite. Ona sedañeticue. Moisés micori jaie cuega: “Cai Nama Jusiñamuina seda. Dama naimiemo iobillacinona feca”.

⁹ Ie mei Jerusalémo Jusiñamui jofu muidomo Taife Jesúsna uite. Raite:

—Jusiñamui Jitodiodena, eniruemo mai ana uai. ¹⁰⁻¹¹ David micori ona jaie cuega:

Ona eenollena Jusiñamuidi ie jaienisaimo lloite.

Eniruemo o uaiñellena, o abi bofedaiñellena, ona feiñoitimaci

cuega. Naimie lloga uai suillena, bie jofu muidomona mai ana uai. Naimie ie lloga uaina finorede; ia iena cue uinollena, mai ana uai.

¹² Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uinotiecue. Jamai ebena naimiena facaciñeiticue. O lluaña finoñeiticue.

¹³ Taife naimiena ramo faia mei, naimiemona ie jitaille dinori oni jaide.

Galileamo Jesús ie rafue llole jillaci

(Mt 4.12-17; Mr 1.14-15)

¹⁴ Jusiñamui Joreño naimiemo illamona, Galileamo Jesús abido jaide. Nana naie eniruemo naimie mameci soride. ¹⁵ Ailluena judiuaí ofiracuaimo naimie llofueuide. Iena cacajanona, comini: “Naimie llofuiacino mare” raitimaci.

Nazaretmo Jesús illa rafue

(Mt 13.53-58; Mr 6.1-6)

¹⁶ Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofiracomo jaide. Jaie cuegafuiaina ado facallena, naimie a naidadate. ¹⁷ Naie lloraco nama mullaimadi Isaías micori jaie cuegafuiaí jai ferinoga rabe naimiemo fecade. Iena oni suiñocaida, bie rafuena baillanona facade:

¹⁸⁻¹⁹ Jusiñamui Joreño cuemo ite.

Dueredinomo mare rafuena lloleña, cuena fetode.

Taife anamo ailluena comini illa jira, Jusiñamui naimacina jillotaiacana uinonhedimaci.

Jusiñamui rafuena ailluena comini uinonñena jira, naimie illanomo rillena uinonhedimaci.

Jecino anamo naimaci illa jira, Jusiñamui naimacina jillotaiacana uinonhedimaci.

Naimie naimacina duenallana birui uinuana jitaide.

Naimacimo mare rafue lloleña, cuena jai oretate.

²⁰ Naie rafue facaja fuillamona, cuegafuiaí abido fecade. Naimacina llofueuella, dane ana raide. Nana nainomo ite comini naimiemo eo eruaidimaci.

²¹ Iemei naimie naimacina llofue. Raite:

—Omoi como cacaja cuegafuiaí omoi motomo jai suide. Cuena ñaite.

²² Naimie lluaña comini cacajano, coninina raitimaci:

—Naimie fue mare. Naimie marena llofue. —Iemona rajicaillamona, coniniri raitimaci—, Naimiedi jamai José jito. ¿Ñiese naie rafue birui suide?

²³ Iena uinuamona, Jesús dinena llote:

—Cue lluaña inonñedomoi. Comeciaina facadomoi: “Capernaumo naimie siño finoca rafuena fididicai. Siño rafuena cai motomo naimie jiaí finoi, naimiena inoiticai. ‘Ua médico duia, ie abina dama jillotarede’ cai einamací raisoidimaci. Ie isoide. Naimie llua isoi naimie ia, siño rafue cai motomo finorede” comeciaina facadomoi. ²⁴ Uanaicinona omomoi lloiticue. Naimie comini nairaimo Jusiñamui facaina lloraíma ia, ie comini naimie uaina feiñoiacasiñede. Iena jamasite. Ie isoide. Cue nairaimo cue illa jira, cue uaina inonñedomoi. ²⁵ Jaie ie isoide. Elías facaiseconi daje amani años abimo atomonado noci deiñede. Aime guitimaci. Naie facaiseconi bie eniruemo cai comini dine ailluena feciñuai itimaci; iadedi omoi jaiagai Jusiñamui uaina inonñedomoi. ²⁶ Jusiñamuidi Eliana cai comini dine oreñede; iadedi jiaie eniruemo ite feciño dine naimiena orede. Sarepta railla nairaimo orede. Sidón railla eniruemo naie nairai ite. Cai cominiñede feciñomo orede. ²⁷ Jiaie rafuena lloiticue. Eliseo micoridi Jusiñamui facaina jaie llote. Eliseo micorí facaiseconi bie eniruemo diga efonaitino ite; iadedi naimacimona Jusiñamui

buna jillotañede. Omoi jaiagai Jusiñamui uaina ñinoñena jira, Eliseo micori duidinona jillotañede. Naie facaiseconi dama Naamán micorina jillotate. Cai cominimo naimie duiñede; ia Siria railla eniruemo duide. Ie isoidomoi. Cue uaina ñinoiacaiñedomoi—llote.

²⁸ Jesús llwana cacajano, naie ofiracomo itino eo iciritimaci. ²⁹ Naidacaillano, naimiena jino uitimaci. Naie illanodi iconimo ite. Nainomo naimiena uillanona, iconimona naimiena ana dotaacadimaci. ³⁰ Naimiena meineiacadimaci; iadedi naimaci motomo naimie jaillanona, naimacimona naimie jillobillano oni jaide.

Jesúdi Janaba anamo itimie jillotaja rafue
(Mr 1.21-28)

³¹ Jesús Capernaumo jaide, Galilea railla eniruemo ite. Nainomo naimie ia, sábadoruimo judíuai ofiracomo jaide. Nainomo llofue. ³² Illaima uai isoi naimie llofuia jira, nainomo ite comini naimie llofuiamona rajicaidimaci. ³³ Janaba anamo illamie nainomo ite. Jesús llofuiana cacaita, Janabadi ñimana ado cuirioitate:

³⁴ —Odi Nazaret ie Jesús. ¿Bue ñeiacadio cai diga? Caina duere finuaibidio. Ona uiñoticue. Odi Jusiñamui ie Mare Fetocamedio.

³⁵ Jesús naimiena lletade:

—Llicai. Naimiemona oni jai. —Iena cacajanona, naimaci motomo Janaba ñimana ana dotade; ia naimiedi bofedaiñede. Ie mei Janaba naimiemona oni jaide. ³⁶ Iena ciuanona, nana nainomo itino rajicaidimaci. Coniniri siadotimaci:

—¿Ñie isoide Jesús uai? Janabamo naimie llua mei, ñimamona Janabadi oni jaide.

³⁷ Jesús finoca rafue muidona, naimie mamecidi nana naie eniruemo soride.

Jesúdi Simón Pedro jifaiñona jillotaja rafue
(Mt 8.14-15; Mr 1.29-31)

³⁸ Ofiracomona Jesús jaillanona, Simón Pedro jofomo jaide. Ie facaise Simón jifaiño duide. Abina cuaride. Naiñaiño jilloitallena, nainomo itino Jesúmo jicanote. ³⁹ Naiñaiño dine Jesús jaillanona, ie uai lluanona, naie duicodi oni jaide. Ieconí naiñaiño jillode. Abi cuariñede. Naidacaillanona, guille finuanona, ie jofomo itinona ecade.

Jesúdi ailluena duidinona jillotaja rafue
(Mt 8.16-17; Mr 1.32-34)

⁴⁰ Nairuido jitoma ana itemo, comini ailluena duidinona Jesús dine atidimaci. Diga duicuai illanona atidimaci. Naimacina jetajamona, naimacina jillotate. ⁴¹ Jananiaina jiai oni oretajano, jananiai dinena raite:

—Odi Jusiñamui Jitodio. —Naimiena naimaci uiñua jira, Jesús naimaci ñaiana rairuide. Naimiedi Jusiñamui Jitona uiñotimaci.

Judeamo Jesús llofuia rafue
(Mr 1.35-39)

⁴² Ie areruido jitiramo jofue ñenenamo Jesús jaide; iadedi comini naimiena jenuaidimaci. Baillanona, naimaci motomona naimie jaiñellena jicanotimaci.

⁴³ Naimacimo llote:

—Jiaie nairaimo cue mare rafuena lloiacadicue. Naimie anamo comini illana Jusiñamui jitailla jira, naimacimo iena lloiacadicue. Ie mare rafuena lloillena, Jusiñamui cuena orede. Oni jaiticue. Omoi diga fiebiñeiticue.

⁴⁴ Ie mei Judeamo ite ofiracuaimo Jesús llocana jaide.

5

Jesús muidona, naimaci ailluena lliciaina ua rafue
(Mt 4.18-22; Mr 1.16-20)

¹ Jiairuido Genesaret railla jorai fuemo Jesús ia, ailluena comini naimie dine bitimaci. Ie rafue raise cacaillena, conini oni ñuicocana naimie ecimo bitimaci. ² Ie facaise jorai fuemo Jesús mena sijide botena ciode. Naimaci lloijina naimaci jocua jira, naie botemo lloiji fairaini iñede. ³ Comini ie llofuacinona raise cacaillena, Jesús daje botemo jaide. Naie bote namadi Simón Pedro. Naie bote joraimo janore bai ñuitallena Simómo jicanote. Botemo ana raíta, botemona cominina llofujete. ⁴ Llofua mei, Simómo llote:

—Aforedinomo jai. Nainomo omoi lloijina faino.

⁵ Simón uai ote:

—Maestro, cue nabaiñiai diga namona naio lloiji faiticai; iadedi jaca buena oñedicai. ¿Ñiese ja oiticai? Iadedi o llua jira, lloijina faiticue.

⁶ Iena naimaci faia mei, ailluena lliciaina jitatimaci. Ie jira naimaci lloiji cuaranoiacade. ⁷ Iena ciuano, onolli diga imaci nabaiñiaina uaidote, naimiena naimaci canollena. Naimaci canuaibilla mei, lliciaina naga bote oruitate. Eo oruilla jira, buiacade. ⁸ Iena ciuano, Simón Pedro Jesús mo iobillacino fecallena, caiñici ifodo rainadate. Raite:

—Odi siño Jitodio; ia cue jamai bue isoilla jira, cuemona oni jai. Jeacinona finouidimiedicue.

⁹ Ailluena lliciaina naimaci ua jira, naimaci rajicaillamona, iena naimie llote. ¹⁰ Naimie nabaiñiaimona Zebedeo jito iaiaiaia ite. Juan diga Jacobo iaiaiaia. Simómo Jesús llote:

—Cuena jaciruiño. Lliciaina birui ocabitomoi; iadedi cue dibeimo naimaci illena, biruimona cominina oitomoi.

¹¹ Eniruemo sijiano, naimaci raruiaia fainonocaida, Jesús diga jaidimaci.

Jesúdi efonaitimiena jillotaja rafue
(Mt 8.1-4; Mr 1.40-45)

¹² Jiairuido Jesúsdi jiaie nairaimo ia, efonaitimie naimie dine bite. Naimie eo fodo jaide. Jesúsna naimie ciuano, naimiena raise uaiduamona, ana bitadate. Llote:

—Maestro, o jitaiaidedi, cuena jillotaredio.

¹³ Jesús ie onolli oni ñuitajanona, naimiena jetade. Raite:

—Ona jillotaiacadicue. Mai o jillo. —Iecon jillode.

¹⁴ Jesús naimiemo llote:

—Omo suide rafue jaca bumo lloñoeno; iadedi Jerusalémo Jusiñamui jofomo Jusiñamui diga ñairaímamo o abina acatajai. O jillua jira, Jusiñamui mo Moisés micorí jaie lloga rana feca Iemona comini o jilluana uiñoitimaci.

¹⁵ Iese Jesús naimiemo llote; iadedi Jesús finoca rafue llocana eo uite. Ie muidona naimie llua cacaillena, duidinona Jesús jillotallena, ailluena comini naimie dine bitimaci. ¹⁶ Bitimaci; iadedi Jusiñamui diga ñaillena, jofue iñenanomo Jesús jaide.

Jesúdi tsitaitimiena jillotaja rafue
(Mt 9.1-8; Mr 2.1-12)

¹⁷ Jiairuido naimie llofueia, diga comini naimie illa jofomo bitimaci. Fariseuai railla comini bitimaci. Moisés micorí llogacinuaina llofueraini bitimaci. Galileamona diga nairaímoma bitimaci. Judeamona bitimaci. Jerusalémona bitimaci. Jusiñamui uaido Jesús naimie dine bite duidinona jillotate. ¹⁸ Ie facaise ie biramo bide tsitaitimiena Jesús dine damierie atidimaci; ¹⁹ iadedi naimaci uillifo iñena jira, ailluena comini illa jira,

riñedimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econocaida ifodo naimiena ie bïramo bïde diga, comini motomo Jesús ecimo ana ñuitadimaci. ²⁰ Iena Jesús cïuanona, tisitaitimie jilluana naimaci ñnuana Jesús uiñote. Tisitaitimie mo llote:

—Jadi, o jeacinona cue feitaja jira, iena oni jai dotadicue. Ie facai ibana jai oñeiticue.

²¹ Nainomo itinomona Moisés micori llogacinona llofueraini itimaci. Fariseuai jiai itimaci. Comeciaina facadimaci: “Naimie Jusiñamuina jeare ñaite. Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade”. ²² Naimaci comeciaina facajacinona Jesús uiñuanona, naimacimo jïcanote:

—¿Bue ñellena omoi comeciaina iese facadomoi? ²³ Bimiemo: “O jeacinona jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona macari” cue lloia, cue uai siñonana uiñoitomoi. ²⁴ Monamona jaie cue billanona, ñmana jaidicue. Ie jira jeacino oni dotaja uai cuemo ite. Iena omoi uiñollena, tisitaitimie mo lloiticue: “Mai naidacai. O bïra ferianona, o jofomo mai jai”.

²⁵ Iese naimie raillamona, tisitaitimie jillode. Ieconï naimaci motomo naimie naidaide. Ie bïra feriano, Jusiñamuimo iobillacino fecajano, ie jofomo jaide. ²⁶ Nana naiena cïodino eo raijicaidimaci. Iemonna Jusiñamuimo iobillacinona fecadimaci. Eo raijicaillamona, raitimaci:

—Bie isoide siño comena jaca cïoiñedicai.

Jesúdi Levína fetua rafue

(Mt 9.9-13; Mr 2.13-17)

²⁷ Jesús jino macarillano, gobierno facaina ucube oraimana cïode. Naimie mameci Leví. Ie ucubena ouillanomo raide. Jesús naimie mo llote:

—Cue llofuegamiena o jaillena, cue diga bi.

²⁸ Naidacaida, Jesús diga jaillanona, ie maiñiana fainonocai. ²⁹ Nailli ie jofomo Leví aillue rafuena finode, Jesús iena. Diga ucube oraini guisaibitimaci. Diga jiaie comini jiai guisaibitimaci. Jesús diga danomo guitimaci. ³⁰ Nainomo fariseuai cominidi, Moisés micori llogacino llofueraini diga, jamai bitimaci. Jesúsna cïuanona, ie llofueoicaiganomo jïcanotimaci:

—¿Bue ñelli ucube oraini diga guitomoi? Maraiñede comini diga guitomoi.

Moisés micori llogacinodo ucube oraini raise jaiñenamona, naie isoidino diga fariseuai comini nabairiñena jira, iese jïcanotimaci. ³¹ Jesús iena cacajano, llote:

—Ecairedino médiconna jitañedimaci; iadedi duidinodi médiconna jitaïdimaci.

³² Jusiñamui dibeimo mareuidinona uaibñedicue; iadedi maraiñedinona uaibiticue.

Jesúmo comini guiñenana jïcanua rafue

(Mt 9.14-17; Mr 2.18-22)

³³ Naie facaise fariseuai dinena Jesúsno llote:

—Cai einamacï llua isoi, Jusiñamuina cai raise iobitallena, guiñenaruillai illa facaiseconï guiñedicai. Jusiñamuimo jïcabidicai. Cai jeacino facaina sunaicabiticai. Cai einamacï rafuedo Juan Bautista llofueoicaigano jaidimaci. Cai llofuegano iedo jiai jaidimaci; iadedi o llofueoicaigano jaca guitimaci. ¿Bue ñellena cai einamacï rafuedo jaiñedimaci?

³⁴ Jesús uai ote:

—Jiaie rafuedo iena lloiticue. Coniruedi ie aina uarui ia iobilla jira, ie nabaiñiaï sunaiñedimaci. Iobillamona guitimaci. ³⁵ Jiaïruido jai aïreiacade

conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci. ³⁶ Jiaie rafuedo iena lloiticue: Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiño cíoite. ³⁷ Jacagomona finoca bolsa como finoca vino joneñega. Jonegadena, mairiñena jira, sirillamona igo raire cuararite. Vino faifite. Igoi jiai faifite. ³⁸ Como finoca vino comogomo jonelle. Iemei iena faifiñeite. ³⁹ Navui finoca vino jirua mei: “Navui finoca vino nia mare” raillamona, como finoca vino buna jiroacaiñede. Ie isoide. Omoi einamací rafue ifomo jiaie rafue birui ite. Iena omoimo llocabiticue. Iedo jaidicai; ia omoi einamací rafuemo omoi fibilla jira, jiaie rafuedo birui jaiacaiñedomoi —llote.

6

Sábadoruimo Jesús llofueoicaigano maijia rafue (Mt 12.1-8; Mr 2.23-28)

¹ Jiairuido sábadoruimo Jesús, ie llofueoicaigano diga, trigo illa illi motodo joide naisonaa jaide. Ie llofueoicaigano trigona tijiano, golluano, guicana jaidimaci. ² Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Caimona jeacinona jai finodimaci.

³ Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga Jusiñamui jofomo fo jaide. ⁴ Jusiñamuimo fecaca llomeniconaa uanona, guitimaci. Jamai bue isoidino naie llomeniconaa guillana Jusiñamui rairuide. Dani Jusiñamui diga ñairaini iena guiredimaci. David micori iena guite; ia Jusiñamui naimacina duere finoñede. ⁵ Monamona cue billamona, imana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiai rairuiredicue. Ie jira nairuimo cue jitailla rafuena finoredicue.

Jesúdi onollina idisarodimienna jillotaja rafue (Mt 12.9-14; Mr 3.1-6)

⁶ Jiaie sábadoruimo judíuai ofiracomo Jesús jaillanona, llofuate. Ie facaise nainomo nabellimo idisarodimie ite. ⁷ Moisés micori llogacinona llofueraini, fariseuai diga, Jesúmo eruaidimaci, sábadoruimo Jesús naimienna raabaca ie segoitai. Iena Jesús finoia, naimacimona sábadoruimo naimie jai maijia jira, naimienna llogidoiacadimaci. Naimacimona sábadoruimo bu maijia, jeacinona finode. ⁸ Naimaci comeciaina facajacinona Jesús uiñuamona, onollina idisarodimiemo llote:

—Cue ecimo naidada. —Iemei Jesús ecimo naidadate.

⁹ Jesús nainomo itinomo jicanote:

—¿Nie isoide rafue sábadoruimo finuadena mare? Bimie birui cue jillotaiadedi, birui mare rafuena finodicue. Cuenaa birui omoi meineiadedi, birui marañede rafue finodomoí. Sábadoruimo ¿nie isoide rafue finuana rairuidomoí?

¹⁰ Naimacimo eruailanona, duidimiemo llote:

—O onolli mai oni ñuita. —Iena ñuitajanona jillode. ¹¹ Nainomo itino iena ciuanona, eo iciritimaci.

—¿Niese Jesúsna nibaiticai? —naiemona coniniri siadotimaci.

*Jesúdi ie doce llofueoicaiganona fetua rafue
(Mt 10.1-4; Mr 3.13-19)*

¹² Nairui aneduaimo Jesús jaide, Jusiñamui diga ñaillena. Namona naio jiiide. ¹³ Monaidemo, ie llofueganona naimie dine uaidote. Naimacimona doce digamiēna fetode. Naimie diga icabillena, naimacina naimie facaina llorainina naimaci jaillena, naimacina fetode. ¹⁴ Iese mameciredimaci: Simón; naimie mameci jiaicidi Jesús jitaca Pedrona. Andrés; naimiedi Pedro ama. Jacobo, Juan, Felipe, Bartolomé, ¹⁵ Mateo, Tomás, jiaie Jacobo; naimiedi Alfeo jito. Jiaie Simóna fetode. Naimiedi cananista comini facaisemo duide. ¹⁶ Judas; naimiedi Jacobo jito. Judas Iscariote micori; naimiedi Jesúsna gaitatimie.

*Jesúdi ailluena cominina llofua rafue
(Mt 4.23-25)*

¹⁷ Aneduaimona siniaidinomo ie doce llofueoicaigano diga Jesús bite. Ie jiaie llofuegano naimie dine bitimaci. Ailluena jiaie comini bitimaci. Nana Judeamona bitimaci. Jerusalémona bitimaci. Tiromona bitimaci. Sidómona bitimaci. Tiro monailai fuemo ite. Sidón monailai fuemo jiai ite. Naimie lluomo cacareillena bitimaci. Naimaci duicomona jiai jilloiacadimaci. ¹⁸ Jananiai anamo itinomona Jesús jananiaina oni orede. ¹⁹ Nana comini naimiēna jetaacadimaci. Naimiemo siño uai illa jira, naimiēna jetajamona, naimaci duicomona jillodimaci.

*Jesús lloga rafue
(Mt 5.1-12)*

²⁰ Ie llofueganomo eruaillanona, Jesús llote:

—Naimie anamo omoi jai illamona, Jusiñamui omoina sedaacana rafuena omoina llofueiticue. Naimiēna jitaidomoina, omoina sedaite. Comeciaina facadomoi: “Jusiñamui jitaillacinona dani finonidicai; ia Jusiñamui caina canuamona, iena finoiticaí”. Naimie comini omoi illamona, naimie omoina canoite. Iemona caimare iitomoi. ²¹ Naimie jitaillacino omoi finuamona, Jusiñamui omoina sedaite. Naimiedi mare rafuena omoi finuana canoite. Iemona caimare iitomoi. Omoi sunaia, Jusiñamui omoina sedaite. Ailluena comini jeacino finocana jaidimaci. Iena uiñuamona, sunaitomoi. Naie isoidino omoi illamona, Jusiñamui omoi comeciaina ocuiñotaite. Iemona iocire iitomoi. ²² Cuemo omoi duia, duere sefuitomoi. Jiaie comini omoina enoitimaci. Omoina oni dotaitimaci. Omoina jeare ñaitimaci. Cuemo omoi duilla jira, omoina jamaitimaci; ia Jusiñamui omoina caimare itataite. ²³ Omoi isoi omoi jaiagaimona Jusiñamui facaina lloraini micoriai jaie duere sefuidimaci. Iena omoi uiñuamona, monamo Jusiñamuimona ailluena ibana ico omoi feiñua jira, birui omoi duere sefuia, iocire omoi jai. ²⁴ Iese iitomoi; ia Jusiñamuina jitañedino ico duere sefuitimaci. Comeciaina facadimaci: “Jusiñamuina jitañedicaí. Marena birui iticai. Nana cai comeciai jitaillacino birui caimo ite”. Iese birui itimaci; ia Jusiñamui naimacina ico duere finoite. ²⁵ Jusiñamuimona buena birui jitañedino ico duere sefuitimaci. “Nana cai comeciai jitailla rafue caimo birui illa jira, Jusiñamuimona buena jitañedicaí” raitimaci. Iese birui itimaci, ia Jusiñamui naimacina ico duere finuamona, buenitimaci. “Cai comeciaina iocire itatallena, Jusiñamuina jitañedicaí” damerie birui raitimaci. Naimaci jeacino facaina sunañedimaci. Birui ite rafuena ebiruitimaci. Iese birui itimaci; ia Jusiñamui naimacina ico duere finuamona, sunaitimaci. Eeitimaci. ²⁶ Naimaciri iobillamona, omoi jaiagaidi Jusiñamui facaina llorainina abi caitadinona marena ñaitimaci. Damerie birui daje isoidimaci. Jusiñamuina iobitaiacañedimaci; ia cominina

iobitaiacadimaci. Iemona comini naimacina marena ñaitimaci; ia Jusiñamui naimacina ico duere finoite.

Jesúdi iba oñenana llua rafue

(Mt 5.38-48; 7.12)

²⁷ Jesús llote:

—Cue lluaana cacajamona, iena ñino. ñnuamona omoína enoidinona isirui. Naimacina cano. ²⁸ Omoí jeare ñaitinona marena ñaino. Omoína jeare finodino facaina Jusiñamuimo omoí jii. ²⁹ Omoí cacaina bu dutaiade, iba oñeno; iadedi enefebeimo dobaida, enefebeimo jiai dutallena. Omoí ñiroina bu bairoiaciona, omoímo naimie nia jicañenia, naimie jitailla ñiroi baifemo naimiemo feca. ³⁰ Omoímo ite rana bu jicaia, iena caidiñeno feca. Omoímona rana bu bairoia, iena abido jicañeno. ³¹ Jusiñamui jitaillacinona omoí ñnuamona, jiaie cominina marena fino. Jiaie comini omoína ñnuana omoí jitailla isoi, naimacina fino. Naimaci omoína marena ñnuana omoí jitaia, naimacina marena fino. Naimaci omoína maraiñeno ñnuana omoí jitaia, naimacina ie isoi maraiñeno fino. O finoacaga ra isoi jiaie cominimo fino. ³² Naimie cominina omoí illamona, nana comini daje isoi isirui. Omoína isiruitinona omoí isirua, mare; iadedi omoína gaiñenanona omoí isiruiñenia, Jusiñamui omoína: “Mare” raiñeite. Maraiñede rafuena finoraini naimacina isiruitinona isiruitimaci. Nana cominina omoí isiruiñenia, maraiñede rafuena finoraini baifemo faiñedomoi. Naimaci isoi itomoi. ³³ Naimie cominina omoí illamona, nana comini daje isoi cano. Omoína canodinona omoí canoia, mare; iadedi omoína canoñedinona omoí canoñenia, Jusiñamui omoína: “Mare” raiñeite. Maraiñede rafuena finoraini naimacina canodinona canodimaci. Nana cominina omoí canoñenia, maraiñede rafuena finoraini baifemo faiñedomoi. Naimaci isoi itomoi. ³⁴ Naimie cominina omoí illamona, nana cominimo daje isoi rana feca. Omoímo ra fecadinomo rana omoí fecajia, mare; iadedi omoímo rana fecañedinomo rana omoí fecañenia, Jusiñamui omoína: “Mare” raiñeite. Maraiñede rafuena finoraini naimacimo rana fecadinomo rana jiai fecadimaci. Nana cominimo rana omoí fecañenia, maraiñede rafuena finoraini baifemo faiñedomoi. Naimaci isoi itomoi. ³⁵⁻³⁶ Omoína gaiñedinona isirui. Naimacimo mare rafuena fino. Naimacimo rana jamai feca. Naimacimona iba uamo ocuriñeno; ia Jusiñamui omoí raise ibaite. Jusiñamui maraiñedinona canocabide. Naimieri iobiñedimaci; ia naimacina canocabide. Naimacina duenaicabite. Ie jira maraiñedinona omoí duenai. Naimie isoi omoí illamona, maraiñedinodi naimie cominina omoí illana uiñoitimaci. Jusiñamuidi cominina duenaila isoi, cominina omoí jiai duenai.

Jesúdi jiaie cominina mameriñenana llua rafue

(Mt 7.1-5)

³⁷ Jesús llote:

—Duenaillacinona nia llofueiacadicue. Jiaie cominina mameriñeno. Jiaie cominina omoí mameria, omoímo ite maraiñede rafue facaina Jusiñamui omoína duere finoite. Omoímo maraiñede rafuena bu finoia, iena feita. Iena omoí feitañenia, Jusiñamui omoímo ite maraiñede rafuena feitañeite. ³⁸ Jiaie rafuedo iena lloiticue. Rana omoí fecaia, iena raise omoí gaieia, ico ibana omoí oia, raise gaiecana feiñoitomoi. Ie isoide. Jiaínomo maraiñede rafuena finoñeno; ia naimacina duenaillamona, naimacimo rana jamai feca. Iena raise feca. O fecaja diese Jusiñamuimona eo raise ibana feiñoitomoi.

³⁹ Naimacina iena nia llofuiamona, naimacimo Jesús jiaie rafuena llote:

—Cue cominina omoí illamona, bie rafuena cacarei. Uanaicínodo omoí jaiñenia, uisínidimie isoi iitomoi. Uisínidimie jiaie uisínidimiena ifonide.

Ifo iade, nagamaiaí dafomo uaidiaímaiaí. ⁴⁰ Fueotimie ie llofueraíma baifemo uaiñede; iadedí naimie raise fueoia, ie llofueraíma isoi jaite. Raise fueollena, cue uaimo cacarei. ⁴¹ Omoí ecimo itimie mo janore maraiñedicino illana omoí uiñoia, iemo comecina facañeno; iadedí omoímo ailluena ite maraiñedicinomo nano omoí comecina faca. ⁴² Omoímo maraiñedicino illamona, ¿niese omoí ecimo itimiena mameritomoí? Omoímo ite maraiñedicinomo omoí comecina facaacañena jira, maredinona abi caitadinodomoí. Omoí comeciaina nano raise fino. Iemeí omoí ecimo itimiena canorenitomoí. Naimie comecina raise canorenitomoí.

Jesúdi riará llisilla lilla llua rafue
(Mt 7.17-20; 12.34-35)

⁴³ Jesús nia llofuate:

—Mare riará maraiñede riará isoi llisiñede. Maraiñede riará mare riará isoi jiaí llisiñede. ⁴⁴ Llisillamona nie isoide riará illana uiñoticaí. Amena ie llisilla llillamona amena marena uiñoga. Llillamona, amena maraiñenana jiaí uiñoga. Eecuaímona uvas railla riarana oñedicaí. Monaigímona higos railla riarana jiaí oñedicaí. ⁴⁵ Ie isoide. Naimaci comeciámo iticinomona comini ñaitimaci. Mare comeci iticinomona maremiedi mare rafuena finocabide. Maraiñede comeci iticinomona maraiñedimie maraiñede rafuena finocabide.

Jesúdi naimiena ñnuana ñaia rafue
(Mt 7.24-27)

⁴⁶ Jesús nia llofuate:

—Omoímona damierie cuena: “Cai Nama” raitomoí; iadedí cue llogacinona finoñedomoí. ⁴⁷ Diga comini cue dine bitimaci. Cue uaina cacadimaci. ⁴⁸ Cue uaina ñnotimie jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite. Noci deidemo, eo jinuidemo, jofomo ille toia, jofo raise finua jira, jofo goiñede. Iena faifiñede. Ie isoide. Cue llua ñnotimie faifiñeite. ⁴⁹ Cue uaina ñnoñedimie jofona raise finoñedimie isoide. Jofona raise finoñedimiedi ie jofona finodemo, enirue emodomo iena finode. Ana raiñede. Noci deidemo, eo jinuidemo, jofomo ille toia, jofo goillamona, jai eo judaisite. Iena faifide. Ie isoide. Cue llua ñnoñedimie faifite —llote.

7

Jesúdi capitán mullaímana jillotaja rafue
(Mt 8.5-13)

¹ Ie llua fuillamona, Jesús Capernaumo jaide. ² Nainomo romanos railla nairaimo duide illaíma ite. Cien soldaduaina sedauide. Naimiedi capitán. Judíuñedimie. Ie mullaíma eo duide. Niade fiadaiacade. Capitán naimiena eo gaide. ³ Capernaumo Jesús illana capitán fidiano, Jesús dine judíuai einamacina orede. Naimie dine Jesús billena jitaide. Ie mullaímana jillotaja billena jitaide. ⁴ Jesús dine naimaci rillano, capitán dine naimie billena, naimie mo duere jicanotimaci. Raitimaci:

—Naimiedi caímona maremiena jira, naimiena o canuana jitaídicaí. ⁵ Cai nairaina isiruite. Ie ucube diga cai ofiracona finotate.

⁶ Iena cacajamona, Jesús naimaci diga jaide. Capitán jofomo iaírei Jesús ria, capitádi Jesús dine ie nabaiñaína orede, Jesúmo lollena:

—Maestro, biñeno. Jamai bue cue isoilla jira, cue jofomo biñeno. ⁷ Jamai bue cue isoilla jira, o dine jiaí jaiñedicue. O illanomona o uaido cue mullaíma jilloita. ⁸ Jiaíe illaicomini anamo iticue. Naimaci lloga uaina ñnoticue. Cue anamo jiaíe soldaduai illanona, cue uaina ñnotimaci. Cue anamo cue

mullaïma illa jira, naimiedi cue uaina ñnote. O anamo naie duico illa jira, o uaina bene o lloia, cue mullaïma jilloite.

⁹ Iena cacajano, Jesús rajicaide. Oni dobaidajano, naimie diga jaidinomo llote:

—Bie isoidimie cue uaina ñnotimiena jaca baiñedicue. Cai judíuai cominimona bie isoidimiena jaca ñede. Mai abido jai.

¹⁰ Capitámona bitino abido capitán jofomo rillano, mullaïma jai jilluana cioidimaci.

Jesúdi feciño jitona jillotaja rafue

¹¹ Jiairuido Naín raila nairaimo Jesús jaide. Ie llofueoicaigano jiai jaidimaci. Ailluena comini jiai jaidimaci. ¹² Naie nairai ie nasemo naimie iaireicaia, jai fioidaitimiena comini jino atiana ciode. Naie fioidaitimiedi conirue. Ie eidi feciño. Dajede ie jitodi jai fioidaite. Ailluena Naín itino naie feciño diga jaidimaci. ¹³ Jesús naiñaiñona ciuanona, naiñaiñona duenaite. Naiñaiñona raite:

—Mai eeño.

¹⁴ Fioidaitimie dine Jesús jaillanona, naimaci ieconi naidadallena, ie uiga rana jetade. Naimiena uitinodi ieconi naidadatimaci. Fioidaitimie mo Jesús llote:

—Mai a rainada.

¹⁵ Iena Jesús llua mei, naie fioidaitimie ie uiga ramona a rainadate. Ie meinononi naimie ñaite. Jesús naimiena ie eimo abido ite. ¹⁶ Naieri nana jacinaitimaci. Jusiñamui iobillacinona fecadimaci. Raitimaci:

—Jusiñamui facaina loraïma cai motomo ite. Naimie uai eo siño. Naimiena Jusiñamui oretaja jira, Jusiñamui caina birui canoacana jira, iobidicai.

¹⁷ Nana Judeamo itino Jesús finoca rafuena fididimaci. Judea enirue fuemo ite nairaiadi jiai fididimaci.

Jesús dine Juan Bautista micori ie llofueoicaiganona oretaja rafue (Mt 11.2-19)

¹⁸ Juan Bautista micori llofueoicaiganodi nana Jesús finoca rafuena fidiano, iena naimie mo llote. Ie llofueoicaiganomona Juan micoridi menamiena uaidote. ¹⁹ Llote:

—Jofue ñenanomo navui cue ia, jiaimie billena llofuecabiticue. Jesús dine omico jai: “¿Buudio? ¿Odi Juan llofuegamiedio? ¿Jiaimie billemo nia ocuriticaí?” naimie mo jicano.

²⁰ Jesús dine iaïmaiaï rillano, Jesús mo llotiaïmaiaï:

—Juan Bautista cocona orede. Jofue ñenanomo navui naimie ia: “Jusiñamui mona damie biite” naimie llofuecabite. Juan llofuegamiena o illana uiñoiacadicaï. Imieñedi odena, jiaimie billemo nia ocuriticaï. Cocomo llono.

²¹ Jesús dine iaïmaiaï billa facaiseconi, Jesús diga isoide duicuai illanona jillotate. Jananiaï anamo itinomona jananiaïna oni jiai orede. Uisnidinona uisina dane ciotate. ²² Ie jira Jesús iaïmaiaïmo llote:

—Cue llwana cacadomico. Cue finoca rafuena ciodomico. Juan dine abido omico jaillanona, iena naimie mo llono. “Uisnidino jai cioidimaci. Ñujañujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fioidaillamona damierie jai jillodimaci. Dueredino mare rafuena jai cacadimaci”. Iese naimie mo llono. ²³ Jiai llono: “Ñibai nana cue rafuena raise cacaiñedio; ia cuena jaca nia ñnocana o jaia, caimare itio”.

²⁴ Iaïmaiaï abido jailla mei, naimie ecimo ailluena ite cominimo Jesúdi Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoiñede. Nie isoide rafue naimiemo ia, cue rafuena llocana jaide. ²⁵ ¿Bue ñellena naimie dine jaidomoi? Mare iniroina jitadimiena cioiñedomoi. Mare iniroina jitadinona omoi cioacaniadedi, illaicomini dine jaidomoi. Naimacimo ailluena ra ite. ²⁶ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira. ²⁷ Malaquíás micori naimiema jaie cuela: “Jusiñamui raite: ‘Ero, o uicodo cue rafuena llollena, damiema oretaiticue, comini comeciama marenona duiñollena’ ” cuela. Malaquíás Juan Bautistana cuete. ²⁸ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofue; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioiñede. Iemona naimie baifemo faitomoi.

²⁹ Naimacina navui Juan bautizaja jira, nainomo ite comini iema cajanoma, Jusiñamuimo iobillacinona fecadimaci. Gobierno ucube orainidi jiaie fecadimaci; ³⁰ iadedi fariseuai iobillacinona fecañedimaci. Moisés llogacinuama llofueraini jiaie fecañedimaci. Jusiñamui naimacina jillotajana naimaci jamailla jira, naimaci jeacinona Jusiñamuimo lloñena jira, Juan naimacina navui bautizañede. ³¹ Jesús llote:

—Cuena inoñedinona lloiticue: Ero, omoima ñaiticue. ³² Jifanote uruiam isoidomoi. Uruiam jifanoiacania, naimaci nabairiñaina uaiduanona, raitimaci: “Omoi diga jifanoiacadicaie; iadedi caie diga jifanoiacaiñedomoi. Caimarede rafuena caie jifanoiacania, sunailla rafuena jifanoiacadomoi. Sunailla rafuena caie jifanoiacania, caimarede rafuena jifanoiacadomoi. Coninina nabairiñedicaie” raitimaci. ³³ Ie isoidomoi. Juan jirorainide. Caimare guñede; ia naimie diga nabairiñedomoi. Naimiema gaiñedomoi. Ie jira omoimona dajerie naimiema raitimaci: “Janaba anamo naimie illamona, naimie uarico isoi ite” raitimaci. ³⁴ Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cuena jiaie gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimidio”. ³⁵ Iese raitomoi; iadedi Jusiñamuina inotinodi cue finoca rafuena marenana uñotimaci.

Jesús Simón jofomo illa rafue

³⁶ Jiairuido fariseuai cominimona, ie jofomo naimie diga guillena, damiedi Jesúsna uaidote. Naimiedi Simón. Naimie dine Jesús jaillanona, naimie diga guite. ³⁷ Jesús guitemo, daje riño fo jaide. Naiñaiñodi marañede rafuena finoraiño. Naicomo Jesús guillana fidiano, naiñaiño fo jaide. Noficimona finoca frascona atide, na soride ra illa diga. ³⁸ Judíuai aciaita jaca guisoidimaci. Jinafo dine eilli jonesuidimaci. Fo jaillano, naie riño Jesús abimo naidaide. Naiñaiño eiamona, naiñaiño uisimona uaide uillinociaie diga Jesús eillina jocode. Safenaillena, naimie eillina ie ifotie diga dote. Ie eillina jiaie llibanote. Ie mei ie eillimo frascomona soride rana totade. Naimiema naiñaiño isiruillamona, iese naiñaiño finode. ³⁹ Iema cianona, Simón dama comecina facade: “Bimie Jusiñamui facaina lloraimadena, nie isoide naimiema jetade riñona niade uñote. Naimiedi naiñaiño marañede rafuena finoraiño uñote. Iema naimie uñuamona, naiñaiño jino raie orede. Naimiedi Jusiñamui facaina lloraimañede”. ⁴⁰ Jesús naimie comecina facajacinona uñuano, naimiemo llote:

—Simón, naiñaiño finoca rafuena o raise fueollena, omo bie rafuena lloiacadicue.

Simón uai ote:

—Maestro, mai cuemo llono.

⁴¹ Jesús llote:

—Damie menamaiaimo ucubena fecade. Damie mo quinientos diga ucubena fecade. Jiaimie mo cincuenta diga ucubena fecade. ⁴² Ie iade, naiena abido meidonidiaimaia. Ie jira ucubena fecadimiedi raite: “Dama omico meidoñega. Naiena jai feitatícue”. Ero, Simón, ¿nimieca ucubena fecadimiena eo isiruite?

⁴³ Simón dinena uai ote:

—Cue comeci raite: Ailluena ucube feitaja jira, eo ailluena ucubena igamie. Jesús dinena raite:

—Raise cue uaina fairiotio.

⁴⁴ Iemei Jesúsdi riño dine dobaidajanona, Simómo llote:

—Biñaiño ja lloiticue. O jofomo bitícue; ia cuena raise nafueñedio. O nabai o dine bia, naimiena raise nafuecabitio. Ie jearede eilli jocolena, comini finocabilla isoi, jinui fecadio. Safenaillena eilli dora fecadio. Naimiena llibanotio. Ie abi caimare sorillena, janore soride ra naimie mo jonetio. Iese cuena nafueñedio; ia bie riño cuena isiruillamona, ie uillinociai diga cue eillina jocode. Ie ifotie diga dote. ⁴⁵ Naiñaiño cue ecimo fo billanona, cue eillina diga icaiño llibanote. ⁴⁶ Naiñaiño cue eillimo soride rana totade. ⁴⁷ Naiñaiño mo eo jeacino ite; ia cuena naiñaiño eo isiruillamona, nana ie jeacina jai oni dotajana uiñotícai. “Jeaicino cuemo raise iñede” comecina bu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o comecina faca.

⁴⁸ Naiñaiño mo llote:

—O jeacino jai oni dotaca. Iena jai feitatícue.

⁴⁹ Jiaino nainomo guillanona, coniniri ñaitimaci:

—Bimiedi ¿nie isoidimie? Bimie jeacino oni dotanide.

⁵⁰ Jesús dinena riño mo llote:

—Cuena o inua jira, o jeacinomona jai jillodio. Mai uri o jaillano o i.

8

Dajerie riñoia: Jesúsna canua rafue

¹ Ie facaise diga nairaimo Jesúsdi mare rafuena llocana jaide. Naimie anamo comini illana Jusiñamui jitailla jira, Jesúsdi Jusiñamui dibeimo naimaci comeciai iuaina meiduana llofue. Ie doce llofueoicaigano naimie diga jaidimaci. ² Dajerie riñoia: jiai jaidimaci. Naiñaiñoa: mona dajerie Jesús navui janania: anamona orecañaiñoa. Dajerie duicomona jilloitagañaiñoa. María Magdalena ite. Naiñaiñoa: siete diga janania: oni oretate. ³ Juana ite. Naiñaiño inidi Chuza. Herodes railla illa: ma ecimo naimie maijuide. Susana ite. Jiaie riñoia: jiai itimaci. Naiñaiñoa: ramona Jesúsna canoidimaci.

Jesúsdi trigona juda: dimiena llua rafue

(Mt 13.1-9; Mr 4.1-9)

⁴ Diga nairaia: mona ailluena comini Jesús dine billanona, naimacimo llote: —Jusiñamui omo: ina sedaacana omo: fueollena, bie rafuena lloiticue.

⁵ Damiedi trigona juda: aide. Naimie juda: amona naisomo janore idua: juide. Comini nainomo jaillano, iena saitadimaci. Bai jailla mei, sillinai: iena jiai guisa: bite. Ie jira sicoñede. ⁶ Nofie mo jiaie idua: juide. Sicode; iadedi jinui raise iñena jira, duide. ⁷ Eecua: illanomo jiaie idua: juide. Eecua: sicuamona,

riara eecuai ibaica. Ie jira llisiñede. ⁸ Mare eniruemo jiaie iduai juide. Sicode. Llisillamona danademo cien diga llisillana ote.

Bie rafuena naimie llua mei, naimacimo llote:

—Omoi jeforena jira, raise fueollena, cue lluomo cacarei. Iena ñino.

Jesús ie como lloga rafuena llofua rafue

(Mt 13.10-23; Mr 4.10-20)

⁹ Jesús ie llofueoicaigano ie como lloga rafuena jicanotimaci:

—¿Bue ñellena bie isoide rafuedo cominina llofuetio?

¹⁰ Uai ote:

—Jusiñamuidi omoina ie sedaacana rafuena jai uiñotade. Jaie iena uiñoñedomoi. Jiaie cominina iena nia uiñoñañede. Ie jira bie isoidicnodo naimacimo lloticue. Cue siño finoca rafuena ciodimaci; iadedi iena naimaci ñnoñena jira, uiñoñoeno jaidimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci.

¹¹ 'Omoina cue como lloga rafuena llofueiticue. Naie iduaidi Jusiñamui uai. ¹² Dajerie comini comeciai naisomo juide iduai isoidimaci. Jusiñamui uaina cacadimaci; ia naimaci naie uaina ñnoi raillano, naimaci naiemona jilloi raillanona, Taife naimaci comeciamo cacaja uaina ñnotañede. ¹³ Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci. Nofiemmo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefua, abido danomo uaidimaci. ¹⁴ Jiaie iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciamo itabiñede. Jusiñamui jitaille rafuena finocana jaiñedimaci. ¹⁵ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Mare jeanide comeciamona ñnocana jaidimaci. Eo lliside isoidimaci. Jusiñamui jitailla rafuena sefuiruiñoeno ñnocana jaidimaci.

Jesús ie rafue llocana jailla llua rafue

(Mr 4.21-25)

¹⁶ Jesús nia llote:

—Lamparín bu unia meinoconi, jiaie ra bide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainaca. ¹⁷ Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie ñnotimaci. Damierie ñnoñedimaci. ¹⁸ Cue lluomo raise cacarei. Iena omoi ñnuamona, Jusiñamui omoina canoite. Omoina uiñocana jaitaite. “Jusiñamui rafuena uiñoticue” raitimiedi ñnoñenia, Jusiñamui naimiena faifitaite.

Jesús dibeimo itinona ñaia rafue

(Mt 12.46-50; Mr 3.31-35)

¹⁹ Cominina Jesús nia llofua, naimie dine Jesús ei, ie amatiai diga bitimaci; ia ailluena comini illa jira, naimiemo riñedimaci. ²⁰ Nainomo itino naimiemo llote:

—O ei, o amatiai diga jino naidaidimaci. O diga ñaiacadimaci.

²¹ Jesús uai ote:

—Jusiñamui uaina cacajamona, iena ñnotino ieca cue eidi, cue amatiaidi.

*Jesúdi jorai baguana ll#caitaja rafue
(Mt 8.23-27; Mr 4.35-41)*

²² Jiairuido botemo Jesús jailla mei, ie llofueoicaiganomo llote:

—Ruica díbeimo mai cai jailli. —Ie mei jaidimaci. ²³ Naimaci jaidemo, Jesús inide. Bai jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci. ²⁴ Jesúna casitajano, naimiena raitimaci:

—Maestro, jai buisaidicai. Jai corobaisaidicai.

Naimie casillano, aifina lletade. Joraina ll#caitade. Ieconi aifi ll#caide. Bagoñede. ²⁵ Naimacimo jicanote:

—¿Bue ñellena cuena inoñedomoi? —Naimiena jacinallamona uai oñedimaci. Raijcaillamona, coniniri ñaitimaci:

—Bimiedi, ¿nie isoidimie? Aifi naimie uaina inote. Jorai naimie uaina jiai inote.

*Jesúdi Gadara railla eniruemo illa rafue
(Mt 8.28-34; Mr 5.1-20)*

²⁶ Ruica díbellemo ridemo, Gadara railla eniruemo sijidimaci. Galilea facaisemo ite. ²⁷⁻²⁹ Botemona ari Jesús jaidemo, damie Jesús dine bite. Naie nairai imie. Janaba anamo illamie. Taimiena jai jaicaisoide. Jofomo naimie irainide; ia comini raioillanomo nofie moto ifuaimo i-isoide. Ebena cominina naimie faei raillanona, lloeo diga ie onollidi maiga. Ie eilli jiai maiga; iadedi lloeo oni ticonote. Ie mei jofue iñenanomo Janaba naimiena jaitate. Iese suisoide.

Jesúna naimie cianona, cuirioide. Jesús ecimo uaide. Janaba naimiena ado llotatate:

—Jesús, nanoca Jusiñamui Jitodio. ¿Niese cuena nibaiacadio? Cuena duere finoñeno.

Iese raite, Janaba naie imamona oni jai oretajana Jesús llua jira. ³⁰ Jesús naimiemo jicanote:

—¿O mamaci bu?

Uai ote:

—Aillosiedicai. —Ailluena jananiai naimie ecimo illa jira, iese naimiedi raite. ³¹ Jesúmo duere jicanoside, iraimo naimacina nia oretañellena. ³² Naie facaise nainomo ite anedumo ailluena chanchuai itimaci. Chanchuai abimo naimaci jaillena Jesúmo duere jicanotimaci. Jesús dinena:

—Jee —raite. ³³ Ieconi imamona jaidemo, chanchuai abimo jaidimaci. Iena suidemo, iconi jillacimo joraimo chanchuai aisidimaci. Dinomo corobaiside.

³⁴ Iena cianona, chanchuai sedaraini naimaci nairai dine aisicana jaidimaci. Naie rafuena llocana jaidimaci. ³⁵ Ie jira diga comini jaide, naie rafuena raise fidillena. Jesús dine naimaci ridemo, jaive Janaba anamo illamiena Jesús ecimo raillana ciodimaci. Naimie iniroina jai jitade. Naimie jai uairicoñede. Iena cianona, Jesúna jaciruitimaci. ³⁶ Naie rafuena ciodinodi como bitinomo naimie jilluana llotimaci.

³⁷ Naimiena naimaci jaciruillanona, naimacimona oni jaillena nana naie eniruemo ite nairaidi Jesúmo jicanotimaci. Ie jira botemo Jesús jaide, ruica díbeimo abido jaillena. ³⁸ Ieconi jaive Janaba anamo illamie Jusúmo jicanote, naimie diga jaillena; iadedi Jesús raite:

—Dama ite. ³⁹ Mai o jofomo o jai. Nainomo itinomo nana Jusiñamui omo finoca rafuena llono.

Ie mei jaide. Nana naimie nairaimo Jesús naimiemo finoca rafuena llocana jaide.

*Jesúdi mena duide riñona jillotaja rafue
(Mt 9.18-26; Mr 5.21-43)*

⁴⁰ Ruica díbeimo Jesús abido ria, naimie abido billemo naimaci ocuirilla jira, ailluena comini naimiena feiñotimaci. ⁴¹ Jairona mameciredimiedi Jesús dine bite. Naimiedi judíuai rafue ofiraco sedaraima. Jesúmo duere jicanollena, ana bitadate. Naimie jofomo Jesús billena duere jicanote. ⁴² Dañaiñode ie jisa. Doce años naiñaiñodi ite. Niadedi fiodaiacade. Ie jira Jesúmo jicanuaibite. Iena cacajano, naimie diga Jesús jaide. Ie llofueoicaigano jiaí jaidimaci. Jesús jaillano, diga comini naimiemo ñajisaiide.

⁴³ Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. Naiñaiñona jaca buna jillotanide. ⁴⁴ Jinafo dinena billanona, Jesús iniroi fueda jetade. Iemona diailladi fainonocaiide. Jillode.

⁴⁵ Jesús dinena jicanote:

—¿Bu cuena jetade?

Naimie ecimo ite comini uai otimaci:

—Ona jetañedicaí.

Ie nabaiñiai diga Pedro dinena raite:

—Maestro, ailluena comini o ecimo jaidimaci. Omo ñajjidimaci.

⁴⁶ Jesús uai ote:

—Damie cuena jetade. Cue abimona cue uai jaillamona, naimie jai jillode.

⁴⁷ Jaive duidiñaiñodi Jesús naiñaiñona uiñuana uiñote. Ie jira Jesús dine jaciruicana bite. Naimie uicomo ana bitadajanona, nana comini uicomo naimiena jetaja rafuena llote. Naiñaiño ieconi jilluana llote. ⁴⁸ Jesús dinena naiñaiñona raite:

—Ñoo, cuena o ñnua jira, jai jillodio. Mai jaillanona, uri o i.

⁴⁹ Naiñaiño diga Jesús nia ñaitemo, Jairo jofomona damie bite. Jairomo llote:

—O jisa jai fiodaite. Maestrona ñaidoño.

⁵⁰ Iena Jesús cacajano raite:

—O comeci jarire iñeno; ia cuena nia ñno. Naiñaiño jilloite.

⁵¹ Jairo jofomo naimaci rillano, ailluena comini naimie diga fo jaillana rairuide. Dani diese fo jaillana jitaide: Pedro, Jacobo, Juan, nai jitaibici moo, naiñaiño ei. Jaca diese fo illana jitaide. ⁵² Nana nainomo itino eecuinaidimaci. Failliñaidimaci. Jesús dinena raite:

—Omoi eeño. Cuemona naiñaiñodi fiodaiñedesa. Jamai inide.

⁵³ Jai fiodaitedi: “¿Bue ñelli inide raitio?” raillanona jaisitimaci. ⁵⁴ Jesús fo jailla mei, naiñaiño onollina llinocaida, raite:

—Jitaibici, mai naidacai.

⁵⁵ Ieconi naiñaiño joreño abido bite. Naidacaide. Jesús llote:

—Guillena naiñaiñona eca. ⁵⁶ —Naiñaiño moo, ie ei diga, rajicaidíiaímaiaí. Jesús iaímaiaímo llote:

—Bie rafuena bumo lloño.

9

*Jesúdi ie llofueoicaiganona oretaja rafue
(Mt 10.5-15; Mr 6.7-13)*

¹ Ie doce llofueoicaiganona naimie dine Jesús uaiduanona, naimacimo ie uaina iñonocaiide, jananiaina anamona cominina jilloitallena. Duicuaína oni oretallena, iena jiaí iñonocaiide. ² Naimacimo llote:

—Omoi jaillanona, cominimo llono: “Jusiñamui facaina jaie lloraini micoriaí llogamie jai bene ite. Naimie anamo omoi illana Jusiñamui jitailla jira, naimie díbeimo omoi comeciáí iuaina meido”. Duidinona jillota. ³ Omoi

jaia, buena uiñeno. Omoi abina riidollena, jiguidana uiñeno. Ailluena rana omoi uiñellena, bolsana uiñeno. Llomeniconana uiñeno. Ucubena uiñeno. Guille ifo meidollena, rana uiñeno. Meidolle iniroina uiñeno. ⁴ Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i. ⁵ Omoína comini feiñoñenia, naimaci nairaimona omoi jaia, omoi eilliaimo ite jearacuaina oni jaidino. Nicino naimacimo illana naimaci uiñollena, omoi eilliaina oni jaidino.

⁶ Jesús naimacimo llua mei, jaidimaci. Jusiñamui rafuena lluanona, diga nairaimo jaidimaci. Diga comini imaci duicomona jillotatimaci.

Juan Bautista micori fiodailla rafue

(Mt 14.1-12; Mr 6.14-29)

⁷ Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micori jai jillode” dajerie railla jira, ie comeci uri iñede. ⁸ Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micori jai jillode.

⁹ Jesúsna fidiano, Herodes comeci uri iñede. Comecina facade: “Juan micori ie ifogina navui jaitataticue. Ie muidona ¿birui bu ie rafuena fididicue?” Raise uiñollena, Jesúsna cioacade.

Jesús cinco mil iñiaina ecaja rafue

(Mt 14.13-21; Mr 6.30-44; Jn 6.1-14)

¹⁰ Jesús llofueoicaigano abido bia, Jesúsno naimaci finoca rafuena llotimaci. Ie mei dani ie llofueoicaigano diga Jesús Betsaida railla nairai dine jaide; ¹¹ iadedi comini iena fidianona, naimiena racadimaci. Naimie dine naimaci rilla mei, naimacina feiñuanona, naimie anamo comini illana Jusiñamui jitailla jira, Jesúsdi Jusiñamui dibeimo naimaci comeciai iuaina meiduana llofujete. Duidinona jiai jillotate.

¹² Jitoma ana itemo, ie doce llofueoicaigano naimie dine billanona, raitimaci:

—Jofue bene iñede. Bene jaca buedi iñede. Ianori ite nairaiaimo, ianori ite jofuemo naimaci inillena, naimaci guille ollena, bie cominina abido oreta.

¹³ Jesús uai ote:

—Naimacina bene eca.

Uai onaisite:

—Dani caimo ite cinco llomenico mena lliciai diga. Nana naimaci guillena, ¿guille cai iballena nibai jitaideo?

¹⁴ Cinco mil iñiaia nainomo illa jira, ailluena guille jitaillana uiñotimaci. Naimaci ainiaia, imaci uruiaia diga, jiai itimaci. Ie llofueoicaiganomo Jesús llote:

—Comini ana raillesa llono. Cincuenta digamierie ana imaci raillesa llono.

¹⁵ Iena finodimaci. ¹⁶ Naie cinco llomeniconana, naie mena lliciai diga Jesús uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. ¹⁷ Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci.

Pedro Jesúsna llua rafue

(Mt 16.13-19; Mr 8.27-29)

¹⁸ Jiairuido Jesús ie Moomo jiaa facaiseconi, ie llofueoicaigano naimie diga illanona, naimacimo jicanote:

—¿Niese cominidi cuena raitimaci?

¹⁹ Uai otimaci:

—Damierie raitimaci: “Juan Bautista micoridio”. Damierie raitimaci: “Odi Eliadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

²⁰ Jesús naimacimo jicante:

—¿Niese omoi cuena raitomoi?

Pedro uai ote:

—Odi cai Jilloitaramadio. Jusiñamui facaina lloraini micoriai o billena jaie llotimaci. Jusiñamui ona orede.

Jesús ie fiodaillena llofuia rafue

(Mt 16.20-28; Mr 8.30-9.1)

²¹ Jesús naimaci como llogacino bumo llwana rairuide. ²² Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloiticue.

²³ Nana ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue dibeimo naimie iite. ²⁴ Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jaia, jaca faifiñeite. ²⁵ Cue cominina bu jaiñenia, nibai eo duere sefuñeite. Nibai aillena ra naimiemo iite; ia, ¿niese cue Moo dine riite? Nainomo naimie riñeno faifite. ²⁶ Cuena bu meiruia, cue uaina bu meiruia, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisai siño uai isoi illanona, cue Moo dinena monamona ico biiticue. Cue Moo uai cuemo illanona, ebire biiticue. ²⁷ Uanaicinona omoimo lloticue. Omoimona dajerie nia fiodaiñeitoimoimo, illaimana cue bairellena cioitomoimo.

Jesús abi meidocaila rafue

(Mt 17.1-8; Mr 9.2-8)

²⁸ Ocho digarui illanona, Jusiñamuimo jillena, anedumo Jesús jaide. Naimie diga jaillena, Pedrona uite. Juan jiai uite. Jacobona jiai uite. Jiaie llofueoicaiganona uiñede. ²⁹ Naimie jiamona naimie abi meidocaide. Naimie iniroi naie dacaiño eo userecaide. ³⁰ Iecon menamie bairiano, Jesús diga ñaitiaimaiaia. Moisés micori joreño ite. Elías jiai ite. ³¹ Ebire bairediaimaiaia. Jesús Jerusalémo fiodaille rafuena ñaitimaci. ³² Ie facaiseconi Pedro ie nabaiñiaia diga jai inidimaci; ia casillamona, Jesús ebirenana cioidimaci. Jesús ecimo itiaimaiaina jiai cioidimaci. ³³ Iaimaiaia jaiacania, Pedro Jesúsimo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie. —Iese raite; ia ie ñaia rafuena raise uiñoño jamai ebena ñaite.

³⁴ Iena naimie nia llwanona, uillie billamona, naimacina ibaide. Uillie ibaibillaconi jacinaitimaci. ³⁵ Uilliemona Jusiñamui naimacimo llote:

—Bimiedi cue Jito. Naimiena fetodicue, cue jitaille rafue finollena. Naimie llwana omoi cacareillanona, iena ñno —llote.

³⁶ Jusiñamui llua mei, dama Jesúsna dane cioidimaci. Jesús diga itino naimaci cúa rafuena naie facaiseconi jaca bumo lloñedimaci.

Jesúdi Janaba anamo itimiena jillotaja rafue

(Mt 17.14-21; Mr 9.14-29)

³⁷ Ie areruido anedumona ana bitimacimo, ailluena comini naimacimo dafaifide. ³⁸ Cominimona damie ado llote:

—Maestro, cue dajede cue jito duillana jibuisaibi. ³⁹ Janaba naimie anamo illamona, cue jito cuiritate. Cue jitona naillitacabite. Iemona ie fue mullecabide. Naimiena bofedaicabite. Naimiemona oni jaiacaiñede. ⁴⁰ Janabana oni oretallena, o llofueoicaiganomo jicanoticue; ia oretanidimaci.

⁴¹ Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi ñnollena, ¿nie dinori omoi diga iiticue? —Naie duidimie moomo llote—, O jito cue dine mai ati.

⁴² Naie urue billano, Janaba naimiena eniruemo ana dotade. Naimiena naillitate; ia oni jaillena Jesús Janabana lletade. Ieconí naie urue jillode. Iemei Jesús ie moomo naimiena fecade. ⁴³ Comini iena ciuanona, Jusiñamui siño uai naimiemo illari rajicaidimaci.

Jesús ie fodaillena dane llofua rafue

(Mt 17.22-23; Mr 9.30-32)

Naimaci nia rajicaia, Jesús ie llofueoicaiganomo llote:

⁴⁴ —Cue lluana feitaño. Monamona billanona, imana jaidicue; ia Jusiñamui jitailla jira, jairuido illacomini cuena meineitimaci.

⁴⁵ Jesús lluana raise cacaiñedimaci. Naimie iena llofueña jira, iena raise uiñoñedimaci. Naimiemo iena jicanuana jiai meiruitimaci.

Jesús ie llofueoicaigano moto imiena ille rafue

(Mt 18.1-5; Mr 9.33-37)

⁴⁶ Ie facaise Jesús llofueoicaigano conini uaitajanona raitimaci:

—¿Bu cai moto imiena ille?

⁴⁷ Jesús naimaci comeciai facajacinona uiñuamona, nainomo ite cominimona daje urue bai jainanocaida, naimaci motomo naimiena jonete.

⁴⁸ Raite:

—Comini dinena bie urue jamai bue isoide; ia bie isoidimie cuemo duillamona, naimiena feiñotimiedi cuena jai feiñote. Jusiñamui cuena oretaja jira, cuena feiñotimie Jusiñamuina jiai jai feiñote. Jamai bue isoidimiedi omoi moto imiena ille.

Jesúdi ie dibeimo itinona llua rafue

(Mr 9.38-40)

⁴⁹ Naie facaise ie llofueoicaiganomona Jesús Juan llote:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

⁵⁰ Jesús dinena uai ote:

—Naimiena rairuiño. Cai dibeimo itimiedi cai facaisena ite. Ie jira naimie isoidinona rairuiño.

Jesús dinena Jacobo, Juan iaímaiaí lletaja rafue

⁵¹ Monamo abido Jesús jaillirui iaírei ia, Jerusalémo jaiacanamo naimie comecina facade. ⁵² Ie jira dajeriena uicodo oretate. Ie inillinona jenollena, Samaria railla nairaímo jaidimaci; ⁵³ iadedi Jerusalémo naimaci jailla jira, judíuaiñedinona samaritanodi gaiñena jira, Jesús llofueoicaiganona feiñoiacaiñedimaci. ⁵⁴ Iena fidianona, Jacobo, Juan diga, Jesús jicanotiaímaiaí:

—Nama, ¿bie comini jobaillena, monamona irai billena Jusiñamuimo coco jicanuana jitaídió?

⁵⁵ Iaímaiaímo eruaíllanona, Jesús dinena iaímaiaímo ríire lletade:

—Dama ite. Iena jitaíñedicue.

⁵⁶ Ie mei inillena jiaíe illanomo jaidimaci.

*Jesús ie llofuegamiena damie jaillena ie rafue
(Mt 8.19-22)*

⁵⁷ Naisona ie llofuecaigano diga, Jesús oni jaillanona, Jesúmo damie llote:
—O jaillinomo o diga jaiacadícue. O llofuegamiena jaiacadícue.

⁵⁸ Jesús uai ote:

—Janorede ocainaiáidi joforedímaci. Silliñiai jillainiáiredímaci; iadedi jofonidícue. Monamona billanona, imana jaidícue; iadedi buenidícue. Jofonidícue. Cue diga o jaiacania, bue isoidena cuemona oñeitío. Iemo o comecina raise faca.

⁵⁹ Jiaimíemo Jesús llote:

—Cue llofuegamiena o jaillena, cue diga mai bi.

Naimie uai ote:

—O diga jaitícue; ia cue moo nia fiodañena jira, o diga nia jaiñeitícue.

⁶⁰ Jesús naimíemo dane llote:

—Dama ite. Cue diga mai bi. Cuená ñnoñedinodi o moona canoredímaci. Naimie fiodaia, naimiena naimaci raille. Cue rafue jiaie rafue baifemo faite. Naimie anamo comini illana Jusiñamui jitailla jira, naimie díbeimo naimaci comeciai iuaina meiduana llocana cue diga mai o bi.

⁶¹ Jiaimie Jesúmo llote:

—O llofuegamiena jaiacadícue: iadedi cue jofomo nano jaiacadícue, cue cominina facadollena.

⁶² Jesús uai ote:

—Cue llogamiena jaiacania, jiaie ramo naimie comecina eo facañena. Jiaie ramo naimie comecina eo facaia, Jusiñamui facaina raise majinide.

10

Ie rafuena llollena, Jesús setenta digamiena oretaja rafue

¹ Ie llofueganona llofua mei, naimacimona Jesús setenta digamiena fetode. Naga naimie jaiacana nairaiáimo menamieriena oretate. ² Naimacimo llote:

—Diga comini ite, naimacina Jusiñamui rafuena ñnotallena; iadedi eo janore lloraini ite. Jusiñamuimo jicano, jiaie llorainina naimie oretallena.

³ Mai jai; iadedi abi rairuicana jai. Toica llaudaiaí janallari illanomo illa isoi, omoína oredícue. ⁴ Ucubena uñeno. Ailluena rana omoi uñellena, bolsana uñeno. Meidolle zapatona uñeno. Naisomo bu omoímo dafaífa, are ñaiñeno.

⁵ Bu ie jofomo omoi ria, jofomo itinomo marena uaido. ⁶ Nainomo maremie ia, o uaina fairioite. Maremie iñenia, o uaina fairioñenia: “Jusiñamui ona canoite” naimíemo lloñeno. ⁷ Nie nairai mo omoi ria, dacomo omoi ri. Omoi ecalle rana guiño. Cue facaina omoi majia jira, comini omoína ecajia, cue facaina omoi majia facaina omoi guiño. Naga jofomo guicana jaiñeno. ⁸ Nie nairai omoi ria, omoína naimaci feiñoia, omoi ecalle rana uaitañeno guiño.

⁹ Duidinona jillota. Nainomo itinomo llono: “Naimie anamo omoi illana Jusiñamui jitailla jira, naimie díbeimo omoi comeciai iuaina meido”. ¹⁰ Nie nairai mo omoi ria, omoína naimaci feiñoñenia, ie naiso motomo jaillanona llono: ¹¹ “Omoi naisomo cai eillimo ite jearacuai jai jaidinoticaí, marañede rafue omoímo illana omoi uñollena. Jusiñamui omoína sedaacade; ia iena jitañedomoi” llono. ¹² Sodoma nairai jaie eo marañede. Jusiñamui iena jaie fuidode; ia nana comini naimie uicomo ico ia, Jusiñamuidi omoína feiñoñedinona Sodoma railla nairai baifemo duere finoite.

*Jesús ie ñnoñedinona llua rafue
(Mt 11.20-24)*

¹³ Ie fetocanomo Jesús nia llote:

—Corazín railla illanomo navui iticue. Betsaida railla illanomo navui jiai iticue. Naimaci dine diga siño rafuena finodicue; iadedi inoñedimaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci comeciai eo isinotailamona, naimaci comeciai iuai meidotimaci. Naimaci comeciai iuai meiduana jiaie comini uiñotallena, ebinide iniroina jitajanona, jusefo naimaci ifogiamo jonetimaci. ¹⁴ Jusiñamui uicomo nana comini ico ia, Corazímo itino Tiro nairai baifemo duere sefuitimaci. Sidón nairai baifemo duere sefuitimaci. ¹⁵ Capernaumo itino jiai duere sefuitimaci. Birui abina iedoiacadimaci; iadedi jiairuido sure iitimaci. Monamo cue Moo diga jaca iñeitimaci; iadedi naimie naimacina duere finollemona, sure iitimaci. ¹⁶ Omoi lluana naimaci cacaacania, cuena cacadimaci. Omoi lluana naimaci jitaiñenia, cuena jitaiñedimaci. Cuena jitaiñedinodi cuena oretagamiena jiai jitaiñedimaci. —Jesús naie fetocanomo iese llua mei, oni jaidimaci.

Je setenta fetocano abido billa rafue

¹⁷ Jiairuido Jesús ie setenta fetocano abido caimare bitimaci. Raitimaci:

—Nama, o facaido cominimona jananiaina oni oredicai.

¹⁸ Jesús naimacimo llote:

—Monamona Taife borilla isoi jaie ana dotajana ciodicue. Iemona cue uai naimie uai baifemo faiana uiñoticue. ¹⁹ Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jiai jai itataticue. Nana cue dibeimo iñedino omoi anamo jai itataticue. Omoina niese nibaiñeitimaci; ²⁰ iadedi omoi uaina jananiai inua jira, iobiñeno; iadedi Jusiñamui cominina omoi illamona, omoi mameciai monamo Jusiñamui rabenicomo jai cuiamo iobi.

Jesús ie Moo diga ñaia rafue (Mt 11.25-27; 13.16-17)

²¹ Ie facaiseconi ie Moo Joreño naimiemo illa jira, Jesús iobide. Raite:

—Ore Moo, oca mona Namadio. Oca enirue Namadio. Abina uiñotina bie isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo feaacadicue. Mai.

²² Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitaille diese omoina naimiena uiñotadicue. Ie muidona naimiena uiñotomoi.

²³ Ie llofueoicaigano diga eneno ia, naimacimo llote:

—Cue finoca rafuena omoi ciua jira, ni ua omoi marena illino jillaci.

²⁴ Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie inotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

Jesús cai ecimo itimiena isiruillana llua rafue

²⁵ Jesús ecimo itinomona Moisés micori llogacinuaina llofueraimadi Jesúsna facaciano, naimiemo jicanote:

—Maestro, Jusiñamui illanomo jaca cue illena, ¿bue finoiticue?

²⁶ Jesús uai ote:

—¿Niese Moisés micori llogacinuai iena raite?

²⁷ Uai ote:

—Moisés micori jaie cuega: “O jitailla jira, o comecina facajamona, cai Nama Jusiñamuina nana o comeci jitaillamona naimiena eo isirui. O abina o isiruilla isoi, o ecimo itinona isirui”.

²⁸ Jesús dinena raite:

—Marena cue uai otio. Iena o finoia, Jusiñamui illanomo jaca itio.

²⁹ Naie llofueraima Jesúmo dane jicanote:

—¿Bu cue ecimo itino?

³⁰ Jesús uai ote:

—Jiaie rafuedo iena omo lloiticue. Jerusalémona Jericómo damie jaide. Naimie jaillano fiiredino naimie dine bitimaci. Ie iniroina bairosite. Naimiena fatimaci. Niade ie meinianona ie ecimona jaisite. ³¹ Dallu illanona, Jusiñamui diga ñairaima naie naisona jaide. Fagamiena cide; iadedi ecido jaide. ³² Dallu illanona, Jusiñamui jofomo maijiraíma jiaí jaide. Fagamiena ciuanona, ecido jiaí jaide. ³³ Ja muidomo Samaria nairaí imie jaide. Naie nairaína enoidomoi. Fagamiena naimie ciuanona, naimiena duenaitie. Iemona naimie canoacade. ³⁴ Naimie dine jaillano, ie bofellaña manode. Jiaí maitade. Ie burro emodomo jonecaida, naimiena uite. Inillinomo rilla mei, nainomo naimiena sedade. ³⁵ Ie areruido ie inia jofu namamo janore ucubena fecade. Raite: “Naimiena seda. Naimie facaina jiaie rana o oia, abido cue bia, iena ibaiticue”. Ie mei oni jaide. ³⁶ —Naie llofueraímamo Jesús dinena jicanote— ¿Fagamie ecimo itimiedi bu?

³⁷ Uai ote:

—Fagamiena duenaitimie.

Jesús raite:

—Jai raise uiñotio. Mai jai. Ie isoi finocana o jai.

Jesúdi Marta iaíñuai María jofomo illa rafue

³⁸ Nia macaritimacimo, comini illanomo Jesús ie llofueoicaigano diga ridimaci. Marta raillañaíño ie jofomo naimiena feiñote. ³⁹ Naiñaiño euiñodi María. Jesús ecimo llaribamo María ana raide, naimie llofuiacinona cacareil-lena; ⁴⁰ iadedi Martamo maijille eo illa jira, naiñaiño naimie llofuiacinona cacarefiñede. Ie jira Jesúmo llote:

—Nama, cue euiño cuena canoacaiñena jira, daño maijidicue. “O euiña cano” naiñaiñomo llono.

⁴¹ Jesús uai ote:

—Ero, Marta, jarire itio. Diga o ramo comecina facadio; ia Jusiñamui rafuemo comecina faca. ⁴² María iemo comecina jai facade. Naiñaiño cue llofuiana nano cacaiacade. Ona canollena naiñaiñomo lloñeiticue.

11

Jusiñamuimo Jesús jia rafue (Mt 6.9-15; 7.7-11)

¹ Jiairuido ie Moo diga Jesús ñaia, ie llofueganomona damie naimiemo llote:
—Nama, jiana caina llofue, ie llofueoicaiganona Juan Bautista micori llofua isoi.

² Jesús uai ote:

—Omoi jiaia, iese omoi jii:

Ore Moo, comini ori iobidesa.

O illaimana jira, nana cominina o anamo raire itata.

O jaienisaí o jitaillacinona finua isoi, cominina o jitaillacinona finota.

³ Nagarui guille caimo itata.

⁴ Caina jeare jiaíno finoia, iena caimona feilla isoi, cai jeacinona omona feilla jira, cai jeacinona oni dota.

Caina ramo bu faia, caina cano, iena cai ñnoñellena.

⁵ Iena naimacina nia llofuellena, Jesús jiaie rafuena llote:

—Naiona mona moto llomeniconona jicallena, o nabai dine o jaia, ado lloito: “Nabai, daje amani llomeniconona jitaide. ⁶ Jiaie nabai cue jofomo como ride. Jaca cuemo buedi iñede, naimiena cue ecallena”. ⁷ Ie jofu jeraimona o nabai fairioite: “Cuena uaidoñeno. Cue nasedi jai cue ibaicasa. Cue uruiaí jai inidimaci. Jiaí inidicue. Llomeniconona omo fecallena casiacañedicue”. ⁸ Ja muidomo casillano, omo iena fecaite. Ie nabaina o illa jira, fecañeite; iadedi o eo jitailla jira, o jitailla rana fecaite. ⁹⁻¹⁰ Daje ra omoi faifia, iena jenodomoí. Raise jenoia, iena baitomoí. Damiena omoi jenoia, naimie illanomo jaidomoí. Nainomo naimiena baillamona, omoína feñeite. Ie isoide. Buena omoi jitaia, Jusiñamui jica. Iena omoi jicaja jira, iena naimie cacajamona, omoimo iite.

¹¹ 'Ero, omoimona ie moomo llomeniconona ie jito jicaia, noficina fecañede. Lliciaína jicaia, jaiona fecañede. ¹² Jigina jicaia, acaidona fecañede. ¹³ Jeacinona finocabidomoí; iadedi omoi uruiaímo mare rana fecacabillana uiñotomoí. Cai Moo Jusiñamui jaca mareuidimie. Cai baifemo naimie faite. Ie muidomo naimacina canollena, naimiemo jicadinomo ie Joreña itataite.

Comini Jesúna jeare ñaia rafue
(Mt 12.22-30; Mr 3.19-27)

¹⁴ Jiairuido Janaba anamo illamemona Jesús Janabana oni orede. Janabana nia oretañenia, Janaba anamo naimie illamona, naie ñima ñainide. Janaba oni jailla mei, naimie ñaite. Ie jira comini rajicaidimaci; ¹⁵ iadedi dajerie raitimaci:

—Beelzebú anamo bimie illamona, Beelzebú uaido jananiaína oni orede —raitimaci. Beelzebúdi Janaba comini.

¹⁶ Jiaíno naimiena facaciacasite. Raitimaci:

—Siño uai omo ia, Jusiñamuina siño rafuena finota.

¹⁷ Naimaci comeciaina Jesús uiñua jira, naimacimo llote:

—Daje isoi comeciaina lloillamo daje nairai facañenia, danomo maijinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci. ¹⁸ Ie isoide. Beelzebú uaido jananiaína, omoi lua isoi, cue oretaia, Janaba ie dibeimo itino diga jai nabairiñede. Iemona naimie comini danomo iñeitimaci. ¹⁹ Omoi comini jananiaína oni oretacabitimaci; iadedi naimaci finoca rafuena uaitañedomoí. Naimacimo jicano, bie isoide rafuena omoi raise uiñollena. Iemei cue finoca rafuena uaitañeitomoi.

²⁰⁻²² Jiaie rafuedo iena lloiticue. Ero, ie rana raise riidamona, mairidimie ie rana raise enoite. Ie jofomo ie ra illanona, iena raise sedaite. Jamai bue isoidimie ie rana finide; iadedi naimie baifemo mairidimie bia, naimiena emodofillamona, ie rana firede. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui uaido jananiaína cue oretaia, Jusiñamui rafuena cue llua uiñotomoí.

²³ 'Cue dibeimo iñedimie cuena enoide. Cue dibeimo cominina itatañedimiedi naie cominina cuena ñnotañede.

Janaba anamo illamie rafue
(Mt 12.43-45)

²⁴ Jesús naimacimo nia llote:

—Birui bene ite marañede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide; iade baiñede. Baiñena jira, naimie comecina facade: “Navui cue anamo illamie dine abido jaiticue”. ²⁵ Abido naimie bia, naie ñima comeci namanidena naimie baite. ²⁶ Iemei oni jaillanona, jiaie siete jananiaína naimie diga

atide, naimaci anamo naie iima illena. Naie siete jananiai naimie bai femo maraiñedimaci. Iemona naie iima eo fodo jaide. Ie isoide birui ite maraiñede comini. Cue rafue naimaci iñoñenia, eo fodo jaitimaci.

Daje riño Jesús eina marena ñaia rafue

²⁷ Cominimo Jesús llotemo, comini motomona dañaiño Jesúmo llote:

—O ei caimare illesa. Naiñaiñomona comuidio. Naiñaiño monoi jirodio. Naiñaiño caimare illesa.

²⁸ Jesús uai ote:

—Marena llotio; ia Jusiñamui uaina naimaci cacajamona, iena iñuamona, jiaño eo caimare iitimaci.

Dajerie Jesús siño rafuena finuana jitailla rafue

(Mt 12.38-42; Mr 8.12)

²⁹ Ie facaise diga comini Jesús dine biñoidimaci. Naimacimo llote:

—Birui ite cominidomoi maraiñedomoi. Siño rafuena cue finuana cioacadomoi; iadedi iena omoi jamai cioillena, siño rafuena finoñeiticue. Ero, Jonás micori jaie ite rafuena uiñotomoi. Naiemo omoi comeciaina omoi faca. ³⁰ Naimiemo suide rafuemoni Nínive railla nairaidi Jusiñamui naimiena oretajana jaie uiñotimaci. Ie isoide. Fiodaillamona cue jilluamona birui ite cominidi Jusiñamui cuena oretajana uiñotimaci. ³¹ Ero, Saba railla nairai ie illaiño micoridi Salomón micori dine jaie aarena jaide. Naimie micori uiñuacinona naiñaiño micori cacareillena, aarena jaide. Salomón micori bai femo birui uaidicue; iadedi cuena iñoñedomoi. Omoi comeciaina icinuaina birui omoi meidoñena jira, Jusiñamui uicomo nana comini ille facaiseconi naiñaiño micori omoina ico ñaite: “Naimiedi siño rafue finuana ciodomoi. ¿Bue ñellena naimiena iñoñedomoi?” omoina ico ñaite. ³² Lliciai jeraimona naimie jillua mei, Nínive railla nairai dine Jonás micori jaide. Nainomo Jusiñamui rafuena llote. Naie comini iena cacajano, naimaci comeciaina icinuaina meidotimaci. Cue rafuena omoi cacajamona, omoi comeciaina icinuaina birui omoi meidoñena jira, Jusiñamui uicomo ico nana comini ille facaiseconi: “Cue cominidomoi” omoina raiñeiticue. Jonás micori bai femo birui uaidicue; iadedi cuena iñoñedomoi.

Jesús comini illa rafue

(Mt 5.15; 6.22-23)

³³ Jesús llote:

—Lamparín bu unia mei, jofo anamo bainino rainañega. Cirigai anamo rainañega. Ie rairanomo rainaca, comini nainomo bia, jofo jerai lligaiñollena. ³⁴ Omoi uisi diga rana ciodomoi. Omoi uisi maraiñenia, rana raise cioiñedomoi. Ie isoide. Omoi comeci maraiñenia, maraiñedicinona finocana jaidomoi. Jusiñamuina uiñoñedomoi. Ie rafuena jiai uiñoñedomoi. ³⁵ Ie jira omoi comeciaina raise fino, cue rafuena omoi raise iñollena. ³⁶ Nana omoi comeciaina marena ia, cue rafuena iñocana jaitomoi. Iena raise uiñotomoi. Jofomo lamparín raise lligaiñua isoi, cue rafuena raise uiñotomoi.

Jesúdi judíuai illaicominiña ñaia rafue

(Mt 23.1-36; Mr 12.38-40; Lc 20.45-47)

³⁷ Comini Jesús llofua mei, daje fariseo imie naimie dine bite. Raite:

—Cue diga cue jofomo mai guisaibi. —Jesús fairiua mei, naimie diga guisaide. ³⁸ Naimie nia guiñenia, naimaci einamací llogacinodo naimie jaiñenamona, Jesús ie onollina jocoñede. Ie jira naie fariseo imie raijicaide. Ie comeciaina facade: “Naimie eo mare llofueraima. ¿Ñiese cai einamací llogacinodo jaiñede?” ³⁹ Jesús naimiemo llote:

—Da platos jinafo, da pocillos jinafo jocodino isidomoi. Da platos jerai, da pocillos jerai jocoñedino isidomoi. Omoi abina finodomoi; iadedi omoi comeciaina finoñedomoi. Rana eo nicidotomoi. Omoi comeciai jearede. ⁴⁰ Abi uiñoñedomoi. Jusiñamui omoi abiaina omoi comeciai diga finode. Omoi finoca rafuena uiñote. Omoi comeciaina facajacinona jiai uiñote. ⁴¹ Omoi comeciai marena ia, jiaie cominina canodomoi. Iemona Jusiñamuimona omoi abi jiai mare. ⁴² Fariseuai, omoimo rafuena lloiticue. Nana omoi illimo ite ramona Jusiñamuimo janore jisa fecacabidomoi; iadedi jiaie cominimo mare rafuena raise finoñedomoi. Jusiñamuina jiai raise isiruiñedomoi. Nana naie isoide rafuena omoi jiai finua. ⁴³ Comini omoiri acarillena, ofiracomo uicomo raiacadomoi. Nine omoi macaria: “Jamai bue isoiñedica!” omoi comeciaina facajamona, jiaie comini omoina uaiduana gaidomoi. Iese omoi jailla jira, Jusiñamui omoina duere finoite. ⁴⁴ “Bainino ite raiafo emodomo comini uiñoñeno macarillamona, naimaci abi jai jearede” raitomoi. Bainino ite raiafo isidomoi. Omoi diga jiaie cominidi omoimo ite jeacinona uiñoñeno nabairillamona, jeacinona jiai finodimaci. Iese omoi finocana jaia, Jusiñamui omoina duere finoite.

⁴⁵ Naie facaise Moisés llogacinuaina llofueraimona damie Jesúmo llote:

—Iese o lloia: “Jecino finodomoi” caina jiai llotio.

⁴⁶ Jesús uai ote:

—Jusiñamuimona jiai duere sefuitomoi. Omoi einamací llogacinuaido raise naimaci jaillena, diga rafue comini finuana jitaidomoi; iadedi iedo naimaci raise jaillena, naimacina jaca canoñedomoi. “Jusiñamuina eo raise sedadica!” comecina facadomoi. ⁴⁷ Omoi jaiagaidi Jusiñamui facaina llorainina meinetimaci. Naie lloraini micoriai raiafuaí birui marena finodomoi; ⁴⁸ iadedi naimaci micoriai llogacinuaido omoi birui jiai jaiñena jira, omoi jaiagai finoca radi: “Mare” raitomoi. Jusiñamui rafuedo birui omoi raise jaiñena jira, omoi jaiagai isoi itomoi. Iese omoi jailla jira, Jusiñamui omoina duere finoite. ⁴⁹ Omoina Jusiñamui abi uiñuamona jai llote: “Cue rafuena llollena, naimaci dine cue facaina llorainina oretaiticue. Cue rafuena eo uiñotinona jiai oretaiticue. Dajeriena meineitimaci. Jiaínona duere finoitimaci”. ⁵⁰ Enirue finua facaisemona ailluena Jusiñamui facaina llorainina meinetimaci. Omoimona Jusiñamui iba oite. ⁵¹ Abel micori jaie ite. Ie ama naimiena meinete. Naimie facaisemona omoi jaiagaidi diga llorainina meinetimaci. Zacaríana jiai meinetimaci. Jusiñamui jofomo Jusiñamuimo toica ocaina jobaisoillano motomo naimiena meinetimaci. Omoimona Jusiñamui birui iba oite. ⁵² Omoi llofuiamona comini Jusiñamui rafuena uiñoñedimaci. Jusiñamui rafuena raise uiñoñedomoi. Jiaíno iena raise uiñuana jitañedomoi. Iese omoi jailla jira, Jusiñamui omoina duere finoite.

⁵³ Fariseo jofomona Jesús jailla mei, fariseuai comini icirillamona, Jesúmo diga rafuena jicanotimaci, naimie uaina uaitallena. Moisés micori llogacino llofueraí daje isoi uai uaitatimaci. ⁵⁴ Naimie raise uai oñedena, naimiena duere finoacadimaci.

12

Jesúdi mareuidinona abi caitadinona llofui rafue

¹ Ie facaiseconi eo ailluena comini Jesús dine ofidimaci. Ailluena illa jira, conini eilliammo naidadatimaci. Ie llofueoicaiganomo Jesús llote:

—Fariseuai siritate ramona abina rairui. Biena ñaiticue. “Maredica!” raitimaci; iadedi mareuidinona abi caitadimaci. Naimacimona abina rairui.

² Naimaci birui finoca rafuena birui bainino finodimaci; ia Jusiñamui naimaci

comeciai iticinona ico uiñotaite. ³ Ero, cue rafuena birui anado llocana jaidomoi; ia ico marefodo iena llocana jaitomoi.

Jesúdi jaciruiñeno llofua rafue
(Mt 10.28-31)

⁴ Ie llofueganomo Jesús llote:

—Cue nabaiñiaidomoi. Omoína meineiacadinona jaciruiñeno. Omoi abina meineredimaci; ie iadedi omoi joreña meinenidimaci. Omoína naimaci meinia, omoi joreño Jusiñamui dine jaite. Iena uiñuamona, omoi meineiacadinona jaciruiñeno. ⁵ Cue rafuedo omoi raise jaiñenia, Jusiñamuina jacirui. Omoi fiodailla mei, omoi abina omoi joreño diga iraimo ie dotalle uai naimiemo ite. Ie jira naimiema jacirui. ⁶ Ero, dabecuiro janorede sillina fecadomoina, eo janore ibaca. Silliñia eo janore raifide; iadedi Jusiñamui naimaci illana uiñote. ⁷ Ero, niga ifotirai omoimo illana Jusiñamui jia uiñote. Naimiedi omoína sedajana jia uiñote. Silliñia baifemo Jusiñamui isiruigaomoi. Omoi duere finoacadinona jaciruiñeno. Jusiñamui jitañenia, omoimo jaca buena suiñeite.

Jesús naimiema janoñenana llofua rafue
(Mt 10.32-33; 12.32; 10.19-20)

⁸ Ie llofueoicaiganomo Jesús nia llote:

—Cue rafuena omoi llua mona, jiaino omoína duere finoitimaci. Cuena birui omoi janoñenia, nana comini Jusiñamui jaienisa uicomo ico ia, nainomo omoína janoñeiticue. “Cue cominidomoi” omoína raiticue. ⁹ Cuena birui omoi janoia, nana comini Jusiñamui jaienisa uicomo ico ia, nainomo omoína janoiticue. “Cue cominiñedomoi” omoína raiticue. ¹⁰ Jusiñamuidi naga cuena jeare ñaitimie jeacinona feitarede; iadedi Jusiñamuidi ie Joreña jeare ñaitimie jeacinona feitañeite. ¹¹ Cue rafuena omoi llua muidona, duere sefuitomoi. Illaicomini dine omoína llogidollena comini uia, omoi abiridollicinomo omoi começaina jarire facañeno. ¹² Naie facaiseconi Jusiñamui Joreño omoi abiridollicinona uiñotaite.

Jesúdi raruia eo uamona abirairuillana llofua rafue

¹³ Nainomo ite cominimona damie Jesús llote:

—Maestro, cue moo jai fiodailla mei, cue ama doforamie cue facaina ite rana cuemo iacañede. Naimiemo llono, cuemo illena.

¹⁴ Jesús uai ote:

—Juezñedicue. Bie isoide rafue cuemo duiñede.

¹⁵ Ie ecimo itinomo llote:

—Ero, rana nicidoño. Ailluena ra omoimo illamona, Jusiñamui illanomo riñeitomoi. ¹⁶ Iena omoi raise uiñollena, jiaie rafuedo iena lloiticue. Ucuberedimiedi ie illimona ailluena rana ote. ¹⁷ Ie jira começina facade: “Cue illimona ailluena rana oticue; iadedi ¿ninomo iena eenoiticue? ¹⁸ Birui cuemo ite eenoracona judaaiticue. Ie mei aillue eenoracona finoiticue. Nainomo cue rana eenoiticue”. ¹⁹ Ie começina facaite: “Cuemo ailluena ra jai ite. Diga años nia iiticue. Jamai iiticue. Marena guiticue. Caimare iiticue”. ²⁰ Iese começina facade; iadedi Jusiñamui naimiemo llote: “Abi uiñoñedio. Cue llua jira, ja naiona fiodaitio. Ie mei omo ite ra omo fiebiñeite”. ²¹ Dama ramo ie começina bu facaia, Jusiñamui jitaillacinomo ie começina bu facañenia, faifite.

Jesúdi Jusiñamui cai sedajana llua rafue
(Mt 6.25-34)

²² Ie llofueoicaiganomo Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. ²³ Jusiñamui omoina itataja muidona, guille omoimo iite. Naimie omoi abi finua muidona, iniroidi omoimo iite. ²⁴ Silliñaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoina canoite. ²⁵ Omoimona, ¿bu ie comeci jarire facajamona a sairite? Iese jaca buna a sairine. Dama Jusiñamui omoina a sairitarede. ²⁶ Omoi comeciaina facajamona omoi a sairine jira, jiaie ramo omoi comeciaina jarire finoñeno. ²⁷ Safiamo omoi comeciaina faca. ¿Niese sicodimaci? Maiñedimaci. Iniroina tifiñedimaci; iadedi Salomón micori naimaci isoi jaie inede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide. ²⁸ Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ino. Jusiñamuina eo janore inotomoi. ²⁹ Omoi comeciaina jarire icana jaiñeno. “¿Buena guiticaí?” raiñeno. Iemo comeciaina eo facañeno. ³⁰ Jusiñamuina inoñedino iemo comecina facacabidimaci. Nana omoi jitaillacinona omoi Moo Jusiñamuidi uifua jira, naimaci isoi ineno. ³¹ Jusiñamui jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo Jusiñamui iite. Iniroi omoimo jia iite.

Jesúdi Jusiñamuimo comecina facaja rafue
(Mt 6.19-21)

³² Jesús llote:

—Cue cominina omoi illanona, uri omoi i. Omoi Moo Jusiñamui jitailla jira, naimie anamo omoina itatajamona, omoina sedaite. ³³ Omoi raruiaina fecajanona, ucubena dueredinomo feca. Sabiñeite bolsana ono, omoi ra faifi raillano. Monamo omoi ra illa isoi ñaiticue. Monamo omoi ra illa isoi, iena faifiñeitomoi. Firiraima nainomo jaiñede. Gireco nainomo jia iñede. ³⁴ Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

Jesús ie abido billemo ocurillana llofua rafue

³⁵⁻³⁸ Jesús nia llofue:

—Monamona ico cue abido billemo ocuri. Iena omoi raise cacaillena, bie rafuedo iena lloiticue. Damie ie nabai ie ai ua rafue dine naiona jaide. Ie mullaia naimie abido billemo ocurillana ocuide. Naimie billemo naimaci raise ocuria, iniroina jitajanona, lamparinia unianona, ocuritimaci. Iese naimaci ia, nasena naimie tuia, iena raire econoitimaci. Nie hora naimie abido bia, naimiena naimaci inineno ocuria, ieri naimie iobite. Iobillamona, mullaimana naimie itena, mesamo naimacina ecaite. Naimie bille hora naimaci uifnoñena jira, jaca ocuricana naimaci illa. ³⁹ Ero, firiraima bille facaiseconi jofo namadi uifnotena, nia caadote, ie ra faifi raillanona. ⁴⁰ Monamona ico abido biiticue. Omoi ocurine facaisemo biiticue. Ie jira cue billemo raise ocuri.

Jesúdi patrón ie mullaimana ie jofona sedataja llua rafue
(Mt 24.45-51)

⁴¹ Ie como lloga rafuena cacajano, Jesús mo Pedro jicanote:

—¿Bumo bie rafuena llotio? ¿Caimo llotio? ¿Nana cominimo?

⁴² Uai ote:

—Bie isoide cominimo lloticue. Ie mullaiaimona patrón damiena fetode, ie jiaie mullaiaina sedallena. Naimacina sedajanona, naimie naimacina jiaie ecade. ⁴³ Ie mei patrón oni jaide. Jofomo abido naimie bia, ie nanoca mullaima raise maijana fidiia, naimiena raise ibaite. ⁴⁴ Iobillamona, nana ie raruaiaina sedataite; ⁴⁵ iadedi naie mullaima marañenia, comecina facaite: “Cue patrón are biñeite. Jiaie rafuena finoiticue”. Ie comecina iese facaja jira, naimie anamo ite mullaiaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. ⁴⁶ Ie ocuiriñena facaise ie patrón abido billanona, naimiena meinetaite. Ie uaina ñnoñedino isoi, duere finoite. ⁴⁷ Naie mullaima ie patrón jitailla rafuena finuana uiñote; iadedi iena finoñede. Ie jira eo duere sefuite; ⁴⁸ iadedi marañede rafuena raise uiñoñoeno jiaie mullaima finoia, janore duere sefuite. Ie isoide. Jusiñamui rafuena raise uiñotino iedo raise jaiñenia. Jusiñamui naimacina eo duere finoite. Iena janore uiñotino iedo raise jaiñenia, Jusiñamui naimacina janore duere finoite. Iese omoimo suiñellena, mare mullaima isoi, Jusiñamui jitaillacino finocana omoi jai.

Jesús muidona nana comini uri iñena rafue
(Mt 10.34-36)

⁴⁹ Jesús llote:

—Cuena naimaci ñnollena, eniruemo comini dine biticue. Cuena dajerie ñnuamona, cue cominina jaitimaci. Cuena jiaino ñnoñenamona, cue cominina jaiñeitimaci. Iemona cominina duere finoiticue. Cue maijia raire fuiduana jitaidicue. ⁵⁰ Cue nia eo duere sefuiticue. Iena raire suillena jitaidicue. ⁵¹ Nana cominina uri itatallena eniruemo biñedicue. Cuena ñnoñedinodi cuena ñnotinona enoitimaci. Enoillamona, cuena ñnotinona duere finoitimaci. ⁵² Cue billamona, daje jofomo itino diese danomo iñeitimaci. Dabecuiro comini nainomo ia, menamie cue ñibeimo iite. Daje amani cue ñibeimo iñeite. Iese iñenia, daje amani cue ñibeimo iite. Mena cue ñibeimo iñeite. ⁵³ Cue lloga rafuena damierie ñnua muidona, ie moo illa ñibeimo ie jito iñeite. Ie jito ñibeimo ie moo iñeite. Ie ei illa ñibeimo naiñaiño jisa iñeite. Ie jisa ñibeimo ie ei iñeite. Ie jifaiño illa ñibeimo ie miodi iñeite. Ie mio ñibeimo ie jifaiño iñeite. Iese cominina uri itatañedicue.

Jesúdi monamo ite rana llofua rafue
(Mt 5.25-26; 16.1-4; Mr 8.11-13)

⁵⁴ Cominimo Jesús dane llote:

—Bie eniruemo afai dine uilliena omoi cioia, raicabitomoi: “Noci deiacade”. Iese omoi ciua meinomo, ua noci deide. ⁵⁵ Bie eniruemo beici dinena aifi bia: “Eo ecasiite” raicabitomoi. Iese aifi bia, ua eo ecasite. ⁵⁶ Abina uiñotinona abi caitadinodomoi. Monamo eruaillamona, rafue suillana uiñotomoi; iadedi omoi ecimo suiacalle rafuena raise uiñoñedomoi. Cue lloga rafuena raise cacaiñedomoi. ⁵⁷ Iemo omoi comeciaina raise facañedomoi. ⁵⁸ Ero, omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina jonetaite. ⁵⁹ Nana raise ibañenia, juez llua isoi, jino jaiñeitomoi. Ie isoide. Cue rafue omoi cacajamona, naimiemona duere sefuiñellena, Jusiñamui diga omoi rafuena raise fino.

13

Jesúdi comeciái iuai meiduana dana llua rafue

1 Cominina Jesús nia llofuetemo, jiaie comini Jesús dine billanona, raitimaci:

—Jerusalémo Jusiñamui jofomo dajerie Galileamona navui bitimaci. Ocainaiaina fatimaci, Jusiñamuina naimaci sedallena. Ie facaiseconi Pilato railla gobernadori soldaduaina orede, naie cominina fallena.

2 Jesús uai ote:

—¿Niese comeciaina facadomoi? “Bie comini iese duere sefuilla jira, jiaie Galilea comini baifemo jeacinona finodimaci” comeciaina facadomoi. 3 Iese omoi comeciaina facañeno; ia omoi comeciái iuai meiduamo comeciaina faca. Omoi comeciái iuai omoi meidoñenia, omoidi jiaí faifitomoi. 4 Siloé railla tidacana navui ana goillamo, dieciocho digamie saitabidimaci. Iena fididomoi. ¿Niese naimacimo omoi comeciaina facadomoi? “Nana Jerusalémo ite comini baifemo jeacinona finodimaci” comeciaina facadomoi. 5 Iese omoi comeciaina facañeno; ia omoi comeciái iuai meiduamo comeciaina faca. Omoi comeciái iuai omoi meidoñenia, omoidi jiaí faifitomoi.

Jesúdi ie Moo comini comeciái iuai meiduamo fecuise ocurilla llua rafue

6 Iena comini raise uñollena, Jesús bie rafuena llote:

—Damie ie illimo higuera railla riarana rite. Sicua mei, riarana ollena jibuisaide; iadedi nia llisiñede. 7 Ie jira ie illina sedaraimamo llote: “Ero, daje amani años bisoidicue, riarana ollena. Nia llisiñede. Iena mai tie. Naie illanomo jiaie riarana coco rillesa”. 8 Ie illina sedaraima uai ote: “Dama ite. Daje año nia seda. Riarana abina caigiticue. Eniruena caimaretaiticue. 9 Jiaie año llisia, mare. Llisiñenia, iena taiticoco”. Ie isoide. Jusiñamui omoi comeciái iuai meiduamo are ocurite; ia meidoñenia, omoína duere finoite.

Jesúdi jicaidiñaiña jillotaja rafue

10 Jiairuido sábadoruimo judíuai ofiracomo Jesús llofue. 11 Nainomo duidiñaiñodi ite. Janaba anamo naiñaiño illa jira, naiñaiño jicaide. Atona naidainide. 12 Naiñaiña Jesús ciuanona, naiñaiñomo llote:

—Ñoo, o duicomona jai jillodio. 13 —Ie mei naiñaiña jetade. Ieconí naiñaiño atona naidadate. Ie jira Jusiñamuimo iobillacinona fecade. 14 Naie ofiraco sedaraima icirite, sábadoruimo Jesús naiñaiña jillotaja jira. Nainomo itinomo llote:

—Seis digarui ite majillena. Nairuido omoi bi, omoi duicomona omoi jilloillena. Sábadoruimo biñeno. Sábadoruimo majiñedicaí.

15 Jesús uai ote:

—Majiñedinona abi caitadinodomoí. Sábado iruimo majicabidomoi. Sábado iruimo omoi toñiaina imaci illanomona suiñodomoi, jinui illanomo naimaci jiruaillena. Naie isoide majia omoimona mare. 16 Ie isoide. Bie riñodi Abraham micori comini. Omoi nairai iñaiño. Dieciocho años Janaba anamo jai illamona, duere sefuide. Naiñaiña canollena, sábado iruimo naiñaiña Taife anamona cue jillotaia, cuemona mare.

17 Iena Jesús lluamona, nana naimie dibeimo iñedinodi meidaitimaci; iadedi jiaie comini iobidimaci, diga mare rafue naimie finua jira.

Jesúdi mostaza ido llua rafue

(Mt 13.31-32; Mr 4.30-32)

18 Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. 19 Jiaie rafuedo iena omoimo lloiticue. Mostaza railla ido eo

janorede. Ie illimo damie iena rillamona, eo aillue riaradi sicode. Ailluena jira, nainomo silliniãia jicaiciaina finodimaci.

Jesús siritate rana llofuia rafue
(Mt 13.33)

²⁰ Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. ²¹ Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

Jesúdi Jusiñamui dine rille llua rafue
(Mt 7.13-14, 21-23)

²² Jesús diga nairaimo llofuecana jaide. Jerusalén dine jaide. ²³ Jesús oni jaillanona, damie naimiemo jicanote:

—Nama, ¿niga comini o uaina inoitimaci? —Jesús uai ote:

²⁴ —Monamo cue Moo dine jaille nasedi janorede isoide. Naie nasedo lliicana o jai. Ailluena comini naiedo jaiacanitimaci; iadedi fo jaititimaci. ²⁵ Naie jofo nama nase ibailla mei, ¿niese fo jaitomoi? Jino naidaillamona, nasena tutajanona, raitomoi: “Nama, o nase econo”. Naimie uai oite: “Omoina uiñoñedicue”. ²⁶ Dane lloitomoi: “O diga navui guiticaí. Cai illanomo llofuetio”; ²⁷ iadedi naimie uai oite: “Omoina uiñoñedicue. Cue cominiñedomoi. Jeacino omoi comecimo nia illa jira, mai jai”. ²⁸ Jusiñamui illanomo Abraham micorina, Isaac micorina, Jacob micorina, nana Jusiñamui facaina lloraini micorina cioitomoi; ia omoi jino illamona, duere sefullamona, eeditomoi. ²⁹ Diga comini Jusiñamui illanomo iitimaci. Ailluena judíuaiñedino naga nairaimona Jusiñamui illanomo biitimaci. Nainomo coninina caimare nabaitimaci. ³⁰ Naga nairaimona Jusiñamui cominina jillotarede. Cue rafuena cacadomoi; ia cue cominina omoi jaiacania, abi iedoñoeno cuena inocana omoi jailla.

Jesús Jerusalémo itinomo llua rafue
(Mt 23.37-39)

³¹ Ie facaiseconi dajerie fariseuai comini Jesús dine billano raitimaci:

—Benomona mai o jai. Cai illaíma Herodes ona meineiacade.

³² Jesús uai ote:

—Herodedi eo jifueraima. Naimie dine jai. Naimiemo llono: “Janaba anamo ite cominimona Janabana oni orecabidicue. Duidinona jillotacabiticue. Birui siño rafuena finocabidicue. Ico iese nia finoiticue. Iese cue maijille fuite. ³³ Nia oni jaiticue. Ailluena Jusiñamui facaina lloraini micoríai nainomo jai fiodailla isoi, Jerusalémo cue rafue jiai raire fuite” llono.

³⁴ Jerusalémo itinomo comecina facajano, Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie uruiaí sedaja isoi, diga icaiño cue anamo omoina uaidoiacadicue; iadedi omoi dinena cuena jitañedomoi. ³⁵ Iemona Jusiñamuidi omoi illanona jai faínonocai. Cue Moo dine jaiticue. Cue jailla mei, cuena cioiñeitomoi. Ico cue abido bia, comini cuena lloitimaci: “Jusiñamui oretagamie eo mare. Naimiedi cai Nama” lloitimaci.

14

Jesúdi abina siridimiena jillotaja rafue

¹ Jiairuido sábadoruimo Jesúdi fariseo imie jofomo guisaide. Naie fariseo imiedi illaicomini. Nainomo itino Jesúmo eo eruaidimaci. ² Guille facaise naie jofomo duidimie bite. Naimie abina siridimie. ³ Nainomo itinomona damieriedi fariseuai comini. Moisés micori llogacinuaina llofueraini jiai itimaci. Naimacimo Jesús jicanote:

—Sábadoruimo comena cue jillotaia, ¿omomona jeacino finodicue? ¿Niese Moisés micori llogacinuai iena llote?

⁴ Uaina oñedimaci. Ie jira Jesús duidimie onollina llinuamona, naimiena jillotate. Ie mei naimiena jino orede. ⁵ Nainomo itinomo llote:

—Sábadoruimo maijicabidomoi. Sábadoruimo omoi jurareta pozomo uaidena, iena jillotallena, nairuimo iena ari otomoi. Omomona naie isoide maijia mare. Bimiena cue jillotaja jira, ¿niese cuena jeare ñaitomoi? ⁶ Iena cacajanona, uainicaidimaci.

Jesúdi guillena uaidoganona llua rafue

⁷ Jesúdi naimaci guisaibillana cide. Jiaino baifemo illena, jofo nama abimo nana raiacadimaci. Iena ciuamona, naimacimo Jesús rafuena llofuate:

⁸—Rafue dine guillena omoina bu uaidoia, jofo nama abimo raiño, omoi baifemo itimie bi raillano. ⁹ Jofo nama abimo omoi raia, omoi baifemo itimie bia, jofo nama omomimo lloite: “Bimie mo omoi raillanona feca”. Meidailanona, oni rainadaitomoi. ¹⁰ Ie jira rafue dine omoina uaidoia, naie jofomo omoi ria, oni rai. Ie mei jofo nama jitaia, omomimo lloite: “Cue abimo rai”. Ie mei nana naie itino omoi iobillana cioitimaci. ¹¹ Ie isoide. Jusiñamuidi jiaimie afemo iacadimiena jiaimie afemo iñenana itataite. Jusiñamuidi jiaimie afemo iacaiñedimiena jiaimie afemo itataite.

¹² Naimiena uaidotimie mo Jesús llote:

—Guille rafuena o finoia, naga icaiño o nabaiñiaina uaidoño. Naga icaiño o cominina uaidoño. Naga icaiño o ecimo itino ucuberedinona uaidoño. Naimacina o uaidotona, jiairuido guillena ona uaidoitimaci, naie iba o ollena; ¹³ ia rafuena o finoia, dueredinona uaido. Ñuja-ñujacaida macaritinona uaido. Uisnidinona uaido. ¹⁴ Naimacimona iba ico o oñenamona, Jusiñamui ona caimare itataite. Jiairuido fiodaillamona mareuidino jilloia, monamo Jusiñamui ona ibaite.

Jesúdi ailluena guille finoca rafuena llua rafue

¹⁵ Jesús abimo itinomona Jesús llua na damie cacajano, raite:

—Monamo Jusiñamui illanomo itimiedi marena iite.

¹⁶ Jesús uai ote:

—Iena omoi raise uiñollena bie rafuena lloiticue. Damie aillue rafuena finode. Ailluena cominina uaidote. ¹⁷ Rafue illaruimo ie mullaimana orede, cominina dane uaidollena. Raite: “Mai bi. Nana guille finuadi jai fuite”; ¹⁸ ia biacaiñedimaci. Damie llote: “Eniruena como ibadicue. Iena jibuisaiacaducue. O rafuemo jaiñeitucue. Ie jira cue joreña icaiñeitiosa”. ¹⁹ Jiaimie llote: “Diez diga juraretana como ibadicue. Naimacina jibuisaiacaducue. O rafuemo jaiñeitucue. Ie jira cue joreña icaiñeitiosa”. ²⁰ Jiaimie llote: “Riño como otucue. Ie jira o rafuemo jaiñeitucue”. ²¹ Ie nama dine naie mullaima abido jaide. Comini biacaiñenana llote. Iena cacajano, rafue namadi icirite. Ie mullaímamo llote: “Cai nairai naisona jai. Dueredinona uaido. Ñuja-ñujacaida jaidinona uaido. Uisnidinona uaido”. ²² Ie mei naie mullaíma jaide. Abido naimie bia, ie namamo llote: “O llua finodicue. Ailluena comini jai bitimaci. O jofomo illino nia ite”. ²³ Rafue namadi uai ote: “Naisomo itinona bene atillena, cue jofona oruitallena, cai

nairaimona jino jai. ²⁴ Cue nano uaidogano cue guillena guiñeitimaci”. Ie isoide. Jusiñamui rafuena feiñotino monamo Jusiñamui illanomo ico iitimaci; ia naimie rafuena jitaiñedino nainomo ico iñeitimaci.

Jesúdi naimie llofueganona jaiacadino rafue

²⁵ Naie facaise ailluena comini Jesús diga jai jaisoidimaci. Naimacimo llote:

²⁶ —Cue llofuegamiena jaiacadimie cuena ie moo baifemo isiruilla. Cuena ie ei baifemo isiruilla. Cuena ie ai baifemo isiruilla. Cuena ie uruiaí baifemo isiruilla. Cuena ie amatiaí baifemo isiruilla. Cuena ie miriñotiaí baifemo isiruilla. Cuena ie abi baifemo isiruilla. Iese cuena isiruiñenia, cue llofuegamiena raise jainide. ²⁷ Cue llofuegamiena bu jaillamona, duere sefuicana jaite. Nibai naiemona fiodaite. Bu iese jaiacaiñenia, cue llofuegamiena naimie raise jainide.

²⁸ 'Ero, jiaie rafuedo iena lloiticue. Jofona bu finoacania, ie ucubena bailla diese uiñollena: “¿Niga raifite?” comecina nano facade. ²⁹ Iese naimie comecina facañenia, goguirai naidania mei, ie ucube riñenia, taiguanona, naimieri jaisitimaci. ³⁰ Raitimaci: “Ie jofo finua tainede; iadedi fuidonide”.

³¹ 'Ero, jiaie rafuedo iena lloiticue. Illaíma jobaimena finoacania, nano comecina facade: “Cuemo ite diez mil soldaduai. Cue bacauaimo ite veinte mil soldaduai. ¿Niese emodofiticue?” Comecina facaja mei: “Emodofititue” naimie comecina facajia, ³² nia are naimie bacauai ia, daguelli uicodo orede, ie fairiconi diga ñaillena. Raite: “Jobairiacaiñedicue; ia o diga bie rafuena raise finoacadicue”. ³³ Biemo comecina omoi faca. Ie raruiaimo bu comecina eo facaia, cue llofuegamiena jainide.

³⁴ 'Sal mare; iadedi ie caimano jai iñenia, ¿dane niese nibaiamona caimarenite? ³⁵ Jai maraiñede. Eniruemo jonegadena, jiaí maraiñede. Oni dotaca. Ie isoide. Cue llua isoi omoi iñenia, cue llofueganona jainidomoi. Omoi jeforena jira, raise fueollena, cue lluomo cacarei. Iena ñno.

15

Jesúdi naimiena ñnotinomona damie faifillana jitaiñena rafue (Mt 18.10-14)

¹ Naimaci bisoilla isoi ie rafuena cacaillena, diga gobierno ucubena oraini Jesús dine ofidimaci. Jusiñamui llogacinona raise jaiñedino jiaí ofidimaci.

² Iena ciuano, fariseuai cominidi, Moisés micori llogacinuaina llofueraini diga, Jesús joreñona ñaitimaci:

—Bimie maraiñedicinona finorainina feiñote. Naimaci diga jiaí guite.

³ Naimaci ñaiana uiñuanona, Jesús naimacimo bie rafuena llote:

⁴ —Omoimona damiemo cien toica llaudaiaí nibai ite. Naimacimona daje feiraite. Ie noventa y nueve llaudaiaína faínonocaida, iena jenuaite, ie baille dinori. ⁵ Baillanona, ie fecanicomo rocanocaida, iobicana biite. ⁶ Jofomo naimie ria, ie nabaiñiaína uaidoite. Ie ecimo itinona jiaí uaiduanona, raite: “Cue diga iobi. Cue feiraite llaudana jai baiticue”. ⁷ Ie isoide. Cue rafuena cue lluamona, damie ie comeci jeacinona faínonocaillamona, ie comeci iuai meiduamona, monamo itino eo iobitimaci; iadedi noventa y nueve comini marena illamona, janore iobitimaci.

Jesúdi faifide ucubena bailla llua rafue

⁸ Jesús llote:

—Jiaie rafuena omoimo lloiticue. Dañaiñodemo diez diga ucube ite. Naiemona daje ucube naiñaiño faifia, lamparín unianona, ie jofona gallaite. Eo jenoite, ucube ie baille dinori. ⁹ Iena naiñaiño baia, ie nabaiñiaína uaidoite. Ie ecimo itinona jiaí uaiduanona, raite: “Cue diga iobi. Cue faifide

ucubena jai baiticue”. ¹⁰ Ie isoide. Cue rafuena cue llua mona, damie ie começi jeacinona faimonocaillamona, ie começi iuai meidua mona, Jusiñamui jaienisaï eo iobidimaci.

Jesúdi damie ie moo faimonocailla llua rafue

¹¹ Jesús llote:

—Jiaie rafuena omoimo lloiticue. Damie mo mena jito ite. ¹² Ie mo mo jamamie llote: “Moo, o fiodailla mei, o raruiamona janore feiñoiticue. O fiodaillana sedaacaiñedicue. O raruiaina cue facaina birui jitaidicue. Cuemo ine”. Ie jira ie moo naimie mo fecade. ¹³ Ie mei nano nie dinori illamona, nana ie raruiamona iraiamona, jiaie enruemo jaide. Nainomo ie ucube jamai buruemo faiaide. ¹⁴ Nana naimie ucube fuidua facaise, naie enruemo guille iñede. Aime guitimaci. Naimie jiaï aime guite. ¹⁵ Ie jira nainomo ite patrón dine maijiaide. Naie patrón ie chanchuaina sedallena naimiena orede. ¹⁶ Naimiena jaca buna ecarainina jira, chanchuai guillemona guiacade. ¹⁷ Iese naimie duere sefuilla jira, ja muidomo abina uiñoocaillamona, começina facade: “Cue moo jofomo nana naimie mullaiaï raise guitimaci. Guille fiebicabite; iadedi bene aimeri fiodaiticue. ¹⁸ Cue moo dine abido ja jaiticue. Naimie mo lloiticue: Jusiñamuimo jeacinona finodicue. Omo jeare jiaï finodicue. ¹⁹ Odi: ‘Cue jito’ cuena raiño. O mullaiaï illa isoi, cuena abido feiño”. ²⁰ Ie facaise ie moo dine jai jaide. Nia aare naimie ia, ie moo naimiena ciode. Ie jirona duenaillanona, naimie dine aiside. Naimiena caimadote. Jiaï llibanote. ²¹ Ie jito naimie mo llote: “Moo, Jusiñamuimo jeacinona finodicue. Omo jeacino jiaï finodicue. Odi: ‘Cue jito’ cuena raiño”. ²² Ie moo iena cacajano, ie mullaiaï mo llote: “Cue jirona naimie eruaillena, eo mare iniroina ati, naimie jitallena. Cue jirona naimie illa jira, iena jitallena, anillona ati. Naimie jitallena, zapatona jiaï ati. ²³ Janoreta farediretana fano. Iena raise finuanona, iena mai cai guilli. Iobillamona, caimare ebirede rafuena finoiticaï. ²⁴ Navui cuemona cue jito fiodaite isoide. Cajue cuemo dane abido rilla. Navui cuemona naimiedi faifide; iadedi birui naimiena dane ciodicue”. Naimie llua isoi, rafuena finodimaci. ²⁵ Naie facaise nano doforamie illimo ite. Jofomo abido naimie bia, comini iraisillana cacade. ²⁶ Daje mullaïmana uaiduanona, naie rafuena jicanote. ²⁷ Naie mullaïma uai ote: “O ama abido jai bite. O ama ramo jiriño abido billa jira, o moo ie janoreta farediretana jai fatatate”. ²⁸ Iena cacajano, icirite. Fo jaiacaiñede. Ie jira ie moo jino bite. Naimiena fo uaidote. ²⁹ Ie mo mo llote: “Ero, diga años o diga maijidicue. O uaina jaca inoticue; iadedi cue nabaiñaï diga, rafuena cue finollena, chivo cuemo jaca fecañedio. ³⁰ O jito jamamie ie ucube callirediñaiñuaimo fuidode; iadedi abido naimie billano, naimie facaina janoreta farediretana fatatatio”. ³¹ Ie moo uai ote: “Moo, nagarui cue diga itio. Nana cue radi oïenite. ³² Cuemona o ama navui fiodaite isoide; iadedi naimiena dane ciodicue. Naimie navui faifide raiticue; iadedi cajue cuemo dane abido rilla. Cue iobillanona rafuena finodicue”. Bie rafuemona omoï fueollena, iena jai lloticue —Jesús llote.

16

Jesúdi patrón ie mullaïma finoca rafuena llua rafue

¹ Ie llofueoicaiganomo Jesús jiaie rafuena llote:

—Ucuberede patrón ie mullaïmana ie rana sedatate. Naie patrón eneno oni illanona, ie mullaïma ie rana raise sedañenana fidide. ² Naimiena uaiduanona, naimie mo jicanote: “¿Maraiñede o finoca rafuena niese fididicue? Omo ite cuentas cioacadicue. Cuemo ati. Cue diga jai maijñeitio”. ³ Iena

cacajano, naie mullaïma comecina facade: “¿Ñiese ñibaiticue? Cue nama cuena jai dotaacade. Maijiana ocuinidicue. Jiaie cominimona ucube jamaï jicajana meiruiticue. ⁴ Cue finuana jai uiñoticue. Naimaci jofomo comini cuena ico feiñollena cue dotaja mei, nana cue patrón debedinona uaidoiticue”. ⁵ Ie jira naimacina uaidote. Damiemo jicanote: “¿Cue patrómo ñiga debedio?” ⁶ Uai ote: “Cien bidones raifi aceitunamona oga aceitena debedicue”. Naie mullaïma raite: “O rabemo jarire ja cueno: cincuenta bidones”. ⁷ Jiaïmiemo jicanote: “¿Ñiga debedio?” Uai ote: “Cien digagai trigo raifi debedicue”. Naie mullaïma ñinena raite: “O rabemo ochentana cueno”. ⁸ Iena fidiano, naie mullaïmamo ie patrón raite: “Jiaïruido marena o illemo o comecina raise facadio. Eo abina uiñotimedio” raite. Ero, Jusiñamui ñinoñedinodi naimiena ñnotino baïfemo ra fecajana baitadimaci. ⁹ Naiemona omoï fueollena, omoïmo lloiticue. Omoïmo ite ra ñiga dueredinona cano. Iemona omoï nabaiñiaïna jaitimaci. Omoï fiodaia, omoï ra bene fiebite; ia Jusiñamui illanomo naimaci ñiga omoï ia, naimacina birui omoï canuamona, nainomo omoïna marena ñaitimaci. ¹⁰ Janore ra omoïmo illamona, Jusiñamui facaina birui omoï raise maijia, ailluena ra omoïmo itedena, Jusiñamui facaina jiaï raise maijïitomoï. Janore ra omoïmo illamona, marañede rafuena birui omoï finoa, ailluena ra omoïmo itedena, marañede rafue ñia jiaï finoitomoï. ¹¹ Omoïmo birui ite ra ñiga Jusiñamui facaina omoï raise maijïñenia, naimiemona jiaie rana feiñoñeitomoï. ¹² Omoï anamo ite ra ñiga Jusiñamui facaina omoï raise maijïñenia, Jusiñamui ie rafue omoïmo itañeite. ¹³ Mena patrones ñiga daruido buna jaca maijinide. Mena ñiga bu maijiacania, damiena jiaïmie baïfemo gaitte. Ie gaiamie ocuica rana finote. Jiaïmie ocuica rana raise finote. Ie isoide. Raruiaï ollemo comecina omoï eo facaia, Jusiñamui jitaillacinomo comecina raise facañeitomoï.

Jesúdi fariseuai comini ñiga dane ñaia rafue

¹⁴ Jesús llofuiana fariseuai comini cacajano, ucubena eo gaia jira, naimie uaina jamadimaci. ¹⁵ Naimacimo Jesús llote:

—Omoï finoca rafuemona comini omoïna: “Mare” raillana jitaïdomoï; iadedi Jusiñamui omoï comeciaï marañenana uiñote. Iese omoï illana Jusiñamui gañede. ¹⁶ Jusiñamui facaina lloraïni micoriaï ciegafuiaïmona Jusiñamui rafuena cacacabidomoï. Moisés micori ciegafuiaïmona iena jiaï cacacabidomoï. Juan Bautista micorimona naimie anamo omoï illana Jusiñamui jitaïllana cacadomoï. Jusiñamui ñibeïmo omoï comeciaï iuaina meiduana cacadomoï. Iena jiaï llocabiticue. Iena ailluena ñnuamona, Jusiñamui ñibeïmo birui duere iacadimaci. ¹⁷ Mona enrue ñiga ñia ia, nana Jusiñamui llogacinuaï suicana jaite.

Jesús ñima ie aïna dotaja rafuena llofui rafue

(Mt 19.1-12; Mr 10.1-12)

¹⁸ Jesús llote:

—Naga aïna dotadimiedi, jiaïñaiño ollena, jeacinona jai finode. Dota-cañaiño bu oia, jeacinona jai finode.

Jesúdi ucuberedimie iaïmaiaï Lázaro ie rafuena llua rafue

¹⁹ Jesús jiaie rafuena llote:

—Cue llogacinona omoï raise uiñollena, bie rafue lloiticue. Ucuberedimie ite. Eo mare ñinoina jitate. Eo caïmare raise guicabite. ²⁰ Naimie nasemo Lázaro raillamie jamai bïde. Naimiedi dueredimie. Efonaitimie. ²¹ Naimiedi ucuberedimie guiga allamona guiacade; ia guñede. Jiconiaïdi naimie efociaïna mecabite. ²² Ie mei naimie fiodaite. Jusiñamui comina

naimie illamona, Jusiñamui jaienisaí naimie joreño monamo Abraham micorí joreño illanomo uitimaci. Ucuberedimie jiaí fiodaite. Comini naimiena raitimaci. ²³ Jusiñamui cominina naimie iñenamona, naimie joreño iraimo jaide. Nainomo naimie duere sefuillamona, Abraham joreña aarena ciode. Naimie ecimo Lázaro micorí ie joreña jiaí ciode. ²⁴ Abraham joreña uaidote: “Cue moo Abraham, cuena duenai. Lázarona cue dine oreta, ie onocai diga, jinuína cue fuemo llocatallesa, cue fueo manare jaillena. Bie iraimona jai eo legi cacadicue”. ²⁵ Abraham joreñodi uai ote: “Moo, o illa dinori naga ra omo ite. Marena itio; iadedi Lázaro duere sefuide. Birui naimie marena ite; iadedi o duere sefuidio. ²⁶ O dine jainidicaí. O enefebetuemo itio. Cai enefebetuemo jiaí iticaí. Caimona omoi dine bu jaiñellena, omoimona cai dine bu biñellena, iese ite”. ²⁷ Ucuberedimie micorí joreño dinena uai ote: “Cue moo jofomo Lázarona oreta. ²⁸ Cuemo cinco amatiaí ite. Naimacimo riire llollena, bie iraimo naimaci riñellena, naimiena oreta”. ²⁹ Abraham joreñodi uai ote: “Naimacimo Moisés micorí cuegafuiaí ite. Jusiñamui facaina jaie lloraini micoriaí cuegafuiaí jiaí ite. Iemo naimaci comeciaina facallesa”. ³⁰ Uai ote: “Iese lloño. Iemo comeciaina facañeitimaci; iadedi fiodaillamona jilluanona, naimaci dine bu jaia, naimiena ñnoitimaci. Naimaci comeciái iuai meidoitimaci”. ³¹ Abraham joreñodi uai ote: “Moisés micorí cuegafuiaí, Jusiñamui facaina jaie lloraini micoriaí cuegafuiaí naimaci ñnoñenia, fiodaillamona bu jilloia, naimiena jiaí ñnoñeitimaci” —Jesús llote.

17

Jesúdi jeacinona finoñenana llofua rafue (Mt 18.6-7, 21-22; Mr 9.42)

¹ Ie llofueoicaiganomo Jesús llote:

—Diga ramo omoi faicana uitinomo riitomoí. Omoi ramo faitimie duere sefuite. Jusiñamui omoi ramo faitimiena duere finoite. ² Como creyentena jaidimiena ramo bu faia, naimie cimaimo aillue nofici maianona, joraimo corobaillena naimiena dotacadena, mare. ³ Como creyentena jaidimiena ramo omoi faiñellena, abina omoi rairui. O ecimo itimie ona jeare finoia, naimiemo iena llono. Ie comeciaina meidoiacania, naimie jearede finoca rafuena feita. ⁴ Nagarui diga icaiño ona jeare naimie finoia, naga icaiño o diga naimie marena dane ñaiacania, naie rafuena feita.

Jesúdi naimiena ñnuana llua rafue

⁵ Ie doce llofueoicaigano Jesúmo llote:

—Ona ñnoticaí; ia caina o uaina eo ñnota.

⁶ Uai ote:

—Jusiñamuina eo janore ñnotomoidena, bene ite amenamo omoi lloia: “Benomona jai. Joraimo sico”, naie amena omoi uaina ñnote.

Jesúdi ie facaina llofueoicaigano maijia llua rafue

⁷ Ie llofueoicaiganomo Jesús llote:

—Bie rafuemono omoi fueollena, iena lloiticue. Illimo ie mullaíma maijiamona, ie toiníai sedajamona jofomo abido naimie ria, ie patrón naimiemo lloñeite: “Mai nano guisaíbi”; ⁸ iadedi naimiemo lloite: “Cueiena guillena nano fino. Cuena eca. Ie mei guitio”. ⁹ Naie mullaíma ocuica rana finua muidona, mullaímana naimie illa jira, ie mullaímamo patródi iobillacinona fecañeite. ¹⁰ Ie isoide. Nana cue llua omoi finodomoina, dani omoi maijiadi, cue cominina omoi illa jira, cuemona iobillacinona feiñoñeitomoí.

Jesúdi diez efonaitinona jillotaja rafue

¹¹ Jerusalémo ie llofueoicaigano diga Jesús jaidemo, naimie nabeimo Samaria enirue ite. Naimie jarifebeimo Galilea enirue ite. ¹² Nairai dine naimie riacania, diez efonaitinodi naimiemo dafaifidimaci. Eneo oni naidaidimaci. ¹³ Naimiena ado uaidotimaci:

—Jesús, Maestro, caina duenai. Caina ja jillota.

¹⁴ Naimacina Jesús ciuanona, naimacimo llote:

—Mai jai. Jusiñamui diga ñairainimo omoi abina acata. —Jaidimacimo, jillodimaci. ¹⁵ Ie abi jilluana ciuano, naimacimona damie Jesús dine abido bite. Jusiñamuimo iobillacinona ado fecade. ¹⁶ Naimiemo iobillacinona jiai fecallena, Jesús uicomo ana bitadate. Naimiedi judíuñedimie. Samaritano imie. ¹⁷ Jesús llote:

—Diez digamiedomoi. Omoína jai jillotaticue. ¿Ninomo jiaínodi nueve digamie itimaci? ¹⁸ ¿Niese Jusiñamuimo iobillacinona feacaaiñedimaci? Dama bimie fecade. Naimiedi judío imieñedimie.

¹⁹ Jesús naimiemo llote:

—A naidada. Mai jai. Cueno o ñnua jira, jai jillodio.

Jesúdi Jusiñamui ie cominina sedajana llofuia rafue

(Mt 24.23-28, 36-41)

²⁰ Naie facaise fariseuai comini Jesúsno jicanotimaci:

—¿Niruido Jusiñamui caina bene sedaite?

Jesús uai ote:

—Siño rafuena omoi ciuamona, Jusiñamui omoína sedallena uiñoñeitomoi.

²¹ Buena ciuamona raíñeitomoi: “Jadi, Jusiñamui bene caina jai sedade”. “Jadi, batine caina jai sedade”; iadedi omoi motomo itinomona Jusiñamui díbeimo damierie illamona, Jusiñamui omoi motomo jai illana uiñoitomoi.

²² Ie llofueoicaiganomo llote:

—Jairuido duere sefuillamona cue diga janore jisa iacanitomoi; iadedi iese nia iñeitomoi. ²³ Damierie raia: “Ero, batine Cristo jai bairede” nainomo jaiñeno. Naimaci raia: “Ero, bene Cristo jai bairede” iena ñnoñeno. ²⁴ Mona borillamona mona jillacidi usere ciode. Ie isoide. Cue abido bia, nana comini iena uiñoitimaci. ²⁵ Birui iese nia suiñeite. Nano duere sefuiticue. Birui ite comini cuena jiai feiñoñeitimaci. ²⁶ Abido cue billirui iaírei ia, Noé micori facaiseconi itino isoi, comini iitimaci. Naimaci duere sefuillemo Noé micori facaise itinodi comeciaina facañedimaci. ²⁷ Naie facaiseconi nia eo noci deiñenia, Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. Nia noci deiñenia, Noé micori lloga uaina ñnoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue. ²⁸ Lot micori facaiseconi daje isoidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Rana ibauidimaci. Iena fecauidimaci. Illimo maijuuidimaci. Jofona finouidimaci. Naimaci isoilla isoi icana jaidimaci. ²⁹ Dani iemo comeciaina facadimaci. Jusiñamuimo comeciaina facañedimaci. Iese icana jaidimaci, Sodomamona Lot micori jailla dinori. Nairui monamona boode azufre ebena billanona, nana Sodomamo itino jobaide. Ebena nana faifidimaci. ³⁰ Ie isoide. Abido cue billiruimo comini iitimaci. Cue bia, ebena biiticue. ³¹ Naie facaise bu ie jofo emodomo ia, ie raruiaina ollena, naimie diga uillena, bu fo jaiñena. Illimo bu ia, ie raruiaina ollena, ie jofomo bu jaiñena. ³² Iemona fueollena, Lot ai micori rafuemo comeciaina faca. Naiñaiño ie raruiaimo

daño comecina facajamona, na ie abi diga faifide. ³³ Dama ie raruiamo ie comecina bu facaia, ja muidomo faifite. Cue diga jaca iñeite; iadedi cue jitaillacinona finuamo ie comecina bu facaia, monamo cue diga jaca iite. ³⁴ Cue bille facaise menamie daje cuartomo iniano iitiaimaia. Damie jaite. Jiamie fiebite. ³⁵ Mena riño danomo doberillanona iitiaiñuai. Dañaiño jaite. Jaiñaiño fiebite. ³⁶ Menamie illimo maijiano iitiaimaia. Damie jaite. Jiamie fiebite.

³⁷ Ie llofueoicaigano jicanotimaci:

—¿Ñine jaitimaci?

Uai ote:

—Urujaisai rifaide ramo ofillana uiñua isoi, nana cuena inotino cue abido billena uiñoitimaci. Cuemo duillamona, cue diga jaitimaci.

18

Jesúdi feciñona llua rafue

¹ Ie llofueoicaiganomo Jesús rafuena dane llote:

—Jusiñamuimo jicabi, omoi jicaca rafue omoi feiñolle dinori. Raire feiñoñenia, abina jafueño. ² Iena omoi raise uiñollena, bie rafuena lloiticue. Jiaie nairaimo juez ite. Jusiñamuina jaciruiñede. Cominina jiai jaciruiñede. ³ Nainomo naimie dine daje feciño jai-jaicabillanona, raite: “Cuen a duere finodimie mona cuena cano”. ⁴ Naimie dinena raite: “Dama iesede. Ona canoñeiticue”. Ie mei ie comecina facade: “Jusiñamuina jaciruiñedicue. Cominina jiai isiruiñedicue; ⁵ ia naiñaiño cuemo sefuire bina jira, naiñaiño canoiticue, cue rairafaiñellena”.

⁶ Jesús llote:

—Maraiñede juez llua cacadomoi. Ja muidomo naiñaiño canode. ⁷ Ero, biemo omoi comeciaina faca. Jusiñamui naie juez isoñede. Nagarui Jusiñamuimo naimaci jicaia, ¿ñiese naimie ie fetocanona canoñeite? Jaca canoite. ⁸ Raire fairuanona, naimacina raire canoite; iadedi abido cue bia, ¿niga cuena inotino itimaci? Nibai ailluena cuena inoñeitimaci.

Jesúdi Jusiñamuimo menamie jia llua rafue

⁹ “Mareuidicai” dajerie railla jira, “Jiaie comini baifemo faiticai” dajerie railla jira naimacimo Jesús bie rafuena llote:

¹⁰ —Jusiñamui jofomo, nainomo jillena, menamie jaidiaimaia. Damie fariseo imie. Jiamie gobierno ucubena oraima. ¹¹ Fariseo imie naidadacaida, dama anado jide: “Jusiñamui, jiaie comini isoñedicue. Fidimaci. Maraiñedimaci. Naimaci aiñede riño diga itimaci. Cue ecimo ite ucubena oraima isoi iñedicue. ¹² Naga semana menarui guicabiñedicue, ona raise cue sedajanona. Cue ramona omo fecacabidicue. Macaibaite” jide. ¹³ Gobierno ucubena oraima eneno naidadacaida, jide. Monamo eruaiñede; iadedi jamai bue isoillanona, jogobena farode. Raite: “Jusiñamui, jeacinona finoraímadicue. Cuen duenai. Macaibaite” jide. ¹⁴ Jusiñamuidi jiamie afemo iacadimiena jiamie afemo iñenana itataite. Jusiñamuidi jiamie afemo iacaiñedimiena jiamie afemo itataite. Ie jira gobierno ucubena oraima ie jofomo Jusiñamuimona jai marebicaillanona jaide; ia fariseo imie iese jaiñede.

Jesúdi naimie dine uruiai billana jitailla rafue

(Mt 19.13-15; Mr 10.13-16)

¹⁵ Naie facaise Jesús dine comini naimaci eisaiana atisite. Ie onolli naimacimo naimie joniana jitaídimaci. “Naimacina raise cano” ie Moomo llollena jitaídimaci. Iena ciuanona, ie llofueoicaigano cominina Jesús dine billana rairuidimaci; ¹⁶ iadedi Jesúdi eisaiana uaiduano raite:

—Uruiái cue dñe billesa. Naimacina rairuiñeno. Cuená bie isoi ñnotinodi Jusiñamui cominidimaci. ¹⁷ Bie uruiái abina iedoñedimaci. Einamacimona jamái bue isoidimaci. Naimaci isoi bu iñenia, Jusiñamui cominina jaiñeite. Jusiñamui naimiena sedallena, Jusiñamui cominina naimie jaiñeite.

Ucuberedimie Jesús diga ñaia rafue
(Mt 19.16-30; Mr 10.17-31)

¹⁸ Ie facaise illaicominimona damie Jesúmo jicanote:

—Maestro, odi mareuidimiedio. Jusiñamui diga ico monamo cue jaca illena, ¿nie isoide rana finoiticue?

¹⁹ Jesús uai ote:

—¿Bue ñellena cuena: “Mareuidimiedio” raitio? Dama damie mareuidimiena. Naimiedi Jusiñamui. Naimiemo jicano. ²⁰ Moisés micori llogacinuaina ñnocana jai. Jaie cuete: “O aiñede riño diga iñeno. Comena meineño. Rana fiñeno. Jiaimiena o llogidoia, tainona lloño. O moo uaina ñno. O ei uaina ñno”.

²¹ Uai ote:

—Cue uruena illa facaisemona nana bie llogacinuaina ñnoticue.

²² Iena cacajano, Jesús raite:

—Daje rana nia finoñedio. O raise marebicaiacania, omo ite raruiaina feca. Naie ucubena dueredinomo feca. Cuená o ñnuamona, monamo ico jaca iitio. Cue llofueoicaiganona o illena, mai cue diga bi.

²³ Jesús lluana naimie cacajano, sunaicaide. Naimiemo eo ailluena ra illa jira, iena fecaacaiñede. ²⁴ Naimiemo eruailano, Jesús raite:

—Ucuberedinodi Jusiñamui cominina jaillena eo sefuiruite. ²⁵ Igi do ifodo camello jaca jainide. Ie isoide. Ie ra isiruillamona, ucuberedimiedi Jusiñamui cominina jiai raise jainide.

²⁶ Jesús lluana cacadino jicanote:

—¿Iemona buca jillobiti?

²⁷ Jesús uai ote:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro raite:

—Ero, o llua isoi cai jofuena fañonocaida, o diga jaisoidicai.

²⁹ Uai ote:

—Uanaicinona lloticue: Jusiñamui cominina naimie jaillamona, ie jofona bu fañonocaia, ie aina bu fañonocaia, ie amatiaina bu fañonocaia, ie moona bu fañonocaia, ie eina bu fañonocaia, ie uruiaina bu fañonocaia,

³⁰ Jusiñamui mona ailluena ibana birui feiñoite. Monamo ico jiai jaca iite.

Jesúdi ie fiodaillena dane llua rafue
(Mt 20.17-19; Mr 10.32-34)

³¹ Ie doce llofueoicaigano eneno uillanona, dani naimacimo llote:

—Ero, Jerusalémo jai jaidicai. Monamona billanona, imana jaidicue. Jusiñamui facaina lloraini cuena jaie cuetimaci. Nana naie rafue ja suite.

³² Judíuainedonomo judíuai illaicomini cuena fecaitimaci. Cueri jifanoitimaci. Cuená jeare finoitimaci. Cuená tuallaitimaci. ³³ Cuená faitimaci. Cuená meineitimaci; ia darui amani illanona, cue fiodaillamona jilloiticue.

³⁴ Naimie lluana raise cacaiñedimaci. Naimacina iena Jesús nia raise llofueña jira, iena raise uiñoñedimaci.

Jesúdi uisidimiena jillotaja rafue
(Mt 20.29-34; Mr 10.46-52)

³⁵ Jericó railla nairaïmo ie llofueoicaigano diga Jesús riacademo, uisïnidi mie nairo fuemo raillana ciode. Ucubena jamai jica-jicade. ³⁶ Ailluena comini Jesús diga jaillana naimie cacajano, naie cominimo nie isoide rafue illana jicanote. ³⁷ Uai otimaci:

—Nazaret ie Jesús como bene bite.

³⁸ Ie jira naimie cuirioide:

—David micori Jitona o illamona, cuena duenai. Cuena cano.

³⁹ Uicodo jaidino naimiena lletade, naimiena llucitallena; iadedi naimie eo cuirioide:

—David micori Jitona o illamona, cuena duenai.

⁴⁰ Naimiena cacajano, Jesús naidadate.

—Cue dine naimiena ati —llote. Naimiena atianona, naimiemo Jesús jicanote:

⁴¹ —¿Niese ona cue nibaiana jitaïdio?

Uai ote:

—Maestro, cioacadicue.

⁴² Jesús raite:

—Mai eroda. Cuena o ñnua jira, jai jillodio.

⁴³ Ieconï naimie uisidi ciode. Jusiñamuimo iobillacinona fecajano, Jesús diga jaidino diga naimie jaide. Naimie jilluana ciuamona, nana comini Jusiñamuimo iobillacinona jiaï fecadimaci.

19

Jesús Zaqueo diga illa rafue

¹ Jericómo Jesús rillanona, nainomo macaritemo, ² naie facaise nainomo Zaqueo raillamie ite. Gobierno ucubena nanoca oraïma. Naimiedi eo ucuberede. ³ Jesús bai macaritemo, Zaqueo naimiena cioacade; iadedi ailluena comini illamona, Zaqueo ianorina jira, Jesúsna cionide. ⁴ Ie jira uicodo aisicana jaide, amenamo a jaillena, naimiena cioillena. ⁵ Naimie dine Jesús rillano, Zaqueomo a erodate. Naimiena uaidote:

—Zaqueo, raïre ana bi. O diga danomo illena, o jofo dine jaiticue.

⁶ Ie jira raïre ana bite. Ie jofomo Jesúsna iocire feiñote. ⁷ Iena jiaïe comini ciuanona, Jesús joreña jeare ñaïanona raitimaci:

—Mariñedicinona ñnoraima jofomo naimie jaide.

⁸ Jesúsna naimie feiñua mei, Zaqueo Jesús ecimo naidaita, naimiemo llote:

—Nama, atuedo cue raruiaina dueredinomo biruimona fecaiticue. Bu-mona navui cue fiïa, cuatro diga ra abïdo iiticue.

⁹ Jesús uai ote:

—Iese o llua jira, o comini diga Jusiñamuina jai o ñnuana uiñoticaï. —Jamai bitinomo llote:

—Zaqueodi Abraham micori jito; ia Jusiñamuina navui ñnoñede. ¹⁰ Naimie isoidino jillobitallena, biticue. Monamona billanona, imana jaïe jaidicue. Jusiñamuina ñnoñedinona jenuaïbidicue, naimacina jillobitallena.

Illaïma ie mullaïaïmo ucubena fecaja rafue

¹¹ Zaqueo jofomo itino Jesús llofuiana cacajano, comecina facadimaci: “Jerusalén ianori ite. Nainomo Jesús rilla mei, illaïma isoi nainomo Jusiñamui ie cominina raïre sedaite”. ¹² Iena naimaci raise uiñollena, Jesús bie rafue naimacimo llote:

—Illaïma jito ie nanoca illaïma dine jiaïe nairaïmo jaide. Ie cominina sedallena, nanoca illaïmamona ie uaina feiñoiacade. Iemei abïdo biacade. ¹³ Nia naimie jaiñenia, diez diga ie mullaïaina uaidote. Nagamierie daberie ucubena

fecade. Naimacimo llote: “Bie ucube diga jiaie ucube ocana omoi jai”. Ie mei oni jaide. ¹⁴ Ie comini naimiena enoidimaci. Jiaisona nanoca illaïma dine oretajano, raitimaci: “Bimie caina sedajana jitaiñedicaï”; ia nanoca illaïma dinena naimacilluana jaca cacaiñede. Ie jira naie nanoca illaïma naie illaïma jitomo ie uaina ite. ¹⁵ Ie uaina feiñua mei, abido ie eniruemo jaide. Rilla mei, ie mullaïaina uaidote. Nie diese ucubena ocana naimaci jaillana uiñoiacade. Ie jira naimacina uaidote. ¹⁶ Nano bitimie raite: “Nama, o cuemo dabe fecadio. Dabedemona jai cuemo ite diez digabe”. ¹⁷ Naie illaïma naimiemo llote: “Eo marena maijidio. Mare mullaïmadio. Janore ra raise o sedaja jira, ona diez nairaïaina sedataiticue”. ¹⁸ Ie mei jiaie mullaïma billanona, raite: “Nama, o cuemo fecaca dabedemona jai cuemo ite cinco digabe”. ¹⁹ Illaïma llote: “Ona cinco nairaïaina sedataiticue”. ²⁰ Ie mei jiaie mullaïma bite. Raite: “Nama, jadi, o cuemo iga o ucube. Iniroimo tilliano, iena eenoticue. ²¹ Ona cue jaciruillano, odi eo riimiena jira, iena jamai eenoticue. Jiaie comimona ie rana bairocabidio. O maijiñena ramona ocabitio”. ²² Illaïma dinena raite: “Eo maraiñede mullaïmadio. Cuena o llua isoi, ona duere finoiticue. Cue riimienana uiñotio. Jiaie comini ie rana cue bai ruana uiñotio. Cue maijiñena motomo ra cue uana uiñotio; ia buena maijiñedio. ²³ ¿Bue ñellena bancomo cue ucube joneñedio? Bancomo itena, jiaie ucubena ocana jaide. Ie mei abido cue bia, omo cue fecaja ucube baifemo feiñoticue”. ²⁴ Nainomo itinomo llote: “Naie ucube naimiemono bai ruano, diez digabe itimie feca”. ²⁵ Uai otimaci: “Naimiemo ailluena ucube jai ite. ¿Bue ñellena dane jiaie fecaitio?” ²⁶ Illaïma dinena uai ote: “Ailluena raredimie jiaie rana feiñoite; iadedi janore raredimie ie rana faifite. ²⁷ Cuena enoidinona bene ati. Naimacina cue sedajana jitaiñedimaci. Naimacina meine”.

Jesús nia llote:

—Ie isoide. Iese omoimo suiñellana, Jusiñamui ie comini sedalliruina omoi uiñoñena jira, cue jitaillacino finocana jai.

Jesús Jerusalémo jailla rafue

(Mt 21.1-11; Mr 11.1-11; Jn 12.12-19)

²⁸ Naie rafuena llofuia mei, Jerusalén dine comini uicodo ie llofueoicaigano diga Jesús jaide. ²⁹ Jerusalén iaieicaidemo, mena nairaïmo riacade. Betfagémo railla nairaïmo ride. Betania nainomo jiai ite. Olivos railla anedumo naga nairaï iaïmaiaï ite. Ie llofueoicaiganomona mena orede. ³⁰ Raite:

—Bie nairaï illa uicomo mai omico jai. Nainomo cuinaca burritona baitomico. Naie burrito emodomo nia buna jaiñena. Iena suiñuano bene ati. ³¹ Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide”.

³² Naimie llua isoi jaidiaïmaiaï. Naimie llua isoi burritona baitiaïmaiaï.

³³ Ie facaise ie nanaï iaïmaiaïmo jicanote:

—¿Bue ñellena cai burritona suiñodomico?

³⁴ Uai otiaïmaiaï:

—Coco Nama iena jitaide.

³⁵ Ie mei Jesúmo iena atidiaïmaiaï. Burrito emodomo iniroina jobianona, ie emodomo Jesúdi rainadate. ³⁶ Jesús iese jaidemo, naimiena iobital-lena, illaïma isoi naimie jaillena, comini imaci iniroi diga, naiso motomo jobedimaci. ³⁷ Jerusalémo joide naiso ite nafai muidomo naimie rillanona, naie ituemo ana jaillanona, nana Jesús diga jaidino caimare itimaci. Nana Jesús siño finoca rafuena naimaci jai cïua jira, iena naimaci uibiñuamona, Jusiñamuimo iobillacinona ado eo fecadimaci. ³⁸ Raitimaci:

—¡Cai Illaíma billa! ¡Jusiñamui mamecido bitimíemo cai iobicabillasa! O muidona Jusiñamuidi comini diga uri ite. ¡O finoca rafue muidona Jusiñamuimo iobicabillasa!

³⁹ Naie cominimona dajerie fariseuai raitimaci:

—Maestro, o diga jaidinona llicaillena, naimacina lleta.

⁴⁰ Uai ote:

—Naimaci llicaiia, biso fuemo ite noficidi cuena marena ñaite.

⁴¹ Jerusalémo Jesús iaírei ria, iena ciuano, eede. ⁴² Raite:

—Jerusalén itino, Jusiñamui diga omoi uri illena jai biticue. Omoína naimie cominina itataiacadicue; iadedi iena jitaiñedomoi. Iena jitaídomoidena, íco duere sefuiñeitomoi. ⁴³ Jiaíruido omoi bacauai jobaimena finuanona, omoína cirinoitimaci. Omoi ecido llaitimaci. ⁴⁴ Omoína meineitimaci. Omoi uruiána meineitimaci. Omoi illanona judaitimaci. Jusiñamui omoi motomo birui illana omoi uiñoñaena jira, iese omoímo suite.

Jesúdi Jusiñamui jofomona damieriena dotaja rafue

(Mt 21.12-17; Mr 11.15-19; Jn 2.13-22)

⁴⁵ Jerusalémo Jesús rilla mei, Jusiñamui jofomo jaide. Jusiñamuimo ofomaíaina fecallena, naimíemo toica llaudaíaina fecallena, nainomo comini jaisoidimaci. Naie cominina íbatajanona, ofomaíaina, toica llaudaíai diga, damierie fecauídímaci. Iena ciuanona, naimacina jino orede. ⁴⁶ Raite:

—Ie facaina lloráima micorí Jusiñamui llogacino jaie cuega: “Cue jofo ite nainomo cuemo comini jillena” cuega. Ero, ailluena omoi íbataja jira, naimie jofona firiruidino jofona omoi finoca.

⁴⁷ Jusiñamui jofomo nagarui Jesús llofujete. Judíuai illaicomínidi Jesúna meineiacadímaci; ⁴⁸ iadedi ñiese nibaiñedímaci, nana comini naimie llofuiana eo jitailla jira.

20

Jesúdi ie siño uaina llua rafue

(Mt 21.23-27; Mr 11.27-33)

¹ Jusiñamui jofomo Jesúdi cominina llofujete. Jusiñamui rafuena llofujete. Judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micorí llogacino llofueraíni. Naimacidi einamaci. Die se billanona, ² jicanotimaci:

—¿Ñie isoide uaido o finoca rafuena finocabidío? ¿Bu omo iga uai diga o finoca rafuena finocabidío?

³ Jesús dinena uai ote:

—Omoímo nano jicanoíticue. ⁴ Juan Bautista micorídi cominina navui bautizade. ¿Bu naimie micorína cominina bautizatate? ¿Jusiñamui? ¿Comini? Cuemo llono.

⁵ Daní coniniri iena siaduanona raitimaci:

—“Jusiñamui” cai fairioia, caímo jicanoíte: “¿Bue ñellena naimie micorína iñoñedomoi? ¿Bue ñellena naimie micorí llua isoi bautizañedomoi?” ⁶ “Comini” cai fairioia, bene itino caina meineitimaci, Juan micorídi Jusiñamui facaina lloráima naimaci railla jira.

⁷ Ie jira Jesús uai otimaci:

—Uiñoñedícaí.

⁸ Jesús dinena raite:

—Ie muidona cuemo ñie isoide uai illana omoímo lloñeiticue.

Jesúdi marañede maijiraíni rafuena llua rafue

(Mt 21.33-44; Mr 12.1-11)

⁹ Nainomo itinomo Jesús llote:

—Jiaie rafue omoimo lloiticue. Iemo cacarei. Daje patrón uvas railla riaraiaina rite. Ie mei ibatajanona jiaimomo fecade, iena sedallena. Ie mei jiaie eniruemo are illena jaide. ¹⁰ Uvas jai einaila facaise riaraiaina sedaraini dine daje mullaimana orede, naimie facaise iedinona naimie feiñollena; iadedi naie sedaraini naie mullaimana fatimaci. Uvas naimiemo fecañeno abido oredimaci. ¹¹ Ie mei patrón jiaie mullaimana orede. Naimiena fatimaci. Jeare finodimaci. Uvas naimiemo fecañeno abido oredimaci. ¹² Naie patrón jiaimiena orede. Naimiena eo bofedaitajanona jino dotadimaci. ¹³ Iemei patrón comecina facade: “¿Niese nibaiticue? Cue isiruiga jitona oretaiticue. Naimiena nibai jaciruitimaci. Naimie uaina ñnoitimaci”. ¹⁴ Riaraiaina sedaraini naimiena ciuanona, coniniri ñaitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” ñaitimaci. ¹⁵ Naimiena jino dotajanona, naimiena meinetimaci. Iena fidia mei, ¿niese naie patrón nibaiite? ¹⁶ Naimie biite, naie sedarainina meinellena. Ie mei jiaimona ie illina sedataite.

Naie rafuena cacadino raitimaci:

—Bie isoide rafue suillana jitaiñedicaí.

¹⁷ Naimacimo Jesús eruaillano, llote:

—Naie illi sedaraini isoidomoi. Jusiñamui facaina lloraíma micori omoína jiaie cuete. Ie ciegafuena raise facañedomoi. Naimie micori cueda:

Jofu finoraini jitaiñena nofici nana naie jofomo ite nofici baifemo jai uaide. cueda. Jusiñamui cominina damierie jaillana naimie micori cuete. Jusiñamui oretagamiena damierie jitaiñenamona, naimie cominina jaiñeitimaci; iadedi Jusiñamui oretagamiena ailluena ñnuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi. ¹⁸ Naie noficina nia ñaiticue. Noficimo bu eicaitaia, bofedaite; ia naie nofici bumona ana uai, naimiena saitaite. Ie isoide. Cue lluaña omoi jamaia, duere sefuitomoi. Iena omoi ñnoñenia, ja muidomo faifitomoi —llote.

Jesúmo gobiernomo ucubena fecajana jicanua rafue

(Mt 21.45-46; 22.14-22; Mr 12.12-17)

¹⁹ Jesús como lloga rafuedo naimacina ñaiana uiñotimaci. Ie jira naie facaiseconi judíuai illaicomini naimiena gaitacadimaci; iadedi cominina jaciruitimaci. ²⁰ Ie jira naimiena uiñododimaci. Mare rafuedo abi caitadinona oredimaci. Naimie raise uai oñenia, naimiena duere finollena, naimiena facaciacadimaci. Gobernadormo naimiena llogidoiacadimaci. ²¹ Jesúmo llotimaci:

—Maestro, uanaicinona marena llofuecabitio. Nana cominina dauaido llofuecabitio. Jusiñamui rafuedo cai marena jaillana raise llofuetio. ²² Omo rafuena jicanoiacadicaí. Dama Jusiñamuina sedadicaí; iadedi romanos railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —lloitimaci.

²³ Naimiena naimaci jifuiana uiñuanona, Jesús dinena uai ote:

²⁴ —Ucube cuemo acata. ¿Bu ie joreño nainomo ite? ¿Bumo jainaiaide bie cueda radi?

Uai otimaci:

—César.

²⁵ Jesús raite:

—César iena itedi, Césarmo ille. Jusiñamui iena itedi, Jusiñamuimo ille —raite.

²⁶ Jesúsdi uai raise ua jira naimie lluañona jeare rafuena uiñoñedimaci, naimiena llogidollena. Naimie lluari rajicaillamona, llñcaidimaci.

Jesús dine saduceuai railla comini billa rafue
(Mt 22.23-33; Mr 12.18-27)

²⁷ Naie facaise dajerie saduceuai railla comini naimie dine bitimaci. “Fiodaillamona jaca buna jilloñeite” raisoidimaci. ²⁸ Jesúmo llotimaci:

—Maestro, cai facaina Moisés micori jaie cuega: “Fima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. ²⁹ Bie rafuena uiñoiacadica. Siete amatai ite. Nano doforamie ie aina ote. Naimie nia uruiainide fiodailla. ³⁰⁻³¹ Ie emodo imie ie ama feciño ote. Naimie uruiainide jiai fiodailla. Naie siete digamiedemona iese sefuide. ³² Ja muidomo naie riño jiai fiodaite. ³³ Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede — llotimaci.

³⁴ Jesús uai ote:

—Birui aina otomoi. Inina otomoi; ³⁵ iadedi fiodaillamona, Jusiñamui diga jaca itino jillua mei, ainitimaci. Ininitimaci; ³⁶ ia Jusiñamui jaienisaí isoi illanona, dane fiodaiñeitimaci. ³⁷ Fiodaitino jilluana omoimo lloticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. ³⁸ Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite. Naimiemo naimaci duillamona, naimaci abiai diga jilluanona, naimie diga jaca itimaci —llote.

³⁹ Iena cacajano, Moisés micori llogacinuaina llofuerainimona dajerie raite:

—Maestro, raise llotio.

⁴⁰ Ie facaise naimiemo nie isoide rafuena dane jicanuana jaciruitimaci.

Jesús dinena fariseuai cominimo jicanua rafue
(Mt 22.41-46; Mr 12.35-37)

⁴¹ Iemei naimie ecimo itinomo Jesús jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jítora raitimaci? ⁴² Salmos railla cuegafuiaimo David micori jaie cuega:

Jusiñamuidi cue Namamo llote: “Illaimana o illamona, cue nabeimo ana rai.

⁴³ Ona ñnoñedino o anamo itataiticue”.

⁴⁴ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi dama David micori jitoñede; ia jiai ie Nama.

Jesúdi judíuai illaicomina ñaia rafue
(Mt 23.1-36; Mr 12.38-40; Lc 11.37-54)

⁴⁵ Nana comini cacajano, ie llofueganomo Jesús llote:

⁴⁶ —Moisés micori llogacinuaina llofuerainimona abina rairui. Ilaicomina naimaci itimacidena, naimacina comini cioillena, eo mare iniroina jitaacacabidimaci. Níne naimaci macaria, naimaci jamai bue isoíñedinona itimacidena, comini naimacina uaiduana gaidimaci. Comini naimaciri acarillena, ofiracomo uicomo raiacadimaci. Rafue ia, naimaci jamai bue isoíñedinona comecina facajanona, rafue nama ecimo raiacadimaci. ⁴⁷ Feciñuaimona rana ocabillanona, naiñaiñuaina duere finodimaci. Naimiena eo sedadimacidena, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

21

*Jesúdi Jusiñamui jofomo duerede feciño ucube fecajana ciua rafue
(Mr 12.41-44)*

¹ Jusiñamui jofomo Jesús nia ia, a erodatemo, nainomo ite eenoranomo ucuberedino ucubena joniana ciode. ² Eo duerede feciño menaruñu joniana jiai ciode. ³ Ie llofueoicaiganomo Jesús llote:

—Bie eo duerede feciño nana ucuberedino jonia baifemo jonete.

⁴ Naimacimo ailluena ite; iadedi naie ucubemona janore jonetimaci. Naiñaiño eo duerede; iadedi nana naiñaiñomo ite ucubena jai jonete. Janore jonete; ia Jusiñamuimona naiñaiñodi jiaino baifemo jonete.

*Jesúdi Jerusalémo ite Jusiñamui jofo judaiana llua rafue
(Mt 24.1-28; Mr 13.1-23)*

⁵ Naie facaise Jesús llofueoicaiganomona dajerie Jusiñamui jofona eruaillanona, raite:

—Mare nofici diga finoca. Eo mare ra nainomo jiai ite.

⁶ Jesús llote:

—Birui bie rana ciodomo; iadedi ico jiairuido nana bie jofomo ite nofici ai oni judaisite.

⁷ Jicanotimaci:

—Jusiñamui jofo judaisillana omo jicanoiacadica. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁸ Uai ote:

—Omoina bie rafuena bu jifueñellena, omoi abina rairui. Ailluena comini cue mamecido billanona: “Cristodicue” raitimaci. “Cristo jai bairede” raitimaci. Naimaci dibeimo iñeno. ⁹ Jobaimiai illena fiditomo; iadedi jaciruiñeno. Iese suite; iadedi abido nia biñeticue. ¹⁰ Daje nairai jiaie nairai diga jobairite. Daje gobierno jiaie gobierno diga jobairite. ¹¹ Eo aillena ñuisañuai suite. Diga illanomo comindi aime guitimaci. Duicuai eo iite. Monamo comini diga jacirede rana cioitimaci. ¹² Bie isoide rafue nia suiñenia, cuena ñnoñedino omoina llogidoitimaci. Omoina gatatajanona, omoina duere finoitimaci. Naimaci ofiracomo omoina uitimaci. Cárcelmo omoina jonetimaci. Cuemo omoi duilla jira, omoi duere sefuillena, illacomini dine omoina uitimaci. ¹³ Naie facaiseconi cue rafuena naimacimo lloitoi. ¹⁴ Omoi abina omoi ridoia, omoi llua uicodo jarire iñeno. ¹⁵ Omoi raise lollena, omoina canoiticue. Uiñoraciona omoimo iiticue. Iemona omoi dibeimo iñedino o uaina uaitanitimaci. ¹⁶ Cuena ñnotomo; ia ailluena cuena ñnoñeitimaci. Cuemo omoi duilla jira, omoina enoitimaci. Iemona dajerie mootiai, dajerie eitiai, dajerie amatiai, dajerie nabaiñiai omoina llogidoitimaci. Omoimona dajeriena meineitimaci. ¹⁷ Cue cominina omoi illamona, nana nairai omoina enoitimaci; iadedi cuena fainonocaiñedimie ja muidomo monamo jaca iite. Naimiena jillotaiticue. ¹⁸ Omoi ille dinori Jusiñamui omoina raise sedaite. ¹⁹ Duere omoi sefuia, cuena fainonocaiñeno jai. Ja muidomo monamo jaca iitomo. ²⁰ Jerusalén fueo ruicabene icaifona soldaduai ia, ie judaille facaiseconi iairei iite. ²¹ Naiemona omoi jillobillena, duere omoi sefuiñellena, Judeamo omoi illamona, aneduai dine aisi. Jerusalémo omoi ia, naiemona oni jino omoi jai. Jino omoi ia, Jerusalémo omoi jaiñeno. ²² Ie facaina lloraini micoriai cuezafuiai suillanona, naie facaiseconi naimiena ñnoñedinomona Jusiñamui ibana oite. ²³ Naie rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite. Naie facaise comini duere sefuitimaci. Llegi cacaitimaci.

²⁴ Lloebi diga meinecana uitimaci. Jiaie nairai dine naimacina jaiadoitimaci. Judíuaiñedino sedalle facaise dinori, naimaci anamo Jerusalémo itino iitimaci.

Jesús abido ie bille rafue

(Mt 24.29-35, 42-44; Mr 13.24-37)

²⁵ Jesús nia llofueite:

—Jitoma nagarui illa isoi iñenamona, fivui nagarui illa isoi iñenamona, ucuai nagarui illa isoi iñenamona, comini jiaie rafue suillena uiñoitimaci. Monailai eo baguamona, comini comeciai eo jarire iitimaci. ²⁶ Nana monamo ite radi jaidisite. Iena raise naimaci uiñoñena jira, nie isoide rafue suillena naimaci uiñoñena jira, jaciruillamona, comini fioiditimaci isoi iitimaci. ²⁷ Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. ²⁸ Bie isoide rafue sua, omoina cue jilloitajabillirui iaiei illa jira, cue billirui mo raise ocuiri.

²⁹ Iena omoi raise uiñollena, bie rafuena omoimo lloiticue. Higuera railla riaramo omoi comeciaina faca. Nana amenamo comeciaina faca. ³⁰ Bie eniruemo amena firuillamona, fiemona raie illana uiñotomoi. ³¹ Ie isoide. Bie rafue ico sua, Jusiñamui ie cominina raie sedajana uiñotomoi. ³² Uanaicinona omoimo lloiticue. Nana bie rafue suille facaiseconi bie nairai nia iite. ³³ Mona fuite. Enirue jiai fuite; iadedi cue lloga uai jaca suite. ³⁴ Jifaillacinona omoi ebirui raillano, omoi ecimo ite rana ebirui raillano, abina rairuicana jai. Cueno ñoñedinona duere finollena, ebena abido biiticue. ³⁵ Cue bia, illaimana cue illamona, nana cominimo juez isoi lloiticue. ³⁶ Ie jira nagarui abi rairuicana jai. Naie duere sefuelle facaise omoi jilloillena, Jusiñamui mo jii. Ja muidomo monamo cue diga jaca iitomoi —llote.

³⁷ Jusiñamui jofomo Jesús nagarui llofueuide. Naiona Olivos railla anedumo, nainomo inillena, jaisoide. ³⁸ Nagarui jitaramo naimiena cacareillena, Jusiñamui jofomo comini bisoidimaci.

22

Judíuai illacomini Jesúsna gaitallena siadua rafue

(Mt 26.1-5, 14-16; Mr 14.1-2, 10-11; Jn 11.45-53)

¹ Naie facaise pascua railla rafue iaiei ite. Naie facaise llomenico guille rafue jiai ite. Naie rafue ia, siritate rana jaca guiñedimaci. Egiptomona naimaci jaiagai jillobillana comecillena, naie rafue ite. ² Judíuai illacomini Jesúsna meineiacadimaci; iadedi cominina jaciruillanona, naimiena nia meineñedimaci.

³ Ie facaiseconi Taife ie anamo Judas Iscariote micorina itatate. Judadi Jesús ie doce llofueoicaigano imie. ⁴ Jusiñamui diga nanoca ñairaini dine jaide. Jusiñamui jofona sedaraini dine jiai jaide. Jesúsna gaitatallena, naimaci diga ñaiaide. ⁵ Jobillanona, naimiemo ucubena feacaacadimaci. ⁶ Judas dinena:

—Jee —raite. Jesús diga ailluena comini iñena facaiseconi naimiena gaitatallena sedade.

Jesúdi ie fioidille rafuena llua rafue

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Llomenico guille rafue illanona, judíuai comini toica llauda fauillarui ride.

⁸ Jesúdi Pedro iaiaiaia Juan diga oretajano, raite:

—Cai rafue guille uicodo finollesa omico jai.

⁹ Naimiemo jicanotiaiaiaia:

—¿Ninomo naiena coco finuana jitaideo?

¹⁰ Uai ote:

—Ero, Jerusalémo omico ria, nogodo jinuina uitimiena cioitomico. Naimie jailla jofomo naimiena raca. ¹¹ Jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” Iese llono. ¹² Ie mei omicomoo afebebamo ite aillue cuartona acataite. Na raruiaí diga ite. Nainomo cai guille fino.

¹³ Jaidiaimaiaí. Naimie llua isoi baitiaimaiaí. Pascua rafue guille finodiaimaiaí.

¹⁴ Guille facaiseconi ia, Jesús ie llofueoicaigano diga nainomo guisaide.

¹⁵ Mesamo guitimacimo, ie llofueoicaiganomo llote:

—Nia cue fioldañenia, omoi diga bie rafue guillena eo jitaídícue. ¹⁶ Ie cominina cue Moo ico sedalle facaise ia, nana bie rafue fuite.

¹⁷ Jiroracomo jai totaca vino llinocaida, Jusiñamuimo iobillacinona fecaja mei, raite:

—Mai llino. Biemona nana dajena omoi jiro. ¹⁸ Omoína bene dane iese caimare nabaiñeítícue. Cue Moo sedajanomo omoi diga ico cue ia, nainomo omoína dane iese caimare marena nabaitícue. —Iena jirodimaci.

¹⁹ Llomenicono llinuanona, Jusiñamuimo iobillacinona fecaja mei, iena tairude. Naimacimo fecajano raite:

—Biedi cue abi facai ie. Omoi facaina fioldaitícue. Cue abimo omoi comecina facajano, iena guiño.

²⁰ Naimaci guilla fuilla mei, jiroracomo vino diga dane oruitajanona, naimacina jirotrate. Raite:

—Cue fiollaillamona, dama cue diaillamona, jeacino anamona jilloitomoi. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. —Iena jirodimaci.

²¹ Jesús llote:

—Ero, cuena gaitataitimie cai diga guite. ²² Monamona billanona imana jaidícue. Jusiñamui jitailla isoi jai jaoicaídícue; iadedi Jusiñamuimona cuena gaitataitimie eo duere sefuite.

²³ Iemei: “¿Nimie Jesúsna gaitatalle?” dani coniniri siadoside.

Naimaci moto imiēna bu ille rafue

²⁴ Ie facaise coniniri siaduana raitimaci:

—¿Cai moto imiēna bu ille?

²⁵ Iena cacajanona, Jesús raite:

—Naimaci jitailla ra finollena, judíuaiñedino illaímaiaídi naimaci anamo itinona ocuicabide. “Cai anamo itinona canocabidícaí” raitimaci; ²⁶ iadedi omoimo iese iñede. Omoi moto itimie omoi moto imieñedimiena jailla. Omoimona bu imiēna iacania, omoi mullaímana naimie jaicabillasa. Omoimona bu imiēna iacania, omoína naimie canocana jaicabillasa. ²⁷ Ero, jiaie rafuedo iena lloítícue. Naimiēna ecallena, naimiēna canollena, patrón anamo ie mullaíai itimaci. Naimaci baifemo patrón illamona, naimacina canollena, ie mullaíai facaina maijiñede. Cue anamo itomoi; ia omoína canollena, omoi mullaíma isoi itícue. ²⁸ Birui duere cue sefuidícuemo, cuena faínonocaiñedomoi. ²⁹ Cue Moo cuena illaímana jai itatate. Omoína fetodícue, ³⁰ jiaíruido cue illaíma illa facaiseconi cue ecimo omoi caimare marena iocire illena. Nainomo omoi judíuai doce nairaíaina sedaitomoi.

Jesúdi Pedro naimiēna januana llua rafue

(Mt 26.31-35; Mr 14.27-31; Jn 13.36-38)

³¹ Jesús llote:

—Simón Pedro, ero, Taifedi Jusiñamuimo ona jicanote, o ramo faillena; ³² iadedi ori jai jidícue, cuena nia inocana o jaillena. Ico cuena raise

o ñnoñena mei, cue ðibeimo o comeci iuai dane o meidoia, iemona jiaie creyentiaie comeciaina ocuiñotaitio.

³³ Pedro uai ote:

—Nama, cárcelmo o ia, nainomo jiaie iitice. O fiodaia, jiaie fiodaitice. Ona fañonocaiñeiticue.

³⁴ Jesús uai ote:

—Pedro, jítiramo iitava nia ñaiñenia, dacaiño amani cuena janoitio.

Jesús fiodailla facaise iaie rei illa rafue

³⁵ Ie llofueoicaiganomo Jesús llote:

—Omoimo ite rafuena uiñoiacadice. Cue rafue llollena, navui omoina oredice. “Ucubena uiñoeno, bolsa uiñoeno, meidolle zapatos uiñoeno” omoimo llotice. Naie facaiseconi omoie, ¿bue rana jitaídomoie?

Uai otimaci:

—Cai buena jitaíñedicai.

³⁶ Jesús raite:

—Biruimona omoie duere sefuitomoie. Ie jira abina rairuicana jai. Birui ucube omoimo ia, ñine omoie jaia, iena uiño. Bolsa bumo ia, iena uiño. Abina riidollena, omoimo lloebi iñenia, janore iniroina feca, lloebi ollena. ³⁷ Cuena jaie ciegafuiaie ja suite. Isaías micorie cuena jaie cueba: “Maraiñede rafue finoraíma isoi naimie duere sefuite”.

³⁸ Raitimaci:

—Ero, Nama, mena lloebi caimo birui ite.

Jesús uai ote:

—Mena ia, macaibaite.

Jesúdi Getsemanímo Jusiñamuimo jia rafue

(Mt 26.36-46; Mr 14.32-42)

³⁹ Guille mei, ie llofueoicaigano ðiga, Jesús jino jaide. Olivos railla anedumo naimie jaisoilla isoi jaide. ⁴⁰ Nainomo ria, naimacimo llote:

—Taife omoina ramo faie raillano, iena omoie ñnoñellena, Jusiñamuimo jii — llote.

⁴¹ Naimie janorede nofici bai faia uaila ðinori bai jaide. Caiñici ifodo ana raíta, Jusiñamuimo jii ðe:

⁴² —Ore Moo, o jitaia, cue duere sefuillamona cuena jillota. Cue jitailla isoi cuena finoñoeno; iadedie o jitailla isoi cuena fino.

⁴³ Naimie comecina ocuiñotallena, ie facaiseconi monamona Jusiñamui jaenici bite. ⁴⁴ Jesús comeci jarire illamona, naimie rioci faitemo, ðifai ðiruena eniruemo uaide. ⁴⁵ Jia mei, ie llofueoicaigano ðine abido bite. Ocosinaillamona, jai inidimaci. ⁴⁶ Naimacimo jicanote:

—¿Bue ñellena inidomoie? Mai casi. Taife ramo omoina faie raillano, iena omoie ñnoñellena, Jusiñamuimo jii.

Jesúna gaitalle rafue

(Mt 26.47-56; Mr 14.43-50; Jn 18.2-11)

⁴⁷ Nia Jesús lloia, ðiga comini naimie ðine bitimaci. Judas Iscariote micorie naimacina ifode. Naimie ðe Jesús llofueoicaigamie. Naimiena llibanollena. Jesús ðine iaie bite. ⁴⁸ Jesús raite:

—Judas, cuena llibanuanona, cuena gaitataiacadio.

⁴⁹ Ie llofueoicaigano naie rafuena jai ciódimaci. Jicanotimaci:

—Nama, ¿caie atica lloebi ðiga ona riidoiticaie?

⁵⁰ Ie facaise naimacimona ðamie ðe Jusiñamui ðiga nanoca ñairaíma ie mullaíma ie nabei jefona jaibonote. ⁵¹ Jesús ðinena raite:

—Dama ite. —Ie jefona naimie jetajamona, naimiena jillotate. ⁵² Diga illaicomini Judas diga Jesús dine bitimaci. Naimacimo Jesús llote:

—Fíriraímadicuenta cuena omoi gaitajaibilla. Omoi lloebina atidomoi. Omoi butaralluna jiai atidomoi. ⁵³ Nagarui Jusiñamui jofomo omoi motomo llofuecabiticue; iadedi cuena gaitañedomoi. Jusiñamui jitailla jira, cuena omoi gaitaja facaise jai ride. Taife anamo jai itomoi.

Pedrodi Jesúsna janua rafue

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Naimiena gaitaja mei, Jusiñamui diga nanoca ñairaima jofomo uitimaci. Pedro aarena naimaci jinafona racade. ⁵⁵ Nairaibiri motomo irai bonua mei, ana raídímaci. Pedro naimaci diga jiai raide. ⁵⁶ Nainomo ite mullaíñodi irai bouamona, Pedromo eruaillano raite:

—Bimiedi Jesús diga jaisoidimie.

⁵⁷ Pedro abi janote:

—Naimiena uiñoñedicue.

⁵⁸ Dallu illanona, jiaimie Pedrona ciuanona llote:

—Jesús ie llofueoicaigano imiedio.

Pedro dinena uai ote:

—Imieñedicue.

⁵⁹ Daje hora illanona, jiaimie raite:

—Bimie galileo imiena jira, bimiedi Jesús diga ua jaisoidimie.

⁶⁰ Pedro dinena raite:

—O lluana uiñoñedicue. —Ieconí naimie ñaitemo, itava ñaite. ⁶¹ Jesús dobaidacaida, Pedromo erodacaide. Iemei Pedro Jesús lluana uibiñote. Jesús naimiemo jaive llote: “Itava nia ñaiñenia, dacaiño amani cuena janoitio”.

⁶² Pedro jino jaillanona, eo sunaillamona, eo eede.

Jesúna jifanodua rafue

(Mt 26.67-68; Mr 14.65)

⁶³ Ie facaise Jesúsna gaitadino naimiena jifanododímaci. Naimiena jiai fatímaci. ⁶⁴ Ie uisina maítímaci. Llotímaci:

—Siño jitodiosa, ¿bu o faja? caimo llono.

⁶⁵ Iese jifanodocana uitímaci.

Jesúdi judíuai illaicomini dine illa rafue

(Mt 26.59-66; Mr 14.55-64; Jn 18.19-24)

⁶⁶ Monaidemo judíuai illaicomini ofidímaci. Jusiñamui diga nanoca ñairaini ofidímaci. Moisés micori llogacino llofueraini ofidímaci. Naimaci dine naimiena gaitadino Jesúsna uitímaci. Naie illaicomini dinena raitímaci:

⁶⁷ —Ua Cristodiona, iena caimo llono.

Jesús uai ote:

—Omoimo iena cue lloia, inoñeitomoi. ⁶⁸ Buena omoimo cue jicanoia, cue uaina oñeitomoi. ⁶⁹ Monamona jaie billanona, imana jaidicue. Cuena omoi meiniamona, illaíma isoi Jusiñamui ecimo raire iiticue.

⁷⁰ Nana jicanotímaci:

—“¿Jusiñamui Jitodicue” raitio?

Uai ote:

—Raise cacadomoi. Imiedicue.

⁷¹ Iena cacajano, raitímaci:

—Naimie lluana jai cacadicaí. Jiaie comini naimiena llogiduana jai jitañedicaí. “Jusiñamui Jitona iticue” naimie llua jira, Jusiñamuina jai jeare ñaite. Naimie Jusiñamui Jitoñede.

23

Pilato dine Jesús illa rafue

(Mt 27.1-2, 11-14; Mr 15.1-5; Jn 18.28-38)

¹ Judíuai illaicomini naidacaillanona, Pilato dine Jesúsna uitimaci.

² Naimiena llogidotimaci:

—Cai cominimo marañedifuena lloste. Gobiernomo ucubena cai fecajana rairuide. Naimie jiai raite: “Cristodicue. Illaimadicue”.

³ Pilato dinena naimiemo jicanote:

—¿Judíuai comini illaimadio?

Uai ote:

—Jii, judíuai illaimadicue.

⁴ Jusiñamui diga nanoca ñairainimo Pilato llote. Nainomo bite cominimo jiai llote:

—Nicinodi naimiemo iñede.

⁵ Uai otimaci:

—Gobierno joreño comini comeciai jeare feidocana naimie uite. Nana Judeamo uite. Galileamona tainede. Bene jai caimo ride.

Herodes dine Jesús illa rafue

⁶ Iena cacajano, naimie llogidotinomo Pilato jicanote:

—¿Naimiedi Galilea imie?

⁷ —Jii —raitimaci. Galilea enirue illaima Herodes. Naie facaiseconi Jerusalémo naimie illa jira, naimie dine Pilatodi Jesúsna orede. ⁸ Jesúsna Herodes cianona, iobide. Naimie finoca rafuena naimie fidia jira, naimiena cioacade. Siño rafuena naimie finuana jiai cioacade. ⁹ Jesúsno ie finoca rafuena are jicanote; iadedi Jesús dinena uaina oñede. ¹⁰ Ie facaiseconi judíuai illaicomini Jesúsna riire llogidotimaci. ¹¹ Herodes ie soldaduai diga naimiena eo jeare ñaitimaci. Illaima jítaiuga iniroina jítatatimaci. Ie mei Pilato dine naimiena abido orede. ¹² Iemona nairuido Herodes Pilato diga nabairite. Jai conimana enoidiaimaia.

Pilatodi Jesús fiodaillana llua rafue

(Mt 27.15-26; Mr 15.6-15; Jn 18.39-19.16)

¹³ Pilatodi judíuai illaicominina, nainomo ite comini diga, uaidote. ¹⁴ Raite:

—Bimie cue dine atidomoi. Raitomoi: “Comini comeciai feidocana naimie uite”. Naimiemo jai jicanoticue; ia naimiemo nicinodi iñede. ¹⁵ Herodes cue dine naimiena como abido orede. “Naimiemo nicinodi iñede” jiai raite. Naimiena cue meinellena, naimie jaca nicinona finoñede. ¹⁶ Ie jira naimiena cue sechedotajanona, naimiena oni oretaiticue.

¹⁷ Naie rafue facaiseconi naga año cárcelmona damiena jino jamai oretauide. ¹⁸ Pilato lluana cacajano, nana comini ado cuiriidimaci:

—¡Naimiena oni uiño, naimiena meinellena! ¡Barrabás cárcelmona jino oreta!

¹⁹ Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite. ²⁰ Jesúsna naimie jamai oretaiacana jira, comini diga Pilato dane ñaite; ²¹ iadedi cuiriidimaci:

—¡Naimiena corai! ¡Naimiena meine!

²² Pilato dane jicanote:

—¿Nie isoide marañede rafuena finode? Naimiena cai meinellena, naimie jaca nicinona finoñede. Naimiena sechedotaiticue. Ie mei naimiena jamai oretaiticue.

²³ Eo riire cuiriidimaci:

—¡Naimiena corai! —Ja muidomo Pilato dinena:

—Jee —raite. ²⁴ Naimaci jitailla isoi Pilato fairiote. Jesúna meinellena llote. ²⁵ Ie mei Barrabásna cárcelmona jino oretate, naimiena comini jicaja jira; iadedi Jesúna naimacimo fecade, naimiemo naimaci jitailla ra naimaci finollena.

Jesúna coraia rafue

(Mt 27.32-44; Mr 15.21-32; Jn 19.17-27)

²⁶ Jesúna soldaduai oni uitemo, Simón raillamie diga dafafidimaci. Naimiedi Cirene railla enirue imie. Jerusalén onifemona bite. Jesús jinafona naimiena cruzna rocaicaida sonotate. ²⁷ Ailluena comini Jesúna racadimaci. Ailluena riñoniai eo eecana jaisite. ²⁸ Iena cacajano, Jesús naiñaiñuai dine dobaidacaida, naiñaiñuaimo llote:

—Jerusalén itiñaiñuai, cue facaina eeñeno; iadedi omoi facaina mai omoi ee. Omoi uruiai facaina mai omoi ee. ²⁹ Ero, jiairuido duere sefuellemona comini raitimaci: “Oiniñuai jiaie riñoniai baifemo duere sefuiñena jira, marena itimaci”. ³⁰ Jusiñamui riicaillafuemona jilloiacanamona, comini jiai raitimaci: “Aneduai caimo jaicorillana jitaidica”. ³¹ Maraiñede rafuena finoñedicue; iadedi jai duere sefuidicue, Maraiñede rafuena finodimaci. Ie jira cue baifemo eo duere sefuitimaci.

³² Naie iaimaiaina meinellena, mena maraiñede iimana jiai uitimaci. Gobierno llogacinona inoñediiaimaiaia. ³³ Ifocoraina eruailla illanomo naimaci ria, Jesúna coraidimaci. Naie maraiñede iaimaiaina jiai coraidimaci. Damie Jesús nabeimo. Jiaimie Jesús jarifebeimo. ³⁴ Jesús ie Moomo llote:

—Ore Moo, naimaci finoca rafuena naimaci raise uiñoñena jira, bie soldaduai cuena duere finua rafuena feita —llote. Bu dajerie uille uiñollena, Jesús iniroina jifanoduanano soldaduai facasite.

³⁵ Ailluena comini eruaidimaci. Judúuai illaicominidi naimiena jifanoduanona, coniniri raitimaci:

—Naimiedi jiaie cominina duicomona jillotate. ¿Niese dama naimie abina birui jillotañede? Naimiedi Jusiñamui oretagamiedena, Jusiñamui fetocamiedena, fiodaillamona dama naimie abina jillotarede.

³⁶ Soldaduai naimiena jiai jifanododimaci. Ie abi isirena cacaiñellena, naimiemo vino fecajanona, ³⁷ raitimaci:

—Judúuai illaimadiodena, fiodaillamona dama o abina jillota. —Naie vino Jesús jiroñede.

³⁸ Jesús ifogi afeconi rabicimo Pilato cuetatate: “Bimiedi judúuai comini illaia”.

³⁹ Jesús diga coraica iaimaiaimona damie naimiena taigode:

—Jusiñamuimona bitiodena, nia fiodañenamona dama o abina jillota. Cicona jiai jillota.

⁴⁰ Jiaimiedi naimiena lletade:

—¿Bue ñellena bimiena taigodio? ¿Niese jearede rafuena nia finoacadio? Ja fiodaitio. Iemei Jusiñamui uicomo ja iitio. ¿Niese Jusiñamui uicomo o illena jaciruiñedio? ⁴¹ Maraiñede rafuena coco finua jira, duere sefuidicoco; iadedi bimie maraiñede rafuena finoñede.

⁴² Iemei Jesúmo llote:

—Illaimana o illa facaise cuena comeci.

⁴³ Jesús uai ote:

—Uanaicino lloticue. Birui cue diga cue Moo illanomo iitio.

Jesús fiodailla rafue

(Mt 27.45-56; Mr 15.33-41; Jn 19.28-30)

⁴⁴ Jitoma naidai jai itemo, daje amani horas mona jitibicaide. ⁴⁵ Jitoma raise lligaiñoñede. Jusiñamui jofo ie fetaca iniroife ana anaba jillacimo motodo menafe cuararide. ⁴⁶ Jesús ado llote:

—Ore Moo, cue joreñaona feiño. —Ie mei naimie jai fiodaite.

⁴⁷ Soldaduai imaci capitán bie rafuena ciuano, Jusiñamuina jaciruillamona, raite:

—Bimie maraiñede rafuena finoñede.

⁴⁸ Ailluena comini Jesús fiodaillana ciodimaci. Ie mei eo sunaillamona, jogobemo fairuanona, jofomo abido jaidimaci. ⁴⁹ Jesús nabaiñiai bie rafuena aarena ciodimaci. Galileamona bite riñoniai bie rafuena aarena jiai ciodimaci.

Jesús raiafomo jonia rafue

(Mt 27.57-61; Mr 15.42-47; Jn 19.38-42)

⁵⁰⁻⁵² Pilato dine José raillamie jaide, Jesús abina jicallena. Naimiedi illaicomini. Maremie. Inogamie. Jesúna meiniana jitaiñede. Arimatea railla nairai imie. Judeamo naie nairai ite. Naimiedi Jusiñamui ie cominina ico sedajanomo illemo ocuride. ⁵³ Pilato:

—Jee —railla mei, Jesús abina cruzmona ana uanona, iena useroi diga ferinote. Nofici ie raiafomo jonete. Nia bu raiafomona jonete. ⁵⁴ Nairui viernes. Sábadorui rille jai iaiei illa jira, Jesús abina raiafomo raie jonete. ⁵⁵ Galileamona navui bite riñoniai racadimaci. Raiafona ciodimaci. Naimie abi finuana ciodimaci. ⁵⁶ Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sábadoruimo jafaici otimaci, Moisés micori jaie llua isoi.

24

Jesús fiodaillamona jillua rafue

(Mt 28.1-10; Mr 16.1-8; Jn 20.1-10)

¹ Domingo jitiramo monaidemo, naie riñoniai raiafomo jaidimaci, iñaiñuai finoca soride rana uillena. ² Raiafo ibaila nofici oni joillana ciodimaci. ³ Fo jaidemo, Jesús abina cioñedimaci. ⁴ Uainicaidimaci. Iecon menamie naiñaiñuai ecimo bairediaimaia. Iaimaia iniroi eo quenirede. ⁵ Iaimaia jacinuillamona, ifogi ana jitadacaidimaci. Naie iaimaia dinena jicanote:

—¿Bue ñellena fiodaitimie illanomo cajedimena jenodomo? ⁶ Galileamo navui naimie omoimo llogacinona comeciedomoi. ⁷ Naimie raite: “Monamona billanona, imana jaidicue. Jusiñamui jitailla jira, maraiñede rafue finoraini anamo iiticue. Cuen coraitimaci. Darui amani illanona, fiodaillamona jilloiticue” raite.

⁸ Iemona ie llogacinona jai comecitimaci. ⁹ Raiafomona abido jaidimaci. Ie once llofueoicaiganomo naiñaiñuai ciua rafuena llotimaci. Naie llofueoicaigano diga itinomo jiai llotimaci. ¹⁰ Naie riñoniaimona María Magdalena ite. Juana ite. María ite. Naiñaiñodi Jacobo ei. ¹¹ Naie riñoniaidi iena llotimaci; iadedi ie rafuena cacadinodi iena inoñedimaci.

—Jamaifuena ñaitomoi —raitimaci.

¹² Iena cacajano, Pedro aisicana raiafomo jaide. Nainomo ria, ana jitadacaida, fo erodate. Useroi joillana ciode. Iemo ie comecina facajano, jofomo abido jaide.

Mena llofueoicaiganomo Jesús bairia rafue

(Mr 16.12-13)

¹³ Jesús jilluarui mena llofuega iaímaiaí Emaús railla nairaímo jaidiaímaiaí. Jerusalémona nibai once kilómetros ite. ¹⁴ Nana Jesúmo suide rafuena ñaiano jaidiaímaiaí. ¹⁵ Iaímaiaí ñaianona, Jesús iaímaiaí diga dafaífillanona, iaímaiaí diga jaide. ¹⁶ Jusiñamuidi iaímaiaína naimiena uiñoñaíena jira, naimiena uiñoñediaímaiaí. ¹⁷ Iaímaiaímo Jesús jicanote:

—¿Buena ñaitomíco? —Ieconí naidadatíiaímaiaí. Sunaitíiaímaiaí. ¹⁸ Naie iaímaiaímona damiedi Cleofas. Naimie uai ote:

—¿Niese Jerusalémo birui suide rafuena uiñoñedio? Nibai como ridio. Nana jiaí comíni iena uiñoñotímací.

¹⁹ Uai ote:

—¿Nie isoide rafue suide?

Uai otíiaímaiaí:

—Nazaret ie Jesús rafue. Naimiedi Jusiñamui facaina lloráima. Diga siño rafuena finode. Comínina raise llofue. Jusiñamuimona naimiedi maremie. Comínimona naimie maremie; ²⁰ iadedi caí illaícomíni naimiena gaitatímací. Naimiena cruzmo coraitatímací. ²¹ Jusiñamui naimie caí dine orecamiemo comeína facadícoco. Naimie caí illaímana illemo ocuiridícoco; ia naimie jai fiodaite. Naimie fiodaillamona darui amani jai ite. ²² Caí comínimona dajerie riñoñaíbirui caína jacínaitadímací. Jitíramo Jesús raíafomo jaidímací; ²³ iadedi naimie abína cioíñedímací. Abído naimací bia: “Jusiñamui jaíenisáína ciodícaí” raitímací. Naie jaíenisáí naimacímó llote: “Naimiedi caje”. ²⁴ Iemei caímona dajerie raíafomo jaidímací. Riñoñaí llua isoí ciodímací. Jesús abína cioíñedímací.

²⁵ Jesús dímena uai ote:

—Abí uiñoñedomíco. Nana Jusiñamui facaina lloráini micoríaí ciegafuíaína ñinoiacíñedomíco. ²⁶ Cristo duere sefuillena cuetímací. Jusiñamui iena jitaillena cuetímací. “Naimie nia illaímana jaíñenia, duere sefuite” cuetímací.

²⁷ Iemei Jesús iaímaiaína llofue. Moisés micorí ciegafuíaína llofue. Jusiñamui facaina lloráini micoríaí ciegafuíaína jiaí llofue. Nana Cristona ciegafuíaína llofue.

²⁸ Emaús díne iaírei naimací ría, Jesús nia jaiacademo, ²⁹ naimiena caidídiaímaiaí. Raitíiaímaiaí:

—Coco diga fiebi. Jitoma jai ana ite. Jai abí juanide, nia o jaillena. —Ie muidona iaímaiaí diga fiebillena fo jaide. ³⁰ Naillí guitímacímó, llomeniconá Jesús llinuano, Jusiñamuimo iobillacínona fecade. Iena taíruano, iaímaiaímo fecade. ³¹ Jusiñamui jitailla jira, ieconí Jesúna uiñoñotíiaímaiaí. Iemei iaímaiaímona naimiena jai cioicáñena. ³² Daímaiaí ñaitíiaímaiaí:

—Coco diga naimie ñaía, coco comeci caímare ite.

³³ Naie dacáño Jerusalémo abído jaidiaímaiaí. Jesús llofueoicaigano naimací nabaiñaí diga danomó illana baitíiaímaiaí. ³⁴ Iaímaiaímo llotímací:

—Caí Nama fiodaillamona jai jillode. Simón Pedromo jai bairedé.

³⁵ Ie meí naísona iaímaiaí jailla rafuena llotíiaímaiaí:

—Caí guitícaímó, naimiena uiñoñotícoco —llotíiaímaiaí.

Jesús ie llofueoicaiganomó bairía rafue

(Mt 28.16-20; Mr 16.14-18; Jn 20.19-23)

³⁶ “Jesúna ciodícoco” llotíiaímaiaímo, ie llofueoicaigano motomó Jesús bairedé. Llote:

—Jai bitícue. Uri omó i.

³⁷ Naimiena cíuamona, jacínaitímací. “Joreñoña ciodícaí” comeciána facajanona, jiaí jacíruitímací. ³⁸ Naimacímó Jesús jicanote:

—¿Bue ñellena jaciruitomoi? ¿Bue ñellena cue bene illana ñnoñedomoi? ³⁹ Cue onollimo eruai. Cue eillimo eruai. Jesúdicue. Cuena jeta, raise uiñollena. Cuemo llicisi ite. Cuemo illaici ite. Jamai joreño isoiñedicue.

⁴⁰ Iena llua mei, coraiafona naimaci cioillena, ie onolli ie eilli diga acatate. ⁴¹ Iobiacadimaci; iadedi nia raise ñnoñedimaci. Iemo comeciaina nia facadimacimo, naimacimo jicanote:

—¿Bue illa, cue guillena?

⁴² Naimiemo janorede jai ruica lliciaina fecadimaci. ⁴³ Iena feiñuanona, rite. Iena ciodimaci. ⁴⁴ Naimacimo llote:

—Navui omoi diga cue ia, diga rafue omoimo lloticue. Moisés micori cuena cuete. Jusiñamui facaina lloraini micoriai cuena cuetimaci. Jusiñamui jitailla jira, iena jai suide.

⁴⁵ Naie facaiseconi naimacina naie ciegafuiaina raise uiñotade. ⁴⁶ Naimacimo llote:

—Jusiñamui facaina lloraini micoriai cuena jaie cuetimaci: “Cristo duere sefuite. Fiodaillamona darui amani illanona, jilloite. ⁴⁷ Naimie muidona comeciari iuai meiduamona, Jusiñamui naimaci jeacinona oni dotaite. Naimie rafue nana nairaimo damierie lloitimaci”. Omoimo biena lloticue. Cue rafuena llollena, Jerusalémo taineitomoi. ⁴⁸ Bie rafuena ciodomoi. Iena lloitomoi. ⁴⁹ Ero, navui naimie llua isoi, cue Moo Joreño omoi dine oretaiticue. Jerusalémo fiebi, naimie Joreño omoi feiñolle dinori. Cue rafuena omoi llollena, naimie Joreño omoi comeciaina ocuiñotaite.

Jesús monamo jailla rafue

(Mr 16.19-20)

⁵⁰ Betania railla nairai dine Jesús naimacina ifode. Marecinona naimacimo llote.

—Jusiñamui omoina raise marena canoite —llote. ⁵¹ Iena naimacimo lluanona, monamo jaide. ⁵² Jerusalémo eo caimare abido jaidimaci.

⁵³ Jusiñamuimo iobillacino fecajano, Jusiñamui jofomo nagarui itimaci. Mai. Macaibaite. Lucadicue.

JUAN JESUCRISTO ENIRUEMO ILLA RAFUE CUAFUE

Jesucristo rafue iese tainede

¹ Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui. ² Jusiñamui diga jaca nano ite. ³ Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede. ⁴ Naimie muidona iticai. Naimiena cai ñnuamona, jaca iiticai. Lligaiñora diga rana cai cúa isoi, caina Jusiñamuina uiñotade. ⁵ Naimiena ñnoñedino jitiredinomo itimaci isoidimaci. Naimaci comeciái jitirede. Ie uaido naimaci comeciaina lligaiñote, naimaci comeciaino ite jeacino oni jaillena.

⁶⁻⁷ Naimaci comeciaina lligaiñotimiena llollena, Juan micori llucacino Jusiñamuina nana comini ñnollena, Jusiñamuidi Juan Bautista raillamie micorina oretate. ⁸ Juan naie lligaiñoñedimie; iadedi Juan naimiena lluaibite. ⁹ Nanoca lligaiñotimiena llote. Nanoca lligaiñotimiedi eniruemo billanona, nana comini comeciaina lligaiñote. ¹⁰ Naimie muidona comini comuidimaci; iadedi naimie bene billa meinoconi, comini dinena naimiena uiñoñedimaci. ¹¹ Ie nairai illanomo naimie ride; iadedi nana cai nairai naimiena feiñoñedimaci. ¹² Damierie naimiena feiñotimaci. Naimiena ñnotimaci. Ie uaido naimiedi naimacina Jusiñamui uruiaina itatate. ¹³ Iena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicai. Comini jitaillamona iena jaiñedicai. Buena cai finuamona iena jaiñedicai.

¹⁴ Iemo caina Jusiñamuina uiñotallena, Jusiñamui Jito comena jaide. Naie fa-
caise cai comini motomo naimie ite. Cai cominina eo duenaite. Uanaicinona llouide. Ie siño uaina uiñocana jaidicai. Jusiñamui dajede ie Jitona ciodicai.

¹⁵ Juan micori naimiena cominimo jaie llote:

—Birui omoimo lloticue; iadedi jaimie cue ifo meidoite. Cue baifemo faite. Cue nia jeiciñenia, naimiedi jaca ite —llote.

¹⁶ Jesucristo caina eo duenaillamona, birui caina eo canocabide. ¹⁷ Moisés micori Jusiñamui uaina jaie llote; iadedi iemona Jusiñamui caina duenaillana jaie raise uiñoñedicai. Jesucristo lluamona Jusiñamui caina duenaillana jai raise uiñoticaí. Naimiemona uanaicinona jai raise cacadicai. ¹⁸ Jaca buna Jusiñamuina cioñede; iadedi dajede ie Jito caina naimiena uiñotade. Ie Moo diga danomo illamona, Jesús naimiena uiñote.

Juan Bautista micoridi Jesúna llua rafue

(Mt 3.11-12; Mr 1.7-8; Lc 3.15-17)

¹⁹ Jerusalémona Juan micori dine judíuai illaicomini Jusiñamui diga ñairainimona dajerie oredimaci. Jusiñamui diga ñairaini canorainimona dajerie jai oredimaci. Naimiemo:

—¿Budío? —raillano jicanotadimaci. Juan dine rillanona, raitimaci:

—Cai Jilloitaraima biite raillamie ocluiridicai. Cristo raillamie billemo ocluiridicai. ¿Odi naimedio? —raillanona jicanotimaci. ²⁰ Naimie dinena janoñede; ia:

—Imieñedicue —raite.

²¹ Dane naimiemo jicanodosite:

—¿Budío? ¿Elías?

Juan micorì dinena uai ote:

—Elíañedicue.

Raitimaci:

—Moisés micorì Jusiñamui facaina lloraima ico billena jaie llote. ¿Odi naimiedio?

Juan dinena raite:

—Ieñedicue.

²² Dane jìcanotimaci:

—¿Budìo? Caìmo llono, caì oretatìnomo caì lollena. ¿Nìese naimacìmo ona lloiticai?

²³ Juan dinena raite:

—Jofue iñenanomo ado llotimiedicue. Isaías micorì jaie llua isoi llocabiticue: “Caì Nama biite. Naimie naiso atona raise fino”. Iese lloticue; ia naimie uaina omoì feiñollena, omoì comeciai raise finollena ñaiticue.

²⁴ Juan dìne bitìnodì fariseuai comìni. ²⁵ Nia jìcanoiacadimaci:

—Odi caì Jilloitaraìmañenia, o Elíañenia, o Moisés micorì llotimieñenia, ¿bue ñellena comìnina bautizadìo? ¿Nìe isoide uai omo ite? ¿Nìnomona o uaina otìo?

²⁶ Juan dinena uai ote:

—Comìnina bautizadicue; iadedì omoì motomo omoì uiñoñegamie jai ite.

²⁷ Naimie cue ifo meidoite. Cue baifemo faite. Jamai bue cue isoilla jira, naimie illafomo cue riñena jira, naimièna canonidicue.

²⁸ Naie rafuedì Betábaramo suide. Jordán railla ille ruicafebeimo ite. Nainomo Juan bautizauide.

Juan micorì Jesúna dane llua rafue

²⁹ Ie areruido Juan micorìdì Jesús naimie dìne billana ciuano, naimièna raite:

—Ero, Jusiñamui Jito toìca llauda mamecìdo jai bite. Caì jeacìno facaina faga llauda ifomo Jusiñamui ie Jitona jai orede. Naimie fallemona comìni jeacìnona dotaite. ³⁰ Navui naimièna ñaiticue. Lloticue: “Cue ifo jìaimie meidoite. Jamai bue isoidicue; iadedì naimie jamai bue isoifede. Cue nia jeicìñenia, naimiedì jaca ite”. ³¹ Cue dìne naimie nia biñenia, naimiedì caì Jilloitaraìmana uiñoñedicue; iadedì comìnina bautizallena bene iticue, caì comìnimo naimièna lollena.

³² Juan jiaì llote:

—Monamona ucugì isoi Jusiñamui Joreño ana billana ciodicue. Jesúmo baite. ³³ Naimiedì caì Jilloitaraìmana nia uiñoñedicue; iadedì comìnina bautizallena, cuena oretagamiedì jaie cuemo llote: “Cue Joreño ana billana damiemo baillana ico cioitìo. Cue Joreño baillamiedì cue Joreño omoìmo fecaite”. ³⁴ Naie rafuena ciodicue. Iemona naimiedì Jusiñamui Jitonana lloticue.

Jesús ie fetoacaga comìni ie rafue

³⁵ Ie areruido Juan micorì llofueoicaiganomona menamie Juan micorì dìga ia, ³⁶ Juan micorì Jesús macarillana ciuano, raite:

—Ero, Jusiñamui Jito toìca llauda mamecìdo jai bite.

³⁷ Juan micorì dìga itiaìmaiaì naiena cacajano, Jesúna racadìaìmaiaì.

³⁸ Jinafo dìne erodajanona, Jesús iaìmaiaìna ciode. Iaìmaiaìmo jìcanote:

—¿Buena jitaìdomico?

Iaìmaiaì dinena uai otiaìmaiaì:

—Rabbí, ¿nì o jofo? ¿Nìnomono itìo? —uai otiaìmaiaì. Rabbí oni dobaiñuamona: “Llofueraima raillamie”.

³⁹ Jesús nai iaìmaiaì uaina ote:

—Mai. Cue diga bi, omico uñollena. —Ie jira jaidiaimaia. Jesús illanona ciodiaimaia. Jitoma nia a illa jira, nairuido naimie diga fiebidiaimaia. Jitirecaidemo oni jaidiaimaia.

⁴⁰⁻⁴¹ Naie iaiaimaiaimona damie Andréna mameciredimie. Jesús dinena naimie jaidemo, ie ama nano jenuaide. Naimie amadi Simón Pedro. Naimiena baillanona, llote:

—Jai cai comina Jilloitaramana baiticue. Cristo raillamiena baiticue.

⁴² Ie mei Jesús dine naimiena uite. Jesús naimiena eo eruaillanona, raite:

—Birui o mamecidi Simón. Juan ie jitodio. Biruimona Cefana jiai mamecirenitio —raite. Oni dobañuacidi Pedro.

Jesús menamie uaidua raufe

⁴³ Ie areruido Jesús Galileamo jaiacade. Filipena baillanona raite:

—Cue llofuegamiena o jaillena, cue diga coco jaillesa, mai cue diga bi.

⁴⁴ Felipedi Betsaida nairai imie. Andrés iaiaimaia Pedro diga daje nairai iaiaimaia. ⁴⁵ Jesús naimiemo llua mei, Felipedi Natanaelna oni jenuaide. Higuera railla riará anamo naimiena baillanona, raite:

—Moisés micori jaie cuegamiena jai baiticue. Jusiñamui lloraini micoriaidi naimiena jaie jiai cuetimaci. Naimiedi Jesús. Nazaret imie. Ie moodi José.

⁴⁶ Natanael naie nairaina uaitajanona raite:

—Nainomo mare comedi ñede.

Felipe dinena raite:

—Naie o uñollena, cue diga mai bi.

⁴⁷ Jesúsmona iaiaimaia iaie ia, Jesús dinena llote:

—Ero, buna jifueñegamie billa. Nanoca Israel imie bite.

⁴⁸ Natanael dinena uai ote:

—¿Bu cuena llogao? ¿Ñiese cuena uñotio?

Jesús uai ote:

—Felipe ona ailli nia baiñenia, higuera railla riará anamo o illana jai uñoticue.

⁴⁹ Jacinaillamona, Natanael dane uai ote:

—Maestro, odi Jusiñamui Jitodio. Cai comini illaimadio.

⁵⁰ Jesús dinena uai ote:

—Amena anamo o illana cue uñua jira, cuena ñnotio. Diga siño rafuena ciojitio. Bie rafue baifemo finuana ciojitio. ⁵¹ Jusiñamuimona billanona, imana jaidicue. Uanaicino omo lloticue. Mona ecorillana o cioia, Jusiñamui jaienisaie cue dine billena cioitio. Cuemona abido jaillena jiai cioitio.

2

Jinuimona Jesús vino finua rafue

¹ Menarui illanona, Galileamo Canámo iima ie ai uarafue ite. Rafue nama uaidua jira, nainomo Jesús ei jaide. ² Jesús jiai uaidoga. Ie llofueoicaiganodicaie jiai uaidogacai. ³ Vino cueillamona, Jesús ei Jesúmo llote:

—Vino jai ñede.

⁴ Jesús dinena uai ote:

—Quei, ¿bue ñellena iese cuemo llotio? Siño rafue cue finolle facaisedi nia riñede.

⁵ Iemei ie eidi rafue nama mullaiaimo llote:

—Naimie omoimo llua fina.

⁶ Jinui nainomo eenollena, nainomo seis noficimona finoca llerodana raisoide. Naiemona jinuína ouidimaci. Marena illena, cai einamací llua isoi, jofomo naimaci ría, naimaci abiaína llereuidimaci. Naga lleroda nibai cinco latas totaca. ⁷ Mullaiaimo Jesús llote:

—Naie llerodaiaina jinui diga oruita. —Pozomona jinui atiano, naie llerodamo toidimaci.

Iena finua mei, ⁸ Jesús naimacimo llote:

—Llerodamona janore jisa uanona, rafue nama dine uiño.

⁹ Naie facaiseconi naie jinuidi vinona jaide. Rafue nama naiena facade. Naimiedi ninomona naie vino uana uiñoñede. Dani nainomo ite mullaia uiñotimaci. Jirua mei, ai otimie uaiduano, ¹⁰ raite:

—Rafue bu finoia, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

¹¹ Galileamo Canámo Jesúsdi siño rafuena nano finode. Iemona caina ie uai siñona uiñotade. Ie muidona naimie siño Jitonana inoticaí.

¹² Rafue fuilla mei, Capernaumo Jesús ie ei diga, ie amatiaí diga, ie llofueoicaiganodicaí diga jaide. Nano nigarui nainomo iticaí.

*Jusiñamui jofomona Jesúsdi rana fecarainina dotaja rafue
(Mt 21.12-13; Mr 11.15-18; Lc 19.45-46)*

¹³ Pascua railla rafue iaire iacana jira, Jerusalémo Jesús cai diga jaide. Egiptomona cai jaiagai jillobillana comecillena, naie rafue ite. ¹⁴ Rillano, Jusiñamui jofomo diga rana fecarainina cide. Ucube ollena, nainomo juraretaiaí, toica llaudaiaí, ucugiaí fecauidimaci. Ucubena meidorainidi jiaí itimaci. ¹⁵ Naimaci ocainaiaí diga naimaci jino jiullena, rao Jesús uanona, iena lleride. Naimaci ucubena judaide. Mesaiaina oni caitade. ¹⁶ Ucugiaina fecarainimo llote:

—Omoi ucugiaina jino uiño. Cue Moo jofomo ra feca-fecajana jitañedicue —llote.

¹⁷ Iemo Jusiñamuina lloraini micoriaí cuegafuiaina jai comeciticaí. Iese jaie cuega: “O jofona cue riiduamona, jiaíno cuena meinetaitimaci”. ¹⁸ Nainomo ite judíuaí illaicomini dinena raitimaci:

—¿Ñie isoide uaido naimacina jino oredio? Siño rafuena fino, siño uai omo illana cai uiñollena. ¹⁹ Jesús uai ote:

—Bicono judaí. Darui amani maijiamona iena dane nillana fuidoiticue.

²⁰ Dane raitimaci:

—Cuarentiséis años bicomu maijidimaci, iena finollena. ¿Ñiese iena darui amani illanona, iena dane nillana fuidoitio?

²¹ Iese raitimaci; ia Jesúsdi Jusiñamui jofona ñaiñede. Dama ie abina ñaite. Fodaillamona ie jilloillena ñaite. ²² Jesús fodaillamona naimie jillua mei, ie llofueoicaiganodicaí bie llucina comeciticaí. Ie jira naie cuegafuena inoticaí. Jesús llucina jiaí inoticaí.

Jesúsdi comini comeciainimo iticino llua jitañena rafue

²³ Pascua railla rafue facaiseconi Jerusalémo Jesús ia, diga siño rafuena finode. Ie jira ailluena comini naimie uaina inotimaci. Coniniri raitimaci:

—Naimiedi cai Jilloitaraima. ²⁴ —Naganomo comeciaina naimaci facaja jira, naie comina naimie uiñuamona, Jesús naimaci motomo iacañede. ²⁵ Naimaci comeciainimo iticinuaina naimie eo raise uiñua jira, comini rafuena naimiemo bu llua jitañede.

3

Nicodemo Jesús diga ñaia rafue

¹⁻² Judíuaí illaicomini mona damiedi Nicodemo. Naimiedi fariseo imie. Naiona Jesús dine billanona, raite:

—Maestro, cai cominina llofuellena, Jusiñamui ona orede. Iena uifnoticue. Siño rafuena o finua jira, Jusiñamui uai omo illana uifnoticue.

³ Jesús dinena uai ote:

—Raise llotio; ia daje rafue omo lloiticue: Uanai omo lloiticue. Dane abido comonori o jeicifñenia, Jusiñamui ie cominina sedajanomo jaca initio.

⁴ Nicodemo abido jicante:

—¿Niese eimie ie ei jeraimo dane iite? ¿Niese dane comonori jeicite?

⁵ Jesús uai ote:

—Uanai omo lloticue. Jusiñamui ie comini sedajanomo o illena, dama o eimona jeicifñellio. Jusiñamui Joreñodo bu dane comonori comuitañenia, Jusiñamui ie cominina sedajanomo jaca ifñeite. ⁶ Comemona cai comuitaia, jaca comedica; iadedi Jusiñamui Joreñodo cai comuitaiadedi, Jusiñamui uruedica. ⁷ Omo dane lloiticue: Comonori jeicia. Ieri rajicifñeno. ⁸ Iena o raise cacaillena, jiaie rafuedo iena lloiticue. Aifidi ie jitailla dine sairide. Iena cacadio; iadedi ninena billana uifnotedio. Nine jaillana jiai uifnotedio. Ie isoide. Niese Jusiñamui Joreño cominina comuitajana jiai uifnotedio.

⁹ Nicodemo dane jicante:

—¿Niese biedi dane iite? Raise cacafñedicue.

¹⁰ Jesús uai ote:

—Jusiñamui rafuena omoi cominina llofuecabitio. Jusiñamui rafuena omo lloticue; ia iena raise cacafñedio. ¹¹ Uanaicinona omo lloticue. Abi uifnuamona omo lloticue. Cue cúa rafuena lloticue; iadedi cue lluaña ifnotedio. ¹² Bene ite rafuena cue lloia, iena ifnotediota, monamo ite rafuena cue lloia, iena jiai raise ifnoteitio. ¹³ Eniruemona monamo jaca buna jaiñena jira, monamo ite rafuena bu raise uifnotede. Monamona cue billa jira, nainomo abido jaiticue. Ie muidona nainomo ite rafuena uifnoticue. ¹⁴ Monamona biticue; ia amenamo fiodaiticue. Jofue ifñenanomo Moisés micori jaijo joreño amenamo jaije cuinade. Jaioniai ainillamona comini fiodaifñellena iena cuinade. Comini ie isoi jilloillena, ie isoi cuena coraifñimaci. ¹⁵ Cue fiodaillamona bu cue uaina ifnoia, monamo jaca iite.

Jusiñamuidi cominina eo isiruilla rafue

¹⁶ Jusiñamuidi cominina eo isiruilla jira, comini dine ie damiede Jitona orede. Ie Jitona naimaci ifnollena, naimiena orede. Naimiena ifnuamona, monamo jaca itimaci. Jiai faifñeitimaci. ¹⁷ Naimacina duere finotallena ie Jitona oreñede; iadedi naimaci jeacinomona jilloillena, naimiena orede. ¹⁸ Jusiñamuidi Jesús uaina ifnotinona jaca duere finoñeite; iadedi ie dajede Jitona uaina naimaci ifnoñena jira, Jusiñamui duere finollicino anamo jai itimaci. ¹⁹ Comini comeciaina lligaiñollena, Jusiñamui Jito bite. Jeacino comeciaino illana naimaci uifnollena, naimaci comeciaina lligaiñuabite; iadedi naimaci comeciaini jifñedimacimo iacana jira, jearede rafue naimaci finua muidona, naimiena jitaifñedimaci. Ie jira Jusiñamui naimacimo duere finollicinona anamo jai itimaci. ²⁰ Naimie finoca rafue bai raillano, naga jeacino finoraíma ie comeci lligaiñuana jitaifñede; ²¹ ia Jusiñamui jitaillacinona finodino naimaci finoca rafue baillena, lligaiñotimie dine marefodo bitimaci.

Juan micoridi Jesúna dane ñaia rafue

²² Digarui illanona, Jesús ie llofueoicaiganodica; diga, Judea railla eniruemo macaricana jaidica. Nainomo diga irui fiebidica. Llofuamona ifnotinona bautizacana uitica. ²³⁻²⁴ Nia cárcelmo ifñenia, ailluena jinui nainomo illa jira, Enón railla nairaímo bautizajanomo Juan micori jiai ite. Salim railla nairaí iairei ite. ²⁵ Naie facaise Juan micori llofueoicaigano

judíuái imíe díga bautizajana siadotímaci. ²⁶ Ie muidona Juan micorí díne billanona, raitímaci:

—Maestro, navui Jordán ruica díne damíe billena llotío. Naimíena o bautizallena, o díne navui bite; iadedí birui naimíedí comínina bautizade. Ailluena comíní naimíe díne jaíoidímaci. O díne jai raise biñedímaci.

²⁷ Juan uai ote:

—Jusiñamui ie uai fecañedena, Jusiñamui facaina buna jaca buena finonide. ²⁸ Cue llwana navui cacadomoi. Llotícue: “Cai comíní Jilloitaraímañedícue. Cristoñedícue. Naimíe billena cue lollena, Jusiñamuidí naimíe uicomo cuena orede”. ²⁹ Jiaíe rafuedo iena lloitícue. Damíe ie aína ua mei, dama naimíemo duide. Ie aína ua rafue facaise, naimíe nabai iena ciuano, ieri jiaí iobide. Ie isoide. Comíní cue díne navui biñoidímaci. Birui Jesúmo jaíoidímaci. Naimíemo jai duidímaci. Iena cue cacajamona, ieri iobidícue. ³⁰ Comíní naimíe uai siñona uiñuana jitaídícue. Comíní cue jamai bue isoidímíena uiñuana jiaí jitaídícue. ³¹ Jamai comedícue. Ie jira eníruemo ite rafuena llocabítícue. Jusiñamuimona Jesús billa jira, cai baífemo faite. ³² Ie Moo illanomo ciua rafuena llote. Ie Moo illanomo cacaja rafue jiaí llote; iadedí eo janore comíní naimíena ñnotímaci. ³³ Naimíena ñnotímíedí Jusiñamui uanaicinona llwana raise uiñote. ³⁴ Jusiñamuidí ie Joreño ie Jitomo caidíñeno fecaja jira, naimíe Jusiñamui uaina llocabite. ³⁵ Jusiñamuidí ie Jitona isiruite. Ie jira naga rafue naimíemo fecade. ³⁶ Bu Jusiñamui Jitona ñnoia, Jusiñamui illanomo jaca iite; iadedí bu naimíena ñnoñenia, Jusiñamui illanomo jaca iñeite. Jusiñamui ricaillafue anamo jai ite.

4

Galileamo Jesús jailla rafue

¹⁻² Naie facaise ailluena comíní Jesúmona fueotímaci. Iemei naimíe díbeido bautizadímaci. Naimacina naimíe bautizallena, janore comíní Juan díne jaide. Jesúdí bautizañede. Dani ie llofueoicaiganodícaí bautizadícaí. Fariseuái bie rafuena fidiano, iena Jesús uiñua jira, ³ Judeamona Galileamo Jesús cai díga dane abído jaide.

Samaria iñaiño díga Jesús ñaia rafue

⁴ Galileamo jaillena, Jesúdí Samaria railla enírué díbeido jaiacade. ⁵ Samariamo cai ria, Sicar railla nairaimo iaírei rillano, daje pozomo ridícaí. Naie pozodí Jacob micorí jaie finoca. Jacob micorí naie pozo illano ie jito José micorímo jaie fecade. ⁶ Jitoma naidai itemo, naie pozo fuemo cai rillano, Jesús ana raide. Are macarillanona, jafaicí ote. ⁷⁻⁸ Jesús pozomo fiebicailla meinona, Sicarmo jaidícaí, guille ollena. Cai jailla mei, Samaria iñaiñodí jínui ollena, pozomo bite. Jesús naiñaiñomo jicade:

—Jínui na cue ine, cue jirollésa.

⁹ Naiñaiñodí uai ote:

—Judío imíedio. Samaria iñaiñodícue. ¿Ñíese cuemo jínui na jicadio? — Naiñaiño íese raite, judíuái Samaria comíní díga ñairainina jira.

¹⁰ Jesús dínena dane uai ote:

—Jusiñamui omo fecaacalle ra uiñotíodena, o díga ñaitímíena uiñotíona, cuemo jaca itataite jínui na cuemo jicadio. Iemei omo iena fecadícue.

¹¹ Naiñaiño uai ote:

—¿Ñíese bie pozomona jínui na oitío? Eo ana ite. ¿Ñinomona jaca itataite jínui na oitío? ¹² Cai usuma Jacob micorí bie pozo caímo jaie iñonocaiga. Naiemona naimíe micorí jaie jirode. Ie uruícaí micoríaí jiaí naiemona

jirodimaci. Ie ocainai daijemona jiai jirodimaci. Cai usuma micori baifemo fañedio —raite.

¹³ Jesús uai ote:

—Nagamiai bie jinui jirua mei, dane jiroacanite; ¹⁴ iadedi cue fecalle jinuina jirua mei, dane jiroacaiñenite. Cue fecalle jinui, torafo illa isoi, naimiemo jaca iite. Jusiñamui dine illena, naimiena jaca itataite.

¹⁵ Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

¹⁶ Jesús dinena uai ote:

—O jofomo mai jai. O ini diga abido bene bi.

¹⁷ Naiñaiño uai ote:

—Ininidicue.

Jesús dinena uai ote:

—Uanai llotio. Ua ininidio. ¹⁸ Cinco diga inina jai faicaidio. Birui o diga itimiedi jiai o iniñede. Uanaicinona ua llotio.

¹⁹ Iemona abina uiñoocaillamona, naiñaiño dinena uai ote:

—Odi Jusiñamui ie lloraimadio. Iena uiñoticue. ²⁰ Cai jaiagai bai bene ite anedumo Jusiñamuina sedauidimaci. Ie jira nainomo Jusiñamuina nia sedadica; iadedi omoi judíuai dinena raitomoi: “Jerusalémo Jusiñamuina cai sedauilla”.

²¹ Jesús dinena dane uai ote:

—Cuenta ino. Jiairuido bai bene ite anedumo cai Moona sedañeitomoi. Jerusalémo naimiena jiai sedañeitomoi. ²² Raise uiñoño Jusiñamuina biruido sedadomoi; iadedi cai nairaimona cai Jilloitaraima illa jira, naimiena raise uiñuana sedadica. ²³ Jiairuido, ua birui, cominidi: “¿Ninomo Jusiñamuina sedaitica?” raillamo comeciaina facañeitimaci. Naimaci comeciai jitaillamona, naimaci illanomo Jusiñamuina ua sedaitimaci. Naie isoide comini naimiena sedajana Jusiñamui jitaide. ²⁴ Jusiñamui comeñede. Naimiedi jafaici. Omoi comeciai jitaillamona naimiena omoi sedajana jitaide.

²⁵ Riño uai ote:

—Cai Jilloitaraima billena uiñoticue. Naimiedi Cristo. Naimie bia, nana bie isoide rafuena caina raise uiñotaite.

²⁶ Jesús raite:

—Naimiedicue.

²⁷ Ieconí abido ridicaí. Riño diga Jesús ñaia jira, rajicaidicaí; iadedi: “¿Buena naiñaiño jitaide?” raillano jicanoñedicai. “¿Buena ñaitomíco?” raillano jiai jicanoñedicai. ²⁸ Ie lleroda pozo ecimo rainanocaida, Jesús llua isoi, naie facaise naiñaiño ie nairaimo abido jaide. Nainomo abido rillanona, naiñaiño cominimo llote:

²⁹ —Ailli pozo fuemo cue jaca cioiraininamie diga dafaifidicue. Nana cue finouiga rafue diese cuemo llote. Mai, cai jibuisailli. Naimiedi pozo fuemo ite. Nibai naimiedi cai Jilloitaraima. Naimiedi nibai Cristo.

³⁰ Ie jira Jesús dine ailluena comini bitimaci. ³¹ Naie riño ie nairai dine jailla mei, abido cai dine nia riñenia, Jesúsna raiticaí:

—Maestro, mai guiño.

³² Naimie uai ote:

—Cuemo guille illana uiñoñedomoi.

³³ Coniniri siadoticaí:

—Jai nibai bu ecajaibiga.

³⁴ Jesús uai ote:

—Jusiñamui cuena oretate. Naimie jitailla rafuena finocana jaidicue. Naimie rafuena cue llumona, jai guiticue isoidicue. ³⁵ Comecina facadomoi:

“Jusiñamui uaina nia lloñeiticaí. İco iena lloiticaí”. İe isoide. İllımo rıara nıa llısiñenia, comeciaina facadomoi: “Rıara einaillena, naga amaga fıvui fiebite. Naie facaise maijıtıcaí”. Omoımo llotıcue: Omoı ecımo eruai. Rıara jai einainte isoide. Naimacımo Jusiñamui rafue llollena, iena naimacı ĩnollena, aılluena comını jai itımacı. ³⁶ Naie llısilıamo maijıtımıedi ie ucubena feiñoite. İe isoide. Jusiñamui rafuena damıerie llocabıllamona, comını iena cacadımacı. Jıaino bıllamona, iena dane cacajamona, iena ĩnotımacı. Naie mare rafue llorainı ĩbana feiñoitımacı. Jusiñamui dıbeımo naimacı dajena maijıa jıra, dajena iobıtımacı. ³⁷ Caı comını iena raıcabıtımacı: “Damıe iduaina rıte; ia jıaimıe llısilıana ote”. ³⁸ İe isoide. Omoına oredıcue, comını cue dıbeımo itatallena. Naimacımo cue uaina nano lloñedomoi; iadedı nano jıaino naimacımo cue uaina llotımacı. İe jıra nana omoı llofuiamona cue uaina ĩnoıtımacı.

³⁹ Samarıa ĩñaiño llıamona, naiñaiño nairaimona aılluena comını Jesúna ĩnotımacı. “Naimıedi nana cue fınoa rafuena cuemo llote” naimacımo naiñaiño llote. “Naimıedi caı Jıllotıraıma” raıllanona Jesúna ĩnotımacı. ⁴⁰ Jesús dne naimacı rıllanona, naimacı dıga naimıe fiebillena, Jesúmo jıcanotımacı. İe jıra Jesús menarui naimacı dınomo fiebıde. ⁴¹ Naimıe llıfuiamona, jıaie aılluena comını naimıena ĩnotımacı. ⁴² Rıñoımo llotımacı:

—Daño o llıamona, navui ĩnotıcaı; iadedı naimıe uaina caı cacajamona, bıruı raise ĩnotıcaı. Naimıedi comını ua Jıllotıraıma.

⁴³ Menarui illanona, nainomona Galıleamo Jesús caı dıga jaıde. ⁴⁴ Caımo llote:

—Jusiñamuına lloraimadı ie nairai illanomo ia, naie comını naimıe llıamo cacarefiacaiñedımacı; ⁴⁵ iadedı Galıleamo caı rıllanona, nainomo itıno naimıena caımare feiñoıtımacı. Pascua raılla rafue facaise Jerusalémo nana naimıe fınoa rafue navui naimacı cıua jıra, naimıena caımare feiñoıtımacı.

Jesúdı illaıcomını jıtına jıllotaja rafue

⁴⁶ Galıleamo Jesús caı dıga macarıa, dane Canámo rıdıcaı. Nainomo jınuımona vino navui fınode. Nainomo caı ia, Capernaum raılla nairaimo itımie jıto duıde. Duidımıe moodı go bıerno dıga maijıııde. ⁴⁷ Judeamona Galıleamo Jesús illana naimıe fıdıano, Canámo bıte. Jesús illanomo bıllena, ie jıto jai fıodaiacana jıra, ie jıtına jıllotallena Jesúmo duere jıcanote. ⁴⁸ Jesús naimıemo llote:

—Siño rafuena omoı cıoiñenia, cuena ĩnoñedomoi.

⁴⁹ Uai ote:

—Maestro, cue dıga bı, cue jıto fıodaiñellesa.

⁵⁰ Jesús uai ote:

—Mai jai. O jıto jai fıodaiñeıte —llote. Naie ĩıma Jesús uaina ĩnuano, ie jıfomo abıdo jaıde. ⁵¹ Naısona naimıe jaıdemo, ie mullaıaı dıga afeedo beıci dafaıfıde. Llotımacı:

—O jıto jai jıllode.

⁵² İe jıra naimıe jıcanote:

—¿Nıno jıtıma itemo, jıllode?

Uai otımacı:

—Navui are jıtıma oni llıuaı caıdemo, abı cuarılladı faınonocaıde.

⁵³ İe comeciına facade: “Navui are naie facaise Jesús cuemo llote: ‘O jıto jai jıllode’ ”. İe mullaıaı llıana cacajamona, naimıedi Jesúdı caı Jıllotıraımana ĩnote. Nana naimıe jıfomo itıno jıaı ĩnotımacı. ⁵⁴ Judeamona Galıleamo Jesús abıdo bıllano, sıño rafuena ıese jai fınode.

5

Joraibimo tísitaitimie jillua rafue

¹ Digarui illa mei, cai judíuai rafue iacana jira, Jerusalémo Jesús abido jaide. ² Jerusalémo toica llaudaiai jaisoilla nase facaimo joraibi ite. Cai judíuai uaimona nai joraibi mamecidi Betesda. Naie jorai fuedo ite cinco jifocotiai. ³ Nainomo diga duidino biidimaci: uisnidimaci, ñuja-ñujacaidino, tísitaitino. Jínuina begollena sedadimaci. ⁴ Feide isoidemona dacaño Jusiñamui jaienicidi jínuina begotallena bite. Iemei nai jínuimo nano jaidimie ie duicomona jillode. ⁵ Duidino motomo tísitaitimie ite. Treintiocho años duide. ⁶ Naimiena ciuano, naimie are duillana uiñuamona, Jesús naimiemo jicanote:

—¿Jilloiacadio?

⁷ Duidimie uai ote:

—Jii; iadedi jínuina begoia, jaca buna ñede cue canoiten. Ie jira jiaimiedi cue uicodo jínuimo jaide. Ie jirari nia jilloñedicue.

⁸ Jesús uai ote:

—Mai naidacai. O bíra ferinocaida macari.

⁹ Ieconí naimie jillode. Ie bíra ferianona oni jai macarite.

Sábadoruimo duidimie jilloitajana siadua rafue

Sábadoruimo, judíuai jafaici oullaruimo, naimie jillode. ¹⁰ Ie jira judíuai illaicomínidi jillodimiemo llote:

—Birui sábado. O bíra abinocaida o uilla jira, Moisés micorí rairuica rana jai finodio. Sábadomo maijinidicai. Birui jafaici uaruimo jaca buena jetanidicai.

¹¹ Naimie uai ote:

—Cuenta jilloitaimie cuemo llote: “O bíra mai ferinocaida macari”.

¹² Judíuai dinena jicanote:

—¿Bu iena omo llote? —Naimie uiñoñena jira, uai ñede.

¹³ Jesúsdi comini motomo itabilla jira, ailluena comini illa jira, jai jillodimie ie jilloitaimiena uiñoñede. ¹⁴ Ie meinoconi dallu illanona, Jusiñamui jofomo Jesús dinena naimiena baite. Llote:

—Jai jillodio. Abido dane eo duere o sefuisa, dane jeacinona finoño.

¹⁵ Ie mei judíuai illaicomínimo jillodimie lluaide. Llote:

—Jesús raillamie cuenta jillotate.

¹⁶ Sábadoruimo Jesús bie rafuena finua jira, judíuai illaicomínidi naimiena duere finoacasite. ¹⁷ Jesúsdi abina riiduanó llote:

—Cue Moodi ie jitailla rafue jaca finode. Ie isoi cue jitailla rafue finocana jaca jaidicue —llote. ¹⁸ Sábadoruimo naimacimona Jesús maijia jira: “Jusiñamuidi cue Moo” naimie railla jira: “Jusiñamuidicue” naimie railla jira, judíuai illaicomíni naimie meinellena eo jitaidimaci.

Jesús ie Moo isoi finua rafue

¹⁹ Naimacimo Jesús llote:

—Uanaicinona lloticue. Buena dama finonidicue. Cue Moo finua rafuena ciuano finocabidicue. Cue Moo finua isoi finodicue. ²⁰ Cue Moo cuenta isiruillanona, nana ie finoca rafuena cuenta jai uiñotade. Naimie Jitona cue illa jira, bie imana cue jilloitaja baifemo jiaie siño rafuena finoiticue, omoi raillacailena. ²¹ Fiodaitinona jilloitallena, cue Moomo ie uai ite. Naie uai cuemo jiaí ite. ²² Cue Moo juez isoi naimie ñnoñedinomo lloñeite; iadedi naimacimo juez isoi cue llollena, naimaci duere sefuillena, ie uai cuemo iga. ²³ Omoi dine naimie cuenta oretate. Naimiedi omoi cuenta iobitajana jitaide, naimiena omoi iobitaja isoi. Cuenta omoi iobitañenia, cue Moona

jiaí iobitañedomoi. ²⁴ Uanaicínona llotícue. Cue uaina bu cacaia, cuena oretatimiena bu ñnoia, monamo jaca iite. Jearede rafue naimie finua facaina duere sefuiñeite. Faiñeite; ia monamo Jusiñamui diga jaca iite. ²⁵ Uanaicino llotícue. Jusiñamui Jitodicue. Ua birui cuena ñnoñedino cue uaina cacareitimaci. Cuena cacajamona, cuena ñnuamona, jaca iitimaci. ²⁶ Comínina jaca itatallena, cue Moomo uai ite. Comíni jaca itatallena, cuemo ie uai jiaí iga. ²⁷ Cuena ñnoñedinomo juez isoi cue lollena, naimiemo cue duillamona, ie uai cuemo jiaí iga. ²⁸ Ieri raijicaiño. Jiaíruido nana jai fiodaitino diese cue lluana cacaitimaci. ²⁹ Fiodaillamona naimaci abiaí jilloitimaci. Ie mei cue jitaillacinona finodino jaca illena lloitícue. Cue jitaillacinona finoñedino diese duere sefuillena lloitícue. ³⁰ Naimacimo cuena oretatimie jitailla isoi lloitícue. Dama cue comecimo ite rafuena cue lloñena jira, bie lluacinodi uanaicino.

Jusiñamui ie Jito uaina comíni ñnoñena rafue

³¹⁻³² Jesús nia llote:

—Dama cue abina cue lloiadedi, bu cuena jaca ñnoñede; iadedi Jusiñamui cue facaina jiaí llote. Naimie llucino uanaicino. Iena uiñoticue. ³³ Naimiena cacareillena, Juan Bautista micori ñine comínina navui oretatomoí. Abido naimaci bia, naimaci cacaja rafuena omoímo lollena, naimacina oretatomoí. Juan lluacinodi uanaicino. ³⁴ Naimie micori cue rafuena llouide; iadedi naimie micori llogacinomo omoí comeci eo facajana birui jitañedicue. Cuena omoí ñnollena, naimie mamecina jai llinoticue. ³⁵ Lamparín raise lligaiña isoi, ie rafuedo Juan micori omoí comeciaino iticínona raise uiñotade. Dallu ieri iobidomoí. ³⁶ Cue finoca rafue Juan micori finoca rafue baifemo faite. Cue siño finoca rafuena ñaitícue. Cuena naimie oretajamona, cue Moo uaido iena finodicue. Ie jira naiemona naimie ñinena cue billana jai uiñotomoí. ³⁷ Cue finoca rafue muidona cuena uiñotomoí; iadedi naimie lluana jaca cacaiñedomoi. Naimiena jiaí jaca cioiñedomoi. ³⁸ Cuena omoí ñnoñena jira, naimie uaina feiñoñedomoi. ³⁹ Jusiñamui ñine omoí rillena, Jusiñamui facaina lloraini micoriai ciegafuiaina facacabidomoí. Naifuiadi cuena ñaite; ⁴⁰ iadedi Jusiñamui ñine omoí rillena, cue uaina ñnoiacaiñedomoi. ⁴¹ Cuemo iobillacinona omoí fecallena sedañedicue. ⁴² Jusiñamuina isiruiñedomoi. Iena uiñoticue. ⁴³ Cue Moo mamecido cue billanona, cuena feiñoñedomoi; iadedi dama ie mamecido jiaimie bia, naimiena feiñoitomoí. ⁴⁴ Jaca ñnoiacaiñedomoi. Iobillacino coninimo fecadomoí; iadedi ua Jusiñamuidi omoína “Mare” raillana jitañedomoi. ⁴⁵ “Cue Moomo omoí marañede finoca rafuena lloitícue” raillanomo comeciaina facañeno. Moisés micori ciegafuiaimo omoí llogiduafue jai ite. Moisés micori ciegafuiaí muidona Jusiñamui ñine omoí jaca illemo ocuridomoí. ⁴⁶ Moisés micori ciegafuiaina ñnotomoína, cuena naimie micori cuia jira, cuena jiaí ñnoitomoí. ⁴⁷ Naimie ciegafuiaina ñnoñedomoi. Ie jira cuena jiaí ñnoñeitomoí —llote.

6

Jesús cinco llomenicomona ailluena comínina ecaja rafue
(Mt 14.13-21; Mr 6.30-44; Lc 9.10-17)

¹ Jiaíruido Galilea railla jorai ie ruica ñibeimo Jesús ie llofueoicaiganodicaí diga jaide. Naie joraidi jiaí Tiberiana mameciredede. ² Duidinona naimie jillotaullana naimaci cúa jira, ailluena comíni naimiena racadimaci. ³⁻⁴ Naie facaiseconi pascua railla rafuedi jai iaíre ite. Jesús cai diga anedumo a

jaillanona, dinomo ana raide. ⁵ Oni erodatemo, ailluena comini naimie dine billana ciode. Felipemo jicanote:

—Naimaci guillena, ¿ninomona llomenicono oiticaí?

⁶ Naimiena facacillena, iena jicanote; iadedi Jesús ie finolle rana jai uiñote.

⁷ Felipe uai ote:

—Janore naimaci guillena, doscientos digarui ie majia ucube diese llomenico oticaína, baiñede.

⁸ Naie facaise caimona damie iena cacade. Naimiedi Simón Pedro ama. Andréna mameciredo. Naimie raite:

⁹ —Cinco cebadamona finoca jenide llomenico daje uruemo bene ite. Mena lliciaí jiaí naimiemo ite; ia ¿niése nibaiticaí? Baiñeite.

¹⁰ Jesús caimo llote:

—Cominimo llono, ana imaci raillesa.

Ie jira raitire illanomo ana raidimaci. Cinco mil iñiaí itimaci.

¹¹ Llomenicono Jesús ua meinomoni, Jusiñamui iobillaciona fecajano, Jusiñamui jide. Iemei cominimo caína naie llomenicono fecatate. Comini jitailla dierise lliciaí daje isoi fecatate. ¹² Naimaci monillamona, caimo Jesús llote:

—Buena jaca fañiñellena, fiebide guille danomo irai.

¹³ Ie jira iena iraidicaí. Naie cinco llomenicomona, comini guigamona fiebidemona, doce cirigaiamo oruitaticaí. ¹⁴ Jesús finoca rafuena naie cominidi ciuanona, llotimaci:

—Jusiñamui facaina lloraini micoriaídi caí Jilloitaraíma ico billena jai llotimaci. Bimiedi naimie.

¹⁵ Naimaci illaimana naimie illena, naimiena gaitacadimaci. Iena naimie uiñua jira, iena naimie jitañena jira, aneduamo naimie oni jaide.

Capernaumo Jesús abido jailla rafue

(Mt 14.22-27; Mr 6.45-52)

¹⁶ Jitoma ana itemo, jai navuidemo, ie llofueoicaiganodicaí joraimo jaidicaí. ¹⁷ Caí botemo caí jaillano, ruica Capernaumo jaiacadicaí; iadedi Jesús nia biñede. Jesúsna sedadicaímo, naimie biñena jirari, jai jitiarena facaiseconi jai jaidicaí. ¹⁸ Riire aifi illa jira, jorai eo bagode. ¹⁹ Nibaí cinco, nibaí seis kilómetros jaidicaímo, damie caí dine jinui emododo billana ciodicai. Bote dine naimie billana ciuanona, jacinaiticaí. ²⁰ Jesús caimo llote:

—Jesúdicuesa. Jacinañeno.

²¹ Iena cacajanona, botemo naimiena a billana jitaídicaí. Ieconí ruica dine caí jaiacananomo ridicaí.

Comini Jesúsna jenua rafue

²²⁻²⁴ Caí jailla mei, daje bote nairuido illa jira, jinafomo fiebidino Jesús caí diga jaiñenana uiñotimaci. Caí Nama ie Moomo iobillaciona fecajanomo, cominimo guille fecajanomo, Tiberiamona dajerie botes naie facaise iaíre bite. Monaidemo, Jesúsna naimaci cioñena jira, caí jiaí iñena jira, naie botiaído Capernaumo Jesúsna jenollena, jaidimaci.

Jesús: “Llomenicodicue” railla rafue

²⁵ Ruica dine Jesúsna comini baillanona, jicanotimaci:

—¿Niruido bene ridio? ²⁶ Jesús uai ote:

—Navui are omoína cue ecajamona, iemona omoi monillamona, cuena jenodomoí. Siño rafuena cue finuana ciodomoi; iadedi cuena nia iñoñedomoi.

²⁷ Guille raíre cueicabide. Cueiruide ramo comeciaina eo facañeno. Cueiruiñede ramo comeciaina eo faca. Jusiñamui diga omoi jaca illemo

comeciaina eo faca. Cue Moo Jusiñamui, imana cue jaillena, cuena oretate. Ie uai cuemo illanona, cue uaina omoi inuamona, Jusiñamui diga jaca iitomoi.

²⁸ Jicanotimaci:

—Nia Jusiñamui dibeimo iticaina, ¿nie isoidifue finodicaina mare?

²⁹ Jesús uai ote:

—Naimie oretagamie uaina omoi inuana jitaide.

³⁰ Naimaci dinena dane jicanotimaci:

—¿Nie isoide rafuena finoitio? iena cai ciuano, o uaina cai inollesa. ³¹ Cai jaiagai jofue inenanomo Jusiñamuimona bite guilla ra guisoidimaci. Moisés micori iena jaie cuela: “Jusiñamuimona bite guiga ra naimacimo nagarui fecauide”. Iemo jiai birui ocuridicai. Naie isoide siño rafuena o finuana jiai cioacadicai —llotimaci.

³² Jesús uai ote:

—Uanai lloticue. Moisés micori naie guiga ra jaca fecañede. Cue Moo iena fecauide. Birui naimiedi monamona bite ua llomeniconona omoimo jai fecaacade. ³³ Jusiñamui fecaacalle llomenico monamona jai bite. Comini iena guillamona, jaca iitimaci.

³⁴ Llotimaci:

—Nagarui caimo bie isoide llomeniconona feca.

³⁵ Jesús uai ote:

—Llomenico guillamona iticai. Omoi llomenico isoidicue. Cuena inuamona, monamo jaca iitomoi. Cuena inotimie dane aimetañeite. Cuena isiruitimie jaca dane jiroacaiñenite. —Iese llote; ia naimaci comeciaina ñaite. Naimaci comecai jitaillacino naimacimo jaca illena ñaite—. ³⁶ Cuena ciodomoi; iadedi cuena inoñedomoi. ³⁷ Nana cue dibeimo cue Moo itatallinodi cuena inoitimaci. Cuemona naimacina jaca oni dotañeiticue. ³⁸ Cuena oretatimie ie jitailla rafuena finollena, monamona jai biticue. Dama cue jitailla rafuena finoiticuena biñedicue. ³⁹ Cuena oretatimiedi cue dibeimo itatallinomona buna faifillana jitañede. Jusiñamui lluaruimo fodaillamona nana naimaci abiaina cue jilloitajana jiai jitaide. ⁴⁰ Jusiñamui Jitona cue illana bu inoia, cuena bu inoia, monamo jaca iite. Jusiñamui lolliruimo fodaillamona naimie abina jillotaiticue. Iese cue Moo jitaide.

⁴¹ Jesúsdi: “Monamona bite llomenicodicue” railla jira, judíuai illaicominidi naimie uaina jamaillano inosiñede. ⁴² Raitimaci:

—Bimiedi Jesús. José jito. Ie moonu uiñoticaí. Ie eina jiai uiñoticaí. ¿Niese naimiedi: “Monamona biticue” raite?

⁴³ Jesúsdi uai ote:

—Iese omoi naiñeno. ⁴⁴ Naimiena cue Moo inotañenia, bu cuena inonide. Cuena bu inoñenia, Jusiñamui lolliruimo fodaillamona naimie abina jillotaiticue. ⁴⁵ Jusiñamuina lloraini micoriai jaie iena cuetimaci: “Jusiñamuidi nana cominina ico llofueite” cuetimaci. Birui naie rafue jai suide. Naga cue Moomo cacarefidimie, naga cue Moomona fueotimie cuena jiai inoite. ⁴⁶ Buna cue Moonu jaca cioñede. Naimiemona cue billamona, dama cue cúa.

⁴⁷ Uanaicinona lloticue. Cue uaina inotimie monamo jaca iite.

⁴⁸ Jesús dane llote:

—Llomenico guillamona iticai. Omoi llomenico isoidicue. Cuena inuamona, monamo jaca iitomoi. ⁴⁹ Jofue inenanomo omoi jaiagai Jusiñamuimona bite rana guisoidimaci; iadedi fodaítimaci. ⁵⁰ Birui jiaie guille ra ite. Monamona ite. Iena bu guia, monamo jaca iite. ⁵¹ Bie llomenicodi cue. Monamo cominina jaca itatallena, monamona biticue. Bu bie isoide llomeniconona guia, jaca iite. Bie llomenicodi cue abi. Comini facaina fodaíticue.

⁵² Iena cacajano, judíuái illaicomini coniniri naiena siadotimaci. Raitimaci:
—¿Niese bimie abina riticai?

⁵³ Ie jira Jesús dinena raite:

—Uanai lloticue. Cue abina omoi riñenia, cue diruena omoi riñenia, cue Moo diga jaca iñeitomoi. ⁵⁴ Bu cue abina riia, bu cue diruena riia, cue Moo diga jaca iite. Fiodaillamona naimie abi iirairuimo jillotaiticue. ⁵⁵ Cue abidi ua rille. Cue diruedi ua rille. ⁵⁶ Bu cue abina riia, bu cue diruena riia, cuena nabaide. Naimiena jiai nabaidicue. ⁵⁷ Cue Moo cuena orede. Naimiedi jaca ite. Cue Moo jaca illa jira, cue jaca iticue. Daje isoide. Bu cue abina riia, cue illamona, naimie jiai iite. ⁵⁸ Bie isoide guille ra monamona jai bite. Omoi jaiagai jai guiga ra isoñede. Jai fiodaitimaci; iadedi bie guille ra birui bu guia monamo jaca iite. —Iese llote; iadedi naimie fiodaillamona, naimiena comini inuamona, Jusiñamui diga naimaci jaca illena ñaite.

⁵⁹ Capernaumo judíuái ofiracomo Jesús biena llote.

Jesús diga jaisoidino naimie llua na siadua rafue

⁶⁰ Jesús diga jaisoidino naimie llua na cacajano, coniniri siadotimaci:

—Bie llua eo irirede. Bu iena cacaiñede.

⁶¹ Jesúsdi naimaci iese siaduana uiñote. Ie jira llote:

—Cue llua na raise inoñedomoi. ⁶² Jusiñamuimona imana jaillena jai biticue. Monamo abido ico cue jaillena cioitomoína, iena jiai nibai raise inoñeitomoi. ⁶³ Cai joreño caimo illamona, iticai. Dani cai abi diga iñedicaí. Ie isoide. Cue llogacino Jusiñamuimo duide. Iena omoi inuamona, jaca iitomoi; ⁶⁴ ia omoimona nana inoñedomoi —llote. Nano dofoconimona Jesúsdi naimiena inoñedinona uiñote. Naimiena gaitataitimiena jiai uiñote.

⁶⁵ Jesús dane llote:

—Ie jira omoimo lloticue: Cue Moo jitaiñenia, cuena jaca bu inonide.

⁶⁶ Iena cacajano, Jesús diga jaisoidinomona, diga comini naimiena fainonocaidimaci. ⁶⁷ Ie jira ie doce llofueoicaiganodicaímo Jesús jicanote:

—¿Jiai cuena fainonocaida, abido jaitomoi?

⁶⁸ Simón Pedro uai ote:

—Nama, o diga cai jaiñenia, ¿bu diga jaiticai? Jusiñamuimo cai rillena, o isoi jillotaraima iñede. Jaiñiemmo jaca itatajaracinodi iñede. ⁶⁹ O llua na jai inoticaí. Jusiñamui mare Jitodio. Iena uiñoticaí.

⁷⁰ Jesús dane uai ote:

—Doce digamie fetocaomoi; iadedi omoimona damie Taifemo jainaiáide —llote. ⁷¹ Caimona Judas Iscariote micorina ñaite. Judas micori Jesúsna gaitataiacadimie.

7

Jesús amatiaí naimiena inoñena rafue

¹ Jaiñuido Galileamo ite nairaiáimo Jesús macarite. Judíuái illaicomini naimiena meineiacana jira, Judeamo jaiñede. ² Jifocotiaíai raila rafue iaíre ite. Judíuái ie rafue. ³ Ie jira Jesús amatiaí naimiemmo llote:

—O diga jaicabidino o finua rafuena raise cioillena, beno fainonocaida, Judeamo jai. ⁴ Bu ie mameci are soriacania, bainino maijiraínina. Ie isoide. Siño rafuena o finoia, ailluena comini illa motomo iena fino.

⁵ Jesús amatiaí naimiena inoñena jira, iese raite. ⁶ Jesús dinena uai ote:

—Jerusalémo nia jaiñeiticue; iadedi nainomo omoi jaiacalliruido omoi jai.

⁷ Comini omoína enoñedimaci. Naimaci finoca jearede rafuena cue llua jira, cuena jaca enoidimaci. ⁸ Jerusalémo rafuemo jai. Cue jaillirui nia riñena jira, nia jaiñeiticue. ⁹ —Iese llua no, Galileamo naimie fiebide.

¹⁰ Naimie amatiai rafuemo jailla mei, Jesúdi naimaci jinafona dama bainino jaide. ¹¹ Nai rafuemo judíuai illaicomini Jesúna jenuano baiñenano, cominimo jicanotimaci:

—¿Ninomo naimie ite? —Uiñoñena jira, comini uai oñedimaci.

¹² Nainomo ailluena comini itimaci. Comini illa motomo naimiena anado siadoside. Jiaíno dinena: “Naimiedi mare” raitimaci. Jiaíno dinena: “Naimiedi cominina jifuate” raitimaci. ¹³ Judíuai illaicominina iciana comini jaciruillanona, anado siadoside. Jesúna marefodo buna ñañede.

Sábadoruimo Jesús maijia rafue

¹⁴ Jifocotiaiai railla rafue atuedo fuitemo, Jesús Jusiñamui jofomo jaillano, llofuate. ¹⁵ Illaicomini naimie llofuiamona rajicaidimaci:

—¿Ñiese naimie abi uiñote? Eo rafuena uiñotimemona jaca fueñede —raitimaci.

¹⁶ Jesús uai ote:

—Dama cuemona oñega cue llofuiacinodi. Cuen a oretatimie ie. ¹⁷ Jusiñamui jitaillacinona finoiacadimiedi ninomona cue llofuiacinona cue uana uiñoite. Jusiñamuiamona cue uana uiñoite. Dama cue comecimona cue oñenana jiai uiñoite. ¹⁸ Bu dama ie comecimona ie llofuiacinona uanona lloia, naimiedi comini naimiemo iobillacinona fecajana jitaide; iadedi bu ie oretatimiena iobitaia, uanai llote. Marañedicinona finoñede. ¹⁹ Moisés micori Jusiñamui uaina jaie llote; iadedi birui naie llogacinuaina nia raise ñnoñedomoi. Iena raise ñnotomoidena, cuena niade meineiacañedomoi.

²⁰ Comini dinena uai ote:

—Ñibaí uairitaidio. ¿Bu ona meineiacade?

²¹ Jesús uai ote:

—Dacaiño sábadoruimo damiena jillotaticue. Ie jira cue uaina uaitatomoí. ²² Sábadoruimo jiai maijicabidomoí. Moisés micori isaiaí abiaí diana omoímo jaie llote; iadedi naimie micori naiena nano lloñede. Naimie micori usumatiaí naiena nano llotimaci. Sábadoruimo isana abi dellirui ia, detomoí. ²³ Moisés micori llogacinona ñnollena, sábadoruimo isaiaína detomoí. Sábadoruimo imana raise jillotaticuemo, ¿bue ñellena cue diga iciritomoí? ²⁴ Cominimo jamai eruailanona, naimacina jeare ñañeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

Jesúna comini siadua rafue

²⁵ Ie jira Jerusalémo itino coniniri siadotimaci:

—Illaicomini bimiena meineiacadimaci; ²⁶ iadedi beno marefodo naimie llofuate. Jaca buena lloñedimaci. Illaicomini: “Bimiedi cai Jilloitaraíma” raillano ñibaí comeciaina facadimaci. ²⁷ Bimie ie billanona cai uiñua jira, naimiedi cai Jilloitaraímañedimie. Cai Jilloitaraíma baireia, jaca budi naimie billanona uiñoñeite —siadotimaci.

²⁸ Ie jira Jesús Jusiñamui jofomo naimie llofuiano llote:

—Cuen a uiñotomoí. Ninena cue billana jiai uiñotomoí. Cue jitailla jira biñedicue; iadedi jiaimie cuena oretate. Naimiedi uanai llote. Naimiena uiñoñedomoi. ²⁹ Naimiemona cue billa jira, naimiena uiñotice. Cuen a oretate —llote.

³⁰ Ie jira illaicomini Jesúna gaitaacadimaci; iadedi naimie fiódaille facaise nia riñena jira, buna naimiena gaitañede. ³¹ Nairui ailluena comini naimie uaina ñnotimaci. Raitimaci:

—Cai Jilloitaraíma bia, ¿ñiese naimiedi bimie baífemo jiaie rafuena finoite?

Jesúna gaitaiacana rafue

³² Fariseuaidi comini iese ñaiana cacajano, Jesúsna gaitallena, Jusiñamui diga nanoca ñairainidi ailluena policiana orede. ³³ Ie jira naimacina Jesús dinena raite:

—Dallu omoi diga nia iiticue. Ie mei cuena oretatimie dine abido jaiticue.

³⁴ Cuena jenoitomo; iadedi cuena baiñeitomo. Cue dine binitomo.

³⁵ Ie jira nainomo ite illaicomini dani siadotimaci:

—¿Ñine jaite? ¿Ñiese naimiena baiñeiticai? Judúuaiñedinona llofuellena, jiaie eniruemo cai comini dine nibai jaite. ³⁶ ¿Ñiese naimie raite: “Cuena jenoitomo; iadedi cuena baiñeitomo”? ¿Ñiese raite: “Cue dine binitomo”? —iese siadotimaci.

Jesúdi Jusiñamui Joreñona ñaia rafue

³⁷ Jifocotiaiai railla rafue fuillaruimo, ua rafue ie nairuimo, Jusiñamui jofomo itinomo Jesús ado llote:

—Bu jiroacania, cue dine bi. ³⁸ Jusiñamui facaina lloraini micoriai jaie cuela: “Naimiena inotimie comecimo jaca itatate jinui isoi iite, torafomona jinui tonooilla isoi”.

³⁹ Jesúdi iese llote; ia Jusiñamui Joreñona ñaite. Jesúsna inotinomo Jusiñamuidi ie Joreñona ico illena ñaite. Jesús nia fioidañena jira, iena nia iñega.

Comini Jesúsna dane siadua rafue

⁴⁰ Jesús lluana comini cacajano, raitimaci:

—Jusiñamui facaina lloraini micoriai Jusiñamui facaina lloraíma ico billena jaie llotimaci. “Cristo nia baireñenia, naimie biite” llotimaci. Bimiedi naimie.

⁴¹ Jiaino raitimaci:

—Naimiedi cai Jilloitaraíma. Naimiedi Cristo.

Jiaino raitimaci:

—Cai Jilloitaraíma Galileamona biñeite. ⁴² Jusiñamui facaina lloraíma micori cuela: “Cai Jilloitaraímadí David micori jito. Belémo David micori illanomo jeicille”.

⁴³ Ie jira daje isoi naimiemo comeciaina facañedimaci. ⁴⁴ Jiaino naimiena gaitacadimaci; iadedi buna naimiena jetañede.

Judúuai illaicomini Jesúsna inoñena rafue

⁴⁵ Ie mei policías naimaci illaicomini dine abido jaidimaci. Fariseuai dinena jicannotimaci:

—¿Bue ñellena Jesúsna atiñedomoi?

⁴⁶ Policías dinena uai ote:

—Naimie llofuia isoi jaca buna llofueñede. Iena jacinallanona, naimiena atiñedicai.

⁴⁷ Fariseuai dane llotimaci:

—Cominina jifuia isoi, omoína jiaí jifuate. ⁴⁸ Cai illaicomini dinena naimiena jaca inoñedicai. Moisés micori llogacínodo raise jaidicai; ⁴⁹ ia Jesús llofuiana cacadino Moisés micori llogacínuaído jaca raise jaiñedimaci. Ie jira jaca faifitimacisa.

⁵⁰ Naie illaicomini mona Nicodemo raillamie ite. Naimie naóna Jesús dine navui jaide. Fariseo imie. ⁵¹ Jesúsna riiduanona, naimie llote:

—Cai einamací llocabitimaci: “Bu duere cai finoacania, nano naimie lluomo cacarefiticai. Jearede rafue naimie finuana cacareillano, naimiena duere finoiticai”. Iena cai cacañenia, naimiena duere finoñeiticai.

⁵² Nicodemomo llotimaci:

—Galileamona bitino isoi ñaitio. Naimie llofuegamiena nibai jai jaiacadio. Jaie cuezafuiana raise faca. Jusiñamui facaina lloraini micoriaídi cai nairaina

Jilloitaraïma Galileamona billena jaie cueñedimaci. Bie Jesús raillamiedi cai nairaina Jilloitaraïmañedimie.

⁵³ Ie meinoconi damierie imaci jofomo jaidimaci.

8

Ie iniñede ïma diga riñodi rafuetailla ie rafue

¹ Naie facaise Jesúsdi Olivos railla anedumo jaide. ² Ie areruido jítiramo Jusiñamui jofomo abido dane jaide. Ailluena comini naimie ðine billa jira, naimie ana raïta, naimacina llofuate. ³ Naie facaise Moisés micori llogacinona llofuerainimona dajerie bitimaci. Fariseuaimona dajerie jiaï bitimaci. Daje riño atidimaci. Ie iniñede ïma diga naiñaiñona jai eïdatimaci. Comini illa uicomo atiano, ⁴ Jesúsimo llotimaci:

—Llofueraïma, biñaiño ie iniñede ïma diga eïdaticai. ⁵ Moisés micori jaie cueda: “Bie isoidiñaiñodi nofici diga fairinoga, meinellena”. ¿Niese naiñaiñona o raïtio?

⁶ Naimiena facacillena, naimie raise uai oñenia, naimiena llogidollena, iese jïcanotimaci. Iena cacajano, Jesús ana jítadacaida, eniruemo ie onocai diga cuete. ⁷ Naimiemo diga icaiño jïca-jïcanuano, naimie naidacaida, naimacimo llote:

—Omoïmona jeacino iñedimie naiñaiñoïmo nano noficina fairino.

⁸ Dane ana jítadacaida, eniruemo dane cuete. ⁹ Naimie lluaana cacajano, dajerie jino jaidimaci. Nano eo einamacidi jino jaidimaci. Ie mei conirueni jino jaidimaci. Nana comini tuua mei, nainomo Jesús fiebide, naie riño diga ñaïllena. ¹⁰ Eruaïllano naiñaiñoïmo jïcanote:

—¿Ni nai o llogidotino?

¹¹ Naiñaiño uai ote:

—Jaca iñedimaci. Cuena jai llogidoiacaiñedimaci.

Jesús uai ote:

—Jiaï ona duere finoñeiticue. Mai jai. Jeacino dane finoñoïno.

Jesúdi comini comeciaï lligaiñua rafue

¹² Jesúsdi cominina dane llofuianona, raite:

—Jeacino oni jaïllena, comini comeciaina lligaiñotocue. Cuena ïnotimie jítiredinomo jaca iñeite. Jeacino anamo jai iñedimie Jusiñamui diga ico jaca iite.

¹³ Fariseuai ðinena uai otimaci:

—Dama o abina ñaïtio. Ie jirari uanaicïnona lloñoedio.

¹⁴ Jesús uai ote:

—Dama cue abina llotocue; iadedi uanaicïnona llotocue. Ninena cue billanona uiñotocue. Nïne cue jaïllinona jiaï uiñotocue. Ninena cue billanona uiñoñedomoi. Nïne cue jaïllinona jiaï uiñoñedomoi. ¹⁵ Abi raise uiñoñoïno cuena jeare ñaïtomoi. Iese omoïna ñaïñedicue; ¹⁶ iadedi omoïna cue ñaïa, uanaicïnona llotocue. Dama cue uaina omoïna lloñedicue. Cuena oretatimie omoïna jiaï llote. ¹⁷ Moisés micori iena jiaï jaie cueda: “Menamie daje isoi lloia, naie iaïmaïaï llucïnodi omoi ïnuua” cueda. ¹⁸ Cue facaina llollena, menamie jai ite. Cue facaina llotocue. Cue Moo cue facaina jiaï llote.

¹⁹ Fariseuai ðinena jïcanote:

—¿Ni o moo?

Jesúsdi uai ote:

—Cuena uiñoñedomoi. Cue Moona jiaï uiñoñedomoi. Cuena uiñotomoina, cue Moona jiaï uiñotomoi.

²⁰ Jusiñamui jofomo ucube eenoracomo bicïnona siadotimaci. Jesús fio-daille facaise nïa riñena jira, jaca buna naimiena gaïtañede.

Jesúna comini ñnoñenia, naie jeacino diga fiodailla rafue

²¹ Naimacimo Jesús dane llote:

—Íco oni jaiticue. Cuenajenoitomoi; iadedi cuenabaiñeitomoi. Na omoimo jeacino nia ítemo, fiodaitomoi. Cue jaillinomo jainitomoi.

²² Ie jira judíuái illaicomini dinena iena siadotimaci:

—Dama íe abína meíte.

“Cue jaillinomo jainitomoi” Jesús railla jira, íese siadotimaci.

²³ Jesúsdi uai ote:

—Jusiñamuí íte rafuíemo duiñedomoi. Naimíemo íte rafuíemo duidícue. Naimíe díbeímo íñedomoi; ía naimíe díbeímo íticue. ²⁴ Cue Jusiñamuí Jítonana omoi ñnoñena jira, na omoi jeacino diga fiodaitomoi.

²⁵ Jícanosíde:

—¿Budíó?

Jesús uai ote:

—Nano omoi motomo cue íllamona bumíedicuena omoína raícabítícue. ²⁶ Dígá rafue omoímo lloíacadícue. Maraiñede rafuíena omoi finuíana omoímo nía lloíacadícue; íadedi omoímo cuena oretatímíe uaina dama llotícue. Naí uaidí uanaícíno —llote.

²⁷ Naimíedí íe Moo Jusiñamuína llote; íadedi cacaiñedímaci. ²⁸ Ie jira Jesús llote:

—Cuenajenoí meínía meí, bumíedicuena uíñoítomoi. Cue uaido dama lloñedícue; íadedi cue Moo cue llofúía uaido llocabítícue. ²⁹ Cuenajenoí oretatímíe cue díga íte. Naimíe jítaílle rafuíena cue finúa jira, cuena faínocaiñede.

³⁰ Íese Jesús llotemo, díga ílláicomini naimíe uaina como ñnoíacadímaci.

Comini Taiífe anamo ílla rafue

³¹ Jesúsdi naimíe uaina como ñnoíacadínomo llote:

—Cue lluíana ñnocana omoi jaía, cue ua comínídomoi. ³² Uanaícínóna uíñoítomoi. Íe meí jíaímíe anamo dane íñeítomoi.

³³ Uai otímaci:

—Abraham mícorí íe uruíadícaí. Jíaímíe anamo jaca íñedícaí. ¿Bue ñíllena llotío: “Jíaímíe anamo íñeítomoi”?

³⁴ Jesúsdi uai ote:

—Uanaí llotícue. Jeacino finocabídomoi. Naga jeacino finoraíma íe jeacino anamo jaí íte. Omoi jeacino anamo omoi íllána ñaítícue. ³⁵ Jíaíe rafuíedo íena lloítícue. Íe patrón anamo ítímíemo íe patrón rafuíedí duiñede; íadedi naíe patrón jítomoi íe rafuíedí duíde. ³⁶ Íe ísoíde. Jusiñamuí Jítóna cue íllamona, naimíe rafuíemo duidícue. Íe jira omoímo cue lloía, omoi jeacino anamo ua íñeítomoi. ³⁷ Abraham mícorí íe uruíadídomoi. Íena uíñoítícue; íadedi cue lluíana omoi raíse ñnoñena jira, cuena meíneíacádomoi. ³⁸ Cue Moo díga jaíe cue íllamona, cue cíua rafuíena llocabítícue. Omoi móomona cacaja rafuíena finocabídomoi.

³⁹ Uai otímaci:

—Caí móodí Abraham mícorí.

Jesús dane uai ote:

—Abraham mícorí uruíadídomoídéna, Abraham mícorí finoca rafuíe ísoí finódomoi. Abraham mícorí uruíadíñedomoi. Íe jira Abraham mícorí finoca rafuíe ísoí finoñedomoi. ⁴⁰ Uanaí cue llúa jira, cuena meíneíacádomoi; íadedi Abraham mícorí íese finoacaiñede. Cue lluíacino Jusiñamuímona otícue.

⁴¹ Jusiñamuí uruíái finoca rafuíena finoñedomoi; íadedi omoi móo finoca rafuíena finocabídomoi.

Uai otímaci:

—Jamáí náíraí íe uruíadíñedícaí. Caí Móodí Jusiñamuí.

⁴² Jesús dane llote:

—Jusiñamuidi omoi moodena, cuena isiruitomoi, naimiemona cue billa jira. Cue jitailla jira, biñedicue; iadedi cuena oretate. ⁴³ ¿Bue ñellena cue llwana cacaiñedomoi? Cacareirainidomoi. ⁴⁴ Omoi moodi Taifena jira, cue llwana ñnoñedomoi. Naimie jitailla rafuena finoacacabidomoi. Nano dofomona naimiedi comena meineraima. Naimie taino jaca llua jira, uanaicnona naimie jaca gaiñede. Naimie tainona lloia, ie comeci llua isoi llote. Naimiemona taino llucanodi comuicabide. Naimie isoidomoi. ⁴⁵ Uanai cue llua jira, cuena ñnoñedomoi. ⁴⁶ ¿Nie isoide jeacino finodicue? Cuemo llono. Uanai cue llia, ¿bue ñellena cuena ñnoñedomoi? ⁴⁷ Jusiñamuina mooredimiedi Jusiñamui uaina cacade. Jusiñamui uruiañnedomoi. Ie jira cue llwana cacaiñedomoi.

⁴⁸ Naimiena jearuillanona, naie illaicomini dinena iese raitimaci:

—Samaritano nairai imedio. Janaba illamedio. Uairitaidio.

⁴⁹ Jesús uai ote:

—Janaba illamieñedicue. Cue finoca rafuemona cue Moona iobitadicue; iadedi iese cuena omoi ñaiamona cuena iobitañedomoi. ⁵⁰ Omoimona iobil-lacinona feiñollena, cue rafuena finoñedicue; ia cue Moo iena oiacade. Cuena omoi ñnoñenia, cuemo iobillacinona omoi fecañenia, cue Moo omoina duere finoite; ⁵¹ ia bu cue llwana ua ñnoia, jaca ua fioidañeite.

⁵² Naie illaicomini dinena uai otimaci:

—Janaba illamediona jai uñoticai. Abraham micori jai fioidaite. Jusiñamuina lloraini micoriai jai jai fioidaitimaci; iadedi: “Bu cue llwana ñnoiadedi, fioidañeite” raitio. ⁵³ Cai usuma Abraham micori baifemo faiñedio. Jusiñamuina lloraini micoriai baifemo faiñedio. ¿Bumiediota?

⁵⁴ Jesús uai ote:

—Dama cue abina biriñedicue; ia cue Moo cuena marena ñaiamona, cuena iobitate. “Cai Moodi Jusiñamui” raicabitomoi; ⁵⁵ iadedi naimiena uñnoñedomoi. Naimiena uñoticue. “Naimiena uñnoñedicue” cue raia, omoi isoi taino lloticue. Naimiena uñoticue. Naimiena jai ñnoticue. ⁵⁶ Omoi usuma Abraham micori eniruemo cue ico billena jai uñote. Iena uñuamona, naimie iobide.

⁵⁷ Illaicomini dinena uai otimaci:

—Odi cincuenta años nia iñedio. ¿Niese Abraham micorina ciodio?

⁵⁸ Jesús uai ote:

—Abraham micori nia iñena facaiseconi jaca iticue.

⁵⁹ Iena cacajanona, naimie fairinollena, naie illaicomini noficina llinotimaci; iadedi Jesús reirillanona, Jusiñamui jofomona oni jaide.

9

Jesús uisñidimiena jillotaja rafue

¹ Jaiiruido ie llofueoicaiganodicai diga Jesús macaria, uisñidimiena ciodo. Iese nanomona jaca naimiedi jeiciga. ² Jesúmo jicanoticai:

—Llofueraima, ¿bue ñellena naimiedi iese jeiciga? ¿Nie isoide ra ie moo jetajamona, naimie iese jeiciga? ¿Nie isoide ra ie ei jetajamona, naimie iese jeiciga? Caimo llono.

³ Jesús uai ote:

—Naimie jeacino finua muidonañede. Ie moo muidonañede. Ie ei muidonañede. Jaca bue jetajamona, iese comuiñede. Jusiñamui uai siñonana comini uñollena, iese jeiciga. ⁴ Nia userena jira, cuena oretatimie ie jitailla rafuena finoacadica. Raire jitirenite. Ie mei bu jaca maijinite. ⁵ Eniruemo cue nia ia, comini comeciaina lligaiñoticue. —Iese Jesús llote; iadedi jaiie rafuena ñaite. Naimie nia fioidañenia, Jusiñamui rafuena llocana naimie

jaillana ñaite. Ie fiodaillirui jai iaire iacanana ñaite. Comeciaina lligaiñuana llote, jeacino oni jaillena.

⁶ Iena lluanona enirueña tuajano, enirue idiai finuanona, uisínidimie uisina naie enirue diga riginote. ⁷ Raite:

—Siloé railla joraibimo mai noisai —raite. Siloé oni dobaiñuamona: “Oretarabi”.

Ie jira naimie noisaide. Uisi jai ciodigo, abido bite. ⁸ Billa mei, naimie ecimo itino, jiai naimiena ciocabidino diga, naimie jilluana coniniri siadotimaci:

—¿Buuta naimiedi? Bene ucube jicallena raicabidimie isoide.

⁹ Jiaíno raitimaci:

—Jii, naimie.

Jiaíno raitimaci:

—Ieñede. Naimiena eruaide isoide.

Naimie dinena raite:

—Uisínidimiedicue; iadedi jai ciodicue.

¹⁰ Naimiemo jicanotimaci:

—¿Niese jai birui ciodio?

¹¹ Uai ote:

—Jesús raillamie enirue idiai finuano, cue uisina riginote. Cuemo llote: “Siloé railla joraibimo noisai”. Ie jira noisaidicue. Jai ciodicue.

¹² Jicanotimaci:

—¿Ninomo ite nai Jesús?

Naimie uai ote:

—Uiñoñedicue.

Comini uisínidimie jai jilluana siadua rafue

¹³ Navui uisínidimie jai jillua mei, fariseuai dine comini naimiena uitimaci. ¹⁴ Sábadoruimo Jesúsdi naimiena jillotaja jira, ¹⁵ fariseuai naimiemo jicanotimaci:

—¿Niesenamona jai ciodio?

Uai ote:

—Jesús raillamie enirue idiai finuano, cue uisina riginote. Ie mei Siloé railla joraibimo noidicue. Iemona jai ciodicue.

¹⁶ Fariseuaímona jiaíno raitimaci:

—Sábadoruimo bimiena Jesús jillotaja jira, caímona jai maijide isoide. Jesús maijia jira, Jusiñamuimona naimie biñede.

Jiaíno raitimaci:

—¿Niese jearede ra finuidimiedi uisínidimiena jillotate? —Ie jira daje isoi comeciaina facañedimaci.

¹⁷ Ie jira navui uisínidimie dane jicanotimaci:

—Naimie ona jillotaja jira, ¿niese odi Jesúsna raitio?

Uai ote:

—Naimiedi Jusiñamui uai lloraíma.

¹⁸ Naimie moo, naimie ei iaímaíamo nia jicanoñenia, judíuai illaícomini nai íima jaca cioíñenano ñinosiñede. Ie jira iaímaíaina uaiduanona, ¹⁹ jicanotimaci:

—¿Bimiedi omico jito? ¿Naimie jaca uisínino jeiciga?

²⁰ Uai otiaímaíai:

—Jii, bimie coco jito. Jaca uisínino jeiciga. Iena uiñoticoco. ²¹ Niese jai naimie uisina cuana uiñoñedicoco. Bu naimiena jilloitajana jiai uiñoñedicoco. Naimiemo jicano. Naimiedi jai eimiesa. Dama ie facaina jai ñaite —uai otiaímaíai.

²² Bie rafue nia suiñenia, judíuai illaícomini navui llotimaci: “Jesúsdi caí jilloitaraíma bu lloia, caí ofracomo naimiena fo billana rairuiticai”. Iena

jaciruillanona, ²³ llotiaimaia: “Naimie jai eimesa. Naimiemo jicano”. ²⁴ Ie jira illacomini dane naimiena uaiduano, llotimaci:

—Jusiñamui iobillacinona feca. Jesúmo fecaño. Naimie jearede rafuena finouidimiena uiñoticaí.

²⁵ Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidi cioirainidicue. Birui jai ciodicue. Iena uiñoticue.

²⁶ Jicanotimaci:

—¿Niesede ra diga finuamona odi uisina ciodio? ¿Niese ona jillotate?

²⁷ Uai ote:

—Omoimo jai lloticue; iadedi cacaiacaiñedomoi. ¿Bue ñellena omoimo dane lloiticue? ¿Ie llofueganona jaiacadomoi?

²⁸ Riire uai otimaci:

—Naimie ie llofuegamiedio. Caidi Moisés micori ie llofueganodicai.

²⁹ Jusiñamui Moisés micorimo jaie llwana uiñoticaí; iadedi bimiena uiñoñedicai. Naimie ninena billana jai uiñoñedicai.

³⁰ Nai ima uai ote:

—Jai, naimie ninena billana uiñoñedomoi; iadedi cuena jillotate.

³¹ Jusiñamuidi jearede rafuena finodino ñaia uaina cacareñede. Naie isodino siño rafuena finoñenana uiñoticaí; iadedi Jusiñamuidi naimiena sedadimie ñaia uaina cacade. Ie jitailla rafuena finodimie ñaia uaina cacade. Naie isodino siño rafuena finuana uiñoticaí. ³² Enirue finua facaisemona jaca buna uisino jeicigamiena jilloitañede. ³³ Jesús Jusiñamuimona biñedimiedena, jaca buena finonide.

³⁴ Uai otimaci:

—Jamai cai naira imiedio. ¿Niese caina llofueitio?

Ie jira naimaci ofiracomona naimiena jino dotadimaci.

Jesús uisnidimie diga ñaia rafue

³⁵ Uisnidimiena jino dotajana fidianona, Jesús naimiena jenode. Baillano, jicanote:

—¿Omoi comina jilloitaraimana inotio?

³⁶ Uai ote:

—¿Bumai naimie? Cuemo llono, naimiena cue inollesa.

³⁷ Jesús uai ote:

—Naimiena ciodio. O diga ñaite. Cue.

³⁸ Caiñici ifodo rainadajanona, iobillacinona fecallena, uai ote:

—Nama, jai o uaina inoticue.

³⁹ Jesús uai ote:

—Uisnidino cioitallena, eniruemo biticue. Jai uisina ciodino uisina cioitañellena biticue. —Iese Jesús raite; ia naimaci comeciaina ñaite. Jesús “Jai marañedicai” raitinona jillotajabite. Jesús “Jai maredicai” raitinomo ite jeacino naimaci uiñollena bite.

⁴⁰ Naimie ecimo ite fariseuai iena cacajano, jicanotimaci:

—¿Uisnidomoi caina raitio?

⁴¹ Jesús uai ote:

—Uisnidino isoi itomoina, omoimo ite jeacino omoi muidonañede; ia “Jai ciodicai” omoi railla jira, omoimo ite jeacino omoi muidona.

Iese raite; ia naimaci comeciaina ñaite. Jeacino naimacimo illana naimaci uiñoiacañena jira, iese ñaite. Naimaci jeacino oni dotajana jitañedimaci.

1-2 Jesús dane llofujete:

—Cue rafuena omoi raise uifollena, toica llaudaiaina ñaiticue. Llaudaiaia jino uicabilla isoi, llaigafomo nasedo fo jaidimiedi naie llaudaiaia sedaraima; ia jinofebei dinena bitimiedi firiraima. ³ Llaigafo llaudaiaia sedaraima fo jaillena, nase sedaraimadi nase econote. Llaudaiaia naimie uaina uifotimaci. Imaci mameciaido uaiduamona, llaigafomona jino bitimaci. ⁴ Nana ie llaudaiaia jino bia, naimacina ifode. Naimie uaina uifuanona, naimiena racadimaci. ⁵ Naimaci uifonnegamiena racañedimaci; iadedi naimie uaina naimaci uifonena jira, naimiemona oni aisidimaci.

⁶ Bie isoidicinona Jesús llofujete; iadedi naie comini iena cacañedimaci. ⁷ Ie jira Jesús dane llofujete:

—Llaigafo ie nase isoidicue. ⁸ Damierie firirainina bitimaci. Ie jira llaudaiaia naimaci uaina cacañedimaci. —Iese Jesús llofujete; ia naimiena inotinona ñaite. Naimiena abi caitadinona ñaite. Naimie inotino naimiena abi caitadino llogacinomo cacareñena ñaite. ⁹ Nia llofujete:

—Llaigafo isoidicue. Bu cue nasedo fo bia, jilloite. Llaudaiaia isoi fo biite. Jino jaite. Mare guille baite isoite. —Iese llofujete; ia naimiena inotino marena illana ñaite. Naimiemona naimaci jitailla rafuena uana ñaite. ¹⁰ Nia llofujete:

—Llaudaiaia fillena, meinellena, faifillena, firiraima bite; iadedi cominina jaca raise itatallena, biticue. ¹¹ Llaudaiaia marena sedaraimadicue. Mare sedaraimadi ie toiniaia facaina riiduanona ie abina faifite. ¹² Janallari bia, llaudaiaia naimie ieñena jira, jamai maijidimiedi, llaudaiaia faionocaillano, ecimona aiside. Llaudaiaia janallari gaitaacanamona, llaudaiaia tuudimaci. ¹³ Jamai ucube oiacanano, isiruiñenano, jamai maijidimie aiside. ¹⁴ Iese inedicue. Mare sedaraimadicue. Cue llaudaiaia uifoticue. ¹⁵ Cue Moo diga conimana coco uifua isoi, naimaci cuena jiaia uifotimaci. Cue llaudaiaia facaina fiodaiticue. —Iese Jesús llofujete; ia naimiena inotinona ñaite. Jamai maijidimie isoi naimacina sedañede. Naimacina raise riidote. Naimaci facaina jiaia fiodaiacade. ¹⁶ Nia llofujete:

—Jiaie llaigafomo jiaie llaudaiaia cuemo ite. Naimacina jiaia atiacadicue. Cue uaina cacaitimaci. Ie mei danomo nana cue llaudaiaia iitimaci. Naimacina dama sedaiticue. —Iese Jesús llofujete; ia jiaie nairaiaimo naimiena inoitinona ñaite. Dajena naimacina sedajana ñaite.

Jesús fiodaille rafue

¹⁷ Jesús nia llofujete:

—Cue jai fiodaiacanamonona, cue Moo cuena isiruite. Fiodaillamonona dane jilloiticue. ¹⁸ Cue jitañenia, jaca buna cuena meineñeite. Cue jitailla jira, fiodaiticue. Siño uai cuemo illa jira, cue jitailliruimo fiodaiticue. Cuemo cue Moo siño uaidi jai illa jira, dane jilloiticue.

¹⁹ Jesús iese llofuia jira, judíuai illaicominidi daje isoi comeciaina facañedimaci. ²⁰ Jiaiodi:

—Naimiemo Janaba illamie —raitimaci—. Uairico. Naimiena cacareiaicañedicai —raitimaci.

²¹ Jiaino raitimaci:

—Bie isoidicinona Janaba illamie llofueñede. Janaba illamie uisinidimiena jillotanide.

Jesús ie Moo diga daje isoi comeci lloilla rafue

²² Rollime facaise Jerusalémo Jesús ite. Naie facaiseconi Jusiñamui jofu ie finua comeci rafue ite. ²³ Salomón micori finotaga jofu abi ibirimo

Jesús macarite. ²⁴ Naie facaise judíuái illaicomini naimie dine bitimaci. Jícanotimaci:

—¿Niruido caimo ona lloitio? Odi cai Jilloitaraímania, caimo marefodo llono.

²⁵ Jesús uai ote:

—Omoimo jai lloticue; iadedi ñnoñedomoi. Cue Moo mamecido cue finoca rafuemonu cuena uiñotomoi. ²⁶ Cue toica llaudaíaimo omoi jainaiñena jira, cuena ñnoñedomoi. ²⁷ Cue toica llaudaíai cue uaina cacadimaci. Naimacina uiñoticue. Cuena racadimaci. ²⁸ Naimaci jaca itataticue. Jaca abina faíñeitimaci. Cue anamona jaca budi naimacina bairoñeite. ²⁹ Cue Moo naimacina cuemo fecade. Naimacidi jaino baifemo faitimaci. Naimiemona jaca budi naimacina bairoñeide. ³⁰ Cue Moo diga daje isoi comecina lloidicoco. —Iese llote; ia naimiena ñnotinona ñaite. Naie illaicomini naimiemo jainaiñena jira, naimiena ñnoñedimaci. Iena Jesús ñaite.

³¹ Jesús llofuiana cacajano, naie illaicomini noficina llinotimaci, naimiena meinellena. ³² Iena ciuanona, Jesús llote:

—Cue Moo uaido diga mare rafuena finodicue. ¿Nie isoide rafuena cue finua muidona, cuena meineiacadomoi?

³³ Uai otimaci:

—Mare rafuena o finua muidona, ona meineñeiticai. Jamai imadio. “Jusiñamuidicue” o railla jira, ona meineiticai. Jusiñamui Joreñona jiaí jeare ñaitio.

³⁴⁻³⁶ Jesús dinena uai ote:

—Jaie cuezafuina jamainidicai. Nainomo Jusiñamuidi naimie uaina cacadinomo jaie llote: “Omoídi jusiñamuilladomoi”. Jusiñamui ie uaina cacadinomo jaie iese lloide, ¿ñiese cuena jeare ñaitomoi? Jusiñamui cuena fetuano, cuena bene oretate. “Jusiñamui Jitodicue” cue railla jira, “Jusiñamui Joreñona jeare ñaitio” raitomoi. ³⁷ Cue Moo isoi cue finoñenia, cuena ñnoñeno; ³⁸ iadedi cuena omoi ñnoiacañenia, cue Moo isoi cue finoia, naie rafuena ñno. Iemei cue Moomo cue jainaiñallana uiñoitomoi. Cuemo cue Moo jainaiñallana jiaí uiñoitomoi.

³⁹ Iena cacajano, naimiena dane gaitaacadimaci; iadedi naimacimona jillode.

⁴⁰ Ie mei Jesús Jordán railla ille ruica díbeimo jaide. Nainomo Juan micorí cominina nano bautizade. Nainomo rillanona, nainomo Jesús fiebide.

⁴¹ Ailluena comini Jesús dine bitimaci. Coninina raitimaci:

—Juan micorí siño rafuena finoñede; iadedi nana Juan micorí Jesúsna llucacacodí uanaicino.

⁴² Nainomo ailluena cominidi Jesús naimaci Jilloitaraímana ñnotimaci.

11

Betaniamo Jesús abido jailla rafue

¹ Naie facaise Betaniamo Lázaro raillamiedi duide. Naimie miriñodi Marta, María íaiñuái. ² Naie Maríadi jiaíruido Jesús eillimo caimare soride rana totade. Ie mei naiñaiño ie ífotie diga naimie eillina safenaillena dote. ³ Naie íaiñuái Jesús dine uaina orediaíñuái, naimie billena. Naimie jibuisaíbillena llotatataíaiñuái:

—Nama, o isiruigamie duide —llotatataíaiñuái.

⁴ Jesús naie rafuena fidiano, llote:

—Jamai fodaillena naimie duiñede. Jusiñamui uaina siñonana comini uiñollena, naimie duide. Iemona comini dinena: “Ua Jusiñamui Jitodio” cuena raitimaci.

⁵ Jesúsdi Lázaron a isiruite. Ie miriño iaiñuaina jiai isiruite; ⁶ iadedi Lázaro duillana Jesús fidiano, naimie dine jaiñede. Naimie illanomo menarui nia fiebide. ⁷ Ie mei ie llofueoicaiganodicaimo llote:

—Judeamo abido dane mai cai jailli.

⁸ Uai oticai:

—Llofueraima, judíuai illaicomini birui noficina ona fairinoiacadimaci. ¿Niese naimaci dine dane jaitio?

⁹ Uai ote:

—Nagarui userede. Userenia bu macaria, raise ciua jira, eicaitañede; ¹⁰ iadedi bu naiona macaria, raise cioñena jira, eicaitaide. —Iese llofujete; ia naimie rafuedo jaillena ñaite. Raite:

—Cue rafue suicana jaite. Cue jitaille dinori nia llofueticue. Cue rafuedo omoi jaia, marena jaitomoi. Iedo omoi jaiñenia, duere sefuitomoi.

¹¹ Dane llote:

—Lázaro jai inide; iadedi naimiena casitallena, jaiticue.

¹² Uai oticai:

—Nama, naimie jamai inia, nia dama casite.

¹³ Naimie jafaici uanona iniamo comeciaina facadica; iadedi Jesús naiena lloñede. Lázaro fiodaillana ñaite. ¹⁴ Ie jira Jesús caimo marefodo llote:

—Naimie jai fiodaite. ¹⁵ Nainomo cue iñena jira, cue siño uai omoi inollena, omoi facaina iobidicue. Naimie dine mai cai jailli.

¹⁶ Caimona Tomás caimo llote:

—Maiña. Naimie diga fiodaisaiticai —llote. Tomás mameci jiaicidi Dídimio. Naimiedi gorasa.

Jesús Marta diga ñaia rafue

¹⁷ Betaniamo cai ria, Lázaro raiafomo jai nagaamagarui illana fididicai. ¹⁸ Jerusalémona Betaniamo tres kilómetros dinori illa jira, ¹⁹ diga judíuai illaicomini eedollena, Marta iaiñuai María dine bitimaci. ²⁰ Jesús billana Marta fidiano, cai dine naisomo bite; iadedi jofomo María fiebide. ²¹ Jesúsno Marta llote:

—Nama, o bene itiona, cue ñio fiodañede; ²² iadedi Jusiñamuimo buena o jicaia, naimie iena finoite. Iena uiñoticue.

²³ Jesús dinena uai ote:

—O ñio abido jilloite.

²⁴ Naiñaiño uai ote:

—Nana comini jilloilliruimo naimie jiai jilloite. Iena uiñoticue.

²⁵ Jesús uai ote:

—Fiodaillamona comini abiaina Jilloitaraímadicue. Jusiñamui diga jaca illena, cominina itataraímadicue. Bu cuena inuanona, fiodaíadedi, iemona íco jilloite. ²⁶ Cuen a inotimiena Jusiñamui illanomo jaca illena itataiticue. ¿Iena inotio?

²⁷ Naiñaiño uai ote:

—Jii, Nama; odi cai Jilloitaraímadio. Odi Jusiñamui Jitodio. Jusiñamui dinena o billamo jaie ocuiridicai.

²⁸ Iese raillanona, jofomo Marta abido jaide. Ie euiñona uaiduano, anado llote:

—Llofueraima jai ride. Ona uaidote.

²⁹ Iena cacajano, raire cai dine María bite. ³⁰ Marta diga ie ñaianomo Betania ecimo Jesús nia ite. ³¹ Jesús dine María nia jaiñenia, judíuai illaicomini María nia eedotimaci. María jino jaillana ciuano, racadimaci. “Raiafomo eellena naiñaiño jaide” raillanona comeciaina facadimaci. ³² María Jesús dine rillano, naimiena duenaillano, caiñici ifodo rainadacaida, llote:

—Nama, bene itiona, niadedi cue iiodi fioidañede.

Jesús Lázarona jillotaja rafue

³³ María eiana Jesús ciuano, naiñaiño diga bitino eiana ciuano, naimie comeci eo sunaite. Sunaillamona, jafaicina faite. ³⁴ Jicanote:

—¿Ninomo Lázarona raitomoi?

Uai otimaci:

—Nama, mai jibuisaibi.

³⁵ Lázarona duenaillanona, Jesús eede. ³⁶ Iena ciuanona, judíuai illaicomini dinena llotimaci:

—Ero. Naimiena eo isiruite.

³⁷ Jiaino raitimaci:

—Navui uisinidimiena jillotate. ¿Bue ñellena bimiena jilloitañede, naimie nia fioidañenia?

³⁸ Iena cacajanona, ie siño uai finuana naimaci nia raise inosiñena jira, Jesús comeci dane sunaite. Oni jaillanona, raiafomo ridicai. Nofici motomo ite naie raiafo. Ifodi jiaie noficina ibaica. ³⁹ Jesús llote:

—Nofici oni ñuita.

Marta dinena naimie uai ote:

—Nama, naimie abi jai sorirede. Nagaamagarui raiafomo jai ite.

⁴⁰ Jesús uai ote:

—Cuenta o inoia, Jusiñamui uai siñonana uiñoitio.

⁴¹ Iemona cominidi noficina oni ñuitadimaci. Jesús monamo eruaillano, llote:

—Moo, cue uaina o cacaja jira, iobidicue. ⁴² Jaca cuenta cacadio. Iena uiñoticue; iadedi cue diga bene itino illa muidona, iese ado lloticue. Cuenta o oretajana naimaci inollena, o diga ado ñaiticue.

⁴³ Ie mei eo ado llote:

—Lázaro, jino bi.

⁴⁴ Nai fioidaitimie nia naimie abi nana ferinua ra diga jino bite. Jesús cominimo llote:

—Naimie abi ferinua oni suiño. —Ie jira suiñodimaci.

⁴⁵ Ie muidona María diga bitinomona ailluena comini Jesúsna inotimaci. Naimie finoca rafuena ciuanona, inotimaci.

Jesúna meinellena, illaicomini comeciaina facaja rafue

(Mt 26.1-5; Mr 14.1-2; Lc 22.1-2)

⁴⁶ Jesúsna inoñedinomona damerie Jesús finoca rafuena fariseuai dine lluidimaci. ⁴⁷ Ie jira Jusiñamui diga nanoca ñairaini, fariseuai diga, danomo ofidimaci. Jesús rafuena siadotimaci:

—¿Niese naimiena nibaiticai? Diga siño rafuena ua finocabide.

⁴⁸ Naimiena niese cai nibañenia, nana comini naimiena inoitimaci. Nana comini naimie dibeimo jiaia, naimaci illaimana naimie jaillana jitaitimaci. Iemei romanos soldaduai biitimaci. Jusiñamui jofona judaiaibitimaci. Cai nairaiaina jiaifuidoitimaci. Iena jitaiñedicai.

⁴⁹ Naie facaise nanoca Jusiñamui diga ñairaimana Caifás illamona, naimacimo llote:

—Naimie rafuena raise uiñoñedomoi. ⁵⁰ Iese cai nairaimo suiñellena, damie cai nairai facaina fioidaitena, mare. Iena nibai nia raise uiñoñedomoi.

⁵¹ Ie comecina dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimiena buena llotatate:

—Jesúdi cai comini facaina fioidaite.

⁵² Cai comini facaina dama fioidañede; iadedi nana Jusiñamuina inoitinona facaina fioidaite. Diga nairaimo itimaci; iadedi naimiemo dajena nana

naimaci duillena, naimie fiodaite. ⁵³ Caifás lluana naimaci cacajamona, judíuai illaicomini comeciaina nia facadimaci, naimiena meinellena.

⁵⁴ Ie jira Jesús judíuai illaicomini illa motodo marefodo macariñede. Jofue iñena dofodo jaidicai. Efraín railla nairai dine ridicai. Nainomo diga irui iticai. ⁵⁵ Pascua railla rafue iaire iacana jira, ailluena comini Jerusalémo naimaci nairaiamona jaidimaci. Rafue nia taineñenia, naimacimo ite rafue oni jaillena, cai einamací llua isoi finodimaci. ⁵⁶⁻⁵⁷ Jusiñamui diga nanoca ñairainidi fariseuai diga navui ñaitimaci:

—Bu Jesúsna cioia, naimiena cai gaitallena, caimo llono.

Rafuemo bitino illamona, Jesúsna jenodimaci. Jusiñamui jofomo naimaci ia, coninimo jicanododimaci:

—¿Niese comeciaina facadomoi? ¿Jesús bene biite? Cai illaicomini llua jira, níbai jai biñeite. Illaicomini lluana fidiano, naimie biñeite.

12

Betaniamo Lázaro jofomo Jesús guilla rafue (Mt 26.6-13; Mr 14.3-9)

¹ Pascua railla rafue rilledi seis digarui fiebidemo, Jesús cai diga Betaniamo jaide. Betania Lázaro illano. Jesús Lázaronna fiodaillamona navui jillotate.

² Jesúri iobillano, Lázaro ie guille rafuena finode. Marta guille bai jonega. Jesús diga guitino motomo Lázaro ite. Jesús llofueoicaiganodicaidi jiai motomo guiticai. ³ Iemei Mariadi nardomona finoca caimare soride ra Jesús eillimo totade. Daje botella raifi totade. Safenaillena naiñaiño ifotie diga ie eillina dote. Nai caimare soride ra eo raifide. Daje botella ite. Iemona nana jofo jeraidi soride. ⁴ Caimona Judas Iscariote micorina mameciredimie ite. Jesúsna gaitataitimie. Llote:

⁵ —¿Bue ñellena bie soride radi fecañede, ucubena ollena? Fecacadena, trescientos digarui maijia ucube diese raifide. Ie mei nai ucube dueredinomo fecadena, mare —llote. ⁶ Dueredinona naimie duenaiñede; iadedi naimie cai ucubena sedade. Naimiedi firiraima. Naie ucubemona fiuilla jira, iese naimie llote.

⁷ Jesús uai ote:

—Dama ite. Bie soride ra naiñaiño jai eenoga cue fiodaillirui iena.

⁸ Dueredino omoi diga jaca iitimaci; iadedi omoi diga jaca iñeiticue.

Ailluena comini Lázaronna cúa rafue

⁹ Lázaro jofomo Jesús illana ailluena cai illaicomini fidiano, bitimaci. Navui fiodaillamona Lázaronna Jesús jillotaja jira, Jesúsna dama cioiacaiñedimaci; iadedi Lázaronna jiai cioiacadimaci. ¹⁰ Ie jira Jusiñamui diga nanoca ñairainidi Lázaronna jiai meinellemo comeciaina facadimaci. ¹¹ Lázaro muidona ailluena judíuai illaicomini naimaci illa dibeí fañonocaida, Jesúsna innotimaci.

Jerusalémo illaima isoi, Jesús marena jailla rafue (Mt 21.1-11; Mr 11.1-11; Lc 19.28-40)

¹² Pascua railla rafue illa jira, ailluena comini Jerusalémo itimaci. Egiptomona cai jaiagai jillobillana comecillena naie rafue ite. Jesús Lázaro diga guillarui ie areruido Jesús Jerusalémo billana naie comini fididimaci. Fiodaillamona Lázaronna Jesús navui jilloitajana diga comini ciodimaci. Iena llocana uitimaci. Ie jira ailluena comini Jesús dine jaidimaci. ¹³ Raforona uanona, naimiena feiñollena, naimie uicomo jaidimaci. Ado cuiriisite:

—¡Cai Jilloitaraima billa! ¡Jusiñamui mamecido bitimie eo mare! ¡Cai Illaima eo mare! —cuiiriisite.

¹⁴ Jesúsdi ailli baiga burrito emododo jaide. Jusiñamui facaina lloraima micorí jaie llua isoi jaide. Jaie llote: ¹⁵ “Jerusalén imaci, jacinaiñeno. O Illaima burrito emododo biite”. ¹⁶ Naie facaise bie rafuemo comeciaina facañedícaí; iadedi Jesús jillua mei, bie rafuena comecíticai. ¹⁷⁻¹⁸ Lázaroná Jesús jillotaja jira, ailluena comini Jesús díne jaidímaci. ¹⁹ Iena ciuano, fariseuái coniniri ñaitímaci:

—Jaca buena birui finoñedícaí. Ailluena comini Jesús díbeimo jai jaidímaci.

Judíuainédino Jesúsna cioiacana rafue

²⁰ Judíuainédino Jusiñamuina sedallena, pascua railla rafuemo jiaí bitímaci. ²¹ Naie facaise caí díne bitímaci. Felipedí Galilea ie Betsaida nairai imiēna jira, Felipe díne bitímaci. Felipemo llotímaci:

—Jesúna cioiacadícaí.

²² Felipe iena Andrémo llote. Ie mei Jesúsno lluidiaímaiaí. ²³ Jesús uai ote: —Monamona biticue; ia jai cue fiódaille facaise ride. Comini cue uaidi siñonana uñua facaise jai ride. ²⁴ Jiaie rafuedo iena lloíticue. Ido rilla mei, naie ido sícoñenia, buena iñede; iadedi sícuamona, ailluena llisilladí iite. Ie isoide. Cue fiódaiñenia, jaca bu jillobiñeite. Cue fiódaillemona ailluena comini jillobitímaci. ²⁵ Ie abimo ite rafuemo comeciina dama bu facaia, ja muidomo faifite; ia cuemo ite rafuemo comeciina bu facaia, monamo jaca iite. ²⁶ Cuena bu raise sedaacania, cue rafuedo naimie jaite. Cue llofuegamiena naimie jaillamona, cuemona fueoite. Iemona cue Moodí naimiēna caimare itataite. ²⁷ Cue comeci jai rucacuerite; iadedi, ¿ñiese raiticue? Raiñeiticue: “Moo, cue fiódaillemona cuena jillote”. Fiódaillena biticue. Ie jira raiticue: ²⁸ “Moo, cominina o uai siñonana uñota”.

Ieconí monamona Jusiñamui llote:

—Jai iena finodícue. Dane iena finoíticue.

²⁹ Jusiñamui ñaiana nainomo ite comini raise cacaiñenano, raitímaci:

—Mona gurude.

Jiaino raitímaci:

—Naimiemo Jusiñamui jaiēnicí llote.

³⁰ Jesús uai ote:

—Cue facaina naie llua cacaiñedomoi; iadedi omoi facaina iena cacadomoi. ³¹ Cuena uñoñedino duere sefuilla facaise ja tañeite. Taife anamo comini jai itímaci; ia Jusiñamui Taifena ja anafefitaite. ³² Cruzmo cue fiódaiā, naimacina jilloitallena, ailluena cominina cue díbeimo itataíticue. ³³ —Naimie fiódaillena naimaci uñollena, iese llote.

³⁴ Naie comini uai otímaci:

—Jusiñamui facaina lloraini micorí jaie cuega: “Caí Jilloitaraima jaca fiódaiñeite”. ¿Ñiese raitio: “Jusiñamuimona biticue; ia fiódaiticue”?

³⁵ Jesús dane uai ote:

—Cue llofuiā dínorí omoi comeciaina nia lligaiñotícue. Cue llua cacarei. Omoi díga cue nia ia, cue llofuiamo cacarei. Jitiredemo bu macaria, nai illana raise uñoñede. Ie isoide. Jeacino anamo itinodí jitiredinomo itímaci isoidímaci. Uanaicínona uñoñedímaci. ³⁶ Jeacino anamona omoi jilloillena, cue llofuiā uaido omoi comeciaina birui lligaiñotícue. Cue uaina ñno, cue cominina omoi jaillena.

Bie llua mei, Jesús oni jaillano, naimacimona reirite.

Comini Jesús uaina ñnoñena rafue

³⁷ Jesús díga siño rafuena finode; iadedi ailluena comini: “Naimiedi caí Jilloitaraima” raillana nia ñnosíñede. ³⁸ Iemona Isaías micorí jaie cuegafuiái suide. Naimie jaie cuega:

Jusiñamui, cai llucacina cacadimaci.

O siño uaido o finoca rafuena jiaí ciodimaci; iadedi inoñedimaci.

³⁹⁻⁴⁰ Isaías micori dane cueba:

Naimaci ciori raillano, Jusiñamui naimacina uisnidino isoi itatate.

Naimaci comeciama abina uiñoi raillano, naimaci comeciama feitate.

Naimiema inoi raillano, iese naimacina jai itatate.

Je jira jai inonidimaci. ⁴¹ Jusiñamui ie ebirede rafuena naimie cuama, Isaías micori iema llo. Isaías micori Jesúsna llo. ⁴² Isaías micori iese llo; iadedi ailluena judiua illaicomini Jesús uaina inotimaci. Fariseuama jaciruillanona, iema janotimaci. Naimaci ofiracomona naimacina jino dotajana jaciruitimaci. ⁴³ Comini naimacina iobitajana naimaci eo jitailla jira, dotajana jitañedimaci. Jusiñamuimo ite iobillacina raise oiacañedimaci.

Jesús ie Moona ñaia rafue

⁴⁴ Naie facaise Jesús eo ado llo:

—Cuenta inotimie cuenta oretatimema jiaí jai inote. ⁴⁵ Cuenta ciodimie cuenta oretatimema jiaí ciodo isode. ⁴⁶ Comini comeciama lligañollena biticue. Je muidona naga cuenta inotimie jitreñonomo jai inede. Jeacino anamo jai inede. ⁴⁷ Cua uaina cacajano inoñedimie juez isoi birui lloñedicue. Comina duere finollena, biñedicue; iadedi naimaci jeacinomona naimacina jilloitallena biticue; ⁴⁸ ia cuenta bu inoñema, cua uaina naimie inoñema, ja muidona fafite. Cua uaina naimie inoñellemona, nana naimema inoñedino janafelliruimo Jusiñamui naimema ico duere finoite. Cuenta jitañedimie, cua uaina jitañedimie comini janafelliruimo janafite. ⁴⁹ Dama cua comeci facaja uaido lloñedicue. Cua Moo cuenta oretaja muidona, cua Moo cuemo lloga uaido lloticue. ⁵⁰ Cua Moo lloga uaidi naimie debeimo comina jaca itatate. Iema uiñoticue. Je jira cua Moo cuemo lloga uaina jaca lloticue.

13

Jesúdi ie llofueoicaigano eilliaina jocua rafue

¹ Pascua railla rafue riacana areruido ia, Jesús ie Moo dine abido jaicanana uiñote. Naimaci diga naimie nia ia, ie comina jaca eo isiruite.

² Jesúsna gaitatallena, naie facaise Taifedi Judas Iscariote micori comeci feidote. Judas micori Simón jito. ³ Jesúdi ie uai ie Moomona feiñuana uiñote. Je Moo dinema billana uiñote. Je Moo dine abido jaillena jiaí uiñote. ⁴ Nairuido Jesús cai diga guite. Guilla meinoconi, Jesús a naidacida ie abimo ite iniroina duiñode. Abi dora diga ie moillina ferinote. ⁵ Janorede nogomo jinuina totaja mei, cai eilliaina jocode. Safenaillena, ie dora diga dote. ⁶ Simón Pedro dine naimie ria, Pedro jicante:

—Nama, ¿cua eillina jiaí jocoitio?

⁷ Jesús uai ote:

—Cua finoca rafuena birui uiñoñedio; iadedi jiairuuido uiñoitio.

⁸ Pedro uai ote:

—Cua eillina jaca jocoñeio.

Jesús uai ote:

—O eillina cua jocoñema, cua facama ineio.

⁹ Pedro uai ote:

—Nama, dama cua eillina jocoñeno. O facama raise cua illena, cua onolli, cua ifogi diga, jiaí joco.

¹⁰ Jesús uai ote:

—Nana o abina jocoñeticue. Da o eillina jocoiticue. Jai noidimie mena icaiño noiñede. Ie abi jai jeanide. Dama ie eillina nibai dane jocoacade. Omoi comeciai jiai jai jeanide; iadedi omoimona damie comeci nia jearede.

¹¹ Naimiena gaitataiacadimiena naimie uiñua jira, iese llote.

¹² Cai eilliana jocua mei, ie iniroi dane jitaja mei, dane ana rainadajanona, caimo jicanote:

—Omoimo ailli cue finoca rafuena nibai raise cacaiñedomoi. ¹³ Cuen a “Cai Nama” raicabitomoi. “Cai llofueraima” cuena jiai raicabitomoi. Iese cuena omoi raia, mare. Ie isoi iticue. ¹⁴ Omoi Namadicue. Omoi llofueraimadicue; iadedi omoi mullaima isoi iticuedena, omoi eilliana jai jocodicue. Omoi jamai bue isoidinomona, omoi eilliana danirie jocua. ¹⁵ Cuemona fueo. Abi iedoñoeno cue isoi omoi jai. Cue afemo iñedomoi. ¹⁶ Uanai omoimo lloticue. Mullaima ie nama afemo iñede. Oretagamie ie oretatimie afemo iñede. Ie isoide. Cue afemo iñedomoi; ia omoi eilliana jocodicue. “Jiaimie afemo itica” raillanomo comecina omoi facañeno. ¹⁷ Bicino omoi uiñuamona, iese omoi finoia, caimare iitomoi. ¹⁸ Nana omoina iese ñaiñedicue. Nana cue fetocanona uiñoticue. David micori jaie llote: “Cue diga gutinomona damie cuena enoidimie ite”. ¹⁹ Bie nia suiñenia, iena jai lloticue. Iena cuemo suilla mei, David micori llogacino raise iñoitomoi. ²⁰ Uanai lloticue. Cue oretagamiena bu feiñoia, cuena jiai feiñote. Bu cuena feiñoia, cuena oretatimiena jiai feiñote.

Jesúdi ie gaitataitimiena llua rafue

(Mt 26.20-25; Mr 14.17-21; Lc 22.21-23)

²¹ Jesús iese llua mei, ie comeci sunaite. Llote:

—Uanai lloticue. Omoimona damie cuena gaitataite.

²² Caimona ¿nimie naimiena gaitataite? raillanona, comecina facajano, coninimo eroridicai. ²³ Cuen a Jesús eo gaia jira, Jesús abimo iticue. ²⁴ Cuen a uaiduanona, Pedro cuemo llote:

—“¿Bu ona gaitataite?” Jesúmo jicano.

²⁵ Ie jira Jesúmo jicanoticue:

—Nama, ¿bu ona gaitataite?

²⁶ Jesús uai ote:

—Bie llomeniconona mutajanona, naimiemo fecaiticue —raite. Mutaja mei, Judas micorimo fecade. Naimie micoridi Simón Iscariote jito. ²⁷ Llomeniconona guilla meinoconi, Taife anamo Judas micori illamona, Taife naimie comecina feidote. Jesús naimiemo llote:

—O finoacaga rana raire fino.

²⁸ Jesús Judas micorimo llua raise uiñoñedicai. ²⁹ Judas micori ucubena sedaja jira, jiaino comecina facade: “ ‘Cai jitaille guille ibarisai’ Jesús naimiemo llote”. Iese lloñenia, “ ‘Janore ucube dueredinomo feca’ nibai naimiemo llote”. ³⁰ Guilla mei, Judas micori jino jaide. Naie facaise jai jitireficaide.

Jesús ie fiodablena ñaia rafue

³¹ Judas micori jailla mei, Jesús llote:

—Jusiñamumona billanona, imana jaidicue; ia cue fiodable facaise jai ride. Cue fiodablemona cominidi Jusiñamui uai siñonana uiñoitimaci. ³² Iemona Jusiñamui uai siñonana comini uiñoia, Jusiñamuidi cominina cue siño Jitona jiai uiñotaite. Iese ja finoite. ³³ Cue comini, dallu omoi diga bene iticue. Jaiticue. Cue diga iacanitomoi. Judíuai illaicominimo navui cue llua isoi, omoimo ja lloticue. Cue jaillinomo nia jaiñeitomoi. ³⁴ Ie jira jiaie rafuena omoimo ja

lloiticue. Omoina cue isiruilla isoi, coninina omoi isirui. ³⁵ Coninina omoi isiruillamona, jiaie cominidi cue cominidomoina uiñoitimaci.

Pedro Jesús diga ñaia rafue

(Mt 26.31-35; Mr 14.27-31; Lc 22.31-34)

³⁶ Naie facaise Pedro naimiemo jicanote:

—Nama, ¿nine jaitio?

Jesús uai ote:

—Cue jaillinomo cue diga ja jaiñeitio. Jiairuido jaitio.

³⁷ Pedro uai ote:

—Nama, ¿bue ñellena ja jaiñeticue? O jitaia, o facaina ja fiodaiticue.

³⁸ Jesús dinena uai ote:

—Cue facaina fiodaiacadio. Uanai omo lloticue. Nia monañenia, itava nia ñañenia, dacaiño amani cuena janoitiosa.

14

Jesús ie Moo dinomo rille rafue

¹ Jesús ie llofueoicaiganodicaina nia llofuate:

—Rucaicueriñeno uri i. Jusiñamuina ñnocana jai. Cuena jiai ñnocana jai.

² Cue Moo illanomo diga comini illanuai ite. Iese ñnedena, omoimo jai lloticue. Omoi illinuaina raise finollena, nainomo jaiticue. ³ Fuiduanona, dane abido biiticue. Omoina cue dine uillena, cue dine omoi illena, biiticue. ⁴ Cue jaillinona birui uiñotomoi. Nainomo omoi rillena jiai uiñotomoi.

⁵ Tomás uai ote:

—Nama, o jaillinona uiñoñedicaí. ¿Ñiese nainomo riiticaí?

⁶ Jesús uai ote:

—Omoi naiso isoidicue. Uanaicinona lloticue. Cue Moo dibeimo cominina jaca itataticue. Cue Moo dine joide naiso isoidicue. Jaca dasode cue Moomo duide naidi. Cue Moo dine o ria, cuena ñno. ⁷ Cuena uiñotomoina, cue Moona jiai uiñotomoi. Biruidemona naimiëna uiñoitomoi. Naimiëna jai ciodomoi.

⁸ Felipe uai ote:

—Nama, o Moona caimo acata. Iemo jai macaibaite.

⁹ Jesús uai ote:

—Felipe, are omoi diga iticue; iadedi cuena nia uiñoñedomoi. Cuena ciodime cue Moona jiai jai ciode isoide. ¿Ñiese llotio: “O Moona caimo acata”? Cue Moona jai ciodio isoidio. ¹⁰ Cue Moo diga daajedicoco. Iena nia ñnoñedio. Cue lluadi cue Moo uai. Cue lluadi cue comeci iuaiñede. Cue motodo naimie maijide. ¹¹ Cue Moo diga daajedicoco ñno. Cue uaina omoi ñnoñenia, siño rafuena cue finua jira, cuena ñno.

Jesús ie Moo Joreña llua rafue

¹² Jesús nia llofuate:

—Uanai lloticue. Cuena omoi ñnoia, cue finoca rafuena jiai finoitomoi. Cue Moo dine cue jailla jira, cue Moo Joreña omoi dine cue oretaja mei, cue finua baifemo finoitomoi. ¹³ Cue Moo uai siñonana omoi uiñollena, buena cue dibeido cue Moomo omoi jicaia, nana iena finoiticue. ¹⁴ Cue dibeido omoi jicaia, iena finoiticue. ¹⁵ Cuena omoi isiruia, cue llogacinuaina ñnoitomoi. ¹⁶ Ie Joreño omoimo fecallena cue Moomo juiticue. Naie Joreñodi omoina canoite. Omoi diga jaca iite. ¹⁷ Uanaicinona llocabite. Naimiëna naimaci uiñoñena jira, cuena ñnoñedino naimiëna feiñonidimaci; iadedi naimie omoi diga illa jira, naimiëna uiñotomoi. Omoi diga jaca iite. ¹⁸ Omoina fainonocaiñeiticue; ia dane biiticue. ¹⁹ Nano nigarui illanona, cuena ñnoñedino cuena nia cioitimaci. Ie mei cuena cioiñeitimaci; iadedi

fiodaillamona cue jillua mei, cuena nia cioitomoï. Cue jaca illa jira, jiaï jaca iitomoï. ²⁰ Fiodaillamona cue jillua mei, cue Moomo cue duillana raise uiñoitomoï. Cuemo omoï duillana jiaï raise uiñoitomoï. Omoïmo cue duillana jiaï raise uiñoitomoï. ²¹ Cue llogacínuaïna omoï isirua, cuena isiruitomoï. Ie jira cue Moodi omoïna jiaï isiruite. Omoïna jiaï isiruiticue. Omoïna cuena uiñotaiticue.

²² Iscariotena mamecifeñede Judas naimiemo jicanote:

—Nama, ¿bue ñellena danï caina ona uiñotaitio; iadedi jiaïe cominina ona uiñotañeitió?

²³ Jesús uai ote:

—Cuena isiruitinona cue rafuena uiñotadicue. Bu cuena isirua, cue llogacínuaïna ñnoite. Cue Moo naimiena isiruite. Iemona naimiena nabaiticoco. ²⁴ Bu cuena isiruiñenia, cue llogacínuaïna ñnoñede. Cue llogacínodi cuejeñede. Cue Moo ie. Naimie cuena oretate. ²⁵ Omoï diga nia cue illamona, bie llogacínuaï omoïmo jai lloticue. ²⁶ Cue Moodi omoïna canollena, naga rafuena omoïna llofuellena, cue facaina ie Joreñona omoïmo oretate. Omoïna nana omoïmo llogacínuaïna comecitaite. ²⁷ Cue Moo ñine jaiticue; iadedi omoï comeciaina uri itataiticue. Cuena ñnoñedino omoï comeciaina iese itatanidimaci. Jarire iñeno. Jaciruiñeno. ²⁸ Ailli cue llua cacadomoï: “Cue Moo ñine jaiticue; iadedi dane biiticue”. Cue Moo ñine cue jailla jira, cuena omoï isirua, cueri iobitomoï. Cue Moo cue afemo ite. ²⁹ Bie rafue cuemo nia suiñenia, uicodo omoïmo iena jai lloticue. Naie suia, cuena fañonocaiñeno omoï jaillena jitaïdicue. ³⁰ Omoï diga are nia ñaiñeiticue. Cuena ñnoñedino anamo itimie cuena jai duere finoacade. Taiñena ñaiticue. Naimie anamo iñedicue; ³¹ iadedi cue Moona cue isiruillana cuena ñnoñedino uiñollena, cue Moo cuemo llua isoi, finoiticue. Mai cai jailli.

15

Uvas railla riarã ie rafue

¹ Jesús nia llofuate:

—Cue ñibeimo marena omoï illena omoï raise uiñollena, jiaïe rafuedo iena llofueiticue. Uvas railla ua riaradicue. Cue Moodi uvas railla riarã sedarãima. ² Cue amena igailaïdomoï. Llisiñede igai cue Moo cugaica. Eo llisillena, naga lliside igaina janore muido jaigaica. Ie isoide. ³ Cue llogacínuaïdo jaillamona, jai jaigaica isoidomoï. Iemona omoï comeciã jai jeanide. ⁴ Cuena nabai. Ona jiaï nabaiticue. Naie amenamo jai ñuiñena jira, daje ñibegaise jaitaca igaidi jai llisiñede. Ie isoide. Cuena omoï nabaicabiñenia, llisiñede igai isoidomoï. Ie jira cuena nabai. ⁵ Uvas railla riaradicue. Cue amena igailaïdomoï. Cuemo omoï ñuiadedi, omoïmo cue ñuiadedi, eo lliside isoidomoï; iadedi cuemo omoï ñuiñenia, jaca llisiñede isoidomoï. Cuemo omoï ñuiñenia, cue jitailla isoi mare rafuena jaca ñinoñeitomoï. ⁶ Jai ñuide igailaï safenailla mei, maraiñena jira, jobaillena, danomo ofitacã. Cuemo ñuiñedimie jai ñuide igai isoide. Jusiañamuimona duere sefuite. ⁷ Cuena omoï nabaia, cue uaina omoï feitañenia, omoï jitailla rana jica. Ie mei feiñoitomoï. ⁸ Eo lliside omoï isoia, cue Moo iobide. Iese omoï ia, ua cue cominidomoï. —Iese Jesús llofuate; ia naimie ñibeimo naimaci raise illena ñaite. Mare rafuena naimaci ñinocana jaillena ñaite.

⁹ Nia llofuate:

—Cuena cue Moo isiruilla isoi, omoïna isiruiticue. Cuena nabaicabi. ¹⁰ Cue Moo llogacínuaïna cue ñnuamona, naimie isiruillacino anamo iticue. Cue Moo llogacínuaïna omoï ñnuamona, cue isiruillacino anamo itomoï. ¹¹ Cue isoi omoï comeciã eo caimarellena, bicínuaï omoïmo lloticue.

¹² Dane bie rafuena lloiticue. Omoína cue isiruilla isoi, coninina omoi isirui. ¹³ Naimaci o isiruillamona, o nabaiñiaí facaina o fiodaia, naimacina eo ua isiruitio. ¹⁴ Cue llogacinuaina omoi ñnoia, cuena nabaidomoi. ¹⁵ Omoína “Cue mullaiaidomoi” jaca raiñedicue; iadedi omoína “Cue nabaiñiaidomoi” birui raiticue. Mullaiaí imaci patrón finoca rafuena uiñoñedimaci. Ie jira nana cue Moomona cue cacaja rafuena omoimo jai lloticue. Ie jira nana cue rafuena jai uiñotomoi. ¹⁶ Cuena fetofñedomoi; iadedi omoína fetodicue. Omoi lliside isoicabillana omoimo jai lloticue. Ie mei buena cue mamecido cue Moomo omoi jicaia, omoimo fecaite. ¹⁷ Coninina omoi isiruillena jai lloticue.

Comini Jesúsna enoilla rafue

¹⁸ Jesús nia llofue:

—Cuena ñnoñedino omoína enoia, nano cuena jai enoidimaci. Iena uiñotomoi. Omoína nia enoiñenia, cuena jai enoidimaci. ¹⁹ Naimacimo jainaiaidomoina, omoína isiruitimaci; iadedi naimacimo omoi jainaiañena jira, omoína cue fetua jira, omoína enoidimaci. ²⁰ Omoimo jai lloticue. Illaíma duere sefuia, naimie anamo itino jiaí duere sefuidimaci. Ie isoide. Cuena comini duere finua isoi, omoína jiaí duere finoitimaci. Cue llofuiacinona naimaci ñnua isoi, omoi llofuiacino jiaí ñnoitimaci. ²¹ Cuena oretatimiena naimaci uiñoñena jira, cue muidona iese finoitimaci. ²² Naimacimo ite jeacinona naimacimo lloñedicuena, naimacimo ite jeacinona uiñoñedimaci. Cue rafuena naimaci cacajamona, naimacimo ite jeacinona jai uiñotimaci. Naimacimo jeacino nia ia, naimaci muidona. ²³ Cuena enoidimiedí cue Moona jiaí enoide. ²⁴ Eo siño rafuena naimaci motomo finodicue. Buna cue isoi jaca finoñede. Iena finoñedicuena, naimacimo ite jeacinona uiñoñedimaci. Cue siño finoca rafuena jai ciodimaci. Ie jira cuena enoidimaci. Cue Moona jiaí enoidimaci. ²⁵ Naimacina David micori jaie llote: “Naimacimo buena finoñedicue; ia cuena enoidimaci”. Naie ciegafuiaí jai suide.

²⁶ Cue Moo ie Joreño omoimo oretaite. Ie Joreño omoína canoite. Omoína uanaicinona uiñotaite. ²⁷ Cue nano lluaruimona cue diga omoi illa jira, cue facaisena jiaí raise lloitomoi.

16

Judíuaí illaicomini Jesús llofueoicaiganona duere finua rafue

¹ Jesús nia llofue:

—Danomo abido omoi jaiñellena, cue uaina omoi fañonocaiñellena, bicinuaí omoimo ja lloiticue. ² Omoi ofracomona illaicomini omoína dotaitimaci. Jiaíruido omoína meiniamona: “Jai Jusiñamuina marena sedadicaí”, comeciaina facaitimaci. ³ Cuena naimaci ñnoñena jira, cue Moona jiaí naimaci ñnoñena jira, iena finoitimaci. ⁴ Bie rafue omoimo sua, naie facaise cue lluana omoi comecillena, omoimo birui lloticue. Omoi diga cue illa jira, navui iena lloñedicue; iadedi omoimona birui oni jaiticue.

Jesús Jusiñamui Joreñoña llua rafue

⁵ Jesús nia llofue:

—Cuena oretatimie dine ja jaiticue; iadedi omoimona buna: “¿Ñine jaitio?” cuemo jaca nia jicanoñede. ⁶ Omoimo bie rafue cue llua jira, omoi comeciái eo sure ite. Ie jira cue jaillinona jicanoñedomoi. ⁷ Uanai lloticue. Cue jaia, mare. Cue jaiñenia, omoína canoraíma omoi dine biñeite. Cue jaia, omoi dine naimiena oretaiticue. Jusiñamui Joreñodi omoi canoraíma. ⁸ Naimie bia, cuena ñnoñedinona naimacimo ite jeacinona uiñotaite. Naimiedí Jusiñamui marena naimaci illana jitaillana uiñotaite.

Naimiedi Jusiñamui naimacina duere finollena jiai uiñotaite. ⁹ Cuen a naimaci ñinoñenia, naimacina naimacimo jeacino nia illana uiñotaite. ¹⁰ Cue Moo dine abido cue jaillinona, cuena cioiñeitimaci; ia iemona Jusiñamui Joreño cue uaina siñonana uiñotaite. ¹¹ Fiodaillemona jilloiticue. Iemona cuena ñinoñedino anamo itimiedi cue Moo janafefillacino anamo iite. Taifena ñaiticue. Cue finoca rafue muidona, cue Moo Joreñodi cominina, cue Moo Joreñodi cominina naie janafefillemona jilluana uiñotaite. ¹² Diga rafue omoimo nia lloiacadicue; iadedi jai rairairaidomoi. ¹³ Jusiñamui Joreño bia, omoimo nana uanaicinuaina llofueite. Dama ie facaina llofueñeite; iadedi ie cacajacinodo llofueite. Jiairuido suille rafuena llofueite. ¹⁴ Omoina cue rafuena uiñotaite. Ie jira cuena iobitaite. Nana cue Moomo ite uaidi cueje. ¹⁵ Ie jira bie rafuena lloticue. Jusiñamui Joreño omoina cue rafuena raise uiñotaite.

Sunaillamona caimare illa rafue

¹⁶ Jesús nia llofueite:

—Dallu illanona cuena cioiñeitomoi. Ie mei dallu illanona, cuena dane cioitomoi.

¹⁷ Ie llofueoicaiganodicaimon a damierie dani coninimo jicanodosite:

—¿Ñiese caimo llote: “Dallu illanona, cuena cioiñeitomoi. Ie mei dallu illanona, cuena dane cioitomoi. Cue Moo dine jaiticue”? ¹⁸ ¿Buena caimo llote? Raise cacaiñedicai.

¹⁹ Cai jicanuana Jesús uiñuanona, naimie jicanote:

—¿Cue llua raise uiñoiacadomoi? ²⁰ Cuemo suille rafue sua, eo eeditomoi; iadedi cuena ñinoñedino eo iobitimaci. Sunaitomoi; iadedi jiairuido caimare iitomoi. ²¹ Jiaie uaido iena lloticue. Riño jocoacania, naiñaiño jigico isirede. Jocua mei, naiñaiño urue jeiciamona, isirenadi feibicaide. Iemona jai iobide. ²² Ie isoide. Ja sunaitomoi; iadedi dane omoina cioiticue. Fiodaillamona cue jillua mei, dane cuena cioitomoi. Ie mei caimare iitomoi. Iemona omoina buna sure itatañeite. ²³ Nairuimo cuemo buena jicañeno; iadedi cue Moomo jica. Ie mei cue muidona naimie omoimo fecaite. ²⁴ Cue mamecido cue Moomo buena jaca nia jicañedomoi. Jica. Ie mei feiñoitomoi, omoi comeci eo caimare illena.

Jiairuido Jesús mrefodo llua rafue

²⁵ Jesús nia llofueite:

—Jiaie uaido bicinona omoimo jai lloticue. Jiairuido iese lloñeiticue. Omoina cue Moona mrefodo lloticue. ²⁶ Nairuimo cue Moomo omoi facaina jicañeiticue. Cue mamecido cue Moomo omoi jitaillacinona dani jicaitomoi. ²⁷ Omoina naimie isiruillamona, omoimo fecajite. Cuena omoi isiruilla jira, cue Moomona cue billana omoi ñnua jira, cue Moo omoina isiruite. ²⁸ Cue Moomona eniruemo biticue. Naimie dine abido jaiticue.

²⁹ Lloticai:

—Jai mrefodo caimo llotio. O uaina meidocana jai uiñedio. ³⁰ Nana rafuena o uiñuana uiñoticaí. Cai comeciaino iticinona o uiñuamona, caina raise uiñotio. Iemona Jusiñamuimona o billana jai ñnoticaí.

³¹ Jesús uai ote:

—Cuen a jai ñnotomoi. ³² Jiairuido, ua birui, oni tuitomoi. Nagamiiai jofomo omoi jailla mei, dama ifoconi fiebiticue; iadedi dama iñeiticue. Cue Moo cue diga iite. ³³ Cuen a omoi ñnuano, omoi uri illena, omoimo bie lloticue. Eniruemo omoi ia, jaca duere sefuitomoi; iadedi omoi comeciaina ocuiño. Omoina duere finodinona jai cue emodofilla jira, omoi comeciaina ocuiño. Naimaci baifemo faiticue.

17

Jesús ie Moo diga ñaia rafue

¹ Jesús bicinona llua mei, monamo eruaillano, j#de:

—Moo, cue fiodaiaacanarui jai ride. Cue uai siñonana uiñota. Iemei o uai siñonana jiai uiñotaiticue. ² Nana comini afemo cuena jai itatatio. Imana cue jaillamona, nana comini afemo cuena jai itatatio. Comini comeciai iuaina o meidotajamona, cue fiodaillamona, ailluena comini o diga jaca iitimaci. ³ Ona nanoca Jusiñamuina uiñoitimaci. Jai cuena o oretajana jiai uiñoitimaci. ⁴ Ailluena siño rafuena jai finodicue. Nana o cuemo lloga rafuena cue finuamona, bene ona jai iobitadicue. ⁵ Ore Moo, enirue nia iñena facaiseconi o diga iticue. Illaima isoi o ecimo dane ebire iacadicue. Dane cuemo ine, daje isoi coco illesa. ⁶ Comini comeciai iuaina o meidotajamona, naimacina jai llofuecabiticue. O anamo naimaci illamona, omo ite rafuena llofuecabiticue. Iemona o rafuena #nocana jaidimaci. ⁷ Nana cuemo ite rafue omona feiñoticue. Iena jai uiñotimaci. ⁸ Nana cuemo o llogacinuaina naimacimo jai lloticue. Jai #notimaci. Omona cue billana jiai jai #notimaci. Cuena o oretajana jiai #notimaci. ⁹ Naimaci facaina birui j#dicue. Naimacina cuena #notadio. Ie jira omo jai duidimaci. Ona #noñedino facaina birui j#ñedicue. ¹⁰ Nana o dibeimo itinodi cueje. Nana cue dibeimo itinodi oie. Nana naimaciri iobidicue. ¹¹ Bene eniruemo fiebitimaci. Eniruemona monamo jaiticue. O dine abido jaiticue. Ore Moo, jeacino naimaci finoi raillano, o anamo o uai diga naimacina seda. Coco comeci lloilla isoi, naimaci daje isoi comeciaina lloita. ¹² Naimaci diga nia cue ia, naimacina cue anamo sedadicue. Naimacina raise sedadicue, naimaci feirai raillano. Naimaci motomona dama Judas feiraite. Jusiñamui lloraima micori ciegafuia suillena, naimie ua faifite. ¹³ O dine ja jaiticue. Cue isoi naimaci comeciai eo caimare illena, naimacimo ailluena rafuena jai lloticue. ¹⁴ O llogacinuaina jai lloticue. Ona #noñedinomo naimaci jainaiñena jira, ona #noñedino naimacina enoidimaci. Ona #noñedinomo jiai jainaiñedicue. ¹⁵ Eniruemona birui o naimacina uana jicanoñedicue; iadedi Taifemona naimacina o sedajana birui jicanoticue. ¹⁶ Ona #noñedinomo jainaiñedimaci. Ona #noñedinomo jiai jainaiñedicue. ¹⁷ O llogacinuaido naimacina marena itata. O llogacinuaidi uanaicino. O jitaillacinona naimaci finollena, o uai naimaci comeciaino raise itata. ¹⁸ Bene cuena o oretaja isoi, ona #noñedino dine naimacina oretaticue. ¹⁹ Uanaicinona naimaci uiñuamona, naimaci comeciai marebicaillena, cuena #notino facaina fiodaiaacadicue. ²⁰ Bimacina birui dane j#ñedicue; iadedi bimaci cue rafuena ico lloia, jiaie comini cuena #noitimaci. Cuena ico #noitino facaina birui jiai j#dicue. ²¹ Daajedicoco. Coco illa isoi, naimaci comeciaina daje isoi lloillena, nana naimaci facaina j#dicue. Daje isoi comeciai lloillamona, cuena nia #noñedinodi #noitimaci. Iemona cuena o oretajana #noitimaci. ²² Cuemo o iga uaidi ebirede. Naimaci comeciai lloillena, naimacimo o uai jai cue iga. ²³ Naimaciri dajedica. O diga daajedicoco. Naimaci comeciai daje isoi lloillana jitaidicue. Iemona cuena #noñedino bene cuena o oretajana uiñoitimaci. Cuena o isiruilla isoi, naimacina o isiruillana jiai uiñoitimaci. ²⁴ Ore Moo, naimaci cue dine illena jitaidicue. Enirue nia iñenia, illaima isoi o ecimo ebire jaie iticue. Dane ie isoi ebire birui cue ia, naimaci cuena ciuana jitaidicue. ²⁵ Ore Moo, mareuidimedio. Jiaie comini ona uiñoñedimaci; iadedi ona uiñoticue. Cue llofueoicaiganodi o cuena oretajana jai uiñotimaci. ²⁶ Naimacimo ona jai lloticue. O cuena isiruilla isoi coninina naimaci isiruillena, naimacimo nia lloticue —j#de.

18

Jesúna gaitalle rafue

(Mt 26.47-58; Mr 14.43-54; Lc 22.47-54)

¹ Jíia mei, Jesús ie llofueoicaiganodicaí dígá, Cedrón railla iconi enefebeimo ruica aceituna railla riaraiái illanomo naiona jaide. ² Jesús cai dígá nainomo jaisoilla jira, Judas micorí naie illanona jiaí uiñote. Jesúna gaitatallena nainomo Judas jaide. ³ Soldaduai dígá policías dígá jaide. Naimacina ifode. Jusiñamui dígá nanoca ñairaini naimacina oredimaci. Fariseuai naimacina jiaí oredimaci. Soldaduai di lamparínaiiri bitimaci. Reinaíairi jiaí bitimaci. Sidaniáiri jiaí bitimaci. Judas naimacina ifode. ⁴ Jesús di nana naimiemo suille rafue uiñuanona, naimaci dine billano, jicanote:

—¿Buna jenodomoí?

⁵⁻⁶ Uai otimaci:

—Nazaret ie Jesús.

Jesús uai ote:

—Imiedicue.

Iena cacajano, jacinailamona, abido ñajillamona, eniruemo uaidimaci. Jesúna gaitatallena, Judas micorí naimaci dígá ite.

⁷ Jesús dane jicanote:

—¿Buna jenodomoí?

Uai otimaci:

—Nazaret ie Jesús.

⁸ Jesús uai ote:

—Omoímo jai lloticue: “Imiedicue”. Cuená omoí jenoia, cue dígá itino oni jaillena rairuiñeno.

⁹ Naimie ie Moomo como lloga uai suillena, iese llote. Iese ie Moomo como llote: “Cuená o ñnotaganomona jaca buna faifñedicue”. ¹⁰ Ie daacaiño Simón Pedro di ie lloebi llinocaida, Jusiñamui dígá nanoca ñairaima mullaíma jefona jaíbonote. Naie mullaíma mamecidi Malco. ¹¹ Iena ciuanona, Jesús Pedromo llote:

—O lloebina eeno. Cue Moo jitailla isoi, fiódaiticue.

¹² Ie mei soldaduai, imaci capitán dígá, judíuai imaci policías dígá, Jesúna gaitajano, naimiena maitimaci. ¹³ Anás dine nano uitimaci. Anás di Caifás jifai. Caifás di Jusiñamui dígá nanoca ñairaima. ¹⁴ Navui Caifás judíuai illaicominimo llote: “Damie nana cai comini facaina fiódaitena, mare”.

Pedro Jesúna nano janua rafue

(Mt 26.69, 70; Mr 14.66-68; Lc 22.55-57)

¹⁵ Simón Pedro Jesús jinafo racade. Jiaí racadicue. Cuená Jusiñamui dígá nanoca ñairaima uiñua jira, ie nairairirimo Jesús dígá jaidicue; ¹⁶ iadedi Pedro nasemo fiebicaide. Ie jira jino abido jaillano, Pedro fo atillena, nasena sedaraiñomo jicanoticue. ¹⁷ Naiñaiño Pedromo llote:

—Jesús llofueoicaigano imiedo.

Pedro uai ote:

—Ieñedicue.

¹⁸ Rosirena jira, naie jofo mullaíai, policías dígá, cooci dígá irai bonodimaci. Agaillena irai ecimo naidaidimaci. Agaillena Pedro naimaci motomo jiaí ite.

Jesús Anás dine illa rafue

(Mt 26.59-66; Mr 14.55-64; Lc 22.66-71)

¹⁹ Ie facaise Anás Jesúmo ie llofueoicaiganodicaína jicanote. Ie llofuiaínuaína jiaí jicanote. ²⁰ Jesús dinena uai ote:

—Nana cominimo marefodo lloticue. Omoi ofiracuaimo jaca llofuecabiticue. Jusiñamui jofomo jiaí jaca llofuecabiticue. Nainomo nana o comini oficabidomoi. Bainino buena jaca lloñedicue. ²¹ ¿Bue ñellena birui cuemo jicanotio? Cuenacadinomo iena jicano. Cue llofuiana uiñotimaci.

²² Iese Jesús llua jira, daje policia naimie uiecona butade. Jesúmo jicanote:

—¿Bue ñellena iese uai otio?

²³ Jesús dinena naie uai ote:

—Naimie uai jeare oticuena, cuemo llono. Jeare oñedicuemo, ¿bue ñellena cuena butadio?

²⁴ Jesús uai oñede. Iemei Anásdi Caifás jofomo Jesús maianona orede.

Pedro Jesúna dane janua rafue

(Mt 26.71-75; Mr 14.69-72; Lc 22.58-62)

²⁵ Ie facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

²⁶ Naie facaise daje mullaíma Pedromo llote:

—Aceitunas railla riaraiái illanomo ona ciodicue —llote. Jesúsna soldaduai gaitaja facaiseconi Pedro naie mullaíma ie come jefona ailli jaibonote, soldaduai Jesúsna gaitaja ie daacaiño. ²⁷ Pedro dane janote. Ieconi itava ñaite.

Jesús Pilato dine illa rafue

(Mt 27.1-2, 11-14; Mr 15.1-5; Lc 23.1-5)

²⁸ Ie mei Caifás jofomona gobernador jofomo Jesúsna jitraramo uitimaci. Naie facaise gobernadori Pilato. Naimiedi judíuaiñedimie. Naimaci einamací rairuilla jira, judíuaiñedimie jofomo naie facaise fo jaiñedimaci. Fo jaiadedi, pascua railla rafue guiledi guiñega. ²⁹ Ie jira Pilato jino bite. Naimacimo jicanote:

—¿Nie isoide rafue muidona llogidotomoi?

³⁰ Uai otimaci:

—Bimie marañede rafue finoñedena, o dine naimiena atiñedicaí.

³¹ Pilato llote:

—Naimiena uiño. Omoi einamací llogacínuaído naimiena duere fino.

Uai otimaci:

—Come meinellena caimona rairuidomoi. Naimie coraiana jitaídicaí —lloitimaci. ³² Navui Jesúsdi: “Cuenacruzmo coraitimaci” llote. Naie llucino jai suisaide.

³³ Pilato fo abido jaillano, Jesúsna uaiduano, naimiemo llote:

—Judíuai illaíma raillamiedio.

³⁴ Jesús dinena jicanote:

—¿O comecina dama iese facajano llotio? Iese comecina o facañenia, jiaimie omo lloga.

³⁵ Pilato uai ote:

—Judío imieñedicue. O rafue raise uiñoñedicue. Omoi comini cuemo ona fecadimaci. Jusiñamui diga nanoca ñairaini cuemo jiaí fecadimaci. ¿Nie isoide marañede rafuena finodio?

³⁶ Jesús uai ote:

—Eniruemo cominina sedañedicue. Judíuai illaicomini cuena gaitañellena, eniruemo cominina sedadicedena, cue comini cue facaina fuiridimaci.

³⁷ Pilato uai ote:

—Ie jira odi illaimadio.

Jesús uai ote:

—Jaca railla. Uanaicino lollena, jeicigacue. Nana uanaicinona jitaídino cue llwana cacadimaci.

³⁸ Pilatodi Jesús uaina uaitajamona, raite:

—¿Nie uai naidi uaina?

Ie mei dane jino billano, cominimo llote:

—Jaca nicino naimiemo iñede.

Jesúna coraiacana rafue

(Mt 27.15-31; Mr 15.6-20; Lc 23.13-25)

³⁹ Pilato nia llote:

—Naga año pascua railla rafue illa facaise, damie cárcelmona jino ollena, cuemo jicanuaibisoidomoi. Bie año omoi jitaia, omoi illaíma raillamiena marena oretaiticue.

⁴⁰ Comini dinena cuiriidimaci:

—Dama ite. Bimiena jitaíñedicaí. Barrabásna cárcelmona marena jino oreta. —Iese cuiriidimaci. Barrabásdi firiraima.

19

¹ Ie mei Pilato Jesúna oni uillanona, naimiena sechedotade. ² Jifanodosillena, soldaduai eecuaimona finoca nuiciraina naimie ifogimo jítadimaci. Jiduirede iniroina jítatajano raitimaci:

³ —Judíuai illaimadio. —Iemei ie uiecona bucoidimaci.

⁴ Pilato dane jino billano, raite:

—Naimie omoi dine jino ja biite. Naimiemo nicinodi iñede —raite.

⁵ Ie facaise Jesús jino bite. Eecuaimona finoca nuiciraina jítaca. Jiduirede iniroina jítaca. Pilato naimacimo llote:

—Jadí, naimie.

⁶ Jusiñamui diga nanoca ñairainidi, jaie illaicomini diga, naimiena ciuano, cuiriidimaci:

—Naimiena corai.

Pilato llote:

—Naimiemo nicinodi iñede; ia oni uillanona, naimiena omoi corai.

⁷ Uai otimaci:

—Moisés micori jaie cuega: “Bu Jusiñamuina jeare ñaianona, fiodailla”. “Jusiñamui Jitodicue” naimie railla jira, naimie fiodailla. Naimie Jusiñamui Jitona abina caitadimie. Caímona naimiedi marañede rafue jai finode.

⁸ “Naimiedi Jusiñamui Jito” comini raillana Pilato cacajano, eo jacinaite.

⁹ Jesúna dane fo uite. Jesúdi Jusiñamui Jitona naimie raise uiñollena, Jesúmo jicanote:

—¿Ninena bitio?

Jesús uai oñede. ¹⁰ Ie jira Pilato dane jicanote:

—¿Bue ñellena cue uaina oiacaíñedio? Uai cuemo ite, o marena oretallena. Uai cuemo ite, ona coraitallena.

¹¹ Jesús uai ote:

—O anamo Jusiñamui cuena itataja jira, o uai ite, cuemo lollena. Ie jira omo cuena fecadino o baifemo jeacino finodimaci.

¹² Ie facaimona Pilato Jesús marena jino oretaiacade; iadedi judíuai illaicomini dinena cuiriisite:

—Bimie o jino marena oretaia, cai nanoca illaíma ie nabaiñedio. “Illaimadicue” Jesús lluamona, cai nanoca illaíma díbeimo naimiedi iñede. Cai nanoca illaimadi César.

¹³ Comini llwana cacajano, Pilato Jesúna jino atide. Ie cominimo lloranomo raide. Naie illano nofinina mameciredede. Judíuai uaido Gabatana

mameciredede. ¹⁴ Pascua rafue guilla finorarui mo jitoma naidai illanona, Pilato dinena llote:

—Jadi, omoi illaïma.

¹⁵ Iemona cominidi cuiirisite:

—¡Naimie oni uillanona, naimiena meine! ¡Naimiena corai!

Pilato jicanote:

—¿Bue ñellena omoi illaïmana coraïitïcue?

Jusiñamui diga nanoca ñairaini uai otimaci:

—Cai illaïmadi César. Jiaïe illaïmadi caïmo iñede. Jaca dallaimade cai illaïmadi.

¹⁶ Ie mei Pilato naimacimo naimiena fecade, coraïllena.

Jesúna coraïacana rafue

(Mt 27.32-56; Mr 15.21-41; Lc 23.26-49)

Pilato llua jira, Jesúna uitimaci coraïllena. ¹⁷ Jesúdi ie cruzna rocaoicaida sonode. Hcoraina eruailla mameciredede illanomo jaidimaci. Judíuai uaido naie illano Gólgotana mameciredede. ¹⁸ Nainomo naimiena coraidimaci. Naimie abïmo menamie coraïca. Damie Jesús nabeïmo. Jiaïmie jarifebeïmo. ¹⁹ Cruzmo jonellena, Pilato rabicïmo cuetatate: “Nazaret ie Jesús. Judíuai Illaïma”. ²⁰ Judíuai uaido cuega. Romanos comini uaido jiaï cuega. Griego uaido jiaï cuega. Jesús coraïano Jerusalén ianori illa jira, ailluena comini iena cioidimaci.

²¹ Iena ciuamona, naie rabicïna meïdöllena, Jusiñamui diga nanoca ñairaini Pilatomo llotimaci:

—“Judíuai Illaïma” raïllano jai cuetatatio. Iena meïduana jitaïdicai. Bimie dinena raisoide: “Judíuai Illaïmadicue” raïllanona, o cuetatajana jitaïdicai

²² Pilato uai ote:

—Jai cuetataticue. Jiaïe rabicïmo dane cuetatañeïticue.

²³ Jesúna coraïa mei, soldaduai naimie inïroi uanona, naga soldado digamie jonega inïroi. Nagaamaga soldaduai ite. Ie camisa fiebide. Naie daje jamai nigaroi. ²⁴ Ie jira danï coniniri ñaitimaci:

—Bie camisa cuaranoñeïticai, danï cai fecallena. Mai. Conima jabomaiticai, iena ollena. —Iese finuano Jusiñamuina lloaïma micori cuegafuiai suide. Jiaie cuega: “Cue inïroi danï naimacimo fecaitimaci; iadedi cue camisa ollena, conima jabomaitimaci”. Iese finodimaci.

²⁵ Cruz abïmo Jesús ei, ie euiño diga ite. Cleofas aïdi ite. Naiñaiño mamecï María. María Magdalena jiaï ite. ²⁶ Jesús ie eina ciode. Cuenaiñaiño ecïmo jiaï ciode. Cuenaiñaiño ecïmo jiaï eïmo llote:

—Jadi, o jito isoi itimie anamo iitïo.

²⁷ Cueno llote:

—Jadi, o ei isoidiñaiño anamo iitïo.

Naie dacaiño naiñaiño cue jofomo uillanona, naiñaiño sedadïcue.

²⁸ Ie mei Jesús nana rafue jai fuïllana uiñuano, llote:

—Jiroacadïcue. —Iese lluanona, Jusiñamuina lloaïma micori jiaie cuegafuiai jai suide. ²⁹ Nainomo llerojïmo vino ite. Radosïmo fibecode rana joniano, vinomo faïte. Iemei Jesúmo fecade jaronollena. ³⁰ Iena jaronuano, Jesús llote:

—Cue maïjia jai fuite. Jai macaïbaite. —Ie ifogï ana jitaïdacïda, fiodaite.

Jesús sida diga ducia rafue

³¹ Pascua raïlla rafue guille finuarui illa jira, judíuai illaïcomini Pilato dine jaidimaci. Raïre fiodaïllena, coraïcano idaïaïna uellullena naimïemo jicanuaidimaci. Sábado rafue ie nairui nia illanona, sábadorui jai raïre taineacana jira, coraïcano cruzmo sábadoruïmo illana jitaïñedimaci.

³² Soldaduai jaillano, Jesús ecimo coraica iaiaiaia idaiaina uellude. ³³ Jesús dine billano, naimie jai fiodaillana ciodicu. Ie jira naimie idaiaina uelluñedicu; ³⁴ iadedi daje soldado Jesús craigiconi sida diga ducide. Naifo diaide. Naifomona jinui jiai bite. ³⁵ Nana iena ciodicue. Uanai lloticue. Omoi inollena, iena lloticue. ³⁶ Soldaduai iese finuamona, jaiie cuegafuia jai suide. Jaiie Jesúsna cuega: “Naimie illaicina tainoñeitimaci”. ³⁷ Jiai jaiie cuega: “Judíuai dinena naimaci ducitagamiemo ico eruaitimaci”.

Nofici ifomo Jesús raia rafue

(Mt 27.57-61; Mr 15.42-47; Lc 23.50-56)

³⁸ Naie facaise Pilato dine José raillamie jaide. Cruzmona Jesús abi oni ollena, Pilatomo jicanuaide. Josédi Arimatea nairai imie. Pilato fairiote. Ie jira José Jesús abi ana uanona, iena oni uite. Judíuai illaicominina naimie jaciruillanona, Jesúsna bainino inote. ³⁹ Nicodemo jiai bite. Siorede rana atide. Mirra áloe diga jai tamiano atide. Nibai treinta kilos atide. Naimiedi Jesús dine naiona navui bite. ⁴⁰ José, Nicodemo diga, Jesús abina useroina ferinotiaiaiaia. Naimaci comini finouilla isoi, naie siorede radi iniroimo jonega. ⁴¹ Amenaiaia iaie illanomo Jesúsdi coraica. Nainomo nofici ie raiafodi ite. Nia buna naifomo raiañafo. ⁴² Naifo iaie illa jira, sábadorui jai riacana jira, jaiie raiafo jenollena abi juanina jira, nainomo naimiena jonetiaiaiaia. Nofici diga raiafo raise ibailla mei, jofomo jaidiaiaiaia.

20

Fiodaillamona, Jesús jillua rafue

(Mt 28.1-10; Mr 16.1-8; Lc 24.1-12)

¹ Domingo jitiramo nia monañenia, raiafomo María Magdalena jaide. Raiafo ibailla nofici oni joillana ciode. Jesús abina cioñede. ² Ie jira aisicana Pedrona jenuaide. Cuenajai jenuaide. Baillano, llote:

—Cai illaicomini cai Nama abina raiafomona otimaci. Naimiena jonianona uiñoñedicue.

³ Ie mei raiafomo jaidicoco. ⁴ Aisicana jaidicoco; iadedi riire cue aisicana jailla jira, nano ridicue. ⁵ Ana bitadacaida, fo erodatucemo, useroi joillana ciodicue; iadedi fo jaiñedicue. ⁶ Ie mei Simón Pedro rillano, fo jaide. Useroi joillana jiai ciode. ⁷ Ie ifogimo ferinoga iniroi eneno illana ciode. Raise nacuana ciode. ⁸ Iemei jiai fo jaidicue. Iniroina cuamona, Jesús jai jilluana inoticue. ⁹ Jaiie cuegafuia llote: “Fiodaillamona jilloite”. Naie cuegafuiaia como raise inoticoco. ¹⁰ Ie mei jofomo jaidicoco.

María Magdalenamo Jesús bairia rafue

(Mr 16.9-11)

¹¹ Raiafomo abido billano, coco jailla mei, nainomo María fiebide. Eede. Ana bitadacaida, fo erodatemo, ¹² Jusiñamuimona mena jaienici jai billana ciode. Userede iniroi jitadiaiaiaia. Jesúsna navui jonianomo ana raidiaiaiaia. Damie ifogi dibeimo raide. Jiamie eilli dibeimo raide. ¹³ Naiñaiño jicanotiaiaiaia:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena jonianona jai uiñoñedicue.

¹⁴ Naie facaise jinafo dine erocailanona, Jesúsna ciode; iadedi naimiena uiñoñede. ¹⁵ Naiñaiño comequina facade; “Naimiedi bie illano sedaraima”. Jesús naiñaiño jicanote:

—¿Bue ñellena eedio? ¿Bu jenodio?

Naiñaiño uai ote:

—Jesúna o uia, naimie jonianona cuemo llono. Ie mei naimiena oni uiticue.

¹⁶ Jesús dinena uai ote:

—¡María!

Naimie dine naiñaiño como raise dobaicaide. Judíuai uaido llote:

—¡Raboni! —Naie uai oni dobañuamona: “Llofueraima”.

¹⁷ Jesús uai ote:

—Cuenta linoñoeno cuenta faicai. Cue Moo dine nia a jaiñedicue. Cue amataia dine mai jaillanona, cue rafuena lluai. Cue Moo dine jaiticue. Naimiedi cue Jusiñamui. Naimie jiai omoi Moo. Jiai omoi Jusiñamui.

¹⁸ Ie jira María Magdalena Jesús llofueoicaiganodicaimo lluaibite:

—Cai Namana jai ciodicue. —Iemei caimo naimie naiñaiño como lluaana llote.

Jesús ie llofueoicaiganomo bairia rafue

(Mt 28.16-20; Mr 16.14-18; Lc 24.36-49)

¹⁹ Domingo naio Jesús llofueoicaiganodicaí jofomo ofidicaí. Judíuai illaicominina cai jaciruillamona, nasiaí nana cai ibaica. Nase econoñoeno ieconi Jesús cai motomo billanona, caina uaiduano, llote:

—Uri omoi i.

²⁰ Ie onollina acatate. Ie ciraigina jiai acatate. Cai Namana jai cai ciuari eo iobidicaí. ²¹ Jesús dane llote:

—Uri omoi i. Cue Moo cuenta oretaja isoi cue rafuena lollena, omoína oretaiticue.

²² Ie facaise caina firaiñuanona, raite:

—Jusiñamui Joreñoona omoi feiñuana jitaidicue. ²³ “O jeacina jai dotade” bumo omoi lloia, Jusiñamui jai dotaca. “O jeacina nia dotañede” bumo omoi lloia, Jusiñamui nia dotañega.

²⁴ Naie naio Tomásna mameciredede llofueoicaigamie cai diga iñede. Dídimona jiai mameciredede. Naimiedi gorasa. ²⁵ Naimiemo lloticaí:

—Cai Namana ailli ciodicaí.

Tomás uai ote:

—Clavo ifona naimie onolli jeraimo cue cioñenia, naie ifona cue jetañenia, naimie ciraigi ifona cue jetañenia, ñinoñeiticue.

Jesús ie llofueoicaiganomo dane bairia rafue

²⁶ Ocho digarui illanona, Jesús llofueoicaiganodicaí dane ofillano, Tomás cai diga ite. Nana nasiaí ibaica; iadedi nase econoñoeno ieconi Jesús cai motomo dane fo billano, uaiduano, llote:

—Uri omoi i.

²⁷ Iemei Tomásno llote:

—Eroda cue onollimo. Naifo jeta. Ciraigi ifona jiai jeta. ñinoñoeno jaiñoeno. Mai ñno.

²⁸ Tomás uai ote:

—Cue Namadio. Cue Jusiñamuidio.

²⁹ Jesús dane uai ote:

—Cuenta o ciua jira, cuenta ñnotio; iadedi cuenta cioñedino cuenta ñnoia, jiai caimare iitimaci.

³⁰ Jesús diga siño rafuena finode. Iena ciodicaí. Nana naie rafuena bie rabenicomo cueñedicue; ³¹ iadedi dajerie cueticue. Jesúsdi cai Jilloitaraimana omoi ñnollena, iena cueticue. Naimiedi Jusiñamui Jitona omoi ñnollena, iena jiai cueticue. Naimiena omoi ñnuano, naimie diga jaca iitomoí.

21

Jesús ie llofueoicaiganomo ane bairia rafue

1 Diga irui illanona, Tiberiana mameciredede jorai fuemo Jesús ie llo-
fueoicaiganodicaimo dane bairede. 2 Nainomo diese iticaí: Simón Pedro,
Tomás, Natanael, cue ama Jacobo, cue, jiaie iaimaiaí. Tomás mameci jiaicidi
Dídimo. Natanael Galilea ie Caná nairai imie. 3 Simón Pedro caimo llote:

—Lloiji faiaitice.

Naimie uai oticaí:

—O diga jaiticaí. —Iese raillano, botemo jaidicaí. Namona naio lloijina
faiticaí; ia jaca buena oñedicaí. 4 Monaiacademo, Jesús jorai fuemo bite;
iadedi naimiena uiñoñedicaí. 5 Jesús caimo jicante:

—Caimaci, ¿nie diese lliciaina jai otomoi?

Uai oticaí:

—Jaca oñedicaí.

6 Naimie dane uai ote:

—Omoi bote nabei dine omoi lloijina faíno.

Ie jira faiticaí. Ailluena lliciaí naiemo jilla jira, a aiñonidicaí. 7 Iena
ciuamona, Pedromo llotice:

—Cai motomo cai Namadi ite.

Pedro iena cacajano, naimie taimiena jira, ie iniroi jítade. Jesús dine naimie
raire rillena, joraimo daiade; 8 iadedi botedo biticaí. Enirue iaire illa jira,
na lliciaimo sonocana, lloijina atidicaí. Nibaí cien metros oni ite. 9 Jorai
fuemo cai ria, cocimona bonoca iraina ciodicaí. Lliciaí iraimo ruica jai ite.
Llomenico jiaí ite. 10 Jesús caimo llote:

—Omoi oga lliciaimona janore ati.

11 Ie jira Simón Pedro botemo jaillano, lloijina llinuanona, eniruemo ari
sonode. Ciento cincuenta y tres jemerie jítaticaí. Ailluena ite; iadedi lloiji
cuarariñede. 12 Jesús llote:

—Mai guisaíbi. —Jesúna cai uiñua jira: “¿Budío?” jaca buna raiñena.

13 Jesúsdi llomenico diga lliciaina caina ecade. 14 Fiodaillamona jillua facaise-
mona dacaiño amani caimo Jesús jai abina bairetate.

Jesús Pedro diga ñaia rafue

15 Guilla mei, Jesús Simón Pedromo llote:

—Simón, odi Juan jítodío. —Jiaí jicante— ¿Cúena isiruitío?

Simón uai ote:

—Jii, Nama, ona cue isiruillana uiñotío.

Jesús uai ote:

—Toica llaudaiaí uruiaina omoi raise sedaja isoi, cúena inotinona raise
seda. Naimacina cue rafuena raise llofue.

16 Dane llote:

—Simón, odi Juan jítodío. —Dane jicante— ¿Cúena isiruitío?

Simón uai ote:

—Jii, Nama, ona cue isiruillana uiñotío.

Jesús dinena uai ote:

—Toica llaudaiaí uruiaina omoi raise sedaja isoi, cúena inotinona seda.

17 Dane jicante:

—Simón, ¿cúena isiruitío? —Jesús naimiemo dane jicanua jira, “Jesús cue
uaina inoñede” raillanona, Pedro comeci sunaite.

Uai ote:

—Nama, naga rafuena uiñotío. Ona cue isiruillana uiñotío.

Jesús uai ote:

—Toica llaudaiaí uruiaina omoi raise sedaja isoi, cúena inotinona seda.

18 Daje rafue omo nia lloitice. O nia conirue facai o iniroi dama jítadío. Ie
mei o jitaillanomo jaidío. O uaicíroma facaiseconi o onolli oni ñuitaitío. Ie mei

jiaimie o iniroi ona jitajano, o jitañenanomo ona uite. Cue lluaana #nocana o jai.

¹⁹ Fiodaillena Pedro uinollena, uicodo Jesús iese llote. Cristo llua isoi, Cristo rafue muidona, illaicomini Pedrona jiairuido meinetimaci. Naimie fiodaillanona, Jusiñamuina iobitade.

Jesús ie gaia llofueoicaigamie mo llua rafue

²⁰ Pedro diga Jesús nia ñaia facaise, Pedro dobaicaillanona, cuena ciode. Iaimaia jinafona racadicue. Jesús gaimiedicue. Navui cai guia, Jesús nia foidañenia, Jesús abimo cue ia, Jesús mo jicanoticue: “¿Bu gaitatallio?”

²¹ “Cuena #notinona seda” Pedromo Jesús llua mei, Pedro dobaicaillanona, cuena ciuano, Jesús mo jicanote:

—Nama, ¿niese naimie fiodaite?

²² Jesús uai ote:

—Naimie nia itemo, cue abido bia, dama iesede. Naimie rafuedi omo duiñede; ia cue lluaana #nocana o jai.

²³ Ie jira creyentia naie lluaana fidiano cuena raitimaci:

—Naimie foidañeite. —Iese raitimaci; iadedi Jesús iese raiñede. Jesús llote: “Naimie nia itemo, cue abido bia, dama iesede. Naimie rafuedi omo duiñede”.

²⁴ Nana rafuena ciuano lloticue. Iena cueticue. Uanaicinuaina cueticue.

²⁵ Jesús ailluena jiaie rafuena finode. Nana ie rafue cuedadena, enirue baiñede, naie libros eenollena. Mai. Juandicue.

JESUCRISTO ORETAGANODI NAIMIE RAFUE LLOCANA UILLA RAFUE

Jesús Jusiñamui Joreño billena llua rafue

¹ Teofilo, o dine, ¿nigacino? ¿Nie isoidio? Omo jiaie rabe birui dane oretaiacadie. Lucadie. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiai cueticue.

² Monamo naimiena Jusiñamui nia uiñenia, Jesús ie llofueoicaiganona llofueuide. Ie llofueoicaiganona jiaie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci.

³ Naimie fiodaillamona ie jillua mei, naimacimo bairede. Naimie ua jilluana naimaci raise uiñollena, diga icaiño cuarenta digarui naimacimo baireuide. Naimacina Jusiñamui dibeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suiñede rafuena llofueuide.

⁴ Naimaci diga Jesús guilla facaise, naimie Jerusalémona naimaci oni jailana rairuide. Raite:

—Cue Moo ie Joreño omoimo fecallena, omoimo jai llotie. Naiena omoi feiñollena, Jerusalémo nia fiebi. ⁵ Naimie rafuena comini inuamona, Juan Bautista micori jinui diga bautizade; iadedi cue rafuena omoi inuamona, nano nigarui illanona, cue Moo ie Joreña feiñoitomo —raite.

Monamo Jesús jailla rafue

⁶ Ie llofueoicaigano diga Jesús dane ofillanona, naimiemo jicanotimaci:

—Nama, ¿birui cai judiaui cominina jai sedaitio, David micori cai usumatiai micoriai jai sedaja isoi?

⁷ Naimie uai ote:

—Naie rafue suille facaiseconi jaca uiñoñeitomo. Naimie siñona illamona, dama cue Moo naie rafue suilliruina uiñote; ⁸ iadedi cue Moo ie Joreña omoi feiñua mei, siño uai omoimo iite. Ie jira Jerusalémo cuena lloitomo. Judeamo, Samariamo, ua nana enruemo ite nairaimo lloitomo —raite.

⁹ Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisiñede. ¹⁰ Monamo nia eruidemo, ieconi naimaci dine Jusiñamui jaienici, mena ima bairia isoi, bairediaimaiai. Naie iaimaiai iniroi userede. ¹¹ Raitiaimaiai:

—Galileo imaci, ¿bue ñellena monamo eruidomo? Omoi motomona Jesús monamo jaillana jai ciodomo. Naimie jai jailla isoi, dane abido ico biite —raitiaimaiai.

Matiana fetua rafue

¹² Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros dinori illanona, sábadoruimo Moisés micori lloga dinori macaritimaci. ¹³ Rillano imaci cuartomo jaidimaci. A dibeiamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiaie Jacobo jito. Dese nainomo itimaci. ¹⁴ Naimaci jitaillamona, Jusiñamuimo jillena, nagarui danomo ofidimaci. Jillena, jaino naimaci diga jiai ofisoidimaci. Diga riñoniai jiai ofisoidimaci. Jesús ei, María, jiai ofisoide. Jesús amatiai jiai ofisoidimaci.

¹⁵ Comini ofilla motomo Pedro naidaita, rafuena llote. Nibai ciento veinte comini nainomo itimaci. Pedro llote:

¹⁶—Amatiai, David micori jaie lloga rafue birui jai suide. Jusiñamui Joreño jaie David micorina Judas micorina ñaitatate. Salmos rabenicomo naie ñaiacínodi cuega. Iena uiñotícaí. Judas micorina uiñotícaí. Naimie Jesúsna gaitadinona ifode. ¹⁷ Naimiedi da cai llofueoicaigano imie. Cai diga maijiuide.

¹⁸ Ie marañeno finoca rafuemonu ucubena feiñua mei, ie comeci iuaina meiduanona, naie ucubena oni judaide. Judíuai illaicomini naie ucube diga enirueña ibadimaci. Nainomo Judas micori ie cimaio cuinajanona, ie abina dama meinete. Rifaillamona, ana uaillamona, ie jebegi boficaillamona, nana ie jebegi jino uaide. ¹⁹ Nana Jerusalémo itino iena fididimaci. Ie jira cai uaido naie enirue mameciredede Acéldama. Oni dobaiñuamona dirue toillanie. ²⁰ Ero, Salmos rabenicomo Judas micorina iese David micori jaie cuega:

Naimie illano taino iite.

Buna jaca iemo iñeite.

Naimie maijille jiaimie mo iite.

Iese cuega. ²¹⁻²² Ie jira cai diga itinomona damiena fetotícaí. Cai Nama Jesús cai diga illa facaiseconi, nagarui diga iñiaí cai diga jaisoidimaci. Juan Bautista micori Jesúsna bautizaja facaisemona, Jesús monamo camona jaillarui facaiseconi, naimaci cai diga jiaí itimaci. Naimacimona damiena fetotícaí, Jesús jilluana cai diga llollena. —Iese Pedro raite.

²³ Ie mei mena imana fetodimaci. Damiedi José Barsabas. Jiaici mameci Justo. Jiaimiedi Matías. ²⁴ Ie mei Jusiñamuimo jiidimaci:

—Nama, nana comini imaci comeciaina uiñotio. ¿Nie imana jitaideo? Caina uiñota. ²⁵ Naimiedi Judas ifo meidoite. Jesús ie oretagamiena naimie jaillamona, cai diga maijijite. Ie fiodaillamona Judas micori ie maijiana jai fañonocaide —jiidimaci. ²⁶ Ie jira conima jabomaside, uiñollena bu ille. Matíamo baite. Iemei jiaie once diga oretagano isoi naimie ite.

2

Cristo oretagano Jusiñamui Joreño feiñua rafue

¹ Pentecostés railla rafue irui ria, nana creyentiaí diese danomo itimaci. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. ² Danomo ia, ebena illacínomona monamona ríire aifi billa isoi buena cacadimaci. Nana jofomo itino naiena jiaí cacadimaci. ³ Iena naimacimo bairede. Iena cioidimaci. Irai boua isoi eruaide. Nana naimacimo baite. ⁴ Iese Jusiñamui Joreño feiñotimaci. Nana naimaci comeciaina namatade. Iemei diga nairai uaillaido ñaitimaci, Jusiñamui Joreño naimacina ñaitatajamona. Naimaci ñaia uaillaina uiñoñedimaci.

⁵ Naie facaiseconi Jerusalémo Jusiñamui rafuedo eo jaide judíuaidi itimaci. Diga nairaiamona bitimaci. ⁶ Creyentiaí ñaiana naimaci fidiano, ailluena comini jino tainomo ofidimaci. Nagamíaidi ie nairai uaina cacade. Ie jira jacinaitimaci. ⁷ Eo rajicaidimaci. Coninimo jicanotimaci:

—¿Buta ñaite? Nana Galileos imaci. ⁸ ¿Niese naimacina cacadicaí? Cai uaido dajerie ñaiana cacadicaí —raitimaci. ⁹ Diga comini imiaí itimaci: Partos, Medos, Elamitas, Mesopotamia imaci, Judea imaci, Capadocia imaci, Ponto imaci, Asia imaci, ¹⁰ Frigia imaci, Panfilia imaci, Egipto imaci, Libia imaci. Libia imaci enirue Cirenemo ruica eruaide. Romamona jamai macaritano jiaí itimaci. ¹¹ Judíuai itimaci. Judíuaiñedino jiaí itimaci. Judíuai isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadicaí —raitimaci.

¹² Nana eo rajicaidimaci. Danirie jicanododimaci:

—¿Bue ite?

¹³ Jiaie comini jifanoduano, raitimaci:

—Jifaidimaci. Ie jira iese ebena ñaitimaci.

¹⁴ Ie facaise ie once nabaiñia naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue llamo cacarei. Naie rafuena lloiticue. ¹⁵ Omoi comeciaina omoi facaja isoi, jifaiñedica. Jitoma nia furi daidemo, bu jaca jifairainina. ¹⁶ Joel micori bie rafuena jaie llote. Joel micori Jusiñamui rafuena lloraíma. Naimie jaie lloga rafue birui caimo jai suide.

¹⁷ Llote:

Jusiñamui caimo llote: “Jiairuido bie rafue suite.

Cue Joreña diga cominimo fecajiticue.

Iedo omoi uruia cue llana lloitimaci.

Iemona omoi coniruiaina nicairitaiticue.

Iemona omoi einamacina jiai nicairitaiticue.

¹⁸ Ua nana cuena sedadinomo cue Joreña fecajiticue.

Naimaci cue llana lloitimaci.

¹⁹ Monamo eo jacirede rafuena ico suiñotaiticue.

Eniruemo eo jacirede rafuena ico jiai suiñotaiticue.

Comini jobairillemona, eniruemo comini diruedi eo iite.

Naie facaise daje diese enirue boojite. Bouamona uillie eo iite.

²⁰ Jitoma lligaiñoñeite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

²¹ iadedi birui cuemo bu jicaia, ie jeacinomona naimiena jillotaiticue”
Jusiñamui llote.

Ie Joreño caimo birui illamona, Joel micori llogacino jai suide.

²² Caimaci, bie uaina omoi cacarei. Nazaret ie Jesúna ñaiticue. Jusiñamuidi omoi motomo naimiena siño rafuena jai finotate. Iena jai uiñotomoi.

²³ Jusiñamui comeci jaie facaja isoi, Jusiñamui jitailla isoi, Jusiñamui naimiena omoimo fecade. Jesúna coraitatomo. Jusiñamuina ñoñedinona naimiena meinetadomo; ²⁴ iadedi fiodaillamona naimiena Jusiñamui jillotajano, legi ie cacajamona naimie jillobide. Naimie fiodaite; iadedi fiodaillamona nainomo iñoñede. ²⁵ David micori naimiena jaie llote:

Jusiñamui cue diga jaca illana uiñoticue.

Cue ecimo naimie ite, cue comeci ocuiñotallena.

²⁶ Ie jira cue comeci caimare ite. Eo iobidicue.

Cue marena illemo jai jiai ocuridicue,

²⁷ raiafomo cue joreña naimie fañonocaiñena jira,

ie mare Jito abi rifaillana naimie jitañena jira.

²⁸ Naimie cuena jilloitallena uiñoticue.

Cue diga naimie illa jira, cue comeci caimare iite.

²⁹ Caimaci, cai usuma David micorina marefodo ñaiticue. David micori ñaia, dama naimie facaina ñañede. Jesúna ñaite. David micori jaie fiodaite. Raiafomo jonega. Naifo bene nia illamona, naimiedi Jesúna ñaiana uiñotica.

³⁰ Ie ia David micori Jusiñamui rafuena llote. Naimie micoridi Jusiñamui naimiemo uanaicinona llana uiñote. Jaie Jusiñamui naimiemo llote: “O uruiaimona damie illaimana illanona, ie cominina sedajite” llote. ³¹ Cristona ñaite. David micori nia suiñede rafuena llote. Naimie micori Cristo jilloillena llote: “Raiafo Jusiñamui fiodaillanomo Cristo Joreño fañonocaiñeite. Cristo abi rifañeite” llote. ³² Jesúna ñaite. Jusiñamui Jesúna jai jillotate. Nana cai iena ciodica. Ie jira iena llotica. ³³ Ie ecimo Jesúna jai dane itatajanona, Jusiñamui

naimiena iobitade. Ie Moo llua isoi, Jesús jai ie Moo Joreño caimo jai fecade, omoi birui ciua isoi, omoi birui cacaja isoi. ³⁴ Naimie abi monamo jaiñena jira, David micori dama naimie facaina ñaiñede; ia Cristona ñaite. Ero, jaie David micori raite:

Jusiñamui Cristomo llote: “Cue ecimo ana rai.

³⁵ Ona ñnoñedinona o anamo itataiticue” raite. David micori llua isoi, birui jai suide.

³⁶ Pedro nia ñaite:

—Jesúna coraidomoi; iadedi Jusiñamui naimiena cai Namana itatate. Naimiena cai Jilloitaraimana jai itatate. Nana judíuai comini naiena uifñuana jitaidicue.

³⁷ Pedro lluaana cacajano, naimaci comeciaino raire baite. Pedromo iena jicanotimaci. Ie nabaiñaimo jiai jicanotimaci:

—Caimaci, o lluaana jai cacadicaí. ¿Bue finoiticaí?

³⁸ Pedro uai ote:

—Omoi comeciái iuaina meido. Iemei Jusiñamui omoimo ite jeacinuaina dotajite. Jesucristo facaina omoi bautizallomoi. Jusiñamui Joreñoña jiai feiñoitomoi. ³⁹ Omoimo ie Joreño fecallena navui llote. Omoi uruiaimo jiai fecaite. Jiaie nairaiaí itinomo jiai fecaite. Ua nana Jusiñamui fetocanomo jiai fecaite.

⁴⁰ Diga uai naimacimo Pedro llote. Raite:

—Ailluena comini marañede rafuena birui finocana jaidimaci. Faifitimaci. Naimaci isoi jaiñeno; iadedi cue lluaana omoi cacajamona, iena ñno.

⁴¹ Diga comini ie lloga uaina feiñuano, bautizadimaci. Nairuido nibai tres mil comini creyentiaína jaidimaci. ⁴² Cristo oretagano llofuiana fueoidimaci. Cristo oretaganona eo nabaidimaci. Nagarui ofillanona, Jesús fiodaillana comeciuidimaci. Jusiñamuimo jñuidimaci.

Cristona ñnotino illa rafue

⁴³ Cristo oretaganodi diga siño rafuena finuamona, nana comini jacinaitimaci. ⁴⁴ Nana creyentiaí damacina itimaci. Naimaci raruiaí coninimo fecauidimaci. ⁴⁵ Dueredino ia, naimacina canollena, raruiaíredino naimaci raruiaína vendidimaci. Iemei naie ucube dueredinomo fecadimaci.

⁴⁶ Jusiñamuina sedallena, nagarui Jusiñamui jofomo ofisoidimaci. Danirre imaci jofuemo Jusiñamuina jiai sedauidimaci. Nainomo danomo guillanona, Jesús fiodaillana comeciuidimaci. Caimare imaci comeciái illamona, caidiñeno guisoidimaci. ⁴⁷ Jusiñamuimo iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaína jaidimaci.

3

Jusiñamui jofomo Pedro llucino

¹ Jusiñamui jofomo jia facaise Pedro iaímaiaí Juan diga jaide. Jitoma ana ia, comini jñuidimaci. ² Iaímaiaí jaillanomo jiaie comini tisitaitimiena atiana ciodiaímaiaí. Tisitaitimiena naimie jaca jeiciga. Naimiena nagarui atiano, Jusiñamui jofu ie ebiredena railla nase fuemo rainauidimaci. Nainomo naimiena rainauidimaci, fo jaidinomona ucube jica-jicallena. ³ Iaímaiaí fo jaiacania, ucube jicallena, ie onolli ñuitade. ⁴ Iaímaiaí naimiemo eruaillano, Pedro raite:

—Cocomo eruai.

⁵ Ie jira iaímaiaímo eruaide. Ra feiñoitena, ocianona sedade. ⁶ Pedro raite:

—Ucube cuemo iñede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaiticue.

⁷ Pedro naimie onollido llinuano, a naidanete. Ieconi naimie eillidi jillode. Ie taisicoñuai jiai jillode. ⁸ Daiacaillanona naidacaide. Macarillanona, iaïmaiaï diga fo jaide. Jusiñamuimo iobillacinona fecajano, daiacaillanona macarite. ⁹ Nana comini naimie macarillana cioidimaci. Naimie iobillacinona fecajana jiai cacadimaci. ¹⁰ Naimie nase fuemo ana raisoilla jira, naimiena uiñotimaci. Naimiemo jai suide rafuena eo rajjicaidimaci. ¹¹ Naimiedi Pedro iaïmaiaï Juan diga nia llinuano, naimaci dine Salomón micori finotaga jofa abi ibirimo comini aisidimaci. Rajjicaidimaci. ¹² Iena ciuano, Pedro naimacina raite:

—Caimaci, ¿bue ñellena biemo rajjicaidomoi? ¿Bue ñellena caimo iese eruaidomoi? “Daiamaiaï iaïmaiaï uaido naimiena jilloitate” raillanona como eruaidomoi. ¹³ Iena finoñedicoco; iadedi Jusiñamui iena finuano, ie Jito Jesúna iobitade. Cai usumatiaï micoriaï, Abraham, Isaac, Jacob, ua nana cai usumatiaï micoriaï bie Jusiñamuina sedadimaci; iadedi Jesúna birui fecadomoi, coraillena. Pilato naimiena jino marena oretaiacana jira, Pilato ecimo naimiena llogidotomoi. ¹⁴ Mareuidimiena jitaiñedomoi; iadedi come fatimiena cárcelmona jino billana jitaïdomoi. Barrabás raillamiena jitaïdomoi. ¹⁵ Jusiñamui dibeimo caïna itatatimiena meinetomoi. Naimie fiodaite; ia Jusiñamui naimiena jillotate. Iena ciodicoco. Ie jira iena lloticoco. ¹⁶ Tisitaitimie jilluana jai ciodomoi. Naimiena uiñotomoi. Jesúna naimie ñnua jira, Jesús naimiena maïritate. Naimiena raise jillotate. Iena jai ciodomoi.

¹⁷ Caimaci, ero, omoi finoca rafuena abina uiñoñoeno finodomoi. Omoi illaicomini jiai daje isoi finodimaci. ¹⁸ Jaie Jusiñamuidi ie facaina llorainina jiaïruido sulle rafuena llotatate. Naimacina Cristo llogi cacajana llotatate. Birui naie llogacino suide. ¹⁹ Omoi comeciïaï iuaillaï meido. Jusiñamui dibeimo omoi comeciïana meido. Iemei Jusiñamui omoi jeacinona dotaite. Iena jaca feitaite. ²⁰ Omoi uri illa facaise illena, Jusiñamui omoi diga illena, iena fino. Jusiñamui Jesucristona omoi dine dane oretallena, iena fino. Naimiedi omoi Jilloitaraïma. ²¹ Jusiñamui facaina lloraini micoriaï jaie lloga rafue sulle dinori monamo naimie fiebiite. Jaie Jusiñamuidi ie mare lloraini micoriaï uaido biena llote. ²² Moisés micori raite: “Omoi cominimona naimie rafue lloraimana jaïllena, cai Nama Jusiñamui cue isoi damiena fetoite. Nana naimie omoi mo lluaana cacarei. ²³ Bie lloraimana bu cacarefiñenia, Jusiñamui naimiena duere finoite. Iemona faïfite”. ²⁴ Nana Jusiñamui ie lloraini micoriaïdi birui sulle rafuena llotimaci. Samuel micori illa facaisemona naimaci biena llotimaci. ²⁵ Jusiñamuidi cai usumatiaï micoriaïmo rafuena llote; ia bie rafue birui omoi mo jiai duide. Jusiñamui Abraham micorimo jaie llote: “Nana cominidi o uruiaï muidona caïmare iitimaci”. ²⁶ Ie rafue suiñollena, Jusiñamui ie Jitona omoi dine navui orede. Omoi caïmare illena, nano omoi marañedicinona faïnonocaitallena, omoi dine naimiena nano jai oretate.

4

Cristo oretagamaiaï llaicomini motomo illa rafue

¹ Comini diga Pedro iaïmaiaï Juan diga ñaïa facaise, Jusiñamui diga ñairainidi naie iaïmaiaï dine bitimaci. Jusiñamui jofona sedaraini illaïma diga, saduceuai railla comini diga jiai bitimaci. ² Fiodaïllamona Jesús jai jilluana llofuetiaïmaiaï. Cominina iaïmaiaï llofua jira, naie iaïmaiaï diga iciritimaci. ³ Iaïmaiaïna gaitajanona, jai navuilla jira, cárcelmo jonetimaci, ie jitiramo naie rafuena siadollena. ⁴ Iese suide; ia Pedro llogacinona cacadinomona aïlluena comini naïena ñnotimaci. Cinco mil digamie creyentiaïna jai itimaci.

⁵ Icoiti Jerusalémo nana judíuai illaicomini siadollena ofidimaci. ⁶ Anás jiai bite. Naimiedi Jusiñamui diga nanoca ñairaima. Caifás bite. Juan bite. Alejandro jiai bite. Nana Jusiñamui diga nanoca ñairaima cominidi ofidimaci. ⁷ Naimaci motomo Pedro iaimaiai Juan diga atianona, iaimaiaimo jicanotimaci:

—¿Bu uai diga buena finodomico?

⁸ Jusiñamui Joreño nana Pedro comecimo namatajano, Pedro naimacimo llote:

—Illaicomini, bie rafuena omoimo lloiticue. ⁹ Tisitaitimie jilluana birui cocomo jicanotomoi. “¿Buemona naimie jillode?” raillanona cocomo jicanotomoi. ¹⁰ Jesucristo uai diga jillode. Omoi buena uiñuana, ua nana judíuai comini buena uiñuana jitaídícue. Jesucristodi Nazaret imie. Naimiena jai coraidomoi; ia Jusiñamui naimiena jai jillotate. Ie jira omoi uicomo Jesús muidona tsitaitimie jai benoconi naidallana ciodomoi. ¹¹ Omoi jofo finoraini isoidomoi. Omoi jitaiñede noficidi jiaie nofici baifemo jai jaide. Jesúsdi naie nofici isoide. Naimie rafuena omoi jitaiñena jira, naimiena meinetomoi. ¹² Cai jeacinomona jiaimie caina jillotanide. Nana enruemo ite cominimona jiaimie buna jaca jillotanide. Dama Jesús caina jillotarede —llote.

¹³ Jaciruiñeno marefodo llofuetiaimaiai. Nainomo itino iena cacajano, comecina facadimaci: “Abina uiñoñediamaiai. Jamai bue isoidiaimaiai”. Ie jira rajicaidimaci; iadedi Jesús llofueoicaigaiaimaiaina illana uiñotimaci.

¹⁴ Jilloitagamie iaimaiai diga naidallana ciodimaci. Ie jira naimaci uai iñede. ¹⁵ Naie rafuena siadollena, naie illaicomini iaimaiaina bai oredimaci. ¹⁶ Coninimo jicanotimaci:

—¿Niése naie iaimaiaina nibaiticai? Nana Jerusalémo itino iaimaiai siño rafuena finuana jai fididimaci. Iena janonidicai. ¹⁷ Jiaie comini iena fidii raillano, Jesús rafuena iaimaiai llofuiana rairuiticai.

¹⁸ Ie mei iaimaiaina naimaci dine dane uaidotimaci. Iaimaiaimo Jesús rafuena llofueñellena riire llotimaci. ¹⁹ Pedro iaimaiai Juan diga naimaci uai ote:

—Ie rafuena coco llollena Jusiñamui jitaide. Omoi uaina coco ñinoia, Jusiñamui jitailla rafuena finoñeiticoco. Cocomo llono. ¿Bu uaina ñnoiticoco? ¿Jusiñamui? ¿Omoi? Cocomo iese llono. ²⁰ Daimaiai coco ciua rafuena lloticoco. Daimaiai coco cacaja rafuena lloticoco —raite.

²¹ Iaimaiaina jacinaitajamona, iaimaiaina jino oretatimaci. Iaimaiaina duere finoñedimaci, nainomo ite comini icirinaiñellena. Jusiñamuimo nana nainomo itinodi iobillacinona fecadimaci, tsitaitimie jai jillua jira. ²² Jai jillodimie mo cuarenta años baifemo ite. Siño uaido naimie jillua jira, comini iobidimaci.

Naimacina Jusiñamui canollena, naimiemo jiacino

²³ Iaimaiai jino jailla mei, iaimaiai nabaiñiai dine jaidiaimaiai. Illaicomini iaimaiaimo llua llotiaimaiai. ²⁴ Naimaci iena cacajano, Jusiñamuimo damie llua isoi jidimaci:

—Ore Moo, mona finodio. Enruena finodio. Monaillaina finodio. Nana naiemo ite rana jiai finodio. ²⁵ Cai usuma David micorina raise uiñoticai. Naimiedi ona sedadimie. Naimiena bie rafuena o Joreño jaie llotatajama, naimie llote:

¿Bue ñellena Jusiñamui diga judíuaiñedino iciritimaci?

¿Bue ñellena Jusiñamuimo comini tainomo comeciaina facadimaci?

²⁶ Illaicomini ofidimaci, Jusiñamui diga fuirillena.

Jusiñamui facaisena iñedimaci.

Cristo facaisena jiai iñedimaci

llote. ²⁷ Naie rafue birui bene suide. Bie nairaïmo Herodedi, Poncio Pilato diga, judíuainédino diga, judíuai comini diga, ofide. O mare Jito Jesús facaisena iñedimaci. Naimacimo o oretagamie facaisena iñedimaci. ²⁸ Naimaci ofillamona, nana o jitaille rafuedi, o jaie lloga rafue diga, jai suide. ²⁹ Nama naimaci jaciruitajacinona jai uiñotio. Cai comeciaina ocuiñota, o rafuena jacitaiñeno cai lollesa. ³⁰ Duidinona jilloita. O mare Jito Jesús uaido caina siño rafuena finota —jüidimaci.

³¹ Jusiñamuimo jüiacino fuilla meinoconi, naimaci ofiracodi jaidisite. Jusiñamui Joreño nagamiiai comecimo namatade. Iemona Jusiñamui uai jacitaiñeno llocana jaidimaci.

Creyentiaï damacina illa rafue

³² Nana creyentiaï damacina itimaci. Naimacimo raruaia ia, dajena naimacimo duide. ³³ Naie facaise siño uaido naimie oretagano cai Nama Jesús jilluana llofueuidimaci. Iemona cominidi naimacina: “Mare” raitimaci. Nagarui Jusiñamui naimacina eo canode. ³⁴ Naimaci dine buna buena jaca jitaiñedimaci. Ucube ollena, enirueredino imaci eniruena fecadimaci. Ucube ollena, joforedino imaci jofona fecadimaci. Ucubene atianona, ³⁵ Cristo oretaganomo fecadimaci. Ie mei dueredinomo imaci jitailla isoi fecauidimaci. ³⁶ Naimaci motomo José mameciredimie ite. Cristo oretagano jitaca mamecidi Bernabé. Ie mameci oni dobaiñuamona firadotimie. Naimie nairaïdi levita. Naimiedi Chipre railla uiasi imie. ³⁷ Jerusalémo naimie fecalle eniruedi ite. Iena fecajamona, ucube atiano, Cristo oretaganomo fecade.

5

Ananías micori ie ai micori diga Jusiñamuina jifuia rafue

¹ Naie facaise Ananías ie ai diga iaïmaiaï eniruena jiaï fecade. Ie ai mamecidi Safira. ² Naie iba naimiemo dabeï fiebide. Ie ai iena uiñote. Atuedo atianona, Cristo oretaganomo fecade, “Nana ucube atidicue” raillanona. ³ Jusiñamui Joreño Pedrona naie rafuena uiñotajamona, Ananíamo Pedro jïcanote:

—¿Niese Taife o comecimo namatade? Jusiñamui Joreño taino llotio, dabeï ucube omo fiebilla jira. ⁴ Enirue nia fecañenia, nia oie. Fecaja mei, naie ucubedi nia oie. ¿Bue ñellena o comecina maraiñeno facadio? Cominimo taino llotio. Jusiñamuimo tainona jiaï llotio.

⁵ Ananías bie uaina cacajano ieconi fiodaillamona oni caide. Nana iena ciolino eo jacinaitimaci. ⁶ Iemei nainomo ite conirueniaï naimiena feridimaci. Jino uillano, raiafomo jonetimaci.

⁷ Naie rafue daje amani horas illanona, naimie ai ie inimo suide rafuena uiñoño bite. ⁸ Pedro naiñaiño jïcanote:

—¿Nie diese o fecaca o enirue? Cuemo llono.

Naiñaiño uai ote:

—Jüi, ie diese coco fecaca.

⁹ Pedro jïcanote:

—¿Bue ñellena Jusiñamui Joreño jïfuetomico? Ero, o ini raiafomo jonetino saisia jai nasemo cacade. Naimaci ona jiaï jino ja uitimaci.

¹⁰ Naimie ecimo ieconi naiñaiño fiodaillamona, oni caide. Conirueniaï fo billano, naiñaiño fiodaillana ciolimaci. Jino uillano, ie ini abimo dafomo jonetimaci. ¹¹ Iena fidiamona, nana creyentiaï eo jacinaitimaci. Nana bie rafuena fididinodi jiaï eo jacinaitimaci.

Cristo oretagano ailluena siño rafuena finodimaci

¹² Comini motomo Cristo oretaganodi ailluena siño rafuena finouidimaci. Naie facaise nana naimacidi Jusiñamui jofomo Salomón micori finotaga jofu abi ibirimo ofisoidimaci. ¹³ Jiaie cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

¹⁴ Jaciruitimaci; iadedi creyentiana ailluena comini jaidimaci. Ailluena iñia, ailluena riñonia, diese creyentiana jaidimaci. ¹⁵ Imaci büramo duidinona joncaida, naisomo atidimaci. Pedro nainomo macarillano, o lloca naimie joreño naimacimo ibaillanona, “Jillobitica” raillano, atidimaci. ¹⁶ Jerusalémo ie fuemo ite nairaiaimona comini biadedi, duidinona jiai atidimaci. Janaba anamo ite cominina jiai atidimaci. Nana jillodimaci. Ie isoi Cristo oretagano siño rafuena finouidimaci.

Cristo oretagano duere sefuilla rafue

¹⁷ Cristo oretagano finoca rafueri Jusiñamui diga nanoca ñairaima eo uradoide. Nana naimie dibeimo itino jiai eo uradoidimaci. Saduceuai railla cominimo duidimaci. ¹⁸ Eo uradoillanona, Cristo oretaganona gaitajano, cárcelmo jonetimaci. ¹⁹ Naiona Jusiñamui jaienicidi cárcel nasena econote. Cristo oretagano jino atiano, naimacina raite:

²⁰ —Jusiñamui jofomo mai abido jai. Cominimo Jusiñamui dine naimaci ille rafuena llono.

²¹ Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaima, ie comini diga billano, danomo ofillena illaicominina uaidote. Cárcelmo policiaiana oretate, Cristo oretaganona atillena. ²² Cárcelmo jaidemo, naimacina cioñedimaci. Abido billanona, llotimaci:

²³ —Cárcel ie nase jaca ibaicana ciodica. Raise llaveca. Nase fuemo jaca soldaduai itimaci; iadedi econoticaimo, jaca buna cioñedica.

²⁴ Jusiñamui jofu nanoca sedaraima, Jusiñamui diga ñairaini diga, bie lluna cacajano, uainicaidimaci. Comecina facadimaci: “¿Nie isoide rafue naimacimo jai suide?”

²⁵ Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

²⁶ Iena cacajano, Jusiñamui jofu nanoca sedaraima ie policías diga jibuisaide. Cristo oretaganona atide. Fecuisse atide, comini dinena policiaiana noficiado fairinoi raillano. ²⁷ Naimacina atiano, illaicomini motomo jonetimaci. Iemei Jusiñamui diga nanoca ñairaima naimacimo llote:

²⁸ —Omoimo Jesús rafuena llofuiana rairuidica; iadedi nana Jerusalén cominina jai llofuetomoi. Iese omoi llofuecabilia, “Cai illaicomini Jesúna meinetimaci” llotomoi.

²⁹ Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoi llua baifemo Jusiñamuina inoiacadica. ³⁰ Cai usumatiai micoriai Jusiñamuina sedauidimaci. Naie Jusiñamuidi Jesúna jai jillotate. Jesúna meinellena, cruzmo coraidomoi; ia Jesúna omoi meinia mei, ³¹ Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaraimana naimiena jiai jai itatate. Cai judíuai comini comeciai iuai meidollena, naimaci jeacinuai dotallena, iese naimiena itatate. ³² Bie rafuena llofuecabitica. Jusiñamui Joreño uaido iena jiai llofuetica. Jusiñamuina inotonomo Jusiñamuidi ie Joreño jai fecade —raite.

³³ Iena cacajano, illaicomini eo iciritimaci. Cristo oretaganona meinea-cadimaci; ³⁴ ia ieconi illaicomini motomo damie naidaide. Naimie mameci Gamaliel. Moisés micori llogacinona uiuicaide. Nana cominidi naimie uaina inotimaci. Cristo oretaganona dallu bai oni oretajanona, naimie llote:

³⁵ —Caimaci, omoi bie cominimo omoi finolle rafuemo comeciaina raise faca. ³⁶ Jaie Teudas micori illaimana jaiacade. “Jai uaina baitimiedicue” rail-lano, naimie dibeimo cuatrocientos iniai jaidimaci. Iemei naimie fiodaite. Naimie micori dibeimo itinodi oni tuusite. Jai naie rafuedi jaca ieconi duide. ³⁷ Naimie micori illa mei, comini mameciaina cuiana gobernador llua facaise, Galileo ie Judas micoridi jobairiacade. Jiaie comini naimie dibeimo illena fuemo faite. Naimie jiai fiodaite. Naimie micori dibeimo itino oni tuusite. ³⁸ Ie jira ja omoimo lloiticue: Bie cominina fainonocai. Jamai cominimona naimaci llogacino iade, jamai cominimona naimaci finuacino iade, ieconi duide. ³⁹ Jusiñamuimona bie rafue ia, jaca niese nibaifneitomo. Jusiñamuimona bie rafue ia, Jusiñamui diga omoi rafuedi iite.

Naimaci naimie llua feiñuano, ⁴⁰ Cristo oretagano fo atiano, naimacina fatimaci. Naimaci Jesús rafuena llofuiana eo rairuide. Ie mei jino imacina oredimaci; ⁴¹ iadedi illaicomini illanomona Cristo oretagano caimare jaidimaci. “Jesús dibeimo cai illa jira, caina duere finodimaci” raillano, caimare jaidimaci. Jusiñamui naie facaise naimacina ridoñena jira, jiai caimare itimaci. ⁴² Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai Jilloitaraima” llo-fueuidimaci.

6

Creyentiaina canollena, siete digamie diáconuaina illena, fetua rafue

¹ Naie facaise ailluena comini creyentiaina jaidimaci. Uradoillamona griego uaido ñaite comini dinena, judíuai uaido ñaite cominina jeare ñaitimaci. Grieguai feciñuai judíuai feciñuai isoi nagarui rana feiñoñena jira, jeare ñaitimaci. ² Ie jira naie doce oretaganodi creyentiai danomo ofillena, nana naimacina uaidotimaci. Naimacimo llotimaci:

—Jusiñamui uaina lollena, ra fecalle diga, abi juanide. Jusiñamui uaina llofuiana cai fainonocaiadedi, marañede. Ra jamai cai fecaiadedi, jiai marañede. ³ Ie jira, amatiai, omoimona siete digamiena fetu. Inoganona fetu. Jusiñamui Joreño nana comecimo namatadinona fetu. Eo abi uinotinona fetu. Ie isoide iniaina fetu. Bie ra fecarainina maijitimaci. ⁴ Ie mei cai abi juarenite, Jusiñamuimo cai jillena, Jusiñamui uaina cai llofuellena.

⁵ Nana cominidi:

—Jee —raitimaci. Esteban micorina fetodimaci. Naimie Jusiñamuina eo inote. Jusiñamui Joreño nana naimie comecimo namatade. Jiai fetodimaci: Felipe, Prócoro, Nicanor, Timón, Parmenas, Nicolás. Nicoládi Antioquía nairai imie. Judíuai comini isoi naimiedi Jusiñamuina inote. ⁶ Fetua mei, oretagano dine atidimaci. Jusiñamuimo oretagano jia mei, fetocanomo imaci onolli jonetimaci, Jusiñamui naimacina marena itatallena.

⁷ Naie facaise Jusiñamui uaidi cominido uinotacana jaide. Jerusalémo ailluena comini creyentiaina jaidimaci. Jusiñamui diga ñairainimona creyentiaina ailluena jiai jaisite.

Esteban micori ie rafue

⁸ Esteban micori fue eo mare. Jusiñamui Joreño naimiena namatajamonona, naimie uai eo siño. Comini motomo ailluena siño rafuena finouide. ⁹ Naie facaise daje judíuai comini ofiracomona damierie Esteban micori dine

bitimaci. Patrón anamona jillobidinomo naie ofiraco jainaiide. Naimaci diga damerie Cirene nairai imaci bitimaci. Damerie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci; ¹⁰ iadedi naimaci uaitalle uaidi inede. Naimacimo Esteban uai isoiduaidi inede. Jusiñamumona ie uaina ua jira, Esteban abina uinuano ñaite. ¹¹ Ie jira jiaie cominimo bainino ibajano, naimiena llogidotadimaci. Raitimaci:

—Esteban Moisés micori jinafomo jeare ñaiana cacadicaí. Naimiedi Jusiñamui jinafomo jeare ñaiana jiai cacadicaí.

¹² Iese llumona, comini comeciaina feidocana jaidimaci. Illacomini comeciaina feidocana jiai jaidimaci. Esteban dine billanona, naimiena gaitadimaci. Naie rafuena siadollena, naimaci ofiracomo naimie micorina uitimaci. ¹³ Tainona llogidotinona jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite. ¹⁴ Naimiedi Jesús bie jofona judaillena llote. Moisés micori caimo llogafuiai fainonocaillena jiai llote. Iena cacadicaí.

¹⁵ Iemo nana illacomini naimiemo eruaidimacimo, naimie uieco Jusiñamui jaienici isoi eruaide.

7

Esteban micori abi ríidua rafue

¹ Jusiñamui diga nanoca ñairaima Esteban micorimo jicanote:

—¿Ua ie isoi naimaci llucino ite?

² Naimie uai ote:

—Caimaci, cacarei. Cai jaiagamona cai fueollena, naimaci micoriaina lloiticue. Jusiñamui maremiena jira, naimiedi cai eirue jitomo jaie bairede. Cai eirue jitodi Abraham micori. Mesopotamiamona naimie micori nia ia, Harámo naimie micori nia jaiñenia, Jusiñamuidi naimie micorimo bairiano ³ llote: “O eniruemona mai jai. O cominimona mai jai. Omo cue acatalle eniruemo jaitio”. ⁴ Ie jira Caldea railla eniruemona naimie micori jaide. Harámo rillanona, diga iruillai nainomo ite. Naimie moo micori fiodailla mei, omoi birui illa eniruemo Jusiñamui naimie micorina oretate. ⁵ Nainomo rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajitícue” raite. “O uruiamo fecajitícue” jiai llote; iadedi naie facaise Abraham micori uruenide. ⁶ Jusiñamui jiai llote: “O urui jiaie comini eniruemo jianitímaci. Egiptomo jianitímaci. Naimacina duere finoitímaci. Cuatrocientos años legi cacajitímaci. ⁷ Naimacina maijitaite nairaina duere finoitícue. Ie mei o urui naie eniruemona biitímaci. Bie illanomo cuemo iobillacinona fecajitímaci” llote. ⁸ Ie cominina naimaci jaillena, Jusiñamui Abraham micorimo isaiaí diese abina diana llote. Ie facaise Abraham micori Isaac micorina comuitate. Ie jeiciamona ocho digarui illamona, Abraham micori naimie micorina dete. Isaac micori Jacob micorina comuitate. Jacob micori doce uruiaina comuitate. Naimaci micoriaimona cai doce diga nairai comuidimaci.

⁹ Caimaci, José micorina Jacob micori urui micoriaí uradoillamona, Egipto cominimo naimiena fecadimaci; ¹⁰ iadedi Jusiñamui naimiena eo sedade. Ie legi ie cacajamona naimiena jillotate. Naimiemo uñoracinona fecade. Ie jira Faraón micori naimiena jiai gaide. Faraón micoridi Egipto illaíma. Ie muidona Faraón Joséna fetode, nana Egiptomo itinona sedallena. Ie jofona jiai sedatate. ¹¹ Naie facaiseconi nana Egipto comini aime guitímaci. Canaámo Jacob micori illanona, nana nainomo itino diga aime jiai guite.

Eo duere sefuidimaci. Cai usumatiai micoriai naimaci illanomo guillena baiñedimaci. ¹² Egiptomo guille illana Jacob micori fidiano, guille ollena, nano facaise ie urui ai micorina nainomo oretate. ¹³ Ie mei José ie amatiaina naimiena uiñotade. Faraón di José comini illana fidide. ¹⁴ Ie jira José di ie moona uaidote. Nana ie cominina uaidote. Setenta y cinco digamie ite. ¹⁵ Ie jira Egiptomo Jacob micori jaide. Nainomo fiodaite. Ie urui ai micoriai nainomo jiai fiodaitimaci. ¹⁶ Siquem railla nairai illanomo naimaci comini naimaci micoriaina uillano, nofici ie raiafomo jonetimaci. Siquemmo Abraham micori naifona Emmor urui ai micoriaimona jaie ibade.

¹⁷ 'Caimaci, Jusiñamui Abraham micorimo lloga rafue suille iaiei illa facaiseconi, Egiptomo cai cominidi eo jebuidimaci. Abraham micorimo: "Egiptomona o urui ai biitimaci" Jusiñamui jaie llote. ¹⁸ Naie facaise jiaie illaima Egiptona sedade. José micorina uiñoñede. ¹⁹ Ie jira cai cominina jifuiano maijitaude. Uruai fiodaillena, naimacina imaci uruiaina fainonocaitate. ²⁰ Ie facaiseconi Moisés micori jeiciga. Jusiñamuimona naimie micori eo ebire eruaide. Ie moo jofomo daje amani fivui ite. ²¹ Ie mei naimiedi fainonocaiga. Faraón jisa micoridi naimie micorina uanona, naiñaiño jito isoi naimie micorina uiuicaide. ²² Naimie micori nana Egipto comini uiñuacinona fueote. Illaima uai isoi naimie uaidi ite. Eo abina uiñotimie.

²³ 'Caimaci, naimie micori cuarenta años illa facai, ie comini dine ie jaillemo ie comecina facade. Naimie cominidi cai judiui comini. ²⁴ Egipto imiemona damie llege cacajana ciuano, naimiena riidote. Riduanona, Moisés micoridi Egipto imiena meinete. ²⁵ Moisés micori comecina facade: "Cue muidona Egiptomona Jusiñamuidi cue cominina oretate". "Cue comini buena uiñotimaci" raillanona comecina facade; ie iadedi iena uiñoñedimaci. ²⁶ Ie arediruido Moisés micoridi mena come iaiaiaia fuirillana ciode. Iaiaiaia marena itataiacade. Raite: "¿Bue ñellena conimana duere finoacadomico? ¿Bue ñellena o come diga fuiridomico?" ²⁷ Duere finoacadimie naimiena oni ñuitade. Jicanote: "¿Bu odi cai illaimana jonegao? ¿Bu caimo ona llotatate juez isoi? ²⁸ ¿Na are Egipto imie o meinia isoi cuena jiai meineiacadio?" ²⁹ Iena cacajano, come fajana naimie llinua jira, jacinaillanona, Moisés micori aiside. Madián railla enruemo jamai ua illafuena ite. Dinomo ie aina ua mei, nainomo mena jitona comuitate.

³⁰ 'Caimaci, cuarenta años illa mei, jofue iñenanomo Moisés micori illanona, Jusiñamui jaienici naimie micorimo bairede. Sinaí railla anedu ianori ite. Amena boua isoi amenamo bairede. Naie boode amenadi fuiñede. ³¹ Iena ciuano, Moisés micori rajicaide. Naie iaieise naimie micori jibuisaidemo, naimiemo Jusiñamui llote: ³² "O usumatiai imaci Jusiñamuidicue. Abraham, Isaac, Jacob, imaci Jusiñamuidicue" llote. Jacinaillanona Moisés micori abi docaide. Jaciruillanona, erodañede. ³³ Jusiñamui naimiena raite: "Jamai bue o isoilla jira, o zapatona duiño. Benomo cue illa jira, o naidaillanodi eo mareno. ³⁴ Egiptomo cue comini llege cacajana raise ciodicue. Naimaci duere sefuillana uiñoticue. Ie jira omo bairedicue, naimacina Egiptomona jilloitallena. Mai jai. Egiptomo ona oretaiticue" llote; ³⁵ iadedi comini dinena Moisés micorina jaie jitaiñenamona, naimiena raitimaci: "¿Bu illaimana odi jonegao? ¿Bu o juezna jonegao?" Comini dinena naimiena jitaiñedimaci; iadedi Jusiñamui naimiena illaimana itatate. Naimiena Egiptomona cominina jilloitaraimana jiai itatate. ³⁶ Egiptomona Moisés naimacina atide. Egiptomonia ia, diga siño rafuena finode. Jiairede monaillai fuemo naimaci rillanona, siño rafuena jiai finode. Jofue iñenanomo cuarenta años siño rafuena finocana jaide.

³⁷ 'Caimaci, Moisés micoridi cai judíuai cominimo llote: “Omoimona Jusiñamuidi damiena ie rafue lloraimana ico oretaite, naimie cuena oretaja isoi”. ³⁸ Jofue iñenanomo naimaci ia, Moisés Jusiñamui jaienici diga anedumo ñaite. Anedu mamecidi Sinaí. Iemei cai usumatiai micoriai diga naie jaienici facaina Moisés ñaite. Caimo fecallena, naimiedi cominina itatate uaina feiñote; ³⁹ iadedi cai usumatiai micoriai naimiena ñnoiacañedimaci. Naimiena jitaiñedimaci. Egiptomo abido jaillemono naimaci comeciiai facadimaci. ⁴⁰ Ie jira comini dinena Aarón micorimo llotimaci: “Egipto eniruemono Moisés caina atide; iadedi naimie cai diga illana ja uiñoñedicaí. Cai facaina Jusiñamuina eruaide jiraraina fino, Egiptomo abido caina ifollena”. ⁴¹ Iemo jurareta urue joreña finodimaci. Iena sedallena, faga toica ocainaiaina fecadimaci. Naimaci finoca rafueri eo caimataidimaci. ⁴² Ie jira Jusiñamui naimacimona oni jaillanona, naimacina fañonocaide. Iemono jitomana sedauidimaci. Fivuina jiai sedauidimaci. Ucuaina jiai sedauidimaci. Jusiñamui rafue lloraíma ie rabenicomo biena jaie iese cuega:

Jusiñamui llote: “Judíuai imaci, cuarenta años jofue iñenanomo omoi ia, cuemo omoi faga toica ocainaiaí fecañedomoi;

⁴³ iadedi cuemo omoi comeciaina facañeno Moloc railla jiraraina sedadomoi. Refán railla ucuduna jiai sedadomoi.

Naimacina sedallena, jiraraina finodomoi.

Ie jira Babilonia nairai baífemo omoína oretaiticue”

cuega. Naie facaise cai usumatiai micoriai Jusiñamuina jitaiñedimaci.

⁴⁴ 'Caimaci, bie rafuena cai fueollena, cai usumatiai micoriai motomo Jusiñamui illana lloiticue. Jofue iñenanomo cai usumatiai micoriai motomo daje jofu aillocona nitimaci. Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cuega noficidi naicomo eenoga. ⁴⁵ Josué diga bie eniruemo naimaci billa facaise, cai usumatiai micoriai naicono atidimaci. Bie enirue jiaie nairaiamo jainaiide; iadedi Jusiñamui naie nairaiaina dotajano, cai usumatiai naie eniruena bairodimaci. Naico nainomo ite David micori facaiseconi. ⁴⁶ Jusiñamui David micorina eo canode. Ie jira David micoridi cai usuma Jacob micori ie Jusiñamui jofona finollena jicanote: ⁴⁷ ia Salomón micoridi jofona Jusiñamui iena finode; ⁴⁸ iadedi Jusiñamuidi ñima finoca jofomo i-iñede. Jusiñamui facaina lloraíma micoridi Jusiñamuina iese cuete:

⁴⁹⁻⁵⁰ Cai Nama raite: “Monamo cue illamona, nana comini cue anamo itimaci. Jafaici oticuedena, naga rana cue finua jira, nainomo cuena omoi sedallena, nie isoide jofona omoi finuana jitaiñedicue” raite.

⁵¹ 'Ero, omoi comeciiai jaiarede. Omoi comeci ñnoñede. Jefonidomoi isoidomoi. Ie jira Jusiñamui Joreño anamo iacaiñedomoi. Omoi usumatiai micoriai isoi itomoi. ⁵² Omoi usumatiai micoriaidi nana Jusiñamui rafue lloraíma micoriaina duere finodimaci. Mareuidimie billena llotinona meinetimaci. Mareuidimiena gaitatatomoi. Naimiena jai meinetomoi. Jesúsna ñaiticue. ⁵³ Jusiñamui jaieniciaimona Moisés micori llogacinona feiñotomoi; iadedi iena ñnoñedomoi.

Judíuai Esteban micorina meinia rafue

⁵⁴ Esteban llofuiana naimaci cacajano, eo iciritimaci. Icirillamona, isiduai muru-muru raite. ⁵⁵ Jusiñamui Joreño nana Esteban micori comecimo namatajamona, monamo eruaillano, naimiedi Jusiñamui ebirenana cide. Naimiedi Jusiñamui nabeimo Jesús naidaillana cide. ⁵⁶ Raite:

—Mona ecuaillana cidicue. Jusiñamui Jito Jusiñamui nabeimo naidaillana cidicue.

⁵⁷ Esteban lluana cacajano, jefo oroisite. Eo cuiriillano, naimie dine aisicaidimaci. ⁵⁸ Jerusalémona naimiena jino dotadimaci. Naimacimo ite emodomo itiroina duiñuanona, Saulo railla conirue ecimo iniroina joneside. Iemei Estebana noficido fairinoside. ⁵⁹ Estebana nofici diga fairinuano, Estebadi Jusiñamuimo ado jüide:

—Cue Nama Jesús, cue joreño feiño.

⁶⁰ Ieconí caiñici ifodo rainadacaida ado jüide:

—Naimaci bie jeacino finua muidona, ibana oñeno.

Iese naimie jüia mei, fiodaite.

8

Saulo creyentiaina duere finua rafue

¹⁻² Saulo dinena Esteban meiniana jüia jitaide. Cristo rafuena eo inotinomona damierie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiaí duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jüainodi Samaria railla eniruemo jaidimaci; iadedi Cristo oretagano nine jaiñedimaci. ³ Ie facaiseconi Saulodi creyentiaina eo duere finode. Diga jofomo jamai jaillano, iñiaina gaitade, cárcelmo jonellena. Riñoniaina jüia gaitade.

Felipe Samariumo illa rafue

⁴ Tuficaida jaidino naga illanomo Jesús rafuena llocana uitimaci. ⁵ Samariumo Felipedi daje nairaimo jaide. Nainomo Cristo rafuena llofueuide. ⁶ Ailluena cominidi Felipe llofuiana eo raise feiñotimaci, naimie siño rafuena finua jira. ⁷ Felipedi diga jananiaí anamo ite cominimona jananiaina oretate. Riire cuirioillano, jaidimaci. Ailluena tsitaitinona jillotate. Ailluena ñuja-ñujacaidinona jüia jillotate. ⁸ Ie jira naie nairaimo ite comini eo iobidimaci.

⁹ Naie nairaimo Simóna mameciredimie ite. Naimie siño rafuena finouide. Iemona Samaria cominina rajjicaitate. Naimie raite:

—Siñomiedicue.

¹⁰ Nana comini naimiena inotimaci. Abina uiñoñedino inotimaci. Abina uiñotino jüia inotimaci. Raitimaci:

—Naimie uaidi Jusiñamui ie. Naimiedi siño jito —raitimaci. ¹¹ Iese naimacina are jifuate. Naimaci rajjicailla jira, naimaci naimiena cacadimaci.

¹² Ie mei Felipe Cristo ie mare rafuena llote. Naimie anamo naimaci illana Jusiñamui jitailla jira, Jusiñamui dibeimo naimaci comeciaí iuaina meiduana llote. Naimaci Felipe llofuiana inotimaci. Inuamona, Felipe naimacina bautizade. Iñiaina bautizade. Riñoniaina jüia bautizade.

¹³ —Jüia inoticue —Simón di raite. Naimie bautizaja mei, Felipe diga jaiocaide. Felipedi diga siño rafuena finua jira, Simón naiena ciuano, rajjicaide.

¹⁴ Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaímaiaí Juan diga, batine oredimaci. ¹⁵ Iaímaiaí rillano, naimaci Jusiñamui Joreñona feiñollena Jusiñamuimo jüdiaímaiaí, ¹⁶ naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreñona nia feiñoñedimaci. ¹⁷ Ieconí iaímaiaí onolli naimacimo joniano, Jusiñamui Joreñona feiñotimaci.

¹⁸ Naimaci Jusiñamui Joreño feiñuana Simón di ciuano, ucubena iaímaiaímo feacaade. ¹⁹ Raite:

—Cuemo omico uaina ine, bumo cue onollina cue joniamona, naimie Jusiñamui Joreñaona feiñollena.

²⁰ Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadio; iadedi Jusiñamui naiena jamai fecade. ²¹ Bie rafuedi omo duiñede. Jusiñamuimona o comeci nia maraiñede. ²² O comeci iuai meido. Naimie o comecimo ite maraiñede facajacinuaina oni dotallena, cai Namamo jica. ²³ Omo ailluena maraiñedicino illana uiñoticue. O comeci eo uradoide. Maraiñedinona o comecimo namaredio.

²⁴ Simón uai ote:

—O llua cuemo suiñellena, o Nama diga cue facaina ñaino.

²⁵ Cristo rafuena iaiaiaia llua mei, Jerusalémo abido bitiaiaiaia. Abido billano, Samariamo diga comini illanuaimo Jesús ie mare rafuena llocana bitiaiaiaia.

Etiopía imie creyentena jailla rafue

²⁶ Naie facaise Jusiñamui jaienisaiaimona damie Felipemo llote:

—Beicido joide naido mai jai. Jerusalémona Gazamo joide naisona jai — llote. Naie naiso jofue iñenanodo joide. ²⁷ Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maijiuide. Naiñaiño mamecidi Candace. Naimiedi nana naiñaiño gobierno ucubena sedade. ²⁸ Naimie jai abido jaillano, ie carretamo raita, Isaías micori cueda rabenicono ado facade. ²⁹ Jusiñamui Joreño Felipemo llote:

—Naimie dine iairei jai. Carreta dine jai.

³⁰ Naimie dine Felipedi aisicana jaillanona, rabe ado facajana cacade. Felipe dinena naimiemo jicanote:

—¿O facaca rabenicono uiñotio?

³¹ Naimie uai ote:

—¿Ni ese uiñoticue, bu cuena canoñenia?

Felipemo jicanote, naimie diga a jaillano danomo raillena.

³² Naimie facaca cueda fue iese raite:

Toica llauda fallena uilla isoi, naimiena uitimaci.

Toica llauda itirai garedino dine eeñena isoi, naimie ñaiñede.

Ie abina riidollena, uaina oñede.

³³ Maraiñede rafuena naimie finoñede; ia naimiena duere finodimaci.

Naimie uruai iñededí, ¿bu naimie rafuena lloite?

Meinia meinoconi, naimie jai iñede.

³⁴ Etiopía imie Felipemo jicanote:

—¿Bie lloraia bu iena llote? ¿Dama naimie iena llote? ¿Jiaimiena iena llote? Cuemo llono.

³⁵ Iemei Felipedi bie cueda fue iamona naimiemo Jesús ie mare rafuena llote.

³⁶ Naisona jaidiaiaiaimo, jinui illanomo ridiaiaiaia. Etiopía imie dinena raite:

—Ero, bie jinui itemo, ¿bue ñe cuedi bautizañellicue?

³⁷ Felipe uai ote:

—O comecimona o ñnoia, cuemona mare.

Naimie uai ote:

—Jesucristodi Jusiñamui Jitonana ñnoticue.

³⁸ Naimie ie carreta jorodate. Iemei jinui dine jaidiaiaiaia. Felipedi naimiena bautizade. ³⁹ Jinuimona iaiaiaiaia bia, Jusiñamui Joreño Felipe na oni uite. Etiopía imie Felipe na dane cioñede; iadedi Etiopía imie iobicana jaide.

⁴⁰ Jusiñamui Joreño Azotomo Felipe na uite. Cesarea dine naimie jaillanona, naga nairaiaimo Jesús ie mare rafuena llocana uite. Ie mei Cesareamo ride.

9

Saulo creyentena jailla rafue
(Hch 22.6-16; 26.12-18)

¹ Naie facaise Saulo cai Nama Cristona ñnotinona eo duere finoacade. Icirillamona, naimacina meineiacad. Ie jira Jusiñamui diga nanoca ñairaima dine jaide. ² Judíuai comini naie ñairaima anamo illamona, creyentiana duere finollena, Saulo cartana naimiemo jicajaide. Damascomo ite judíuai ofiracuaimo dajerie cartana uiacade. Naie ofiracuai sedaraini naimie canollena jitaide. Jesucristona ñnotinona naimie baia, naimacina gaitajano, Jerusalémo atillena, naimiena canollena, cartana jitaide. Hiñiai baia, riñoníai baia, naimacina Jerusalémo atiacade. ³ Cartana ua mei, naimie jaillano, Damascomo iaire ia, ieconi monamona damie naimie abina quetiñote. ⁴ Eniruemo naimie ana uaillano, monamona damie naimiemo lluaana cacade:

—Saulo, Saulo, ¿bue ñellena cuena duere finodio?

⁵ Naimie uai ote:

—¿Budío?

Monamona damie raite:

—Jesúdicue. Cuena duere finodio. Iemona o abina duere finodio, ricacillamona raise maiga jurareta suiñoacana isoi. Ie isoidio. Ricacillamona, cuena duere finoacadio. ⁶ Naidacai. Damascomo mai jai. Nainomo o finolle rafue omo lloiticue.

⁷ Saulo diga jaidinodi ñaiñeno naidaidimaci. Naie uaina cacaidimaci; iadedi buna cioiñedimaci. ⁸ Ieconi Saulo naidacaide. Ie uisi ecoricacillamona, erodatemo, jai buena cioiñede. Ie onollina llinocaida, naimiena Damascomo uitimaci. ⁹ Darui amani cioiñede. Jusiñamuimo comecina facajamona, guiñede. Jiai jiroñede.

¹⁰ Damascomo Ananíana mameciredimie ite. Naimiedi creyente. Iníñenamona, Ananías nicairilla isoi cacacillena, Cristodi naimiemo rafuena llote:

—Ananías.

Naimie uai ote:

—Jii, bene iticue.

¹¹ Cai Nama Cristo naimiemo llote:

—Naidacai. Atona joide railla naisona jai. Judas ie jofomo jai. Naicomo Tarso ie Saulona jicano. Naimie cuemo jai jide. ¹² Naimie damiena jai nicairite isoide. Ananíana mameciredimiena nicairite isoide. Ona nicairite isoide. Naimie dine o jaillena ona nicairite isoide. Naimiemo o onolli joniamona, naimie dane ciuana nicairite isoide.

¹³ Ananías uai ote:

—Nama, diga cominimona naimiena fididicai. Jerusalémo naimiedi marañede rafuena ona ñnotinomo finode. ¹⁴ Jusiñamui diga nanoca ñairaima uai naimiemo ite, nana bene ite creyentiana gaitallena.

¹⁵ Cai Nama naimiemo llote:

—Mai. Naimie jai cue fetoca, judíuaiñedinomo cue rafuena llollena, illaicominimo cuena llollena, judíuai cominimo cue rafuena jiai llollena.

¹⁶ Cuena naimie jai ñnua muidona, naimie nie isoi legi cacajite. Naimiemo iena lloiticue.

¹⁷ Ie jira Ananías naie jofomo jaide. Ie onolli Saulomo joniano, raite:

—Saulo, jai cue amana jai itio. Naisomo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o comecimo namatallena.

¹⁸ Ieconi Saulo uisimona lliciai ico isoide ra uaide. Dane ciuana, naidaide. Ie mei jai bautizaga. ¹⁹ Ie mei jai guite. Dane mañride. Diga irui Damascomo ite creyentiai diga naimie ite.

Damascomo Saulo illa rafue

²⁰ Judúuai ofiracomo naimie jaillanona, Jesús ie rafuena llofujete. “Jesúdi Jusiñamui Jito” raillanona llofujete.

²¹ Nana naimiena cacadinodi rajicaide. Raitimaci:

—Bimie Jerusalémo Jesúsna ñnotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús dibeimo jai ite.

²² Saulo nagarui jacitaiñeno llofuiamo fibioicaide. Llofueuide:

—Jesúdi cai Jilloitaraima. —Naimie raise llofuia jira, judúuai dinena iena uaitanidimaci.

²³ Digarui illa mei, judúuai comeciaina facadimaci, naimiena meinellena.

²⁴ Naimie aisii raillano, aremona nairai nasiaina sedadimaci. Naiona nasiaina jiai sedadimaci, naimiena meinellena; iadedi Saulo iena fidiano, ²⁵ naiona creyentiai naimiena oni uitimaci. Naimie jillobillena, llaigafu jinofebeimo cirigaimo rainajanona, naimiena ana ñuitadimaci.

Jerusalémo Saulo illa rafue

²⁶ Jerusalémo naimie jaide. Naimie ria, creyentiaina nabaiacade; ia naimiena jaciruitimaci. Creyentena naimie jaillana ñnoñedimaci. ²⁷ Ie jira Bernabé naimiena Cristo oretagano dine uillano, naimacimo naiso motomo Saulo cai Namana ciuana llote. Naiso motomo cai Nama Saulomo llua jiai llote. Damascomo naimie ia, Jesúsna jacitaiñeno llofuiana jiai llote. ²⁸ Ie jira Saulona nabaidimaci. Jerusalémo jaisoillanona, cai Nama ie rafuena jacitaiñeno lloouide. ²⁹ Iena cacajanona, griego uaina ñaite judúuaidi naimie llofuiana uaitatimaci. Naimiena meineiacadimaci. ³⁰ Creyentiai iena fidiano, Cesareamo Saulona uitimaci. Ie mei Tarsomo naimiena oredimaci.

³¹ Judeamo, Galileamo, Samariamo nana creyentiai uri itimaci. Cai Namana ñnocana jaidimaci. Cai Namana jaciruiocaida jaidimaci. Jusiñamui Joreño naimaci comeciaina eo ocuiñotade. Ailluena comini creyentiaina jaidimaci.

Eneas jillua rafue

³² Naie facaise diga illanuaimo Pedro macarite. Lidamo ite creyentiai dine ride. ³³ Nainomo damie biramo biidena ciode. Naimiedi Eneas. Ocho años tisitaimonona biide. ³⁴ Naimiena ciuano, Pedro naimiemo llote:

—Eneas, Jesucristo ona jai jillotate. Mai naidacai. O biira feri. —Iecon naimiedi naidadate. ³⁵ Nana Lidamo ite comini, nana Sarónmo ite comini diga, naimiena jilluana ciuana, creyentiaina jaidimaci.

Fiodaillamona Dorcas jillua rafue

³⁶ Jopemo Tabitana mamecirediñaiño ite. Griego uaimona oni dobaiñuamona naie mameci Dorcas. Naiñaiño creyente. Ailluena mare rafuena finouide. Ailluena duerede cominina canouide. ³⁷ Naie facaise naiñaiño duicotaide. Ie mei fiodaite. Naimaci einamací finua isoi, ie nabaiñaiñai naiñaiño abina jocodimaci. Iemei aneba ie cuartomo naiñaiño jonetimaci. ³⁸ Lidamona Jope iaire ite. Pedro Lidamo creyentiai illana fidiano, menaimie naimie dine oredimaci. Iaimaiaina llotatatimaci:

—Buena sedaño cai dine raire bi.

³⁹ Ie jira Pedro naidacaida, naie iaimaiiai diga jaide. Naimie ria, aneba ie cuartomo naimiena uitimaci. Nana feciñuai Pedro ecimo eecana naidaidimaci. Dorcas finouiga iniroina naimiemo acatatimaci. ⁴⁰ Dorcas finouiga rafuena Pedro fidiano, Pedro nana naimacina jino orede. Caiñici ifodo naimie raite, Jusiñamuimo jide. Abido dobaicaida, naiñaiño erodate. Raite:

—Tabita, mai rainaicai.

Ieconí naiñaiño uisi oni erodate. Pedrona ciuano, a rainadate. ⁴¹ Naiñaiño onolli llinuanona, a naidanete. Ie mei Pedrodi feciñuaina, jiaie creyentiai diga, uaidote, naiñaiño jai cajenana naimaci cioillena. ⁴² Nana Jopemo ite comini naie rafuena fididimaci. Ie jira ailluena comini cai Namana inotimaci. ⁴³ Jopemo Pedro diga irui Simón jofomo ite. Simóndi ocaina igoina cuidoraima.

10

Cornelio comeci iuai meidua rafue

¹ Cornelio raillamiedi Cesareamo ite. Naimiedi capitán. Italiamoná bite soldaduai naimie anamo itimaci. ² Naimiedi Jusiñamui llogacínodo jaide. Nana ie comini diga Jusiñamuina inote. Judíuai cominimo ailluena rana jamai fecauide. Jusiñamuimo jiuide. ³ Jitoma ana ia, naimiemo jai nicaírilla isoi ite. Naimiedi Jusiñamui jaienicina naimie dine billana ciode. Jaieniciði uaidote:

—Cornelio.

⁴ Naimiena Cornelio jaciruoicaida eruaide. Jicanote:

—Nama, ¿buena jitaído?

Naimie uai ote:

—Jusiñamui o jiacinuaina jai cacade. Jusiñamuidi duerede cominina o canuana jiaí feitañede. ⁵ Mai, Jopemo damerie o mullaiaimona oreta, Simón raillamiena atillena. Naimie jiaie mameciði Pedro. ⁶ Naimiedi igoi cuidoraima jofomo ite. Naie cuidoraima mameciði Simón. Monailai fuemo naimie jofo ite.

⁷ Jusiñamui jaienici jailla mei, Corneliodi ie mullaiaimona mena uaidote. Naimie anamo ite soldaduaimona damie jiaí uaidote. Naie soldadodi Jusiñamuina jiaí inote. ⁸ Nana naimiemo Jusiñamui jaienici lluana naimacimo llua mei, Jopemo oretate. ⁹ Ie are naimaci jaillano, Jopemo ianori riacanano, jitoma naidai ia, jofo emodomo Pedro jaide, Jusiñamuimo jillena. ¹⁰ Naimie aimetaite. Guiacade. Guillena comini finodemo, naimiemo nicaírilla isoi ite. ¹¹ Mona oni econuana ciode. Aillue sábana isoi, buena ana billana ciode. Eniruemo naga muiduedo maigado ana bite. ¹² Naiemo jiaíforie eruaide ocainaiái ite. Diga eniruemo jorode raniai ite. Diga nuiciniai jiaí ite. Nana Moisés micori fimaidoga rille radi ite. ¹³ Naimiedi monamona damie lluana cacade:

—Pedro, naidacaida, fajano, buena rino.

¹⁴ Pedro uai ote:

—Nama, dama ite. Moisés micori fimaidoga rille rana jaca riñedicue.

¹⁵ Monamona damie lluana dane cacade:

—Jusiñamui jai fimaidoñede. Ie jira iese lloñoeno.

¹⁶ Dacaiño amani iese suide. Ie mei naie radi monamo abido jaide.

¹⁷ Pedro ie comecina facade: “¿Niese illana ciodicue?” Ie daacaiño Cornelio oretagano bite. Simon illa jofo jicanuano, naie nasemo ride. ¹⁸ Simón Pedrona naie jofomo illana jicanotimaci. ¹⁹ Pedro ie nicaírillana isoidemo comecina facajano, Jusiñamui Joreño naimiemo llote:

—Ero, daje amani ima ona jenode. ²⁰ Naidacaida, ana jai. Naimaci diga buena sedañoeno mai jai. O dine naimacina oredicue.

²¹ Pedrodi comini dine ana jaide. Raite:

—Omoi jenocamedicue. ¿Bue ñiaíbitomoi billa?

²² Uai otimaci:

—Cornelio raillamie anamo iticai. Corneliomo Jusiñamui jaienici birui llote: “Pedro dine damieriena oreta, naimiena o jofomo atillena. Jusiñamui rafuena raise cacaillena, naimiena ati” llote. Corneliodi capitán. Naimiedi

mareuidimie. Jusiñamuina inotimie. Nana judíuai comini dinena naimiedi mareuidimie.

²³ Iena Pedro cacajano, naimie jofomo inillena naimacina fo uaidote. Ie are naimaci diga jaide. Damierie Jopemo ite creyentiai naimie diga jiai jaidimaci.

²⁴ Ie are Cesareamo ridimaci. Cornelio naimaci billemo ocuride. Nana ie cominina jai uaidote. Ie nabaiñiai jiai jai uaidote. ²⁵ Pedro fo jaia, Cornelio dinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena. ²⁶ Pedrodi naimiena a naidanete. Raite:

—Mai a naidada. Cue jiai jamai imadicue.

²⁷ Naimie diga ñaiano fo jaidiaimaiai. Ailluena comini ofillana ciodo. ²⁸ Naimacimo llote:

—Moisés micori judío imie judíuñedimie nabairillana rairuide. Iena uiñotomoi. Judíuñedimie jofomo illana jiai rairuide. Ie areruido Jusiñamui nicairilla isoidifueno cuemo acatate. Iemona jai fueoticue. Jiaie nairai diga cue nabairillena, Jusiñamuimona marenana jai uiñoticue. Jusiñamui omoina cue jearuillana jai jitañede. ²⁹ Ie jira buena sedaño biticue, cuena o uaidua jira. ¿Bue ñellena cuena uaidotomoi? Cuemo llono.

³⁰ Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jiidicue. Ieconi Jusiñamui jaienici cuemo bairede. Naimie iniroi quenirede.

³¹ Cueno raite: “Jusiñamui o jiaana cacade. Naimiedi duerede cominina o canuana feitañede. ³² Ie jira Jopemo damieriena oreta, Simón Pedrona uaidollena. Jiaie Simón jofomo ite. Simóndi igo cuidoraima. Ie jofomonai llai fueimo ite”. ³³ Iemona ona uaidoticue. O comeci marena jira, bene bitio. Jai nana bene iticai. Jusiñamui cai diga jiai ite. Cai Nama nana omo lluna cacareillena, bene iticai.

Corneliomo Pedro llua rafue

³⁴ Pedro uai ote:

—Jusiñamui nana comini naimie inuana jitaillana jai uiñoticue. ³⁵ Naga nairaimona Jusiñamuidi cominina jai jitaide. Bu naimiena inoia, bu mare rafuedo jaia, Jusiñamui naimiena jai jitaide. ³⁶ Cai judíuai cominimo Jesucristo llumona, Jusiñamui dibeimo cai illena jai uiñoticai. Iemona Jusiñamui diga cai uri illana jai jiai uiñoticai. Jesúdi nana cai Nama. Bie rafuena navui janore fididomoi. ³⁷ Nana Judeamo bie rafue llocana jai jaide. Juan micori bautizajana llua mei, Galileamo Jesús naimie llofuiana tainede. ³⁸ Jusiñamuidi ie Joreñoa Jesúmo fecade. Jesúdi Nazaret imie. Naimiemo ie uaina jiai fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itinona jillotate. ³⁹ Judíuai eniruemo nana naimie siño finoca rafuena ciodicai. Iena birui llocabiticai. Cruzmo jonianona, cai illaicomini naimiena meinetimaci; ⁴⁰ iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, ailluena comini naimiena ciodimaci. Cajedimiena ciodimaci. Jiai ciodicai. ⁴¹ Nana comini naimiena cioñedimaci; iadedi Jusiñamui fetocano diese naimiena ciodimaci. Fiodaillamona naimie jillua mei, naimie diga guiticai. Naimie diga jamai jirodicai. Naimiena cai raise uiñua jira, Jusiñamui caina fetode, naie rafuena lollena. ⁴² Cominimo bie rafuena lluna caimo llote. Jusiñamui Jesúna jai fetode, naimiena inoñedinona duere finollena. Nia fiodañedinona duere finoite. Jai fiodaitinona jiai duere finoite. Ie jira Jesús rafuena llocana jaidicai. ⁴³ Jesús muidona naga naimiena inotimie ie marañedicinodi Jusiñamui dotalle. Iena nana Jusiñamui facaina lloraini micoriai jai llotimaci.

Judíuñedino Jusiñamui Joreñoa feñua rafue

⁴⁴ Pedro biena nia llofueia, Jusiñamui Joreño nana bie rafuena cacadinomo bite. ⁴⁵ Iena ciuanona, Pedro diga bite creyentiaí rajicaidimaci. Naimacidi judíuai comini. Judíuaiñede cominimo Jusiñamui ie Joreño jai fecaja jira, rajicaidimaci. ⁴⁶ Jusiñamui Joreño naimacimo illamona, judíuaiñedinodi jiaie nairai uaillado ñaitimaci. Naie ñaia uallaina uiñoñedimaci. Jusiñamuimo iobillacinona jai fecadimaci. Pedro diga bitino iena cacajano, rajicaidimaci. Iemei Pedro raite:

⁴⁷ —Cai feiñua isoi, Jusiñamui Joreño jai feiñotomoi. Omoi bautizallena jaca budi rairuiñeite.

⁴⁸ Ie jira naimiedi naimaci Jesucristo facaina bautizallena llote. Bautizaja mei, naimaci diga fiebillana naimaci jitailla jira, diga irui nainomo fiebide.

11

Jerusalémo Pedrodi naimiemo jai suide rafuena llote

¹ Judeamo ite Cristo oretagano, jiaie creyentiaí diga, judíuaiñede comini Jusiñamui uaina feiñuana fididimaci. ² Pedro Jerusalémo abido ria, judíuai comini naimiena icidimaci. ³ Jicanotimaci:

—¿Bue ñellena judíuaiñedino jofomo jaidio? ¿Bue ñellena naimaci diga guitio?

⁴ Pedro uai uanona, naimacimo naie rafuena nagacinuaina llote:

⁵ —Jopemo navui cue ia, Jusiñamuimo cue jiaia, nicairilla isoi iticue. Aillue sávana isoi ana billana ciodicue. Monamona ana lloride, ie muiduai maiga diga. Cuemo ana ride. ⁶ Nainomo eruaidicue, diga rana ciodicue: ocainaiaina, eniruemo jorocana jaidinona, nuiciniaina. Iena ciodicue. ⁷ Monamona damie cuemo lluaana cacadicue. Raite: “Pedro, naidacaillanona, fajanona, rino”. ⁸ Naie uai oticue: “Nama, dama ite. Moisés micori fimaidoga rille rana jaca riñedicue”. ⁹ Monamona dane cuemo llote: “Jusiñamui iena jai fimaidoñede. Ie jira iese lloño”. ¹⁰ Dacaiño amani iese suide. Ie mei monamo nana abido dane jaide. ¹¹ Ieconí daje amani ima cai illa jofomo ridimaci. Cesareamona cue dine damie naimacina orede. ¹² Jusiñamui Joreñodi naimaci diga buena sedaño cue jaillena cuemo llote. Cue diga seis creyentiaí jai jaidimaci. Cuená uaidotimie jofomo jaidicai. ¹³ Nainomo cai rilla mei, naimie ie jofomo Jusiñamui jaienicina navui ciuana caimo llote. Naie jaienici naimiemo llote: “Jopemo cominina oreta, Simón Pedrona atillena. ¹⁴ O jitaillé rafuena omo lloite. Naie rafuena o cacajamona, jeacinomona jilloitio, nana o jofomo ite comini diga” llote. Ie jira naimie cuena uaidote. ¹⁵ Nainomo cue llofuia facaiseconi, nano dofoconi caimo billa isoi, Jusiñamui Joreño naimacimo bite. ¹⁶ Iena cue ciuamona, cai Nama Jesús lloga uaina comeciticue. Naimie navui llote: “Juan micori rafuena comini feiñuamona, Juan naimacina bautizade; iadedi cue rafuena omoi feiñuamona, cue Moo ie Joreño birui feiñoitomoi”. ¹⁷ Cai Nama Jesucristona cai inuamona, Jusiñamuidi ie Joreño caimo navui fecade. Naimacimo daje isoi birui fecademo, ¿ñiese Jusiñamui dibeimo iñeiticue?

¹⁸ Iena Cristo oretagano cacajano, jai naimaci uaina uaitallicino iñede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judíuaiñede comini comeciaí iuai meiduaana jai jitaide. Naimie dibeimo naimaci illana jai jitaide. Ie jira naimieri iobidicai.

Antioquíamo ite creyentiaí illa rafue

¹⁹ Esteban micorina duere finua facaise, creyentiaí tuficaida jaidimaci. Feniciamo damerie jaidimaci. Chipremo damerie jai jaidimaci. Antioquíamo damerie jai jaidimaci. Dani judíuai cominimo naimaci rafuena

lloŧimaci; ²⁰ iadedi tuficaidinomona jiaño Chripremona billanona, Cirenemona billanona, Antioquíamo rillano, judíuañedínomo cai Nama Jesús rafuena lloŧimaci. ²¹ Cristo uai naimacimo illamona, ailluena comini innotimaci. Cai Nama dibeimo jaidimaci. ²² Jerusalémo ite creyentiaí iena fidiano, Antioquíamo Bernabéna oretatimaci. ²³ Naimie ria, naimaci marena illamona, naimiedi Jusiñamui naimacina dueruillana uiñote. Ie jira iobide. Imaci comeciaí ocuiñocana inocana jaillana naimacimo llote. ²⁴ Naimiedi maremie Jusiñamui Joreño nana naimie comecimo namatadimie. Jusiñamuina eo innotimie. Naie facaise ailluena comini creyentiaína jaidimaci.

²⁵ Ie mei Tarsomo Bernabé Saulona jenuaide. Naimiena baillanona, Antioquíamo naimiena uite. ²⁶ Daje año creyentiaí diga nabairillanona, naimacina llofuetiaímaiaí. Antioquíamo creyentiaídi cristianona nano mameciredimaci.

²⁷ Iemei Jerusalémona Antioquíamo damerie Jusiñamui rafuena lloraini bitimaci. ²⁸ Naimacimona Agabo raillamie ite. Jusiñamui Joreñodi naimiena llotatate:

—Nana comini ico aime gutimaci. —Claudio illaimana illa facaiseconi iese jai suide. ²⁹ Ie jira Antioquíamo ite creyentiaídi, Judeamo ite creyentiaímo, ucubena oretaiacadimaci. ³⁰ Nagamíai imacimo illa dierise ucubena oredimaci. Creyentiaína llofuerainimo Bernabé diga, iaímaiaí Saulo diga, naie ucubena oredimaci.

12

Herodes Agripadi creyentiaína duere finua rafue

¹ Naie facaise Herodes railla illaimadi creyentiaímona damieriena gaitatate, naimacina duere finollena. ² Lloebi diga Jacobo cimaíona jaitatate. Jacobodi Juan ama. ³ Ieri judíuai illaicomini iobidimaci. Iena uiñuamona, Herodes Pedrona jiaí gaitatate. ⁴ Naie facaiseconi judíuai comini llomenico guilla rafue ite. Naimiena gaitatajanona, cárcelmo jonete. Soldaduaína orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedaudimaci. Naie llomenico guilla rafue fuilla mei, comini illa uicomo naimiena meineiacade. ⁵ Ie jira Pedro cárcelmo fiebide; iadedi creyentiaí naimie facaina eo jüdimaci. ⁶ Herodes naimiena meineiacanarui naío Pedro soldaduai motomo inide. Mena lloeo diga maíga. Soldaduai cárcel nasena jiaí sedadimaci. ⁷ Ieconí cai Nama ie jaieniciídi cárcelmo bairede. Cárcelmo lligaiñote. Naimiena casitallena, jaienici Pedro ciraigina jetade. Raite:

—Raíre naidacai.

Ie mei naimie onollimo ite lloeodi oni uaide. ⁸ Jaienici naimiena raite:

—O iniroina jita. O zapatona jiaí jita— Iena jitaja mei, naie jaienici dane raite—. O iniroi o abimo ferino. Cue diga mai bí.

⁹ Naie jaienici jinafona Pedro jino jaide. Pedrodi naie jaienici naimiemo finoca rafuena uiñofede.

—Nicaírilla isoi comecina facadicue —raite. ¹⁰ Naga nasena sedade soldadomona jaide. Jino jaillena, nanoca nasemo ride. Nai nasedi lloema ie; iadedi nase dama ecoride. Jino jaidiaímaiaí. Daje calle jaillanona, jaienici naimiena fainonocaide. ¹¹ Iemona Pedro naimiemo suide rafuena jai uiñocaide. Raite:

—Cue Nama ie jaienicina uanai oretate. Herodemona cuena jillobitade. Judíuai illaicomini cue meinellena cue sedajamona cuena jillobitade.

¹² Iena jai naimie uiñuano, María jofomo jaide. Mariádi Juan Marcos ei. Jusiñamuimo jillaena, naicomo ailluena comini ofidimaci. ¹³ Rillanona calle fuemo ite nasena tute. Daje mullaiño bite. Naiñaiño mamecidi Rode. ¹⁴ Naimie uaiduamona, naiñaiño Pedro uaina uiñote. Iobilla jira, nase econoñede; iadedi abido fo aiside. Pedro nasemo illana llote. ¹⁵ Raitimaci:

—Odi uairico isoidiosa.

Naiñaiñodi:

—Pedrodi jaca ieseuide —raite.

Uai uamona:

—Naimie joreño ite —raitimaci.

¹⁶ Pedro nasena nia tua jira, nasena econuaibitimaci. Econuamona naimiena naimaci ciuamona, rajicaidimaci. ¹⁷ Fo jaillano, Pedro ie onolli jaidide, naimaci llucaillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiaie creyentiaimo iena jiai llono.

Ie mei Pedro jino jaillano, jainomo jaide.

¹⁸ Monaidemo, Pedro nainomo iñena jira, soldaduai rajicaillanona, siadotimaci. ¹⁹ Herodes iena fidiano, naimiena jenotate. Naimiena baiñena, soldaduaiimo jicanote. Baiñena jira, naimacina meinellena llote. Iemei Judeamona Cesareamo Herodedi jaide.

Herodes micori fiodailla rafue

²⁰ Naie facaise Herodedi Tiro railla nairai diga, Sidón railla nairai diga, eo icirite. Naimaci uri ille rafuena siadollena, naimie dine bitimaci. Herodes ecimo maijidimiedi Blasto. Blasto diga naie cominidi nabairite, naimaci dibesimo naimie illena. Herodes eniruemona naimaci guille billa jira, uri illena naimiemo jicanote. ²¹ Naie cominina Herodes feiñollena, ie ebirede iniroina jitade. Naimacina feiñollena, ie rairabicimo raide. Iemona raita, rafuena are llote. ²² Iena cacajano, comini ado cuiridimaci:

—Jamai imadi ñaiñena. ¡Jusiñamui ñaia!

²³ “Jusiñamuiñedicue” naimie raiñena jira, ieconi cai Nama jaienici naimiena iracotaitate. Jusiñamuimo iobillacino naimie fecañena jira, aiai naimiena aite. Iemona naimiedi fodaite.

²⁴ Naie facaiseconi Jusiñamui uai llocana jaide. Ailluena comini iena inotimaci.

²⁵ Iaimaiai uiga ucube illanona, Bernabé, Saulo diga, Jerusalémona Antioquíamo abido bitiaimaiai. Juan Marcos jiai atidiaimaiai.

13

Bernabéna, iaimaiai Saulo diga, fetua rafue

¹ Antioquíamo creyentiai motomo Jusiñamui facaina lloraini itimaci. Llofueraini jiai itimaci: Bernabé, Simón. Simóndi jiaie mameci Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enirue gobernador. Saulo jiai ite. ² Naimaci Jusiñamuina sedajamona, guiñenaruillai ia, Jusiñamui Joreño naimacimo llote:

—Bernabé iaimaiai Saulo diga fetu, cuejena. Cue rafuena iaimaiai llollena, iaimaiaina jai fetodicue.

³ Jusiñamuimo naimaci jia mei, Jusiñamui iaimaiaina fetuana naimaci uiñuamona, naimaci onolli iaimaiaimo jonia mei, iaimaiaina naimacimona oni oretatimaci.

Pablo, iaimaiai Bernabé diga, Chipremo illa rafue

⁴ Iaimaiaia Jusiñamui Joreño oretaja jira, Seleuciamo jaidiaimaiaia. Nainomona botedo Chipremo jaidiaimaiaia. Chipredi uiasi. ⁵ Chipremo ria, Salamino judíuai ofiracuaimo Jusiñamui uaina llofuetiaimaiaia. Juan Marcos iaimaiaia diga jiaia jaide. ⁶ Nana naie uiasimo jaillanona, Pafos railla nairaimo ridimaci. Nainomo Barjesúna mameciredimiena baitimaci. Naimie judío imie. Naimiedi aima. Naimiedi diga siño rafuena finoraíma. “Jusiñamui rafuena lloticue” raite; iadedi taino lloiraíma. ⁷ Gobernador diga maijuide. Gobernadori Sergio Paulo. Gobernadori abina uiñotimie. Jusiñamui uaina cacaacana jira, naimie Bernabé iaimaiaia Saulo diga uaidote. ⁸ Barjesús ie jiaie mamecidi Elimas. Naie iaimaiaia llofuiana uaitate. Gobernador ñnuana jitaíñede. ⁹ Saulodi jiaie mameci Pablo. Pablo ñnena naimiena eo eruai llano, Jusiñamui Joreño nana Pablo comecimo namatajamona, ¹⁰ naimiemo llote:

—¡Eo jifueraimadio! ¡Eo maraiñedio! ¡Taife ñibeimo itio! Nana mare rafue ñibeimo iñedio. Cai Nama ie mare uanaicñona dobairaidodio. ¹¹ Cai Nama ie uaido ona ja iracotaitaicue. Nano nigarui useredinona cioiñeítio.

Ieconí naimie cioiñede. Cominina jenuaide, ie onollido llinocaida ie uillena. ¹² Iena ciuamona, gobernador creyentena jaide. Cai Nama Jesús rafue siñonana ciuanona, naimie jacinaite.

Jesús rafuena llocana jaidiaimaiaia

¹³ Pafomona botedo Pablo ie nabaiñiaia diga jaide. Perge railla nairaimo ride. Perge Panfilia railla eniruemo ite. Juan Marcos iaimaiaia fañonocaida, Jerusalémo abido jaide. ¹⁴ Pergemona Antioquíamo jaidiaimaiaia. Pisidia railla eniruemo Antioquía ite. Sábadoruimo judíuai ofiracomo jaillano, ana raidiaimaiaia. ¹⁵ Moisés micori ciegafuena facaja mei, Jusiñamui facaina lloiraíni micoriaia ciegafuena facaja mei, judíuai ofiraco sedadino iaimaiaimo llotimaci:

—Caimaci, cominimo bue omico lloiacania, mai llono.

¹⁶ Pablo naidadajano, ie onollina jaidide, comini llicai llana. Raite:

—Jusiñamuina sedallena bene itomoi. Omoimona damierie judíuaidomoi. Jiaíno judíuaiñedomoi; iadedi judíuai isoi Jusiñamuina sedadomoi. Cue llamo mai cacarei. ¹⁷ Iemona omoi fueollena, cai jaiagai rafuena lloticue. Cai judíuai comini Jusiñamuina birui sedadicaia. Naimiedi cai jaiagaina jaie fetode. Egiptomona naimaci ia, naimacina eo jebuitate. Nainomona ie siño uai diga naimacina atide. ¹⁸ Jofue iñenanomona cuarenta años naimacina canode. ¹⁹ Canaán eniruemo siete nairaína cuenode. Cai jaiagaimo, naimaci uruiaia diga, naie eniruena fecade, naimaci iena. ²⁰ Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamuidi jueces fetode, cai jaiagaina naimaci canollena. Naimie ñibeimo naimacina itatallena, Jusiñamui naie jueces fetode; iadedi Samuel micori illa facaise juecesna jai jitaíñedimaci. Samuel micoridi Jusiñamui facaina lloiraíma. ²¹ Illaímana naimaci jitailla jira, Jusiñamui Saúl micorina fetode. Naimiedi Cis micori jito. Naimie micori nairaídi Benjamín. Cuarenta años Saúl micori cai usumatiaia micoriaína sedade. ²² Naimie ifo meidollena, naimaci illaímana illena, Jusiñamui David micorina fetode. Naimiedi Isaí micori jito. Jusiñamui naimie micorina llote: “Bimie eo cue comecido jaidimie. Nana cue jitailla rafuena finoite”. ²³ Jusiñamui llua isoi, David micori uruiaimona Jesúdi cai judíuai comini Jilloitaraímana jaide. ²⁴ Jesús ñia llofueñenia, Juan Bautista micori llofueuide. Juan micori cai cominimo llouide: “Omoi jeacina fañonocaida, Jusiñamui ñibeimo omoi comeciaia iuailai meido. Iena omoi meidoia, comini iena uiñotallena, mai omoi bautizallomoi”. ²⁵ Juan micori ie llofuia fuillamona, raite: “Omoi comeci facajamieñedicue. Cue ifomo

jiaimiena meidoite. Naimie isoiñedicue. Jamai bue isoidicue. Jamai bue cue isoilla jira, naimiena cue canuana uiñoñedicue”.

²⁶ 'Caïmaci, cai eirue jito Abraham micorimona comuidicai. Jusiñamuina birui sedadicaï. Ie jira cai jeacinomona naimie jilloitalle rafue caïmo duide. Jesúna ñaiticue. ²⁷ Jerusalémo itinodi, cai illaïcomini diga, Jesúna jaie meinetimaci. Naga sábado Jusiñamui facaina lloraini micoriaï ciegafuiaïna facadimaci; iadedi iena raise cacaiñedimaci. Jesúna naimaci meini- amona, Jusiñamui lloraini micoriaï ciegafuiaïna jai suitatimaci. ²⁸ Jesús marañede rafuena finoñede; iadedi naimiena meinetimaci. Pilatomo jïcanotimaci, naimiena meinellena. ²⁹ Nana Jusiñamui facaina lloraini micoriaï ciegafuiaïna suilla mei, cruzmona naimie ana uano, nofici ie raiafomo naimiena jonetimaci; ³⁰ iadedi fiodaillamona Jusiñamui naimiena jillotate. ³¹ Galileamona Jerusalémo naimie diga jaidino naimiena diga icaiño ciotimaci. Iemei cominimo naimie rafuena jai llocabitimaci. ³² Jusiñamui cai jaiagaimo jaie lloga rafue jai suide. Iena omoïmo ja lloiticoco. ³³ Jusiñamuidi cai jaiagaimo llogafue birui jai suide. Jesúna cai dine jai orede. Naiena salmos dosmo cueba: “Jusiñamui llote: ‘Cue jitodio. Birui ona Jilloitaraimana itataticue’ ”. ³⁴ Fiodaillamona Jusiñamui naimiena jai jillotate. Ie abi jaca rifañede. Iena Jusiñamui jiaï raite: “Davidmo cue llogacinona omoï facaina jaca finojiticue”. ³⁵ David micori jiaïe salmomo iena cuete: “O mareuidimie jaca rifaïllana jitaïñedio” raite. ³⁶ Jusiñamui David micorina ñañede. Ie illa dinori David micoridi Jusiñamui jitaïlla rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide; ³⁷ iadedi Jusiñamui Jito abidi ie isoi rifañede.

³⁸ 'Caïmaci, daje rafue omoïmo lloiacadicue. Jesús fiodaïlla jira, Jusiñamui omoï jeacino oni dotaacade. Moisés micori llogacinodi omoï marañedicinomona omoïna jillotañede; ³⁹ iadedi Jesúna birui omoï ñnoïa, omoï jeacino anamona jilloitomoï. ⁴⁰ Abina omoï rairui, Jusiñamui facaina lloraini micoriaï jaie ciegafuiaï omoïmo sui raïllano. Jaie cuetimaci:

⁴¹ Ero, Jusiñamui uaina jamaidomoï. Ieri raijicaïdomoï; iadedi faïfidomoï.

Omoï motomo siño mare rafuena birui finodicue.

Bu omoïmo iena iese lloïa, bie rafuena ñnoñeitomoï.

Ie isoi omoïmo suiñellena, Jesúna birui omoï mai ñno.

⁴² Ie mei Pablo llïcaïde. Iaimaïai jino jaidemo, comini iaimaïaimo jïcanotimaci, jiaïe sábadoruïmo bie rafuena naimacïmo dane llollena.

⁴³ Comini jino jaïlla mei, aïlluena comini Pablo, iaimaïai Bernabé diga, ñaïcana jaidimaci. Judúuai iese jaidimaci. Judúuaiñedino iese jiaï jaidimaci. Naïe judúuaiñedinodi judúuai isoi Jusiñamuina ñnotimaci. Pablo, iaimaïai Bernabé diga, ñaïcana jaïllanona, naimacïmo llotïiaïmaïai:

—Jusiñamui omoïna duenaïllana omoï jai uiñua jira, Jesús rafuena mai omoï ñno.

⁴⁴ Jiaïe sábadoruïmo aïlluena comini ofidimaci, Jusiñamui uaina cacareïllena.

⁴⁵ Aïlluena cominina ciuano, judúuai comini dinena eo uradoidimaci. Pablo joreña ñaitimaci. Naimie llofuiacïnuaina uaitatimaci; ⁴⁶ iadedi Pablo, iaimaïai Bernabé diga, jacitaïñeno llofuetïiaïmaïai:

—Omoïmo Jusiñamui uaina nano lloiacadicoco. Iena jitaïñedomoï. Jusiñamui diga omoï jaca illena jitaïñedomoï. Ie jira judúuaiñedino dine jaiticoco. ⁴⁷ Iese Jusiñamui jaie llote:

Judúuaiñedinomo ona oretaiticue, naimacïmo cue rafue llollena,

naga eniruemo ite cominimo jeacinomona jilluana llollena.

⁴⁸ Iena cacajano, judúuaiñedino iobidimaci.

—Jusiñamui rafue mare —raitimaci. Jusiñamui jaca illena fetocano diese Jesúna ñnotimaci. ⁴⁹ Nana bie eniruemo cai Nama Jesús uaina llocana jaide; ⁵⁰ iadedi judíuai dinena diga cominina fuemo faicana uitimaci. Jusiñamuina sedade riñoniaina fuemo faicana uitimaci. Naie riñoniai mameciai are soride. Illaicomini fuemo faicana uitimaci. Ie jira Pablo, iaímaiaí Bernabé diga, duere finodimaci. Naimaci illanomona iaímaiaína jino dotadimaci; ⁵¹ iadedi jioracuai iaímaiaí eillimona jaidinotiaímaiaí, naimacimo ite jeacinuaina naimaci uiñollena. Ie mei Iconio railla nairaímo jaidiaímaiaí; ⁵² iadedi Antioquíamo ite creyentiaí eo iocire itimaci. Jusiñamui Joreño nana naimaci comecimo namatade.

14

Iconiomo Pablo, iaímaiaí Bernabé diga, illa rafue

¹ Iconiomo judíuai ofiracomo, iaímaiaí Antioquíamo jailla isoi, jaidiaímaiaí, Cristo rafuena duere llotiaímaiaí. Ie jira ailluena comini creyentiaína jaidimaci. Judíuai cominimona ailluena ñnotimaci. Judíuaiñede cominimona ailluena jiaí ñnotimaci; ² iadedi ñnoñede judíuaídi judíuaiñedinona fuemo faitimaci. Naimacimo creyentiaína tainona llotimaci; ³ iadedi nainomo are fiebidiaímaiaí. Cai Nama facaisena jaitaiñeno llotiaímaiaí. Cai Nama Jesús iaímaiaína siño rafuena finotate. Ie jira cominidi cai Nama Jesús naimacina dueruillana fididimaci; ⁴ iadedi nana comini naiena ñnoñedimaci. Comeciaína daje isoi lloisíñede. Damierie judíuai facaisena itimaci. Damierie naie iaímaiaí facaisena itimaci. ⁵ Judíuaiñedinodi, judíuai diga, naimaci illaicomini diga, naie iaímaiaína duere finoacadimaci. Noficina iaímaiaína fairigiacadimaci. ⁶ Iena fidiano, Licaoniamote nairaímo aisicano jaidiaímaiaí. Litra railla nairaímo jaidiaímaiaí. Derbe railla nairaímo jiaí jaidiaímaiaí. Naie nairaí ecimo ite eniruemo jiaí jaidiaímaiaí. ⁷ Nainomo Jesús ie mare rafuena llofuetiaímaiaí.

Listramo iaímaiaímo suilla rafue

⁸ Listramo damie tsitaite. Nanomona naimie iese jeicia jira, jaca macariñede. ⁹ Pablo llofuiana naimie raise cacajamona, “Jusiñamui cuena jillotarede” raillanona, tsitaitimie ñnote. Pablo dinena naimiemo eruaillano, naimie ñnuana uiñote. ¹⁰ Naimiemo ado llote:

—A naidada.

Iemei daiacaida naimie macarite. ¹¹ Ailluena comini Pablo finoca rafuena cioidimaci. Naimaci uaido ado cuiriidimaci:

—Ñiaí isoi Jusiñamui cai dine bite.

Naie cominidi Júpiter railla jusiñamuina sedauidimaci. Mercurio railla jusiñamuina jiaí sedauidimaci. ¹² Ie jira Bernabé mamecidi jiaícina jonega Júpiter. Pablo mamecidi jiaícina jonega Mercurio, naimie ñairaímana illa jira. ¹³ Naie nairaí nanoca nase ruica facai Júpiterna sedauilla jofo ite. Iaímaiaína sedallena, safia diga juraretaína abina finoduanona, Júpiter facaina ñairaíma naimacina atide. Ailluena comini diga bite. Juraretaína fallena, “Naie iaímaiaídi cai Jusiñamui” raillano, iaímaiaímo feaacadimaci. ¹⁴ Iaímaiaí iena cianona, “Comini marañede rafuena finoacade” raillano, iaímaiaí iniroina cuaranotiaímaiaí. Comini motomo aisicana jaidiaímaiaí. Ado llotiaímaiaí:

¹⁵ —Nabaiñiaí, ¿bue ñellena cocomo iese finodomoí? Jamai imadicoco. Omoí isoidicoco. Jusiñamuina omoí sedallena, jamai rana omoí sedañellena, mare rafuena omoímo jai lloticoco. Cajede Jusiñamuina sedadicoco. Naimiedi mona finode. Eniruena finode. Monailaina jiaí finode. Nana nainomo ite rana jiaí finode. ¹⁶ Jaie Jusiñamuidi nana omoí judíuaiñedino omoí jitailla

rafuena finuana rairuiñede; ¹⁷ iadedi naimie finoca rafuemona naimiena uiñoredomoi. Omoi facaina mare rafue naimie finocabide. Noci deitate. Omoi riarra sicutate. Omoimo guille itatate. Iemona omoi comeciaina caimare itatate. Iemona Jusiñamuina uiñoredomoi.

¹⁸ Iese Pablo llote; iadedi iaiaimaimo juraretaiaina fecajana jaca fainonocaiacaiñedimaci. ¹⁹ Nano nigaruillamona, Pisidiamo ite Antioquíamona judíuai comini bitimaci. Iconiomona jiai bitimaci. Judíuai dinena fuemo faiamona, naimaci dibeimo comini jaidimaci. Iemona noficido Pablona fairigite. Naie nairaímona naimiena sonocana uitimaci, fiodaitimiena naimie eruaila jira. ²⁰ Naimiena iese fainonocaila mei, creyentiai naimie ecimo billamona, naimie a naidadate. Nai nairaímo abido jaide. Ie are Derbemo, Bernabé diga, jaide. ²¹ Naie nairaímo Jesús ie mare rafuena llotiaimaia. Diga comini creyentiaina jaidimaci. Ie mei Listramo abido jaidiaimaia. Iconiomo abido jiai jaidiaimaia. Pisidiamo ite Antioquíamo jiai abido jaidiaimaia. ²² Creyentiai comeciaina ocuiñotadíaimaia. Cristona nia inuana llotiaimaia. Raitiaimaia:

—Jusiñamui dine cai nia riñenia, eo duere sefuiticai.

²³ Naga creyentiai illanomo creyentiaina sedarainina fetodiaimaia. Guiñeno Jusiñamuimo jia mei, guiñena facaise mei, naimiena naimaci jai inua jira, cai Nama illa anamo naimacina fainonocaidiaimaia.

Siriamonte Antioquíamo abido jaidiaimaia

²⁴ Pisidiamo jaillanona, Panfiliamo ridiaimaia. ²⁵ Pergemo Cristo uaina llua mei, Ataliamo jaidiaimaia. ²⁶ Nainomona botedo Siriamo ite Antioquíamo abido ridiaimaia. Nano naie iaiaimaia illanomo abido ridiaimaia. Nainomona iaiaimaia navui nia jaiñenia, creyentiai dinena Jusiñamui iaiaimaia duenaillana uiñuamona, iaiaimaia oredimaci. Jusiñamui rafuena iaiaimaia lollena, iaiaimaia oredimaci. Naie maijia fuilla jira, jai abido bitiaimaia. ²⁷ Iaiaimaia rilla mei, creyentiaina ofitatiaimaia. Nana Jusiñamui iaiaimaimo finoca rafuena llotiaimaia.

—Jusiñamuidi judíuaiñedino naimiena inuana jai jitaide —llochiaimaia.

²⁸ Dinomo creyentiai diga are itiaimaia.

15

Jerusalémo Moisés micori llogacina siadua rafue

¹ Antioquíamo Jerusalémona janore comini billano, creyentiaina iese llofuetimaci:

—Moisés micori caimo llua isoi, omoi abina omoi detatañenia, jeacinomona jillobiñeitomoi.

² Ie jira creyentiai uri iñedimaci. Pablo, iaiaimaia Bernabé diga, Jerusalémona bitino llofuiana eo uaitatiaimaia. Ie muidona creyentiai dinena iaiaimaia, jiaie creyentiai diga, Jerusalémo jaillena fetodimaci. Cristo oretagano diga, Jerusalémo ite creyentiaina sedaraini diga, bie rafuena siadoiacasite. ³ Creyentiai naimacina oretaja mei, Fenicia railla enirue dibeido jaidimaci. Ie mei Samaria railla enirue dibeido jiai jaidimaci. Creyentiai illanuaímo llofuecana jaidimaci. Judíuaiñedino creyentiaina jai jaillana naimacimo jiai llotimaci. Ie jira naie creyentiai caimare itimaci.

⁴ Jerusalémo ria, creyentiaidi naimacina feiñotimaci. Cristo oretagano itimaci. Creyentiaina sedaraini jiai itimaci. Naimacimo nana Jusiñamui iaiaimaimo finoca rafuena llotiaimaia. Cristo rafuena iaiaimaia llofuamona, judíuaiñedino Cristona inuana llotiaimaia. ⁵ Iena cacajano, fariseuai dibeimo ite creyentiaimona jiaino naidaita raitimaci:

—Moisés micori llogacinuaina #nuamona, judíuaiñede creyentiai abina diana jitaidicai.

⁶ Bie rafuena siadollena, Cristo oretaganodi, creyentiai sedaraini diga, danomo ofidimaci. ⁷ Iena are siadua mei, Pedro naidacaillano, raite:

—Amatiai, judíuaiñedinodi cuemona Jesús ie mare rafuena cacaillena, jaie omoimona Jusiñamui cuena fetode. Iena uiñotomoi. Cue llofuiamona #notimaci. ⁸ Nana comini comeciaina naimie uiñuamona, judíuaiñedino naimiena #nuana Jusiñamuidi uiñote. Cai mo fecaja isoi, ie Joreño naimacimo fecaja jira, Jusiñamuidi judíuaiñedinona jitaillana jai uiñotocai. ⁹ Jusiñamuidi naimacina cai isoi jai feiñote. Naimiena naimaci #nua jira, naimie naimaci comeciaimona jeacinona jai dotade. ¹⁰ ¿Bue ñellena Jusiñamuina #noiacaiñedomoi? Jusiñamui jitaillacino omoi finoacaiñena jira, naimie omoina duere finuana jitaidomoi. Cai jaiagai Moisés micori llogacinodo jaidimaci; iadedi iena raise #noñedimaci. Nana ie llogacinona jaca finonidimaci. Iedo jaie jiai jaidicai; iadedi iena jiai finonidicai. ¿Bue ñellena iedo birui cai jaillana jitaidomoi? ¹¹ Jesucristo caina duenailla jira, cai jeacinomona jilloiticai. Judíuaiñedino cai isoi jilloitimaci.

¹² Iena cacajano, nana ofidino uai llicaidimaci. Iemei Bernabé lluaana cacadimaci. Pablo lluaana jiai cacadimaci.

—Jusiñamui judíuaiñedino motomo cocona siño rafuena finotate — llotiaimaiai.

¹³ Iaimaiai ñaia mei, Jacobo raite:

¹⁴ —Amatiai, cuemo cacarei. Judíuaiñedinomo Jesús rafue Simón Pedro nano llua rafuena jai cacadica. Creyentiaina naimaci jaillena, Jusiñamui naimacina jai fetode. ¹⁵ Jusiñamui facaina lloraini micoriai iena jaie cuetimaci:

¹⁶⁻¹⁸ Jusiñamui jaie llote: “David micori illaima isoi illaimana illena, cue Jitona ico oretaiticue.

David jicori jito illaimana birui iñede;

iadedi David micori ifomo illaimana cue Jito iite.

Iemona judíuaiñedino cuena #noitimaci.

Naimaci cue cominina jaillena jiai jitaidicue.

Iena cue llua jira, iena finoiticue” llote.

¹⁹ Ie muidona cue comeci raite: Judíuaiñedinomona creyentiaina jaidinona duere finoñeiticai. ²⁰ Naimacimo rabena oreta, dama buena llollena: “Jiraraimo fecaca llicisina riñeno. O aiñede riño diga iñeno. O iniñede ima diga iñeno. Llerinoga rana riñeno. Diruena jiai riñeno”. ²¹ Jaiemona naga sábado naga judíuai ofiracomo judíuidi Moisés micori cufuafuaimona naie isoide lletarafuena cacadimaci. Ie jira naie isoide rafuedo nia jaiticai: iadedi jiaie Moisés micori lletarafuedo jaiñeiticai.

²² Ie mei Cristo oretaganodi, creyentiaina sedaraini diga, comeciaina facadimaci, naimacimona cominina fetollena, Antioquíamo oretallena. Nana creyentiai comeciaina facajano: “Jee” raitimaci. Pablo, iaimaiai Bernabé diga, naimacina oretaiacadimaci. Judana fetodimaci. Naimie mameci jiaicidi Barsabás. Silana jiai fetodimaci. Jiaie comini baifemo rafuena baitadiiaimaiai. ²³ Rabena cuetimaci, iaimaiai diga oretallena. Iese raillano, cuetimaci:

“Antioquíamo itino, Siriamo itino, Ciliciamo itino, omoimo cueticai. Jerusalémo iticai. Cristo oretaganodicai. Creyentiaina sedarainidicai. Omoidi cai amatiai. Omoimo jai cueticai. Judíuaiñedimoi; iadedi cai amatiaidomoi.

²⁴ Cai motomona jiaie comini naimaci llofuiado omoina uri itatañenana fididicai. Omoi jeacinomona omoi jilloillena, Moisés micori llogacinodo

omoi jaillana jitaídmaci. Ie jirari omoi comeciái rucaicuerite. Naimacina oretañedícaí. ²⁵ Danomo caí ofilla mei, menamiéna fetodícaí, omoímo oretallena, Bernabé, iaímaiaí Pablo díga. Bernabéna isiruitícaí. Pablona jiaí isiruitícaí. ²⁶ Iaímaiaí caí Nama Jesucristo muidona navui niadedí fio-daitíiaímaiaí. ²⁷ Ie jira Judas, iaímaiaí Silas díga, oretaitícaí. Omoímo bie rabe cuia isoi lloítíiaímaiaí. ²⁸ Jusiñamui Joreño caímo illamona, bie rafuena omoímo lloítícaí. Ailluena rafue omoi finuana lloñeítícaí. Dani bie rafuena fínojitomoi. ²⁹ Jiraraímo fecaca rana riñeno. Diruena riñeno. Llerínoga rana riñeno. O añede riño díga iñeno. O iniñede íima díga iñeno. Iese omoi iñenia, marena íitomoi. Macaíbaite” cuetímaci.

³⁰ Ie mei Antioquíamo jaidímaci. Ailluena comínina ofitaja mei, naimacímo cartana fecadímaci. ³¹ Iena facajano, naie llucínori iobidímaci. ³² Judas Jusiñamui facaina lloraíma. Silas daje isoide. Díga rafuena creyentíamó llofuetíiaímaiaí. Naimací comeciána jiaí ocuiñotadíiaímaiaí. ³³ Díga irui nainomo illa mei, iaímaiaína oretatínomó creyentíai íaímaiaína marena abído oretatímaci.

³⁴ Nainomó Silas comecína facajano, fiebide. Ie jira Judas dama abído jaide. ³⁵ Antioquíamo Pablo, iaímaiaí Bernabé díga, caí Nama Jesús rafuena llofuellena fiebidíiaímaiaí. Díga comíní jiaí iese llofuetímaci.

Pablo jiaíe eníruemo ite creyentíai díne dane jailla rafue

³⁶ Díga irui illa mei, Pablo Bernabémo llote: p —Naga navui coco llua nairaímo creyentíai díne abído maí coco jai. Caí Nama íe mare rafuena dane lloítícoco. Nie isoi naimací illana jíbuitícoco.

³⁷ Bernabédí, naie íaímaiaí díga, Juan Marcos uiacade. ³⁸ Panfiliamo íaímaiaína navui Juan faínonocade. Íaímaiaí díga llofuellena jaiñena jira, Pablo naimiéna dane uiacañede. ³⁹ Riire ñaitíiaímaiaí. Comecína daje isoi lloíñediíiaímaiaí. Ie jira dajena jaiñediíiaímaiaí. Bernabé Juan Marcona uillanona, Chipremo aillue botedo jaidíiaímaiaí. ⁴⁰ Ie mei Pablo Silana uite. “Jusiñamui omícona canoite” creyentíai dínena raíllanona, íaímaiaína oredímaci. ⁴¹ Siria railla eníruemo Jesús rafuena llocana jaidíiaímaiaí. Cilicia railla eníruemo jiaí llocana jaidíiaímaiaí. Creyentíai comeciána ocuiñotacana jaidíiaímaiaí.

16

Timoteo íaímaiaí díga jailla rafue

¹ Nano Derbemo Pablo, íaímaiaí Silas díga, ridíiaímaiaí. Iemona Listramo ridíiaímaiaí. Nainomó Timoteo railla creyente íte. Naimíe eídí judía íñaiño. Jiaí creyente. Ie moo mícórídí griego ímie. ² Listramo íte creyentíai, Iconiomó íte creyentíai díga, naimiéna: “Mare” raitímaci. ³ Pablodí Timoteona uiacade, naimíe díga jaillena. Timoteo moo mícórí griego ímieña jira, naimíe abína nía detatañede; íadedí nainomó íte judíuaí illa jira, Moisés mícórí llua isoi, Pablo Timoteo íe abína dete. Judíuñedímíe naimací motomó ía, naimací motomó ínide. ⁴ Naga nairaímo naimací jaíllanona, Jerusalémo siadogacínona creyentíamó llote. Jerusalémo Cristo oretagano, creyentíána sedaríní díga, navui naicínona siadotímaci. Creyentíai naie lluaña íñollena, íena llocana jaidímaci. ⁵ Ie jira creyentíai íñocana jaidímaci. Nagaruí ailluena comíní creyentíána jaidímaci.

Pablo nícaírilla ra isoídena cíua rafue

⁶ Jusiñamui Joreño Asia railla eníruemo íe uaina naimací llofuiana rairuilla jira, Frigia railla eníruemo macaricana jaidímaci. Iemona Galaciamó jaidímaci. ⁷ Misiamó naimací rillano, Bitiniamó jaiacade; íadedí Jesús Joreño

dane imaci jaillana rairuide. ⁸ Ie jira Misiamaona ecido jaillano, Troas railla nairaimo jaidimaci. ⁹ Nainomo naie naiona Pablo nicairilla ra isoidena cide. Daje Macedonia imiedi uicomo naidaita naimiemo jica-jicanode. Raite: “Macedoniamu ruica o bi. Caina canuaibi”. ¹⁰ Naiena Pablo cúa mei, naie facaisemona Pablo diga jaidicue. Lucadicue. Ie jira bie rafuena raise uifoticue, iena omo cuellena. Macedoniamu ruica dine cai jaille botena jenodicai. Comecina facadica: “Jusiñamuidi caina uaidote, nainomo ie mare rafuena cai lollena”.

Filipomo illa rafue

¹¹ Ie jira Troamaona Samotraciamu monaillaido atona ie mamedo jaidicai. Ie icoitidiruido Neápolis railla nairaimo ridicai. ¹² Dinomona Filipomu duide naisodo jaidicai. Macedoniamu ite. Naie enirue facaise ie nanoca nairai Filipos. Naie nairaidi Romamaona bitino nairai. Diga irui nainomo iticai. ¹³ Sábadoruido naie nairaimona nasedo jino jaidicai. Comecina facajamona: “Dinomu nibai comini oficabidimaci, Jusiñamuimo jillena”, ille fuemo jaidicai. Nainomu dañaiñorie riñoniai billanona, dinomu ana raidicai, naiñaiñuaimo Cristo rafuena lollena. ¹⁴ Naimacimona dañaiño cai llofuiana eo cacade. Naiñaiño mamecidi Lidia. Tiatira railla nairai iñaiño. Naiñaiñodi jiduirede iniruena fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comeci naie llua feiñotade. Naie facaise creyentena jaide. ¹⁵ Naiñaiño ie jofomo itino diga bautizaja mei, caimo llote:

—Cuedi cai Namana cue jai inuana omoi uifua, cue jofomo mai bi, nainomo omoi fiebillesa. —Duere caina uai-uaidode.

¹⁶ Jusiñamuimo jiranomu jairuido jaidicaimo, daje jitañomomo dafafidicai. Naiñaiñodi jainomona ibacañaiño. Janaba anamo naiñaiño jai ite. Iemona naiñaiño jairuido suille rafuena llouide. Naie rafuena llua ibatajano, naiñaiño namaiaidi ailluena ucubena feiñoudimaci. ¹⁷ Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jilluana omoimo llocabitimaci.

¹⁸ Diga irui naiñaiñodi iese cuiri-cuirisoide. Icirillamona, Pablo abido dobaidacaida, naiñaiñomomo ite Janabamo llote:

—Cue Nama Jesucristo uaido naiñaiñomona oni jai. —Iemona oni jaide.

¹⁹ Naiñaiño llua mona ucubena jai oñenana naiñaiño namaiai jai uifua jira, Pablo, iaiaiai Silas diga, gaitadimaci. Iaiaiaia plazamo illacomini illanomo sonocana uitimaci. ²⁰ Dinomu iaiaiaia illacomini dine atidimaci. Iese iaiaiaia llogidotimaci:

—Naie iaiaiaiaidi cai nairaina uri itatañediaiaiaia. Iaiaiaiaia judíuai comini.

²¹ Romanuai cominina cai illa jira, iaiaiaia llogacinuaina cai inoia, iedo cai jai, marañede.

²² Iena cacajano, nana comini naie iaiaiaia fanaisitimaci. Illacominidi naie iaiaiaia iniroina cuaranuanona duiñode. Rasi diga, iaiaiaia diga icaiño fatatatimaci. ²³ Iaiaiaia eo faja mei, cárcelmo jonetimaci. Cárcelna sedaraimamo iaiaiaia raise sedallena llotimaci. ²⁴ Iese llua jira, iaiaiaia llaveracomomo fo iaiaiaia uite. Donoramomo iaiaiaia eilliaia ñuitajano, raise donode.

²⁵ Naiona daferui facai Pablo, iaiaiaia Silas diga, Jusiñamuimo ifuerillacinona ro-rodiaiaiaia. Jai jidiaiaiaia. Jai llavecana naiona cacadimaci. ²⁶ Jamai ebena illacinomona ñuisañodi suide. Cárcel illanodi jaidisite. Naie facaiseconi nana nasiaidi ecocorinaite. Ie dacaiño nana llavecana imaci donua radi oni ecoride. ²⁷ Cárcelna sedaraima casidemo, cárcel ie nasiaia ecocorinaillana cide. “Llavecana jai aisidimaci” raillamo

naimie comecina facade. Ie jira ie lloesi aiñoicaida, dama abi faitaacade. “Illaicomini bia, ¿bue lloiticue?” raillamona comecina facade; ²⁸ iadedi Pablodi eo riire cuiριοide:

—¡O abina dama meineño! Bene nana iticaisa.

²⁹ Lamparina atillena cárcelna sedaraima jicajanona, jarire fo jaide, Pablo iaimaiai Silas dine. Jacinaillano, naimie abidi docaillamona, iaimaiai uicomo caiñici ifodo ana rainadate. ³⁰ Iaimaiaina jino ua mei, nai iaimaiaimo jicanote:

—¿Buena finojiticue, cue jeacinomona cue jilloillena?

³¹ Uai otiaimaiai:

—Coco Nama Jesúna ñno. Iese na o jofomo ite comini diga o jilloillesa.

³² Iemei naimiena Jesús ie rafuena llofuetiaimaiai, nana ie jofomo itino diga. ³³ Naie facaise iaimaiai bofellaña jocode. Iemei naimiedi, nana ie comini diga, bautizaga. ³⁴ Guillena, ie jofomo naie iaimaiaina uite. Jusiñamuina jai ñnua jira, na ie comini diga, naimie caimare ite.

³⁵ Ie oni monaidemo, illaicominidi dajerie policiana cárcelmo oretatimaci, nai iaimaiaina jino orellena. ³⁶ Cárcel sedaraimadi naie rafuena Pablomo llote. Raite:

—Omico jaillena, illaicominidi omicono oredimaci. Mai marena jai.

³⁷ Iadedi policiaimo Pablodi llote:

—Cocodi romanuai cominidicoco; iadedi cocomo ite rafuena raise uiñoño cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeticoco. Naimacimo llono: “Cocona jino ollena bi”.

³⁸ Illaicominimo policias naiena lluaibitemo, illaicominidi naiena cacajanona, eo jacinaite, romanuai cominina iaimaiaina jira. Cai nanoca illaicominidi romanuai nairai cominina jamai ebena duere finuana rairuidimaci. ³⁹ Ie jira naie iaimaiai dine illaicominidi jaidimaci, iaimaiaina: “Dama dino iesede” raillena. Jino atia mei, nairaimona jino iaimaiai jaillena oredimaci. ⁴⁰ Cárcelmona jino billano, Lidia jofomo fo jaidiaimaiai. Creyentiaina ciuano, naimaci comeciaina ocuiñotallena, naimacina dane llofuetiaimaiai. Ie mei oni jaidiaimaiai.

17

Pablo, iaimaiai Silas diga, Tesalónicamo illa rafue

¹ Anfípolis railla nairaimo macaritiaimaiai. Apolonia railla nairaimo macaritiaimaiai. Ie mei Tesalónica railla nairaimo ridiaimaiai. Dinomo judíuai ofiracodi ite. ² Pablo fibilla isoi, nainomo fo jaide. Daje amani sábadoruimo Jusiñamuina ciegafuiaimona naimacina llofuate. ³ Iese naimacina llofuate:

—Cristo legi cacajte. Fiodaillamona naimie jilloite. Naimiedi Jesús.

⁴ Naiena cacadinomona ailluena ñnotimaci. Pablo, Silas iaimaiai dibeimo jaidimaci. Jusiñamuina ñnote grieguaimona ailluena comini creyentiaina jaidimaci. Ie emodoconi ailluena nanocañaiñuaidi creyentiaina jai jaidimaci; ⁵ iadedi judíuaidi uradoillano, jamai itinomona eo marañede iñiaina uaiduanona, ailluena cominina ofitatimaci. Ie jira naie nairai uri iñedimaci. Iaimaiaina comini uicomo uillena, Jasón jofomo binaisite. ⁶ Iaimaiaina baiñenano, Jesóna, jiaie creyentia diga, illaicomini illanomo aiñoicaida uitimaci. Cuirisite:

—Naga nairaimo cominina uri itatañediaimaiai. Benomo jai bitiaimaiai. Jai benomo billanona, Jasón ie jofomo iaimaiaina feiñote. ⁷ Cai nanoca illaima

ie llogacinona jai ñnoñedimaci. Ie anamo jai iacaiñedimaci. Raitimaci: “Jiaie illaïma anamo iticai. Jesús raillamie anamo iticai”.

⁸ Judíuai iese llumona, cominidi uri iñedimaci. Illaicominidi jiai uri iñedimaci. ⁹ “Naie iaimaiai dane biñeitiaïmaiai” illaicominimo creyentiai raillano, illaicominidi Jasón jiaie creyentiai diga, jino oretatimaci.

Bereamo Pablo, iaïmaiai Silas diga, illa rafue

¹⁰ Naie naio creyentiaidi Pablona, iaïmaiai Silas diga, Bereamo raire oretatimaci. Dinomo rillano, judíuai ofiracomo jaidiaïmaiai. ¹¹ Nainomo ite judíuai eo mare. Tesalónicamo ite judíuai isoñedimaci. Bereamo itinodi Cristo rafuena iocire feñotimaci. Niedi uanaicinoni raillanona, nagarui Jusiñamuina cuegafuina facadimaci. ¹² Ie jira naimacimona ailluena ñnotimaci. Judíuaiñedinomona ailluena nanocañaiñuiai ñnotimaci. Ailluena iñiaiai jiai ñnotimaci; ¹³ iadedi Bereamo Pablo Jusiñamui ie uaina jai llumona Tesalónicamo ite judíuaidi fidiano, dinomo jaidimaci. Cominina fuemo faillena, jaidimaci. ¹⁴ Naie facaise creyentiaidi Pablona oni oretatimaci. Monailai fuemo duide naisona oretatimaci. Silas, iaïmaiai Timoteo diga, fiebidiaïmaiai. ¹⁵ Pablo uigamací naimie diga Atenamo jaidimaci. Dane abido Bereamo jaidimacimo, naimacimo Pablo llote:

—“Silas, iaïmaiai Timoteo diga, raire cue dine billesa” llono.

Atenamo Pablo illa rafue

¹⁶ Atenamo iaïmaiai rillena Pablo sedademo, naie nairaimo ailluena jiraraïna cide. Iena ciuanona, Pablo comecidi jeareficaide. ¹⁷ Naiena ciua mei, judíuai ofiracomo judíuai diga coniniri Jusiñamui rafuena siadote. Jusiñamuina jai ñnote judíuaiñedino diga coniniri iena jiai siadote. Plazamo nagarui jamai itino diga coniniri iena jiai siadote. ¹⁸ Jamai comecina facadinomona damierie naimie diga jiai ñaitimaci. Epicúreo railla rafuedo jaisoidimaci. Estoico railla rafuedo jiai jaisoidimaci. Damierie naimacimona raitimaci:

—¿Buena nai ñaïllareuidimie caïmo lloiacade?

Jiaïno raite:

—Jiaie nairai jusiñamuillaicaïmo lloiacade isoide.

Jesús fiodaillamona jilluana Pablodi llouilla jira, iese raitimaci. ¹⁹ Ie jira naimiena naimaci siadouillanomo uitimaci. Naie illano Areópagona mameciredede. Jicanotimaci:

—¿Nie isoide o comocinuai? Caïmo llono, cai uiñollena. ²⁰ Eo feiredicinuaina cacadicaï. ¿Buena nai llofuiaicnodi llote? Iena uiñoiacadicaï.

²¹ Nana Atenamo ite comini, jiaie illanomona bitino diga, jamai ailli como imaci fidi rafuena ñai-ñaidimaci. Jamai ailli fidi rafuena caca-cacadimaci. Jiaie rafuena finoñedimaci.

²² Jicanua mei, Areópago railla illanomo Pablo naidacaida llote:

—Atenas imaci, omoïmo rafuena lloiacadicue. Omoï jusiñamuillaïna eo sedacabidomoï. ²³ Cue macarillamona, omoï jusiñamuillaïna sedaja jiraraïna ciodicue. Daje jiraraï abïmo iese cuega: “Uiñoñega Jusiñamuina sedadicaï” cuega. Uiñoñeno naimiena sedadomoï. Ja omoïmo naimiena lloiticue. ²⁴ Jusiñamui biniena jai finode. Ie emodoconi Jusiñamuidi nana binïemo itinona jiai finode. Naimiedi mona ie Nama. Enirue ie Nama. Ie jira ñima finoca jofomo naimie iñede. ²⁵ Naga jitaille rana naimïemo illa jira, naimiena canonicadicaï. Naimie nana cominina comuitate. Jiai nagarui jafaici cai uadi caïmo iga. Uanaï nana rana caïmo iga. ²⁶ Damiedemona nana cominina jebuitate, nana eniruemo naimaci illena. Naimaci illa ñinori naimie jonega.

Naimaci illanomo naimie jiai jonega. ²⁷ Iese jonega, naimaci naimiena jenollena. Jenuano, nibai naimiena baitimaci. Caimona naimie are iñede. ²⁸ Naimie jaca illa jira, cai jiai iticai. Jiai cajedica. Ie isoi omoi rafue lloraini jiai llotimaci: “Naimie ie uruiaidica”.

²⁹ Naimie caina comuitaja jira, Jusiñamuidi jirarai isoiñedena uiñotica. Jusiñamuidi oromona finoca ra isoiñede. Platamona finoca ra isoiñede. Noficimona finoca ra isoiñede. Ima ie onolli diga finoca ra isoiñede. ³⁰ Cominidi abi uiñoño jeacino jaie finouidimaci. Jusiñamui naimacina nia janafeñede; iadedi jai birui Jusiñamuidi nana cominina naga illanomo naimaci comeciai iuai meidollena jitaide. ³¹ Naimaci comeciai iuai naimaci meidoñena, naimie jai lloga facaise, naimacina duere finoite. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finoite. Fiodaillamona Jesúsna naimie jai jilloitaja jira, iena uiñotica.

³² Fiodaillamona Jesús jilluana cacajano, damierie jaisitimaci. Iecon jiaiodi raite:

—Jiairuido o lluana dane cacajitica.

³³ Iemei naimaci motomona Pablo jino jaide. ³⁴ Naie cominimona damierie naimie dibeimo jaidimaci. Inotimaci. Naimacimona damie Areópagomo siadouidimie. Ie mamecidi Dionisio. Jiaiñaiño inote. Naiñaiño mamecidi Dámaris. Daje facaiseconi jiaie cominidi inotimaci.

18

Corintomo Pablo illa rafue

¹ Atenamona Corinto railla nairaimo Pablodi jaide. ² Nainomo Aquila railamiena baisaide. Naimiedi judío imie. Ponto railla eniruedi naimie comuillano. Ie ai mamecidi Priscila. Naiñaiño diga Romamona como bitiaimaia. Romamona Claudio nana judíuai cominina jai oretate. Ie jirari bitiaimaia. Roma ie nanoca illaimadi Claudio. ³ Pablo iaimaia daje isoi maijia jira, Pablo iaimaia jofomo fiebide. Iaimaia conima diga maijide. Chivos itiraia ie nilla iniroina tiforisoidimaci, naiemona jofona finollena. ⁴ Naga sábadoruimo judíuai ofiracomo llofuede, judíuaina inotallena, judíuaiñedinona iena jiai inotallena. ⁵ Macedoniamona Silas, iaimaia Timoteo diga, bitemo, Pablodi nagarui Jusiñamui uaina llofueuide. Judíuaimo: “Jesúdi cai Jilloitaraima” llouide; ⁶ ia naimie uaina inosiñedimaci. Jiai naimie jinafomo jeare ñaitimaci. Naimaci comeciai jeare cúa jira, Pablo ie iniroina jaidinote, naimacina raillano:

—Dani omoi muidona Jusiñamui omoina duere finojite. Cue muidonañeite. Jai judíuaiñedino dine jaiticue, naimacina cue llofuellena.

⁷ Iese raillano, oni jaide. Justo jofomo jaide. Naimiedi Jusiñamuina inouidimie. Ie jofo judíuai ofiraco ecimo ite. ⁸ Crispodi, nana ie jofomo itino diga, cai Nama Cristona inote. Naimiedi judíuai ofiraco ie sedaraima. Ailluena Corintomo ite comini creyentiaina jaidimaci. Ie mei naimacidi bautizaga. ⁹ Daje naiona Pablo nicairilla isoidemona, Pablomo cai Nama Jesucristodi llote:

—Mai jaciruiño. Faicaiño cue rafuena llocana jai. ¹⁰ O diga iiticue. Budi ona maraiño finoñeite. Bie nairaimo ailluena cominidi cue dibeimo jaitimaci.

¹¹ Ie jira daje año ie emodo seis fivui dinomo Pablodi fiebide, naimacimo Jusiñamui uaina llofuellena.

¹² Corinto railla nairaidi Acaya railla eniruemo jainaiide. Naie facaise Acaya ie gobernordi Galión. Naie facaiseconi damierie judíuai comini Pablona faiacadimaci. Galión dine naimiena uitimaci. ¹³ Raitimaci:

—Cai illaíma llogacino isoi bimiedi cominina Jusiñamuina sedallena llofueñede.

¹⁴ Pablo uai oiacademo, judíuaimo Galióndi llote:

—Judíuai, cacarei. Naimie marañede rafuena finodena, naimie omoína jifuetena, omoi llamo nia cacarefidicue; ¹⁵ iadedi jamai naimie uaillai cuemo llotomoi. Omoi usumatiai micoriai mameciai cuemo jiai llotomoi. Omoi einamací llogacinuaina cuemo jiai llotomoi. Iena omoi coniniri siadotomoi. Bie isoide rafuena siadoiacañedicue.

¹⁶ Iemona naimiedi nainomona naimacina oni orede. ¹⁷ Ie mei Sóstenena gaitadimaci. Sóstenes ofiraco ie sedaraíma. Naimiena gobernador uicomo fanaisite; ia naifuenta Galión niese nibañede.

Antioquíamo Pablo abido jailla rafue

¹⁸ Naifue suilla mei, nainomo Pablo are fiebide. Ie mei creyentiaína facaduano, Priscila iaímaiai Aquila diga, Siria railla eniruemo botedo jaide. Ie uai raise finuana uiñollena, Moisés micori llua isoi, Cencreamo rillano, ie ifogina rijiruda garetate. ¹⁹ Efesomo rillanona, iaímaiaína fainonocaide. Judíuai comini Jusiñamui rafuena siadollena, Pablodi judíuai ofiracomo fo jaide. ²⁰ Are naimaci motomo fiebillena naimiemo jicannotimaci; iadedi Pablo dinena uai ote:

—Fiebiñeiticue— ²¹ Naimacina facaduano, llote—. Jerusalémo jaiticue; iadedi Jusiñamui jitaia, dane omoi dine abido riiticue. —Iemei Efesomona jaide. ²² Cesareamo sijiano, Jerusalémo macarite. Creyentiaí dine jaide. Ie mei Antioquíamo jiai macarite.

²³ Nainomo are fiebilla mei, Pablo dane jaide. Galaciamo macarite. Ie mei Frigiamo macarite. Nana creyentiaí imaci comeciaina ocuiñotacana jaide.

Apolos illa rafue

²⁴ Ie facaise Efesomo Apolos raillamie Alejandría railla nairaimona ride. Judío imie. Naimie eo raise llofueuidimie. Naimiedi Jusiñamui facaina lloraini micoriai ciegafuiaí raise uiñote. ²⁵ Naimiedi Jesús ie rafuena navui jai cacade. Ie comecimona iena eo llote. Jesús rafuena raise llofuate; iadedi naimie dama Juan micori ie bautizajana uiñote. Nana Jesús finoca rafuena nia uiñoñede. Jusiñamui Joreño feiñuana jiai uiñoñede. ²⁶ Judíuai ofiracomo naimie llofuia, jaitañeno llofuate. Priscila, iaímaiai Aquila diga, naimana cacadiáímaiai. Ie jira naimiena oni eneno uitiaímaiai. Ie uiñoñega rafuena eo raise naimiena llofuetiaímaiai. ²⁷ Acayamo Apolodi jaiacana jira, creyentiaídi naimie comecina ocuiñotajano, naimiena oresite. Acayamo ite creyentiaímo rabemo cuetimaci. Jusiñamui naimacina dueruilla jira, creyentiaína jai jaidimaci. Naimiena marena feiñollena iese cuetimaci. Nainomo naimie rillanona, creyentiaína eo canode. ²⁸ Judíuai diga marefodo jiai eo ñaite. Iemona naimaci uai ollinodi iñede. Naimiedi Jusiñamui ciegafuiaímona Jesúsdi cai jilloitaraimana llofuate.

19

Efesomo Pablo illa rafue

¹ Corintomo Apolo nia itemo, nairaiái onifedo joide naído jailla mei, Pablo Efesomo ride. Dinomo rillanona, creyentiaína baite. ² Naimacimo jicannote:

—¿Cristona omoi ñnuaruimo Jusiñamui Joreña feiñotomoi?

Uai otimaci:

—Jusiñamui Joreñoña nia jaca cacaiñedicai.

³ Dane jicanote:

—¿Nie isoi omoi bautizagaomoi?

Uai otimaci:

—Juan micori lloga rafue facaina bautizagacai.

⁴ Pablo uai ote:

—Mare. Juan lote: “Omoi comeciái iuaina meido. Iemei bautizallomoi”. Ie ifo meidoitimiena comini ñnollena llote. Jesúsna ñnollena llote. Jesús rafuena omoimo raise lloiticue.

⁵ Iena cacajano, cai Nama Jesús dibeido bautizadimaci. ⁶ Naimacimo Pablo ie onollina joniamona, Jusiñamui Joreñoña feiñotimaci. Ie mei naimaci uiñoñega nairai uaido ñaitimaci. Jusiñamui Joreño naimacimo llua rafuena jiai llotimaci. ⁷ Nibai nana naimacidi doce iñiaí.

⁸ Sábadoruimo judíuai ofiracomo fo jaillano, naimie anamo naimaci illana Jusiñamui jitailla jira, Jusiñamui dibeimo naimaci comeciái iuaina meid-uana Pablodi jacitaiñoño eo llouide. Nainomo daje amani fivui fiebide.

⁹ Naimacimona jiaínodi Pablo uaina uaitatimaci. Jiai ñnoiacañedicimaci. Naimaci ñnoñena ira, ofiracomo bitinomo: “Cristo rafuedi maraiñede” llouidimaci. Ie jira Pablodi creyentiaí diga naimacimona eneno oni jaide. Tiranno ie lloracomo nagarui Pablodi llofueuide. ¹⁰ Mena fiemona iese llofueuide. Ie jira diga Asia railla eniruemo ite cominidi cai Nama ie uaina cacadimaci. Judíuai cacadimaci. Judíuaiñedino jiai cacadimaci.

¹¹ Jusiñamuidi Pablona siño rafuena finotate. ¹² Duidinomo cominidi naimie jetaca pañueluaina uitimaci. Duidinomo naimie jetaca iniroina jiai uitimaci. Naiena jetajamona, duidinodi jillodimaci. Janaba anamo itinodi jiai jillodimaci. ¹³ Naie facaise jamai macarisoidino ridimaci. Judíuai imaci. Naimacidi icoriraini. Jesús mameci llinuano, jananiai anamo itinomona jananiaina oni oretaiacadimaci. Jananiaimo raitimaci:

—Pablo llua isoi, Jesús muidona bimacimona oni jai.

¹⁴ Esceva ie siete jitotiaídi iese finoacadimaci. Escevaí Jusiñamui diga ñairaima. ¹⁵ Janabana oni oretaiacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omoína uiñoñedicue.

¹⁶ Ieconí Janaba anamo itimie naimaci emodomo daiacaide. Riire nana naimacina emodoficaide. Ie jira naie jofomona taímiaína jino aisidimaci. Naimacidi bofellaíai diga jino aisidimaci.

¹⁷ Nana Efesomo itino iena fididimaci. Judíuai, judíuaiñedino diga, naifuena fididimaci. Naifuena fidianona, eo jacinaitimaci. Iemona cai Nama Jesús mamecidi are soride. Comini dinena: “Jesús uai eo siño” raitimaci.

¹⁸ Ie jira ailluena creyentiaídi billano, imaci navui maraiñede finoca rafuena Jusiñamuimo llotimaci. Icorilla rafuena finouidimaci. Iena marefodo llotimaci. ¹⁹ Ailluena icorilla rafuiaí illabiaí atianona, marefodo jobaidimaci. Niga raifi rabiaí jobaillana facadimaci. Cincuenta mil ucube diese facai rabiaína jobaidimaci. ²⁰ Cai Nama Jesús uaina eo llocana jaide. Cominidi naie uai siñonana uiñotimaci.

²¹ Naie rafue illa mei, Pablodi comecina facajano raite: “Macedoniamos cue macarillamona, Acayamos cue jiai macarillamona, Jerusalémo riacadicue”. Ie emodoconi naimiedi raite: “Nainomona Romamos jiai jaiacadícue”. ²² Naimie nia Asiamos nano nigarui illanona, mena canoraímana Macedoniamos oretate. Timoteona, iaímaíai Erasto diga, oretate.

Efesomos ite comini maraiñede rafue finoacadimaci

²³ Naie facaiseconí Pablo nia oni jaiñenia, Jesucristo rafue muidona Efesomos ite cominidi maraiñede rafuena comuitatimaci. ²⁴ Demetrio raillamie

platamona diga rana finouide. Naimiedi Diana ie jofu joreñuaina finouide. Naimie anamo ailluena maijuidimaci. Dianadi naimaci jusiñamui. ²⁵ Naimie isoi maijuidinona Demetrio uaidote, nana naimaci danomo ofillena. Ie mei raite:

—Jai danomo ofidicai. Bie maijiamona cai ucubena uana raise uiñotomoi; ²⁶ iadedi Pablo raillamiedi diga cominina jai llofuate: “Comini finoca raniadi jusiñamuillaiñede”. Naie llofuiamona ailluena comini naimie dibeimo jaidimaci. Dama Efesomo iese suiñede; iadedi ua nana Asiamo iese suide. ²⁷ Ie jira abina rairuiacadica, cai maijille faifi raillano, comini Diana jofona jiai sofei raillanona. Cominidi naiñaiñona ebiruillana feittaitimaci. Naiñaiñori rajicaiñeitimaci. Dianadi eo ebirede jusiñamui. Nana Asiamo ite comini naiñaiñona sedacabidimaci. Uanai nana bie eniruemo ite nairaidi naiñaiñona sedacabidimaci. Ie jira abina rairuiacadica.

²⁸ Iena cacajano, eo iciritimaci. Raire cuiroidimaci:

—¡Efeso ie Diana eo ebirede!

²⁹ Danirie siaduamona, nana comini eo failliñaidimaci. Iemo nana comini dajena naimaci ofiracomo fo raire jaisite. Gayona, iaimaia Aristarco diga, gaitajano uitimaci. Naie iaimaiaidi Pablo ie nabai iaimaia. Iaimaia comuillanodi Macedonia. ³⁰ Pablo ofiracomo jiai fo jaiacade; iadedi creyentiaidi naimie fo jaillana rairuidimaci. ³¹ Illaicominimona damerie nabaiñiai naimiemo fo jaillana jiai rairuidimaci. ³² Fo itinomona damerie daje rafuena ebena cuiroidimaci. Jiaino jiaifuena ebena cuiroidimaci. Eo failliñaidimaci; ie iadedi bue ñellena naimaci ofillana raise uiñoñedimaci. ³³ Comini motomona judíuai dinena damie uicomo oredimaci. Ie mamecidi Alejandro. Cominina llícaitallena, ie onolli jaidianona, cominimo lloiacade; ³⁴ iadedi naimie judío imiema naimaci uiñuanona, nana daacaiño cuiroidimaci. Mena horas raifi cuiroi-cuiroidimaci:

—¡Efeso ie Diana eo ebirede!

³⁵ Iemei naie nairai rabe cueraimadi cominina llícaitatate. Naimaci llícailla meinoconi, naimie lluacinona cacadimaci. Raite:

—¡Cacarei! Cai nairaidi Dianana sedacabidica. Naiñaiño ebirediñaiño. Naiñaiñona eruaiide jiraraidi monamona jaie uaide. Iena jiai sedacabidica. Nana bie eniruemo ite comini iena uiñotimaci. Bu naiena uiñoñedimiena jaca iñede. ³⁶ Bu cue lluaana jaca uaitañeite. Ie jira omoi llícai. Comeciai facañeno buena finoñeno. ³⁷ ¿Bue ñellena Gayo iaimaia Aristarco diga, benomo atidomoi? Iaimaiaidi cai jusiñamui joreñona ñaiñediaimaia. Naiñaiñona jeare finoñediaimaia. ³⁸ Demetrio, ie maijiraini diga, iaimaia llogidoiacania, cominina llogidoraco ite. Diga jueces jiai ite. Coniniri nainomo iena siado; ³⁹ iadedi jiai nicino omoimo ia, cai illaicomini ofia, biena siaduanu, caimo lloitimaci. ⁴⁰ Birui bie rafue cai finua jira, illaicomini nibai caina duere finoitimaci. ¿Ñiese cai nibaille? Illaicomini caimo biena jicanoia, ¿ñiese raiticai?

⁴¹ Naie llua mei, ofidinona jino orede. Iemei jai jono tuudimaci.

20

Macedoniamu Pablo dane jailla rafue

¹ Efesomo ite rafue suilla mei, Pablodi creyentiaina uaidote. Naimaci comeciaina ocuiñotafuena llote. Iemei naimacina naimie facaduanu, Macedonia railla eniruemo jaide. ² Nainomo ite nairaiamo macarite. Comecina ocuiñotallena, naimacina llofuecana jaide. Iese Macedoniamona Grecia railla eniruemo risaide. ³ Nainomo daje amani fivui illa mei, Siriamo botedo abido jaiacade; iadedi judíuaidi naimiema meineiacanana Pablo fidiano, Macedoniamu abido macarite. ⁴ Jiaino naimie diga jaidimaci. Sópater jaide.

Naimiedi Berea nairai imie. Pirro jito. Aristarco, iaimaiai Segundo diga, jaide. Tesalónica nairai imie iaimaiai. Gayo naimie diga jiai jaide. Gayodi Derbe nairai imie. Timoteo naimie diga jiai jaide. Tíquico, iaimaiai Trófimo diga, jiai jaidiaimaiai. Asia imie iaimaiai. ⁵ Coco uicodo naimaci jaillano, Troamo cocona sedadimaci. ⁶ Llomenico guillaruillai railla rafue fuilla mei, Filipomona jaidicoco. Monailaido dabecuirorui coco jailla mei, Troamo naimaci diga dane danomo dafaifidicoco. Nainomo siete digarui fiebidicoco.

Troamo Pablo illa rafue

⁷ Domingoruimo Jesús fiodaillana começillena, danomo ofidicaimo, Pablodi caina llofujete. Icoiti naimie jaiacana jira, Pablo are ñaite. Naiona jitoma daferui illa facai nia ñaite. ⁸ Cai ofillanomo ailluena lamparíniai ite. ⁹ Pablo are ñaia jira, daje coniruemo iniaicidi suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pisomo a iticai. Nainomona eniruemo naimiedi uaide. Ana jibuisaibidemo, naimiena meniñocaidemo, naimie jai fiodaillana ciodimaci. ¹⁰ Ie jira Pablo ana jaide. Naimie emodomo jítadacaida, naimiena meniñote. Cominimo llote:

—Omoi rucaicueriño. Naimie cajede. Jafaicina nia faite.

¹¹ Abido a jaidimaci. Jesús fiodaillana começillena, llomenicono tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oni jaide. ¹² Nainomona conirue jai cajede uitimaci. Ie jira nana naimaci naimieri eo iobidimaci.

Miletto railla nairaïmo Pablo jailla rafue

¹³ Pablodi Troamona Asón railla nairaïmo arido jaiacana jira, botedo jaidicai. Iese uicomo Asónmo jaidicai. Nainomona Pablona botedo uiacadicai. ¹⁴ Ie jira Asónmo naimiena cai baillanona, cai diga botemo bite. Ie mei Mitilene railla nairaïmo jaidicai. ¹⁵ Nainomona dane monailaido cai jaillano, ie areruido Quío railla nairaïmo ruicafebellemo jaidicai. Dane ie areruido Samos railla nairai mamedo atona jaidicai. Ie areruido dane cai jaillano, Miletomo sijidicai. ¹⁶ Abijuarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinononi, cincuenta digarui illanona bie rafue ite. Asia railla eniruemo naimie are iacaiñena jira, Pablo começina facade: “Efeso ecido monailaido jaiticai”.

Efesomo ite creyentiai sedarainimo Pablo llua rafue

¹⁷ Creyentiaina sedarainina uaidollena, Miletomona Efesomo Pablo cartana orede. ¹⁸ Naimie dine naimaci rillanona, Pablo naimacimo llote:

—Asiamo nano cue rillaruimona, ñiese omoi diga nagarui cue illana uiñotomoi. ¹⁹ Cai Nama diga abina iedoño maïjuidicue. Eecana sure maïjidicue. Judíuai cuena duere uiñodosia jira, ie facaiseconi dueredicue. ²⁰ Cuemo ite marenona omoïmo jaca janoñedicue. Nana Jusiñamui rafuena omoïmo jai lloticue. Omoi ofillanomo omoïna llofueuidicue. Omoi jofuemo omoïna jiai llofueuidicue. ²¹ Judíuaina llofueticue. Judíuaiñedinona daje isoi llofueticue. Jusiñamui dibeïmo omoi começiai iuaina meiduana lloticue. Cai Nama Jesúsna omoi ñnuana jiai lloticue. ²² Jusiñamui Joreñodi cuena jai jaicaitaja jira, Jerusalémo birui jaiticue. Nainomo ramo cue jirille rafuena uiñoñedicue; ²³ iadedi Jusiñamui Joreño naga nairaïmo cuemo llote: “Llaveracomo ona gaitajano ona jonesite. Duere sefuitio”. ²⁴ Cue ille ñnori are illemo começina facañedicue. Dama cue ille ñnori fuidoiacadicue. Cai Nama Jesúsna cue feñoga maïjiana fuidoacadicue. Mare rafuena omoïmo lloiacadicue. Jusiñamui omoïna duenaillana jiai lloticue. ²⁵ Jusiñamui anamo

omoï illa rafuena omoïmo jai lloticue. Jai dane cue uiecona cioiñeitomoi. Iena uiñoticue. ²⁶⁻²⁷ Cue uaina jaca janoñedicue; ia nana Jusiñamui uai omoïmo lloticue. Ie jira cuemona omoï diga cue comeci mare. Jusiñamui uaido omoï jaiñenia, cue muidonañeite. ²⁸ Mai omoï abi rairui. Jusiñamui Joreñodi omoïna creyentiaïna sedatate. Naimacina raise seda. Jusiñamui ðibeimo itinona llofue. Naimie Jito fiodailla muidona, naimacina ote, naimie iena. ²⁹ Naimacidi toica llaudaïai isoidimaci. Nia abina raise uiñoñedimaci. Cue jailla meinoconi, taino llorainidi, janallari isoi, omoïmo biite. Naimaci nana omoï sedaca cominina ramo faite, danomo abido naimaci jaillena, jiconiaï llaudaïai gaitaja isoi. ³⁰ Omoïmona uanañedicinona llorainidi iite. Creyentiaïna ramo faitimaci, omoï llucinona faïnonocaillena, naimaci ðibeimo illena. ³¹ Ie jira abina rairui. Bie rafuena feitañeno. Daje amani fiemona nana omoïna jai llofueticue. Naïona omoïna llofueticue. Aremona omoïna jiaï llofueticue. Omoïna cue duenaillamona, eïanona omoïna llofueticue. ³² Mai. Cai Nama illa anamo omoïna faïnonocaiticue. Naimie uaimona naimie omoïna duenaillana jai uiñotomoi. Naie uaidi omoïna jiaï ocuiñotaite. Iemona Cristona ñnocana jaitomoi. Nana naimie fetocano diga naimie illanomo ðo jaca iitomoi. ³³ Jiaïno ie ucubena jaca nicidoñedicue. Bu ie iniroillaina jaca jiaï oiacañedicue. ³⁴ Cue jitaille rana dama cue maijiano oticue. Cue diga jaidino imaci jitaille rana jiaï dama cue maijiano oticue. Iena nana omoïdi uiñotomoi. ³⁵ Iese cue illamona omoïna llofueticue. Iese maijiano duerede cominina canocana jaiacadicaï. Cai Nama Jesús ie llogacinona uiñoticaï. Naimie raite: “Raruaïna cai feiñoïa, iobidicaï; iadedi cai eo iobiacania, jiaïnomo raruaïna fecadicaï”. ³⁶ Naie llua meino, naimaci diga caiñici ðfodo rainadajano, Jusiñamuimo jïide. ³⁷ Nana naimacidi eo eedimaci. Pablona caïmaduanona, naimiena llibanotimaci. ³⁸ “Cuenana dana cioiñeitomoi” naimacimo llua jira, eo sunaitimaci. Ieconï naimie diga botemo jaidimaci.

21

Jerusalémo Pablo jailla rafue

¹ Naimacina cai facadua meinoconi, suiñodicaï. Cos railla nairaïmo atona jaidicaï. Ie are Rodas railla uiasimo ridicaï. Iemeï Pátara railla nairaïmo ridicaï. ² Nainomo Fenicia railla eniruemo jaiacade botena baiticaï. Nai botemo cai jailla mei, suiñodicaï. ³ Chipre railla uiasina cai ciojia, cai nabei ðibeimo ite. Iemeï Siria railla eniruemo jaidicaï. Tiro railla nairaïmo sijidicaï. Botedo uiga raruaïna nainomo joneacadimaci. ⁴ Tiromo ite creyentiaï cai baïllanona, siete ðigarui naimaci diga iticaï. Jerusalémo naimiena judíuaï meineñellena, nainomo naimie jaiñellena, Jusiñamui Joreño naimacina Pablomo llotatate. ⁵ ðigarui illa meinomo oni jaidicaï. Naie nairaïmona nana naimaci cai diga jaidimaci. Riñoniaï, naimaci uruaï diga, jaidimaci. Caiñici ðfodo monaïllai fuemo ana rainadajano Jusiñamuimo jïidicaï. ⁶ Naimaci facadua meinoconi, botemo jaidicaï. Naimaci imaci jofuemo abido jaidimaci. ⁷ Tiromona Tolemaïda railla nairaïmo jaidicaï. Creyentiaïna uaiduano, darui naimaci diga iticaï. ⁸ Ie are jaïllano, Cesaremo cai ria, Felipe jofomo jaidicaï. Felipedï Jesucristo ie rafuena lloraima. Jerusalémo díaconuaïna creyentiaï jaie fetua facaise, Felipena fetodimaci. ⁹ Naimie ðinomo fiebidicaï. Naimiemo cuatro jisa ite. Naiñaiñuaï nia ñma abina uiñoñede. Jusiñamui naiñaiñuaïmo llucinona llocabitimaci.

¹⁰ ðigarui nainomo cai illamo Judeamona damie bite. Naimie mameci Agabo. Jusiñamui facaina lloraima. ¹¹ Caïmo ria, naimiedi Pablo cinturóna aïñode. Naie diga ie eïllina maïte. Ie onollina jiaï maïte raïllano:

—Jusiñamui Joreño raite: “Jerusalémo judíuai illaicomini bie cinturón jainaoide imana daje isoi maitimaci. Judíuaiñedinomo naimiena fecajitimaci” raite.

¹² Naiena cai cacajano, naie comini diga, Pablona caididicai, naimie Jerusalémo jaiñellena. ¹³ Pablo uai ote:

—¿Bue ñellena eedomoi? ¿Bue ñellena cue comecina ocuiñotañedomoi? Cue maiana jaca jitaidecue. Ua cue fiodaillana jaca jiai jitaidecue. Cue Nama Jesús muidona cue fiodaiadedi, damamai fiodaiticue.

¹⁴ Cai lloga uai naimie inoñena muidona, raiticai:

—Cai Nama jitaille rafuena finuana jitaidecai. —Iemei llicaidicai.

¹⁵ Nano nigarui illanona, cai raruiaina finuano, Jerusalémo jaidicai.

¹⁶ Cesareamo ite creyentiamona jaino cai diga jaidimaci. Mnasón jofomo caina uitimaci. Naimiedi Chipre railla uiasi imie. Naimiedi nano bie rafue tainiamona creyente.

Jacobo diga Pablo ñaia rafue

¹⁷ Jerusalémo cai ria, creyentiaidi caina caimare uaidotimaci. ¹⁸ Ie are Pablo, cai diga, Jacobo dine jaide. Nana creyentiaina sedaraini nainomo jai ofidimaci. ¹⁹ Uaidua mei, Pablo nagacinuaido Jusiñamui judíuaiñedinomo finoca rafuena llote:

—Cue llofuiamona ailluena judíuaiñedino creyentiaina jaidimaci —llote.

²⁰ Naie rafuena cacajano, Jusiñamuimo iobillacinona fecadimaci. Iemei naimiemo llotimaci:

—Ama, ero, judíuaimona ailluena comini jai creyentiaina jaidimaci; ia nana naimaci Moisés micori llogacinodo eo jaidimaci. ²¹ O finoca rafuena jai fididimaci. Ona comini ñaiana jai fididicai. Jiaie nairai motomo ite judíuaina Moisés micori llogacinona fainonocaillana llofuetio. Naimaci uruiabina deñenana llofuetio. Moisés micori llogacinuaido jaiñellena llofuetio. ²² Ie jira ¿niese nibaiticai? O rillana jai fididimaci. ²³ Ie jira omo cai llua fina. Cai ecimo cuatro ima jai ite. Nie isoide rafuena Jusiñamuimo jai llotimaci. ²⁴ Jusiñamui jofomo naimacina uiño. Naimaci diga Moisés micori llua isoi, o abi fino. Naie rafuena raise fuidollena, Jusiñamuimo fecallena, toica ocainaiaina naimaci facaina iba. Naie rafue omoi fuiduanona, omoi ifogina rijiruda gareitomo. Ie mei nana comini mare rafuena o finocana jaillana uiñoitimaci. Moisés micori llogacinodo o nia jaillana uiñoitimaci. Iese omo lloiacadica. ²⁵ Judíuaiñedino Moisés micori llogacinodo jaillena lloñeiticai. Naimacimona creyentiaina jaidinomo navui cueticai: “Jiraraimo fecaca rana riño. Diruena riño. Llerinoga rana riño. O aiñede riño diga iño. O iniñede ima diga iño” cueticai.

²⁶ Pablo “Jee” raillanona, nai cuatro ima diga ie are Moisés micori llogacinona finuano, Jusiñamui jofomo jaide, naimie ie finoca rafue fuillarui lollena. Jusiñamuimo nagamiai rana fecajaruina jiai llote. Siete digarui illanona, Moisés micori llua isoi, naie rafuena fuidoiacadimaci.

Pablona gaitaja rafue

²⁷ Naie siete iruillai fuiacanaruillaimo Asiamona damerie judíuaidi bitimaci. Jusiñamui jofomo Pablona ciuano, comini comeciaina feidocana uitimaci. Pablona gaitajanona, ²⁸ cuiiriidimaci:

—Caimaci, caina cano. Bimie naga illanomo llofuiamona, cominina raise itañede. Moisés micori llogacinuaido jaiñede. Bifona raise sedañede. Judíuaiñedino bifomo atiano, bie mare jofo naimie jai jeare finode.

²⁹ Iese ite: Jerusalémo Trófimo diga Pablona ciódimaci. Trófimodi Efeso nairai imie. Judíuñedimie. Pablo naimiena Jusiñamui jofomo uillamo

comecina facadimaci; iadedi uifede. Judíuai cominimona judíuñedimie Jusiñamui jofomo jaillana marañede. ³⁰ Asiamona bitino cuirillamona, nana Jerusalémo ite comini icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci. ³¹ Pablona meineiacania, soldaduai ie comandantedi nana comini ieillana fidide. ³² Ieconí naimiedi, ie soldaduai diga, nana ie illaicomini diga, comini dine aisicana bitimaci. Ie jira cominidi naimacina ciuano, Pablona fajana fainonocaidimaci. ³³ Comandante naimiemo iaireicaia, Pablona gaitade. Naimiena mena lloeo diga maillena llote. Jicanote:

—¿Bu naimiedi? ¿Bue ñete?

³⁴ Nana ieidinodi jiaiforie llotimaci. Ie jira naie rafuena naimie jaca uiñoñede. Ie muidona cuatelmo naimiena uillena llote.

³⁵ Cuartel tidabacuimo naimaci ria, comini jarire jailla jira, soldaduai Pablona uitimaci. ³⁶ Ailluena comini racadimaci. Ocuioisite:

—¡Naimiena meine!

Pablo ie abi riidua llua rafue

³⁷ Cuartelmo jaiacania, Pablo comandantemo llote:

—O diga ñaiacaducue.

Raijicaillamona, naimie uai ote:

—Griego uaido ñaitio— ³⁸ Jiai llote—. Egipto imieñedio. Navui jobaime finodio. Jofue iñenanomo, cuatro mil cominina meinetinona uitio.

³⁹ Pablo uai ote:

—Naimieñedicue. Judío imiedicue. Ciliciamo ite Tarso railla nairaimona biticue. Naie nairai mamecidi are soride. Cominimo cue llollena, omo jicanoiacadicue.

⁴⁰ —Jee —raite. Pablo tidabacui muidomo naidaide. Cominina llícaitallena, ie onollina jaidide. Comini llícailla mei, Pablo judíuai uaido naimacimo llote:

22

¹ —Caímaci, einamaci, cue abi riiduacinomo mai omoi cacarei.

² Naimie judíuai uaido llua naimaci cacajano, llícaidimaci. Ie jira Pablo llote:

³ —Judío imiedicue. Ciliciamo ite Tarso railla nairaimo jeicigacue. Bene omoi nairaimo escuelamo jaidicue. Gamalielmona fueoticue. Moisés micori llogacinuaina eo raise facadicue. Jusiñamui rafuedo birui omoi isoi jaidicue.

⁴ Jesucristo ñnotinona jaie eo duere finodicue. Diga creyentiaina maianona, cárcelmo joneticue. Iñiaina duere finodicue. Riñoniaina jiai duere finodicue.

⁵ Jusiñamui diga nanoca ñairaima cuena uifote. Nana omoi illaicomini cuena uifotimaci. Creyentiaina duere finollena, naimacimona dajerie cartana jaie feiñoticue. Damascomo ite judíuaimo cuetimaci. Damascomo jaidicue, nainomo ite creyentiai maiano, Jerusalémo atianona, naimacina duere finollena.

Pablodi Jesúna ñnuana llua rafue (Hch 9.1-19; 26.12-18)

⁶ Omoimo bie rafuena lloiticue. Jerusalémona jaidicue; iadedi Damascomo cue iaireicaia, jitoma naidai iacania, ieconí monamona damie cue abina eo quetiñote. ⁷ Eniruemo ana uaidicue. Monamona damie cuemo llua cacadicue: “Saulo, Saulo, ¿bue ñellena cuena duere finodio?”

⁸ Jicanoticue: “¿Budio?” Monamona damie uai ote: “Nazaret ie Jesúsicue. Cuena duere finodio”. ⁹ Cue diga itinodi cue quetiñua rana cioidimaci; iadedi cue diga ñaitimiena cacañedimaci. ¹⁰ Raiticue: “Nama, ¿bue ñeiticue?” Cai Nama

cuenta raite: “Naidadajanona, Damascómo jai. Nainomo o finolle rafuena omo lloiticue”.

¹¹ 'Cuenta eo quetiñua jira, cioiñedicue. Cue diga itino cue onollido llinocaida, Damascómo cuenta uitimaci. ¹² Nainomo Ananías raillamiedi ite. Jusiñamuina eo ñnote. Moisés micori llogacinuaido eo jaisoide. Nainomo ite judíuaidi naimiena: “Mare” raitimaci. ¹³ Naimie cuemo bite. Cuemo llote: “Saulo, ama, mai oni eroda”. Ieconí dane erodajanona, naimiena ciodicue. ¹⁴ Naimie raite: “Cai usumatiai micoriai ie Jusiñamuidi ona fetode, naimie jitaille rafuena o uiñollena, ie mare Jitona o cioillena, naimie uaina o cacareillena. ¹⁵ Nana cominimo naimiena lloitio. Nana o cúa rafuena lloitio. Nana o cacaja rafuena jiai lloitio. ¹⁶ Mai cue llwana ñno. Naidadajanona, o jeacino oni dotallena, Jusiñamuimo jica. Ie mei bautiza” raite.

Judíuainñedinomo Pablo jailla llua rafue

¹⁷ 'Ie mei Jerusalémo abido cue billa mei, Jusiñamui jofomo Jusiñamuimo cue jiiia, nicairiticue isoidicue. ¹⁸ Cai Namana ciodicue. Cuemo llote: “Jerusalémona raire mai jai. Cominidi o cuenta llwana feiñoñeitimaci”. ¹⁹ Uai oticue: “Nama, naga judíuai ofiracómo ona ñnotinona fauidicue. Cárcelmo naimacina joneuidicue. Nama, Jerusalémo itino iena uiñotimaci. ²⁰ Esteban micori fiodailla façaiseconi nainomo iticue. Naimie o facaina lloraíma. Naimie fiodailla jira, iobidicue. Naimiena meinetino ñiroina sedadicue”; ²¹ iadedi cue Nama cuemo llote: “Mai jai. Judíuainñedinomo ona are oretaia-cadicue”.

Comandante anamo Pablo illa rafue

²² Bie lloga ñnori comini Pablo llwana cacadimaci. Iemei cuiriidimaci:
—Bie isoide iima illana benomo jitañedicai. ¡Naimiena meine!
²³ Cuirillamona naimaci ñiroina jaidisite. Icirisiano enruena jiai fadosite.
²⁴ Judíuai uaido cominimo Pablo llua jira, comandante iena cacaiñede; iadedi comini icirillana cüanona, naimie llote:
—Naimiena cuartelmo uiño. Naimiena fano. Naimiemo ite rafuena caimo naimie llollena, naimiena duere fino.
²⁵ Naimiena maiano naimiena fallena, Pablodi nainomo ite capitámo jicanote:
—¿Juez nia lloñenia, romano nairai imiena fajana mare? Romano nairai imiedicue.
²⁶ Capitán iena cacajano, comandante ñine jaide. Iena llote. Jicanote:
—¿Ñiese ñibaiticai? Bimie romanuai nairai imie.
²⁷ Iena cacajano, comandante bite. Pablomo jicanote:
—¿O Romano nairai imedio?
Pablo uai ote:
—Jii.
²⁸ Comandante ñinena raite:
—Romanuai nairai imiena cue jaillena, eo ibadicue.
Pablo uai ote:
—Romanuai nairai imiena jeicigacue.
²⁹ Ieconí naimiena duere finoacadino naimiemono raire oni jaidimaci. Pablo romanuai nairai imiena jira, naimiena jai ebena maia jira, comandante jiai jacinaite. Comecina ñibai facade: “Iese naimiemo cue finua jira, ie ibana ollena, cue illaimamo cuenta jiai llogidoite”.

Illacomini motomo Pablo illa rafue

³⁰ Comandantedi judíuai Pablona llogiduana ua raise uiñoiacade. Ie jira ie are Pablona suiñollena llote. Jusiñamui diga nanoca ñairaini, nana judíuai

illaicomini diga, ofillena llote. Pablona atiano, naimaci motomo uillanona, naimiena naidanete.

23

¹ Ie abina riddollena, Pablo naie judíuai illaicomini motomo ite. Naimacimo eruaillano, Pablo raite:

—Caimaci, cuemona nana cue illa dinori Jusiñamui jitailla rafuena finocabidicue. Naimiemona cue comeci mare.

² Ananíadi Jusiñamui diga nanoca ñairaima. Pablo llwana naimie gaiñenamona, Pablo ecimo itinona Pablo fuena farotate. ³ Pablo dinena naimiemo llote:

—Jusiñamui o fuena faroite. Mareuidimiena abina caitadio. Moisés micori llogacinuai muidona benomo itio, cuemo llollena; iadedi cue finoca rafuena raise o uiñoñoeno cue fue ebena farollena llotio.

⁴ Nainomo itino raite:

—Jusiñamui diga nanoca ñairaimamo jeare ñaitio.

⁵ Pablo uai ote:

—Moisés micori iena jaie cuiana uiñoticue. “Illaicomina jeare ñaiñoeno” cuete. Caimaci, naimie Jusiñamui diga nanoca ñairaima illana uiñoñedicue. Uiñoticuedena, naimiemo iena lloñedicue.

⁶ Cominimo Pablo eruaillamona, saduceuai railla comini nainomo illana ciode. Fariseuai railla comini nainomo illana jiai ciode. Ie jira naimacimo ado llote:

—Caimaci, fariseo imiedicue. Fariseo imie jitodicue. Fiodaillamona ico jilluacinomo ocuriticue. Ie jira bene cuena llogidoiacadomoi.

⁷ Naimie iena lloia, naimaci comeci dajei isoi lloñedimaci. ⁸ Saduceuai cominidi fariseuai comini isoi ñnoñedimaci. “Fiodaillamona jilloñeiticaí” saduceuai comini raillana ñnoside. “Jusiñamui jaienisaí iñede. Comini joreñuai iñede” raillana ñnoside; iadedi fariseuai comini dinena nana naie rafue illana ñnotimaci. ⁹ Ie jira eo failliñaidimaci. Fariseuai motomona jiaino naidadajanona, llote:

—Bimiemo jeacino iñede. Jusiñamui jaienici naimiemo nibai jaie llwamona, bie rafue naimiemo ite.

¹⁰ Naimaci iese riire failliñaidimaci. Naimaci Pablona llagui raillano, comandantedi soldaduaimo cuartelmo naimiena uillena llote.

¹¹ Ie are naiona cai Nama Pablomo bairedi. Raite:

—Comecina ocuiño. Jerusalémo cuena o llua isoi, Romamo cuena jiai lloitio —raite.

Pablona meineiacana rafue

¹² Monaidemo, judíuaimona jiaino comeciaina facadimaci: “Pablona nia cai meineñenia guiñeiticaí. Jiroñeiticaí”. ¹³ Cuarenta baifemo ite comini iese comeciaina facadimaci. ¹⁴ Naimaci judíuai illaicomini dine jaillano, raitimaci:

—Dani comeciaina facadicaí: Pablona nia cai meineñenia, jaca buena guiñeiticaí. ¹⁵ Omoi dine Pablona atillena, naimiemo eo raise jicaua isoi, comandantemo jicano. Pablo iaírei bia, naimiena cai meinellena, ocuidoiticaí.

¹⁶ Pablo enaise naie rafuena fidiano, cuartelmo jaide, Pablomo llollena. ¹⁷ Iena cacajano, Pablodi capitána uaidote. Raite:

—Bie coniruenta comandante dine uiño. Naimie diga ñaiacade.

¹⁸ Ie jira naimiena uite. Raite:

—Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

¹⁹ Naimie onollina comandante llinocaida, bai ie atianona, naimiemo jicanote:

—¿Bue cuemo lloiacadio?

²⁰ Naimie uai ote:

—Ico are Pablona illaicomini dine uillena, naimiemo eo raise jicanua isoi, omo jicanollena, judíuai dani comeciaina facadimaci. ²¹ Naimaci jitailla isoi finoño. Cuarenta digamie baifemo naimiena reiduan sedadimaci. Llotimaci: “Guiñeiticai, jiroñeiticai, Pablona nia cai meineñenia”. Naimacidi omo jicanolle rafuena o finollena sedadimaci.

²² Comandante coniruena facaduan raite:

—Jaca bumo cuemo o llua lloño.

Félix dine Pablo oretaja rafue

²³ Comandante mena capitána uaidote. Llote:

—Doscientos soldaduaina uaido, imaci raruai finollena, Cesareamo navuida baife imaci jaillena. Setenta caballuaido jaitino uaido. Doscientos ducirainina jiai uaido. ²⁴ Jiaie caballona ati, naie emodomo rainadacaida Pablo jaillesa. Félix railla gobernador dine naimiena raise uiño —llote. ²⁵ Cartana jiai cuete. Iese cuete: ²⁶ “Félix, omo cueticue. Claudio Lisiasdicue. Cai mare gobernordio. ¿Nigacino? Cue uai o dine oredicue. ²⁷ Damie o dine oredicue. Judíuai naimiena meineiacana jira, soldaduai diga naimiena gaitaticue. Naimiena gaitataja mei, naimiedi romanuai nairai imienana fididicue. ²⁸ Judíuai illaicomini dine naimiena uiticue, naimaci llogiduacinona raise cue uiñollena. ²⁹ Naimaci einamací llogacinuai muidona naimiena llogidotimaci. Iena fididicue. Naimie jaca buena finoñede. Naimiena meinelena, naimie cárcelmo jonellena lloiacañedicue. ³⁰ Jiaino naimiena dane meineiacanana fididicue. Ie jira o dine naimiena oretaticue. Ie llogidotino o dine jaillena jiai lloiticue. Naimaci naimiena omo lloitimaci” cuete.

³¹ Comandante llua isoi, soldaduai naiona Pablona Antípatrismo uitimaci.

³² Ico are eillido jaide soldaduai cuartelmo abido bitimaci; ia Pablo caballuaido jaidino diga oni jaide. ³³ Cesareamo railla nairaimo rillanona, gobernadormo cartana fecadimaci. Naimie dine Pablona jiai uitimaci.

³⁴ Gobernador cartana facade. Ie mei Pablomo ie nairai illanona jicanote. Pablo uai ote:

—Cilicia.

³⁵ Gobernador dinena raite:

—O llogidotino bia, o rafuena cacajiticue.

Soldaduaimo jiai llote:

—Omoi anamo Herodes railla illaíma micorí jofomo naimiena seda.

24

Félix dine Pablo riidua rafue

¹ Dabecuirorui illa mei, Ananías bite. Naimiedi Jusiñamui diga nanoca ñairaima. Jiaie illaicomini diga bite. Tértulo raillamie jiai bite. Naimiedi llogidoraima. Gobernadormo Pablona llogiduaibitimaci. ² Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloiticue. Eo mareuidimedio. O muidona eo uri iticai. Cai nairaina canollena, diga mare rafuena finodio. ³ Iobillamona, nana cai iena feiñoticaí. ⁴ Ona iciaicañedicue; iadedi o fue maria jira, cue llua dally cacarei. ⁵ Bimiedi eo cai abina aruire finode. Nana eniruemo ite judíuaina uri itañede. Naimiedi Jesús raillamie rafuedo jaidino illaíma. ⁶ Jusiñamui jofona jeare naimie finoiacana jira, naimiena gaitadicaí. Moisés micorí llogacinuaido naimiena duere finoacadicaí; ⁷ iadedi comandante Lisias ride. Caimona naimiena riire bairode. Naimiena cai llogidollena, o dine cai billena

caimo llote. ⁸ Pablomo o jicanoiacania, naimiemon a bie rafuena uiñoitio. Nana naimiena cai llogiduacinona uiñoitio.

⁹ Judíuai illaicomini, Tértulo llua isoi, dacinodo llotimaci.

¹⁰ Iemei gobernador dinena Pablomo llote:

—Mai o facaina o ñaino.

Ie jira Pablo ñaite:

—Diga años cai nairai o anamo iticai. Ie jira cue abina riiduacinona omo marefodo lloticue. ¹¹ Doce digarui illanona, Jerusalémo como birui ridicue. Iena uiñoiacadiosa jiaie cominimo jicano. Jusiñamuina sedallena, Jerusalémo iticue. ¹² Bu diga conima uaina jaca uaitañedicue. Jusiñamui jofomo uaina uaitañedicue. Judíuai ofiracuaimo uaina jiai uaitañedicue. Naisomo uaina jiai uaitañedicue. Cominina uri itatañenana lloñedicue. ¹³ Níe isoide rafuena cue finuana coiñedimaci. Ie jira cuena raise llogidonidimaci; ¹⁴ iadedi jiaie rafuena lloticue. Cai usumatiai Jusiñamuina sedadimaci. Naimiena jiai sedadimaci. Nana Moisés llogacinuaina ñnoticue. Nana Jusiñamuina lloraini micriai cuegafuaina ñnoticue. Bimacimona jiaie llogacinuaido jai jaidicue. Bimacimona uanaiñedincinodo jaidicue. ¹⁵ Fiodaillamona comini ico jilloillena ñnoticue. Jusiñamuina ñnotino jilloitimaci. Jusiñamuina ñnoñedino jiai jilloitimaci. Beno itino iena jiai ñnotimaci. ¹⁶ Ie jira marena iacadicue, “Maraiñede rafuena Pablo finode” comini lloñellena, “Maraiñede rafue Pablo finode” Jusiñamui lloñellena. ¹⁷ Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiai sedajaibidicue. ¹⁸ Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga iñede. Cominina iciritañedicue. ¹⁹ Naie facaise Asiamona jiaie judíuai bitimaci. Cuemo nicino ia, ¿bue ñellena naimaci bene biñedimaci, cuena llogidollena? ²⁰ Naimaci biacaiñenia, ¿bue ñellena bene itino bie rafuena raise lloiacaiñedimaci? Naimaci motomo Jerusalémo cue ia, maraiñede rafuena cue finuana lloñedimaci. ²¹ Navui naimaci motomo cue lloticue: “Fiodaillamona comini ico jilloitimaci”. Iena birui ñaitimaci. Ie jira cuena llogidoiacadimaci.

²² Félixdi Jesús díbeimo itino rafuena raise uñua jira, Pablo rafuena nairuido siadoiacaiñede.

—Comandante Lisias bia, dane omoi rafuena siadoiticue —raite. ²³ Félix capitámo Pablo cárcelmo sedajana llote. Naimiena maiñellena jiai llote. Naimiena canollena, naimie nabaiñiai naimie dine jaillena rairuiñede.

²⁴ Diga irui illa mei, Félix, ie ai diga, bite. Naiñaiño mameci Drusila. Naiñaiñodi judía iñaiño. Pablona uaidua mei, Pablo llofuiana cacadiiaimaiai. Jesúna ñnuana cacadiiaimaiai. ²⁵ Jeacino finoñellena, dama ie jitailla rafuena finoñellena, jiairuido Jusiñamui riicaillafue anamo iñellena cacadiiaimaiai. Pablo llofuiamona Félix jacinaita. Ie jira raite:

—Jai macaibaite. Cue abi juarelliruido ona dane uaidoiticue.

²⁶ Pablo jino jaille iballe ucubemo ocuiride. Ie jira diga icaiño naimiena uaidote, naimie diga ñaillena. ²⁷ Mena años illa mei, Porcio Festodi Félix ifo meidote. Félixdi judíuaina iobitaacana jira, cárcelmo Pablona fañonocaide.

25

Festomo Pablo llua rafue

¹ Naie provinciamo darui amani rilla mei, Cesareamona Jerusalémo Festo jaide. ² Nainomo Jusiñamui diga nanoca ñairainidi, jiaie judíuai illaicomini diga, Festomo Pablona llogidotimaci. ³ Festomo daje rafuena jicanotimaci,

naimaci iena. Pablona Jerusalémo atillena jicanotimaci. Naiso motomo naimiena meinellemo comeciaina facadimaci. ⁴ Festo uai ote:

—Pablo Cesareamo fiebiite. Raire nainomo abido jaiticue. ⁵ Omoi illaicominimona damierie cue diga jaitimaci, nicino naimiemo ia, naimiena llogidollena.

⁶ Nibai ocho, nibai diez diga irui nainomo illa mei, Cesareamo naimie abido jaide. Ico are ie cominimo llouillanomo raide. Pablo atillena llote.

⁷ Pablo billa mei, Jerusalémona bite judíuai naimie ecimo ofidimaci. Diga fododicinona naimiena llogidotimaci; iadedi tainuaido llogidotimaci. ⁸ Pablo uai ote:

—Judíuai llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

⁹ Iena cacade; iadedi Festo judíuaina iobitaacana jira, Pablomo jicanote:

—¿Jerusalémo cue diga jaiacadio? Nainomo nana bie rafuena siadoiticue.

¹⁰ Pablo uai ote:

—Llogidoracomo jai iticue. Cai nanoca illaima facaina cominimo llotio, naimacina duere finollena. Benomo cue llole. Judíuaimo jaca buena finoñedicue. Iena raise uiñotio. ¹¹ Romanuai railla nairai illaicomini llogacinona cue finoñenia, damamei jearede rafuena cue finoia, cue fiodaillimo jaca ocuridicue; iadedi cuemo nicino iñenia, cuena meinellena bu cuena judíuaimo fecañeite. Cue rafue naimie siadollena, Romamo cai nanoca illaima dine jaiacadicue.

¹² Ie ecimo ite canoraini diga Festo ñaia mei, Festo raite:

—Cai nanoca illaima dine o jaiacana jira, nainomo jaitio.

Agripamo Pablo llua rafue

¹³ Diga irui illa mei, Agripadi Festo dine, ie miriño Berenice diga, Cesareamo bitiaimaia. Agripadi naie enirue illaima. ¹⁴ Diga irui nainomo itiaimaia. Naimiemo Festodi Pablo ie rafuena llote:

—Félix Pablona cárcelmo bene faionocaide. ¹⁵ Jerusalémo navui cue ia, Jusiñamui diga nanoca ñairaimadi, judíuai einamací diga, naimiena llogidote. Naimiena duere finollena cuemo jicanotimaci. ¹⁶ Naimaci uai oticue: “Cai Romanos cominidi llogidogamiena jamai tainomo duere finoñedica; iadedi llogidogamiedi ie llogidotino uai nano cacareitica. Ie mei ie abi ridollicinomo jiai cacareitica”.

¹⁷ Ie jira naimaci cue dine benomo navui bia, ie are cominimo cue llouillanomo raidicue. Pablona cue dine uaidoticue. ¹⁸ Naimiena llogidotinodi lloia, naimiena marañede finoca rafue cue facaja isoi, llogidoñedimaci.

¹⁹ Dani naimaci ñnuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite. ²⁰ Bie rafuena raise cue uiñoñenia, naimiemo navui jicanoticue: “¿Jerusalémo jaiacadio, nainomo bie rafuena siadollena?”; ²¹ iadedi Pablo nainomo jaiacañede. Cai nanoca illaima dine jaillena jicanote. Nainomo ie rafuena siadollena jitaide. Ie jira naimie sedajana lloticue, cai nanoca illaima dine naimiena cue nia oretañenia.

²² Agripadi Festomo llote:

—Naimie ñaiana cacaadicue.

Festo uai ote:

—Ico are naimie ñaiana cacareitio.

²³ Ie jira ie are Agripa, iaimaia Berenice diga, gobernador ofiracomo bitiaimaia. Finobillano ebire bitiaimaia. Soldaduai imaci illaicomini jiai bitimaci. Naie nairaimo ite nanoca comini jiai bitimaci. Ofilla mei, Festo Pablona atillena llote. ²⁴ Festo llote:

—Agripa, nana beno itino, bimiēna ciōdomoi. Jerusalémo ailluēna judíuāi naimiēna llogidōtimaci. Bene cue dīne jīai bitimaci. Naimiē meiniana eo jitaídīmaci; ²⁵ iadedi naimiēmo nicinodi iñenana jai uiñoticue. Naimiēna meinellena cue lollena, nicinodi naimiēmo iñede. Augusto dīne naimiē jaillena naimiē jīcanua jira, naimiēna oretaiticue. ²⁶ Nicinodi nīa iñede, cai illaimamo cue cuellena. Ie muidona omoi dīne naimiēna jai atidicue. Agripa, naimiē ñaiamo raise cacarei. Naimiēmo cai jīcanua mei, nībai nicino naimiēmo illana uiñoitīcai. Iemona Augustomo cueitīcai. ²⁷ Augusto dīne llavecamiē cue oretaia, naimiēmo nicino iñenia, cuemona maraiñede.

26

Pablo ie abīna dane riidua rafue

¹ Naie facaise Agripa Pablomo llote:

—Mai llono. O abī riiduacinona cacaacadīcue.

Pablo: “Jī” raillanona, ie onolli a ñuitade. Raite:

² —Agripa, bene o illa jira, cuemona mare. Cue fue baillafuedo o uicomo cue abina riidoitīcue. Judíuāi comīnīdī dīga rafuēna cuēna llogidōtimaci.

³ Nana cai judíuāi rafuēna raise uiñotio. Nana cai einamacī rafuēna jīai uiñotio. Cuemo raise cacarei. ⁴ Jerusalémo naimaci motomo cue illa jira, dīga judíuāi cue coniruenamona cuēna uiñotīmaci. ⁵ Cuēna naimaci lloiacania, fariseo imiēna cue illana are uiñotīmaci. Jīaiē comīnī baifemo fariseuaidī cai einamacī llogacinuāina iñotīmaci. ⁶ Jusiñamuidī cai usumatīai micorīaimo fiodaillamona comīnī ico jilloillena jaie llote. Ie suillemo jai ocuiridīcue. Ie jira llogidoracomo birui jai itīcue. ⁷ Nagarui Jusiñamuina naimaci eo sedajamona, cai doce nairaidī naie llogacino suillemo jīai nīa ocuiridīmaci. Ore illaīma, bie ocuirillacino muidona judíuāi illaicomīnī cuēna llogidōtimaci.

⁸ ¿Bue ñellena Jusiñamuidī comīnī fiodaillamona jillotajana iñoiacaiñedomoi? ⁹ Jaie ie isoidīcue. Nazaret ie Jesúna iñotinona dīga jearede rafuēna jaie finoacadīcue. ¹⁰ Jerusalémo iēna finodīcue. Cárcelmo ailluēna Jesúna iñotinona joneticue. Jusiñamui dīga nanoca ñairainī uaido iēna finodīcue. Naimacīna meinelle cai illaicomīnī raia: “Jee” raisoidīcue. ¹¹ Dīga judíuāi ofiracomo, dīga icaiño, naimacīna duere finodīcue. Naimaci Jesúna jeare ñaiāna jitaídīcue. Naimaci dīga cue eo icirilla jira, jīaiē enīruemo ite nairaimo jīai jaidīcue, naimacīna duere finollena.

Pablodī Jesúna iñuana llua rafue

(Hch 9.1-19; 22.6-16)

¹² Ie jira Damascomo jaidīcue. Jusiñamui dīga nanoca ñairainī uaido jaidīcue. ¹³ Ore illaīma, jītoma naidai ia, monamona quetiñotēna ciōdīcue. Naidī jītoma baifemo quetiñote. Cue abīna quetiñote. Cue dīga itino abīna jīai quetiñote. ¹⁴ Enīruemo cue ana uaia, damīe lluaana cacadīcue. Judíuāi uaido cuemo llote: “Saulo, Saulo, ¿bue ñellena cuēna duere finodīo? Cue dīga icirillana eo sefuiruitio. Iemona o abīna duere finodīo, riicaillamona raise maīga jurareta suiñoacana isoi. Ie isoidīo. Riicaillamona, cuēna duere finoacadīo”. ¹⁵ Uai otīcue: “¿Budīota?” Cai Nama cuemo llote: “Jesúdicue. Cuēna duere finodīo. ¹⁶ Mai a naidacai. Cue rafuēna o llofuellena ona fetodīcue. O birui cīua rafuēna lloitio. Ona cue uiñotalle rafuēna jīai lloitio. ¹⁷ Naimaci ona duere finoia, omoi comīnimona ona jillotaitīcue. Judíuāiñēdinomona ona jīai jillotaitīcue; iadedi judíuāiñēdino dīne ona oretaitīcue, ¹⁸ naimaci comecīai tainomo iñellena. Taife anamona Jusiñamui anamo naimacīna itataitio. Jeacino anamo naimaci birui illa jira, jītiredīnomo jai itīmacī isoidīmacī. Jusiñamuina uiñuamona, useredīnomo

iitimaci isoidimaci. Iemei Jusiñamui naimaci jeacinona dotajite. Cuen a naimaci inuamona, nana cuena inotino diga cue illano ico jaca iitimaci”.

¹⁹ Ore Agripa, monamona cue cacaja rafuena inoticue. Jesúdi Jusiñamui Jitona inoticue. ²⁰ Damasco como itinomo iena jia lloticue. Ie mei Jerusalémo itinomo iena jia lloticue. Diga Judeamo itinomo iena jia lloticue. Judíuaiñedinomo iena jia lloticue. Lloticue: “Omoi comeciámo iticinona meido, Jusiñamui dibeimo omoi illena. Omoi comeciámo iticinona omoi meidua mei, mare rafuena finocana jai”. ²¹ Ie jira judíuai illacomini Jusiñamui jofomo cuena gaitadimaci. Cuen a meineiacadimaci; ²² iadedi Jusiñamui cuena canode. Ie jira birui bene iticue. Illacominimo beno nia lloticue. Illacominiñedinomo jia nia lloticue. Dama Jusiñamui facaina lloraini micoriai ico sulle cuegafuena birui lloticue. Dama Moisés micori ico suite cuegafuena jia birui lloticue. Jiaie rafuena lloñedicue. ²³ Jai e cuetimaci: “Cristo llegi cacajite. Fiodaillamona jilloite. Naimiedi nano dofoconi jilloitimie. Iemona cai judíuai comini jeacinomona jilloillena uiñoitimaci. Iemona judíuaiñedino jeacinomona jilloillena uiñoitimaci”. Ie jira bie rafuena llocana jaidicue.

Creyentena Agripa jaillena Pablo jitailla rafue

²⁴ Iese Pablodi abi riiduan, Festo riire llote:

—Pablo, odi uairico isoidio, eo comecina o facaja jira.

²⁵ Pablo uai ote:

—Uairicoñedicue. Festo, odi cue illaimadio. Cue lluaciodi uanaicino. Ebena ñai-ñaiacaiñedicue. ²⁶ Agripa cue lloga rafuena raise uiñote. Nana bie rafuena naimie jai uiñua jira, naimie diga marefodo ñaiticue. Bainino suiñede. ²⁷ Ore Agripa ¿Jusiñamui lloraini cuegafuina inotio? omo jicanoticue. Iena o inuana jai uiñoticue.

²⁸ Agripa dinena uai ote:

—Dallu o ñaiamona, cuena creyentena nibai itataiacadio.

²⁹ Pablo uai ote:

—Nibai dallu ñaiticue. Nibai are ñaiticue; iadedi cue isoi o jaillana jitaidicue. Ua nana cue ñaiana cacadino cue isoi jaillana jitaidicue; iadedi omoi bie lloeo diga maiana jitañedicue.

³⁰ Iemona Agripa naidacaide, Festo diga, Berenice diga. Nana raídino jia naidacaidimaci. ³¹ Jino jaillano, Pablo joreña siadotimaci:

—Bimie jaca buena finoñede, naimiena cai meiniana llollena. Buena finoñede, cárcelmo illena.

³² Agripa Festomo llote:

—Naimie cai nanoca illaima dine jaillana jicanoñedena, niadedi naimie jino marena oreca.

27

Romamo Pablo jailla rafue

¹ Italiamo Augusto dine Pablo oretajana Festo llua mei, Pablona jiaie llavecana diga capitámo fecade. Naie capitádi Julio. Augustona mameciredede batallómo jainaiade. ² Adramitiomona bite botemo jaidicai. Naie bote Asia railla enirue igobiaimo sijicana jaiacade. Aristarco cai diga jaide. Macedonia enirue imie. Naimie nairaídi Tesalónica. Suiñodicai. ³ Ie areruido Sidón railla nairaímo ridicai. Nainomo Juliodi Pablona marena sedade. Ie nabaiñai dine Pablo ari jaillana rairuiñede. Ie jira naimacimona ie jitailla rana ote. ⁴ Iemei nainomona suiñodicai. Aifidi abido caina ati-atina jira, aifi raise iñenanomo, Chipre railla uiasi cai jarifebeimo illa ecido jaidicai. ⁵ Cilia railla enirue ecido monaillaido jaidicai. Panfilia railla enirue ecido jia jaidicai. Mira railla

nairaimo ridicai. Naie provincia mameci Licia. ⁶ Naie bote Roma dine jaiñena jira, capitádi jiaie botena jenode. Capitádi Alejandriamona bite botena baite. Naie bote Italiamo jaiacade. Ie jira naie botemo cai jonecaida, caina uite. ⁷ Diga irui fecuise sefuire jaillano, Gnido railla nairai iaireise ridicai. Aifidi abido caina ati-atina jira, Creta railla uiasimo jaidicai. Aifi raise iñenanodo Salmón railla nairai dine jaidicai. ⁸ Uiasi iaireise iese sefuicana jaillanona, Maregobe railla illanomo ridicai. Lasea railla nairai jiai ianori ite.

⁹ Digarui cai faifilla jira, noci deisoilla facaise jai illa jira, jaillena eo jacirede. Ie jira botemo majidinomo Pablo llote:

¹⁰ —Nabaiñiai, cai jaillena eo jacirenana uiñoticue. Eo maraiñeno caimo sefuiticai. Cai raruiaina nibai faifiticaí. Botena jiai nibai faifiticaí. Cai nibai jiai faifiticaí —llote.

¹¹ Iese llote; iadedi naie bote piloto oni jaiacade. Naie bote nama jiai oni jaiacade. Capitán iaímaiai lluana Pablo lluana baifemo ñnote. ¹² Igobe maraiñena jira, rollime facaise illa jira, ailluena comini nainomona jaiacadimaci. “Fenice railla nairaimo niedi riiticaí” raillano jaiacadimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruaide. ¹³ Beici dinena aifidi bia, “cai jitailla aifidi bite” raillanona, suiñodicai. Creta iairei monaillai fuemo jaidicai. ¹⁴ Ie mei raire cai dine eo riire aifi bite. Naie aifi noci deisoilla dinena bite. ¹⁵ Botena oni uite. Botena atona eronenidicai. Ie muidona jamai ebena jaidicai. Aifidi caina iese uite. ¹⁶ Janorede uiasi fuemo aifi raise iñenanomo jaidicai. Nai uiasi mameci Clauda. Faifiñellena bote ie janorede nocae sefuire a aiñodicai. ¹⁷ A aiñua mei, rao diga botena ruica maíticai. Sirte railla conillie illanomo cai joodai raillano, velaiaina duiñodicai. Iemei aifi jamai uigacai. ¹⁸ Ie areruido aifi riire illa jira, cargana oni dotadicai. ¹⁹ Dane ie are bote ie raruiái, cai onolli diga, oni dotadicai. ²⁰ Diga irui jitoma bainide. Diga irui ucuaí jiai bainide. Aifi eo riire nia ite. Cai jillobiñellemo jai ocuiriñedicai.

²¹ Diga irui cai guiñena mei, Pablo naimacimo llote:

—Nabaiñiai, cue uaina navui ñnotiomoidena, niadedi bie isoi sefuiñedicai. Cretamo cai fiebidicaina, bie isoi sefuiñedicai. ²² Omoi comeciaina ocuiño. Bie botedi faifite; iadedi caimona jaca buna faifiñeite. ²³ Jaive naiona Jusiñamui jaienicidi cuemo bairede. Jusiñamuimo jainaiaidicue. Naimiena sedadicue. ²⁴ Naie jaienici cuemo llote: “Pablo, jaciruiñeno. Romamo o nanoca illaíma dine iitio. Jusiñamui ona duenaila jira, nana o diga jaidino jilloitimaci”. ²⁵ Ie jira omoi comeciaina ocuiño. Cuemo llua isoi, naimiedi bie rafuena suiteite. Jusiñamui iena finuana ñnoticue. ²⁶ Nibai uiasimo jutadaiticai.

²⁷ Catorce digarui naio illamona, Adria railla monaillaimo jamai cai jaia, naiona daferui facai marineruaidi: “Enirue iaire ite” raillanona comeciaina facadimaci. ²⁸ Ie jira ie afoedinona facadimaci. Veinte brazas aforede. Iemei nano nie dinori illamona, dane facadimaci. Quince brazas aforede. ²⁹ Nofici illanomo naimaci bai raillano, fairillaillena, ie jillacimona cuatro lloelluna faitimaci. Mona monaille sedadimaci. ³⁰ Naie facaise marineruai botemona aisíacadimaci. Ie jira botemo ite nocaena ana monaillaimo dotadimaci, bote jillacimona lloelluna faia isoi.

³¹ Iena ciuano, Pablo capitámo llote. Soldaduaímo jiai llote:

—Botemo bimaci fiebiñeniadedi, jilloñeitomoi.

³² Ie jira soldaduaídi nocae maia raona jaitadimaci. Jai dinomo nocaena faínonocadimaci. ³³ Nia monaiñenia, Pablo nana caimo llote:

—Guiño. Catorce digarui illanona, jai guiñedomoi. ³⁴ Ie jira guiño, omoi mairillesa. Ua faifiñeitomoi.

³⁵ Iese naimie raillanona, Jusiñamuimo iobillacinona fecade, nana comini illa uicomo. Llomeniconona tairuano, guite. ³⁶ Nana naimaci comeciái ocuiñocaida, jiaí guitimaci. ³⁷ Botemo doscientos setenta y seis diese iticái. ³⁸ Cai monillamona, fiebide trigona monaillaimo oni fadodicái, bote meenaiñellena.

³⁹ Ie oni monaidemo, erodatemo, naie eniruena uiñoñedicái. Igo bemo conillici illana ciodicái. Nainomo jamai ebena sijiacadicái. ⁴⁰ Ie jira lloelluna nainomo oni fainonocaidicái. Datarabe maiana suiñodicái. Vela aifimo sebiñoticái. Monaillai fuemo enirue dine jai jaidicái. ⁴¹ Iemei jaiciridifomo ridicái. Eniruemo jodate. Bote muido eniruemo jaiáire jodate. Eo baguamona jillací taicosite. ⁴² Naimaci iamona jillobi raillano, soldaduai llavecana meineiacadimaci. ⁴³ Pablona jillotaicana jira, capitán iena rairuide. Lote:

—Nano íana uiñotino diese monaillaimo ana daia. Eniruemo jai. ⁴⁴ Jiaino bote ie rabicido juicaida icana jai. Jiaino bote ie raruiaido juicaida icana jai. —Iese eniruemo nana marena ridicái.

28

Maltamo naimaci illa rafue

¹ Jai cai jillua mei, Malta railla uiasimo cai illana uiñoticái. ² Nainomo ite comini caina marena feiñotimaci. Iraina bonotatimaci. Noci deilla jira, rosirena jira, irai ecimo agaillena caina uaidotimaci. ³ Pablo reiena ua mei, iraimo jonete. Joniamona, jaio usirenamona, reigaimona jino bite. Naimiena ainide. ⁴ Jaio naimie onollido lliillana Malta comini ciuano, coniniri ñaitimaci:

—Ñibai bimie comena meinetimie. Monaillaimona jillobide; iadedi jai bu naimiemo ibadi oga.

⁵ Jaiona ciuanona, Pablo iena iraimo dotade. Iemei naimiemo jaca bue isoide rafue suiñede. ⁶ Comeciaina facadimaci: “Naimie onolli raire sirite. Iemei raire fiodaite”. Are sedaja mei, naimiedi jaca niese iñede. Ie jira dane comeciaina facajano raitimaci:

—Naimiedi ñibai Jusiñamui.

⁷ Naie illanomona uiasi illaíma enirue íaire ite. Naimie mamecidi Publio. Caina marena feiñote. Darui amani ie jofomo caina marena itatate. ⁸ Publio moo duide biide. Abi cuaride. Jeraina feide. Ie jira naimie dine Pablo jaide. Jusiñamuimo jia mei, ie onolli naimiemo joniano, naimiena jillotate. ⁹ Bie rafue suilla jira, naimie dine nana uiasimo ite duidino bi-bidimaci. Naimacina jillotate. ¹⁰ Ie jira caimo iobillacinona eo fecadimaci. Cai oni jaiadedi, cai jitailla ra caimo fecadimaci.

Romamo Pablo rilla rafue

¹¹ Daje amani fivui illa mei, Alejandriamona bite botedo jaidicái. Naie uiasimo nana rollime facaiseconi naie bote ite. Mena jusiñamui íaimaiaí joreño bote muidomo ite. Damie Cástorna mameciredede. Jiaimie Póluxna mameciredede. ¹² Naie botedo oni cai jaillanona, Siracusamo sijidicái. Darui amani nainomo iticái. ¹³ Nainomona jaillano Regiomo sijidicái. Darui illa mei, aifi beici dinena billa jira, ie areruido Puteolimo ridicái. ¹⁴ Sijia mei, nainomo creyentiaína baiticái. Naimaci diga siete digarui cai illana jitaídímaci. Ie mei Roma dine jaidicái. ¹⁵ Romamo nia cai riñenia, nainomo ite creyentiaí cai billana fididimaci. Cai dine bitimaci. Foro de Apio railla nairaimo damierie bitimaci. Jiaino Tres Tabernas railla nairaimo bitimaci. Naimacina ciuano, Pablodi Jusiñamuimo iobillacino fecade. Ie comecina jiaí ocuiñote. Cai diga Romamo jaidimaci. ¹⁶ Romamo cai ria, capitán llavecana

ie illaimamo fecade. Cárcelmo Pablona naie illaima oreñede; iadedi Pablo ie ibauiga jofomo eneno oni orede. Aisi raillano, daje soldado nainomo naimiena sedade.

Romamo Pablo llofuia rafue

¹⁷ Darui amani illa mei, Pablo Romamo ite nanoca judíuaina uaidote. Danomo ofilla mei, naimacimo llote:

—Caimaci, jaca buena cai cominimo finoñedicue. Cai einamací llogacinuaina jaca inotícue; ¹⁸ iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo inena jira; ¹⁹ iadedi judíuai: “Dama ite” railla jira, cai nanoca illaima dine jaillena jicanotícue; iadedi cue nairai diga jaca iciríñedicue. ²⁰ Omoi diga ñaillena, omoína cioacadícue. Fiodaillamona íco comini jillollena cue llofuecabilla jira, bie lloeo diga maigacue.

²¹ Uai otimaci:

—Judeamona jiaíno ona cuega cartana jaca feiñoñedícai. Caimo o rafuena llollena, jaca buna biñede. Bene jaca bu ona jeare ñaiñede. ²² Ie jira omona naie rafuena cacaacadícai. Naga illanomo comini o llofuiana uaitajana uiñotícai. Creyentiaina jeare ñaitimaci. Iena fididícai. Ie jira caimo iena raise llono.

²³ Naimie dine dane billiruina llotimaci. Ie mei ailluena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui díbeimo naimaci comeciái iuaina meiduana llofue. Moisés micorí llogacinuaimona, Jusiñamui facaina lloraini micoríái cuegafuiaimona, Jesúsna llofue. ²⁴ Jiaíno naimie llofuiana inotimaci. Jiaíno inoñedimaci. ²⁵ Nana naimaci comeciaina daje isoi lloñedimaci. Iemona oni jaidimaci. Nia jaiñenia, naimacimo Pablo llote:

—Jusiñamui Joreñodí Isaías micorína cai usumatiaimo raise llotatate. Omoi usumatíái micoríái illa isoi nia itomoi. Isaías micorídi omoína jai cuega rafue jai suide. Naimie micorí cuete:

²⁶ Jusiñamui llote: “Bie comini dine mai jai.

Llono: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

²⁷ Omoi comeciái jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisinidomoi isoidomoi. Siño rafuena jai cioiacaiñedomoi. Iena jai uiñoiacaiñedomoi.

Cue díbeimo iacaiñedomoi, omoína cue jilloitai raillanona’ ”.

²⁸ Jusiñamui rafuena omoi inoñena muidona, judíuaiñedinodí Jusiñamui naimacina jilloitaiacanana jai fididimaci. Naimaci iena cacareitimaci.

²⁹ Iese naimie llua mei, judíuaidí coniniri siadocana abido jaidimaci.

³⁰ Mena años Pablo ie jofomo ite. Ie illa dinori naie jofona ibauide. Nainomo nana naimie dine bite cominina feiñote. ³¹ Naimie anamo naimaci illana Jusiñamui jitailla jira, Jusiñamui díbeimo naimaci comeciái iuaina meiduana llofue. Marefodo llofue. Naimiedi cai Nama Jesucristo rafuena llofue. Jaca budí naimie llofuiana rairuiñede. Teofilo, jaca digacino omoi jai llotícue. Mai. Lucadícue.

ROMAMO ITE CRISTONA HNOTINOMO PABLO ORETAGA RABE

Romamo ite creyentiaimo Pablo cartana orede

¹ Romamo ite creyentiaí, omoí dñe cartana oredicue. Pablodícue. ¿Nigacino? Jesucristo díbeimo maíjídícue. Jusiñamui fetocamíedicue. Ie mare rafuena cue lollena, cuena orede.

² Jusiñamuidí naimíe facaina llorainí micoriaído bie rafuena jaie llote. Naimací micoriaí iena jaie jiaí cuega. Iemona birui facacabidícaí. ³ Bie rafuedí Jusiñamui Jitona llote. Naimíe jaie ite usumadí caí illaíma David micorí. ⁴ Naimíe Jusiñamui Jitonana uiñotícaí. Jusiñamui Joreñodí siño rafuedo caína iena uiñotade. Jusiñamui Jito fiodaillamona, Jusiñamuidí ie Jitona jillotate. Jusiñamui Jitodí Jesucristo. Caí Nama. ⁵ Caína duenaillanona, caína oretate, naga nairaíaina naimíena ñnotallena, naimíena naimací iobitallena. ⁶ Naimacimona itomoi. Naimíemo omoí duillena, Jesucristo omoína jai fetode.

⁷ Romamo ite creyentiaí, Jusiñamui isiruiganodomoí. Naimíe isoi mareuidinona omoí illena, fetocanodomoí. Caí Moo Jusiñamui, caí Nama Jesucristo díga, omoína duenaíte. Iena uiñocana maí omoí jai. Iaimaíai omoína uri jai itatataíaimaíai. Iena omoí uiñocana maí omoí jai.

Roma dñe Pablo jaiacade

⁸ Díga comíní, díga illanuaimo, Jesucristona omoí ñnuana jai fidídímáci. Ie jira nano dofoconí omoí facaina Jesucristomo iobillacínona fecaacadícue, Jusiñamuimo iena naimíe fecallena. ⁹ Jusiñamuimo cue jhía, omoíri jhídícue. Jusiñamui iena uiñote. Naimíe Jito rafuena cue lluanona, cue começimona naimíena sedadícue. ¹⁰ Jusiñamuimo cue jhía, naimíemo jicadícue, cuena canollena. Naimíe jitaía, omoí dñe ja muidomo cue riitícue. Iena jicadícue. ¹¹ Omoína eo cioacadícue. Jusiñamui Joreño uai cuemo illamona, omoí começiaína ocuiñotaiacadícue. ¹² Jesucristona omoí ñnuamona, naimíena cue ñnuamona, conínina caí começiaína ocuiñotaitícaí.

¹³ Cue amatiaí, díga icaiño omoí dñe jaiacadícue. Iena omoí uiñuana jitaídícue. Jaiacadícue; iadedí nia jainidícue. Cuemona Jesucristo rafuena cacajamona, dajerie jiaíe nairaíai jai ñnotímáci. Omoí dñe Jesucristo rafuena lluaiacadícue, iena omoímona dajerie ñnollena. ¹⁴ Nana comíní dñe Jusiñamui oretagacue. Ie jira griego uaido ñaitínomo Jesucristo rafuena lloiacadícue. Griego uaido ñaiñedínomo iena jiaí lloiacadícue. Abína uiñotínomo iena lloiacadícue. Abína uiñoñedínomo iena jiaí lloiacadícue. ¹⁵ Ie jira omoímo Jesucristo rafuena eo lloiacadícue.

Jesucristo rafue siño

¹⁶ Jesucristo rafueri iobidícue. Naie rafuedí siño. Jusiñamuidí naga iena ñnotínona naimací jeacínomona jillotate. Judíuaidínno nano iena cacadímáci. Ie mei judíuainédino iena jai cacadímáci. ¹⁷ Naie rafuemona Jusiñamui caína feiñuana uiñotícaí. Jusiñamui caína marebicaitajana uiñotícaí. Naimíena caí ñnuamona iena uiñotícaí. Jusiñamui facaina lloráima micorí jaie cuega: “Jusiñamuina ñnuamona marebicaidímíedi Jusiñamui díbeimo íco jaca íite” cuega.

Comíní jeacínona fñoiadedí, daní naimací muidona

18 Nana Jusiñamuina jitañedinodi naimie duere finollifue anamo jai itimaci. Iena uiñoticaí. Jusiñamui caina iena uiñotade. Maraiñede rafue naimaci finuanona, Jusiñamui ie uanaicinona jamaidimaci. 19 Jusiñamui naimacina naimiena uiñotaja muidona, imaci comeciámona Jusiñamui illana uiñotimaci. 20 Enirue finua facaísemona naimie finoca ramona naimie illana uiñotimaci. Naimiena cionidimaci; iadedi naimie finoca ramona naimiena uiñotimaci. “Naimiena uiñotimaci” omoi raia, naimiedi bu. Naimie uai jaca siñonana uiñotimaci. Ie jira: “Jusiñamuina uiñoñedicaí” rainidimaci. 21 Jusiñamui uiñotimaci; iadedi naimie uaina ñnoñedimaci. Naimiemo comeciáina facañedimaci. Naimiemo iobillacinona fecañedimaci; iadedi ebena comeciáina facacabidimaci. Naimaci comeciá jai tainomo ite isoide. Jai marebificaiñedimaci. 22 “Abina uiñoticaí” raitimaci; iadedi abina uiñoñedimaci. Jamai ebe isoidimaci. 23 Jusiñamui jaca ite. Naimie uai siño. Naimiena sedaacaiñedimaci; iadedi jiaie rana sedaacadimaci. Fodairuide ñmana eruaide jiraraína finodimaci. Ofomana eruaide jiraraína finodimaci. Ocainana eruaide jiraraína finodimaci. Jaiona eruaide jiraraína finodimaci. Naie isoide jiraraína sedauidimaci.

24 Ie jira Jusiñamui naimacina fañonocaide, naimaci jitailla jearede rafuena imaci finollena. Ie mei conini diga eo meirede rafuena finouidimaci. 25 Jusiñamui ie uanaicinona jitañedimaci. Uanañedicinodo jaidimaci. Jusiñamui finoca rari iobidimaci; iadedi naie rana finodimieri iobiñedimaci. Ero, dani Jusiñamuimo iobillacinona jaca cai fecacabillasa. Uanaicinona lloticue.

26 Iese naimaci illa jira, naimaci jitailla meirede rafuena finollena, Jusiñamui naimacina fañonocaide. Coniñona aífuedotimaci. 27 Naimaci jitailla jira, conimana aífuedotimaci. Naimaci maraiñede finoca rafuemonu duere sefuillemona ibana feiñoitimaci.

28 Jusiñamuina naimaci uiñoiacaiñena jira, maraiñede rafuemo naimaci comeciá facallena, Jusiñamui naimacina fañonocaide. Naimaci finorainiga rafuaína finocana jaidimaci. 29 Naga isoide maraiñedicinona finouidimaci. Naga isoide jearedicinona finouidimaci. Jiaie comini rana nicidoudimaci. Jiaie cominina duere finouidimaci. Jiaima raconi uradoisoidimaci. Cominina jaca meinetimaci. Fuiriruidimaci. Jifuerisoidimaci. Jiaie cominina jeare finouidimaci. Eo ñañalledimaci. 30 Jiaie comini joreñona ñañoidimaci. Jusiñamuina jaca gaiñedimaci. Cominina jeare ñañoidimaci. Abina iedoudimaci. Abina biruidimaci. Diga jearede rafuemo comeciáina facauidimaci. Naimaci moo uaina ñnorainidimaci. Naimaci ei uaina ñnorainidimaci. 31 Ebena itimaci. Naimaci lloga uaina finorainidimaci. Jiaie cominina isiruirainidimaci. Naimacina jiaí dueruirainidimaci. Iese jaisoidimaci. Iese nia jaicabidimaci. 32 Jusiñamuidi jiaie llote: “Bie isoide rafuena finodino iraimo jaca duere sefuitimaci. Cue illanomo jaca iñeitimaci” llote. Jusiñamui lluaña uiñotimaci; iadedi naie rafuena finocana jaidimaci. Iena jiaie comini finoiadedi, iobillanona, “Macai mare iese imaci finua” raitimaci.

2

Jusiñamuidi maraiñede rafuena finodinona duere finoite

1 Ero, omoi judíuaimona damie comecina ñibai facade: “Bie isoide maraiñede rafuena finoñedicue. Iena finuamona, jiaie comini Jusiñamuimona duere sefuitimaci. Cue duere sefuiñeiticue” raillamo naimie comecina facade; iadedi naie isoide maraiñede rafuena naimie finua jira, Jusiñamui naimiena jiaí duere finoite. 2 Jusiñamuidi uanaicinona uiñuamona, maraiñede

rafuena finodimiena duere finoite. Iena uiñoticaí. ³ “Jusiñamui duere finollicino anamona jilloñeitimaci” comecina facadio. Naimacimo o comecina o facaja isoi, naimaci isoi o finua jira, Jusiñamui ona jiai duere finoite. ⁴ Ona naimie duenailamona, ona naimie duere finoacaiñellemona, o comecimo iticino marecinona meiduana naimie jitaide. Naimie dibeimo o illana naimie jitaide. Naiena jamaiñeno. ⁵ O comeci jaiarena jira, o comeci Jusiñamui dibeimo meidoiacaiñedio. Ie jira ico eo duere sefuitio. Ie ricaillifuemona Jusiñamuidi nana naimiena ñnoñedinona duere finoite. Iena Jusiñamui finoa, Jusiñamuimona mare. ⁶ Nagamiai imaci finua ille dinori Jusiñamui naimacina duere finoite. ⁷ “Mare rafuena finocana jaidino cue illanomo jaca iitimaci” lloite. Naimaci naimie isoi ebire iacania, naimiemona iobillacino naimaci jitaia, naimie illanomo naimaci jaca iacania, iese Jusiñamui lloite. ⁸ Maraiñede rafuedo jaidino Jusiñamui duere finollicino anamo iitimaci. Dani imaci abina isiruitimaci. Uanaicinona ñnoñedinomaci. ⁹ Jusiñamui naga jeacinona finodimiena eo duere finoite. Judíuai comini ua duere finoite. Judíuaiñedinomaci cominina jiai duere finoite; ¹⁰ iadedi Jusiñamuidi naga mare rafuedo jaidimiena ebire itataite. Iobitaite. Uri itataite. Judíuaimo iese ua finoite. Judíuaiñedinomo iese jiai finoite, ¹¹ naga nairaina daje isoi naimie finua jira.

¹² Judíuaiñedinodi Moisés micori llogacino anamo iñedinomaci; iadedi jeacinona naimaci finua jira, Jusiñamui naimacina duere finoite. Judíuai Moisés micori llogacino anamo itimaci; iadedi iena naimaci ñnoñena jira, jiai jaca daje isoi duere sefuitimaci. ¹³ Moisés micori llogacinona cacajamona, Jusiñamuimona jaca buna marebicaiñede; iadedi iena ñnuamona marebicaide. ¹⁴ Judíuaiñedinodi Moisés micori llogacino anamo iñedinomaci; iadedi naimaci comeciai facajamona, marecinona finuana uiñotimaci. Marecinodo jaillana jiai uiñotimaci. ¹⁵ Moisés micori llogacino anamo naimaci illa isoi, naimaci comeciainona marecinona naimaci finoiadedi, iena uiñotimaci. Ie jira maraiñedinona naimaci finoiadedi, iena jiai uiñotimaci. ¹⁶ Biena llofuecabiticue. Ico Jusiñamui llua jira, Jesucristodi cominimo imaci comeciaino iticinona juez isoi lloite. Maraiñedinona finouidinomo duere finollicinona lloite. Marecinona finouidinomo duere finollicinona lloñeite.

Moisés micori llogacinodo judíuai comini raise jaiñedinomaci

¹⁷ Abina iedumona, omoimona damierie raitomoi: “Judíuai imacidicaí. Moisés micori llogacino anamo cai illa jira, duere finollicinomona jilloiticaí. Jusiñamui cai diga ite” raitomoi. Iena omoi raillamona, abina iedotomoi. ¹⁸ Naimie jitailla rafuena uiñotomoi. Moisés micori llogacinona omoi uiñuamona, marecinona finuana uiñotomoi. ¹⁹ Jusiñamuina uiñoñedinona llofueiacadomoi. Naimiena naimaci uiñoñena jira, jitiñedinomo itimaci isoidimaci. Uanaicinona naimacimo omoi llumona, naimaci comeciaina lligaiñoiacadomoi. Naimacina uanaicinona uiñotaiacadomoi. ²⁰ Jusiñamuina raise uiñoñedinona llofueiacadomoi. Naimacina abina uiñotaiacadomoi. Naimie rafuena nia raise uiñoñedinona llofueiacadomoi. Moisés micori llogacinomo nana uiñuacino illa jira, naiemo uanaicino illa jira, iese iacadomoi. ²¹ Jiaie cominina llofueiacadomoi; iadedi ¿niese omoi comeciaino fueoiacaiñedomoi? “Rana fiñeno” llotomoi; iadedi fiñedomoi. ²² Omoi aiñede riño diga iñenana llotomoi; iadedi ie isoi finodomoi. Jusiñamuina eruaide jiraraina gaiñedomoi; iadedi naie ra illanuaimona naie jiraraina fiñedomoi. ²³ Moisés micori llogacinori abina iedotomoi; iadedi iena omoi ñnoñena jira, Jusiñamuina jeare finodomoi. ²⁴ Iena Isaías micori jiaie cuete: “Omoi muidona judíuaiñedinodi Jusiñamuina jeare ñaitimaci” cuete.

²⁵ Jusiñamui dibeimo jai omoi illana jiaie comini uiñollena, omoi abina detatatomoi. Moisés micori llogacinona omoi ñnoiadedi, omoi abina detatajadi mare; iadedi naicinona omoi ñnoñenia, abina detatañedino isoi jai itomoi. Jusiñamui dibeimo iñedomoi. ²⁶ Moisés micori llogacinona judíuaiñedino ñnoiadedi, naimaci abina detatañenia, Jusiñamuimona naimie dibeimo ite judíuai isoidimaci; iadedi abina detatañedimaci. ²⁷ Moisés micori llogacinuaina uiñotomoi. Omoi abiaina detatatomoi; iadedi Moisés micori llogacinona judíuaiñedinodi ñnua jira, Moisés micori llogacinuai omoi ñnoñena jira, Jusiñamuimona omoi baifemo uaidimaci. ²⁸ Omoi jeiciamona Jusiñamui ua cominiñedomoi. Omoi abiaina detatajamona, Jusiñamui ua cominiñedomoi; ²⁹ iadedi omoi comeciai marena illamona, Jusiñamui ua cominidomoi. Abi detataja jira, Jusiñamui cominiñedomoi; iadedi omoi comeciai marena illa jira, Jusiñamui cominidomoi. Raise naimiena ñnotinodi cominimona iobillacinona feiñuana jitaiñedimaci; iadedi Jusiñamuimona iobillacinona jitaiddimaci.

3

¹ Bie cartana omoi feiñuanona, iena facallemona, damierie comecina facaite: “Judíuidicai; ia naiemona, ¿niese jiaie comini baifemo faiticai? Cai abiaina detataticai; ia naiemona jaca buena oñedicaí”. ² Ie jira omoimo lloiacadicue: “Judíuaina cai illana eo mare”. Jusiñamuidi dani caimo ie rafuena llote. Jiaie cominimo lloñede. ³ Cai cominimona dajerie Jusiñamui rafuena ñnoñedimaci; iadedi Jusiñamuidi ie lloga rafuena jaca finode. ⁴ Comini tainona llotimaci; iadedi Jusiñamuidi uanaicinona jaca llote. David micori iena jaie llote:

O lloga uaimona uanaicinona o llouillana uiñoticaí.

O finoca rafuena jiaie comini uaitaia, o dinena jaca anafenodio.

Iena uiñoticaí.

⁵ Dane damierie comecina facaite: “Jusiñamuidi mareuidimie. Cai baifemo uaide. Cai marañedicinona cai finuamona caina Jusiñamui jitaia, jiaie cominidi Jusiñamui jaca mareuillana uiñoitimaci. Cai illa muidona Jusiñamuina iese uiñotimaci. Ie muidona naimiedi cai jeacino facaina caina duere finoñena, jiaie cominina naimiena cai uiñotaja jira”. Omoimona iese dajerie comeciaina facadimaci; ⁶ iadedi iese iñede. Cai jeacino facaina caina duere finoñeniadedi, Jusiñamuidi jiaie cominina jiaí duere finonite.

⁷ Taino cue lloia, iena naimie oni dotaia, naimiedi mare rafuena finuana cominidi uiñotimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena. ⁸ Omoimona dajerie cuena ñaitimaci: “Bimie raite: ‘Jusiñamui marecinona finuana raise cai uiñollena, marañedicinona finocana cai jailla’”. Iese cue lloñena jira, Jusiñamui naimacina duere finoa, cuemona mare.

Jeacinona nana cai finodicaí

⁹ Judíuidicai; iadedi jeacinona nana comini finua jira, jiaie nairai baifemo faiñedicai. Judíuidicai; iadedi jeacinona finodicaí. Judíuaiñedinodi jeacinona jiaí finodimaci. ¹⁰ Jusiñamui facaina lloraini micoriai iena jaie cuete:

Marebicaidino jaca iñede. Nana comini marañedimaci.

¹¹ Jaca buna Jusiñamuina raise uiñoñedimaci. Naimiena raise uiñoiacaiñedimaci.

¹² Mare rafuedo nana jaiñedimaci. Marañedicinona finoidimaci.

Jaca buna marecinona finoñedimaci.

¹³ Jeare ñaicabitimaci. Tainona llocabitimaci.

Naimaci ñaiamona diga jearede rafue comuicabide.

¹⁴ Naimaci fuiaí eo borede.

15 Icirillamona jiaie cominina raire meinetimaci.

16 Níne naimaci jaia, diga maraiñede rafuena comuitatimaci.

17 Uri illana uiñoñedimaci.

18 Jusiñamuina jaciruiñedimaci

jaie iese cuete. 19 Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uiñuamona, daní abí imaci riidolle uai iñede. Nana comini Jusiñamui duere finollicino anamo itimaci. Iena uiñoticaí. 20 Moisés micori lloga uaina inuamona, Jusiñamui jitailla isoi, jaca buna marebicaiñeite; iadedi naie lloga uaina caí uiñuamona, jeacinona caí finuana uiñoticaí.

Jesucristona caí inuamona jillobidicaí

21 Jusiñamuidi birui caína marebitatajana jai uiñotade. Moisés micori lloga rafuedo iena birui uiñoñedicaí; iadedi Moisés micori iena jaie llote. Jusiñamui facaina lloraini micoriai iena jiaí llotimaci. 22 Jesucristona caí inuamona, Jusiñamuidi caína marebicaitate. Nana Jesucristona inotinona marebicaitate. Nie isoide cominina caí ia, caína marebicaitallena, caína daje isoi feiñoite. 23 Nana caídi jeacinona finodicaí. Jusiñamui caína jitailla isoi, marena iñedicaí. 24 Caína naimie duenaillamona, naimie jitailla jira, Cristo Jesúsna caí inuamona, caína marebicaitate. 25 Jesucristo nia biñena facaise ite cominimo jeacino facaina Jusiñamuidi ibana oñede. Naimaci jeacino facaina Cristo Jesús fiodaillena, caí facaina naimie fiodaillena, Jusiñamui naimiena oretate. Naimiena birui caí inoia, caína duere finoñeite. Jusiñamuina mareuidimiena uiñoticaí. 26 Naimiena iese oretajamona, Jesúsna inotimiena Jusiñamuidi marebicaitaja jira, Jusiñamuina mareuidimiena uiñoticaí.

27 Caí jeacinomona marena caí illena, buena finoñedicaí. Ie jira caí finuamona abí iedoñedicaí. Buena finoñedicaí; iadedi Jesucristona caí inuamona, jillobidicaí. Ie jira caí finoca rafueri abína iedoñedicaí. 28 Moisés micori lloga uaina caí inuamona, marebicaiñedicaí; iadedi Jesucristona caí inuamona marebicaidicaí.

29 Jusiñamuidi daní judíuai imaci Mooñede; iadedi naimiedi nana comini imaci Moo. 30 Caí Moodi jaca damiena jira, naimiena naimaci inua jira, judíuaina marebicaitate. Naimiena naimaci inua jira, judíuaiñedinona jiaí marebicaitate. 31 Caí inuamona caí marebicaiilla jira, Jusiñamui facaina lloraini micoriai jaie lloga uaina caitañedicaí; iadedi iena ua inocana jaidicaí.

4

Abraham micorimona fueoticaí

1 Abraham micori rafuena ja ñaiacadícue. Naimie marebicaiillafuena omoimo lloiacadícue. 2 Ie finoca rafuemona naimie micori marebicaidena, naimie micori abína iedote; iadedi ie finoca rafuemona naimie micori marebicaiñede. Ie jira Jusiñamuimona naimie micori abína iedoiacaiñede. 3 Iena Moisés micori jaie cueda: “Jusiñamuina Abraham micori inua jira, Jusiñamuidi naimie micorina jeacinona jaca finoñedimiena isoitate. Naimie micorina marebicaitate” cueda. 4 Maijillena buna damie ocuiadedi, ibajana jamai fecañeite; iadedi maijia facaina fecaite. 5 Ero, ie maijiamona jaca bu jeacinona jaca finoñedimiena isoiacaiñede. Jusiñamuina naimaci inua jira, Jusiñamuidi maraiñedinona marebicaitate. 6 Bie rafuena David micori jiaí jaie cueda: Ie maijiamona bu marebicaiñena jira, Jusiñamui marebicaitagamiedi iocire iite.

7 Naimaci maraiñedinona Jusiñamui dotajamona, iocire iitimaci. Jusiñamui naimaci jeacinona dane abido ietañeite.

⁸ Naie jeacino Jusiñamuidi comecina dane facañeite. Naimiedi jai feitaite. Ie jira iocire iitimaci.

⁹ Dani abina detatino iocire illena lloñede; ia abina detatañedinomo iena jiai llote. Jusiñamuina Abraham micoridinuua jira, Jusiñamui naimiena marebicaitate. ¹⁰ Naimie micoridinuua nia detatañenia, naimie micoridimarebicaide. ¹¹ Naimie micoridimarebicailla mei, Jusiñamui dinena Abraham micoridimarebicaide. Abraham micoridimarebicailla mei, Jusiñamui dinena Abraham micoridimarebicaide. Ie abina detatajamona, Jusiñamuina naimie micoridimarebicaide. Ie abina detatajamona, judío imiena jai jaide; iadedi Jusiñamuina inuamona, naimie micoridimarebicaide. Ie jira Abraham micoridimarebicaide. Nana comini abina detatañedinomoo. Nana comini abina detatañedinomoo. Nana comini abina detatañedinomoo. Iadedi naimaci inuua jira, Jusiñamui naimiacina marebicaitate. ¹² Cai comini abina detatimaci; iadedi cai moo Abraham micoridimarebicaide. Ie jira Abraham micoridimarebicaide. Ie jira Abraham micoridimarebicaide.

Abraham micoridimarebicaide, Jusiñamui lloga uaidi suide

¹³ Abraham micoridimarebicaide Jusiñamuidi: “Nana enirue omo iiticue” llote. “O uruiaimo iena jiai iiticue” llote. Moisés micoridimarebicaide Abraham micoridimarebicaide inuua jira, iese Jusiñamui lloñede; iadedi Jusiñamui lloga uaina Abraham micoridimarebicaide inuua jira, iese Jusiñamui llote. Abraham micoridimarebicaide inuua jira, Jusiñamuidi naimiena marebicaitate. ¹⁴ Moisés micoridimarebicaide lloga uaina inotino: “Nana eniruena omoimo iiticue” Jusiñamuidi llotena, Jusiñamuina inotino tainona inotimaci. Jusiñamui lloga uai jiai jai saide; iadedi iese inede. Dani naimiena inotino: “Nana eniruena omoimo iiticue” llote. ¹⁵ Moisés micoridimarebicaide lloga uaina naimiaci raise inoñenia, Moisés micoridimarebicaide lloga uaido jaidino Jusiñamui ricailifue anamo itimaci; iadedi Moisés micoridimarebicaide lloga uai inedena, Jusiñamuimona buna duere sefuiñeite.

¹⁶ “Eniruena omoimo iiticue” naimiena inotino Jusiñamuidi llote. Due-naillamona llote. Nana Abraham uruiaimicoridimarebicaide iena llote. Dani Moisés micoridimarebicaide lloga uaido jaidinomo lloñede; iadedi Abraham isoi inotino jiai llote. Abraham micoridimarebicaide isoi cai jailla jira, naimiedi cai moo. ¹⁷ Jusiñamui iena jai llote: “Ona diga nairai imaci moona jai itatitue” llote. Jusiñamui fiodaitinona jilloitarede. Nia inede rana ie uaido jiai comuitate. Ie jira Jusiñamui Abraham micoridimarebicaide llua isoi, suide. Jai fiodaitino illa isoi Abraham micoridimarebicaide illa jira, Jusiñamui naimie abina maritate. Ie ai oninomo urue comuillena llote.

¹⁸ Jusiñamui Abraham micoridimarebicaide jiai llote: “Ailluena uruiaimicoridimarebicaide omo iite. Diga nairai omona jebuite” llote. Abraham micoridimarebicaide naie inoraniga rafuena inote. ¹⁹ Jaca inote; iadedi cien años naimie micoridimarebicaide illamona, naimie jai eeiroa. Naimie micoridimarebicaide aidi, Sara micoridimarebicaide, oninona jira, nainaiño uruedi comuñede. ²⁰ Abraham micoridimarebicaide Jusiñamui llua inote. Inocana jaillano, iobillacinona Jusiñamuimarebicaide fecade. ²¹ Abraham micoridimarebicaide Jusiñamui lloga uaina inuua eo inote. ²² Ie jira Jusiñamui naimiena marebicaitate.

²³ Naie rafue jai ciega; iadedi dama Abraham micoridimarebicaide duiñede; ²⁴⁻²⁵ iadedi caimo jai duide. Jusiñamuina inotino marebicaitate. Cai Nama Jesús fiodaillamona, Jusiñamuidi naimiena jillotate. Cai jeacino facaina fodaite. Caina marebicaitallena, naimiena jai jillotate.

5

Jai cai marebicaidicai

¹ Jusiñamuina cai inuamona cai marebicailla jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri

iticaí. ² Jesucristo muidona Jusiñamui caina duenaillamona, caina marebicaitate. Naimie ebirena isoi cai illemo caimare ocuridicaí; ³ iadedi duere cai sefuia dedi, jiaí iobidicaí. Duere sefuillamona, cai comeciaí ocuiñocana cai jaillana uiñoticaí. ⁴ Cai comeciaí ocuiñuamona facacifidicaí. Facacifillamona, Jusiñamuimo ocuridicaí. ⁵ Jusiñamui caina isiruilla jira, tainomo ocuriñe iticaí. Ie Joreña caimo fecade. Ie Joreño cai comeciaino illa jira, ie Joreño do Jusiñamuidi caina naimie caina isiruillana uiñotade.

⁶ Cai jeacinomona daní jillonidicaino, Cristo cairi fodaite. Maraiñedicaí; iadedi naie facaiseconi cairi fodaite. ⁷ Maraiñedimie facaina caimona jaca buna fodaiaicaiñede. Caimona nibaí damie maremie facaina fodaite; iadedi nana comini iese fodaiaicaiñedimaci. Maraiñedimie facaina jaca buna fodaiaicaiñede; ⁸ iadedi nia maraiñedicaino, Jusiñamui caina isiruillamona, Cristo cairi fodaite. ⁹ Cristo cairi fodaillamona, jai marebicaidicaí. Ie muidona Jusiñamui caina duere finuacinomona Cristodi caina jillotaite. ¹⁰ Cai dinena Jusiñamuina cai enoilla facaiseconi naimie Jito cairi fodailla muidona, ie Jito jillua muidona, Jusiñamui caina jai nabaide. Naimie caina nabaila jira, cai ico jilloillena raise uiñoticaí. ¹¹ Cai Nama Jesucristo muidona, Jusiñamui iobidicaí. Cristo muidona Jusiñamui diga uri iticaí.

Adán micori finoca rafue

¹² Bie rafue jai suide. Adán micori jeacinona finuamona, nana caino jeacinodi jai comuide. Jeacino caino illa muidona, cai jeacino ite diga nana fodaicana jaidicaí. ¹³ Moisés micori llogacino nia iñenia, jeacinona finodimaci; iadedi Moisés micori llogacino nia iñenia, Jusiñamuidi jeacino facaina ibana oñede. ¹⁴ Moisés micori llogacino nia iñenia, Adán micori facaisemona Moisés micori facaisemo naimaci jeacino ite diga nana comini fodaicana jaidimaci. Adán micori isoi jeacinona finoñedimaci; iadedi fodaicana jaidimaci. Adán micoridi Cristo isoiñede. Adán micori finoca rafuemona jeacino comuide. Cristo finoca rafuemona Jusiñamui cai jeacinona oni dotade.

¹⁵ Adán micori finoca rafuedi Jusiñamui finoca rafue isoiñede. Adán finoca rafuemona cai jeacino ite diga nana cai fodaicana jaidicaí; iadedi Jusiñamui finoca rafue Adán micori finoca rafue baifemo faite. Jusiñamui jitailla jira, caina naimie duenaillamona, cai dine Jesucristona orede, nana cai jilloillena. ¹⁶ Dama Adán micori jeacinona finuamona, Jusiñamuidi nana caina duere finollicino anamo itatate; iadedi Jesucristo fodaillamona, Jusiñamui jitailla jira, caina marebicaitate. Ailluena jeacinona finodicaí; iadedi marebicaidicaí. ¹⁷ Dama Adán micori jeacinona finuamona, cai jeacino ite diga nana cai fodaicana jaidicaí. Jusiñamui caina eo duenaillamona, Jusiñamui caina marebicaillamona, dama Jesucristo muidona, Jusiñamui diga jaca iiticaí.

¹⁸ Dama Adán micori muidona, nana comini duere finollicino anamo itimaci; iadedi dama Jesucristo finoca mare rafuemona Jusiñamui diga naimaci jaca illena, nana comini marebicairedimaci. ¹⁹ Adán micori Jusiñamuina iñoñenamona, nana comini jeacinona finodimaci. Jesucristo Jusiñamuina iñuamona, ailluena comini marebicaitimaci.

²⁰ Jusiñamui Moisés micorimo rafuena llote. Iena comini iñoñenamona, diga jeacinona naimaci finuana uiñotimaci. Jeacinona finocana jaidimaci; iadedi Jusiñamuidi naimacina eo duenaite. ²¹ Jeacino anamo jaie nana cai illa jira, cai jeacino ite diga fodaicana jaidicaí; iadedi Jusiñamui duenaillacino anamo birui iticaí. Ie jira cai marebicaillamona, cai Nama Jesucristo muidona, Jusiñamui diga jaca iiticaí.

6

Jesucristomo cai duillamona, jeacino anamo jai iñedicaí

¹ Jeacino anamo jai iñedicaí; iadedi omoimona damierie começina facaite: “Naga icaiño jeacino cai finoia, caina Jusiñamui duenaillamona, cai jeacinona oni dotade. Naimie caina duenaicabillana raise cai uiñollena, jeacino eo finocana jaiticaí. Iemona cai jeacinona oni dotajamona, naimie caina duenaillana eo raise uiñoiticaí”. ² Iese começina facañeno. Jeacino anamo jai cai iñena jira, jeacinona finocana cai jaiñena. ³ Biena uiñotomoi. Cristo Jesús ðibeimo cai illamona, nana caidi bautizagacaí. Cristo fiodailla jira, cai começiamo ite jearedicino anamo jai iñedicaí. ⁴ Cristo fiodailla jira, raiafomo naimiena jonetimaci. Cristo fiodaillamona ie Moo uaido jillode. Naimie ðibeimo cai illamona, cai jeacino anamona jillodicaí. Cai começiamo jiaie rafue birui illa jira, jiaie rafuedo jai jaidicaí.

⁵ Cristo fiodaite; iadedi naiemona jillode. Naimie ðibeimo cai illanona, cai começiamo ite jearedicino anamona cai jillua jira, Cristo ie mare rafue anamo birui iticaí. ⁶ Cristo fiodailla jira, cai começiamo ite jearedicino anamo jai iñedicaí. Caimo jai jainaiañena jira, jeacino finocana cai jaiñena. ⁷ Jeacino anamo jai cai iñena jira, jeacinona finocana cai jaiñena. ⁸ Cristo fiodaite; iadedi jillode. Naimie fiodailla jira, cai jearedicino anamo jai iñedicaí. Naimie jillua jira, jiaie rafuedo birui jaidicaí. ⁹ Fiodaillamona Cristo jillua jira, naimiedi dane fiodañeite. Naimie fiodaitemo, cai jeacino facaina naimiedi jai fiodaite. Jai dane fiodañeite. ¹⁰ Jeacino facaina jeacinona oni dotallena, naimie dacaiño fiodaite; iadedi ie Moona jaca iobitajanona, naimie ie Moo ðibeimo jaca iite. ¹¹ Ie jira jeacino anamo iñenanomo omoi começaina faca. Cristo Jesús ðibeimo jai omoi illanona, Jusiñamui jitailla rafuena finollemo omoi começaina faca.

¹² Jeacinona finocana jaiñeno. Omoi começiai jeacinona finoacania, iena ñnoñeno. ¹³ Jeacinona omoi finoñellena, omoi começaina ocuiño. Mare naimie jitaillacinona omoi finollena, Jusiñamuina ñno. Jeacino anamo jaie omoi illa jira, naimiemo omoi nia duiñena jira, Jusiñamuimona fiodaitino isoidomoi; iadedi jeacino anamo birui omoi iñena jira, naimiemo omoi jai duilla jira, Jusiñamuimona fiodaillamona jai jillodino isoidomoi. Jaie naimiemo duiñedomoi; ia birui naimiemo jai duidomoi. ¹⁴ Moisés llogacinuai anamo omoi jai iñena jira, jeacino anamo jai iñedomoi. Jeacinona finocana omoi jaiñellena, Moisés micori llogacinodo jaiñedomoi; iadedi jeacino omoi finoñellena, omoina Jusiñamui duenaillamona, naimie omoina birui canocabide.

Patrón anamo itinomona cai fueolle

¹⁵ Moisés micori llogacino anamo jai iñedicaí; iadedi omoimona damierie começina facade: “Moisés micori llogacino anamo cai iñenamona, jeacino cai finoia, Jusiñamui caina duere finoñeite”. Iese começina facañeno. Jeacinona finocana cai jaiñena. ¹⁶ Biena uiñoticaí. Patrón anamo bu ia, ie patrón começi jitailla rana finode. Ie ocuica rana ñnote. Ie isoide. Jeacino anamo omoi ia, jeacinona finocana jaidomoi. Jeacino omoi finuamona omoi jeacino ite ðiga fiodaicana jaidomoi. Ie jira Jusiñamui illanomo ico iñeitomoi. Jusiñamui anamo omoi ia, Jusiñamui jitailla rafuena finocana jaidomoi. Naimie illanomo ico iitomoi. ¹⁷ Jeacino anamo jaie itomoi. Iemei omoimo jiaie comini Jesucristo rafuena jai llotimaci. Iena cacajanona, iena raise ñnotomoi. Ie jira Jusiñamuimo iobillacinona fecadicue. ¹⁸ Jeacino anamona jai jillobillamona, marecinona finocana jai jaidomoi.

¹⁹ Cue llwana omoi raise cacaillena, bie isoide rafuena lloticue. Omoi comeciai railla jira, jeacinona navui finodomoí. Maraiñedicinona finocana navui jaidomoí. Cristo dibeimo omoi jai illa muidona, marecinona omoi finocana birui mai omoi jai. Iese omoi jaillamona, omoi comeciai Jusiñamui jitailla isoi marena iitomoí.

²⁰ Jeacino anamo navui omoi ia, Jusiñamui jitailla isoi, marecinona finoñedomoí. ²¹ Jeacinona navui omoi finuamona mare rafuena oñedomoí. Ie jira iena birui meiruitomoí. Jeacinona finocabidino fiodaillamona, Jusiñamui illanomo ico iñeitimaci. ²² Jeacino anamona jai jillobidomoí. Jusiñamui anamo omoi jai illa jira, naimie ocuica rafuena finodomoí. Iena omoi finuamona, Jusiñamui jitailla isoi, marecinona finocana jaitomoí. Ja muidomo naimie diga iitomoí. ²³ Jeacinona finocana omoi jaia, omoi jeacino ite diga fiodaitomoí. Jusiñamui illanomo ico iñeitomoí; iadedi cai Nama Jesucristona omoi ñnuamona, Jusiñamuidi omoína jaca itataite. Naimie illanomo ico iitomoí.

7

Inirede riñomona cai fueolle

¹ Cue amatiai, Moisés micori llogacinuaina uiñotomoí; iadedi iena nia raise cacaiñedomoí. Ie fiodailla mei, jaca buna Moisés micori llogacinuai anamo iñede. Ie fiodailla mei, jai iñena jira, nainomo duiñede. ² Ie isoide. Nana naimie ille ñnori, inirede riño ie inimo duide. Iese Moisés micori jaie llote. Ie ini fiodailla mei, ie inimo jai duiñede. Naimie anamo naiñaiño jai iñena jira, jaiñmiena naiñaiño oia, ie inina illena, Jusiñamuimona mare. ³ Ie ini nia fiodaiñenia, jaiñmie diga naiñaiño ia, ie ini abimo jeacinona jai finode, Moisés micori lloga uai naiñaiño ñnoñena jira. Ie ini fiodailla mei, naimie anamo naiñaiño jai iñena jira, jaiñmiena ie inino naiñaiño oia, jeacinona jai finoñede.

⁴ Ie isoide. Cristo fiodailla jira, Moisés micori llogacinuai anamo jai iñedicai. Iemo jai duiñedicai. Ie jira Cristomo jai duidicai. Jusiñamui jitailla rafuena finocana cai jaillena, fiodaillamona Cristo jai jillode. ⁵ Jusiñamuina nia cai ñnoñenia, cai jitailla rafuena finocana jaidicai. Moisés micori llogacinona uiñoticai; ia cai maraiñede jitailla rafuena finocana jaidicai. Cai jeacino ite diga fiodaicana jaidicai; ⁶ ia Moisés micori llogacino jai saide. Caimo jai duiñede. Navui ie anamo iticai; iadedi birui ie anamo jai iñedicai. Jusiñamuina cai sedajamona, Jusiñamui Joreño rafuedo jai jaidicai. Moisés micori cuela fuaído jai jaiñedicai.

Cue comecimo ite maraiñedicino

⁷ “Moisés micori llogacino maraiñede” lloñeiticai; iadedi naie llogacino iñedena, jeacinona uiñoñedicue. Jaiñmiemo ite rana cue niciduana maraiñenana jaie uiñoñedicue. Moisés micori jaie llote: “Jaiñmiemo ite rana nicidoñeno” llote. Ie jira naiemona niciduanana maraiñenana uiñoticue. ⁸ Naie llogacino muidona cue comeci jeacinona finoacade. Ie muidona rana nicidoticue. Naie llogacino iñedena, jeacino finuana uiñoiacaiñedicai. Naie llogacino iñedena, jeacino anamo iñedicai. ⁹ Moisés micori llogacinona nia cue uiñoñenia, caimare uri iticue. Naiena cue uiñuamona, jeacino cue finuana uiñoticue. Ico Jusiñamui diga cue iñenana uiñoticue. ¹⁰ Nano cue comecina facadicue: “Naiedo cue jaillamona, Jusiñamui diga ico jaca iiticue”. Iese cue comecina facadicue; iadedi naie llogacinona cue uiñuamona, Jusiñamui dibeimo cuena jaca itatañede. ¹¹ Naie llogacino muidona cue comeci jeacinona finoacana jira, cue jitailla rafuena oñedicue. Ico Jusiñamui diga jaca cue illena oñedicue; iadedi duere cue sefuillicinona oticue. Naimie

dibeimo Moisés micorí llogacino cuena itatañede; ia naimie dibeimona cuena itatate.

¹² Iese ite; iadedi Moisés micorí llogacinodi mare. Jusiñamuimona ite. ¹³ Naie llogacino mare. Naie rafue muidona fiodañeiticue; ia jeacino muidona fiodaiticue. Jeacina cue finua jira, Jusiñamui illanomo ico jaca iñeiticue. Naie mare llogacinomona jeacino cue finuana eo marañenana uiñoticue.

¹⁴ Jusiñamui Joreño Moisés micorína naie llogacinona cuetatate. Ie jira naicino mare; iadedi cue jitailla rafuena cue finua jira, cuemo jeacino illa jira, jeacino finoraímana iticue. ¹⁵ Cue finua rafuena raise uiñoñedicue, cue mare jitailla rafuena cue finoñena jira. Cue gaiñena marañede rafuena finocabidicue. ¹⁶ Cue marañede finoacaiñega rafuena cue finoíade, Moisés micorí llogacino marenana uiñoticue. ¹⁷ Cue comeci iena dama finoñede; iadedi cue comecimo ite jeacino cuena finotate. ¹⁸ Cue comecimo marecino iñede. Mare rafuena finoacadicue; iadedi iena finonidicue. ¹⁹ Cue mare finoacaga rafuena finoñedicue; iadedi cue marañede finoacaiñega rafuena finodicue. ²⁰ Cue finoacaiñega rafue cue finoíade, cue comeci iena dama finoñede; iadedi cue comecimo ite jeacino cuena iena finotate. ²¹ Biese cuemo suicabide. Mare rafuena cue finoacaniadedi, jeacina finocabidicue. ²² Cue comeci Jusiñamui lloga uaina gaide; ²³ iadedi cue comecimo marañede rafuena illana uiñoticue. Cue comecina namataacade. Cuena jeacina finotaiacade.

²⁴⁻²⁵ Eo dueredicue. Jusiñamui lloga uaina cue comecimona finoacadicue; iadedi cue comecimo ite marañede rafue cuena jeacina finotaiacade. Jeacino finocana cue jaia, duere sefuiticue. Jusiñamui illanomo ico jaca iñeiticue. Naiemona jaca buna cuena jillobitañede. Dama Jusiñamui cuena jillotaite, cai Nama Jesucristo muidona. Ie jira Jusiñamuimo cue iobicabillasa.

8

Jusiñamui Joreño cai comeciaina namatacana cai jailla

¹ Cristo Jesúmo duidinodicaí. Ie jira Jusiñamuidi caina duere finoñeite. ² Jeacino anamo jai cai iñena jira, caina duere finoñeite. Jeacina cai finuamona, Jusiñamui illanomo ico jaca iñeiticai. Duere sefuiticaí; iadedi naiemona Jusiñamui Joreño caina jai jillotate. Jesucristomo cai duillanona, caina jaca itataite. ³ Moisés micorí llogacinona cai raise iñoñena jira, jeacinomona dani jillonidicaí. Ie jira Jusiñamuidi ie Jitona orede, imana naimie jaillena. Cai isoi naimie jaide; iadedi naimiedi jeacina finoñede. Jeacina finorainidicaí. Cai jeacino facaina fiodaillena, naimiena orede. Naimie uaidi cai jeacina anafefitate. Ie jira jeacino anamona jai caina jillotate. ⁴ Iese finode, cai marena illena, Moisés micorí llogacino llua isoi. Ie jira cai comecimo ite marañede jitailla rafuedo jai jaiñedicai; iadedi Jusiñamui Joreño jitailla rafuedo jai jaidicaí.

⁵ Cai comecimo ite marañede jitaillacinodo cai jaiadedi, naiemo cai comeciaina facadicaí. Iena finodicaí; iadedi Jusiñamui Joreño jitailla rafuedo cai jaiadedi, iemo cai comeciaina facadicaí. Naimie jitailla rafuena finodicaí. ⁶ Marañede jitaillacinomo comeciaina facacabidino Jusiñamui diga ico jaca iñeitimaci; iadedi Jusiñamui Joreño jitailla rafuedo jaidino Jusiñamui diga jaca iitimaci. Jiai jaca uri iitimaci. ⁷ Jiaíno Jusiñamuina enoidimaci. Jusiñamui lloga uaina jitañedimaci. Iena inonidimaci. ⁸ Iese itino Jusiñamuina iobitanidimaci.

⁹ Iese iñedomoi; iadedi Jusiñamui Joreño jai duidomoi. Naimie omoimo ite. Bumo Jusiñamui Joreño iñenia, Cristomo nia duiñede. ¹⁰ Jeacina omoi

finua jira, fioidaitomoi; iadedi Cristo omoimo illa jira, omoi joreñuai Jusiñamui illanomo jaca iitimaci, Jusiñamui omoina marebicaitaja jira. ¹¹ Cristo Jesús fioidaillamona, Jusiñamuidi naimiena jillotate. Omoimo ie Joreño illa jira, omoi fioidaiade, Jusiñamuidi ie Joreño uaido omoi abiaina jiai jillotaite.

¹² Cue amatiai, iese caimo suite. Ie jira cai comeciaino ite marañedicinodo cai jaiñelli. ¹³ Naicinodo cai jaia, Jusiñamui illanomo ico jaca iñeiticai; iadedi Jusiñamui Joreñodi caina canuamona, naicino anamona cai jilluanona, Jusiñamui illanomo ico jaca iiticai.

¹⁴ Nana Jusiñamui Joreño namatadinodi Jusiñamui urui. ¹⁵ Jusiñamui Joreñoña feiñoñedomoi, naimiena omoi jaciruillena; iadedi Jusiñamui uruiaina omoi jaillena, naimiena feiñotomoi. Duere sefuillacinona navui jaciruitomoi; iadedi birui: “Cai Moo” raillanona, Jusiñamuina uaidotomoi. Ie jira naimiena jai jaciruiñedomoi. ¹⁶ Cai comeciaina Jusiñamui Joreño uiñotajamona, cai comeciainona Jusiñamui uruiaidicaina jai uiñoticai. ¹⁷ Naimie uruiaidicaina jira, ie uruiamo fecaacalle ra caimo jai duide, Cristomo jai duilla isoi. Naimie dibeimo cai illanona, Cristo isoi cai duere sefuilla jira, naimie isoi ie Moo illanomo ico iiticai.

¹⁸ Biena uiñoticue. Bene birui duere sefuidicai; iadedi iemo cai comeciaina cai facañena, monamo ico eo marena jaca cai illena jira. ¹⁹ Iese cai illemo nana Jusiñamui finoca radi iocire birui ocuridimaci. ²⁰ Nana enruemo ite Jusiñamui finoca radi mare; iadedi Adán micori jeacino finua jira, Jusiñamui lua jira, naimaci faidobidimaci. Iese suide; iadedi ico dane marena naimaci illemo ocuridimaci, ²¹ naimaci rifaillamona ico naimaci jillua jira. Ie mei Jusiñamui uruiaidicaina isoi marena iitimaci. Dane fioidañeitimaci. ²² Biena uiñoticai. Nana Jusiñamui finoca radi danomo eo duere sefuicana nia jaidimaci. Marena illemo nia ocuridimaci. ²³ Dani naimaci duere sefuicana jaidimaci; iadedi jiai duere sefuidicai. Jusiñamuidi ie Joreño caimo fecaja jira, ico cai marena illena uiñoticai. Monamo Jusiñamui uruiaina ico cai illemo ocuridicai. Cai fioidaia, fioidaillamona cai abiaina jillotaite. Jiaifo eruaite cai abiaimo meidollemo ocuridicai. Ie mei cai abiaia dane fioidañeitimaci. ²⁴ Naiemo cai ocurillamona, cai jeacinomona navui jillobidicai. Bumo ie jitaille ra ia, iemo naimie ocuriñede. Ie feiñoñega ramo ocuride. Ie isoidemo ocuridicai. ²⁵ Caimo suiñede rafuemo cai ocurilla jira, iemo fecuise ocuridicai.

²⁶ Birui duere cai sefuia, ico marena cai illemo ocuridicai. Jusiñamui Joreño caina jiai canode. Jusiñamuimo cai jiaa, naimiemo cai jicanua rafuena cai raise uiñoñenia, ie Joreño cai facaina ñaite. Naimiedi cai jino botanide uaina Jusiñamuimo llote. ²⁷ Jusiñamui cai comeciaina uiñote. Naimie jitaillacinona ie Joreño jia jira, iena uiñote. Jusiñamui cominidicai. Ie Joreño cai facaina ñaiana cacade.

Jusiñamui caina isiruite

²⁸ Jusiñamuina isiruitinodicai. Naimie jitailla jira, naimie caina fetode. Jusiñamuidi caimo suide rafuena marena suicana jaitate. Iena uiñoticai. ²⁹ Caina isiruillanona, caina fetode. Nano dofoconimona caina naimie Jito isoi cai illena itatate. Naimie Jitodi cai ama doforamiena. ³⁰ Caina iese jai itatajamona, birui caina uaidote. Caina uaiduanona, caina jeacinona jaca finoñedino jai isoitate. Caina jeacinona jaca finoñedino jai isoitajamona, naimie illanomo ico cai ia, ebire iiticai.

³¹ Iese caina itataja jira, Jusiñamuidi cai facaina illa jira, bu cai facaina iñellena, damamai iesedicai. ³² Jusiñamuidi ie Jitona duere sefuillamona

jillotañede; iadedi namie jitailla jira, cai facaina ie Jitona orede, cairi fiodaillena. Ie muidona naimie dibeimo marena cai ille rafuena caimo jiai iite. ³³ Jeacinona navui finodicai; iadedi Jusiñamuidi caina jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina naimiemo llogidoñeite. ³⁴ Ie jira cai jeacino facaina jaca buna caina duere finotañeite. Cristo Jesús jaie fiodaite; iadedi fiodaillamona naimie jillode. Jusiñamui beicimo naimiedi birui ite. Cai facaina naimie ñaite. ³⁵ Cristo caina isiruite. Jaca buna Cristo caina isiruillacinona baironide. Jiaie comini duere caina finoia, caina jeare finoia, aime cai guia, cai iniroinia, jacirede rafue caimo ia, jiaie comini caina meinea, Cristo caina nia isiruite. ³⁶ Iena Jusiñamui facaina lloraima micori jaie cuega: Jusiñamui muidona caina jaca meinetimaci, mercadomo toica llaudaia fallena illa isoi cuega. ³⁷ Cristo caina isiruilla jira, caina naimie canuamona, naga bie isoide rafue caimo sua, cai comeciai ocuiñocana cai jailla. ³⁸ Jusiñamui caina isiruite. Naimiemonona jaca budi caina baironide. Cai fiodaia, cai nia ia, Jusiñamui caina nia isiruite. Jusiñamui jaienisaidi, Taifedi, Janabadi Jusiñamui isiruillacinomonona caina baironidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo sua, Jusiñamui caina nia jaca isiruite. Jaca buna ie uaido Jusiñamui isiruillacinomonona caina baironide. ³⁹ Monamo ite radi Jusiñamui isiruillacinomonona caina baironide. Eniruemo ite radi Jusiñamui isiruillacinomonona caina baironide. Nana Jusiñamui finoca radi Jusiñamui isiruillacinomonona caina baironide. Cai Nama Cristo Jesúmo cai duilla jira, Jusiñamui caina isiruillana uiñotica.

9

Jusiñamuidi judúuai railla cominina fetode

¹⁻² Jiaie rafuena nia lloiticue. Cue comecidi eo sunaite. Cristomo cue duilla jira, tainona lloñedicue. Jusiñamui Joreño cue comecina uiñotajamona, iena uiñotice. Cue cominiri sunaitice. ³ Cue comini Cristo rafuena ñnoiacañedimaci. Ie muidona Jusiñamui ricailifue anamo birui itimaci. Naiemona naimaci jilloillena, naimaci duere sefuillicino ifomo cue iticuedena, cuemona mare. Naimacidi cue amatiai. ⁴ Israel railla cominidimaci. Jiaicidi judúuai railla cominidimaci. Jusiñamuidi naimacina fetode, ie uruiaina. Jusiñamui siño finoca rafuena ciodimaci. Iena naimaci ñnollena, Moisés micorimo Jusiñamuidi rafuena jiai llote. Naimiena sedallena jiai llote. Naimaci dine naimaci jilloitaraimana oretallena jiai llote. ⁵ Naimaci jaiagaidi Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidice.

⁶ Cai cominimo Jusiñamuidi ie uaina llote; iadedi nana cai comini iena ñnoñena jira: “Jusiñamui ie lloga uaina finoñede” raiñeitica. Jusiñamuina naimaci raise ñnoñena muidona, nana Israel micorimona comuide cominidi Jusiñamuimo duiñedimaci. ⁷ Nana Abraham micorimona comuidinodi naimiemo duiñedimaci. Jusiñamui iena jaie llote: “Dama Isaacmona comuidinodi ua Abraham uruia”. ⁸ Naie lluamona nana Abraham micorimona comuidinona ie uruiañnenana uiñotica. Jusiñamui lloga uaina ñnotinodi naimie ua uruia. ⁹ Jusiñamuidi Abraham micorimo jaie llote: “Jiaie año bie facaiseconi o dine abido biitice. Naie facaiseconi o ai Saradi jitona jocoite” llote. Ie mei iese suide.

¹⁰ Ie mei Isaac micoridi Rebeca micorina ote, naimie aina. Ie mei naiñaiño micoridi gorasana iaiaia micorina jocode. Nano doforamiedi Esaú micori.

Jiaimiedi Jacob micori. ¹¹⁻¹³ Naiñaiño micori nia jocoñenia, Jusiñamuidi naiñaiño micorimo llote: “Nano doforamie ie ama anamo jaca iite” llote. Jusiñamui facaina lloraíma micori Jusiñamui lluaña jiaí cuete: “Jusiñamui llote: ‘Jacobna eo isiruiticue; iadedi Esaúna janore isiruiticue’ llote”. Naie iaímaiaí micori nia jeiciñenia, iaímaiaí micori marecinona nia finoñenia, iaímaiaí micori marañedicinona nia finoñenia, Jusiñamuidi iaímaiaí micorína iese llote. Ie finoca rafuemoná Jacob micorína fetoñede; iadedi Jusiñamui jitailla jira, Jacob micorína fetode.

¹⁴ “Jusiñamuidi dama Jacob micorína fetuana marañede” raiñeiticaí. Jusiñamuidi marañedicinona jaca finoñede. ¹⁵ Jusiñamui bie isoide rafuena Moisés micorimo llote: “Cue dinena cue jitaillanona duenaiticue; ia cue dinena cue jitañenanona duenaiñeiticue” llote. ¹⁶ Comini naimiena jitaillanona, Jusiñamui naimacína duenaiñede. Naimaci rafue finuamona, naimacína duenaiñede; iadedi naimie jitailla jira, naimacína duenaite. ¹⁷ Jusiñamuidi bie isoide rafuena Faraón micorimo llote. Moisés micori illa facaise Egipto railla enirue illaimadi Faraón micori. Naimiemo llote: “Ona illaimana jai itataticue. O uicomo siño rafuena finodicue, cue uai siñonana jiaie comini uiñollena, nana cominido cue mameci sorillena”.

¹⁸ Jusiñamui iese ite. Naimie dinena ie jitaillanona duenaite. Naimie jitailla jira, jiaie cominina naimiena ñnotañede.

¹⁹ Nibai comeciaina facadomoi: “Cominina iese Jusiñamui itataia, ¿bue ñellena naimacína duere finoacade?” ²⁰⁻²¹ Iese comeciaina facañeno. ¿Niese nainona naimiemo ducañitomoi? Ero, jiñoramona nogona finodñaiñodi ie jitailla dierise nogona finode. Dajerie ebirede nogona finode. Dajerie jamai nogona finode. ²² Ie isoide. Nana comini dajena eruaiñedicai. Ie jitailla isoi, jiaiforie Jusiñamui caina comuitate. Jusiñamui ie jitailla rafuena finode. Jeacinona comini finua jira, Jusiñamuidi naimacína duere finoacade. Naimacína ie uai siñonana jiaí uiñotaacade; iadedi naimacína nia duere finoñede. ²³ Cominina Jusiñamuidi jiaí duenailla jira, naimacína ie siño uai ebirenana uiñotaacade. Naimie illanomo nanomona naimaci marena iitimaci. Iese naimie naimacína itatate. ²⁴ Jusiñamui caina iese itatate. Da judúuaina iese itatañede; ie iadedi judúuaiñedinona jiaí iese itatate. ²⁵ Jusiñamui iena jiaie lluaña Oseas micori jiaie cuete:

Cue cominiñedinodi cue cominina jaitimaci. Isiruiñeganona isiruiticue.

²⁶ Dane jiaí cuete:

Navui cue cominiñedomoi; iadedi jiaie comini omoína íco lloitimaci:

“Naimacidi jaca cajede cai Jusiñamui ie uruiaidimaci” lloitimaci cuete. ²⁷ Isaías micori railla lloraíma jiaie cuete: “Monailai fuemo conillie eo ite. Ie isoi Israel micori uruiaí eo jebuitimaci; iadedi Jusiñamuidi nana naimacína jillobitañeite. Dajeriena jillotajanona, ²⁸ jiaínomo ie lloga uaina raíre finoite. Naimacína duere finoite” cuete. ²⁹ Isaías micori jiaí cuete:

Jusiñamuidi anamo nana ra ite.

Jusiñamuidi Sodómamo ite comini micoriaína jiaie cuenode.

Gomórramo ite comini micoriaína jiaí jiaie cuenode.

Naimaci micoriaí isoi iñedicai, nana cai cominina naimiedi duere finoñena jira.

Judúuidi Cristo rafuena jitañedinomaci

³⁰ Biemo comeciaina faca. Judúuaiñedinodi Jusiñamui jitailla isoi, marena illana navui uiñoiacaiñedinomaci; iadedi iena jai uiñotimaci. Jesucristona naimaci ñnuamona, marena illana jai uiñotimaci. ³¹ Jusiñamui jitailla isoi marena naimaci illena, judúuidi Moisés micori llogacinodo jaidimaci; iadedi

Moisés micori llogacinona naimaci raise inoñena jira, marena illana jaca uiñoñedimaci. ³² Naimaci finoca rafuemonona marena iacadimaci. Marena naimaci illena, Jesucristona inoiacaiñedimaci. Naimie muidona marena ineitimaci. ³³ Isaías micori iena jaie cuete:

Jusiñamui llote: “Ero, Jerusalémo cue Jitona oretaiticue.

Naimie muidona cominidi jilloñeitimaci.

Naimiena naimaci inoñenia, faifitimaci;

iadedi naimiena inotinodi tainona inoñeitimaci.

Suubicaiñeitimaci” llote.

10

¹ Cue amatiai, judíuai comini jilluana eo jitaidicue. Jusiñamui diga cue ñaia, iena jicadicue. ² Jusiñamui jitaillacinona eo finoacadimaci. Iena uiñoticue. Iena finoacadimaci; iadedi iena finuana raise uiñoñedimaci. ³ Jusiñamui naimacina marena itatallena uiñoñedimaci. Naimaci finoca rafuemonona marena iacadimaci. Jusiñamui llua isoi jaiacaiñedimaci. ⁴ Nana Cristona inotiniedi Moisés micori llogacinodo naimie marena illena jai jaiñede. Cristona inuamona, Jusiñamui jitailla isoi, naimie marena jai ite.

⁵ Moisés micori jaie cuete: “Naimie marena illena, cue lluado jaidimiedi jaca iite, cue lluana naimie raise inoia” cuete. ⁶ Iese jaie cuete; iadedi jaca buna iese inoñede. Cristona inuamona, marena Jusiñamui jitailla isoi, birui iticai. Jusiñamui uai llote: “Omoi comeciaina facaño: ‘Cristona cai baillena, naimiena bene cai atillena, monamo jaiticai. ⁷ Fiodaitino dine jaiticai, Cristona cai jillotallena’. Iese comeciaina facaño” llote. Cristodi eniruemo jaie bite. Fiodaite; ia naiemona jai jillode. ⁸ Jusiñamui uai llote: “Naie rafue cai dine jai ite. Iena jai uiñoticai”. Cai jilloillena Cristona cai inuana birui lloticai. ⁹ Jaie cominimo: “Cristodi cai Nama” omoi lloia, Cristo fodaillamona Jusiñamui naimie jillotajana omoi inoia, jilloitomo. ¹⁰ Cai comecimona cai inua jira, Jusiñamui caina marena illana itataite. “Cristodi cai Nama” cai lloia, Jusiñamui caina jillotaite.

¹¹ Isaías micori iena jaie cuete: “Cristona inotinodi tainona inoñeitimaci. Suubicaiñeitimaci” cuela. ¹² Naie rafuedi nana cominina ñaite. Judíuaina ñaite. Judíuaiñedinona jiai ñaite. Jusiñamui anamo nana cominidi itimaci. Nana naimiemo jicanotinona jaca duenaite. ¹³ Cristodi naga naimiemo jicanotimiena jillotaite; ¹⁴ iadedi Cristona naimaci nia inoñenia, naimiemo jicanonidimaci. Cristo naimaci facaina fodailla rafuena naimaci nia cacaiñenia, naimiena inonidimaci. Naimacimo naie rafuena jiaie comini lloñenia, iena cacaiñeitimaci. ¹⁵ Jusiñamui ie rafue llorainina jai orede. Isaías micori iena jaie cuete: “Mare rafuena llotino cai dine billano, eo iobidicai” cuete.

¹⁶ Iese cuete; iadedi ailluena comini naie rafuena nia jitaiñedimaci. Isaías micori iena jiai jaie cuete: “Jusiñamui, ailluena comini cai lluana inoiacaiñedimaci” cuete. ¹⁷ Cai lluamona Cristo rafuena cacadimaci. Cristo rafuena cacajamona, damierie naimiena inotinimaci.

¹⁸ Judíuai comini naie rafuena jai cacadimaci. Jusiñamui facaina lloraima micori iena jaie cuete:

Naga eniruemo ite cominimo Jusiñamui lloraini micoriaidi naie rafuena jai llotimaci cuete. ¹⁹ Judíuai comini naie rafuena cacadimaci; iadedi iena inoñedimaci. Moisés micori iena jaie cuete:

Jusiñamuidi llote: “Cue rafuena naimaci feiñua jira, judíuaiñedino diga uradoitomo.

‘Naimaci abina uiñoñedimaci’ raitomo;

iadedi cue rafuena naimaci feiñua jira, naimaci diga iciritomoi” llote.

²⁰ Isaías micori marefodo jiai cuete:

Jusiñamui llote: “Cuena jenoñedino cuena jai baitimaci.

Naimacina cue jilloitallena cuena jicanoñedino jai bairedicue” llote.

²¹ Jusiñamui judíuai cominina jiai llote: “Naimacina cue dine jaca uaidoticue; iadedi #noiacaiñedimaci. Cuena jitaiñedimaci” llote.

11

Judíuai cominimona dajerie #noitimaci

¹ Jusiñamuidi judíuaina fañonocailamo omoi comeciaina facañeno. Judío imiedicue. Abraham uruiai micoriaimona comuidicue. Benjamín railla nairai imiedicue. ² Naimacina jaie naimie fetua jira, Jusiñamui judíuaina fañonocaiñede. Elíamo jaie ite rafuena uiñotomoi. Jusiñamuimo naimiedi judíuaina llote: ³ “Cue Nama, o facaina lloraini micoriaina meinetimaci. Ona cai sedajanona judaidimaci. Dama cue fiebidicue. Cuena jiai meineiacadimaci”. ⁴ Jusiñamui dinena uai ote: “Dama iñedio. Siete mil iñiai cue dibeimo nia eenoticue. Baal railla jiraraina jaca sedañedimaci. Cuena nia sedadimaci” llote. ⁵ Birui ie isoide. Naimacina duenaillamona, naimacina Jusiñamui fetua jira, dajerie Jusiñamui dibeimo itimaci. ⁶ Naimacina duenaillamona, naimacina fetode. Naimaci finoca rafue muidona naimacina fetodeña, naimacina duenaillamona naimacina fetodeña.

⁷ Ie jira iena iese lloiticue. Ailluena judíuaidi marena Jusiñamui jitailla isoi illana oñedimaci; iadedi Jusiñamui fetocano iena otimaci. Ailluena comini iena #noiacaiñedimaci. ⁸ Jusiñamui facaina lloraini micoriai iena jaie cuega: “Jusiñamuidi naimacina abina uiñotañede. Jusiñamui finoca rana naimaci cioia, iena uiñoñedimaci. Jusiñamui rafuena naimaci cacajia, iena cacaiñedimaci. Birui iese nia itimaci” cuega. ⁹ David micori iena jiai llote: Naimacimo aillue ra illamona, Jusiñamui naimacina duere finoite.

¹⁰ Naimaci comeciari Jusiñamui rafuena uiñoñeitimaci.

Naimaci finoca rafue anamo duere sefuicana jaca jaitimaci.

Judíuaiñedinomona dajerie #noitimaci

¹¹ Naimie rafuena judíuai comini jitaiñena jira, Jusiñamui naimacina duere finode; iadedi naimacina sofeñede. Jusiñamuina judíuai #noñena jira, Jusiñamuidi judíuaiñedinona jai jillotate. Naimacina jai jillotate, judíuai dinena judíuaiñedinona uradoillena. Uradoillamona Jusiñamuidi naimaci naimiena #nollena jitaide. ¹² Cristona judíuai jitaiñena jira, Jusiñamuimona judíuaiñedinodi diga marecinona birui feiñotimaci. Cristo dibeimo ico judíuai ia, Jusiñamuimona judíuaiñedino ailluena feiñoitimaci.

¹³ Judíuaiñedino, omoimo rafuena lloiacadicue. Omoi dine Jusiñamuidi cuena orede. Cue maijari eo marena ñaiticue, ¹⁴ cue comini cuena uradoillena, Cristona dajerie #notallena. ¹⁵ Cristona naimaci nia #noñena jira, judíuaiñedino jai #notimaci. Cristona ico judíuai #noia, Jusiñamui diga jaca iitimaci. ¹⁶ Janore jisa juilliruñu marenia, nana juilliruaidi mare. Riara ie jainauai marenia, nana ie igailai mare. Judíuaidi ie isoidimaci. Naimaci jaiagai micoriai jainauai isoidimaci. Naimaci jaiagai marenia, naimacidi jiai mare. Birui ite judíuaidi igailai isoidimaci.

¹⁷ Taide igailaiddi ie amenamo jai duiñede. Ie isoidimaci. Naimacimona Cristona jaiño #noñena jira, Cristomo jai duiñedimaci. Sotaca riara isoi, naimaci ifomo itomoi. Ie jira Jusiñamuimona rafuena jai feiñocabitomoi.

¹⁸ Naimaci ifomo omoi illa jira, abina uradoiñeno. Igailaimona jainao

cajellena, ie ijina oñede; iadedi iemo duilla jira, jainaomona igailai cajellena, ie ijina ote. Ie isoide. Naimiemo omoi duilla jira, Jusiñamuimona rafuena jai feiñocabitomoi.

¹⁹ Comeciaina facadomoi: “Taide igailai ifomo iticai isoidicai. Jusiñamui judíuaina oni dotade, caina fetollena”. ²⁰ Uanaicinona comeciaina facadomoi. Naimaci ñinoñena jira, Jusiñamuidi naimacina oni dotade. Omoi ñnua jira, naimaci ifomo itomoi. Ie jira abina uradoiñeno; iadedi Jusiñamuina omoi jacirui. ²¹ Naimiema naimaci ñinoñena jira, judíuaina duere finode. Naimiema omoi ñnoñenia, daje isoi omoi na duere finoite. ²² Biemo comeciaina faca. Naimiema ñnoñedinona jai duere finode; iadedi omoi na duenaite. Naimiema ñnocana omoi jai, naimie omoi na nia duenaite. Iese omoi jaiñenia, naimie omoi na dotaite. ²³ Judíuai Cristona ñnoñeno navui jaidimaci: iadedi Cristona naimaci birui ñnoia, naimie ñibeimo Jusiñamui naimacina itatarede, igai riararamo sotaja isoi. ²⁴ Ailli riarana cueticue. Naie amenamo nano duiñedomoi. Judíuai nainomo nano duidimaci. Jusiñamui jitailla jira, sotaca igai isoi, naimaci ifomo omoi na jai itatate. Ie jira Jusiñamui jitaia, nainomo nano naimaci duilla jira, naimiedi judíuaina abido oite.

Eo ailluena judíuai jilloitimaci

²⁵ Bie rafuena omoi uñuana jitaidicue. Iena navui uñnoñedicai. “Judíuai baifemo faiticai” omoi raiñellena, buena omoi mo lloticue. Diga judíuai Cristona birui ñnoiacaiñedinimaci. Jusiñamui jitailla ñese judíuaiñedinno jillua facaisena, iese iitimaci. ²⁶ Ie mei eo ailluena judíuai jilloitimaci. Jusiñamui facaina lloraini micoriai iena cuetimaci:

Jerusalémona cai Jilloitaraima biite.

Jacob micori uruiamona jeacinona dotaite.

²⁷ Naimaci jeacinona oni dotajanona, Jusiñamui jai lloga uai suite.

²⁸ Cristona birui ñnoiacaiñedinimaci. Jusiñamuina enoidimaci. Jusiñamuina naimaci jitañena jira, naimie omoi na fetode. Ie jira jillodomoi; iadedi Jusiñamuidi judíuaina nano jai fetode. Naimaci jaiagai micoriaimo ie lloga uaina jira, naimacina nia isiruite. ²⁹ Jusiñamui ie lloga uaina saiñede. Naimacina fetua jira, naimacina fainonocaiñeite. ³⁰ Jusiñamuina navui ñnoñedomoi; iadedi Jusiñamuina naimaci ñnoñena jira, Jusiñamui omoi na jai duenaite. ³¹ Jusiñamuina jai ñnoñedinimaci; iadedi omoi na naimie duenailla isoi, Jusiñamuidi naimacina ico jai duenaite. ³² Jusiñamui nana cominina naimiema ñnoñenana uñnotade, naimacina naimie duenaillena. ³³ Jusiñamui caina eo duenaite. Eo abina uñnote. Naga rana uñnote; ie iadedi naimie lloga uaina raise cacaiñedicai. Naimie finoca rafuena raise jai uñnoñedicai. ³⁴ Jusiñamui facaina lloraima micori iena jai cuete: “Jaca buna cai Nama Jusiñamui comeci facajacinona uñnoñede. Jaca buna naimiemo ie finoca rafuena lloñede. ³⁵ Jai ruidio ibana feiñollena, jaca buna naimiemo rana fecañede” cuete. ³⁶ Naga ra naimiemo illa jira, naga ra naimiemon bite. Naga rana finode. Naimiemo iobillacinona cai fecacabillasa. Iena jitaidicue.

12

Jusiñamui anamo raise omoi i

¹ Cue amatiai, omoi mo bie rafuena lloticue. Jusiñamui caina duenailla jira, omoi jeanide comeciamona, naimie jitailla rafuena omoi finuamona naimie anamo raise omoi i. Naimie jitailla isoi omoi i. Naimiedi omoi iese illana gaide. Omoi comeciamona naimiema raise omoi seda. ² Cristona uñnoñedinno isoi omoi ñeno; iadedi omoi comeci iuaina meiduanona, jai rafuedo mai omoi jai. Ie mei Jusiñamui jitailla rafuena finuana uñnoitomoi. Mare rafuena

finuana uiñoitomoí. Naimiena iobitajacinona jiaí uiñoitomoí. Eo mare rafuedo jaillana uiñoitomoí.

³ Jusiñamui cuena duenaillamona, bie rafuena omoímo cue llollena, naimie uai cuemo ite. “Jiaie comini baifemo faiticue” raillamo o comecina facañeno; iadedi: “Nie isoidimedicue” o raillamo o comecina raise faca. Jusiñamuimona o feiñoga diese ñnuacinomo o comecina faca. ⁴ Nagamie ie abimo diga ra ite. Ie onolli ite. Ie uisi ite. Ie jebe ite. Diga jiaie ra ite. Rana cai finollena, naga ra cai abimo ite. Cai abimo jainaiaide. ⁵ Ie isoide. Cristona jai ñnoticaí. Aillosiedicaí; iadedi daajena naimiemo jainaiaidicaí. Dani caimo jiaí jainaiaidicaí.

⁶ Jusiñamuidi daje isoide uaina naimie dibeimo cai majillena, caimo fecañede. Ie jitailla diese caimo fecade. Ie jira omoí feiñoga uaido naimie facaina maji. Rafuena omoímo Jusiñamui lloia, iena raise llono. Roracomo omoí majillena Jusiñamui lloia, nainomo raise maji. Omoí llofuelleña Jusiñamui lloia, naimie rafuena raise llofue. ⁷ Roracomo majiacinona uiñotimiedi nainomo raise majia. Llofuiacinona uiñotimiedi raise llofua. ⁸ Comeci ocuiñotajacinona uiñotimiedi comini comeциаina ocuiñotacana jailla. Rana fecajacinona uiñotimiedi rana caidiñeno fecaja. Cominina sedajacinona uiñotimiedi cominina raise sedaja. Dueredinona canodimiedi dueredinona iocire canua. Cristomo daajena cai jainaiaillamona, iese coninina canocana jaiticaí.

Cristo rafuedo cai jailla

⁹ Omoí comeциаímona nana cominina isirui. Maraiñedicinona gaiñeno; iadedi mare rafuedo omoí jai. ¹⁰ Coninina isirui, omoí cominina omoí isiruilla isoi. Omoína jiaimie nia iobitañenia, naimiena raire omoí iobita.

¹¹ Cristo rafuena sefuiruiñeno finocana omoí jai. Cai Namana iocire seda.

¹² Naimie dine omoí illemo iocire omoí ocuiri. Duere omoí sefua, omoí comeциаina ocuiño. Jusiñamui diga ñaícabillanona omoí jai.

¹³ Jiaie creyentiaí rania, naimacina cano. Omoí jofuemo creyentiaí ria, naimacina nafue.

¹⁴ Jusiñamui dibeimo naimaci marena illena, omoína duere finodinona Jusiñamuimo jii. Naimaciri marena ñaino. Naimacina faidoñeno.

¹⁵ Iobidino diga omoí nabairillena, omoí iobi. Sunaitino diga omoí nabairillena jiaí omoí sunai.

¹⁶ Daje isoi omoí comeциаí lloillamona uri omoí i. Abina birioicaiñeno. Jamai bue isoidino diga nabairi. “Jiaie comini baifemo uiñoticaí” raiñeno.

¹⁷ Jiaie comini omoína jeare finoia, naimacina daje isoi jeare finoñeno. Ibana oñeno. Omoí marena illana jiaie comini uiñollena, marena omoí i.

¹⁸ Omoímona rafuena suiñoñeno. Nana comini diga uri omoí i. ¹⁹ Cue isiruigano, bu omoína jeare finoia, ibana oñeno. Jusiñamui naimacina duere finoite. Moisés micori iena jaie cuete: “Cai Nama llote: ‘Cominina duere finodicue. Ibana oiticue’ ” cuete. ²⁰ Ibana oñeno. Jusiñamui facaina lloraíma iena jaie jiaí cuela: “Omoí enoigamie aimetaia, naimiena eca. Naimie jiroiacania, naimiena jirote”. Ie mei naimie meire omoímo eruaite. ²¹ Jiaie comini omoína jeare finoia, iciriñeno; iadedi naimacimo mare rafuena fino. Iese omoí finoia, naimacina omoí dibeimo itataitomoí.

13

¹ Nana illaícominina naimaci ifomo Jusiñamuidi itataja jira, illaícomini lloga uaina nana cai ñnua. ² Illaícomini uaina bu ñnoñenia, Jusiñamuina jiaí ñnoñede. Ie mei Jusiñamui naimiena duere finoite. ³ Mare rafuena

finodinodi illaicominina jaciruiñedimaci; iadedi maraiñede rafuena finodino naimacina jaciruitimaci. Omoina duere finoñellena, mare rafuena finocana omoi jai. Iese omoi jaia, omoina marena ñaitimaci. ⁴ Jusiñamui facaina omoina canodimaci. Maraiñede rafuena omoi finoia, naimacina jacirui. Omoina duere finollena, naimacimo uai ite. Maraiñede rafuena finodimiena Jusiñamui facaina duere finoitimaci. ⁵ Ie jira naimaci uaina ñno, Jusiñamuimona omoi duere sefuiñellena. Omoina: “Mare” jiai raitimaci. ⁶ Gobierno omoina ibataia, Jusiñamui facaina naimaci maijia jira, iena iba. Naimaci raise maijillena, iena iba.

⁷ Gobierno omoina ibataia, iena iba. Illaicominimo iobillacinona feca. ⁸ Ra omoi oia, ibaño jaiño; iadedi coninina omoi isirui. Jiaie cominina isiruitimiedi nana Jusiñamui lloga uaina jai finode. ⁹ Moisés micori diga lletarafuena jaie cuete: “O aiñede riño diga iño. O iniñede ñima diga iño. Jiaimiena meineño. Rana fñño. Jiaimemo ite rana nicidoño” cuete. Jiai lletarafue ite: “Dani omoi abaina omoi isiruilla isoi, jiaie cominina omoi isiruilla”. Bie lletarafuena omoi ñnoia, nana lletarafuena jai ñnotomoi. ¹⁰ Jiaie cominina omoi isirua, naimacina jeare jai finoñedomoi. Jiaie cominina omoi isirua, nana Jusiñamui lloga uaina jai ñnotomoi.

¹¹ Iena birui cai finua. Jesucristo billiruidi iaiei jai ite. Naimiena cai nano ñnua facaiseconi, naimie billiruimo cai comeciaina facadica; iadedi nagarui naimie billirui iaiei iñoicaide. ¹² Jesucristo nia dane biñena jira, eniruemo cai illa jira, jitiredinomo iticai isoidicai. Naimie bia, naimie diga cai illemona, useredinomo raie ja iitica isoitica. Ie jira jeacinona finocana cai jaillana mai cai fainonocailli. Jesucristo rafue anamo raise cai illesa. ¹³ Cai marena illana nana comini uiñollena, mare rafuena finocana cai jailla. Jearede rafuena cai finoñena. Cai jifaiñena. Cai aiñede riño diga cai iñena. Cai furiñena. Cai abina uradoiñena. ¹⁴ Iese cai iñena; iadedi naimie caina namatallena, cai Nama Jesucristona raise cai nabailli. Cai jearede navui jitaillacinona finoacanamo cai comeciaina facañena.

14

Jiaie creyentena jeare ñaiño

¹ Cristona ñnotimiena omoi dine biade, naimiena raise feiño. Naimie Cristona nia raise ñnoñena, naimiena nafue; iadedi omoi isoi naimie ñnoñena, conima uina caitaño. ² Dajerie naga rana guitimaci; iadedi jiaimie difai guiga rana guite. Naimie riñede. Ie comecina facade: “Cue ría, jeacinona jai finoiticue”. ³ Naga rana guiñedimiena miñeno. Naga rana guitimiena miñeno. Jusiñamuidi naimacina jai feiñote. Ie jira miñeno. ⁴ Omoi facaina maijiñedimaci. Jusiñamui facaina maijidimaci. Jeacinona naimaci finoia, Jusiñamui naimacina duere finoite. Jeacinona finoi railanona, Jusiñamuidi naimacina canoite.

⁵ Dajerie creyentiai comeciaina facadimaci: “Judíuai rafue finuaruillai Jesuñamuina sedajitica, nairuillai jairuillai baifemo ualla jira”. Jiaino raitimaci: “Nagarui daje isoide” raitimaci. Nagamie ie comecina raise facajamona, ⁶ cai Namana iobitallena, nagamie ie jitaillaruimo cai Namana sedaite. Naga rana guitimie iobillacinona Jusiñamuimo fecajano, cai Namana iobitate. Naga rana guiñedimie iobillacinona Jusiñamuimo fecajano, cai Namana jiai iobitate.

⁷ Cristomo cai duilla jira, dani cai jitailla rafuena finonidicai. Cai fio-dailliruina jiai llonidicai. ⁸ Naimiedi cai finolle rafuena ocuide. Cai fio-dailliruina jiai lloite. Naimemo cai duilla jira, iese iticai. ⁹ Cristodi fiodaite. Ie

mei jillode. Ie jira naimie anamo iticai. Cai cajenia, naimie anamo iticai. Cai fiodaia, naimie anamo jiaí iiticai.

¹⁰ Naimie baifemo omoi iñena jira, jiaie creyentena miñeno. Naimie uaina caitañeno. Naimiedi Cristo díbeimo ite. Jusiñamui uicomo nana íco iiticai. Jusiñamuidi marañedínona duere finoite. Maredínona duere finoñeite.

¹¹ Isaías micorí jaie iena cuete:

Jusiñamuidi llote:

“Cue jaca illa jira, nana comíni cue uicomo cuena sedajanona, cuemo iobil-lacinona fecaitimaci” llote.

¹² Nainomo Jusiñamuimo nana cai finouiga rafuena lloiticai. Ie jira jiaie creyentiaí díga marena omoi í.

Jiaie creyentena jeacino finoí raillano, mare rafuedo cai jailla

¹³ Ie jira jiaie comínina cai miñena; iadedi mare rafuedo cai jailla. Jiaimiena jeacínona cai finotai raillano, mare rafuedo cai jailla. ¹⁴ Cai Nama Jesúmo cue duilla jira, naga ríga radi cuemona mare. Iena raise uiñoticue. Iena cue ríia, jeacínona finoñedicue. Iena uiñoticue; iadedi jiaimie comecina facade: “Biena cue ríia, jeacínona jai finodicue”. Naimie comecina iese facajamona, iena naimie ríia, naimiemona jeacínona jai finode. ¹⁵ O ríga ra muidona jiaie creyente comeci marañeno jaia, naimiena jai isiruiñedio. Cristo naimieri fiodaite. Ie jira naie isoide rana riñeno, naimiena Jusiñamuina faínonocaitañellena. ¹⁶ Ie jira o jitailla rana finoñeno. Jiaie comíni ona miñellena, naie rana riñeno. ¹⁷ Jusiñamui comínina cai illamona, cai guille ramo cai comeciaina cai eo facañena; iadedi marena cai illamo cai comeciaina cai facaja. Uri cai illamo cai comeciaina jiaí cai facaja. Iocíre cai illamo cai comeciaina jiaí cai facaja. Jusiñamui Joreño caímo illa jira, iese caína itataite. ¹⁸ Iese cai jaia, Cristona raise sedadicaí. Jusiñamuina iobitadicaí. Jiaie comíni caína marena jiaí ñaitimaci.

¹⁹ Ie jira uri icana cai jailla. Daní cai comeciaina ocuiñocana cai jailla. ²⁰ Omoi ríiacaga ra muidona, jiaie comínina Jusiñamuina faínonocaitañeno. Naga radi mare, rillena; iadedi bue isoide omoi ríia muidona, jiaimie Jusiñamuina faínonocaia, jeacínona jai finodomoí. ²¹ Bue isoide omoi ríia muidona, jiaimie jeacino finoí raillanona, iena riñeno. Bue isoide omoi jirua muidona, jiaimie jeacino finoí raillanona, iena jiroñeno. Bue isoide omoi finua muidona, jiaimie jeacino finoí raillanona, íe isoide omoi finoñeno. Naimiedi Cristomo jai duide. ²² Mare ra omoi finoia, omoi comeciaimona iena uiñotomoí. Jusiñamuidi omoi comeciaina uiñua jira, iena marefodo lloñeno. Omoi comeciaimona jeacínona omoi finoñenana uiñotomoí. Ie jira iocíre itomoí. ²³ “Nie isoide ra cue ríia, jeacínona finodicue” raillanomo bu iese comecina facaia, iena naimie riñena. Iena naimie ríia, Cristona naimie raise íñoñena jira, jeacínona jai finode. Jiaimiena jeacínona cai finotai raillano, mare rafuedo cai jailla.

15

Jiaie creyentena cai canua

¹ Cristo rafuedo raise jaidicaí; iadedi jiaíno Cristo rafuedo cai isoí nia jaíñedimaci. Naimacina cai canua. Ie jira daní cai jitaílle rafuena finoñeiticaí; ² iadedi Cristo rafuedo naimaci raise jaillena, jiaie comínimo cai comeciaina cai facaja, naimacina cai canollena. ³ Eníruemo navui naimie ía, Cristo íe jitaílla rafuena jiaí finoñede; iadedi Jusiñamui jitaílla rafuena finode. Naimiedi duere sefuide. Jusiñamui facaina lloraíma micorí Cristo ñaíana jiaí cuete: “Jusiñamuina jeare ñaíacadímacímo, cuena jiaí jeare ñaitimaci”

cuete. ⁴ Naiemona cai fueollena, naiemona cai comeciaí ocuiñotallena, Jusiñamuina jaie cuezafuiaídi caimo ite. Naiemona Jusiñamui illanomo cai illemo ocuridícaí. ⁵ Jusiñamui cai comeciaína ocuiñotade. Naimie coniniri omoína uri itatajana jitaídícue. Cristo Jesús llua isoi, omoi uri illana jitaídícue, ⁶ daje isoi omoi comeciaí lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaídícue.

Judíuaiñedínodí Cristo rafuena jiaí cacadímaci

⁷ Jiaie illanomona creyente omoi roracomo bia, Cristo caina feiñua isoi, Jusiñamuina iobitallena, naimiena raise omoi feiño. ⁸ Iena nia lloítícue. Judíuaina canollena, Jusiñamui lloga uaina fuidollena, Cristodí bite. Jusiñamui tainona lloñede. Jusiñamui naimaci jaiagai micoriaímo ico suille rafuena jaie llote. Eniruemo billanona, Cristo iena fuiduaíbite. ⁹ Judíuaiñedíno Jusiñamuina iobitallena, Jusiñamui naimacina duenailla jira, Cristodí bite. David micorí Cristo llua jaie cuete:

Judíuaiñedíno motomo cue illamona ona iobitaitímaci.

Ruamona cue muidona ona jiaí iobitaitímaci.

¹⁰ Moisés micorí jiaí cuete:

Judíuaiñedíno, Jusiñamuimo duide comíni díga iobi.

¹¹ David micorí jiaí cuete:

Nana judíuaiñedíno, Jusiñamuimo iobillacinona fecá.

Nana comíni naimiemo iobillacinona fecacabillasa.

¹² Isaías micorí cuete:

Isaí micorí uruiaímona damie comuitajamona, naimiedi judíuaiñedínona sedaite.

Naimie naimacina jillobitallena, naimiemo ocuritímaci.

¹³ Jusiñamui iemo omoína ocuritate. Naimiena omoi ñnuanona, naimie omoína caimare itatajana jitaídícue. Uri itatajana jiaí jitaídícue. Iemei Jusiñamui Joreño naimie siño uai díga omoi jilluamo omoína ocuritaite.

¹⁴ Cue amatiaí, omoína uiñotícue. Eo maredomoi. Cue lloga rafuena eo uiñotomoi. Coninina llofueredomoi. ¹⁵ Iena omoi comecillena, dafuerie rafuena omoímo marefodo cuetícue. Jusiñamui cuena fetuanona, ie rafuena cue lollena, cuena orede. ¹⁶ Judíuaiñedíno Jusiñamui ie mare rafuena cue lollena, Cristo Jesús facaina maijídícue. Jusiñamui díbeimo naimacina cue itatajanona, Jusiñamui naimacina feiñollena, naimacimo lloítícue. Jusiñamui Joreñodí naimacina jiaí maretáite.

¹⁷ Jusiñamui díbeimo cue maijía jira, Cristo Jesús muidona cue maijári iobidícue. ¹⁸ Cue maijiana marefodo lloítícue. Judíuaiñedínona Jusiñamuina ñnotallena, Cristodí cuena canode. Cue llua cacadímaci. Cue illana ciódimaci. ¹⁹ Cristodí cuena siño rafuena finotate. Jusiñamui Joreño uaido cuena finotate. Iemei Cristona jai ñnotímaci. Jerusalémona Ilírico railla enirue díno Jusiñamui Cristo ie mare rafuena ailluena comínimo raise jai lloítícue.

²⁰ Nainomo Cristona nia uiñoñedíno díne navui cue jaiacana jira, nainomo Cristo rafuena lluaídícue. Jai cacadíno illanomo cue jaiacaiñena jira, nainomo lluaíñedícue. ²¹ Isaías micorí biena jaie cuete:

Cristo rafuena nia cacaiñedínodí iena cacaitímaci.

Naimiena uiñoítímaci cuete.

Romamo Pablo jaiacade

²² Nainomo cue maijíaacana jira, Romamo omoi díne nia jaiñedícue. ²³ Díga nairáimo Cristo rafuena bene jai cue llua jira, cue maijille bene jai ññede. Díga años omoi díne cue jaiacana jira. ²⁴ Españamo cue jaia, omoi díne jaitícue.

Omoï diga nano nigarui caimare ñaiticue. Ie mei España mo cue jaillena, cuena canoitomoi. ²⁵ Omoï dine jaiticue; iadedi Jerusalémo ite creyentiaina cue canollena, nainomo nano jaiticue. ²⁶ Macedoniamoi ite creyentiaidi ucubena ofitatimaci. Acayamo ite creyentiaidi ucubena jiai ofitatimaci. Jerusalémo ite duerede creyentiaina canoacadimaci. Jerusalémo ite creyentiaina canollena, iena birui uiticue. ²⁷ Iena fecaacadimaci. Judíuainedimaci; iadedi judíuaina canoacadimaci, naimacimo Cristo rafuena navui judíuaini llua jira. Ie jira naimacina birui canodimaci. ²⁸ Naimacimo bie ucubena raise cue fecaja mei, España mo cue jaillemona, omoï dine nano jaiticue. ²⁹ Omoï dine cue ria, naimie rafuena cue lollena, Cristo cuena raise canoite.

³⁰ Cue amatiaï, cai Nama Jesucristomoi omoï duilla muidona, Jusiñamui Joreño coniniña omoïna isiruitaja muidona, Jusiñamui omoï jiaï, cue facaina jiaï omoï jii. ³¹ Judeamo ite creyenteñedinomona cue jillobillena, Jerusalémo ite creyentiaimo cue fecaacalle ucubena naimaci raise feiñollena, cue facaina omoï jii. ³² Jusiñamui jitailla isoi omoï dine iocire cue rillena, iese omoï jii. Iemei omoï diga cue illemona, jafaicina oiticue. ³³ Jusiñamui omoïna uri itatajana jitaïdicue.

16

Romamo itinomo Pablodi ie uaina orede

¹ Febe raillañaiño omoï dine jaite. Naiñaiño omoï uiañuana jitaïdicue. Naiñaiñodi creyente. Cencrea railla nairai iñaiño. Cristo ñibeimo maijiano, nainomo ite creyentiaina canocabide. ² Cristomoi omoï duilla muidona, jiaïe creyentiaina cai feiñoiacacabilla isoi, naiñaiño raise feiño. Diga comina naiñaiño canua jira, naiñaiño jitaïlle ñiese cano. Curna jiaï canode.

³ Priscila ñine cue uaina oredicue. Naiñaiño ini Aquila ñine cue uaina jiaï oredicue. Cristo Jesús facaina cue diga maijiaïmaiaï. ⁴ Cue facaina niadedi fiotaïiaïmaiaï. Ie jira iaïmaiaïri iobidicue. Diga nairaimoi judíuainede creyentiaï itimaci. Cuemona Cristo rafuena cacadimaci. Cue facaina iaïmaiaï niadedi fiotaïlla jira, iaïmaiaïri jiaï iobidimaci. ⁵ Iaïmaiaï jofomoi rollena bitino ñine cue uaina oredicue. Epeneto ñine cue uaina jiaï oredicue. Cue isiruigamie. Asia railla enruemo itinomona naimiedi Cristona nano inotimie.

⁶ María ñine cue uaina oredicue. Omoïna canollena, omoï motomoi maijide. ⁷ Andrónico ñine cue uaina oredicue. Junias ñine cue uaina oredicue. Naie iaïmaiaïdi cue comini. Cárcelmo danomoi navui iticai. Jesucristo oretaganodi iaïmaiaïna marena ñaitimaci. Naimiena ñia cue inoñena facaise Cristona inotiaïmaiaï.

⁸ Amplias ñine cue uaina oredicue. Cristomoi naimie duilla jira, naimiedi cue isiruigamie. ⁹ Urbano ñine cue uaina oredicue. Cristo facaina cai diga maijicabide. Estaquis ñine cue uaina oredicue. Cue isiruigamie. ¹⁰ Apeles ñine cue uaina oredicue. Cristomona naimiedi mare rafuedo jaicabide. Aristóbulo jofomoi itino ñine cue uaina oredicue. ¹¹ Herodión ñine cue uaina oredicue. Naimiedi cue comini. Narciso cominimona dajerie inotimaci. Naimaci ñine cue uaina oredicue. ¹² Trifena ñine cue uaina oredicue. Trifosa ñine cue uaina oredicue. Cai Nama facaina maijiaïñuaini. Pérsida ñine cue uaina oredicue. Cue isiruigañaiño. Cai Nama facaina eo maijide. ¹³ Rufo ñine cue uaina oredicue. Cai Namana eo raise inote. Naimie ei ñine cue uaina jiaï oredicue. Naiñaiñodi cue ei isoide. ¹⁴ Asíncrito ñine cue uaina oredicue. Flegonte ñine cue uaina oredicue. Hermas ñine cue uaina oredicue. Patrobas ñine cue uaina oredicue. Hermes ñine cue uaina oredicue. Naimaci illanomoi ite creyentiaï ñine cue uaina oredicue. ¹⁵ Filólogo ñine cue uaina oredicue.

Julia ðine cue uaina oredicue. Nereo ðine cue uaina oredicue. Naimie miriño ðine cue uaina oredicue. Olimpás ðine cue uaina oredicue. Nana naimaci illanomo ite creyentiaí ðine cue uaina oredicue.

¹⁶ Conini caimare omoi uaido. Diga nairaimo creyentiaí itimaci. Nana naimaciði omoi ðine naimaci uaina oredimaci.

¹⁷ Cue amatiaí, daje rafuena nia lloiticue. Omoi comeciaí daje isoi lloitañedino diga nabairiño. Uai uaitacabidino diga nabairiño. Omoi jai cacaja rafuena lloñedimaci; iadedi jiaie rafuena llotimaci. Naimaci diga nabairiño. ¹⁸ Cai Nama Jesucristo facaina maijiñedimaci; iadedi ðani naimaci jitailla rana maijicabidimaci. Mare isoide llumona abina raise uiñoñedinona jifuetimaci. ¹⁹ Ailluena cominidi Cristona omoi ñnuana uiñotimaci. Ieri iobidicue. Marecinona finuana raise omoi uiñuana jitaídicue. Marañedicionona omoi finuana jitañedicue. ²⁰ Jusiñamuidi omoína uri itatate. Naimie omoína canoite, Taifena anafetallena. Cai Nama Jesucristo omoína duenaillesa.

²¹ Omoi ðine Timoteo ie uaina orede. Cue diga jiaí maijicabide. Lucio ie uaina jiaí orede. Jasón ie uaina jiaí orede. Sosípater ie uaina jiaí orede. Naimaciði cue comini.

²² Terciodicue. Pablo facaina bie cartana omoimo cueticue. Cai Namamo cue duilla jira, omoimo cue uaina oredicue.

²³ Gayodi ie uaina jiaí orede. Naimie jofomo ricabidicue. Creyentiaídi naimie jofomo rocabitimaci.

²⁴ Erasto ie uaina orede. Naimiedi bie nairaí ie ucube eenoraíma. Cuarto ie uaina orede. Naimiedi jiaí creyente.

Jusiñamuimo iobillacinona jaca cai fecajasa

²⁵ Cue mare rafue llua isoi, Jusiñamui omoi comeciaina ocuiñotarede. Jesucristo rafuena llocabiticue. Jusiñamuidi cominimo naie rafuena jaie uiñotañede; ²⁶ iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriaí iena jaie cuetimaci. Jusiñamui llua jira, Cristona comini ñnollena, nana cominido bie rafuena llocana birui jaide. Jusiñamuidi jaca ite.

²⁷ Jusiñamuidi naga rana uiñote. Naimiemo Jesucristo mamecido iobillacinona jaca cai fecajasa. Mai. Macaibaite. Pablodicue.

CORINTOMO ITE CRISTONA HNOTINOMO PABLO NANO ORETAGA RABE

Corintomo ite creyentiaimo Pablo cartana orede

¹⁻² Corinto railla nairaimo ite creyentiaí, ¿nie isoidomoi? Pablodicue. Carta omoimo oredicue. Jusiñamui jitailla jira, Jesucristo rafuena cue lollena, cuena fetode. Sóstenes cue diga illa jira, omoi dine coco uaina oredicoco. Jesucristo díbeimona naimiedi caí ama. Jai Jusiñamui cominidomoi. Jesucristomo omoi duilla jira, Jusiñamui omoína jai marebicaitate. Jusiñamui omoína fetode, naimie iena. Ua nana caí Nama Jesucristona sedadinodicaídi Jusiñamui iena. ³ Caí Moo Jusiñamui, caí Nama Jesucristo diga, omoína jai duenaite. Iena uiñocana maí omoi jai. Iaimaiaí omoína uri jai itatatiamaiaí. Iena omoi uiñocana maí omoi jai.

Cristo muidona Jusiñamuimona ailluena feiñoticaí

⁴ Jusiñamui diga cue ñaia, omoi facaina iobillacinona jaca fecadicue. Jesucristomo omoi duillamona, Jusiñamui omoína jai duenaite. Ie jira naimiemo omoi facaina iobillacinona jaca fecadicue. ⁵ Jusiñamui omoína duenaillamona, ie rafuena omoi lollena, naimiemonona ailluena uaina feiñotomoi. Cristomo omoi duillamona, naga icaíño Cristo rafuena omoi jino lloia, omoína eo canode. Omoína naimiemo ite rafuena raise uiñotade. ⁶ Ie muidona Cristo rafuena raise hnotomoi. Cristo rafuena caí jino luamona, naimiemo raise hnofidomoi. ⁷ Ie muidona Jusiñamuimona omoimo jaca buena fiebiñede, naimie díbeimo omoi raise maíjillena. Naimie díbeimo omoi raise maíjamona, naimie díbeimo jiaie creyentiaína raise itatacana jaidomoi. Caí Nama Jesucristo abido billemo iocire omoi ocuirillanona, Jusiñamuimona ailluena rafuena feiñotomoi. ⁸ Jeacinona omoi finocabi raillano, naimie nia abido biñelle dinori Jesucristo omoi comeciaina raise sedaite. Caí Nama Jesucristo abido bia, nicino omoimo iñena muidona, omoína duere finoñeite. Naimie bia, naimacimo jeacino nia illa jira, naimiena hñoñedinona duere finoite. ⁹ Jusiñamui ie lloga uaina jaca finoite. Naimie hñogamie. Naimie Jitona omoi nabaillena omoína fetode. Naimie Jitodi caí Nama Jesucristo.

Naimaci comeciái daje isoi lloñedinacai

¹⁰ Cue amatiaí, omoimo rafuena lloiticue. Caí Nama Jesucristomo omoi duilla jira, iena lloiticue. Omoi comeciái daje isoi lloillana jitaídicue. Daje isoi omoi comeciái facajana jitaídicue. ¹¹ Cloé raillamie cominimona bie rafuena cue fídia jira, iese omoimo lloticue. “Omoi comeciái daje isoi iñedomoi” naimie llote. ¹² Omoimona damierie raitomoi: “Dani Pablo llofuia díbecinodo jai jaidicaí”. Damierie raitomoi: “Dani Apolos raillamie llofuia díbecinodo jai jaidicaí”. Damierie raitomoi: “Dani Pedro llofuia díbecinodo jai jaidicaí”. Damierie raitomoi: “Dani Cristo llofuia díbecinodo jai jaidicaí” raitomoi. Nana iese itomoi. Iemonona omoi comeciái daje isoi iñedomoi. Cloé cominimona iese fididicue. ¹³ Ero, diga omoi Jilloitaraini iñede. Omoi jeacinomona omoi jillobillena, dama Cristo illa. Omoi facaina cruzmo cuedi fiodañedicue. Cue díbeimo omoi illena cue bautizañegaomoi. ¹⁴ Omoína cue bautizañena jira, omoimo ite rafue cuemonona comuiñena jira, iobidicue. Dama Crispona bautizadicue. Gayona jiaí bautizadicue. ¹⁵⁻¹⁶ Estéfanos jofomo ite cominina bautizadicue. Jiaie cominina cue bautizajana comeciñedicue. Ie muidona: “Pablo facaina bautizadicaí” llonidomoi. Daje isoi omoi comeciái lloñenia, cue muidonañede. ¹⁷ Ailluena cominina cue bautizallena, Cristodi

cuenta oretañede; iadedi naimie rafuena cue llofuellena, cuenta oretate. Eo abina uñoraima isoi omoimo cue llofueticuedena, cue lloga rafuemo omoi comeciaina facañedomoi. Ie jira eo abina uñoraima isoi omoimo llofueñedicue. Cristo fiodaillamona, omoi jeacinomona naimie omoina jillotate. Iena omoi feitañenana jitaídícue.

Cristo finoca rafuemonu Jusiñamui uai siñonana uñotícaí

¹⁸ Cristona ñnoñedinomona cruzmo Cristo fiodailla rafuedi jamaífue. Naimacidi faíficana jai jaidímaci. Jusiñamuimona naie rafue illa jira, caimona naie rafuedi siño. Naie uaidi díga comini comeciái meidorede. Caidi naie rafuena ñnotinodícaí. ¹⁹ Ero, Jusiñamui facaina lloraima micori Cristona ñnoñedinona jai e cuete:

Jusiñamui llote: “Abina uñoraini imaci uñuacinona saitaitícue.

Abina baitadino imaci baitajacinona saitaitícue” llote.

Ie muidona naie isoide comini jilloñenana jai uñotícaí.

²⁰ Naie isoide comini uñuacinomona jaca jillonidícaí. Abi uñoraima uñuacínodi Cristo fiodailla rafue baífemo faíñede. Moisés micori cueda-fuena uñoraima uñuacínodi Cristo fiodailla rafue baífemo faíñede. Uaina uaitatímie birui ite uñuacínodi Cristo fiodailla rafue baífemo faíñede. Jusiñamuidi naimiena uñnoñedinomona imaci abi uñuacinona jai jamaitate. Iena naimie jamaitajamona, naimaci uñuacínodo naimaci jilloñenana jai uñotícaí.

²¹ Ie jitaillacino díese Jusiñamui finua jira, naimaci abi uñuacinomona naimiena ñnoñedinomona. Ie jira naimie mare jitaillacinomona, naimiena ñnotinona jai jillotate. Naimaci jeacinomona naimacina jai jillotate. Cristo rafuena caí llumona ñnotimaci. Jusiñamuina ñnoñedinodi naie rafuena: “Jamaífue” raitímaci.

²² Siño rafuena naimaci cioacana jira, judúuai railla cominidi íese raitímaci: “Siño rafuena Jusiñamui finoa, omoi lloga rafuena ñnotícaí” raitímaci. Grieguai railla comini díenena raitímaci: “Omoi lloga rafuena caí abina uñuacino íe isoi itena, íena ñnotícaí” raitímaci; ²³ iadedi Cristo rafuena llocana jaidícaí. Cruzmo naimie jai fiodaillana llotícaí. Ie jira judúuaidi caí lloga rafue muidona íciritímaci. Naiena oiacaíñenano íciritímaci. Damie naimaci illaímama jaillemo ocuiridímaci. Naimaci ocuirillamie fiodaillamo naimaci comeciaina facañedinomona. Cristo fiodailla jira, raitímaci: “Naimiedi caí ocuiríñenamie” raitímaci. Judúuaiñedinomona díenena raitímaci: “Omoi lloga rafuedi jamaífue” raitímaci. Ailluena comini caí lloga rafuena jitaíñedinomona; ²⁴ iadedi Jusiñamui damierie judúuaina jai fetode. Dajerie judúuaiñedinomona jiaí jai fetode. Cruzmo Cristo fiodaillamona, jeacino anamona naimaci jillua jira, naie fetocano díenena Jusiñamui uai siñonana uñotímaci. Cristo finoca rafuedo naimaci jilluamona, Jusiñamui abina uñuana jiaí uñotímaci. ²⁵ Jusiñamui Cristona orede, caí jeacino facaina naimie fiodaillena. Jusiñamuina ñnoñedinomona Cristo finoca rafuedi jamaífue. Ebinidífue. Caimona Cristo finoca rafuedi Jusiñamui ñnoñedinomona uñuacino baífemo faíte. ²⁶ Cue amatíai, Jusiñamui omoína navui fetode; iadedi ¿nie isoidomoi? Jamai bue isoidomoi. Omoi comeciaina íemo faca. Jusiñamuina ñnoñedinomona abina uñnoñedomoi. Omoi creyentíai díbeimo eo abi uñnotino raise íñedinomona. Omoi creyentíai díbeimo illaícomini raise íñedinomona. Omoi creyentíai díbeimo ucuberedino raise íñedinomona. Jusiñamui íe isoidinona eo fetofede; ²⁷ iadedi abina uñnoñedinomona raillanodomoina fetode, eo abina uñnotino díenena meidaillena. Illaícominiñedinomona jiaí fetode, illaícomini díenena meidaillena. ²⁸ Jamai bue isoidinona fetode, jamai bue isoíñedinomona baífemo faíllena. Jusiñamuimona jamai bue isoíñedinodi

jamai comini. ²⁹ Ie muidona jaca buna Jusiñamui uicomo abina iedoñena. ³⁰ Caina ie cominina Jusiñamui jaitaja jira, Jesucristomo duidicai. Cristomona Jusiñamuina uiñoticai. Cristo fiodailla jira, Jusiñamui cai jeacina feitate. Iemona jeacino cai finoñellena, caina canocabide. Jusiñamuidi jeacino anamona caina jiai jai jillotate. ³¹ Jusiñamui facaina lloraima micori iena jaie cuete: “Bu abina iedoiacania, nana Cristo finoca rafue diga naimie abina iedua” cuete.

2

Pablodi cruzmo Cristo fiodailla rafuena llocabite

¹ Cue amatiai, omoi dine navui cue rillamona, Jusiñamuimona cue feiñoga rafuena llofueticue. Omoi baifemo eo abina uiñoticuedena, iese niade llofueñedicue. ² Daje rafuemo cue comecina facacabidicue. Ie jira omoimo dama Jesucristo rafuena llofueiacadicue. Cruzmo naimie fiodailla rafuena llofueiacadicue. ³ Omoi motomo navui cue ia, meiruiocaillamona jacinaioidicue. Jusiñamui facaina cue raise jino lloñeni raillano jaciuioidicue. ⁴ Comini abi uiñuacinodo omoimo llofueñedicue; iadedi omoi jeacinomona omoi jilluamona, Jusiñamui Joreñodi omoina cue lloga rafue siñonana uiñotade. ⁵ Jusiñamuidi cue iese llofuiana jitaide. Comini abina uiñuacinona omoi cacajamona, Cristona ñnoñedomoi; iadedi Jusiñamui omoina jillotaja jira, jai ñnotomoi.

Jusiñamui Joreñodo bie rafuena uiñoticai

⁶ Comini abi uiñuacinodo llofuecabiñedicue; iadedi Jusiñamuimona ite abi uiñuacinodo llofueticue. Cristona raise ñnofidinomona abi uiñuacinodo llofueticue. Cristo facaina llorainidi cue isoí jiai llofuecabitimaci. Cominimo jai ite uiñuacinodo llofueñedicai. Illaicomini uiñogacinodo llofueñedicai. Ico faifitimaci. Ico jiai uainicaitimaci. Ie jira naimiaci uiñogacinodo llofueñedicai; ⁷ iadedi Jusiñamuimona abi uiñuacinona cai feiñuamona, iedo llofueticai. Nano dofoconi, enirue nia finoñenia, naimie comeci iena uiñote. Monamo naimie ebirede illanomo ico cai illena jitaide. Iena jaie cai uiñoñedicai. Jusiñamui jaca buna iena jaie uiñotañede. ⁸ Birui ite illaicominidi Jusiñamuimo ite rafuena nia uiñoñeditimaci. Iena uiñotimaciden, cruzmo cai ebirede Namana meineñeditimaci. Naimie uai ebirede. Nana ra naimie jai finua jira, naimie uai siño. Jusiñamui rafuena raise uiñoñeditimaci; iadedi Jusiñamui caina iena uiñotade. ⁹ Jusiñamui facaina lloraima micori iena jaie cuega:

Jaca buna naimiena ñnotino facaina Jusiñamui finoca rafuena cioiñede.

Jaca buna iena cacaiñede.

Jaca buna iemo comecina facañede

cuega. Jusiñamui rafuena uiñoñedin naie rafuena jaca uiñoñeditimaci; iadedi naimiena isiruitino naie rafuena uiñotimaci. ¹⁰ Birui Jusiñamui caina iena uiñotade. Ie Joreñodo caina uiñotade. Ie Joreño naga rafuena uiñote. Nana Jusiñamui comecimo iticinona jiai uiñote.

¹¹ Jaca budi jiaimie comecimo iticinona uiñoñede. Dama naimie iena uiñote. Ie isoide. Jaca budi Jusiñamui comecimo iticinona uiñoñede. Dama naimie Joreño iena uiñote. ¹² Jusiñamuimona ie Joreña jai feiñoticai. Jiaie cominimona naie Joreña feiñoñedicai. Jusiñamui Joreñodi caina Jusiñamui caimo caidiñeno fecaca rafuena uiñotade. ¹³ Omoimo naie rafuena llofuecabiticai. Cominimona fueoga uaido llofueñedicai; iadedi Jusiñamui Joreño caimo llofua uaido llofueticai. Ie jira Jusiñamui Joreño ite cominimo naie rafuena llofuecabiticai. ¹⁴ Jusiñamuina ñnoñedinodi Jusiñamui Joreñomona

iticinona feiñoñedimaci. Naimacimona naie rafue jamaifue. Iena cacañedimaci. Iena jiai uiñoñedimaci. Dani Jusiñamui Joreño illa cominidi naiemo cacarefidimaci. ¹⁵ Nana Jusiñamui jitailla rafue diese cacadimaci. Jusiñamuina ñnoñedinodi Jusiñamui Joreño illa comini illa rafuena jiai raise uiñoñedimaci. ¹⁶ Jusiñamui facaina lloraima micori iena jaie cueba: “Jaca buna Jusiñamui comecimo iticinona uiñoñede. Budi naimiena jiai llofuenide” cueba. Ero Cristo comecimo iticinona cai uiñua jira, Jusiñamuina ñnoñedinodi caina raise uiñoñedimaci. Caina jiai llofuenidimaci.

3

Danomo Jusiñamui dibeimo maijidimaci

¹ Cue amatiai, Jusiñamui Joreño anamo itinona omoi raise itomoidena, omoina llofueñedicue. Omoi jitaillacinodo nia omoi jailla jira, omoina llofueticue. Cristo rafuedo janore jai jaidomoi. Jusiñamui uruiaina jai jaidomoi; iadedi monoi ijina jirode urue isoidomoi. Jusiñamuimona nia moonañedomoi isoidomoi. Creyentiaina omoi jailla mei, Cristo rafuedo eo jaiñedomoi. ² Feinide rafuena navui llofueticue. Eo feirede rafuena omoimo llofueñedicue. Omoina iena nia llofueñedicue. Omoi uruia; janore moonaila mei, guitimaci. Ie isoide. Cristona cai ñnua mei, naimie rafuena ñnocana cai jailla; iadedi omoi raise jaiñena jira, Jusiñamuimona nia moonañedinoo isoidomoi. ³ Nia omoi jitaillacinodo jaidomoi. Jusiñamui Joreño anamo nia raise iñedomoi. Coninina abina uradoidomoi. Omoi comeciai daje isoi lloñedomoi. Jusiñamuina ñnoñedinoo isoi nia itomoi. Jamai ebe isoi nia itomoi. ⁴ Omoimona damerie: “Pablo llofua dibeconodo jaidicai” raitomoi. Jaiño: “Apolos raillamie llofua dibeconodo jaidicai” raitomoi. Iese omoi raia, Jusiñamuina ñnoñedinoo isoi itomoi. Ie jira iese raiño.

⁵ Jamai bue isoidicue. Apolos jiai jamai bue isoide; iadedi Jusiñamui dibeimo coco maijiamona, Cristo rafue coco llofuiamona, iena ñnotomoi. Jusiñamui cocomo llua isoi, ie rafuena lloticoco. ⁶ Naie rafuena cue llofuiamona nano ñnotomoi. Ie mei Apolos iena dane llofue. Iese llofueuidicoco; iadedi dama Jusiñamui omoina naie rafuena ñnotacana jaide. ⁷ Ie muidona naiemona cai fueua. Jamai bue isoidicoco. Jusiñamui coco baifemo faite. Ie jira naimie omoina ñnocana jaitate. ⁸ Daje uaina Apolos diga maijidicue. Coco maijia diese Jusiñamuimona coco ibana feiñoticoco. ⁹ Jusiñamui facaina maijidicoco; iadedi naimiedi omoina ñnocana jaitate. Naimiedi omoi comeciaina marena itatacana jaitate. ¹⁰ Jusiñamui cuemo llua isoi, naimie cuena canua diese, Cristo rafuena llofueticue. Cristo rafuena eo cue uiñuamona, Cristo rafuena omoimo navui llofueticue. Cue lluamona Cristona ñnotomoi. Birui jiaimie omoina naie rafuena jai llofue. Omoi comeciamoo naie rafue raise itabillena, omoina llofue. Bu omoina llofueia, omoi comeci marena illacinomo naimie comecina facajanona, omoina naimie llofuecabilla. ¹¹ Omoi jeacinomona omoi jilloillena, jaca daje rafue ite. Jiaie rafuedi iñede. Iena omoimo jai llofueticue. Naie rafuedi Jesucristona ñaite. ¹² Iena raise atona bu llofueia, uanaicinona jaca llofuiamona, cominina Cristona ñnocana jaitate. Naie rafuedi naimaci comeciamoo raise itabide. Iena raise atona bu llofueñenia, uanaicinona jaca llofueñenia, cominina Cristona ñnocana jaitañede. Naie rafuedi naimaci comecimo raise itabiñede. ¹³ Jusiñamuidi nagamie ie llofuiacinona ico lloite. Jesucristo abido bia, Jusiñamui nie isoidicinodo naga naimie facaina maijidinoo llua lloite. Naimaci llogacinona eo facacite. ¹⁴ Ie mei Cristo rafuena raise atona llotinodi Jusiñamuimona ibana feiñoitimaci. ¹⁵ Cristo rafuena raise atona lloñedinodi

Jusiñamuimona ibana feiñoñeitimaci. Naimaci niade jiai faifitimaci; iadedi faifiñeitimaci. Jusiñamui diga jaca iitimaci; iadedi tainomo maijidimaci.

¹⁶ Jusiñamui ie illano omoi comeciaino illana uiñotomoi. Naimie Joreño omoimo illa jira, Jusiñamui ie illanodi omoi creyentiai. ¹⁷ Cristo dibeimona omoi creyentiaina bu abido danomo itataia, Jusiñamui naimiena duere finoite. Jusiñamui omoimo jai illa jira, naimiemo jai duidomoi. Ie jira naimie dibeimona omoina itatatimiena duere finoite.

¹⁸ Bie rafuedo omoi raise jaillena, dani omoi abiaina jifueño. Creyenteñedino uiñuacino jaiño. Omoimona bu iedo jaiacania, naimiemo llono: “Naie isoide rafuedo o jaiño”. Iedo naimie jaia, creyenteñedinomona abina uiñoite; ia Jusiñamuimona abina uiñoñeite. Jusiñamuimona abina uiñotinona omoi jaillena, creyenteñedino uiñuacino omoi jaiño. ¹⁹ Jusiñamuimona naimiena ñnoñedino uiñuacino jamaifue. Jusiñamui facaina lloraïma micori jai euega: “Jusiñamuidi comini abi uiñuacino uiñuana, naimacina jai emodofide. Naimacina jai duere finode”. ²⁰ Jiai euega: “Jusiñamuidi abi uiñotino railla comini imaci comeciã facajacino jamaifueña uiñote”. ²¹ Ie jira omoi llofuerainiri abi iedoño. Jusiñamuimona nana rafue omoimo jai illa jira, naimaci abi uiñuacino abina iedoño. ²² Mareña omoi comeciã illacino jitaï raillano, Cristo omoi dine cana oretate. Cuena oretate. Apolona oretate. Pedrona oretate. Naiemona omoi ra ollena, omoi jitaï raillano, eniruedi ite. Omoi jitaï raillano, birui nana omoimo ite rafuedi suide. Omoi jitaï raillano, jairuido nana omoimo ite rafuedi suite. Nia omoi fioidañena, Cristo omoina canoite. Omoi fioidaia, naimie dine jaitomoi. Naiemona mareña omoi comeciã illacino jitaï raillano, ua nana rafue omoimo jai ite. ²³ Cristomo omoi jainaiãlla jira, naimie anamo itomoi. Jusiñamuimo Cristo jainaiãlla jira, naimie Jusiñamui jitaïlla rafueña jaca finocabide. Ie jira naimie jitaïllacino finocana omoi jai.

4

Cristo fetocano naimie dibeimo maijide

¹ Caïmo omoi comeciaina faca. Cristo dibeimo maijidicai. Jusiñamui rafueña llocana jaidicai. Iena jai e uiñoñedicai; iadedi naimie cana uiñotaga rafueña birui llofueticai. ² Ero, naga patrõdi naimie dibeimo maijidino naimie lloga uaina ñnuana jitaide. Ie isoide. Jusiñamuidi ie facaina lloraïni naimiena naimaci ñnuamona naimie rafueña raise lluaña jitaide. ³ Cue uaina omoi uaitañena, iena omoi uaitaia, jiaïno iena uaitaia, iemo comeciã facañedicue. ⁴ Cuemo nicino ia, iena uiñoñedicue; iadedi Cristomona cue comeciã jecino nibai ite. Ia, naimie cuemo lloite. Iemona cuena duere finoite. ⁵ Ie jira: “O llucino mare” cuemo lloño. “O llucino marañede” cuemo jiai lloño. Cai Nama nia abido biñena, iena cuemo omoi lloño. Naimie bia, nana comini comeciaino ite rafueña uiñotaite. Naimaci comeciaino ite jitaïllacino uiñotaite. Iemona naimaci maijia dinori Jusiñamuimona iobillacino feiñoitimaci. Naie facaise cuemo ite rafueña lloite. Ie jira nia cuemo lloño.

⁶ Cue amatiai, naie rafueña omoi raise uiñollena, Apolona ja ñaiticue. Cocomona omoi fueollena, cuena jiai ja ñaiticue. Omoi facaina ñaiticue. Jusiñamuina euegafue llua isoi, omoi illana jitaïdicue. Omoi lloraïniri tainomo iobiño. Omoi Cristo facaina lloraïnimona damie jai e lloraïma baifemo faïamo omoi comeciaina facañeno. ⁷ Nana omoi llofuerainidi daje isoidimaci. Jusiñamuimona nana naimacimo ite uaina feiñotimaci. Dani naimaci comeciainomona iena naimaci õena jira, ie diga abina iedoño.

8 “Nana Jusiñamuimona iticinona jai feiñotícaí. Jusiñamuimona nana cai jitaillacinona caimo jai ite. Jusiñamui sedajanomo illainina isoi jai itícaí” omoí comeciaina facadomoí; iadedí nia iese iñedomoí. Nainomo itomoidena, nainomo coco jiaí illa jira, cuemona eo mare. Nainomo iticocodena, cuemona eo mare; iadedí jiaíe rafuemo cue comecina jai facadicue. 9 Jusiñamuidí nana omoína cue baifemo faitatate raillanomo cue comecina facadicue. Cristo rafuena llorainidícaí; iadedí cue baifemo omoí faíamo cue comecina facadicue. Omoímona jamai bue isoidícaí. Nana comíní duere caí illamo raise eruaidímací. Jusiñamui jaienisaídí duere caí illamo jiaí eruaidímací. 10 Cristo rafuena caí llua muidona, omoímona ebe isoidícaí. “Cristo rafuena raise ñnuanona, iedo raise jaidícaí” raillanomo omoí comeciaina facadomoí; iadedí Jusiñamuimona iese iñedomoí. Omoímona caí uaidí raise baiñede. “Cai uaidí caímo raise baite” raillanomo omoí comeciaina facadomoí; iadedí Jusiñamuimona iese iñedomoí. Omoímona jamai bue caí isoilla jira, caíri jaisitomoí. “Jiaíe comíní caíri iobidímací” raillanomo omoí comecina facadomoí; iadedí Jusiñamuimona iese iñedomoí. 11 Cai guille buedí jaca iñede. ñiroinidícaí. Jiaíe comíní caína duere finodímací. Jofonidícaí. 12 Cai ra ollena, caí onollí diga duere maijidícaí. Comíní caína jeare ñaitímací; iadedí íbana oñedícaí. Naimací diga marena ñaitícaí. Caína duere finodímací; iadedí uai oñeno íbana oñedícaí. 13 Cai joreñona jeare ñaitímací; iadedí caí dinena naimací diga marena ñaitícaí. Naimacimona jamai bue isoidícaí. Iese caímo naimací comeciái nia facadímací; ía Cristo díbeímo íe rafuena nia llocana jaiacadícaí.

14 Bie carta cue cuiamona, omoína meiruitaiacaiñedicue; ía omoína nia llofueiacadicue. Isiruiga uruíaídomoí isoidomoí. Íe jira bie rafuena omoí raise uíñuana jitaídícue. 15 Omoína Cristo rafuena llofuellena, diga llorainí omoímo íte; iadedí cuemona Cristo rafuena omoí nano cacaja jira, omoí moo isoidícue. Cue uruíaina jai jaidomoí isoidomoí. 16 Íe jira omoímo cue llogacínodo maí omoí jai.

17 Iedo omoí jaillena, omoína canollena, omoí díne Timoteona jai oredícue. Naimíena isiruitícue. Naimíedí Cristo íe ñnogamíe. Cuemona Cristo rafuena naimíe cacajanona, íena ñnote. Íe jira naimíedí cue jito isoide. Creyentíai illanomo cue ía, Cristo rafuena jaca llofuetícue. Naíe rafuedo cue jitaílla isoi, iedo omoí raise jaillena, naimíedí omoína llofue. 18 “Pablo caína jacíruílla jira, naimíe caí díne bíñeíte” raillanomo omoí comeciaina facajamona, omoímona damíeríe jai abína bíridomoí. 19 Iese comeciaina facadomoí; iadedí Jusiñamui jitaía, omoí díne raíre jaitícue. Íe meí níe isoide uai naíe abína bíridínomo íllana uíñoítícue. Naimací ñaíacínodo íena uíñoñeítícue; iadedí naimací finoca rafuemona íena uíñoítícue. 20 Ero, jamai ñaíamona, Jusiñamui anamo naimíe jitaílla isoi íñedícaí; iadedí naimíe finoca rafuedo caí jaíllamona, naimíe jitaílla isoi itícaí. 21 Omoí díne íco cue ría, ¿níese omoí diga ñaitícue? Cuemo llono. Cue lluana omoí ñnoñenia, omoímo ríire lloítícue. Cue lluana omoí ñnoía, omoína cue isiruíllamona, omoímo fecuíse lloítícue. Íe jira cuemo llono.

5

Pablo eo jearede rafuena finodímíena ríire llote

1 Jiaíe rafuena omoímo lloítícue. Eo jearede rafue omoí motomo jai íllana jai fídídícue. Jusiñamuína ñnoñedíno naíe isoide rafuena fínoñedímací; iadedí omoímona damíe íe eicañona ote, íe aína. 2 Jearede rafue omoí motomo íte; iadedí nia abína íedotomoí. Naíe isoide rafue omoí motomo navuí suílla jira, ¿bue ñellena sunaíñedomoí? Omoí rocabíllacomo naimíe bía, naimíe

fo billana rairui. ³ Omoi dine iticuedena, bie rafue daní omoi siadollena, omoi danomo ofillena llotícue. Omoi dine cue iñena jira, cue comecídi omoi dine ite. Bie rafuemo cue comecina facaoidícue. Bie rafue omoi díga are siadoñeítícue; iadedí naie rafuena finodimíena cue ñaiana jai uiñoticue. ⁴ Cai Nama Jesús facaina cue ñaíamona, naimíena ñaitícue. Ofillanona bie rafue omoi siadollena, omoi díga cue iacanana omoi comecí. Omoína canollena, cai Nama Jesucristo omoi díga ite. ⁵ Taífemo jearede rafuena finodimíena sofe. Taife anamo naimíe jai illa jira, duere sefuite; iadedí naiemona fueoite. Duere sefuillamona, Cristo díbeímo dane iite. Cristo íco abído bia, naimíedi Cristo díbeímo dane raise illa jira, Cristo naimíena duere finoñeíte.

⁶ Jearede rafue omoi motomo illa jira, ¿buena abina íedotomoi? Janorede siritate ra juillíruiamo faíamona, nana naie juillírui sírícana jaitate. Iena uiñotomoi. Ie isoide. Janorede jearede rafuemona, eo ailluena jearede rafuena oni jaide. Omoímo ite jearede rafuemona oni omoi í, naiemona jearede rafuedo omoi jaisa. ⁷ Judíuai railla comínídi pascua railla rafuena finoacania, nana siritate ra naimací jofuemona oni dotadímáci. Ie isoide. Cristo jitailla isoi omoi illena, omoi comecíamo ite jeacinona faínonocai. Jeacino anamo omoi jai illa jira, iena faínonocai. Pascua rafue facaiseconi judíuai comínídi toíca llaudaíai fajamona, naimací jeacino facaina Jusiñamui íbana oñede. Cai facaina Cristo jai fiodailla jira, cai jeacino facaina Jusiñamui íbana oñeíte; iadedí íemona naimíena nabaidícái. Ie jira jeacínona finocana cai jaiñeno. ⁸ Cai facaina Cristo fiodailla jira, cai jeacínona faínonocaíllanona, Jusiñamui jitailla isoi mai cai í. Jeacínona finocana cai jaiñelli. Uanaicínodo mai cai jailli.

⁹ Jíaié cartana omoímo navui oredícue. Imací aiñede riñoníai díga ítino díga nabairiñellena llotícue. Naiñaiñuái íniñede íiñíai díga ítiñaiñuái díga nabairiñellena llotícue. ¹⁰ Nibái iena raise cacaiñedomoi. Ie jira iena dane lloitícue. Cristona ínoñedinona ñaiñedicue. Naimací aiñede riñoníai díga ía, naiñaiñuái íniñede íiñíai díga ía, naimací rana nicídoía, rana naimací fííia, jiraráina naimací sedajía, naimací díga omoi nabairiñenana ñaiñedicue. Iena rairuiñedicue. Iena cue rairuidícuedena, naganomo Jusiñamuína uiñoñedíno illa jira, ¿nínomo niadedí ítícaí? ¹¹ “Cristona ínotícaí” raitínona ñaitícue. Naimací aiñede riñoníai díga naimací ía, naiñaiñuái íniñede íiñíai díga naiñaiñuái ía, rana naimací nicídoía, jiraráina naimací sedajía, jíaié comínina naimací jeare ñaía, naimací jífaicabía, rana naimací fíicabía, naimací díga nabairiñeno. Naie isoidíno omoi jofuemo feiñoñeno. ¹²⁻¹³ Cristona ínoñedinona ñaiñedicue. Naimací rafue cuemo duiñede; iadedí maraiñedicínona naimací finoía, Jusiñamui naimacína duere finoíte; iadedí Cristona ínotíno maraiñedicínona finoía, naimacímó ríire llono. Omoi motomo ite jearede rafuena finodimíena omoi rocabillacomo bia, naimíe fo billana rairui.

6

Cristona ínoñede juezmo jíaié creyentena llogídoñeno

¹ Jíaié omoi finoca rafuena fídídícue. Jíaié creyentedímíe díga omoi nicíno ía, ¿bue ñellena jíaié creyentíai díne jaiñedomoi, naicínona siadollena? ¿Bue ñellena Cristona ínoñede juez díne naimíena meiruiñeno llogídotomoi? ²⁻³ Jesucristo abído bille mei, Cristona ínotínodícaídi Cristona ínoñedinona duere sefuillena lloítícaí. Taife comíní duere sefuillícínona íco jíai lloítícaí. Iena uiñotomoi. Naimacímó omoi íco llua jira, ¿bue ñellena birui omoímo ite rafuena daní omoi raise finonídomoi? ⁴ Nicíno omoímo ía, ¿bue ñellena Cristona ínoñedíno díne jaidomoi? Omoímona naimací jamái bue isoidímáci.

Naie isoide jueces omoimo ite rafuena raise uiñoñedimaci. ⁵ Omoi meidallena, iena omoimo jai lloticue. Naie nicinona raise omoi siadollena, iena raise finollena, omoimona nibai damie ite, iena raise finollena. ⁶ Iese finocabiñedomoi; iadedi nicino omoi creyentiaimo ia, Cristona ñnoñedimie mo jiaie creyentena llogidocabitomoi.

⁷ Jiaie creyentena omoi llogidoia, Cristo dibeimo raise iñedomoi. Naicino raise omoi finoñenia, uai oñeno anamo ee. Naimiemona omoi duere sefua, dama ite. ⁸ Iese iñedomoi; iadedi dani conini jiaie creyentiaina duere finocabidomoi. Naimaci rana fuidomoi. Omoi amana duere finodomoi.

⁹ Jusiñamui sedajanomo naimiena ñnoñedino duiñeitimaci. Naimaci isoinia iacadomoi; iadedi Cristo dibeimo omoi illa jira, naimaci isoi inidomoi. Ie jira naimaci illamo omoi abina rairui. Bie isoidino Jusiñamui ie cominina sedajanomo jaca duiñeitimaci: imaci aiñede riño diga itino, imaci iniñede iima diga itino, jiraraina sedacabidino, daje isoide iima diga conima aifiedotino, daje isoide riño diga conioño aifiedotino, ¹⁰ rana bainino fucabidino, rana nicidocabitino, jifaicabidino, jiaie cominina jeare ñaicabitino, cominimona rana bairodino. Nana naie isoidino Jusiñamui ie cominina sedajanomo duiñeitimaci. ¹¹ Omoimona dajerie iese jaie itomoi; iadedi jiaie rafuedo birui jaidomoi. Cai Nama Jesucristo fodailla jira, Jusiñamuidi omoi jeacinona jai oni dotade. Iena jai feitate. Ie Joreño uaido omoina ie cominina jai jaitate. Ie muidona naimiemona jai marebicaidomoi.

Jearede rafuemonabina rairui

¹² Cristo dibeimo omoi illa jira, ¿nie se dani omoi jitaillacinodo jaiacadomoi? Diga Jusiñamui rairuiñega rafue ite. Creyentia iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Dajerie rafuena cai finocabiñelli, naie rafue anamo cai i raillano. Dani Cristo rafue anamo cai illi. ¹³ Raitomoi: “Nie isoide guille cai guiacania, nie isoide rafue cai finoacania, caimona mare” raitomoi. Ero, diga rafuena finoredicai. Naiemona jeacino cai oñena jira, aimetaia, guiredicai. Jusiñamuidi cai aimetaillafue ico saitaite. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede iima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite. ¹⁴ Cristo fodaite; iadedi fodaillamona, Jusiñamui na ie abi diga naimiena jillotate. Cai fodaia, ie uaido na cai abiaia diga caina ico jillotaite. Cai abi jaca illa jira, jearede rafuena birui cai finoñena.

¹⁵ Cristomo jainaiaidicai. Iena uiñotomoi. Omoi ainiañede riño diga omoi ia, naiñaiñuaimo jai duidomoi. Cristo naie isoide riñomo jaca duiñena jira, naiñaiño diga iñeno. ¹⁶ Ie aiñede riño diga bu ia, ie ai illa isoi, jai dajena jaidiaimaiaia. Ie jira Jusiñamui jaie llote: “Riño diga iima illa jira, jai dajena jaidiaimaiaia” llote. ¹⁷ Cai Nama Cristomo bu duia, dajena jai jaidiaimaiaia. Jusiñamui Joreño iaimaiaimo illa jira, iaimaiaia comeci daje isoi jai lloide.

¹⁸ Ie jirari naie jearede rafuemonabina rairui. Iesede bu finoa, jearede rafue ie abimo jai finode. Caimanide rafue ie abi diga finode. Jiaie marañede rafue bu finoa, naimie abimo jearede rafue finoñede. ¹⁹ Naimiemo omoi duillanona, Jusiñamui Joreño omoimo illana uiñotomoi. Ie illanodi omoi creyentiaia. Jusiñamuimo jai jainaiaidomoi. Ie muidona omoi jitaillacinodo jaiñeno. ²⁰ Omoi jeacino facaina Cristo fodailla jira, Jusiñamui cominina jai jaidomoi. Ie jira omoi finoca rafuemonabina Jusiñamuina eo iobita.

7

Pablodí iima ie aina ua rafuena ñaite

¹ Dajerie rafue cuemo jıcanollena, carta cuemo navui oredomoi. İena ja ñaiticue. İima ie aina uana jıcanotomoi. Faıdaima jaca dama iacania, cuemona mare. Faıdaiño jaca daño iacania, cuemona jıai mare; ² iadedi jeacino omoi finoi raillano, nagamie ie aina otena, jıai mare. Nagañaiño ie inina otena, jıai mare. ³ Naga ini ie ai dıga inıacania, naimiemona naiñaiño ie abına caidiñena. Naga ai ie ini dıga inıacania, naiñaiñomona naimie ie abına caidiñena. ⁴ Naiñaiño abi dañoñede; iadedi daño ie ini abımo jıai duide. Naimie abi damañede; iadedi dama ie ai abımo jıai duide. ⁵ İe jira: “Danomo inıñeıtıcoco” lloñeno. Jusiñamui dıga o raise ñaillena, naimiemo o comeına raise o facallena, iemo omıco comeı daje isoi lloillamona, dıga irui illamona danomo omıco inıacaiñenia, jıai mare. Naie facaise fuilla meinomo riño dıga o iacanamona, dane danomo ini, Taife omıcomo ramo fai raillano.

⁶ Dane lloıtıcue. Jeacınona omoi finoi raillano, nagamie ie aina otena, mare. Nagañaiño ie inina otena, jıai mare. İese omoi mo lloıtıcue; iadedi İese ocuiñedıcue. ⁷ Aınidıcue. Cue illa isoi omoi illana jıtaidıcue; iadedi daje isoiñedıcai. Jusiñamui caina itataja dıese İese itıcai. Dajerie aınidımacı. Dajerie aıredımacı. Dajerie inınidımacı. Dajerie inıredımacı.

⁸ Nia aınidınomo lloıtıcue. Nia inınidınomo lloıtıcue. Feciñuaimo jıai lloıtıcue. Aınidıcue. Cue illa isoi omoi iacania, cuemona mare; ⁹ iadedi omoi ocuiñeniadedi, aina ono. Jıaie riño dıga illemo o comeına facañellena, daje riñona ono, o aina. Jıaie imamo o comeına facañellena, daje imana ono, o inina.

¹⁰ Creyentıaimo nia lloıtıcue. Aıredınomo lloıtıcue. İnıredınomo jıai lloıtıcue. Cue uaido lloñedıcue; iadedi cai Nama jaie llote: “Riño ie inina sofeño. ¹¹ İima ie aina sofeño” llote. İese llote; iadedi nie riño ie inina sofeia, jıaie imana naiñaiño oñena. İimana naiñaiño oiacania, ie ini dıga dane abıdo illasa.

¹² Nia lloıtıcue. Cai Nama buena jaie lloñede; iadedi İena birui cue lloıtıcue. Omoi nairaimona creyentena damie jaide; ia naimie ai creyentena nia jaiñede. Naimie creyentena illa jira, naimie dıga naiñaiño nia iacania: “Naiñaiñoña dotaño” naimiemo llono. ¹³ Omoi nairaimona creyentena dañaiño jaide; ia naiñaiño ini creyentena nia jaiñede. Naiñaiño creyentena illa jira, naiñaiño dıga naimie nia iacania: “Naimiena dotaño” naiñaiño mo llono. ¹⁴ İe ini nia creyentena jaiñenia, ie ai creyentena illamona, naimie dıga naiñaiño nia iacania, jeacınona finoñede. İe ai nia creyentena jaiñenia, ie ini creyentena illamona, naiñaiño dıga naimie nia iacania, jeacınona finoñede. Naie creyente muidona, naie iaımaıai uruiaina, jıaie creyente iaımaıai uruiıai isoi, omoi roracomo feiño. ¹⁵ İe inina creyenteñede ai sofeiacania: “Naiñaiñoña dotaño” naimiemo llono. “Naiñaiño jaillena rairuiño” naimiemo llono. İe aina creyenteñede ini sofeiacania: “Naimiena dotaño” naiñaiño mo llono. “Naimie jaillena rairuiño” naiñaiño mo llono. Sofeia mei, jai dajemo duiñediımaıai. Jusiñamui naga creyente uri illana jıtaide; ¹⁶ iadedi ie ini dıga ie ai fiebia, ie ini creyentenamona, naiñaiño nibai creyentena jaite. İe ai dıga ie ini fiebia, ie ai creyentenamona, naimie nibai creyentena jaite.

¹⁷ İena lloıtıcue; iadedi Jusiñamuimona ie feiñoğa uaido nagamie jailla. Creyentıaina omoi jailla facaiseconi, omoi maijuilla ramo nia raise omoi maiji. Naga creyentıai illanomo buena llofuecabitıcue. ¹⁸ Nia creyentıaina omoi jaiñenia, judıuai isoi omoi mona dajerie omoi abıaina detatatomoi.

Naie detatafuemo omoi comeciaina birui facañeno. Omoimona dajerie omoi abiaina nia detatañedomoi. Iemo omoi comeciaina birui facañeno; ¹⁹ iadedi Jusiñamui uaina omoi ñnuamo omoi comeciaina birui faca. Jiaie rafue baifemo faite. ²⁰ Creyentiaina omoi jailla facaiseconi, omoi maijuilla ramo nia raise omoi maiji. ²¹ Creyentiaina omoi jailla facaise omoimona dajerie patrón anamo itinodomo. Nia patrón anamo itino isoi omoi jai. Iemo omoi comeciaina jarire facañeno. Jiairuido omoi patrón: “Cue anamo iñedomoi” raia, naimie anamona oni omoi jai; iadedi Cristo rafuedo jaca omoi jai. ²² Cristona omoi ñnua facaise, patrón anamo omoimona damierie navui itomoi; iadedi Jusiñamui omoina fetode. Naimiena omoi ñnuamona, omoi jeacino anamo jai iñedomoi. Patrón anamo omoimona damierie navui iñedomoi; iadedi Jusiñamui omoina fetode. Ie jira naimie anamo jai itomoi. ²³ Omoi jeacino facaina Jesucristo fiodailla jira, Jusiñamui omoi jeacinona oni dotade. Iena jai feitate. Naimie cominina jai jaidomoi. Ie jira comini jitaillacino anamo iñeno; iadedi Jusiñamui jitaillacino anamo i. ²⁴ Cue amatai, creyentiaina omoi jailla facaiseconi omoi maijuilla ramo nia raise omoi maiji. Jusiñamui omoina canuanona, jearede rana omoi maijiñenia, ñie isoide rana omoi maijia, Jusiñamuimona mare.

²⁵ Navui cuemo cartana oredomoi. Faidaiñuai illa rafuena uiñoiacadomoi. Cai Nama naie rafuena jaie lloñena jira, iena birui lloiticue. Naimie cuena duenailla jira, naimie uaina ñnoticue. Ie muidona comini ñnogamiedicue. ²⁶ Birui duere omoi sefuilla facaise illa jira, omoi illa isoi omoi i. ²⁷ Omoimona bu aïrenia, naiñaiñona dotañena. Bu aïnia, dama aïnide. Riñona oñena; ²⁸ iadedi o aïna illena ininide riñona o otiodena, jeacinona finoñedio. Omoimona o inina illena aïnide ñimana o otiodena, jeacinona finoñedio; iadedi aïna bu ua mei, inina bu ua mei, eo duere maijiite. Iese omoi duere sefuiñellena, omoimo iena lloticue.

²⁹ Cue amatai, biemo omoi comeciaina faca. Jesucristo abido dane billirui iaïrei ite. Naimie jitailla rafuena omoi raise finollena, omoi aïniaimo ite rafuemo omoi comeciaina facaja; iadedi Cristo rafuemo omoi comeciain eo facaja. ³⁰ Omoimona damierie sunaia, damierie caimare ia, iemo omoi comeciaina eo facañeno. Damierie raruiaina ibaia, naieri eo io-biñeno. ³¹ Omoimona damierie bene ite rana ebiruitimaci; iadedi iemo omoi comeciaina eo facañeno. Iemo omoi comeciaina eo facaia, abi juanide, Cristo rafuena omoi finollena. Cristo rafue nano finuamo omoi comeciaina eo faca.

³² Omoi comeciain jarire iñenana jitaïdicue. Nia aïnidimie abi juarede, dama Cristo rafuena maijillena. Naimiena iobitaiacade; ³³ iadedi aïredimie bene ite rafuemo ie comecina facade. Ie aïna iobitaiacade. Naiñaiñomo ite rafuemo naimie comecina facade. Cristo rafuemo ie comecina jiaï facade; ³⁴ iadedi mena rafuemo ie comecina eo facallemo abi juanide. Ininidiñaiño abi juarede, daño Cristo rafuena maijillena. Nana naiñaiño comecimona naimiena iobitaiacade; iadedi inirediñaiño bene ite rafuemo comecina facade. Ie inina iobitaiacade. Naimiemo ite rafuemo naiñaiño comecina facade.

³⁵ Aina uana rairuiñedicue. Inina uana jiaï rairuiñedicue; iadedi omoi raise illena, naie rafuena lloticue. Cristo rafuedo omoi raise marena jaillana jitaïdicue. Dani Cristo rafuemo omoi comeciaina facajana jitaïdicue.

³⁶ Ero, omoimona naiñaiño oiacaga ñimamo ie moo, ie jisa caidiñeno fecaca. Naiñaiño jai moonalla jira, naiñaiño jitailla jira, naiñaiñona feca. Fecaia, ie moo jeacinona finoñede; ³⁷ iadedi inina naiñaiño oiacañenia, naimie comeci llumona, ie comecina eo facajamona, ie jisa fecacañenia, jiaï mare. ³⁸ Ie jisana fecaia, mare. Cristo rafuena naiñaiño eo maijillena, ie jisa fecañenia, jiaï mare.

³⁹ Jiaie rafuena lloiticue. Riño ie ini nia fioidañenia, naiñaiño naimiemo jaca duide. Ie ini fioidaille mei, jiaie iimana ie ini ifomo naiñaiño oiacania, mare; iadedi creyentedimiena naiñaiño ua. ⁴⁰ Naie feciñodi iimana ie inina oñenia, naiñaiño abi juarenite, Cristo rafuena eo maijillena. Ie muidona inirediñaiño bai femo caimare iite.

8

Jusiñamuina eruaide jiraraimo llicisi fecaja rafue

¹ Cuemo cartana navui oredomoi. Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoi. Iena ja ñaiticue. Naie jiraraina naimaci navui sedaja jira, omoimona damerie naie isoide llicisi riana: “Maraiñede” raitimaci. Creyentiamona Jusiñamuina eruaide jirarai jamai rana illa jira, damerie naie llicisi riana: “Mare” raitimaci. Bu iese uiñoia, mare; iadedi iena uiñuamona naimie abi iedoia, naimie comecina raise facañede. Iena naimie rria, jiaie creyentiamo comecina facañede. Jiaie creyentiaina bu isiruia, naimacimo ie comecina facade. Cristo rafuedo jiaie creyentiai raise jaillana jitaide. ² “Eo abina uiñoticue” ie comecina bu facaia, nia eo raise abina uiñoñede; ³ iadedi Jusiñamuina ua cai isiruillamona, jiaie creyentiaina cai isiruia, jai abina uiñoticaí. Jusiñamui dinena caina jiai uiñotaacade.

⁴ ¿Niese Jusiñamuina eruaide jiraraimo fecaca llicisina ñaiticaí? “Jusiñamuina eruaide jirarai jaca cajeñenana uiñoticaí” raitomoi. “Jusiñamui jaca dajede. Iena uiñoticaí” raitomoi; ⁵ iadedi “Monamo diga sedalle ra ite” dajerie comini raitimaci. Jitomana sedacabidimaci. Fivuina sedacabidimaci. “Eniruemo diga sedalle ra ite” dajerie comini raitimaci. Taifena sedacabidimaci. Janabana sedacabidimaci. ⁶ Iena sedacabidimaci; iadedi cai dani Jusiñamuina sedacabidicaí. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina jillotate. Naimiena cai sedallena, Jusiñamui caina finode.

⁷ Jusiñamuina eruaide jiraraidi jamai rana nana creyentiai uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci rria: “Naie jirarai sedadicaí” naimaci comeciaina facadimaci. Naie rafue naimaci raise uiñoñena jira: “Jecinona finodicaí” raitimaci. ⁸ Ero, nie isoide llicisi cai riamona, llicisi cai riñenamona, Jusiñamui caina feiñoñede. Naimiena cai inuamona caina feiñote. Buena cai riñenia, buena cai rria, jecinona finoñedicaí. Naiemona marecinona jiai finoñedicaí. ⁹ Naie llicisina riredomoi; iadedi omoi ama nibai Cristo dibeimo raise iñede. Naie llicisi omoi rria, naimiemona jecinona jai finodomoi. “Jusiñamuina eruaide jiraraina omoi nia sedadomoi” raillanomo naimie comecina facaite. Iena naimie comecina facajanona, Cristo dibeimo raise jaiñeite. Abido danomo naimie dane jaite. ¹⁰ Nibai abina uiñotomoi; iadedi Jusiñamuina eruaide jirarai illanomo omoi guillena omoi jailla jira, omoina nia Cristo dibeimo raise iñedimie cioia, nainomo jiai guisaite, comecina facajano: “Cue ama Jusiñamuina eruaide jiraraina nia sedaja jira, naiena jiai nia sedaiticue”. ¹¹ Omoi ama abido danomo jaia, omoi muidona. Cristo naimie facaina fiodaite; iadedi omoi finoca rafue muidona, omoi ama abido danomo jaite. ¹² Iese omoi finoia, omoi amana jecinona finotatomoi. Naimie comecina ocuiñoñañedomoi. Ie muidona Cristomo jecinona jiai finodomoi. ¹³ Cristomo jecino cue finoi raillano, Jusiñamuina eruaide jiraraimo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.

9

Cristo facaina llorainidi naimaci jitailla rana jamai feiñua

¹ Cue jitaillacinona finoredicue; iadedi Jesucristo jai oretagamiena cue illa jira, naimie jitaillacinona finoacadicue. Cuen a jaie fetua facaise cai Nama Jesúsna ciodicue. Creyentiaina omoi jailla jira, cai Nama facaina cue maijiana uiñotomoi. ² Jiaie comini Jesucristo oretagamiedicuen nibai uiñoñedimaci; iadedi omoi iena uiñotomoi. Cristona omoi inua jira, Jesucristo cuena oretajana uiñotomoi.

³ Cue llofuiacinona bu uaitaia, iese cue llofuiacinona riidoticue. ⁴ Jesucristo rafue lloraimana cue illa jira, omoi dine cue macaria, cue jitailla rana cuemo jamai omoi illa. Jiaie rafuena cue maijiñena motomona cuemo jamai omoi illa. ⁵ Cue ai cuemo itena, omoi dine naiñaiño cue diga macaria, coco jitailla rana cocomo jamai omoi illa. Omoi dine jiaie Jesucristo oretagano naimaci ainiairi macaria, omoi dine Jesucristo amatai macaria, omoi dine Pedro macaria, naimaci jitailla rana naimacimo jamai fecauidomoi. Ie jira, ¿niese cue jitailla rana cuemo jamai fecañeitomoi? ⁶ Jiaie llorainimo naimaci jitailla rana jamai fecacabidomoi; iadedi cue onolli diga cue maijiana nibai nia jitaidomoi. Bernabé ie onolli diga naimie maijiana nibai nia jitaidomoi. ⁷ Ero, soldadodi ie guille ibañede. Iena jamai feiñote. Naga illimo maijiuidimie ie illimo maijide, naiemona naimie guillena. Naga toiniaina sedauidimiedi naimacina sedade, naimacimona ucube ie ollena. Omoi motomo cue maijia jira, cuena omoi nafuia, omoimo Cristo rafuena llocabiticue. ⁸ Jamai comini uaido naiena llofueñedicue; iadedi Moisés micori ciegafuiaimona iena fueotocue. ⁹ Naimie micori jaie cueda: “Jusiñamui llote: ‘Jurareta trigo oni juillena saisia, iemona ie guillesa, ie fueña maiñeno. Maiñenia, ie maijia fueña guite’ llote”. Ie isoide. Omoi motomo cue maijia fueña cue jitailla rana cuemo jamai omoi illa. Iena Jusiñamui lloia, dama juraretamo ie comecina fecañede; iadedi caimo ie comecina ua facade. ¹⁰ Cristo rafuena cue llofuecabilla jira, cue llua fueña cue jitailla rana jamai cue feiñua. Iemo ocuridicue. Ie isoide. Ie illimo bu maijia, naiemona riana ollena, nainomo maijide. Iemo ocuride. ¹¹ Omoi motomo Cristo rafuedo omoi raise jaillena, navui llofueticue. Ie jira cue jitailla raruia omoimona jamai cue ua. ¹² Omoimona raruiaia jiaie lloraini feiñocabilla jira, cuemona Cristo rafuena nano omoi cacaja jira, cue jamai jiaie feiñua; iadedi omoimona raruiaia jicañedicue.

Cue jitailla raruiaie cue ollena, cue onolli diga duere maijide. Ie jira nana cue jitailla raruiaia oñedicue. Cristo rafuena omoi cacaiacaiñeni raillano, omoimona raruiaia jicañedicue. Raruiaia cue jicaia, omoi comeciaina nibai facaitomoi: “Raruiaie oiacanano Cristo rafuena naimie llocana uite”. Ie mei Cristo rafuena cacaiacaiñeitomoi. Ie jira omoimona raruiaia jicañedicue. ¹³ Ero, Jerusalémo judíuai comini Jusiñamuina sedauilla jofo ite. Nainomo naie comini toiniaina atuidimaci, Jusiñamuimo fecallena. Moisés micori jaie llua isoi, naimaci jeacino facaina toiniaina fajanona fecadimaci. Nainomo maijiuidino comini atica toiniaimona naimaci rillena, ibajanona ocabitimaci. Iena uiñotomoi. ¹⁴ Ie isoide. Cristo rafuena llorainidi naimaci rafuena inotonomona naimaci jitailla rana imaci ua. Cristo iena jai llote. ¹⁵ Omoimona raruiaia jaca jicañedicue. Raruiaie birui cue ollena, bie cartana jiaie cuedicue. Dama cuemo ite ra diga iitocue. Omoimona iena feiñotocuedena, meiruioicaida feiñotocue. Omoimona cue feiñoñena jira, omoi facaina Cristo rafue cue llumona, abina iedotocue. Raruiaie cuemo jamai omoi fecaia, ¿niese abina iedoitocue?

¹⁶ Jiaie lloraini rana feiñua isoi cue feiñoia, Cristo rafuena cue llumona abina iedoñeiticue. Jusiñamui cuena oretaja jira, naie rafuena lloticue. Iena cue lloñenia, Jusiñamui cuena duere finoite. ¹⁷ Dama cue começi jitaillamona Cristo rafuena cue lloiacania, Jusiñamuimona ibana feiñoiticue. Dama cue começi jitaillamona lloñedicue; iadedi Jusiñamui cuena oretaja jira, iena llocana jaidicue. ¹⁸ Ie jira, ¿niese ibana feiñoiticue? Ibana nibai feiñoiticue; iadedi omoimo Cristo rafue cue lloia, cuemona mare. Omoimona cue jitailla rana cue oñenia, cuemona mare.

¹⁹ Omoimona raruiaina cue feiñoñena jira, omoi anamo iñedicue; iadedi dama cue jitaillacinodo jaiñedicue. Creyenteñedino diga cue nabairillena, Cristo rafuena naimaci raise cacaillena, nana naimaci mare finocana uiga rafuedo jaidicue. Iese jaidicue, ailluena cominina Cristo ðibeimo cue itatallena. Iese jaiñedicuedena, eo janore comini Cristo ðibeimo nibai jai itataticue. ²⁰ Judúuai comini diga cue ia, naimaci diga cue nabairillena, naimaci mare finocana uiga rafuedo jaidicue. Cristo ðibeimo naimacina cue itatallena, naimaci diga nabairiacadicue. Moisés micori llogacino anamo naimaci illa jira, naie llogacinodo jaidicue; iadedi naie llogacinodo cue jilloitañena jira, naie llogacino anamo iñedicue. ²¹ Judúuaiñedino diga cue ia, naimaci diga cue nabairillena, Moisés micori llogacinodo naimaci jaiñena jira, naiedo jiai jaiñedicue. Naimaci mare finocana uiga rafuedo jaidicue; iadedi Jusiñamui lloga uaido jiai jaidicue. Cristo lloga uaido jiai jaidicue. Naimacina Cristo ðibeimo itataiacadicue. ²² Naimaci diga cue nabairillena, Cristo rafuena nia raise ñnoñedino diga cue ia: “Omoi baifemo Cristo rafuena uiñoticue” raiñedicue. Naimacina iciacaiñedicue, naimacimo jeacinona cue finoi railano. Naimacina cue isiruillamona, naimacina canoacadie. Naimacina Cristo rafuena raise ñnuana itataiacadicue. Nana cominina cue canoacana jira, naimaci mare finocana uiga rafuedo jaidicue. Cue começina facadicue: “Cue muidona damierie Cristona nibai ñnoitimaci”. ²³ Cristo rafuena ailluena comini ñnollena, iese jaidicue. Iena llocana jaidicue. Naimaci ñnua jira, iobidicue.

²⁴ Ero, dani cai jitaillacinodo cai jaiñena. Iemona omoi fueollena, jiaie uaido lloticue. Riire aisia rafuena omoi comini jifanoia, raire uicodo ridimie rana ote. Ailluena comini aisidimacimona, damie naie rana ote. Ie isoide. Cristo rafuena ñnocana mai cai jailli, ico Jusiñamui illanomo monamo ibana nana cai feiñollena. ²⁵ Naga aisidimie riire aisillena, ie abina mairitallena, ie abina eenote. Mairillena, ie abina nagarui jiai facatacabite. Ibana feiñollena, iese finode. Ibana bu oia, dallu iobide. Ero, jeacinona cai finoi raillano, cai abiaina cai eenua. Naimie jitailla isoi cai illena, Cristo rafuemo jiai cai facacabilla. Monamo cai rillanona, ibana cai feiñollemo, jaca iobitica. ²⁶ Riire aisiacadimie ebena aisiñede. Onolli diga mena iaimaiaia jamai jifanoia, jafaicina jamai ducoiñediaimaiaia; iadedi conimana ducoidiaimaiaia. Ie isoide. Cristo rafuedo raise cue jaiacania, jamai ebena jaiñedicue; iadedi nana cue começimona iedo jaidicue. ²⁷ Cue começina raise sedadicue. Dama Cristo rafue anamo iacadie. Dama iena ñnoiacadicue. Ja muidomo ibana cue feiñollena, iese finodicue. Jiaie cominimo Cristo rafuena llofuecabiticue; iadedi monamo ibana cue feiñollena, cue começina raise sedadicue. Iemona omoi fueua.

10

Jiraraina sedañena rafue

¹ Cue amatiaia, bie rafuena feitañeno. Cai jaiagai micoriaia finoca rafuemono fueoiticaia. Egipto raila eniruemono naimaci billa mei, jofue iñenanomo

naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiairede railla monaillai ruica naimaci jaiacania, Jusiñamuidi naie monaillai oni ñaijitate, safefodo nana naimaci ruica jaillena. ² Naie isoide rafue nana naimacimo suillanona, Moisés micori dibeimo raise duidimaci. Naimie anamo itabidimaci. ³ Jofue iñenanomo naimaci illa jira, Jusiñamui nana naimacina ecade. Nainomo guille iñena jira, monamona bite guille rana nana guisoidimaci. ⁴ Nainomo jinui jia iñena jira, Jusiñamui llua jira, Moisés micori noficina butajamona, toide jinuina nana jirodimaci. Naimaci nine macaria, Cristona cioiñedimaci; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide; ⁵ iadedi Jusiñamuina naimaci ñnoñena jira, naimiedi naimaci diga icirite. Naimaci diga naimie icirilla jira, jofue iñenanomo Jusiñamui ailluena naimaci micoriaina fiodaitade.

⁶ Cai jaiagai finoca rafuemona cai fueua. Maraiñede jearede rafuena naimaci finua isoi ebiruiñeno. Abimo omoi oñeno. ⁷ Jusiñamuiñedimiena sedaño. Cai jaiagaimona damierie juraretana eruaide rana jaie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo guitimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi oñeno. Jusiñamuiñedimiena omoi sedaño. ⁸ Naimaci jearede rafuena finodimaci. Naimacimona damierie naimaci aiñede riñoniai diga itimaci. Ie jira naimacimona daruidemo veintitrés mil comini fiodaitimaci. Jusiñamui naimacina fiodaitade. Naimaci finoca rafue isoi abimo cai oñeno. ⁹ Cai jaiagaimona damierie Jusiñamui Joreñoña ñaitimaci. Naimaci guisoiga radi Jusiñamuimona bite. Naiena ñiamona, Egiptomo ite guillemo comeciaina facadimaci. Ie muidona naimiena ricaitadimaci. Ie jira Jusiñamuidi jaioniaina naimacina ainitate. Iemona ailluena fiodaitimaci. Naimaci finoca rafue isoi abimo cai oñeno. Jusiñamuina ricaitaño. Cristona cai nia ñnoñena facai finoca rafuemo cai comeciaina facaño. ¹⁰ Cai jaiagaimona damierie Jusiñamui facaina lloraini joreñuaina ñaitimaci. Ie jira Jusiñamuidi ie jaienicina oretate, naimacina meinetasillena. Naimaci finoca rafue isoi abimo cai oñeno. Jusiñamui facaina lloraini joreñuaina cai ñaiño.

¹¹ Nana naie rafue naimacimo suide. Cai facaina Moisés micori iena jaie cuete. Iemona birui cai fueua, naimaci isoi cai finoi raillanona. ¹² Naie isoide rafue omoimo suiñellena, omoi abiaina rairui. Omoi comeciaina nibai facadomo: “Cristona cai eo raise ñnua jira, iena finoñeitica” comeciaina facadomo; iadedi omoi abiaina omoi rairuiñenia, jeacinona finoitomo. ¹³ Taife ramo omoimo faicabilla isoi, nana jiaie creyentiaimo ie isoi ramo faicabite. Iena feitaño. Jusiñamuidi ñnogamie. Ie muidona omoi comeciari ocuillacino baifemo Jusiñamuidi Taife omoimo ramo faiana rairuite. Naiemona omoi jilloillena, Taife uai omoi ñnoñellena, Jusiñamuidi omoina canoite.

¹⁴ Cue amatiai, Jusiñamui omoina canuamona, Jusiñamuiñedimie facaina finoca rafuemona oni i. ¹⁵ Abina uiñotomo. Ie jira omoimo cue llucina omoi cacaja mei, iemo omoi comeciaina omoi faca. ¹⁶ Ero, Cristona cai sedallena, roracomo danomo oficabidicai. Naimie fiodailla rafuena cai comecillena, janore vino jiruanona, janore llomenicono guitica. Jusiñamuimo iobillacina nano fecadica. Ie mei janore vino jirodica. Iena cai jiruamona, Cristona cai nabaillana uiñotica. Cruzmo Cristo fiodailla jira, naimiena nabaidica. Naie facaise llomenicono cai tairuñuamona, naimiena cai nabaillana uiñotica. Cristo fiodailla jira, iese itica. ¹⁷ Diga creyentiaidica; iadedi daje llomenicomona jaca guitica. Daje llomenicomona cai guilla jira, dajena Cristomo cai duillana uiñotica.

¹⁸ Ero, judíuái raiilla cominimona cai fueua. Naimaci jeacino facaina iba oñellena, toiniaina faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci. ¹⁹ Omoí illanomo Jusiñamuina ñnoñedinodí Jusiñamuina eruaide jiraraimo guillena fecacabidimaci. Cai creyentiaídicaímona naie guilledí jamai guille. Naie jiraraídí jamai ra. Cajeñede; ²⁰ iadedí Jusiñamuina ñnoñedinomona jamai rañede. Naimacimona nanoca ra. “Iemo rille cai fecajia, cai moona sedadicaí” raitimaci; iadedí naie ramo naimaci comeciaina facañedimaci; iadedí imaci moomo comecina facadimaci. Ero, Jusiñamuiñedimíemo comecina fecadimaci. Taífemo naie guille fecacabidimaci. Taífena iobitadimaci. Jusiñamuimo fecañedimaci. Naimaci díga omoí jaia, Taífe díga jai nabairitomoí. Taífe díga omoí nabairillana jitaiñedicue. Taífemo omoí duillana jitaiñedicue. ²¹ Rollena omoí ofia, Cristo fodaillana omoí comecillena, nainomo omoí jiruamona, nainomo omoí guillamona, Cristona nabaidomoí. Comini rafue díne omoí jaillamona, Taífena nabaidomoí. Cristo díga, Taífe díga, daje facaina nabairinidomoí. Iese omoí finoia, marañede. ²² Iese omoí finoia, Jusiñamuina jai iciritaitomoí. Naimíena omoí iciia, ¿níese naimíe ricaiillafuemona jilloitomoí? Jaca jilloñeitomoí.

Jiaie creyentiaína canocana cai jailla

²³ Ero, Jusiñamui díbeimo omoí illa jira, ¿níese daní omoí jitaillacinodo jaiacadomoí? Díga Jusiñamui rairuiñega rafue ite. Creyentiaí iena finorede; iadedí dajerie Jusiñamui rairuiñega rafuena cai finoñelli, naiemona bue cai oñena jira. Iena cai finoia, cai amana Cristo díbeimo itatañedicai. Iena cai finoia, cai amana Cristo rafuena ñnotacana jaiñeiticaí. Naimíena ramo faicana uitataticaí. ²⁴ Omoímona nagamíe dama naimíemo ite rafuemo comecina facañena; iadedí naga jiaie creyentemo ite rafuemo ie comecina jiaí facaja.

²⁵ Ero, ninena o llicisina omoí ibaia, Jusiñamuiñedimíemo naie llicisina fecajana jicanoñeno; iadedí jicanoñeno iena jaricitaiñeno rino. ²⁶ Iena David micorí jaie cuega: “Jusiñamui bie eníruena finode. Nana rana finode. Cai guillena, cai guille rana nana comuitaga” cuega. Ie jira ¿níese fimaiticaí? Naimíe mare finoca rana cai ríia, jeacínona finoñedicai.

²⁷ Ero, naimíe díga o guillena Cristona ñnoñedimíedi ona uaidoia, naimíe díne o jaiacania, naimíe díne guisai. Nana omo ecaja guillena guiño. Jamai uainino guiño. “¿Ninena ibadio bie llicisina?” jicanoñeno. O comeci jarire finoñeno; ²⁸ iadedí Cristona raise ñnoñedimíe nainomo jiaí guitemo, omo lloia: “Bie llicisidí Jusiñamuiñedimíemo jai fecaca llicisi”, iena o riñeno. Iena o ríia, Cristona raise ñnoñedimíe comecina facaite: “Jeaicínona finodio. Taífemo fecaca llicisina ritio. Creyentedimíe iena riñede” comecina facaite. O isoi naie llicisimo naimíe comecina facañede. O raitio: “Naie llicisidí jamai llicisi” raitio; iadedí naimíe raite: “Naie llicisi Taífe ie” raite. Ie jira naie creyentena o canollena, naiena riñeno. ²⁹ Naimíe comecina facajacinodo cai jaiñenamona, nana Jusiñamui comuitaga guillena guiredicaí; iadedí Cristona nia raise ñnoñedimíemona nana guinidicaí; iadedí naimíe comecina facajacinodo jaiñedicai. ³⁰ Cai guia, Jusiñamuimona naie guille comuitaja jira, Jusiñamuimo iobillacínona fecadicaí; iadedí cai guillamona damíerie cai joreñona ñaiamona, iena guiñeiticaí. ³¹ Omoímo iena nia lloiticue. Nie isoide rana omoí guia, nie isoide rana omoí ríia, nie isoide rana omoí jiroia, nie isoide rafuena omoí finoia, naieri Jusiñamuina iobita. ³² Jusiñamuina nia ñnoñedíno canocabi, naimíe uaina naimaci cacaillena. Jusiñamuina jai ñnotínona jiaí canocabi, naimaci abído danomo uaiñellena. ³³ Buena cue

finoia, nana cominimo cue comecina facadicue. Ie jira nagarui cue jitail-lacinodo jaiñedicue; iadedi Cristo rafuena naimaci ñnollena, nana cominina canocana jaidicue.

11

¹ Cristo lloga rafuedo jai jaidicue. Cue isoi omoi jai.

Roracomo riñoniai illa rafue

² Cuen nia feitañedomoi. Cristo oretagano jaie llogacinona omoina llofueticue. Cue llofueuillacinodo nia jaidomoi. Ie jira omoi iobidicue; ³ iadedi jiaie rafuena nia lloiacadicue. Cristo ie Moo anamo ite. Naga ñima Cristo anamo jiaie ite. Nagamie ai ie ñini anamo ite. Omoi afemo itinno uaina omoi ñinoñenia, maraiñede. ⁴ Roracomo omoi comini oficabia, ie ñini anamo ie ai illa jira, omoi comini finocabilla isoi, naga riño ie ifogimo ñiroina bicuano jailla. Iese naiñaiño bicoñenia, ie ñini anamo naiñaiño ññede isoi eruaide. Jusiñamui diga ñie ñima ñaia, Jusiñamui uaina ñie ñima jino lloia, naimie ie ifogi icona jitañeno, Cristo anamo naimie illa jira. Naie facaiseconi ie ifogi icona jitañia, Cristo afemo itena eruaide. ⁵ Ñie riño Jusiñamui diga ñaia, Jusiñamui uaina ñie riño jino lloia, ie ifogimo ñiroina bicoñeno jaia, ñima isoi naiñaiño iacana jira, ie ñini afemo illana eruaide. Ie ñini anamo iacaiñena jira, ie ñinno meidaitade. ⁶ Ñie riño ie ifogimo ñiroi bicoñeno jaiacania, ñima isoi eruaillena, ie ifogidi rijiruda gareca. Iemona naiñaiño meidaillamona, ie ñini anamo illamona, ie ifogimo ñiroina bicuano naiñaiño jaite. ⁷ Jusiñamui diga naimie ñaia, Jusiñamui anamo naimie illa jira, ñima ie ifogi icona jitañena. Jusiñamui naga ñimana comuitate. ñimana naimie finuamona, naimiena cai iobitajamona, Jusiñamui cai afemo illana uinoticaie. Ie ñina iobitajamona, naiñaiño afemo ie ñini illa jira, riño ie ifogimo ñiroina bicuana jailla. ⁸ Ero, Eva micorimona Adán micori comuiñede; iadedi ie ñini micorimona ie ciraiofemona naiñaiño micori comuide. ⁹ Naiñaiño anamo illena naimie comuiñede; iadedi naimie anamo illena naiñaiño comuide. Naimie uai ñnollena, naimiena canollena, naiñaiño comuide. ¹⁰ Ie ñini anamo naiñaiño illa jira, riño ie ifogimo ñiroina bicuano jailla. Naiñaiño iese ia, naiñaiño naimaci cianona, Jusiñamui jaienisañimona jiaie mare. ¹¹ Naga riño ie ñini anamo ite; iadedi Cristona cai ñinua jira, riño baifemo ñimadi faiñede. ñima baifemo riño jiaie faiñede; iadedi dañimaiaie conimana iañimaiaie canua. Cristo naga ñimana, naga riño najaie isoi feiñote. ¹² Naga comini Jusiñamui comuitaga. Nano facaiseconi Adán micorimona Eva micorina jaie comuitate; iadedi birui naga ñima riñomona comuide.

¹³ Biemo omoi comeciaina omoi faca: Omoi roracomo Jusiñamui diga ñie riño ñaia, omoi einamacie finocabilla isoi, ie ifogina bicoñeno jaia, ¿ñiese omoi comeciadi raite? Cue comeci: “Maraiñede” raite. Ie ñini anamo naiñaiño ññedena eruaide. ¹⁴ Nana omoi biesedena raicabitomoi: “Ñie ñima ie ifotirai eo areniadedi, cai cominimona maraiñeno cide; ¹⁵ iadedi ñie riño ifotie eo arenia, mare” raicabitomoi. Naiñaiñuai ieri iobidimaci. Jusiñamui iena sicotajamona, naiñaiño ifotie ie ifogina raise ibaide. ¹⁶ Iena jaca llofuecabiticue. Jiaie creyentiaie illanomo cue isoi comeciaina lloidimaci. Omoimona bu cue llogacinona uaitaiacania, damamei ite.

Cristo fiodailla rafuena raise comeciñedimaci

¹⁷ Jiaie rafuena lloiticue. Omoi maraiñede finocabilla rafuena jai fididicue. Cristona sedallena omoi oficabia, Cristo rafuena ñnocana jaiñedomoi; iadedi naiemona maraiñede rafue comuide. ¹⁸ Rollena omoi oficabia, omoi comeciaina daje isoi lloinñenana jai fididicue. ¿Bue ñellena omoi comeciaina daje isoi lloiacaiñedomoi? Naie rafuena omoi diga ja ñaiacadie. Omoi

oficabia, nagamiia guillena aticabidomoi. Mare; iadedi danomo guiñedomoi. Omoimona damierie ucuberena jira, dueredino diga guiacañedomoi. Omoi guille caididomoi. ¹⁹ Omoi iese illana jitaiñedicue; iadedi daje isoi omoi comeciaina lloiñenamona, Jusiñamui dibeimo raise itinodi uiñoga. Omoimona damierie danomo omoi guillamona, Jusiñamuina omoi isiruillana uiñoticaí. ²⁰ Cristona sedallena omoi oficabia, guitomoi; iadedi vino jiruanona, llomeniconna guillanona, caí Nama fodailla rafuena raise comeciñedomoi. Maraiñede rafuena omoi finua jira, iena nia lloiticue. ²¹ Nagamiia guillena aticabidomoi. Dani coniniri raise guiñedomoi. Danirie omoi atica guillena guitomoi. Jiañona guillena iñedomoi. Damierie omoimo ailluena guille ite. Damierie omoimo guille raise iñede. Jiañona guillena omoi iñena jira, damierie jaca aimetaitimaci; iadedi jiaño monidimaci. Damierie guilla motomo jiaí jifaidimaci. Conini nabaiñedomoi. Ie jirari Cristo fodailla rafuena raise comecinidomoi. ²² Ero, omoi jofue ite, jamai guillena. Omoi oficabia, ¿bue ñe guillaredomoi? ¿Bue ñe jiañonomo guille fecacañedomoi? Jiaie creyentiaína omoi isiruiñenamona, Jusiñamuina jiaí isiruiñedomoi. Janore guille itinona duere finodomoi, naimacina omoi ecaacaiñena jira. Iese omoi illa jira, omoi iobiñedicue.

Cristo fodailla rafuena llofuiacino

²³ Navui omoína buena llofueiticue; iadedi omoi raise iñoñena jira, iena dane llofueiticue. Caí Nama iena cuemo jaie llote. Caí Nama Jesús ie gaitatajarui facaiseconi, ie llofueoicaigano diga ia, naimaci guía, llomeniconna llinote. ²⁴ Iena llinuanona, Jusiñamuimo iobillacinona fecade. Ie mei iena tairuanona raite: “Mai, buena guiño. Bie llomenicodi omoi guillamona, cue fodaillana omoi comeci. Cue fodaillamona omoi jeacinomona jilloitomoi. Buena omoi guillamona cuena comeci. Bie llomenicodi cue abi facai ie. Cue llua isoi iena omoi finocabi” raite. Ie mei iena guitimaci. ²⁵ Ie mei jiroracomo jai totaca vino Jesús llinuanona, Jusiñamuimo iobillacinona fecade. Ie comecina facade: “Adán micori facaisemona cominina imaci jeacino facaina Jusiñamui duere finoñellena, toñiaína atuidimaci, naimiemo fecallena”. Iemo ie comecina facajano, raite: “Cue fodaillamona, dama cue diaillamona, Jusiñamuidi omoimo jiaie rafuena birui llote. Omoi jeacina oni dotajana llote. Bie vinodi naie rafue facai ie. Cue llua isoi, bie vinona omoi jiruamona, cuena comeci. Mai, iena jiro” raite. Ie mei jirodimaci. ²⁶ Naga icaiño Cristo facaina llomeniconna omoi guía, Cristo facaina vinona omoi jiroia, omoi jeacino facaina caí Nama fodaillana uiñotomoi. Naimie nia abido dane bille dinori naiena comeci.

Cristo fodailla rafuena raise comeciadicaí

²⁷ Cristo fodailla rafuena raise comeci. Naie llomeniconna Cristo rafuedo raise jaiacañedimie ebena guía, Cristo rafuedo raise jaiacañedimie naie vino ebena jiroia, iena jamaide. Naimie jeacinomona Cristo naimie jilluana naimie iñoñena jira, Cristomo jeacina finode. ²⁸ Jeacino omoi comeciaino illamo omoi comeciaina faca. Jeacino omoi comeciaino ia, iena guiño. Iena jiroño. Jeacino omoi comeciaino iñena, iena guiño. Iena jiro. Jeacino ia, Jusiñamuimo iena llono. Jiaimie diga nicino ia, iena raise fino. Ie mei iena guiño. Iena jiro. ²⁹ Jeacino naimie comecimo nia illamona, iena guía, iena jiroia, maraiñede. Naimie jeacino facaina Cristo fodailla jira, Cristo fodaillana naimie jai jamaide. Ie muidona Jusiñamui naimiena duere finoite. ³⁰ Ie muidona omoimona ailluena irareside. Ie jira omoimona damierie fodaite. ³¹ Caí comeciaina raise caí facajamona, jeacina caí fañonocaia, Jusiñamui caína duere finoite. ³² Jusiñamui caína birui duere finoia, caína

naimie ðibeimo raise illena itataiacade. Jesucristo abido bia, naimiena ðinoñedinona duere finoite. Naimaci diga cai duere sefuiñellena, birui caina duere finode.

³³ Cue amatiai, Cristo fiodailla rafuena omoi comecillena omoi ofia, daacaiño omoi guillesa, jiaino riñedinona seda. ³⁴ Bu eo aimetaia, jofomo nano guilla. Guillanona omoi ofillinomo bi. Dani coniniri raise omoi guiacaiñenia, Jusiñamui omoina duere fino raillano, jofomo guiño. Nana naie rafuena nia lloñedicue; iadedi omoi dine dane cue ia, iena lloiticue.

12

Cristo facaina raise maijillena, Jusiñamui Joreño naga creyentena canode

¹ Cue amatiai, jiaie rafuena cuemo jai jicanotomoi. Iena ja ñaiticue. Jusiñamui mona diga uaina feiñoticaí. Naimiemona naimie facaina maijia uaina feiñoticaí. Naimie facaina cai maijillena, jiaie creyentiaina cai canollena, naimiemona cai oga uaina ñaiticue. Iena omoi raise uiñuana jitaídicue.

² Ero, Cristona nia omoi ðinoñenia, Jusiñamuiñediniede jiraraina sedauidomoi. Iedo jaietainodo jai-jaisoidomoi. Taife iedo omoina jifue. ³ Ie jira buena omoi raise uiñuana jitaídicue. Jusiñamui Joreño uaido nie creyente ñaia, Jesús Joreño na jeare ñaiñeite. “Jesúdi Jusiñamui Jitoñede” raiñeite; iadedi Jusiñamui Joreño uaido nie creyente ñaia: “Jesúdi Jusiñamui Jito” raite. “Jesús cue Nama” raite. Naie isoide creyentedi Jusiñamui ie. Naimiemo cacarei; iadedi iese raiñedinona cacareiñeno.

⁴ Jusiñamui Joreño caimo jai illa jira, Jusiñamui Joreño mona cai maijia uaina oticaí. Naga creyente daje isoi oñedicai. ⁵ Naga creyente Cristo facaina daje isoide uai diga maijineidicaí; iadedi Cristo facaina nana maijidicaí. ⁶ Jusiñamuidi diga uai llua motomo naga creyentena maijitate, naimie jitailla rafuena naimaci finollena. ⁷ Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uiñoticaí. ⁸ Damierie creyentemo Cristo rafue jino llole uaina itatate. Damierie creyentemo Cristo rafue llofuelle uaina itatate. ⁹ Damierie creyentemo Jusiñamui siño rafue finuana ðnotaja uaina itatate. Damierie creyentemo duidinona jillotaja uaina itatate. ¹⁰ Damierie creyentemo siño rafuena finua uaina itatate. Damierie creyentemo jino llole uaina itatate. Naimacimo Jusiñamuidi ie rafuena llocabite, jiaínomomo jino llole. Dajerie creyentemo uaina itatate, nie isoide uaido Cristo rafuena railla lloraima llua uiñollena. Jusiñamui Joreño uaido nie lloraima lloia, iena uiñote. Taife uaido nie lloraima lloia, iena jiai uiñote. Damierie creyentemo naimaci uiñoñega uaido ñaia uaina itatate. Damierie creyentemo naie uiñoñega uai oni dobaiñolle uaina itatate, comini iena raise uiñollena. Iena naimaci nia dobaiñoñenia, iena jiai raise uiñoñedinomaci. ¹¹ Naga creyentemo itatate uaina Jusiñamui Joreño mona bite. Naimie jitailla isoi, naga creyentena ie uaina itatate.

Cristomo dajena duidicaí

¹² Cai abimo diga ra ite. Cai jefo ite. Cai uisi ite. Cai onolli ite. Cai eilli ite. Diga ra ite; iadedi cai abidi jaca dajede. Dajemo duide. Ie isoide. Diga creyentiaídicaí; iadedi dajena Cristomo duidicaí. ¹³ Dama Jusiñamui Joreñodi dajena Cristomo nana creyentiaídicaí; iadedi duidicaí. Dajerie judíuaídicaí; dajerie judíuaíñedicai; dajerie patrón anamo iticaí; dajerie patrón anamo iñedicai. Diga nairaiídicaí; iadedi dajena Jusiñamui Joreño nana feiñoticaí.

¹⁴ Cai raise maijillena, cai raise illena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga

creyentiaidicai; iadedi Cristo facaina dajena maijidicai. ¹⁵ Ero, cai abimona cai eilli nibai facaite: “Onolli isoinedicue. Onolli cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Onolli eilli baifemo faiñede. Dafoconi ite. ¹⁶ Ero, cai jefo nibai facaite: “Uisi isoinedicue. Uisi cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Uisi jefo baifemo faiñede. Ie isoide. Dajena Cristomo omoi duilla jira: “Jiaimie baifemo iticue” raiñeno. Jiaie creyentena abina uradoiñeno. ¹⁷ Ero, dama uisi cai abimo itena, cai jefo iñedena, jiaie ra cai abimo iñedena, ¿niese rana cacaiticai? ¿Niese niadedi ra sorillana cacadica? Ie isoide. Dajena Cristomo omoi duilla jira, naga creyentena jitaidomoi, Cristomo dajena ñnocana omoi jaillena. Jiaie creyentena uaitañeno. ¹⁸ Jusiñamui cai abimo diga rana comuitate. Naimie jitailla isoi, cai abimo naga rana comuitate. ¹⁹ Cai abimo diga ra iñedena, ¿buedo cajeniticai? ²⁰ Diga ra cai abimo ite; iadedi jaca dajede cai abi.

²¹ Rana cai cioillena, cai uisi ite; iadedi cai onolli iñedena, cai ciua rana llinonidicai. Ra feitañellena, cai comeci ite; iadedi cai eilli iñedena, macarinidicai. Ie isoide. Cristomo dajemo cai duilla jira, naga creyentena dajena ñnocana jaillana jitaidicai. Jiaie creyentemona abina iedoñeno. ²² Naga cai abimo ite rana jitaidicai, raise cai illena. Naga cai abimo ite ra jiaie ra baifemo iñede. Nana daje isoi itena, mare; ²³ iadedi dajerie ra ebire eruaillena, cai abi jifollena, ñniroina jitadicai. Meiruiñellena, cai abi bainillena, ñniroina jiaie jitadicai. ²⁴ Cai uiecomo meiredino iñena jira, iena jifoñedicai. Ero, Jusiñamui cai abina finode. Dajerie ra jiaie ra baifemo iñede. ²⁵ Jusiñamuidi naga cai abimo ite ra dajena maijiana itatate. Dajena maijicana jaide. ²⁶ Cai abimona daje ra isireniadedi, nana cai abi daacaiño isirede; iadedi cai abi caimare marena ia, nana iobidicai. Ie isoide. Cristomo dajena duidicai. Jiaie creyente duere sefuia, naimiena cai canoia, Cristo dibeimo caimare marena iticai. Naimiena cai canoñenia, caimare marena iñedicai.

²⁷ Ero, caidi naimie cominina jira, Cristomo dajena nagasaiai duidicai. ²⁸ Ie jira Jusiñamuidi naimiena ñnotinomona damieriena nano fetuanona, Cristo naimacina oretate, ie rafuena llollena. Ie mei jiaionona fetode, naimacimo ie rafuena llua mei, jiaionomo ie rafuena jino llollena. Jiaionona fetode, ie rafuena llofuellena, cominina ie rafuena raise uiñotallena. Jiaiono ie uaina itatate, naimie facaina naimaci maijillena, jiaie creyentaina naimaci canollena. Damierie creyentemo siño rafuena finua uaina itatate. Damieriemo duidinona jilloitaja uaina itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uiñoñega uaido ñaia uaina itatate. Iese omoina fetode, naimie facaina dajena nana omoi maijillena. ²⁹ Ero, Jusiñamui nana omoina fetode, ie rafuena jino llollena. Damieriena fetode. Nana omoina fetode, ie rafuena llofuellena. Damieriena fetode. Nana omoina fetode, siño rafuena finollena. Damieriena fetode. ³⁰ Nana omoina fetode, duidinona jilloitallena. Damieriena fetode. Nana omoina fetode, omoi uiñoñega uaido ñaillena. Damieriena fetode. Nana omoina fetode, naie uiñoñega uai jino dobaiñollena. Damieriena fetode. ³¹ Naga creyentemo Jusiñamuidi ie maijia uaina itatate; iadedi damierie uai jiaie uai baifemo ite. Iena omoimo illena, Jusiñamui jica; iadedi jiaie rafuena omoi ollena, omoimo lloiticue. Nana jiaie rafue baifemo ite. Jiaie cominina omoi isiruillena lloiticue.

13

Nana jiaie cominina cai isiruillafue

¹ Cai uiñoñega uaido ñaia uaina cai ñaia, Jusiñamui jaienisaí isoi cai ñaia, cominina cai isiruiñenia, jamai ñaiafuena ñaiticai. ² Jusiñamui rafue jino lolle uaina caimo ia, nana Jusiñamui caina uiñotaga rafuena cai uiñoia, nana Jusiñamuimo ite rafuena cai uiñoia, Jusiñamui siño rafuena finuana cai eo ñinoia, cominina cai isiruiñenia, Jusiñamuimona jamai bue isoidicai. ³ Jiaie cominina cai canollena nana caimo ite rana cai fecaia, Cristo rafuena cai lollena cai niadi fiodaia cania, cominina cai isiruiñenia, jaca buena oñedicai. Jusiñamuina jaca iobitañedicai.

⁴ Cominina cai isiruia, naimaci diga raire iciriñedicai. Naimacina canocabidicai. Naimaciri abina uradoiñedicai. Abina birioicaiñedicai. ⁵ Cominina cai isiruia, abina iedoñedicai. Naimacimo cai comeciaina facacabidicai. Cai rana caidicabiñedicai. Naimaci diga iciricabiñedicai. Naimaci caina jeare finoia, ibana ocabiñedicai. ⁶ Cominina cai isiruia, naimaci jeare finoca rari iobicabiñedicai. Naimaci uanai mare finoca rari iobicabidicai. ⁷ Cominina cai isiruia, naimaci caina duere finoia, ibana ocabiñedicai. Cai joreña bu ñaia, caina taino lloia, iena ñnocabiñedicai. Cai marena illamo ocuridicai. Cai comeciaina ocuiñocana jaidicai.

⁸ Jusiñamuidi cominina jaca cai isiruillana jitaide; iadedi caimo ie rafuena jino lolle uaina jaca itatañeite. Naie uaidi ico saite. Caimo cai uiñoñega uaido ñaia uaina jaca itatañeite; iadedi naie uai ico saite. Caimo ie llofuelle uaina jaca itatañeite; iadedi nai uai ico saite. ⁹ Nana Jusiñamui caina uiñotagacinona nia raise cacaiñedicai. Nana Jusiñamui rafuena nia raise jino lloñedicai; ¹⁰ iadedi Jesucristo dane abido bia, Jusiñamui Joreño caimo itataja uaidi saite. Naimie diga cai illemona naimiena raise uiñoiticai. Naimiemo ite rafuena jiai raise uiñoiticai.

¹¹ Jiaie rafuedo iena llofueticue. Jaiie nia cue uruenia, urue isoi ñaiticue. Urue isoi comecina facadicue; iadedi eimiena cue jaillamona, urue isoi jaiñedicue. Cue uruenamona ite rafuena faionocaidicue. Eimie comecina facajacinodo birui jaidicue. Urue isoi Jusiñamui rafuena birui janore uiñoticai; iadedi monamo cai ia, eimie isoi iena raise uiñoiticai. ¹² Ero, jaciae acaranimona cai joreñodi raise bainide. Ie isoide. Jusiñamuimo ite rafuena nia raise uiñoñedicai. Iena raise cacaiñedicai; iadedi Cristona ico cioiticai. Naimiemo ite rafuena birui janore cacadicue; iadedi naimie dne cue ria, Jusiñamui cuena jai uiñua isoi, jiai raise uiñoiticue. ¹³ Ja muidomo lloiticue. Jesucristo billanona, Jusiñamui Joreñomona caimo ite uaidi saite; iadedi Jusiñamui llogacinodo jai abina ñnoticai. Naimie llogacino suillemo jai ocuridicai. Jusiñamuina cai isiruillamona, jiaie cominina jiai isiruiticai. Naie isiruillacino jiaicino baifemo faite. Ie jira coninina isiruicana omoi jai.

14

Omoi uiñoñega uaido omoi ñaia rafue

¹ Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino lolle uaina ua nicido. ² Ero, omoi uiñoñega uaido ñaia uaina omoi ñaicabia, jaca buna omoina cacaiñena jira, cominina canollena ñaiñedomoi; iadedi Jusiñamuina iobitallena ñaitomoi. Omoi uiñoñega rafuena omoi comeciainomona ñaitomoi. ³ Jusiñamui rafuena jino omoi lloia, cominina canodomoi. Naimacina Jusiñamuina ñnotodomoi. Naimie dibeimo raise itatatomoi. Naimaci comeciaina ocuiñotodomoi. ⁴ Nana creyentiaina canodomoi; iadedi naie uiñoñega uaido omoi ñaia, dani omoi comeciaina canodomoi.

⁵ Rollena omoi oficabia, naie uiñoñega uaido omoi ñaia, cuemona mare; iadedi Jusiñamui rafuena jino omoi lloia, cuemona ua eo mare. Naie jino

llua uaidi naie uiñoñega uai baifemo faite. Naie uiñoñega uaido omoi ñaia, nana creyentiai iena raise cacareillena, iena omoi oni dobaiñoia, cuemona jiai mare. Ie mei naie ñaiamona, Jusiñamui rafuena naimaci cacajamona, creyentiaina canodomoí. ⁶ Cue amatai omoi dine cue jaiacanana uiñotomoí. Omoi dine cue ria, cue uiñoñega uaido cue ñaiticuedena, omoína canoñedicue; iadedi Jusiñamui cuemo jai lloga rafuena omoimo cue lloticuedena, omoína canodicue. Jusiñamui rafuena raise cue jai uiñua jira, omoína cue llofueticuedena, omoína jiai canodicue.

⁷ Ero, quena jamai tainuaido bu fia, ie figana uiñoñedicai. Guitarra bu jamai tainuaido taia, ie taillana uiñoñedicai. ⁸ Ejércitomo trompetana jamai tainuaido fia, soldaduai maijillena raise uiñoñedicai. ⁹ Ie isoide. Cai cacaiñena uaido omoi ñaia, omoi ñaiana uiñoñedicai. Iese omoi ñaia, jamai tainona ñaite isoi cacadicaí. ¹⁰ Eo ailluena nairai ite. Naga nairai ie uai ite dani naimaci ñaillena; ¹¹ iadedi nie nairai ie uaina cue uiñoñenia, naimacimona jiaie nairai imiēna eruaidicue. Cuemona naimaci jiaie nairaina eruaidimaci. Conini diga ñaiana cacaiñedicai. ¹² Ie isoide. Jusiñamui Joreñomona bite ñaia uaina omoi eo jitaillanona, diga uaina Jusiñamuimo jica, dani conini Cristo rafuena ñinocana omoi jaillena. Jusiñamui Joreñomona dani daje uaina nicidoñeno; iadedi nana nicido.

¹³ Ie jira ie uiñoñega uaido bu ñaia, ie oni dobaiñua uaina naimiemo illena, jiaie creyentiai iena cacaillena, Jusiñamuimo jicaja. ¹⁴ Jusiñamui diga cue uiñoñega uaido cue ñaia, Jusiñamui Joreño cuena ñaitatate; iadedi iena cacaiñedicue. Iena uiñoñedicue. ¹⁵ Ie jira, ¿niese cue nibaille? Jusiñamui diga cue ñaia, cue uiñoñega uaido ñaiticue; iadedi comini cue ñaiana raise uiñollena, Jusiñamui diga jamai cue uaido jiai ñaiticue. Jusiñamuimo cue roia, cue uiñoñega uaido roiticue; iadedi comini cue ruana raise uiñollena, Jusiñamuimo jamai cue uaido jiai roiticue. ¹⁶ Iobillacinona Jusiñamuimo omoi fecajano, omoi uiñoñega uaido omoi ñaianona, ¿niese omoína cacaiñedinó: “Jee” raitimaci? ¹⁷ Iobillacinona Jusiñamuimo raise fecadomoí; iadedi omoína cacaiñedinona Jusiñamuina uiñotañedomoí. Ie jira omoi uiñoñega ñaia uaina oni dobaiñotimie omoi roracomo iñenia, naie uaido ñaiñeno. ¹⁸ Cue uiñoñega uaido cue ñaicabilla jira, Jusiñamuimo iobillacinona fecadicue. Omoi baifemo naie uaido cue ñaiana uiñoticue; ¹⁹ iadedi roracomo cue ia, cominina raise cue llofuellena, janore cue ñaiadi, mare; iadedi eo are cue uiñoñega uaido cue ñaia, cominina Jusiñamui rafuena cue llofueñenia, cuemona maraiñede.

²⁰ Cue amatai, omoi uiñoñega ñaia uaido dani jai jaidomoí; iadedi jiaie Jusiñamui Joreño itataja uaimo omoi comeciaina facañedomoí. Omoi abina jai uiñuamona, jiaie uaimo omoi comeciaina faca. ²¹ Jusiñamui facaina lloraima micori jaie cueda: “Jusiñamui llote: ‘Cue comini dine jiaie nairaina cue oretajamona, cue cominina cuena ñinotallena, naie jiaie nairai uaido cue cominimo lloticue; iadedi iena jitañeitimaci. Cuena jaca uiñoñeitimaci’ llote”. ²² Ie isoide. Uiñoñega uaido omoi ñaiamona, Cristona ñinoñedinó iena raise cacaiñedicai; iadedi Cristona ñinotino iena cacadimaci. Iemona fueotimaci. Jusiñamui rafuena omoi llofuiamona, Cristona ñinoñedinó iena cacajamona, Cristona ñinoñedicai; iadedi Cristona ñinotinona canodomoí. ²³ Danomo nana omoi ofia, omoi uiñoñega uaido nana omoi ñaia, Cristona ñinoñedinó iena cacajanona, omoína; “Uairico” raitimaci; ²⁴ iadedi omoi ofia, Jusiñamui rafuena omoi jino lloia, iena Cristona ñinoñedinó cacajamona, naimiedi jeacino naimie comecimo illana uiñoite. Naie rafue naimiemo riire baite. ²⁵ Naimie comecimo ite jearede rafue naimie uiñuamona, Jusiñamuimo ie jeacinona lluanona, Jusiñamuina ñinoite. Ie muidona raite: “Uanai, Jusiñamui

omoi motomo ite”.

Roracomo omoi ia, raise marena omoi i

²⁶ Cue amatiai, rollena omoi oficabia, ¿niese omoi nibaille? Iena ja ñaiticue. Omoi ofia, omoimona damierie nibai roite. Jiaimie Cristo rafuena llofueite. Jiaimie naimiemo Jusiñamui como lloga rafuena jino lloite. Jiaimie ie uiñoñega uaido ñaite. Jiaimie naie uaina oni dobaiñoite. Cristo dibeimo creyentiana raise itatallena, nana omoi finua rafuena raise fino. ²⁷ Uiñoñega uaido bu ñaia, damie amani naiedo ñaite. Damierie ñaite. Jiaimie ñaille ifomo jiaimie ñaite. Ie mei damie naie ñaiana oni dobaiñoite. ²⁸ Naie ñaiana oni dobaiñoitimie iñenia, naie uiñoñega uaido ñaitimie roracomo ñaiñena; iadedi naimie ñaiacania, Jusiñamuimo dama ie jofomo ñaia. ²⁹ Jusiñamuimona ite rafuena bu jino lloiacania, damie amani iena lloite. Damierie lloite. Jiaino llorainidi Jusiñamuimona naie llucino billana uiñuanona llua. ³⁰ Jusiñamui rafuena bu nia lloia, naimie ecimo jiaimiena rafuena Jusiñamui Joreño llotataia, nano llotimie raire llucailla. Iemei jiaimie lloite. ³¹ Iese damierie nana lloitemoi, naie llumona Jusiñamui rafuena raise omoi uiñollena, omoi comeciai jiai ocuiñollena. ³² Naga llotimiedi ie uiñua diese llua uiñote. Ie jira jiaimie nia lloia, iena cacarei. Iemei jiaimie llua. ³³ Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitailla jira, omoi uri illena Jusiñamui jitailla jira, cue llucinodo omoi jai.

³⁴⁻³⁵ Jiaie creyentiai illanuaimo isoi omoi roracomo riñoniaidi uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie inimo jicanoitimaci. Roracomo naiñaiñuai ia, Moisés micori jaie llua isoi, naiñaiñuai ini anamo naiñaiñuai illa jira, nainomo ite lloraima uaina naiñaiñuai uaitañena. Roracomo naiñaiñuai uaina uaitaia, maraiñede, nainomo ite jino lloraima uaina naiñaiñuai raise cacaiñena jira.

³⁶ ¿Niese cue llucinodo jaiacaiñedomoi? Jusiñamui rafue omoimona comuiñede. Dani omoimo naie rafue duiñede; iadedi nana creyentiaimo duide. Dani omoimo Jusiñamui ie rafuena lloñede. Nana creyentiaimo iena lloite. ³⁷ “Rafuena Jusiñamui cuemo lloite” omoimona ie comecina bu facaia, “Jusiñamui Joreño ie ñaia uaina cuemo itatate” ie comecina bu facaia, “Cai Namamona ite uaina omoimo cueticue” naimiedi uiñote; ³⁸ iadedi naimie iese uiñoñenia, Jusiñamui Joreñomona naimie uai iñenana uiñoiticaia.

³⁹ Cue amatiai, Jusiñamui omoimo ie rafuena llua uaina naimiemo jica; iadedi naimaci uiñoñega uaido jiaie creyentiai ñaia, iena rairuiñeno. ⁴⁰ Omoi ofia, cue llua isoi, Jusiñamuina raise marena seda.

15

Fiodaillamona Cristo jai jillode

¹ Cue amatiai, iena omoi feitañellena, bie rafuena dane lloiticue. Cristo ie mare rafuena omoina navui llofueticue. Fiodaillamona Cristo jilluana llofueticue. Cue llofuiacinona feiñotomoi. Iena inocana jaidomoi. ² Naiena omoi inuamona, Jusiñamui omoi jeacinomona omoina jillotate. Naiedo nia omoi jaia, iena raise omoi inoia, jai jillobidomoi.

³ Nanoca rafuena omoina llofueticue. Jiaie creyentiaimona biena jai cacadicue. Jusiñamui facaina lloraini micoriai jaie ciegafuiai isoi cai jeacino facaina Cristodi fiodaite. ⁴ Raiafomo naimiedi jonega. Darui amani illanona naiemona Jusiñamuidi naimiena jillotate, Jusiñamui facaina lloraini micoriai jaie llua isoi. ⁵ Ie mei Pedro naimiena ciode. Ie mei ie once llofueoicaigano naimiena ciodimaci. ⁶ Ie mei quinientos naimiena inotino naimiena daruido

ciodimaci. Naimacimona damierie jai fioidaitimaci; iadedi ailluena nia fioidañeditimaci. Cristo jilluana uiñotimaci. ⁷ Ie mei Jacobo naimiēna ciode. Ie mei nana ie oretagano naimiēna cioidimaci.

⁸ Ie mei naimiēna jiai cioidicue. Ie jira fiodaillamona naimie jilluana uiñoticaí. Ie doce llofueoicaigano fetua mei, diga años illanona, naimiēna nia cue uiñoñena facaise cuena fetode. Ie mei ie rafuena cue lollena, cuena oretate. ⁹ Ailluena creyentiaína jaiē cue duere finua jira, nana jiaiē Cristo oretagano cue baifemo faitimaci. Jamai bue isoidicue; iadedi Cristo cuena fetode. ¹⁰ Jusiñamui cuena duenaillamona, Cristo oretagamienā jaidicue. Jusiñamui cuena jamai tainomo duenaiñede. Nana jiaiē Cristo oretagano baifemo Cristo rafuena llofuecabiticue. Dama cue comecimona llofuecabiñediticue; iadedi Jusiñamui cuena canuamona, iese llofuecabiticue. ¹¹ Jiaiē oretagano Cristo rafuena llofueia, iēna cue llofueia, daje isoide rafuena llocana jaidicaí. Naie rafuena omoi cacajamona, iēna ñnotomoi.

Fiodaillamona nana creyentiaí ico jilloitimaci

¹² Fiodaillamona Jusiñamui Cristona jillotajana llofuecabiticaí; iadedi omoiēna dajerie raitomoi: “Fiodaillamona, nana comini imaci abiai diga ico jilloñeditimaci”. ¹³ Ero, omoi llua isoi fiodaillamona comini ico jilloñedena, ie isoi Cristo jiai nia raiafomo ite. Niade jilloñede. ¹⁴ Cristo jilloñenia, Cristo rafuena jai tainona lloticaí. Naie rafuena jiai tainona ñnotomoi. ¹⁵ Cristo fiodaillamona Jusiñamuidi naimiēna jillotajana llofuecabiticaí. Fiodaillamona creyentiaína ico Jusiñamui jillotañenia, Cristona jiai niade jillotañede. Jusiñamui rafuena tainona jai llofueticaí. ¹⁶ Fiodaillamona nana creyentiaí ico jilloñenia, Cristo jiai jaiē jilloñede. ¹⁷ Cristo nia jilloñenia, naimiēna tainona ñnotomoi. Jusiñamui omoi jeacinona niadedi oni dotañede. ¹⁸ Cristona ñnuanona jai fioidaitinodi jiai jai faifidimaci. Jusiñamui illanomo jaca iñeditimaci; iadedi iraimo jaca iitimaci. ¹⁹ Nana cai ille ñnori ñani Cristo caina jilloitallemo cai ocuiria; iadedi naimie jilloñenia, jai duere iticaí. Jai tainomo ocuiridicaí.

²⁰ Ero, tainomo ocuirañediticaí; iadedi fiodaillamona Jusiñamui Cristona jai jillotate. Naimie jillua mei, naimiēna cioidicaí. Ailluena fioidaitino jai itimaci; iadedi Cristo jai jillode. Ie jira nana jai fiodaite creyentiaí jiai jilloitimaci. ²¹ Adán micori jeacinona finua jira, fiodaite. Fiodaillamona jilloñede. Jeacino naimie finua jira, fiodaicana jiai jaidicaí; iadedi fiodaillamona Cristo jai jillua jira, fiodaillamona ico jiai jilloiticaí. ²² Adán micorimona cai comuilla jira, nana fiodaicana jaidicaí; iadedi Cristomo cai duilla jira, jilloiticaí, naimie diga jaca cai illena. ²³ Cristo jai jillode. Cai fiodailla mei, naimiēmo cai duilla jira, ico dane abido naimie bille facaise jilloiticaí. ²⁴⁻²⁵ Ie mei naimie ñnena nana naimie ñibeimo iñedinona anafeditaite. Nana naimie ñibeimo iñede joreñuaina jiai anafeditaite. Illaimana Cristo illamona, nana naimie ñibeimo iñedinona anafeditaite. “O uai cuemo o illamona, nana o jitailla rafuena jai fuidodicue” ie Moomo lloite. ²⁶ Nana naimie ñibeimo iñedinon naimie anamo jai illa mei, Cristo muidona naimie comini jai jilluamona dane fioidañeditimaci. ²⁷ Jusiñamuidi nana cominina Cristo anamo itataite. Ie muidona creyentiaídicaí dane fioidañediticaí; iadedi Cristo anamo Jusiñamui iñeite. Cristona oretaja jira, Cristo anamo Jusiñamui iñede. ²⁸ Naga ra Cristo anamo illa mei, ie mañia fuilla mei, Jusiñamui ie Moona jira, Jusiñamui anamo Cristo jiai iite. Jusiñamui nanocamiēna jira, nana naimie finoca ra naimie anamo iite. Nana comini naimie anamo iitimaci.

²⁹ Cristo jilloñedena, fiodaillamona jilloñeditomoidena, ¿ñiese bautizagaomoi? Fiodaillamona omoi jilloñenia, ¿bue ñnena bautizagaomoi?

Tainomo jai bautizagaomoi; iadedi iese inoñedomoi. Dajerie creyentiai marena illamona, omoimona dajerie creyentiaina jaidomoi. Naimaci jai fiodaitimaci; iadedi fiodaillamona ico jilluana inotimaci. Iena omoi inuanona, bautizagaomoi. ³⁰ Cristo jilloñenia, cue jilloñedicuedena, ¿bue ñellena nagarui Cristo rafuena cue llofuiamona, eo jacirede ramona niadedi fiodaicabiticue? ³¹ Cue amatiai, cai Nama Jesucristomo omoi duilla jira, omoi iobidicue; iadedi nagarui niadedi fiodaicabiticue. Cristo rafuena omoimo cue llocabilla jira, jiaie comini iciritimaci. Icirillamona, cuena meineiacadimaci. ³² Efeso railla nairaimo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue llumona jaca buena oñeiticue. Ie muidona fiodaillamona cai jaca jilloñeiticaidena, Cristo rafuena fañonocaida, ico raire jamai cai fiodailla jira, jamai ua jai jaicaillafuena cai jaiacaiticai. Ie ia iese inede. Cristo jai jillode.

³³ Ie jira omoi abiaina jifueño. “Jilloñeiticaí” railla comini diga omoi nabairia, naimaci llogacimodo jiai jaitomoi. Ie muidona naimaci diga nabairiño. ³⁴ Ie jira raise abina uiñuanona, mai jai. Jeacimona finocana jaiño. Omoimona dajerie Jusiñamuina raise uiñoña jira: “Jusiñamuidi cominina jillotañeite” raitimaci. Omoi meidallena, omoimo iese lloticue. Jusiñamui rafuedo raise mai omoi jai.

¿Niese creyentiai jilloitimaci?

³⁵ Omoimona damie nibai jicanoite: “¿Niese fiodaillamona creyentiaidicai jilloiticaí? Naimaci abiai nibai jai rifaidimaci. ¿Nie isoide abiai diga dane iiticaí?” ³⁶ Iese bu jicanoia, raise comecina facañede. O illimo buena o ria, janore sicua meinoconi, o riga radi jai abidi rifaide. ³⁷ Nie isoide icoña o ria, nie isoide ijina o ria, nie isoide idona o ria, naie ra sicua mei, jai jiaifo eruaide. O riga rana eruañede. ³⁸ Naga riarra daje isoi eruañede. Jusiñamui jitailla isoi, jiaiforie eruaide. Ie isoide. Naga fiodaitimie jillua mei, Jusiñamui jitailla isoi, ie abina jiaiforie itataite. ³⁹ Diga isoide cai abiaina Jusiñamui jai comutate. Naga abi isoide ite. Cai maijillena, comini abi ite. Eniruedo macarillena, ocaina abi ite. Fellena, silli abi ite. Jinuimo illena, lliciai abi ite. Ua diga isoide abi ite. Jusiñamuidi cai jiaiforie eruaite abiaina finorede. ⁴⁰ Jusiñamui dine ico cai ia, cai abiai iite, nainomo cai illena. Bene cai abiai jiai ite, bene cai illena. Monamo cai ia, ebireniticaí. Bene cai ia, jiai ebire iticaí; iadedi daje isoi ebire inedicai. ⁴¹ Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucuaí isoi lligaiñoñede. Naga ucuaí daje isoi lligaiñoñede. Monamo cai ico illena, naimie jitailla diese cai abiai caimo iite. ⁴² Ie isoide. Fiodaillamona cai jillua mei, cai abiai jiaifo eruaite. Cai fiodaillamona cai abiai rifaide; iadedi cai jilluamona, cai abiai dane jai rifaiñeite. ⁴³ Cai fiodaillamona cai abiai jai ebinide; iadedi cai jilluamona, cai abiai ebirenite. Fiodaicana cai jailla jira, cai abiai birui raise mairiñede; iadedi ico cai jilluamona, cai abiai mairite. Nana Jusiñamui jitailla rafuena finoreniticaí. ⁴⁴ Cai fiodaia, come abiai isoi caimo birui ite; iadedi cai jilluamona monamo ico caimo cai abiai jiai iite. Enirue iena cai abiai birui caimo ite. Ie jira monamo cai jiaifo eruaite abiai caimo iite.

⁴⁵ Adán micori comuilla rafuena Moisés micori jaie cuela: “Jusiñamuidi nano comuidimie dofomo jafaicina firaiñuamona, naimie micori comena jaide” cuela. Naimiemona cai comuilla jira, fiodaiticaí. Fiodaillamona Cristo jillua jira, ico cai jiai jilloille jira, caina jiaifo eruaite abiaina ico itataite. ⁴⁶ Eniruemo birui cai illa jira, caimo birui ite abiai diga iticaí. Fiodaillamona ico cai jillua mei, monamo cai ia, jiaifo eruaite abiai diga iiticaí. ⁴⁷ Adán micoridi enirue ie. Imuicimona Jusiñamuidi naimiena finode.

Cristodi eniruemo billanona, imana jaide; iadedi Jusiñamui dinena mona-
mona naimie bite. ⁴⁸ Imuicimona Adán micori finua jira, naimie fiodailla
mei, dane imuicina jaide. Naimiemona cai comuilla jira, cai fiodaia, jiai
imuicina jaiticai; iadedi Cristomo jiai duidicai. Cai jillua mei, naimie isoi ico
iiticai. ⁴⁹ Adán micorimona cai comuilla jira, naimiena eruidicai. Eniruemo
Cristo jaie ia, naimie abi ite. Fiodaillamona naimie jillua mei, naimiemo jiaifo
eruaite abi naimiemo ite. Cai jillua mei, Cristona eruaiticai.

⁵⁰ Cue amatiai, buena lloticue. Caïmo jai ite abiai diga monamo Jusiñamui ie
cominina sedajanomo iñeiticai. Cai abiai rifaiilla jira, cai fiodailla facaise naie
isoide abiai diga nainomo jaca iñeiticai. ⁵¹ Ero, Jusiñamui cuena uiñotaga ra-
fuenta omoïmo ja lloticue. Iena navui jaca uiñoñedicai. Nana creyentiaidicai
fodaiñeiticai; iadedi Jusiñamui cai abiaïna jiaïfo meidotaite. ⁵² Omoï uisi jarire
cuirorilla isoi, iena ua raïre meidotaite. Ie trompeta fillanona, jai fiodaite
creyentiaïna Jusiñamuidi jillotajanona, naimaci abiaïna meidotaite. Nia
fodaiñedinodicai cai abiaïna jiai meidotaite. Dane fodaiñeiticai. ⁵³ Cai abiai
birui rifaiacade. Ie jira birui fiodaicana jaidicai. Jusiñamuidi cai abiaïna ico
meidoite. Ico monamo jiaïfo abiai caïmo ia, cai abiai rifaiñeite. Fodaiñeiticai.
⁵⁴ Iese caïmo sua, Jusiñamui facaina lloraima micori jaie cuega uai jiai suite.
Cuega: “Nairuimona creyentiaï jaca fodaiñeitimaci”. ⁵⁵ Cai jaca illa jira,
fiodaicana jaiñeiticai. Fiodaillana jaciruiñeiticai, dane cai fodaiñeiticaina
jira. ⁵⁶ Jeacino illa jira, birui fiodaicana jaidicai. Moisés micori jaie llogacino
illa jira, iena cai raise finonina jira, jeacino caïmo illana uiñoticaï; ⁵⁷ iadedi cai
jeacino facaina cai Nama Jesucristo fiodailla jira, jeacino anamo jai iñedicai.
Cai fiodailla mei, dane fodaiñeiticai. Jusiñamui caïna iemona jai jillotate. Ie
muidona naimieri cai iobillasa.

⁵⁸ Cue amatiai, fiodaillamona nana creyentiaï ico jillua jira, Cristo rafuenta
inocana jai. Naganomo iñeno; iadedi Cristo rafuenta llocana omoï jai. Naimie
jitailla rafuenta finocana omoï jai. Naimie facaina omoï maijia, tainona
maiñiñedomoï. Naiemona diga mare rafue comuite. Iena jai uiñotomoï.

16

Jerusalémo itinomo ucubena oredimaci

¹ Jiaïe rafuenta cuemo jïcanotomoï. Jerusalémo ite creyentiaïmo ucubena
oretaiacadomoï. Galaciamo ite creyentiaïmo cue llua isoi, omoïmo lloticue.
² Naga domingo omoï ucubemona daje diese eneno oni eeno. Omoï maijia
bailla diese ucubemona cue bille dinori iena eeno. Iese naga domingo omoï
eenonena, ico cue bia, ¿niese dacaiño ofrendamo ailluena ucubena joneit-
omoï? ³ Omoï dine cue rilla mei, omoï eenoga ucubena uillena, Jerusalémo
ite creyentiaïmo omoï fetocanona oretaiticue. Cartana jiai oretaiticue, omoï
fetocano mareuidinona Jerusalémo itino uiñollena. ⁴ Jerusalémo cue comeci
jiai jaiacania, cue diga jaitimaci.

Pablo jai macariacade

⁵ Macedonia railla eniruemo nano jaiticue. Creyentiaïna cioïllena, dajerie
nairaimo jaiticue. Ie mei omoï dine jaiticue. ⁶ Diga irui omoï diga nibai iiticue.
Nana rollime facaise omoï diga nibai iiticue. Nibai daje amani fivui iiticue.
Ie mei cuena omoï canollemona oni jaiticue. Omoï dinomona cue jaia, cue
jaïllinona nia uiñoñedicue. ⁷ Omoï dine birui nia jaiñeiticue. Omoï dine birui
cue jaia, dallu omoï diga iiticue; iadedi jiaïruido omoï dine cue jaia, cai Nama
jitaia, omoï diga are iiticue. ⁸ Beno Efesomo nia iiticue. ⁹ Beno diga comini
Cristo rafuenta cacaacadimaci. Naimacimo iena llofueiacadicue. Diga comini

cue llwana uaitatimaci. Cue llwana jitañedimaci Ie jira bene nia lloiacadicue. Pentecostés railla rafue fuille mei, jaiticue.

¹⁰ Omoi ðine Timoteo ria, naimiena raise marena nafue. Cue isoi cai Nama facaina naimie maijicabide. ¹¹ Ie muidona naimie llucanona jamaiño. Omoimona naimie jaiacania, cue ðine abido naimie raise rillena, naimiena raise cano. Naimie jaiacania, naimie caimare caimaduano oreta. Jiaie creyentiaí ðiga naimie billemo ocuiridicue.

¹² Apolona jicanotomoi. Jiaie creyentiaí ðiga omoi ðine naimie jaillana naimiemo lloticue; iadedi naimie comeci nia jaiacaiñede. Jiairuido abi juarena, omoi ðine jaite.

Fuiduacino

¹³ Jeacinomona abina rairui. Cristo rafuena ðnocana omoi jai. Eimie isoi omoi comeciaina ocuiño. ¹⁴ Jiaie cominina omoi isiruillamona, nana omoi finoacalle rafuena fino.

¹⁵ Cue amatiaí, Acaya railla eniruemo Estéfanadi, ie comini ðiga, nano creyentiaídimaci. Iena uiñotomoi. Naimaci jitailla jira, jiaie creyentiaina canocabidimaci. ¹⁶ Naie isoidino lloga uaina cacarei. Naga Cristo ðibeimo maijidino uaina cacarei. Iedo omoi jai. ¹⁷ Omoimona cue ðine Estéfanas bite. Fortunato ðiga, Acaico ðiga naimie billa jira, iobidicue. Cue ðine iñedomoi; iadedi naimaci billa jira, omoi isoi cuena canodimaci. ¹⁸ Naimaci billamona cue comeci caimataide. Omoi comeci jiaí caimataide. Naie isoidinomo: “Marena maijidomoi” omoi railla.

¹⁹ ðiga creyentiaí Asia railla eniruemo itimaci. Imaci uaina oredimaci. Aquila, ie ai Priscila ðiga, ie uaina jiaí orediaimaiaí. Iaimaiaí jofomo dajerie creyentiaí rocabitimaci. Cristomo naimaci duilla jira, omoína isiruillanona, nana naie creyentiaí imaci uaina jiaí oredimaci. ²⁰ Nana bene ite creyentiaí imaci uaina oredimaci. Nana creyentiaina eo caimare uaido.

²¹ Omoimo cue uaina jiaí oredicue. Cuena canollena, naimiemo cue llua isoi, jiaimie bie carta ciega; iadedi cue mameci bene dama cueticue. Nana iena ðno. Pablodicue.

²² Omoimona Cristona bu isiruiñenia, Jusiñamui naimiena duere finollesa. Cai Nama abido dane billesa.

²³ Cai Nama Jesús omoína duenailasa. ²⁴ Jesucristomo cai duilla jira, omoína cue isiruillana omoi uiñuana jitaídicue. Mai. Macaibaite.

CORINTOMO ITE CRISTONA HNOTINOMO IE EMODOMO PABLO ORETAGA RABE

Corintomo ite creyentiaimo Pablo cartana orede

¹ ¿Nigacino? ¿Nie isoidomoi? Pablodícue. Corintomo ite creyentiaí, omoi dine bie carta oredícue. Nana Acaya railla eniruemo ite creyentiaimo bie carta jiaí oredícue. Jusiñamui jitailla jira, ie rafuena cue jino lollena, Jesucristo oretagamiedícue. Cue diga Timoteo illa jira, naimie ie uaina omoi dine jiaí orede. ² Cai Moo Jusiñamui, cai Nama Jesucristo diga, omoína duenaite. Iena uiñocana mai omoi jai. Iaimaiaí omoína uri jai itatate. Iena omoi uiñocana mai omoi jai.

Pablo ie duere sefuilla rafuena cuete

³ Cai Moo Jusiñamuimo iobillacinona cai fecacabillasa, naimiedi cai Nama Jesucristo ie Moo illanona. Jusiñamui cai Moo illanona, caina jaca duenaite. Cai comeciaina jaca ocuiñotade. ⁴ Nie isoide rafuemonona cue duere sefuia, nie isoide ramo cue jiria, naimie cue comecina jaca ocuiñotade. Ie jira jiaínona canoredícue. Nie isoide rafuemonona naimaci duere sefuia, nie isoide ramo naimaci jiria, Jusiñamui caina ocuiñotaja isoi, naimaci comeciaina ocuiñotaredícue. ⁵ Cristomo jai cue duilla jira, naimie isoi cue duere sefuia, naimie cue comecina ocuiñotade. Iemonona jiaíno comecina ocuiñotajana raise uiñotícue. ⁶ Duere cue sefuillamonona, omoína canoredícue. Jusiñamui jitaillacino omoi finocana jaillana jitaídícue. Cuenona naimie ocuiñotajamonona, Cristona omoi faínonocaiñellena, cue isoi omoi duere sefuia, omoína ocuiñotaredícue. ⁷ Cue isoi omoi duere sefuia, cue isoi Cristo omoi comeciaina ocuiñotaite. Iena raise uiñotícue.

⁸ Cristomo cai duillamonona, cue amatiaí isoi itomoi. Asia railla eniruemo jai e duere sefuídícue. Iena omoi raise uiñollena, ie rafuena dane omoi mo lloiacadícue. Eo duere cue sefuilla jira, cue comeci niadedi ocuiñoñedícue. Niadedi fiódaitícue. ⁹ “Naie facaise fiódaitícue” raillanomo cue comecina facadícue. Cue finoca rafuemonona dama jillonidícue; ia Jusiñamui uai siñona jira, naimie cuena jillotade. Fiódaitinona naimie jillotarede. Niadedi fiódaitinona jiaí jillotarede. Naimiedi naimie cuena jillotajana cue inuana jitaide. ¹⁰ Naie facaise e duere sefuillamonona cuena jillotade. Ico cue duere sefuia, iemonona dane cue jilloillena inotícue. ¹¹ Iena cue facaina omoi jicabi. Jusiñamui faíríua meinomo, ailluena comini cue facaina Jusiñamuimo iobillacinona fecaitimaci. Cuenona Jusiñamui canua jira, iobillacinona fecaitimaci.

Pablo Corintomo navui jaiñede

¹² Cuenona gaiñedino cuena nibai jeare ñaitimaci; ia daje rafueri abina iedotícue. Cue comecimona iena uiñotícue. Cristona inoñedinona marena finodícue. Omoína marena finodícue. Jusiñamui jitaillacino finocana jaidícue. Jusiñamuimona jeacinona finoñecana jaidícue. Cue comecina facajacinomonona iese jaiñedícue; ia Jusiñamui cuena canuamonona, iese jaidícue. ¹³ “Iese cuetio; iadedi o comecimo jiaie rafue ite diga caimo cuetio” raitomoi. Omoína jifueiacaiñedícue. Cue cueda cartaina jai facadomoi. Cue cueda rafue omoi raise cacajana jitaídícue. ¹⁴ Cuenona nia e duere sefuia; ia cuena uiñocana omoi jaillanona, cueri omoi iobillana jitaídícue. Cai Nama Jesús abido bia, omoiri cue iobilla isoi, cueri omoi iobillana jitaídícue. ¹⁵ Omoimo iese cue comecina facajamonona, omoi dine navui jaiacadícue. Macedoniamona cue jaiacadícuemo, raise omoína cue iobitallena, omoi dine

nano navui jaiacaducue. ¹⁶ Macedoniamona cue abido bia, omoi dine navui dane jaiacaducue. Judeamo cue diga jaillena, omoimona damieriena omoi oretajana jitaiducue. Iese cue jaillemono navui comecina facaducue. ¹⁷ Omoi dine cue jaiñena jira, cue comeci naganomo illa isoi, comeciaina facadomoi. Damierie ie lloga uaina jaca finoñedimaci. Dani naimaci rafuemo comeciaina facadimaci. “Jii” raitimaci; ia: “Dama ite” comeciaina facadimaci. ¹⁸ Iese iñeducue. Jusiñamui uanaicinona jaca llua isoi, cue comeci naganomo iñede. Omoimo cue lloga uai finoducue. ¹⁹ Jusiñamui Jito Jesucristo rafuena omoimo navui llotucue. Cristo ie llogacinona jaca meidoñede. Silvano iena jiai llofuate. Timoteo iena jiai llofuate. Nagarui daje isoide rafuena llofueticai. Jiairuido jiaie Cristo rafuena llofueñedicai. ²⁰ Nana Jusiñamui jai lloga uai Cristo finoca rafuemonona suicabide. Jusiñamuina cai sedaia: “Cristo ie rafuena raise finode” cai lloia, Jusiñamuina iobitadicai. ²¹ Jusiñamui Cristo dibeimo caina jai itatate. Ie rafuena cai lloiena, caina jai fetode. ²² Ie cominina caina itatate. Iena cai uiñollena, ie Joreño caimo jai itatate. ²³ Jusiñamuidi cue uanaicinona llua uiñote. Uanaicinona cue lloñenia, Jusiñamui cuena duere finuana jitaiducue. Omoi finoca rafue jai cue uiñuamona, omoimo cue riire lloi raillano, omoi dine navui dane jaiñeducue. ²⁴ Cristona jai omoi inuana uiñoticue. Cristona inocana omoi jailla jira, omoi finolle rafuena lloñeducue; ia omoi iocire illana jitaiducue.

2

¹ Omoi dine nia cue jaiñellemono comecina facaducue. Omoi dine navui cue ia, iocire coniniri iñedicai. ² Omoina jai iciducue. Cueri omoi iobillana jitaiducue; ia omoina cue dane icia, coniniri iocire iñeticai. ³ Omoimo cartana navui oreducue. Omoi dine ite rafuena raise finollena, iena oreducue. Cuena iobitajana uiñotomoi. Omoi dine ite rafuena omoi raise finoia, coniniri iocire iitica. “Cuena iobitaitomoi” raillanomo cue comecina facaducue. ⁴ Cue comeci eo sunaillamona, cue comeci eo eiamona, carta navui oreducue. Omoina iciaicaiñeducue; ia omoina cue eo isiruillana omoi uiñuana jitaiducue. Ie jira omoi dine ite rafuena raise fino.

Maraiñede rafuena finodimie rafuena feita

⁵ Maraiñede rafue navui damie finua jira, sunaiticai. Naimie muidona cue comecido duere jaide; ia daje isoi omoi comeciai jiai duere jaide. ⁶ Omoi nabei dine ite cominimona naimie jai duere sefuilla jira, dama iesede. Naimiena dane duere finoñeno; ⁷ ia naimie finoca rafuena mai feita. Iena dane llinoñeno. Naimie comecina ocuiñota. Naimiena iese omoi canoñenia, omoimona duere sefuillamona, abido danomo jaite. ⁸ Ie jira: “Ona nia isiruiticai” naimiemo llono. Iena eo jitaiducue. ⁹ Nana cue llua omoi inuana cue facacillena, carta omoi dine navui cueticue. ¹⁰ Naimie finoca rafuena omoi feitaia, iena cue jiai faitaitucue. Cristo rafuena omoi inocana jaillana cue jitailla jira, naimie rafuena faitaitucue. Cristo cuena uiñuamona, iena faitaitucue. ¹¹ Taife ramo cai faiana uiñoticai. Cristo rafuedo cai raise jaiñellena, naimie jitaillana uiñoticai. Cristo dibeimona caina Taife itañenia, omoi motomo itimie finoca rafuena faitaiticai.

Troamo navui Pablo ia, uri iñede

¹² Troamo navui jaiducue. Cristo rafuena cue lloiena jaiducue. Cai Nama comini comeciaina jetajamona, naimie dibeimo cue maijiamona, ie rafuena llotucue. ¹³ Tito nainomo cue cioñena jira, uri iñeducue. Naimiedi cue ama isoide. Ie jira nainomo ite creyentiaina facaduanona, Macedoniamoi jaiducue.

Jusiñamuidi Cristo dibeimo iñedinona anafefitaite

¹⁴ Jusiñamui fue eo mare. Cristo dibeimo iñedinona naimie anafefitajanona, Cristo cominina cai illamona, naimie rafuena uicana jaidicai. Ie rafuena cai lloia, iena comini inoia, Jusiñamui naimacina jai caimare itatate. ¹⁵ Cristomo cai duillamona, ie rafuena cai lloia, Jusiñamuina iobitadicai. Cai llumona, damierie jillodimaci. Iena jitaiñenamona, damierie faifidimaci. ¹⁶ Iena cacajamona, damierie faificana jaidimaci. Jusiñamui illanomo jaca iñeitimaci. Iena cacajamona, jiaño Jusiñamui illanomo jaca iitimaci. Jamai bue isoidicue; ia bie rafue llocana jaidicue. ¹⁷ Damierie Jusiñamui rafuena llumona, ucubena oiacadimaci. Omoimo comecina facañedimaci; ia iese llofueñedicue. Omoimo cue comecina facajanona, bie rafue cue llumona, buena oñedicue. Jusiñamuimona cue llogacinona oticue. Jusiñamui cuena ciua jira, Cristomo cue duilla jira, uanaicinona jaca lloticue.

3

Cristo caimo lloga rafuedo birui jaidicai

¹ Omoï dine damierie llofueraïni jaia, cartaiaina uicabitimaci. Naimaci cartaiaimo jiaïnodï: “Bie llofueraïni mare” raïllanona cuetimaci. Omoïmona jiaïno cuega cartaiaina: “Bie comini mare” raïllana jitaiñedicue. Cuemona jiaïno cuega cartaiaina: “Pablo mare” raïllana jiaï jitaiñedomoï. ² Omoï marenana jai uiñoticue. Cue maremenana jai uiñotomoï. Carta isidomoï. Jusiñamui dibeimo omoï comeciï meiduamona, cue comecimona omoïna raise uiñoticue. Omoï birui illamona, omoïna fidiamona, nana comini omoïna raise uiñotimaci. Ie jira jiaïnodï: “Bie comini mare” raïllana omoïmona jitaiñedicue. ³ Cristo rafuena omoïmo lloticue; ia Cristo omoï comeciaina jai meidotaja jira: “Omoï mare” raïllanona naimie jai cuegadana, nana comini uiñotimaci. Tinta diga naimie cueñede. Jusiñamui Moisés micorimo jaie lloga rafue jamai noficimo cuega. Cai cajede Jusiñamui birui iese cueñede; ia naimie Joreño uaido omoï comeciaina birui meidote. ⁴ Cristomo cue jai duilla jira, Jusiñamuina cue inuamona, omoïna iese lloticue. ⁵ Cue finoca rafuemona iese lloñedicue; ia Jusiñamui uai cuemo illamona, iese omoïmo lloticue. ⁶ Jiaïe rafuedo birui cue jaïllena, Jusiñamui cuena fetode. Ie uai cuemo illamona, cuemo lloga rafuena llocabiticue. Moisés micorimo lloga rafuena birui lloñedicue. Moisés micorimo lloga rafue inuamona, Jusiñamui illanomo jaca buna itatañede. Jusiñamui Joreño llotataga rafuena birui llocabiticue. Iena cai inuamona, Jusiñamui Joreño Jusiñamui illanomo caina jaca itatate.

⁷ Moisés micorimo lloga rafuedo jaïllamona, Jusiñamui dine buna jaca iñena. Noficimo Jusiñamui cuega. Moisés micorimo Jusiñamui llua mei, Jusiñamui uai ebirena jira, Moisés micori uieco eo quenirecaide. Jusiñamuimona naimie abido bia, Israel comini Moisés micori uiecomo eruainidimaci. Nagarui Jusiñamui diga naimie ñaiñenia, naimie micori uieco ja muidomo queninide. ⁸ Jusiñamui Moisés micorimo jaie lloga uai ebirede; ia Jusiñamui Joreño birui caimo lloga uai baifemo ebirede. ⁹ Moisés micori rafuedo bu jaia, faificana jaide; ia naie rafue ebirede. Birui ite rafuedo bu jaia, Jusiñamuimona marebicaide. Ie muidona birui ite rafue jaie ite rafue baifemo ua eo faite. ¹⁰ Moisés micori rafue jaie ebirede; ia jiaïe rafue birui illa jira, Moisés micori rafue jai birui ebinide. ¹¹ Birui ite rafue jaca saiñena jira, ua eo ebirede.

¹² Iena cai uiñuamona, bie rafuena marefodo jaciruiñeno lloticue. ¹³ Inroi diga, Moisés micori isoï cue uiecona ibaiñedicue. Naimie micori ie uieco

ibaide, ja muidomo ie uieco quenirena feioicaillana comini cioiñellena; ia cue lloga rafuena marefodo llocabiticue. ¹⁴ Moisés micorì comini Jusiñamui rafuena jaca ñnoñedimaci. Naimaci comeciái jitaiñena jira, ñnoñedimaci. Moisés micorì rafuena birui judíuai comini facaia, iena nia raise cacaiñedimaci. Dani Cristona ñnuamona, naimaci comeciái raise cacareitimaci. ¹⁵ Cristo rafuena birui naimaci ñnoñena muidona, Moisés micorì rafuedo nia jaidimaci. ¹⁶ Cai Nama ñibeimo bu jaia, naimie comeci raise cacade. Moisés micorì rafuedo naimiedi cai jaiñenana raise uiñote. ¹⁷ Cai Nama Joreño naloiticue. Cristo ñibeimo cai jaia, naimie Joreño caimo jiaí ite. Cristona cai nabaillamona, jeacino anamo jai ñnedicai. Moisés micorì rafue anamo jai ñnedicai. ¹⁸ Cristomo jai cai duilla jira, naimiena cai comeciáimona raise uiñua jira, ie ebirede uaina uiñotícaí. Acaranimo cai eruailamona, cai abina ciodicai. Ie isoide. Cai illamona jaie comini Cristona uiñotimaci. Cai Nama Joreño caina canuamona, naimie ebirena isoi cai illena, icana jaidicai.

4

¹ Jusiñamui cuena duenailamona, cue comecina ocuiñocaida, Cristo rafuena llocana jaidicue. ² Meirede rafuena llofueñedicue. Iena bainino llofueñedicue. Jifuiamona omoina llofueñedicue. Omoiri iobitallena, Jusiñamui rafuena meidoñedicue. Jusiñamui cuena cuana cue uiñuamona, naimie rafuena uanaicinona llofuecabiticue. Cue llofuiana bu raise cacaia, uanaicino cue llofuecabilana uiñote. ³ Faificana jaidinodi cue mare lloga rafuena raise cacaiñedimaci. ⁴ Taife anamo naimaci illamona, naimie naimacina cacarefitañede. Cristo uai ebirede. Jusiñamui isoi naimie ite. Taifedi Cristo rafuena naimaci raise uiñuana jitaiñede. ⁵ Cue finoca rafuena llofueñedicue; ia Jesucristodi cai Namanana llofuecabiticue. Naimie ñibeimo cue maiñamona, omoina canollena, naimie rafuena llofuecabiticue. ⁶ Enirue finua facaise Jusiñamui llote: “Jitiredino nana eniruemo ñnellena, useredino mai iite”. Naimiena cue nia uiñoñenia, jeacino anamo cue illamona, cue comeci jitiredinomo ite isoide. Naimiena cuena naimie jai uiñotaja jira, cue comeci useredinomo jai ite isoide. Jesucristo monamo illanona jaie cue cuanona, Jusiñamui uai ebirede siñonana llofueticue.

Cai comeciái ocuiñocaida ñnocana jaidicai

⁷ Enirue ie imuicimona comuidicue; ia Cristo ie mare ebirede rafue cuemo jai ite. Iemona cue lloga rafue cuemona ñnenana uiñotomoi; ia ie uai siñonana illamona, Jusiñamui illana uiñotomoi. ⁸ Bie mare rafue cue llofuiamona, navui duere sefuidicue; ia nia llofuecana jaidicue. Iena sefuiruiñedicue. Naga cuemo suide rafuemo raise cacarefíñeno comecina ocuiñocana jaidicue. ⁹ Damierie cuena duere finodimaci; ia Jusiñamui cuena fañonocaiñeno cuena canode. ¹⁰ Eniruemo jaie Jesús ia, duere sefuillamona, ja muidomo fiodaite. Jesús isoi duere sefuicana cue jaia, naiemona niadedi nagarui fiodaiticue. Iemona cuena naimie jillotaja muidona, Jesús siño uaina uiñocana jaidicue. ¹¹ Jesús rafuena cue llua muidona, nagarui damierie cuena meineiacade. Iemona cue jillocabilla jira, Jesús siño uaina uiñotomoi. ¹² Naimie rafue cue llua muidona, cuena meineiacadimaci; ia bie rafuena omoi ñnuamona, Jusiñamui illanomo jaca iitomoi. ¹³ Jusiñamui facaina lloraíma jaie cueda: “Cue ñnua jira, iena llofueticue”. Naimie isoi cue ñnua jira, bie rafuena jiaí llofuecabiticue. ¹⁴ Jesús fiodaillamona Jusiñamui naimie jaie jillotate. Iena cue uiñuamona, cai fiodaille mei, caina jiaí jillotaite. Jesúmo cai duilla jira, naimie illanomo danomo caina ico itataite. ¹⁵ Omoi facaina nana cue rafue finodicue. Cristo rafuena comini uiñollena, duere sefuidicue. Iemona

Jusiñamui naimacina duenaillana uiñoitimaci. Jusiñamui dibeimo naimaci illamona, naimiemo iobillacinona fecacabitimaci. Ieri naimiena iobitaitimaci. ¹⁶ Ie jira iena sefuiruiñedicue. Cue mairici fuicana nagarui jaide; ia cue comeci nagarui ñnocana ocuiricana jaidicue. ¹⁷ Birui duere sefuidicue; ia iemo cue comecina eo facañedicue. Cristo rafue muidona birui duere cue sefui, Jusiñamui illanomo ico cue ia, nainomo ebire marena iiticue. Iemo cue comecina eo facadicue. ¹⁸ Cuemo birui suide rafuemo comecina eo facañedicue. Jusiñamui illanomo cue nia cioñena rafuemo comecina eo facadicue. Bene ite rafue fuite; ia monamo ite rafue jaca fuiñeite. Bene cue duere sefuillacino fuite; ia nainomo cue Nama diga iocire jaca iiticue.

5

¹ Caïmo ite abi rifaillemona, Jusiñamui illanomo cai illemona, Jusiñamui jiaie isoide abi caïmo itataite. Nainomo cai abi jaca rifaiñeite. ² Birui cue duere sefuillamona, Jusiñamui cuemo ico itatalle abina eo oiacadicue. ³ Cue fiodailla mei, Jusiñamui cue joreñomo jiaie isoide abina itataite. ⁴ Cue jiaie isoide abi cuemo illena, cue jamai fiodaiacaiñedicue; ia iena eo oiacadicue. Jusiñamui cuemo jiaie isoide itataiacade abina eo oiacadicue. Cue fiodaille abi ifomo jaca ille abina cuemo iite. ⁵ Jusiñamuidi ie Joreño caïmo itatajamona, cai abiaina iese jiaie itatajana uiñoticaï. ⁶ Iena cue uiñuamona, nie isoide rafue ia, ñnocana jaca jaidicue. Nia cue fiodaiñenia, cai Nama illa ecimo nia iñedicue. ⁷ Naimiena birui cioñedicue; ia naimiena ñnocana jaidicue. ⁸ Iese jaidicue. Cue Nama diga cue illena, fiodaiacadicue; ⁹ iadedi nia cue fiodaiñenia, naimiena jaca iobitaiacadicue. Cue fiodaia, naimiena jiaie jaca iobitaiacadicue. ¹⁰ Naimie llua jira, Cristo uicomo ico nana iiticaï. Cai bene finoca rafuena uiñotaite. Maraiñede rafuena cai bene finua diese, naimiemona ibana feiñoñeiticaï. Mare rafuena cai bene finua diese, naimiemona ibana feiñoiticaï. Ie muidona naimie jitaillacinona jaca finoacadicue.

Jusiñamui diga cai uri illafue

¹¹ Cue Nama uicomo ico cue illemona, iena cue jaciruillamona, naimie dibeimo cominina jai itatacana jaidicue. Jusiñamui cue illana raise uiñote. Cue illana raise omoi uiñuana jitaidicue. ¹² “Cuedi maremedicue” lloñedicue; ia cue abi facaina omoi riidollena, bie rafuena lloticue. Omoi motomo damerie llofueraïni naimaci llofuiacino diga abina iedotimaci; ia naimaci comeciïmo iticino diga abina iedoñedimaci. ¹³ “Naimiedi uairico” cuena raitimaci. Iese cue iticuedena, Jusiñamui facaina iese iticue; ie iadedi uairicoñedicue. Omoïna llofuellena, omoi facaina majidicue. ¹⁴ Nie isoidicuenta, Cristo cuena isiruillana cue uiñuamona, jaca llofueiacadicue. Nana comini facaina damie fiodaillana jai ñnoticue. Naimaci jeacino ifomo naimie jai fiodaite. ¹⁵ Nana cai facaina naimie fiodaite. Fiodaillamona Jusiñamui naimiena jai jilloitate. Naimiena nia cai ñnoñenia, dani cai comeciïmo ite rafue diga iobidicaï; ia naimiena jai cai ñnua mei, dani cai comeciïmona naimiena cai iobitajana naimie jitaide. Ie jira cue illana jai uiñotomoi.

¹⁶ Damerie llofueraïndi jiaïnomo eruaillamona, naimaci comeciïna facajamona: “Naimaci mare” raitimaci. Jiaïcaïño: “Naimaci maraiñede” raitimaci; iadedi Cristona cue ñnua facaisemona iese cominimo eruaïñedicue. Naimiena nia cue ñnoñenia, Cristona jiaie raise uiñoñedicue. “Naimiedi jamai ñma” raillamo comecina facadicue; ia iese naimiemo birui comecina facañedicue. ¹⁷ Cristona cai ñnua mei, naimiemo jai cai duillamona, cai comeciïu uaina meidoticaï. Jai jiaie isoidicaï. Jiaie rafuedo jai jaidicaï. Jai caïmo ite rafuedo jai jaiñedicaï. ¹⁸ Jusiñamui cai comeciïu uaina meidotade.

Cristo fiodaillamona, Jusiñamui dibeimo caina itatate. Iemona naimiena jai nabairedicai. Naimacimo ie rafuena lollena, cuena fetode, jiaie cominina ie dibeimo itatallena. ¹⁹ Cristo finoca rafue muidona, Jusiñamui dinena cominina nabaiacade. Naimaci jeacino facaina ibana jai oiacañede. Bie rafuena lollena, cuena jai fetode. ²⁰ Cristo cuena oretajamona, naimie facaina llofuecabiticue. Cue llogacinomona Jusiñamui uiñotomoi. Omoimona naimiena bu nia inoñenia, Cristo facaina cue illa jira, Jusiñamuina omoi nabaillanona, naimie diga uri i. ²¹ Cristo jeacino jaca finoñede; ia cai jeacino facaina, Jusiñamui jitailla jira, jeacino finodimie isoi jaide. Naimiemo cai duillamona, Jusiñamui jitailla isoi, jai marebicaidicai.

6

¹ Bie rafuena nia lliacadicue. Jusiñamui facaina cai maijiamona, naimie dibeimo cominina itataticai. Naimie caina duenaillana uiñoticue. Iena omoi inocana jaillana jitaidicue. ² Jaiie Jusiñamui cuetatate:

Cue jitailla facaise omoi jitaillacinona jai cacadicue.

Omoi jilloillena, omoina jai canodicue.

Ero, Jusiñamui birui omoina cacaacade. Birui omoina canuanona, omoina jillotaiacade. Ie muidona naimiena inocana jai. ³ Bie rafuena omoi inoñellena, cue llofuiacinona omoi jamaiñellena, bu diga rafuena comuitaiacañedicue. ⁴ Jusiñamui dibeimo cue maijiamona, nie isoide rafuemona ramo cue jiria, cue illamona naimiedi: “Mare” cuena raillana jitaidicue. Eo duere sefuidicue. Diga icaiño damierie cuena duere finodimaci. Diga icaiño ramo jiridicue. ⁵ Damierie cuena fatimaci. Cárcelmo cuena jonetimaci. Naimaci illanuaimona cuena riire dotadimaci. Eo cue maijia jira, diga icaiño eo raise iniñedicue. Aime guisoidicue. ⁶ Jearede rafuena ebiruiñedicue. Cristo rafuena uiñocana jaidicue. Icirñedicue. Jiaionona canocabidicue. Jusiñamui Joreño anamo iticue. Cominina raise isiruiticue. ⁷ Uanaicinona llocabiticue. Jusiñamui uai cuemo illamona, llofuecabiticue. Cue comecina riidollena, Taifena emodofillena, Jusiñamui jitailla isoi, marecinona finocana jaidicue. ⁸ Damierie cuena marena jai ñaitimaci. Jiaino cuena jeare nia ñaitimaci. Damierie cueri jai iobidimaci. Jiaino cue joreña jai ñaitimaci. Damierie: “Caina jifuetio” cuena raitimaci; ia nia uanaicinona llocabiticue. ⁹ Damierie: “Jamai bue isoidio” cuena raitimaci; ia jiaino cuena raise uiñuamona, naimaci dinena jamai bue isoñedicue. Nagarui niadedi fiodaicabiticue; ia nia iticue. Duere sefuicana jaidicue; ia Jusiñamui cue comecina ocuiñotacana nia jaidicue. ¹⁰ Sunaiticue; ia iocire jaca iticue. Dueredicue; ia ailluena comini comeciaina eo caimaretadicue. Buenidicue; ia Jusiñamuimona ailluena marecinona feiñotocue. Iese jaca jaidicue. Cue illamona: “Naimiedi mare” cuena omoi raillana jitaidicue.

¹¹ Corintomo itino, cue nabaiñiai, cue comecimo ite rafuena marefodo jai llotocue. Cue comecimona omoi diga marena iacadicue. ¹² Cuemona omoina raise isiruiticue; ia omoi dinena nia cuena eo isiruiñedomoi. ¹³ Cue uruia; omoi isoilla jira, omoi diga ñaiticue. Omoina cue isiruilla isoi, cuena omoi isirui.

Jusiñamui cai comeciaino illanodicai

¹⁴ Creyentedimie mo jearede ramo faitatai raillano, daje isoide rafuedo iaiaiaia jaiñena jira, daje isoi rafuena iaiaiaia comeci lloñena jira, creyente creyenteñedimie diga daje rana namatañena. Aina illena, creyentena iñediñaiña creyentedimie oñena. Inina illena, creyentena iñedimiena

creyentediñaiño oñena. Marecinodo jaiacadimiedi maraiñedicinodo jaiacadimie daje isoi diga nabairinide. Jusiñamuina uanaicinona uiñotimiedi useredinomo jai ite isoide. Jeacino anamo nia itimie jitreidinomo nia ite isoide. Cristo rafuena naimie uiñoñede; ia Cristo rafuena omoi uiñuamona, useredinomo jai itomoi isoidomoi. ¹⁵ Cristodi Taife diga jaca nabairinide. Creyentemiedi creyenteñedimie diga daje isoi inide. Daje isoi comecina facañede. ¹⁶ Creyenteñedimiedi Jusiñamuina sedañede; ia jiraraina sedade. Creyente comecimo Jusiñamui illamona, Jusiñamuina sedade. Nana creyentiaí comeciaino Jusiñamui ite. Iena jaiie Jusiñamui llote:

Comini motomo iiticue.

Naimacina nabaiticue.

Naimaci Jusiñamuniticue. Cue comininitimaci.

¹⁷ Ie muidona cuena ñnoñedino diga daje rana namatañeno.

Naimaci jearede jetaca rafuena abimo oñeno.

Iemona omoina raise feiñoiticue.

¹⁸ Omoi Moona iiticue. Cue uruina jaitomoi.

Siño jitodicue.

7

¹ Cue isiruiganodomoi. Bie llogacino Jusiñamui caimo jai llua jira, naga maraiñede rafuena fañonocaida, cai jailla. Naga cai comeciaina jearetade rafuena fañonocaida, mai cai jailla. Jusiñamuina cai jaciruillamona, nana naimie jitaillacinona finocana mai cai jailla.

Pablo cartamo ciegacino diese finodimaci

² Omoi comeciainona cuena raise feiño. Buna jeare finoñedicue. Buna jifueñedicue. ³ Maraiñede rafuena jai omoi finuana lloñedicue. Omoimo cue comecina nagarui facadicue. Iena ailli lloticue. Nia cue ia, raire cue fiodaia, omoina jaca ubiñocabiticue. ⁴ Cue llucacina omoi ñnuana raise uiñotiticue. Omoiri iobidicue. Omoi diga jai uri iticue. Duere sefuidicue; ia iocire iticue.

⁵ Macedoniamoi navui cue jaidicue, cue comeci uri iñede. Cue dibeimo iñedinomona nagarui duere sefuillamona, cue comeci jarire ite. Cristo dibeimona creyentiaina naimaci itatallemo cue comeci jarire ite.

⁶ Comeciaina ocuiñedinona Jusiñamui ocuiñotacabilla isoi, Tito billamona, Jusiñamui cue comecina ocuiñotade. ⁷ Cue dine naimie ria, iocire iticue. Omoimo ite rafue cue cacajamona, jiai iocire iticue. Cuena omoi cioacanana llote. Cue comeci jarire illari sunaitomoi. Cuena riidoiacadomoi. Iena cue cacajanona, iocire iticue. ⁸ Carta omoi dine navui oredicue. Iena omoi feiñua mei, sunaitomoi; ia iena cue oretajari birui sunaiñedicue. Navui ieri sunaiticue; ia iena omoi feiñua mei, iemona dallu omoi sunailla jira, jai iocire iticue. ⁹ Omoi sunaillana jitañedicue; ia iemona Jusiñamui dibeimo omoi comeci iuai omoi meidua jira, iocire iticue. Cue cueda carta muidona icirñedomoi; ia Jusiñamui jitailla isoi sunaitomoi. ¹⁰ Jusiñamui jitailla isoi, ie jeacino facaina bu sunaillamona ie comeci iuai Jusiñamui dibeimo meidoia, sunaiñede; ia bu jamai sunaillamona ie comeci iuai Jusiñamui dibeimo meidoñenia, faifite. Jusiñamui diga jaca iñeite. ¹¹ Jusiñamui jitailla isoi omoi sunaillamona, omoi comeciaina raise finodomoi. Maraiñede rafue dibeimo iacaiñedomoi. Iena eo jitañedomoi. Jusiñamui duere sefuitallicino anamo iacaiñedomoi. Cuena dane cioacadomoi. Jusiñamui jitaillacinona eo finoacadomoi. Jusiñamui dibeimo naimie illena, maraiñede rafuena finodimiena duere finodomoi. Nana bie rafuena raise fuidodomoi. ¹² Carta navui omoi dine cue oretaia, maraiñede rafuena finodimienmo cue comecina

eo facañedicue. Naimiemona duere sefuidimie mo cue comecina eo facañedicue. Cuemo omoi comeciaina facajana omoi uñollena, navui cueticue. Jusiñamui iena uñote. ¹³ Ie jira cue comecina ocuiñoticue. Tito jia iocire illa jira, dane iobidicue. Naimie comecina caimare omoi itataja jira, iobidicue. ¹⁴ Omoi ðine Tito nia jaiñenia, naimie mo omoi lloticue. “Naimaci ona feiñotimaci. Naimaciri iobidicue” naimie mo navui lloticue. Iese naimiena omoi feiñua jira, ieri meidaiñedicue. Omoimo uanaicinona jaca lloticue. Naimie mo cue llua isoi jia suide. ¹⁵ Naimie llofuiacino omoi ðnoiacana jira, naimie mo birui raise isiruite. Meiruiocaida, comecia jarire illamona, naimiena feiñotomoi. ¹⁶ Omoi raise uñoticue. Cristo ðnocana omoi jaillana raise ðnoticue. Omoi iocire iticue.

8

Creventia Jusiñamuimo ucubena fecaja rafue

¹ Cue amatiai, omoimo jiaie rafuena lloiacadicue. Jusiñamui naimacina canuamona Macedoniamite creventiaina omoi uñuana jitaidicue. ² Eo duere sefuidimaci. Jiaie eo dueredimaci; ia iocire illamona, jiaie creventiaimo ucubena caidñeno fecacabidimaci. ³ Naimacimo ite ucube ðiese fecadimaci. Iena uñoticue. Naimaci jitailla jira, naie baifemo fecadimaci. Naimacimo iese fecajana jaca lloñedicue. ⁴ Naimacimo iese lloñedicue; ia iena naimaci eo fecaacana jira, jiaie creventiaina canollena, cuemo iena eo jicanotimaci. Ucube ðiga jiaino creventiaina naimaci canuana cue llua eo jitaidimaci. ⁵ Cue comecina facaja isoi, fecañedicue. Ucubena fecadimaci; ia: “Cai Nama ðibeimo maijacadicai” jiaie llotimaci. Nie isoide rafuena naimaci finuana cue ocuillena, Jusiñamui jitailla isoi, jitaidimaci. ⁶ Omoi ðine Tito dane jaillena jitaidicue. Omoi ðine naimie navui ia, ucube omoi uana naimie canode. Iemona janore tainedomoi. Jiaie creventiaina omoi canuana raise fuiduana jitaidicue. ⁷ Cristona ðnocana jaidomoi. Iena jiaino llocabitomoi. Cristo rafuena raise uñotomoi. Cristo jitaillacinona eo finocana jaidomoi. Cuenajiaie isiruitomoi. Ie muidona omoi ucube ðiga, jiaie creventiaina omoi raise canuana jiaie jitaidicue. ⁸ Omoi iese riire lloñedicue. Macedoniamite creventiaina eo canuana omoi uñuamona, jiaie creventiaina omoi canoia, Cristona omoi isiruillana uñotimaci. ⁹ Cai Nama Jesucristomona cai fueua. Naimie cana duenaillana uñotomoi. Ie Moo ecimo naimie nano illamona, naga ra naimie mo ite; ia eniruemo ie billamona, cana canollena, ðimana jaillanona, duere ite. Iemona Jusiñamui rafuena cai cacaja jira, duere iñedicai. ¹⁰ Ie jira omoimo bie rafuena lloiacadicue. Navuidi año ucube eenuana tainedomoi. Iena finoacadomoi. Ie fuiduana jiaie jitaidicue. ¹¹ Omoi jitaillamona bie rafuena fuido. Omoimo ite ucube ðiese feca. ¹² Ailluena ucubena omoimo iñenia, dama iesede. Omoi jitailla jira, omoimo ite ucube ðiese omoi fecaia, Jusiñamuimona mare; ¹³ ia omoi jitailla rana omoi ollena, omoi ucube iñeni raillano, omoi jitailla baifemo omoi fecajana lloñedicue. ¹⁴ Jiaie creventiaimo ra birui raise iñena jira, naimacina omoi canuana jitaidicue. Omoi ra ico iñenia, naimaci ðinena omoi canuana jitaidicue, nana omoimo ðaje isoi omoi ra illena. ¹⁵ Moisés micori illa facaise ite cominimona cai fueua. Naimacina jiaie iese cueda: “Jusiñamui oretaga guiga ramona ailluena guillena, nagarui ðamierie iraiuidimaci. Jiaie janore guillena, iraiuidimaci; ia coniniri fecajamona, imaci jitailla ðiese nagarui nana guitimaci”. Ie muidona omoimo ite ucubemona naimaci jitailla ra illena, jiaie creventiaimo omoi fecajana jitaidicue.

Pablo Titona ñaite

¹⁶ Omoï dine Tito dane oretaiacadie. Cue isoi naimie omoïmo começina facade. Omoïna canoacade. Naimie começina Jusiñamui iese itataja jira, Jusiñamui iobidie. ¹⁷ Omoï dine jaillena naimiemo llotie, naimie dinena: “Jee” raite. Naimiemo nia iese cue lloñenia, omoïna naimie eo canoiacana jira, naimie omoï dine jailleno ie começina facade. Omoï dine raie jaite. ¹⁸ Naimie diga jiaimie oretaitie. Naga nairaimo ite creyentiaïdi: “Cristo rafuena eo raise llofuecabite” naimiema raitimaci. ¹⁹ Cue diga jaillena, naimiema fetodimaci. Dueredimomo omoï ucubena cue uillena, cue diga naimie jaite. Iemona cai Namana iobitaiticai. Iemona nana creyentiaïdi naimacina cue canuana uiñoitimaci. ²⁰ Omoï ucubena raise cue sedajana jitaie. Iemona: “Pablo cai ucube fide” omoï llua jitaie. “Iena Pablo raise fecañede” omoï llua jitaie. ²¹ Iena raise marena sedaacadie. Jusiñamui iema uiñote. Nana creyentiaï iema uiñuana jiaï jitaie. ²² Iaimaiaï diga jiaimiena jiaï oretaitie. Naimie Cristona eo ñnocana jaillana raise uiñotie. Omoï rafuena naimie fidiano, jiaie creyentiaïna omoï canuana naimie ñnuanona, omoï dine naimie eo jiaicade. ²³ Omoïmo Titona bu jicanoia, naimacimo naimiema raise llono. Danomo Cristo ñbeimo maijiticoco. Cue diga omoïna canode. Jiaie iaimaiaïna bu jicanoia: “Jiaie creyentiaï iaimaiaïna fetuamona bitiaïmaiaï” llono. Cristona iobitaiacadiamaiaï. ²⁴ Cueno omoï isiruillamona: “Omoï mare” omoïna cue llua, naimacina raise nafue. Nana cue jitailla rafuena omoï finuana naimaci uiñuana jitaie. Omoï ucubena eenuana raise fuiduana jitaie. Iena omoï finuamona, abido naimaci bia, naimacina oretaga creyentiaïmo iema lloitimaci.

9

Jiaie creyentiaïna canollena, omoï ucube olle rafue

¹ Bie rafuena omoï jai uiñua jira, iema dane lloñeitie. ² Ucubena omoï jai fecaacana uiñotie. “Benomo Macedoniamomo ite creyentiaïmo omoïri iobidie” llocabitie. “Navuidi añomona fecaacadomoi” llocabitie. “Acaya railla provinciamomo ite creyentiaï fecaacadimaci” llocabitie. Iese omoï illamona, bene ite creyentiaï jiaïno creyentiaïna jiaï canoacadimaci. ³ Iese uiñotie; ia omoïna cue canollena Titona oretaitie, cue jitaillacino omoï raise fuidollena. Ucubena dajena uana raie jitaie. ⁴ Omoï dine Macedoniamomo ite creyentiaï diga cue rillanona, omoï ucube dajena nia iñenia, iese omoïna cue lluaconi meidaitie. Omoïdi jiaï meidaitomoi. ⁵ Ie muidona Tito idai jaillana jitaie. Ucube dajena uana omoï llua isoi, omoïna canoite. Omoï ucube dajena uana lloiacañedie; ia omoï começaimona jiaïno creyentiaïna canuana omoï jitailla jira, iema jitaie. ⁶ Jiaie rafuedo iema lloitie. Janore iduana bu ria, janore llisillana oite. Ailluena iduana bu ria, ailluena llisillana oite. Cue llua jira, omoï ucube dajena oia, eo caïmare iñeitomoi; ia omoï começiaï jitaillamona omoï ucubena dajena oia, eo caïmataïtomoi. ⁷ Ucube dajena omoï oia, nagamie ie começina facajamona fecaia. Naimie jitaie fecañena. Naimie jitailla jira, naimie fecaia. Jiaimie omoïna ñai raillano, “Cai ucubena fecaiticai” raieño; ia o jitaillamona iema feca. Começiaï iocire illamona omoï fecaia, Jusiñamuina iobitadomoi. Iema Jusiñamui jitaie. ⁸ Jusiñamui omoï jitailla baifemo omoïmo fecarede. Nana omoï jitailla ra omoïmo naimie illamona, jiaïnomo omoï fecaia, naimacina canorenitomoi. ⁹ Jusiñamui facaina lloraïma micori iema jiaie cuega: “Jusiñamuina ñnotimie dueredinona canocabide. Mare rafuena finocana jaie”. Ie omoï finollemo, Jusiñamui omoïna canoite. ¹⁰⁻¹¹ Ero,

illimo maijirainimo Jusiñamui iduaina itatate. Iena sicuamona, monail-lamona, nainomo maijirainidi naiemona guicabite. Ie isoide. Omoimo Jusiñamui nana omoi jitailla rana jaca itataite. Iemona jiaie creyentiaina raise canorenitomoï. Omoi ucubena cai uia, iena jiai creyentiaï feiñoia, Jusiñamuimo iobillacinona eo fecaitimaci. ¹² Ucubena omoi oretaia, duerede creyentiaina canodomoï. Omoi muidona naimaci Jusiñamuimo iobillacinona jiai fecadimaci. ¹³ Iemona Cristona omoi raise inuana uiñoitimaci. Ieri Jusiñamuimo iobillacinona fecaitimaci. Omoi iga ucube facaina iobillacinona Jusiñamuimo fecaitimaci. Naimacina canoitomoï. Iemona nana jiaie creyentiaina canoitomoï. ¹⁴ Omoi facaina Jusiñamuimo jiiitimaci. Omoïna naimaci isiruillamona, Jusiñamui omoïna eo canuana naimaci uiñuamona, omoi facaina jiiitimaci. ¹⁵ Jusiñamui caina eo canua jira, iobillacinona naimiemo cai fecallena, cai uai raise iñede. Uainicaidicaï. Naimie eo mare. Naimiena cai iobillasa.

10

Cai Nama Pablona fetua jira, ie uai Pablomo ite

¹ Jiaie rafuena lloiacadicue. Omoïmona damierie llotimaci: “Cai dine Pablo ia, naimiedi caina jaciruite. Riire caïmo naimie rafuena lloñede; ia cai dine naimie iñenia, riire caïmo naimie rafuena llote” llotimaci. Ero, Cristo iciricabiñena isoi iacadicue. Naimie isoi omoïmo lloiacadicue. ² Riire omoïmo lloiacañedicue. Omoïmona damierie cuena raitimaci: “Pablodi Cristona inoñedimie isoi icabite”. Naimaci iese nia lloia, omoi dine cue ria, naimacimo jaciruiñeno riire lloiticue. ³ Comena iticue; ia comini diga cue rafue iñede. ⁴ Taise dibeïmo itino diga cue rafue illa jira, jamai cue uai diga naimacina llacaitañeiticue; ia Jusiñamui uai diga naimacina llacaitaiticue. ⁵ Cristo uai diga Jusiñamui dibeïmo iñedino llucinoconi uainicaitaticue. Abina iedotimaci; ia Jusiñamuina uiñoiacañedinona uainicaitaticue. Naimaci comeciaina facajacinona uainicaitaticue, naimacina Cristo rafuena cue inotallena. ⁶ Cristo anamo omoi raise ia, cue lloga uaina omoi raise inocana jaia, omoïmona raise inoñedinona duere finoiticue. ⁷ Cominimo jamai eruailamona: “Naimaci mare” raitomoï. Jiacaiño: “Naimaci marañedimaci” raitomoï; ia naimaci comeciaina uiñoñedomoï. Omoïmona damie nibai comecina facade: “Cristomona cue uai illamona, Pablo baifemo faiticue”. Cue dinena raiticue: “Cristomona cue uai illamona, daje isoidicoco. Cue baifemo naimie fañede”. ⁸ Abina iedoñedicue; ia cue abi iedoia, ieri meidañedicue. Cristomona cue uai illa jira, cue uai ite, naimie dibeïmo omoi raise itatallena. Omoïna cue canollena cue uai ite. Cristo dibeïmona omoïna itataiacañedicue. ⁹ Omoïmo riire llollena cue uai ite; ia cue carta diga omoïna jacinaitaiacañedicue. Omoïna canoiacadicue. ¹⁰ Omoïmona damierie cuena raitimaci: “Cartana Pablo cueia, eo riire caïmo llote; ia cai motomo naimie ia, ie uai riinide. Cristo rafue raise llwana raise uiñoñede”. ¹¹ Iese iñedicue. Omoi motomo cue ia, cartana cue cueia, daje isoi llofuecabiticue. ¹² Omoïmona damierie coniniri raitimaci: “Maredicaï”. Iese coniniri naimaci comeciaina facaia, abina uiñoñedimaci. Naimaci isoi cue illemo cue comecina facañedicue. ¹³ Jusiñamui cue maijiana cuemo llote. Naimie llua baifemo jaiñeiticue. Omoi dine ie rafue cue llofuellena, naimie jitaillanona, omoi dine navui jaidicue. ¹⁴ Jusiñamui jitailla rafue baifemo jaiñedicue. Cristo rafuena omoi motomo nano llofueraïmadicue. ¹⁵ Jiaie llofueraïni llofuiamona buena oiacañedicue. Cristo rafuena omoi inocana jaillamona, omoi motomo cue illamona, Jusiñamui jitailla diese omoïna canoacadicue. ¹⁶ Jiaie nairaiaï illanuaïmo Cristo rafuena nia lloiacadicue; ia nainomo jiaie llofueraïma llofuiamona buena oiacañedicue. ¹⁷ Bu abina

iedoiacania, cai Nama finua rafueri naimie abina iedua. ¹⁸ Ie llofuia diga bu abina iedoia, Jusiñamui naimie llofuiaicinona: “Mare” raiñeite; ia Jusiñamui finoca rafueri bu abina iedoia, Jusiñamui naimiena: “Mare” raite.

11

Pablodì Cristo oretaganona abì caitadinona llote

¹ Abina cue raise uiñoñenia, cue diga iciriño. Cue llamo nia cacarei. ² Omoimo Jusiñamui comecina facaja isoi, omoimo comecina facadicue. Cue muidona Cristo rafuena omoi cacaja jira, Cristona uiñotomoi. Ima diga nia iñediñaiño, ie inina illena, ie jitaillamiemo ie moo fecaja isoi, Cristomo omoina fecaacadie. Omoimo jecino iñena isoilla jira, omoina Cristomo fecaacadie. ³ Jiaie rafuemo omoi comeciaina facacana omoi jaillamo jacinaitie. Jaie jaiona eruailamona, Taife Eva micorina jifute. Jiai llofueraini Cristo rafuedo omoi raise jaiñenana itatajamo jacinaitie. ⁴ Diga llofuerainina feiñotomoi. Jesús rafuena jiaiforiedo llofuecabitimaci. Cristo rafuena cue isoi llofuecabiñedimaci. Jusiñamui Joreño omoimo illana cue isoi llofuecabiñedimaci. Cue mare lloga rafue isoi llofuecabiñedimaci; ia naimacina jaca feiñotomoi. Ie jira Cristo dibeimona omoi jaillemo jacinaitie. ⁵ “Cristo oretaganodicaì” raitimaci; ia naimaci cue baifemo faiamo cue comecina facañedicue. ⁶ Naimaci isoi rafuena jino llua na eo uiñoñedicue; ia Cristo rafuena eo raise uiñoticue. Nana cue finoca rafuemonona omoina iena diga icaiño uiñotadicue. Uanaicinona omoina jaca llofuecabitie. ⁷ Omoimo Jusiñamui rafuena navui cue lloia, omoina ibatañedicue. Omoimona ucubena jicañedicue. Cue ucube ollena, dama jiaie rana maijidie. Iese cue illa jira, damieriemona marañede rafuena finodicue; ia cuemona eo mare rafuena jai uiñotomoi. Iemona abina jai uiñotomoi. ⁸ Omoina cue canollena, jiaie creyentiamona ucubena feiñoticue. Omoi facaina naimacimona feiñoticue. ⁹ Rana cue jitailla facaise omoimona ucubena jicañedicue; ia Macedoniamona bite creyentiaì cuena canodimaci. Omoimona navui ucubena cue oñena jira, birui cue oñena jira, cuemona ibana oñetomoi. ¹⁰ Cristo cue illana uiñuamona, naimie uanaicimodo cue jaillamona, nana Acaya raila provinciamona iena jaca lloiticue. ¹¹ Omoina cue isiruilla jira, ucubena omoina jicañeitie. Jusiñamui cue comecina raise uiñote. ¹² Abina ieduaamona omoi motomo damerie: “Pablo isoi llofueticaì” raitimaci. Ucubena omoimona feiñotimaci. Naimaci isoi iacaiñedicue. “Daje isoi maijidicaì” naimaci raiñellena, ucubena omoimo jaca jicañeitie. ¹³ Cristo oretaganona abì caitadinodimaci. Cristo dibeimo raise maijiñedimaci. “Cristo caina oretate” raicabitimaci; ia Cristo naimacina oretañede. Jifuecana jaidimaci. Cristo oretajanona itimacina jaidimaci. ¹⁴ Ieri raijicañedicue. Cominina jifuellena, Taifedi Jusiñamui jaienicina abì caitadiniena jaicabide. ¹⁵ Taife dibeimo itinodi Jusiñamui ie mare rafuena llofuerainina jaicabidimaci. “Cai lloga rafuedo omoi jiaia, Jusiñamuimona marebicaìtomoi” llofuecabitimaci. Naimaci finolle rafue diese Jusiñamuimona duere sefuitimaci.

Cristo oretagamiena naimie illa jira, Pablo duere sefuide

¹⁶ “Pablo abina uiñoñedimie” raillamo omoi comeciaina facañeno; ia iese cuena omoi comeciaina facaia, cue llamo nia cacarei. Omoi motomo ite llofueraini abina iedua isoi, iacaiñedicue; ia janore cuemo iticino diga abina iedoticue. ¹⁷ Abina ieduaamona cue lloia, cai Nama Cristo isoi lloñeitie. Naimie cuemo llua jira, iena lloñeitie; ia abina uiñoñedimie isoi lloiticue. ¹⁸ Omoi dine damerie llofueraini naimaci illa diga abina iedua isoi lloiticue.

¹⁹ Abina uiñoñedimaci; ia: “Abina eo raise uiñoticaí” omoi llumona, naimaci llofuacinona cacacabidomoi. ²⁰ Naimaci anamo omoína itataiacadimaci. Omoimo ucubena jicacabidimaci. Omoína ocuicabidimaci. Icirillamona, omoi uiecuaina bofedimaci. Iese omoína finocabidimaci; iadedi buena naimacimo finoñedomoi. Ibana oñedomoi. ²¹ Iese omoimo finoñedicue, omoína cue jaciruilla jira.

Cue illana omoimo ja lloiticue. Nibai abina raise uiñoñedicue; ia naie llofueraini isoi cue illa diga abina iedoiticue. ²² Omoi motomo ite damierie llofuerainina ja lloiticue. Judíuai uaido ñaitimaci. Iena jiai ñaiticue. Judíuai nairai imaci. Daje isoidicue. Judíuai nairai imiedicue. Abraham micori uruiaidimaci. Jiai naimie micori uruedicue. ²³ “Cristo dibeimo maijidicaí” raitimaci. Abina uiñoñedimie isoi lloticue; ia naimaci baifemo Cristo dibeimo maijidicue. Naimaci baifemo duere sefuidicue. Diga icaiño cárcelmo iticue. Diga icaiño fajamona duere sefuidicue. Diga icaiño niadedi fiodaicabiticue. ²⁴ Judíuai comini cinco digacaiño cuena fatimaci. Naga icaiño treinta y nueve digacaiño rao diga cuena jicuidimaci. ²⁵ Dacaiño amani radosi diga cuena fatimaci. Nofici diga cuena dacaiño fairinotimaci. Dacaiño amani bote diga namo anabaiticue. Darui nairo monaillaimo botedo jamai fuiri baiticue. ²⁶ Eo jacirede illedo jaicabidicue. Fíruidino eo illa jira, jaciruoicaida jaicabidicue. Cue judíuai cominimona duere sefuicabidicue. Judíuaiñedinomona duere sefuicabidicue. Naimaci illanuaímo cue ia, diga icaiño duere sefuidicue. Naisodo cue macaria, duere sefuicabidicue. Monaillaido cue jaia, duere sefuicabidicue. Cristo rafuena llorainina abi caitadinomona jiai duere sefuicabidicue. ²⁷ Cue ucube ol-lena, duere maijicabidicue. Diga icaiño raise iniñedicue. Diga icaiño aime guiticue. Rollimemona duere sefuicabidicue. Iniroinamona jiai duere sefuidicue. ²⁸ Diga jiaie rafuemonona duere sefuicabidicue. Duenailamona naga creyentiaí illanuaímo cue comecina nagarui eo facadicue. Iemo nagarui cue comecina cue facaia, duere sefuicabidicue. ²⁹ Nie creyente Cristo rafuedo nia raise iñoñenia, naimiemo cue comecina eo facadicue. Nie creyentena jiaimie jeacino finotaia, naimiemo cue comecina facadicue. ³⁰ Cue abina iedoiacania, jamai bue isoidimiedicuenona lloiacadicue. ³¹ Cai Nama Jesús Moona Jusiñamui illanona, Jusiñamui jaca cai iobillasa. Naimiedi uanaicinona cue llumona uiñote. ³² Cue illana nia lloiacadicue. Damascomo jaie creyentena cue jailla facaise cuena gaitatallena, Aretas railla illaíma anamo ite gobernadori nairai llaiga nasena sedatate; ³³ iadedi llaigafo ecimo ite jofo a ite ventanamonona cirigaí isoide diga ana jaillanona, naimemona jillodicue.

12

Pablo nicairilla isoide rafuena ciode

¹ Abina iedoiacaiñedicue; ia cue illana janore nia lloiticue. Iemona bue oñeiticue; ia cue illa abina riidoiacadicue. Cristo cuemo acataga rafuena lloiacadicue. Cristo cuemo jai llua rafuena jiai lloiacadicue. ²⁻³ Cristomo cue duillamona, catorce años jaie illanona, monamo naimie illamona, naimie dine Cristo cuena uite. Nicairilla isoi cue joreño, cue abi diga, uillana raise uiñoñedicue. Nibai dama cue joreñona uite. Dama Jusiñamui iena uiñote. Naimie mare illanomo iticue. ⁴ Nainomo cue ñainina rafuena cacadicue. ⁵ Ie diga abina iedoñeiticue. Cue jamai bue isoidimie diga abina iedoiticue. ⁶ Uanaicinona cue llumona cue abina iedoiacania, tainona abina iedoñeiticue. Omoi cuena ciuamona, cue lloga rafuena omoi cacajamona, cuena uiñotomoi. Ie baifemo cuena omoi comeciaina facajana jitañedicue. ⁷ Naimie rafuena cuemo acataja jira, bie rafuena cue cacaja jira, ie diga eo

abina cue iedoñellena, tagairede ra cuemo illa isoi Jusiñamui cuemo illamona, duere sefuidicue. Taife jaienici cuena duere finua isoi, duere sefuicabidicue. ⁸ Cuemona iena naimie oni oretallena, cai Namamo dacaiño amani jiidicue; ⁹ ia cuemo llote: “Ona jillotañeiticue; ia cue ona duenaillacinodo jaca ocuiñoitio. O abi eo mairiñenia, ona cue canuana raise uiñoitio” llote. Cue abi eo mairiñenia, ieri iocire iobiticue. Naimie uaido cue jaillamona, cuena naimie canuana raise uiñoiticue. ¹⁰ Cristo muidona duere cue sefuia, cue comecina ocuiñoiticue. Cue jamai bue isoia, cuena bu jeare ñaia, bumona duere cue sefuia, cuena bu duere finoa, cue comecina ocuiñoiticue. Cue duere sefuia, cue Nama cuena eo canode.

Pablo Corintomo ite creyentiaimo comecina eo facade

¹¹ Abina uiñoñedimie isoi iticue. Cue illana cue cuia jira, abina uiñoñedimie isoi iticue; ia iese cuena itatatomoi. Cuena ridoñedomoi; ia jiaino eo mare railla llofuerainina raise feiñotomoi. Jamai bue isoidicue; ia naimaci cue baifemo faiñedimaci. ¹² Omoi motomo siño rafuena cue finua jira, Jusiñamui cuena oretajana uiñotomoi. Cristo rafuena sefuiruiño omoi motomo iticue. ¹³ Cuemona duere sefuiñedomoi. Jiaie creyentiaí omoi baifemo faiamo cue comecina facañedicue. Nibai iese omoi comeciaina facadomoi. Omoimo ucubena cue jicañena jira, jiaie creyentiaí isoñedomoi. Iena omoi gaiñenia, iena feita. Cue diga iciriño.

¹⁴ Menacaiño navui omoi dine jaidicue. Omoi dine dane jaiacadicue. Omoimo ucubena jicañeiticue. Omoi rana jitaiñedicue; ia Cristo díbeimo omoi illana, naimiena omoi raise ñnuana jitaidicue. Cue uruiaí isoidomoi. Rana eenoñedomoi, omoi mootiaí iena; ia omoi mootiaí rana eenotimaci, omoiena. Ie isoide. Cue uruiaí isoi omoi illamona, omoimona rana jitaiñedicue; ia omoimo rafuena iacadicue. ¹⁵ Nana cuemo ite ra omoimo feaacadicue. Nana cue comecimo iticinona omoimo jiaí iacadicue. Omoína eo isiruiticue; ia cuena janore isiruitomoi. ¹⁶ “Caimona ucubena jicañedio; ia jifuecana caimona otio” raicabitomoi. ¹⁷ Ero, omoi dine menamiena cue oretajamona, omoimona ¿nie isoide rana otiaímaiaí? ¿Niese omoína jifuetiaímaiaí? ¹⁸ Omoi dine Titona oretaticue. Jiaisie creyente imiena Tito diga oretaticue. ¿Niese Tito omoína jifujete? Omoimo coco comecina daje isoi facadicoco. Daje rafuedo jaca jaidicoco. Omoína jaca jifueñedicoco. ¿Niese omoi comeciaina raitomoi? ¹⁹ “Caimona ie abina riidote” cuemo nibai comecina facacabidomoi. Jusiñamui cuena uiñuamona, Cristomo cue duillamona, bie rafuena lloticue. Cue isiruiganodomoi. Cristo díbeimo omoi raise illena, naimiena raise omoi ñnollena, bie rafuena llocabiticue. ²⁰ Omoi dine cue ria, cue jitailla isoi omoi iñenamo jacinaiticue. Iese omoi ia, omoi diga cue illana jiaí nibai gaiñeitomoi. Ieri cue comeci jarire ite. Nibai nia uaina uaitatomoi. Nibai nia abina iedotomoi. Nibai nia iciricabitomoi. Nibai nia omoi rana caidicabidomoi. Nibai nia jiaínona jeare ñaicabitomoi. Nibai nia jiaíno joreña ñaicabitomoi. Nibai nia abina uradoidomoi. Nibai daje isoi comeciaina nia lloñedomoi. Omoi iese illari cue comecidi jarire ite. ²¹ Omoi dine dane cue ria, omoi muidona Jusiñamui cuena meidaitajamo jacinaiticue. Cristo díbeimo omoi raise iñenia, sunaiticue. Jearede rafuena omoi nia fainonocaiñenia, omoi aiñede riño diga illana omoi fainonocaiñenia, omoi iniñede ima diga illana omoi fainonocaiñenia, sunaiticue.

13

Iraicaiño Pablo naimacina llofujete

¹ Menacaiño omoi dine navui jaidicue. Omoi dine dane jaiticue. Coninimo omoi rafue ia, iena raise fino. Moisés micori jaié llote: “Mena iaímaiaí

daje isoi lloillamona, daje amani daje isoi lloillamona, maraiñedicinona finodimiena duere finua". ² Maraiñede rafue finodinomo navui riire lloticue. Nana omoimo riire lloticue. Omoi dine navui cue illa isoi, iena dane riire lloiacadicue. Omoi dine cue ria, naimaci comeciai iuai nia meidoñenia, naimacina duere finoiticue. ³ Iemona Cristo uai cuemo illana uiñoitomo. Naimiena omoi inuamona, naimie uai siñonana uiñotomo. Jamai uaido naimie omoina jillotañede; ia ie siño uaido omoina jai jillotate. ⁴ Jamai bue isoidimie isoi cruzmo naimie fodaite; ia fodaillamona Jusiñamui uaido jillode. Cristomo cue duillamona, jamai bue isoidimiena iticue; ia Jusiñamui uai cuemo illamona, omoimo ite rafuena raise finoiticue. ⁵ Cristona inocana omoi raise jaillamo omoi comeciaina faca. Cristo jitaillacino omoi finollemo comeciaina faca. Cristomo omoi duillamona, Cristo omoi diga illana uiñotomo. Cristomo omoi duiñenia, naimie omoi diga nia iñede. ⁶ Cristo omoi diga illana omoi uiñuamona, Cristo uai cuemo illana jiai uiñoitomo. ⁷ Maraiñedicino omoi finocana jaillana jitañedicue. Jusiñamuimo iena jaiticue. Omoi comeciai iuai omoi meidoñenia, Cristo uai diga omoina duere finoacaiñedicue. Omoi comeciai iuai meiduana jitaidicue; ia Cristo uai diga omoina cue duere finoñenia, Cristo uai cuemo illana nibai uiñoñeitomo. ⁸ Cristomona cue uai illana omoi uiñollena, maraiñedicino omoi finuana jitañedicue. Mare rafuena omoi finocana jaillana jitaidicue. Iena finocana jiai jaiacaducue. ⁹ Cristo rafuena inocana omoi raise jaia, iobidicue. Omoimo cue riire lloñenia, iobidicue. Cristo jitaillacino eo raise finocana omoi jaillena jicabidicue. ¹⁰ Birui bie rafuena cueticue. Omoi dine iñedicue; ia bie cartana omoi feiñua mei, omoi comeciaina raise finuana jitaidicue. Cai Namamona cue uaina feiñoticue. Iedo omoimo riire lloiacaiñedicue; iadedi iedo naimie dibeimo omoi raise itataiacadicue. ¹¹ Cue amatiai, bie carta cuiana jai fuidoacadicue. Marena omoi i. Omoi comeciaina raise fino. Cue lloga rafuemo raise cacarei. Nana omoi creyentiai comeciai daje isoi lloicana jai. Coniniri uri omoi i. Iemona Jusiñamui omoina isiruillana uiñoitomo. Jusiñamui omoina uri itatajana uiñoitomo. ¹² Nana creyentiaina eo caimare uaido. ¹³ Nana cue diga ite creyentiai imaci uaina oredimaci. ¹⁴ Cai Nama Jesucristo omoina jaca duenaite. Jusiñamui omoina jaca isiruillamona, coninina omoi isirui. Naimie Joreño omoimo illamona, coninina omoi nabai. Iese jitaidicue. Mai. Macaibaite. Pablodicue.

GALACIAMO ITE CRISTONA HNOTINOMO PABLO ORETAGA RABE

Uaiduacino

¹⁻² Galaciamo ite creyentiai, omoi dine bie carta oredicue. Pablodícue. ¿Nigacino? ¿Nie isidomoi? Omoimo cue uai oredicue. Nana cue diga ite creyentiaidi imaci uaina jiai oredimaci. Jesucristo fetocamiedicue. Cai Moo Jusiñamui jiai fetocacue. Jesucristo fiodaillamona, Jusiñamuidi naimiena jillotate. Mare rafuena cue lollena, cuena orediaimaiaia. Comini cuena oreñedimaci. Cue lloga uaina cominimona jiai oñedicue. ³ Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Omoina uri jai itatatiamaiaia. Iena omoi uiñocana mai omoi jai. ⁴ Cai Moo Jusiñamui jitailla isoi, birui ite marañedicinomona cai jilloillena, cai jeacino facaina Cristo fiodaite. ⁵ Cai Moona jaca cai iobillasa. Iena jitaidícue.

Pablo lloga rafuedi jaca dajede

⁶ Jusiñamuina raire omoi fainonocaillari rajicaidícue. Cristo díbeimo omoi illena, omoina Cristo duenaillamona, Jusiñamui omoina jai uaidote; iadedi omoi jeacinomona omoi jilloillena, jiaie rafuedo jai jaidomoi. ⁷ Jiaie mare rafue jaca iñede; iadedi Cristo rafuena jiaiforiedo llofuiamona dajerie omoi comeciaina uri itatañedimaci. ⁸ Jesucristo rafuena omoimo jaie lloticaia. Jiaie rafuena lloticaidena, Jusiñamui riicaillafue anamo nia cai illasa. Jusiñamui jaienici jiaie rafuena llotena, Jusiñamui riicaillafue anamo jiai naimie illasa. ⁹ Omoimo jaie iese llotícue. Dane ja llotícue. Cai llua isoi Cristo rafuena omoimo bu lloñenia, Jusiñamui riicaillafue anamo naimie illasa. ¹⁰ Comini cueri iobillana jitañedicue; iadedi Jusiñamui cueri iobillana jitaidícue. Cominina iobitaiacadícue, Cristo díbeimo nia maijñedicue.

Ie oretagamiena jaillena, Cristo Pablona fetua rafue

¹¹ Cue amatiai, cue lloga rafuena omoi raise uiñuana jitaidícue. Omoi jeacinomona omoi jilluana jaie llotícue. Bie rafuena comini comeciia facajacinomona oñedicue. ¹² Cominimona oñedicue. Bu jaca cuena iena llofueñede; iadedi Jesucristo cuena uiñotade. ¹³ Jesucristona nia cue ñnoñenia, cue judíuai einamací lloga rafuedo cue jaillana jai fididomoi. Cristona ñnotinona jaie eo duere finodicue. Naimacina fuidoacadícue. ¹⁴ Cue einamací jaie llua isoi, Jusiñamuina raise ñnotícue. Naimací llogacinuaido eo duere cue jailla jira, daje facai cue diga itino baifemo ñnotícue; ¹⁵ iadedi nia cue jeiciñenia, Jusiñamui cuena fetode, naimie iena. Cuena duenaillanona, cuena uaidote. ¹⁶ Omoi judíuaiñedomoimo naie Jito rafuena cue lollena, cuemo ie Jitona jaie bairetate. Naie facaise cuemo jai suide rafuena bu diga ñañedicue; ¹⁷ ia Arabia railla eniruemo jaidícue. Nainomo comini iñena jira, cuemo jai suide rafuemo comeciina facadícue. Jerusalémo Jesucristo nano oretagano dine jaiñedicue. Cuena Jesucristo nia oretañenia, naimacina orede, ie uai lollena. Arabia railla eniruemo cue illa mei, Damasco railla nairaimo abido jaidícue. ¹⁸ Cristo cuemo bairia facaise tres años illamona, naimiena cue uiñollena, Jerusalémo Pedro dine jaidícue. Naimie dinomo quince digarui itícue. ¹⁹ Naie facaiseconi nana Jesucristo oretaganona cioñedicue. Pedrona ciodícue. Jacobona jiai ciodícue. Naimiedi cai Nama ie ama Jiaínona cioñedicue. ²⁰ Omoimo nana cue ciegacínodi uanaicino. Tainona cueñedicue. Tainona cue cueia, Jusiñamui cuena duere finuana

uiñoticue. ²¹ Jerusalémo cue illa mei, Siria railla eniruemo jaidicue. Cilicia railla eniruemo jiai jaidicue. ²² Judeamo ite Cristona inotinodi cuena nia cioiñedimaci. ²³ Cuena iese fidiñedimaci: “Navui caina duere finocabidimiedi Jesucristo rafuena jai llote. Jesucristona cai inuana navui jitaiñede. Caina fuidoacade”. Jiaie cue finoca rafuena fidiñedimaci. ²⁴ Ie fidiñamona, cueri Jusiñamuimo iobillacinona jai fecadimaci.

2

Jerusalémo Pablo jailla rafue

¹ Catorce años illanona, Jerusalémo dane jaidicue. Bernabé cue diga jaide. Titona uiticue. ² Jusiñamui cuemo llua jira, nainomo ite creyentiaimo jaidicue. Judíuaiñedino Cristo rafuena jai inuana cue lollena, jaidicue. Cue llofuiana naimaci raise uiñollena, creyentiai illaicominimo anado nano lloticue. Cue llofuiana: “Mare” naimaci raillana uiñoiacadicue. Tainona Cristo rafuena cue lloi raillanona uiñoiacadicue. Naimaci diga cue ñaia mei, cue llofuiana: “Mare” raitimaci. ³ Tito cue diga ite. Naimiedi judío nairai imieñede; iadedi naimaci abina detacabilla isoi, creyentiai illaicomini dinena naimie abi detatajana lloñedimaci. ⁴ Creyentiaina abi caitadino billa jira, Tito abina detatajana siadoticaí. Naimacina cai uaidoñeno bitimaci. Moisés micori llogacinuai anamo cai iñenana naimaci uiñollena, bitimaci. Cristo Jesús cai inua jira, Moisés micori llogacinuaido jai jaiñedicaí. Moisés micori llogacinuai anamo caina dane itatallena, iena uiñoiacadimaci. ⁵ Cai mare rafuena jiaiena jaca meidoñellena, naimaci ñaiana dallu cacareiñedicaí. Uanaicinona omoi uiñuana jitaídicaí. ⁶ Naie creyentiai illaicomini omoimo lollena, cuemo jiaie rafuena lloñedimaci. Illaicomini raillanodimaci; iadedi cuemona jamai bue isoidimaci. Jusiñamui nana comini daje isoi feiñua jira, naimaci uai cue uai baifemo faiñede. ⁷⁻⁹ Cue llofuiana rairuiñedimaci; iadedi creyentiai illaicomini cuena Bernabé diga marena feiñotimaci. “Daje isoi comeciaina facadicaí” raillamona, cue llofuiana: “Jai mare” raitimaci. Creyentiai illaicomini di Jacobo, Pedro, Juan digamie. Judíuai dine Pedrona Jusiñamui oretaja isoi, cue llamona judíuaiñedino dine Jusiñamui cuena oretajana uiñotimaci. Pedro llamona Jusiñamuidi ailluena judíuaina creyentiaina itatate. Cue llamona, Jusiñamuidi ailluena judíuaiñedinsona creyentiaina jiai itatate. Iemona Jusiñamui uai cuemo illana jai uiñotimaci. Judíuaiñedino Jesucristo rafuena llocana nia coco jaillana jitaídimaci; iadedi judíuaimo Jesucristo rafue llocana nia jaidimaci. ¹⁰ Daje rafue como llotimaci. “Duerede creyentiaina canocabi” llotimaci. Iena iocire finoacadicue.

Antioquíamo suide rafue

¹¹ Antioquíamo cue jailla mei, Pedro nainomo jiai jaide. Nainomo Pedro bia, marañedifue naimie finua jira, naimie uiecomo naimiemo riire lloticue. ¹² Nainomo Pedro nano rilla mei, nana creyentiai diga nainomo naimie guisoide. Judíuai creyentiai diga, judíuaiñede creyentiai diga, danomo guisoide. Iemei Jacobo dinena damerie bitimaci. Moisés micori llogacinodo jaisoidimaci. Moisés micori llogacinodo Pedro jai jaiñede; iadedi naimaci billa mei, naimacina naimie jaciruilla jira, judíuaiñede creyentiai diga Pedro jai guiñede. Ie inoga rafuedo naimie jai jaiñede. ¹³ Naimie iese illamona, judíuai creyentiaidi judíuaiñede creyentiai diga jai jiai guiñedimaci. Pedro illa isoi, Bernabé iedo jiai jaide. ¹⁴ Naimaci iese illa jira, Jesucristo rafuedo raise jaiñedimaci. Uanaicnodo jaiñedimaci. Iena cue uiñua jira, nana comini uicomo Pedromo lloticue: “Judío nairai imiedio; iadedi o jeacinomona

o jilloillena, cai einamací llucínodo biruí jaiñedio. Ie jira, ¿bue ñellena judíuainedio cai einamací llucínodo jaillana jai jitaideo?”

Judíuaidi creyentiaina jailla mei, Moisés micorí llogacínuaído jai jaiñedimaci

¹⁵ Nia lloiticue: Judíuainedinodí Moisés micorí lloga uaina jaie uiñoñedimaci. Caidí judíuaina jeicigacai. Ie muidona Moisés micorí llogacínuaí anamo jaie jeicigacai. ¹⁶ Iese iticai; iadedí Moisés micorí llogacínuaído jaillamona, Jusiñamui jitailla isoi, jaca bu marebicaiñede. Jusiñamui jitailla isoi, Jesucristona ñnuamona marebicaidícaí. Iena uiñotícaí. Ie jira Cristo Jesúsna ñnotícaí, cai marebicaillena. Cai marebicaillena, Moisés micorí llogacínuaína ñnoñedicai. Moisés micorí llogacínuaína ñnuamona, jaca buna marebificainide. ¹⁷ Jusiñamuimona cai marebicaiacallena, Cristona cai ñnuamona jeacino finorainiñedicai. “Cuenta ñnuamona, marebicaitomoi” Cristo iese llofueuide. Naimie llua isoi cai marebicaiñena, cai jeacínomona nia cai jilloñena, Cristo muidona; iadedí iese iñedicai. ¹⁸ Moisés micorí llogacínuaí jai jamaiñocaidícue. Ie jira naicínuaí dane abído cue oia, iena biruí cue ñnoñena jira, jai jeacino finoraimiedícue. ¹⁹ Iemona cue marebicaiñena jira, Moisés micorí llogacínuaí cuemo jai duiñede. Ie anamo jai iñedicue. Ie muidona Jusiñamui llogacínuaído jai jaidícue. Cristo anamo jai itícue. ²⁰ Naimie díbeimo jai itícue. Cristo cuemo ite. Cristo cuenta namatade. Jusiñamui Jitona cue ñnocana jai jaidícue. Cuenta isiruillamona, naimie jitaillamona, cueri fodaite. ²¹ Jusiñamui caína duenaillana jamaiñedicue. Jusiñamui jitailla isoi, Moisés micorí llogacínuaína cai ñnuamona marebicaidícaína, Cristo taínomo niade fodaite.

3

Jesucristona ñnuamona judíuaidi Jusiñamui Joreña feiñotimaci

¹ Gálatas imaci, abína jai uiñoñedomoi. Jiaíno omoína biruí jífuete. Omoímo Jesucristo cruzmo fodailla rafuena jaie marefodo llotícue. Iena raise cacadomoi. ² Ie jira omoímo buena jícanoiacadícue: ¿Ñiese Jusiñamui Joreña jaie feiñotomoi? Moisés micorí llogacínuaído jaillamona iena feiñoñedomoi. Jesucristo rafuena omoí cacajamona, ñnotomoi. Ie mei Jusiñamui Joreña feiñotomoi. ¿Ñiese biruí abína uiñoñedomoi? ³ Omoí marebicaillena, Jusiñamui Joreño omoímo jai ite; iadedí Moisés micorí rafuena dane omoí jaiacanamona, omoí jiaíe finolle rafuemona jai marebicaiacadomoi. ⁴ Jusiñamui Joreñomona díga marecínuaína feiñotomoi; iadedí iena jai jitaíñedomoi. Iese omoí illana ñnoñedicue. ⁵ Dane jícanoitícue: ¿Ñiese Jusiñamuidí ie Joreño omoímo fecade? ¿Ñiese síño rafuena omoíri finode? Moisés micorí llogacínuaído omoí jaillamona ie Joreño omoímo fecañede. Moisés micorí llogacínodo omoí jaillamona, síño rafuena omoíri finoñede; iadedí Jesucristo rafue omoí cacajamona, iena omoí ñnua jira, ie Joreña fecade. Iemona síño rafuena omoíri jiaí finode.

Abraham micorí Jusiñamuina ñnua muidona marebicaide

⁶ Abraham micorí ie rafuena lloiticue. Naimie micorímona fueoitícaí. Moisés micorí naimíena cuete: “Abraham micorí Jusiñamuina ñnua jira, Jusiñamuimona naimíedi marebicaide”. ⁷ Iena cai cacajamona, Abraham micorí isoi cai ñnuamona, naimie ua comínina cai illana uiñotícaí. ⁸ Jusiñamuidí judíuainedio ico marebicaillena jaie uiñote. Naimíena ico naimaci ñnollena jaie jiaí uiñote. Iena uiñuamona, Jusiñamuidí ico suille rafuena Abraham micorímo jaie llote. Mare rafue naimíemo llote: “Nana cuenta o isoi ñnotínona marebicaitaitícue” llote. ⁹ Abraham micorídí ñnote. Jusiñamui naimíena marebicaitate. Ie isoide. Nana Jusiñamuina

ñnotinona marebicaitate; ¹⁰ iadedi nana Moisés micori llogacinuaido jaidino jai faidobidimaci. Moisés micori iena jaie cuega: “Nana cue lloga uaido jaiñedino jai faidobide”. Buna nana naie lloga uaido jaiñena jira, nana faidobidicai. ¹¹ Biena uiñoticaí. Moisés micori llogacinuaido jaillamona, Jusiñamuimona jaca buna marebicaiñede. Jusiñamui facaina lloraima iena jaie cuete: “Jusiñamuina ñnuamona marebicaidimaci. Ie mei jaca iitimaci”. ¹² Moisés micori llogacinuai daje isoñede. Nana Moisés micori llogacinuaina finuamona comini marebicaide. Moisés micori iena jaie cuega: “Cue lloga uai finuamona, marebicaidimaci. Iemei jaca iitimaci”. Jusiñamuina ñnuana lloñede: ia ie lloga uai finollena cominimo llote. Nana ie lloga rafuena finuamona, cominidi marebicaidimaci.

¹³ Moisés micori llogacinuai anamo jaie cai illa jira, faidobidicai; iadedi cai facaina naimie fiodailla jira, Cristodi iemona caina jillotate. Cruzmo Cristo cuinaja jira, cai facaina naimie jai faidobide. Moisés micori iena jaie cuega: “Cruzmo cuinacame Jusiñamuimona jai faidobide”. ¹⁴ Jusiñamuina naimie ñnua jira, Abraham micori jaie marebicaide. Jesucristo fiodailla muidona, naimiena judíuainedino ñnuamona, Abraham micori isoi marebicaidimaci. Jusiñamuidi ie Joreña caimo fecallena jaie llote. Ie muidona Jesucristona ñnuamona, Jusiñamui Joreña birui feiñoticaí.

Jusiñamui lloga rafue

¹⁵ Cue amatiaí, bie rafuemo comeциаina faca. Nie isoide rafuena menamie finoacania, naie rafuena feitañellena, rabemo cuetiaimaiaí. Iaimaiaí mamecina nainomo cuia mei, jairuido damie naie rafuena jiaífo dama meidonide. ¹⁶ Ie isoide. Jusiñamuidi Abraham micorimo ico suille rafuena jaie llote. Iena naimie llua jira, iena meidonide. Ie uruiaimo ico suille rafuena lloñede; ia daje uruemo ico suille rafuena llote. Cristona ñaite. ¹⁷ Biena lloiacadicue. Naimie jilloillena, Jusiñamuina naimie ñnuamona, Jusiñamui Abraham micorimo rafuena llote. Cuatrocientos treinta años illanona, Moisés micorimo Jusiñamuidi jiaie rafuena llote; iadedi Abraham micorimo jaie lloga rafuena meidoñede. ¹⁸ Jusiñamui llua jira, Abraham micori jillode; iadedi Moisés micori llogacinuaido cai jaillamona, cai jilloiadedi, Abraham micori isoi jilloñedicaí. ¹⁹ Iese itena, ¿bue ñellena Jusiñamui Moisés micorimo jiaie rafuena llote? Naiemona jeacina cai uiñollena, iena llote. Naie rafue ite, Cristo enruemo nia biñenia. Jusiñamuidi Abraham micorimo lloga rafue Cristomo duide. Naimie billamona Moisés micorimo lloga rafuena oñedicaí. Jusiñamuidi ie jaienisaimo naie rafuena llote, Moisés micorimo iena llollena. Ie mei Moisés naie rafuena cominimo llote; ²⁰ iadedi Jusiñamuidi Abraham micorimo ie rafuena atona llote. Jiaimie mo iese lloñede, Abraham micorimo iena llollena.

²¹ Moisés micorimo Jusiñamui rafuena llote; ia naiemona Abraham micorimo llogacino nia saiñede. Cai jilloillena, cai jaca illena, Moisés micorimo Jusiñamuidi rafue finuana llotena, naie rafuena cai finuamona marebicaidicaí; ²² iadedi Moisés micori cuegafuiaidi nana comini jeacino anamo illana llote. Moisés micori llogacinuaido jaillamona, jeacino anamona jilloñedicaí. Jesucristona cai ñnuamona Jusiñamui llua isoi, jeacino anamona jillodicaí. ²³ Jesucristona ñnuana nia cai uiñoñenia, Moisés micori llogacinuai anamo iticaí. Jesucristo billamona, naimiena ñnuana uiñoticaí. ²⁴ Moisés micori llogacinuaídi cai lletarafue. Cristo díbeimo cai illena caina lletade. Cristona cai uiñuamona, naimiena cai ñnuamona, marebicaidicaí. ²⁵ Naimiena ñnuana jai cai uiñuamona, naie lletarafuena jai oñedicaí.

Abraham micori ua uruiaí

26 Cristo Jesúsna ñnuamona, nana omoi Jusiñamui cominidomoi. 27 Cristo ðibeimo omoi illamona, bautizagaomoi. Iemona naimie Moodi jiai omoi Moo. 28 Jusiñamuimona dajena itomoi. Naimiedi nana cominina feiñote. Judíuaina omoi illamona, omoína feiñote. Judíuaiñedinona omoi illamona, omoína feiñote. Mullaiaína omoi illamona, omoína feiñote. Mullaiaíñedinodomoidena, omoína feiñote. Iñiaína omoi illamona, omoína feiñote. Riñoniaína omoi illamona, omoína feiñote. Jesucristona omoi ñnua jira, jaca damacidomoi. 29 Cristomo omoi jai ðuiadedi, Abraham micorí cominidomoi. Ie jira Jusiñamui Abraham micorimo lloga rafuemo jiai jainaiaidomoi.

4

Jusiñamui uruiaína jaidicai

1 Moisés micorí llogacinona dane lloiticue. Jiaie rafuedo iena lloiticue. Riai uruiaí moo fiodailla mei, ie moo raruiaidi nano doforamiemo fiebide. Naie nano doforamie uruenia, naimie mamecido naimiemo jide. Naimiemo nia raise jiiñede. Naimiedi nia jamai ite isoide. Naimie ie jofomo mullaiaí isoi ite. 2 Naimie moo llua ðinori jiaíno anamo naimie ite. Ie moo raruiái jiaíno anamo jiaí ite. Naimie jai eimiéna illemona naimie moo raruiaidi naimiemo raise jai ðuite. 3 Jaié daje isoidicai. Uruiaí isoidicai. Cai jaiagai llogacinuai anamo iticai; 4-5 iadedi ie jitailliruiamo Jusiñamuidi ie Jitona orede, naicinomona caína jilloitallena. Jusiñamui uruiaína cai jaillena, ie Jitodi naicino anamo riñomona jeiciga. 6 Naimie uruiaidicaina jira, Jusiñamuidi ie Jito Joreño cai comeciáimo orede. Naimiéna cai feiñuanona, naimiedi caína Jusiñamuina: “Cai Moo” raitatate. 7 Ie jirari jiaíno anamo jai iñedomoi; iadedi Jusiñamui uruiaidomoi. Jusiñamui uruiaidomoina jira, nana naimie lloga rafue omoímo jai ðuide.

Moisés micorí llogacinuai anamo omoi jaia, danomo abido jaidomoi

8 Jaié Jusiñamuina nia omoi uiñoñenia, ua jusiñamuillaíñede ra anamo itomoi. Naie isoide rana sedauidomoi. 9 Jusiñamuina jai uiñotomoi. Naimie omoína jai uiñote. ¿Bue ñellena omoína marebicaitañede rafuedo dane jaiacadomoi? Omoína jilloitañede rafue anamo dane iacadomoi. 10 Judíuai comini rafuena finocabillaruiamo jiai finocabidomoi. Iemona: “Marebicaiticai” raillanona iese finocabidomoi. 11 Cue lloga uai omoi finoñena jira, omoímo tainona jai lloiticue. Nibai jai tainomo maijidicue.

Pablo naimaci ðiga illana uibiñote

12 Cue amatiaí, omoi ðine nano cue jaia, Moisés micorí llogacino anamo iñedomoi. Naie llogacino anamo jaié iticue; ia birui ie anamo iñedicue. Birui cue illa isoi omoi illana jiai jitaídicue. Omoi ðine cue nano ia, cuena raise feiñotomoi. 13 Cristo rafuena omoímo nano cue llua facaiseconi ðuidicue. Iena uiñotomoi. 14 Cue ðuico omoímona jacire eruaide; iadedi cuena jearuiñedomoi. Jusiñamui jaienici omoi ðine billa isoi, cuena feiñotomoi. Jesucristo omoi ðine billa isoi, cuena jiai feiñotomoi. 15 Jaié caimare iticai. ¿Ñiese birui cue ðiga caimare iñedomoi? Cuena omoi canoitena, cuemo fecallena, omoi uisi jaié jino juiconoiacadomoi. 16 Omoímo jicanoiacadicue: ¿Uanaicinuai omoímo cue llua jira, omoi enoillamiéna jai jaidicue? 17 Moisés micorí llogacinuaido jaidino omoína eo nabairitimaci; iadedi mare rafuena finoacaiñedimaci. Naimaci ðiga omoi nabairillena, cue ðiga omoi nabairillana jai jitaíñedimaci. 18 Mare comeciáimona cuena omoi jaca jitaia, eo mare. Omoi ðine cue ia, iese omoi jitaia, mare. Omoi ðine cue iñenia, iese omoi jitaia, jiai mare. 19 Cue uruiaí, Cristo omoi comeciáina raise namataja ðinori, omoíri

cue começi eo duere dane llicidaite. ²⁰ Omoï diga ja iacadïcue, omoï diga atona raise ñaïllena. Omoïmona are cue illa jira, dane raise cai nabairillena, omoïmo cue llwana raise uiñoñedicue.

Jesucristo rafue Moisés micorï llogacïnuaï baifemo faite

²¹ Moisés micorï llogacïnuaï anamo iacadino, omoïmo daje rafuena jïcanoiacadïcue: ¿Moisés micorï ciegafuiaina raise cacadomoi? ²² Moisés micorï jaie cueda: “Abraham micorïmo mena jito ite. Daje jito ie mullaiño mona comuide. Jiaie jito ie mullaiñoñediño mona comuide. Naiñoñodi ie nanoca ai. ²³ Abraham micorï jitailla jira, ie mullaiño jitona comuitate; iadedi ie mullaiñoñediño jito comuide, Jusiñamui llua jira”. ²⁴⁻²⁵ Naie rafuemon aï fueolle. Ie iaiñoaidi mena jai lloga rafue isoidiaïnuai. Abraham micorï mullaiño mameçi Agar micorï. Naiñoñodi Sinaï railla anedumona lloga rafue isoide. Arabia railla enruemo Sinaïmona Jusiñamuidi Moisés micorïmo rafuena llote. Naiñoñodi mullaiño jira, ie urue mullaimana jeiciga. Ie nama anamo jaca ite. Ie isoide. Moisés micorïmo llogacïnuaïdo jaidinodi naie rafue anamo itimaci. Jerusalémo itino Moisés micorï llogacïnuaï anamo jai nia illa jira, Agar micorï Jerusalén railla nairai isoide. ²⁶ Jiaïñoñodi jiaie lloga rafue isoide. Naiñoñodi Abraham micorï ai. Naiñoñodi Sara micorï. Naiñoñodi monamo ite Jerusalén isoide, naiñoñodi mullaiñoñena jira. Nainomo jainaiaidicai, Moisés micorï llogacïnuaï anamo jai cai iñena jira. ²⁷ Isaías micorï iena jaie cuete: Oïniño, mai iobi.

Urue nia jocoñediño, ado iobi.

Inrediño baifemo eo uruiarenitio.

Iemona Moisés micorï llogacïno anamo iñedinomona Cristona ñnotinona ailluena jaillana uiñoñoticaï.

²⁸ Cue amatiaï, bie rafue omoïmo duide. Jusiñamui llua jira, Abraham micorï jito Isaac micorï comuide. Ie isoide. Jusiñamui llua jira, caidi ie uruiaina jaidicai. ²⁹ Ero, mullaiño jitudi mullaiñoñediño jitona jaie duere finouide. Daje isoi Moisés micorï llogacïnuaï anamo itinodi Jusiñamui Joreño anamo itinona birui duere finocabidimaci. ³⁰ ¿Ñiese cai nibaille? Moisés micorï Sara micorï llwana jaie cuete: “ ‘Mullaiño, naiñoñodi jito diga, oni dota. Ie moo fodailla mei, mullaiño jito ie moo raruiaina feiñoñeite. Dama mullaiñoñediñoñede jito ie moo raruiaina feiñoite’ llote”. ³¹ Ie jira mullaiño urue isoïñedicai Moisés micorï llogacïnuaï anamo jai cai iñena jira, mullaiñoñediño urue isoidicai.

5

¿Ñie isoide rafuedo jaitomoi?

¹ Moisés micorï llogacïnuaï anamona Cristodi caïna jai jillotate. Ie jira omoï começaina ocuiño. Jaie omoï illa isoi, dane jaiño. Omoï marebicaitañede rafue anamo jaie itomoi. Ie jira Moisés micorï llogacïnuaï anamo iñeno. Iemona marebicaiñeitomoi. ² Jeacïnomona omoï jillobillena, Moisés micorï llogacïnodo omoï jaiacanamona, omoï abiaïna omoï detataïa, Cristo rafuena jai jitaïñedomoi. ³ Dane lloiticue: Jeacïnomona omoï jillobillena, naga abina detatagamie nana Moisés micorï llogacïnuaïna ñnua. Nana iena ñnoñena, naimie jilloñeite. ⁴ Moisés micorï llogacïnuaïna ñnuamona omoï marebicaiacania, Cristo rafuena jai duiñedomoi. Jusiñamui caïna duenaïllamona, Cristona jaie cai ñne orede. Moisés micorï llogacïnodo omoï jaiacania, Cristo rafuena jai jitaïñedomoi. ⁵ Moisés llogacïnuaïna ñnuamona marebicaiñedicai; iadedi Jesucristona cai ñnuamona, Jusiñamui Joreño caïna canuamona, cai

marebicaillmo iocire ocuiridicai. ⁶ Abina detatajamona, cai jeacinomona jilloñedicai. Abina cai detatañenamona, jiai jilloñedicai. Dama Cristona cai ñnuamona jillobidicai. Naimiena cai ñnua jira, nana cominina isiruicana jaidicai. ⁷ Cristo rafuedo navui marena jaidomoi; ia damerie uanaicinona omoi ñnuana jai jitaiñedimaci. ⁸ Jusiñamuimona naimaci uaina oñedimaci. Jusiñamui omoina navui uaidote, naimie dibeimo omoi illena.

⁹ Jiai rafuedo iena lloiticue: Janore jisa siritate ra ifecimo joneia, jai nana siritate. Ie isoide. Damie jiaie rafuedo jaia, diga cominina jifuerede, naimie jailla dibeido jaillena. ¹⁰ Jiaie rafuedo omoi jaiñelmo cue comecina jai facadicue. Cai Nama cue ñnua jira, cue lloga uaido omoi jaillmo cue comecina jai facadicue. Omoi comeciaina naganomo itatatiniena uiñoñedicue; iadedi Jusiñamui naimiena duere finoite.

¹¹ Cue amatiai: “Abina detataja” omoimo cue lloiadedi, cuena jai duere finoñedomoi, omoi jilloillena Jesucristo fiodailla rafuena jai cue lloñena jira.

¹² Omoi comeciai naganomo itatatinodi raitimaci: “Janore jisa abina detatajamona, cai jeacinomona jillobidicai”. Iese itena, Jusiñamuina uiñoñedino finua isoi, namiena naimaci abiai diana jiai jitaidicue.

¹³ Moisés llogacinuai anamona Jusiñamui omoina jai jillobitade; iadedi marañede rafuena omoi finollena jillobiñedomoi. Omoi jillobilla jira, naimacina omoi isiruilla jira, jiaie cominina cano. ¹⁴ Moisés micori iena jaie llote: “O abi o isiruilla isoi, o ecimo itinona isirui”. Iena omoi finoia, nana Moisés micori llogacinuaina jai finodomoi. ¹⁵ Iese omoi finoñenia, conima diga omoi riire iciria, jaca danomo iñeitomoi.

Jiaie cominina omoi isiruilla rafue

¹⁶ Omoimo nia lloiticue. Jusiñamui Joreño omoi comeciaino namatajano omoi i. Omoi comeciaino ite marañedicinodo omoi jaiñeno. ¹⁷ Cai comeciaino ite marañedicinodi Jusiñamui Joreño jitaillacinodo daacinodo jaiñede. Conima abido jaide, cai jitailla ra cai finoñellena; ¹⁸ iadedi Jusiñamui Joreño anamo omoi raise ia, naimie lluaana omoi raise ñnoia, Moisés micori llogacinona jai jitaiñedomoi. ¹⁹ Ero, marañede comeciaino iticinodo omoi jaia, bie isoidicinona finocabidomoi: añede riño diga illacina, iniñede ñma diga illacino, jeare ñaiacino, diga eo jearede rafuena finuacino, ²⁰ jiraraina sedajacino, aima ra finuacino, comena enoillacino, uaina uaitajacino, abina uradoillacino, icirillacino, dama ie abi ramo comecina facajacino, nana cominina uaitaillacino, damacina iñenacino, ²¹ dama abina uradoillano, rana bairuacino, comena meiniacino, jfaillacino, aifuerillacino, ie isoidicino. Omoimo jaie lloticue. Dane lloiticue: Bie isoide rafuena bu finocabia, naimie cominina naimaci iñena jira, Jusiñamui ie cominina sedajanomo jainaiñeite. ²² Jusiñamui Joreño omoi comeciaino namataia, bie isoidicinona finocabidomoi: nana comini isiruillacino, comeci caimare illacino, uri illacino, raire iciriraininacino, duenaillacino, jiaie cominina canuacino, ie lloga uaina finuacino, ²³ uai oñenacino, abina eenuacino. Moisés micori llogacinuai bie isoidicinona ñañede. ²⁴ Cristo Jesúmo jainaiadinodi naimaci marañede comeciai jitaillacino anamo iñedimaci. ²⁵ Jusiñamui Joreño caimo illa jira, naimie cai comeciaina namatajacinodo cai jailla. ²⁶ Iemona abina cai biriñellesa. Abina jiai cai iedoñellesa.

6

Jiaie llofuiacino

¹ Cue amatiai, omoimona damie ebena jamai jeacinona finoia, dane Jusiñamui dibeimo naimie raise illena, naimiemo fecuise iciñeno lloño.

Omoi cominimona Jusiñamui Joreño comeciaino raise namatadinodi iese naimiemo llofuellesa. Jeacino fino raillano, nagamiiai abi rairuillesa. ² Bu duere sefuia, bu Taife ramo faia, coninina cano. Iese omoi canoia, Cristo llogacinuaina jai inotomoi. ³ “Cuemo iese suiñeite. Dama abina sedadicue. Jamai bue isoñedicue” comecina facadinie dama abina jifueite. Naimie jamai bue isoide. ⁴ Maraiñeni raillano, ie finoca rafueconi iobillena, nagamiiai ie finoca rafuena abido facaja. Dama ie maijia rafueconi iobilla. Dama ie maijia rafuedi naimiemo duide. Jiaimiemo ite maijia rafuedi naimiemo duiñede. ⁵ Naimie finoca rafuemono nagamie jeacina finoia, dama naimie muidona. ⁶ Naga Jesucristo rafuena fueotimiedi ie llofuegamiemo mare ra fecalle. ⁷ Dama o abina jifueñeno. Budi Jusiñamuina jifuenide. Jeacina bu finoia, Jusiñamui ibana jaca oite. Marecina bu finoia, Jusiñamuimona iba feiñoite. ⁸ Ie comecimo ite maraiñede jitaillacino finodimiedi ie abina faifite. Fiodaite; iadedi Jusiñamui Joreño jitaillacinona finodimiedi monamo jaca iite. Faifñeite. ⁹ Jusiñamui Joreño jitaillacinona finuana sefuiruiñeno. Cai comeciai cai ocuiñoia, Jusiñamui jitailla facaiseconi ibana feiñoitica. ¹⁰ Ie jira nana cominina canocabi. Nana creyentiana ua eo canocabi.

Facaduacino

¹¹ Ero, jerie cuiano omoiemo bie facaimo cueticue. ¹² Jiaie cominimona iobilacinona omoi abiana detatajana jitaicino feiñoiacana jira, omoi abiana detatajana jitaicimaci. Cristo rafue lloticainadedi: “Cristo rafuena uiñoñedinodi niade duere caina finodimaci” raillanomo comeciaina facajamona, iese jitaicimaci. ¹³ Omoi abiana detatajana jitaicimodi Moisés micori llogacinodo raise jaiñedimaci. Nana iena inoñedimaci. Omoi abiana iedoiacana jira, omoi abiana detatajana jitaicimaci; ¹⁴ iadedi Jusiñamuidi jiaie rafueri abina cue ieduanana jitañede. Dama Cristo cueri fiodailla rafueri abina iedoticue. Ie jira Jusiñamuiñede rafuemo jainaiñedicue. Naie rafue anamo jai iñedicue. ¹⁵ Abina diamona cai jeacinomona jilloñedica. Abina deñenanomona jaca jilloñedica; iadedi Jusiñamui Joreño caina comonori comuitajamona jillobidica. ¹⁶ Jusiñamuidi nana bie llucacino jaidino uri itatatesa. Naimie naimacina duenailasa. Jusiñamui cominidi ua jaca iese illasa.

¹⁷ Bie isoide rafue illamona, cuena duere finoñeno. Jesucristo rafuena cue llua jira, diga icaiño cue abimo bofellaño jai oticue.

¹⁸ Cue amatiai, cai Nama Jesucristo omoiina duenailasa. Mai. Pablocue.

EFESOMO ITE CRISTONA HNOTINOMO PABLO ORETAGA RABE

Efesomo ite creyentiaimo Pablo cartana orede

¹ Efeso railla nairaimo ite creyentiai, Pablodicue. Bie carta omoi dine oredicue. Ie rafue llollena, Jusiñamui jitailla jira, Jesucristo oretagamiedicue. Naimiemo omoi jai jainaiaila jira, Jesucristona inocana jai jaidomoi. ² Cai Moo Jusiñamui, cai Nama Jesucristo diga, omoina duenaicabillana uiñocana mai omoi jai. Iaimai omoi comeciaina uri itatajacabillana uiñocana mai omoi jai.

Cristomo jai cai jainaiaila jira, Jusiñamui marena itatajacinona feiñotica

³ Cristomo cai jainaiaila jira, Jusiñamui caina eo marena itatate. Ie jira cai Moo Jusiñamuimo iobillacinona cai fecacabillasa, naimiedi Cai Nama Jesucristo ie Moo illanona. Cristomo cai jainaiaila jira, cai comeciai marena itatajacinona Jusiñamuimona jai feiñotica. ⁴ Iena ja lloiticue. Enirue nia iñenia, Jusiñamui nana naimiena inotinona jaie fetode. Cai facaina Cristo ico fiodaillena naimie uiñuamona, caina jaie fetode. Naimiemono cai marebicaillena, jeacinona cai finoñellena, caina fetode. ⁵ Caina isiruillamona caina fetode. Naimie eo jitailla jira, naimie uruiaina cai jaillena, caina fetode. Jesucristo fiodaillamona Jusiñamui uruiaina jaidicai. ⁶ Naimie caina fetuamona, naimie caina duenaillana jai uiñotica. Iemono naimiedi eo mareuidimiena jiai jai uiñotica. Ie isiruiga Jitomo cai jainaiailamona iena uiñotica. Naimiemo buena cai finoñenia, caina duenaite. Naimiena cai iobitallena, caina fetode. ⁷⁻⁸ Caina eo duenaillanona, ie Jito fiodailla jira, Jusiñamuidi jeacino anamona caina jai jillotate. Cai jeacino oni dotajamona, ibana jiai oñeite. ⁹ Naimiena cai raise inollena, caina abina jai uiñotade. Jusiñamui caina naimie nana caina birui jilloitaiacanana jai uiñotade. Cai cominidi iena jaie uiñoñedimaci; iadedi Jusiñamui jitailla diese Cristo finoca rafuedo caina iena jai uiñotade. ¹⁰ Naimie jitailla facaiseconi, nana caimo ie finoacalle rafue fuiduanona, Cristo anamo naimie nagaimena raise itataite. “Cristo cai Nama” raitimaci.

¹¹ Ie jira naga suide rafue suicana jaide, Jusiñamui jitaillacinona fuidollena. Nana naimie jitailla diese, naimie comeci jitailla jira, nana iena finode. Nano facaiseconi naimie cominina cai jaillana naimie uiñuanona, caina jaie fetode. Ie muidona naimie cominina jai jaidicai. ¹² Naimie caina fetuanona Cristona jaie inotica. Naimie diga ico jaca cai illemo birui ocuridicai. Naimiena cai iobitallena caina fetode. “Naimie fue eo mare” cai raillena caina fetode. ¹³ Cristona jai birui inotomoi. Uanaicino rafue omoi jai cacajamona, naie mare rafue omoi cacajamona, omoi jeacinomona jai jillobidomoi. Jusiñamui Joreño omoimo illano, navui Cristo llua isoi, naimie dibeimo omoi illana uiñotomoi. ¹⁴ Jusiñamui Joreño caimo jaca illa jira, Jusiñamui diga ico cai jaca illena uiñotica. Jusiñamuidi caina ie cominina jai jaitate, naimiena cai iobitallena. “Naimie fue eo mare” cai raillamona, naimiena iobitaitica. Naimiemo cai jainaiaila jira, naimiemono nana cai comeciai marena itatajacinona feiñotica.

Naimiaci facaina Pablo jide

¹⁵ Cai Nama Jesuna omoi inuana jai fididicue. Nana jiaie creyentiaina omoi isiruillana jiai fididicue. ¹⁶ Ie jirari Jusiñamuimo cue jia, omoina feitañedicue. Omoi facaina naimiemo iobillacinona jaca fecadicue. ¹⁷ Cai Nama Jesucristo Jusiñamuimo duilla jira, cai Moo Jusiñamui uai siñonana jira, naimiemo cue

jñanona, omoi facaina jñanoticue. Naimie Joreño uaido naimie rafue raise uiñocana omoi jaillena jñanoticue. Naimiena raise uiñocana omoi jaillena jñanoticue. Iese omoi facaina jñanocabiticue. ¹⁸ Naimie dibeimo omoina naimie jai uaidua jira, naimie diga ico jaca omoi illemona, iena omoi raise uiñuana jitaidicue. Naimie cominina omoi jai jailla jira, naimie illanomo ico eo marena iocire iitomoí. Iena omoi raise uiñuana jitaidicue. ¹⁹ Naimie uai ua eo siñonana omoi uiñuana jitaidicue. Naimiena cai ñnua muidona, ie uaido naimie caina canorede. Iena omoi raise uiñuana jitaidicue. ²⁰ Fiodaillamona Cristona ie uaido Jusiñamui jai jillotaja jira, naimie uai siñonana uiñotomoí. Fiodaillamona Cristo jillua mei, monamo Cristo abido jailla mei, ie ecimo Jusiñamuidi Cristona illaimana dane itatate. ²¹ Ie jira Cristo nana Jusiñamui jaienisai afemo ite. Ua nana comini afemo naimie ite. Taife afemo naimie ite. Janaba afemo naimie ite. Naie iaímaiaí isoide joreñuai afemo naimie ite. Birui iese ite. Ico iese nia iite. ²² Jusiñamuidi naga ra Cristo anamo ua jai itatate. Cristona nana creyentiaí imaci illaimana jai ua jai itatate. ²³ Cristomo daajena nana cai creyentiaidicai duidicai. Naimie anamo cai illanona, naimie nana caina ocuicabide. Ie jira marena cai illena naimie jitailla isoi, naimie nana caina birui canocabide.

2

Jusiñamui caina isiruilla jira, cai jeacinomona jai jillobidicai

¹ Jusiñamuina jaie omoi nia ñnoñenia, naimiemo omoi duiñena jira, naimiemona fiodaitino isoidomoí. Jeacino anamo omoi illa jira, naimiemona fiodaitino isoidomoí. Jeacino finocana jaidomoí. Marañedicinona finocana jaidomoí. ² Jeacinona ebiruitomoí Jusiñamui dibeimo iñedino rafuedo jaidomoí. Taife dibeido jai jaisoidomoí. Jusiñamuina oiacañedino Taife jitailla rafuedo jaisoidimaci. ³ Naimaci isoi jaie nana iticai. Cai comeciaino ite jearede jitaillacinona finodicai. Iedo jai jaisoidicai. Ie jira Jusiñamui ricacillafue anamo jaie iticai. Iese jaie nana iticai. ⁴⁻⁵ Jeacinona jaie cai finua jira, jeacino anamo iticai. Jusiñamuina ñnoñedicai; iadedi Jusiñamui caina eo duenaillanona, caina eo isiruillamona, naimie diga ico jaca cai illena, naimie dibeimo caina itatate. Fiodaillamona Cristona Jusiñamui jillotaja jira, jeacino anamona caina jai jillotate. Ie muidona monamo ico iiticai. ⁶ Cristona jillotaja mei, Jusiñamui ie ecimo naimiena dane itatate. Cristomo cai jai jainaiaila jira, Jusiñamui nainomo caina jai jainaiatate. ⁷ Cristo finoca rafuemonna caina iese jai itatate. Caina iese jai itatajamonna, nana cominidi Jusiñamui caina eo duenaillana uiñoitimaci. ⁸ Naimie caina duenaillanona, caina jai jillotate. Jaca buena cai finuamonna jillobiñedicai; iadedi naimie jitailla jira, naimie caina jai jillotate. ⁹ Cai jilloillena jaca buena cai finoñena jira, abina iedoñedicai. ¹⁰ Jesucristomo cai jainaiailamona, ie cominina cai jaillamona, cai illa isoi naimie caina itatate. Iese cai illamo Jusiñamui comeci jaie facajano, mare rafuena finocana cai jaillena, naimiedi cai comeciaina marena itatate.

Cristomo jai cai duilla jira, jai nairaii diga birui uri iticai

¹¹ Omoi jaie isoillana uiñotomoí. Iena comecitomoí. Jusiñamuina jaie uiñoñedomoí. Judíuaiñedina omoi jeiciñena jira, cai judíuai comini isoi abiaina detañedomoí. Ie jira cai cominimona marañedomoí. ¹² Omoi jeacinomona Cristo omoina jilloitaiacanana naie facaiseconi uiñoñedomoí. Cai judíuai nairaimo jainaiañedomoí. Ie muidona Jusiñamui cai judíuai cominimo jaie lloga rafuena uiñoñedomoí. Jusiñamuina nabaillana uiñoñedomoí. Jusiñamui diga omoi ico jaca illena uiñoñedomoí. Jusiñamuina omoi uiñoñena jira, naimiena sedañedomoí. ¹³ Naimie dibeimo jaie jaiñedomoí;

iadedi Jesucristomo birui duidomoi. Jusiñamui jaie ñnoñedomoi; iadedi Cristo jai fiodailla jira, naimiena birui ñnotomoi. Naimiena omoi jai ñnuamona, cai diga naimie ðibeimo jai itomoi. ¹⁴ Naimie omoi comeciai jai uri itatate. Cai comeciai jiai jai uri itatate. Cai judíuaimona omoina jaie jearuiticai. Iese jaie iticai; iadedi Cristo muidona ðani coninina nana birui nabaidicai. ¹⁵ Cristo fiodaillamona Moisés micori jaie llogacino anamo jai iñedicai. Naie llogacino ðani cai judíuaimo duilla jira, Jusiñamui ðibeimo jaie iñedomoi; iadedi Cristo finoca rafue muidona, birui daajena jaidicai. Omoina jaie cai gaiñena jira, omoina jaie nabaiñedicai; iadedi Cristomo daajena cai duilla jira, birui nabairedicai. ¹⁶ Cruzmo Cristo fiodailla jira, Jusiñamui ðibeimo cai illamona, mena nairaimona caina daje nairaina jai itatate. Ie jira daje nairaina uri iticai. ¹⁷ Cristo jaie billanona, mare rafuena llote. Omoi judíuainñedinomo, cai judíuaimo, comeciai uri illana llote. Nana caina jilloitaiacanana llote. ¹⁸ Naimie muidona Jusiñamuina jai nabairedicai. Jusiñamui Joreño caina canuamona, naimie diga birui nabairedicai. ¹⁹ Jusiñamui cominina omoi jai illa jira, nana naimiena ñnotino diga Jusiñamuimo daajena duidomoi. Caimona birui jiaie cominiñedomoi. ²⁰⁻²² Jofo isoidicai. Jofona cai finoacania, naie ibiri nano finodicai. Ie mei diga rana cai atiamona, iena niticai. Ie isoide. Diga jiaie isoide cominiaina iticai; iadedi Cristomo daajena jai duidicai. Naimiedi birui nana cai Nama. Cristo facaina llorainimona naimie rafuena jai cacadicai. Jusiñamui Joreño caina canuanona iena ñnoticai. Iena cai ñnuamona, naimie jitailla isoi, mare rafuena finocana jaidicai. Cai diga Cristomo omoi jai duillamona, Jusiñamui Joreño nana cai comeciamo jai ite.

3

Judíuainñedinomo Pablo Cristo rafuena llofue

¹ Jesucristo rafuena omoi judíuainñedinomo cue llofueuilla jira, cárcelmo iticue. ² Omoina naimie duenaillanona, omoina llofuellena, Jusiñamui cuena oretate. Iena jai uiñotomoi. ³ Jusiñamui cuemo jaie uiñoñega rafuena jai llote. Naie rafuena janore como jai cueticue. ⁴ Bie carta omoi facaia, Cristona jaie uiñoñega rafuena cue jai uiñuana uiñoitomoi. ⁵ Jusiñamuidi cominimo iena jaie raise uiñotañede; iadedi ie Joreñodo Cristo facaina llorainina iena birui jai uiñotade. ⁶ Iena lloiticue. Judíuainñedomoi; iadedi Jusiñamui cuemo jaie llote: “Judíuainñedino Cristona ñnuanona, omoi judíuai isoi jilloitimaci” llote. Omoi facaina Cristodi fiodaite. Naimiena omoi ñnoia, omoina ie uruiaina cai isoi jai itatate. Naimiedi nana cai Moo. Jai daje nairaidicai. Cristomo daajena duidicai. Cristo rafuena omoi ñnuamona, naimie jai llua isoi, Jusiñamui diga ico jaca iitomoi. Jusiñamui cuena iena jaie uiñotade. ⁷ Jusiñamui jitailla jira, cuena naimie duenaillanona, naimie uai cuemo illamona, naie mare rafuena llofuecabiticue. ⁸ Creyentena nia cue jaiñena facaiseconi, creyentiana jaie cue duere finouilla jira, jamai bue isoidicue. Nana jiaie creyentiai cue baifemo faitimaci; iadedi Jusiñamui cuena duenaillanona, ie rafuena cue lollena, cuena oretate. Cristo caina eo raise marena canocabillana llofuecabiticue. ⁹ Naie jaie uiñoñega rafuena nana comini birui uiñollena, cuena oretate. Jusiñamui naga rana finode; iadedi naimie jitailla jira, naie jaie uiñoñega rafuena jaca buna jaie raise uiñotañede. Nana comini iena birui raise uiñollena, cuena oretate. ¹⁰ Judíuainñedino judíuai diga creyentiana jaillamona, Jusiñamui jaienisai naimie uai siñonana uiñoitimaci. “Naimie fue eo mare” raitimaci. ¹¹ Jusiñamui jaca jitailla isoi, naie rafue suicana jaide. Cai Nama Jesucristona naimie oretajanona, cai facaina Cristo fiodaite. Iemona Jusiñamui jitailla rafuedi suide. ¹² Cristona cai ñnua jira, Jusiñamui diga

jaciruiñoeno birui jai ñairedicai. Naimie caina cacajana jia uiñoticaí. ¹³ Cristo rafuena omoimo cue llua jira, birui duere sefuidicue. Cárcelmo cue duere sefuilla jira, Cristo rafuedo jaillena omoi comeciaí sefuiruisiñoeno; iadedi Cristo rafue omoimo cue lluanona cue duere sefuia, iobicana omoi jai.

Cristo caina eo isiruite

¹⁴ Cai Moo Jusiñamui caina eo canocabillanomo cue comecina facaia, naimiemo jiidicue. ¹⁵ Naimiedi nana creyentiaí imaci Moona jira, naimiemo jiidicue. ¹⁶ Naimiemo cue jianona, omoi facaina jiidicue. Naimiemo eo ebirede siño iticino illamona, ie Joreño do naimie omoi comeciaina raise ocuiñotallena jicanoticue. ¹⁷ Cristona omoi inuamona, naimie omoi comeciaina raise namatallena jicanoticue. Jusiñamuina omoi isiruicana jaillana jiidicue. Jiaie cominina omoi isiruicana jaillana jiaí jiidicue. ¹⁸⁻¹⁹ Cristo caina jaca eo isiruillana, nana jiaie creyentiaí diga jaca eo isiruillana, omoi eo raise uiñuana jiidicue. Naimie caina eo isiruillacino cai comeciaí facajacino baifemo uaila jira, naimie caina eo isiruisoillacinona jaca raise uiñoñedicai; iadedi iena janore cai uiñuamona, Jusiñamui omoi comeciaina namatallena jiidicue. Iese omoi facaina jicabidicue.

²⁰ Ie jira Jusiñamuimo iobillacino cai fecajasa. Ie uaido cai comeciaí marena icana jaitate. Naimiemo cai jicajacino baifemo naimie fecarede. Cai comeciaí facajacino baifemo naimie jiaí finorede. ²¹ Ie muidona naimiemo iobillacinona nana cai creyentiaídicaídi fecacabillasa. Jesucristo finoca rafue muidona iobillacinona jiaí cai fecacabillasa. Mai.

4

Jusiñamui Joreño jai caimo illa jira, cai comeci daje isoi lloide

¹ Cárcelmo nia cue illamona, omoimo rafuena nia lloiticue. Cristo rafuena cue llofuia jira, cárcelmo iticue. Creyentiaína omoi jai jailla jira, Cristo jitailla isoi omoi i. Jusiñamui omoína jai fetode naimie jitailla rafuena omoi finollena. ² Ie muidona abina jaca iedoñoeno. Raíre iciriñoeno. Jiaimie ona duere finoia, ibana oñoeno; iadedi uai oñoeno naimiena jaca isirui. ³ Jusiñamui Joreño omoimo illamona, omoi comeciaí daje isoi lloicana jai. Daje isoi omoi comeciaí lloillamona, omoi jitaillamona daní uri omoi i. ⁴ Iena nia lloiticue. Cristona cai inuamona, daajena naimiemo jainaiáidicai. Jusiñamui Joreño nana caimo illamona, daní omoi comeciaí lloicana omoi jai. Jusiñamui caina jai fetode. Ie muidona naimie diga jaca cai illena, naimie isoi cai illemo ocuridicai. ⁵ Jaca dajede Nama sedacabidicai. Caina jilloitallena, da naimiena inoticaí. Dama naimie facaina bautizaganodicai. ⁶ Cai Moo Jusiñamui jaca dajede. Jaca dajede Jusiñamuina nana cai creyentiaídicaídi sedadicai. Naimie anamo nana iticaí. Naimie jitaillacinona cai finollena, caina canocabide. Caina canollena, naimie Joreño caimo jaca ite.

⁷ Naimie jitailla diese, caina fetuanona, naimie facaina cai maijillena, ie uai caimo fecade. Jiaie creyentiaína naimiemo inotacana jaillena, ie uai caimo fecade. ⁸ Iena cai raise uiñollena, David micorí jaie ciegafuemonona fueoiticaí. Naimie cueba: “Monamo abido naimie jaillanona, illaimana naimie illamona, ie cominina naimie ifuanona, naimacimo rana fecade”. Cristona ñaíte. Iemona Cristo cai maijiacino caimo illana uiñoticaí. ⁹ Biemo omoi comeciaina faca. Monamo abido naimie jailla jira, monamona eniruemo Cristo nano billana uiñoticaí. ¹⁰ Eniruemo bite; iadedi monamo abido jaide. Nana cominina birui sedade. Naimie baifemo jaca buna iñede. ¹¹ Ie jira caimo ie uai jai fecajanona, caimona ie llofueoicaiganona fetuanona, ie rafue raise llofuellena, naimacina oretate. Damieriemo ie facaina ie

rafuena jino llolena, ie uaina fecade. Ie rafuena nia ñnoñedinomo llolena, damieriemo ie uaina fecade. Creyentiaina ie rafuena llofuellena, damieriemo ie uaina fecade. ¹² Iese ie uaina fecade, naimie facaina raise cai majillena, nana jiaie creyentiaina cai canollena, Ie mei Cristo rafuena daajena ñnocana jaiticai. ¹³ Iena cai ñnuamona, Jusiñamui Jitona raise uiñocana jaiticai. Cai comecidi daje isoi lloicana jaiticai. Naimie jitaillacinodo raise jaiticai. Naimie marena icana illa isoi jaiticai. ¹⁴ Cai uruiacai facaise cai comeciainaganomo ite. Naie facaise nie isoide rafuena cai cacajia, iena raire ñnoticai. Cristo ñnocana cai jaillamona, uruiacai isoi cai iacaiñena. Damierie naga llofueraima uaido jaidimaci. Damierie llofuerañidi Cristo rafuena raise llofuenedimaci; iadedi jifuetimaci. Tainona llotimaci. Iedo cai jaiñena; ¹⁵ iadedi jiaie cominina cai isiruillamona, uanaicinodo cai jailla. Cristo isoi icana cai jaillamona, abina uiñoitica. Cristodi cai illaimana jira, caina ocuide. ¹⁶ Naga creyente naimiemo jainaiade. Aillosiedicai; iadedi daajena naimiemo jainaiaidicai. Daajena naimiemo cai jainaiailamona, naimie jitaillacino cai finoia, naimiema ñnocana jaiticai. Iemona dani coninina isiruicana jaiticai. Daajena naimiemo cai jainaiaila jira, cai comeciaino daje isoi lloicana cai jailla.

Cristomo jai cai duilla jira, naimie rafuedo birui jaidicai

¹⁷ Omoimo nia lloiticue. Cai Namamo cue duilla jira, biena lloiticue. Jusiñamuina ñnoñedino isoi dane omoi ñeno. Jaie naimaci isoi itomoi. Naimaci comeciaino tainomo jai jaide isoide. Cacarefiacaiñedimaci. ¹⁸ Jusiñamui rafuena uiñoñedimaci. Iena cacaiñedimaci. Abina naimaci uiñoñena jira, Jusiñamui ñibeimo illana jaca uiñoñedimaci. Uanaicinona uiñoiacaiñedimaci. ¹⁹ Jearede rafuena naimaci finoia, meiruiñedimaci. Naimaci comeciaino oiacana rafuedo jai jaidimaci. Naga jearede isoide rafuena eo finocana jaidimaci; ²⁰ iadedi Cristo rafuena omoi cacajamona, naimiema omoi raise uiñuamona, naimaci isoi omoi illena fueoñedomoi. Cristo rafuena omoi cacajamona, jiaiena illena jai fueotomoi. ²¹ Naimiema cacajanona iena ñnotomoi. Naimiema cue llofuiamona, naimiema Cristo facaina lloraini llofuiamona, danomo omoi roracomo omoi ofia, Cristo uanaicinona cacadomoi. ²² Biena omoina llofuecabiticue. Cristona jaie nia omoi ñnoñena isoi, omoi jaiñeno. Omoi comeciaino jaie iticinodo jaiñeno. Naga jearede rafue omoi comeciaino oiacanamona faificana jaie jaidomoi. Iedo birui jaiñeno; ²³ iadedi Cristo ñibeimo omoi jai illanona, naimiemo omoi comeciaino facajano, Jusiñamui omoina canuamona, omoi comeciaino iuaillaina meidocana jai. ²⁴ Cristo rafuena birui ñnotomoi. Naimie jitaillacinodo omoi mai jai. Jusiñamuidi jeacino finocana omoi jaiñenana jitaide. Naimie marena isoi, marena icana omoi jaillana jitaide. ²⁵ Ie jira tainona lloñeno. Cristomo daajena jai jainaiaila jira, coninimo uanaicinona jaca omoi llono. Jainona omoi jifueño. ²⁶ Maraiñedicinona bu finoia, naimiemo riire llono; iadedi iese o lloia, naimiema jeare ñaiñeno. Jiaimie ona icia, naimiema jeare ñaiñeno. Naimie diga o rafue ia, naie rafue nairuido marena fino, ²⁷ Taife ramo o fai raillano. Bu diga o nicino ia, iena raire marena o finoñena, ibana oiacanitia. Naie raire o feitañena jira, Taife ona jeacinona finotaite. Iese suiñellena, naicino raire marena fino. Iena feita. Iena dane abido llinoñeno. ²⁸ Naimiemo ra illena, fiamona omoimona navui bu ia, creyentena naimie jai jailla jira, naimie dane fiiñena; iadedi ra naimie jitaia, naimie majiite. Ie majiamona ie ra ollena, ucubena feiñoite. Ie mei dueredinona naimie jiaie canoite. ²⁹ Jeare ñaiñeno; iadedi nie isoide rafue ia, marecinona ñaino. Ie mei naiemona jiaie cominina canoitomoi, Jusiñamui ñibeimo naimaci raise illena. ³⁰ Jusiñamuimo

omoi jai jainaiaila jira, jeacinona finoño. Jeacino omoi finoia, Jusiñamui Joreñodi sunaite. Naimiena sunaitaño. Naimie caimo illamona, caina jillotajana uiñoticaí. Cristo dane abido billemona, naimie dine cai jaca illena, caina jai jillotate. ³¹ Jiaie cominina iciño. Iciño. Uaina uaitaño. Jiaie cominina jeare ñaiño. Naimacina duere jeare finoño; ³² iadedi coninina canua. Jiaie cominina duenai. Jiamie diga omoi nicino ia, naimie finoca rafuena feitajanona, naimie diga marena ñaino. Naie rafuena dane abido linoño. Cristo finoca rafue muidona, Jusiñamui omoi jeacinona jai feitaja isoi, jiamie diga omoi rafue ia, naifuena omoi feita.

5

Jusiñamui cominina jai cai illamona, naimie jitaillacinona finoiticaí

¹ Jusiñamui isiruiga uruiaidomoi. Naimie marecinona finua isoi, omoi fino. ² Cristo caina isiruilla isoi, coninina isiruicana omoi jai. Naimie jitailla jira, caina isiruillamona, cai facaina naimie fodaite. Cai jeacino oni dotallena naimiedi fodaite. Naimie iese fodailla jira, Jusiñamuina eo iobitade. ³ Jusiñamui cominidomoi. Omoi aiñede riño diga iño. Omoi iniñede ñima diga iño. Rana nicidoño. Jearede rafue finuamo omoi comeciaina facaño. ⁴ Jearede rafuedo jaiño. Jamai ebena ñaiño. Meiredicinona ñaicana jaiño. Naie isoide rafuedo creyentedi jaiña; iadedi Jusiñamuimo iobillacinona fecacana omoi jai. ⁵ Ie aiñede riño diga icabitimiedi Jusiñamui illanomo duiñede. Cristo ie cominina sedajanomo duiñede. Ie iniñede ñima diga icabitñaiñodi Cristo ie cominina sedajanomo jai duiñede. Ie rana Jusiñamui ifomo naimie sedaja jira, rana nicidocabitimiedi Cristo ie cominina sedajanomo duiñede. Cue lloga rafuena jai raise cacadomoi. ⁶ “Creyente naie isoide rafuena finorede” bu lloia, naimie omoína jifueiacade. Naimie iese lluaña ñoño. Jusiñamui naie jeacinona finocana jaidinona duere finoite. ⁷ Ie jira naimaci jearede finoca rafuedo jaiño. Naimacina nabaiño. ⁸ Jusiñamuina jai omoi uiñoña jira, jitreñinomo itomoi isoidomoi; iadedi cai Namamo omoi duillamona, uanaicinona ñinocana omoi jai. ⁹ Jusiñamuina omoi jai uiñoia, jeacinona omoi fañonocaia, Jusiñamui jitaillacinona finocana jaitomoi. Uanaicinona llocana jaitomoi. ¹⁰ Buena o finoacania, Jusiñamui jitaillacinona o finuacinomo o comeciaina nano faca. Cai Nama jai lloga uaido omoi jaicabillamona, naimie jitaillacinodo jaca jai. ¹¹ Jitreñinomo ñia itino finoca rafuedo omoi jaiño. Naimaci finoca rafuemona marecinodi jaca comuiñede. Naimacimo: “Maraiñede” llono. ¹² Iena cue meidailla jira, naimaci jearede bainino finoca rafuena ñaiacaiñedicue. ¹³ Marecinona omoi jaca finuamona, jiaie comini naimaci finoca rafue eo maraiñenana raise uiñotimaci. ¹⁴ Cai ofia, naiena rocabiticaí:

Mai casi. Iniño.

Jai fodaitino isoidomoi;

iadedi omoi comeciaina Cristo jai lligaiñoite.

¹⁵ Ie jirari omoi marena illena, abina rairuicana omoi jai. Jusiñamuina ñoñedino ebena jaicabidimaci. Naimaci isoi jaiño. ¹⁶ Diga maraiñede rafue birui comuicabilla jira, cominina Cristo ñibeimo raise omoi itatajallena, nagarui Cristo jitaillacinona finocana omoi jai. ¹⁷ Ie jira ebe isoi jaiño; iadedi Cristo jitaillacinona uiñocana omoi jai. ¹⁸ Iocire omoi iacania, naiemona diga maraiñede rafue comuilla jira, jifaiño; iadedi omoi comeciaina naimie namatallena, Jusiñamui Joreño anamo raise omoi mai i. Iemei naiemona diga mare rafue comuite. Iocire jai iitomoi. ¹⁹ Danomo omoi ofia, nana omoi comeciaina diga isoide ruana iocire ro-rona. Omoi ruamona jiaie

creyentiaí comeciaina ocuiñota. Cai Namamo omoi ruamona, omoi fillamona, omoi taillamona, naimiena iobitaitomoi. ²⁰ Cai Nama Jesucristomo omoi duillamona, nie isoide rafue omoimo ia, cai Moo Jusiñamuimo iobillacinona jaca feca.

Cristomo jai cai duilla jira, cai comini diga marena iacadicaí

²¹ Cristo anamo omoi illa jira, jiaie creyente baifemo omoi faiacinomo omoi comeciaina facañeno; iadedi coninina nagamiaina cano.

²²⁻²³ Inirediñaiñuai, omoimo rafuena lloiacadicue. Cai Nama Cristomo omoi jainaiaila jira, naimie jitailla jira, omoi iniñiai anamo raise omoi i. Naimaci uaina raise ñno. Cristo nana creyentiaí afemo illamona, naimacina naimie sedaja isoi, naga ini ie ai afemo illamona naiñaiñona sedaja. Cristodi nana creyentiaí imaci jeacinomona jillotajamona, naimie anamo itimaci.

²⁴ Cristo anamo nana creyentiaí illa isoi, naiñaiñuai iniñiai uaina jaca ñnua.

²⁵ Airedino, omoimo jiai lloiticue. Nana creyentiaína Cristo isiruilla isoi, omoi ainiaína isirui. Nana caína naimie isiruillamona, naimie jitailla jira, cai facaina naimie fiodaite. Ie isoi omoi ainiaína omoi isirui. ²⁶ Nana creyentiaí marena illena naimie fiodaite. Jusiñamui jitailla isoi, caína marebicaitate.

Cristo fiodailla jira, Cristo jai lloga rafuena cai ñnuamona, cai jeacinomona jai jillobidicai. ²⁷ Fiodaite, nana cai creyentiaí comeciái marena illena. Cai comeciái jeaninana jitaide. Cristo abido bille facaisemo, Jusiñamui jitailla isoi cai marenana jitaide. ²⁸ Naimie abi naimie isiruilla isoi, naga ini ie aina isiruilla. Iaimaiaí daajena jira, ie aina isiruitimiedi ie abina jiai isiruite.

²⁹ Jaca bu ie abina enoiñede; iadedi ie abina sedade. ³⁰ Naimiemo nana cai creyentiaí duilla jira, Cristo caína isiruillamona, caína sedade. Ie isoi nagamie ie aina isiruilla. ³¹ Bie jaiie lloga uaimona iena uiñoticaí. Moisés micori Jusiñamui lluaña jaiie cueba: “Ie aina ollena, iima ie moona, ie ei diga fañonocaite. Iemei dajena iitiaimaiaí”.

³² Naie llofuiacinomona jiai rafuena fueoiticaí. Cristona ñaiticue. Creyentiaína ñaiticue. Naimiemo cai duillamona, daajena iticaí. ³³ Dane lloticue: Ie abina isiruilla isoi nagamie ie aina isiruilla. Nagañaiño ie ini uai uaitañeno ñnua.

6

¹ Uruiaí, omoimo rafuena lloiacadicue. Cai Nama jitailla jira, omoi eiñiai uaina ñno. Omoi mootiaí uaina jiai ñno. Jusiñamuimona marenana jira, iaimaiaí uaina ñno. ²⁻³ Moisés micori Jusiñamui lloga uaina jaiie cueba: “O moo uai ñno. O ei uai ñno. Marena o illena, raire o fioidañellena, iaimaiaína o isiruillamona, iaimaiaí uaina ñno” cueba. Jusiñamui diga lletarafuena llote; iadedi bie nanoca rafuena llote. ⁴ Mootiaí, omoimo lloiticue. Omoi uruiaína jamaí icañeno; iadedi naimacina cai Namana naimaci uiñollena llofue. Naimaci ñnoiacañenia, abina naimaci uiñollena, naimacina isiruillamona, naimacina duere fino.

⁵ Patrón anamo itino, omoimo lloiticue. Omoi patrones ocuica uaina ñno. Omoi maijiana naimaci ocuica, naimacina iobitallena, jaciruiocaida raise maiji. Omoi comeciáimona naimaci jitailla rana maiji. Cristo iedena, naimaci ocuica uaina ñno. ⁶ Omoimo naimaci eruaia, naimacina iobitallena, marena maiji; iadedi omoimo naimaci eruañenia, naimacina iobitallena, nia marena maiji. Naimacina iobitallena maiji; iadedi Cristomo omoi duilla jira, Jusiñamui jitailla jira, omoi comeciái maiji raillamona, marena omoi maiji. ⁷ Patrón facaina maijiacinomo daní comecina facañeno; iadedi iocire maiji, cai Nama facaina omoi maijidomoidena. ⁸ Biena uiñoticaí: Marena bu maijia, cai Nama Cristomona ibana ico feiñoite. Patrón anamo itino

iena feiñoitimaci. Patrón anamo iñedino iena jiai feiñoitimaci. ⁹ Patrones, omoimo lloiticue. Omoi Nama Cristo monamona omoimo eruailla jira, Cristo monamona naimacimo jiai eruailla jira, omoi anamo itinona marena fino. Naimacina riire ocuiño. Naimacina jeare finoño. Cristo nana naimie cominimo daje isoi comecina lloide. Ie jira omoi anamo itinona marena fino.

Cristomo jai cai duilla jira, naimie cai comeciaina ocuiñotaite

¹⁰ Ie muidona nia lloiticue. Cai Namamo omoi duilla jira, naimiedi omoi canocabillamona, omoi comeciaina ocuiñotacana omoi jai. ¹¹⁻¹² Ero, Taife caina ramo jifueoicaida faite. Caina anafefitaiacade. Naimie isoidino caina jiai anafefitaiacadimaci. Naimacidi aillosie. Naimaci anamo nana Jusiñamuina ñnoñedino jai itimaci. Jitiredinomo naimaci illanona, Jusiñamui dibeimo iñedimaci. Beno eniruemo itimaci. Jusiñamui illanomo duiñedimaci. Cominina ñaiñedicue. Taifena, Janabana, Dofina, jananiaina, Dusisiñona ñaiticue. Naimaci isoide joreñuaina ñaiticue. Cai dibeimo iñedimaci. Naimacimona abina omoi rairui. ¹³ Jobaime illa facaiseconi, soldaduai imaci ra diga imaci abiaina riidotimaci. Cinturón jítadimaci. Lloemamona finoca ra jogobemo jítadimaci. Zapatona jítadimaci. Uico riidollena, naimaci uico riidua rana llinotimaci. Ifogí icona jítadimaci. Lloebina llinotimaci. Ie isoide. ¹⁴ Cristomo omoi comeciai facajanona, uanaicinona jaca llono. Jusiñamui jitailla isoi, marecinona finocana omoi jai. ¹⁵ Cristo rafuemonona omoi comeciai uri itatajamona, iena meiruiño llocana uiño. ¹⁶ Taifemona nana jearede rafuedi comuide. Naimiedi ramo faiacana jai jaide. Cristona omoi ñnuamona, Taife ramo faiacinona jamai. ¹⁷ Jusiñamui caina jai jilloitajana jai uiñotomoi. Iena omoi uiñuamona, Taife ramo faiacinona ñnoño. Taifena anafenollena, Jusiñamui Joreño Jusiñamui uaimona fueo. ¹⁸ Jusiñamui Joreño omoína canuamona, Jusiñamui diga ñaicabi. Taife ramo omoimo faia, iena omoi ñnoñellena, Jusiñamui omoína canoite. Iese abina omoi rairuia, Taifena anafefitaitomoi. Taife ramo faiacino naimaci ñnoñellena, nana jiaie creyentiai facaina jiai jicabi. ¹⁹ Cue facaina jiai omoi jii. Marefodo nana Cristo ie rafuena cue llua omoi jii. Cristo nana cominina jilloitaiacanana nia lloiacadicue. ²⁰ Naie rafue cue lollena, Cristo cuena oretate. Naie rafuena cue llua muidona, cárcelmo iticue. Cue jitailla diese iena marefodo cue llua mai omoi jii.

²¹⁻²² Tíquico omoi dine oretaiticue. Naimiedi cue isiruiga ama. Naimiedi ñnogamie. Cristo rafue facaina cuena canocabide. Omoimo cue illana lloite. Cue finoca rafuena lloite. Naimiemona cue rafuena fidiitomoi. Iena cacajamona omoi comeciai ocuiñoitomoi. ²³ Cai Moo Jusiñamui, cai Nama Jesucristo diga, omoína uri itatajamona, Cristona jai omoi ñnuamona, coniniri uri icana jaillana jítadidicue. Iaimaiaia omoína isiruillamona, iaimaiaia omoi ñnuamona, nana jiaie creyentiaina isiruicana omoi jai. ²⁴ Cai Nama Jesucristona omoi eo isiruilla jira, Jusiñamuidi omoína duenailasa. Mai. Pablodicue.

FILIPOMO ITE CRISTONA HNOTINOMO PABLO ORETAGA RABE

Uaiduacino

¹⁻² Filipomo ite creyentiai, Jesucristomo jai omoi duillamona, bie carta omoi dine oredicue. Pablodicue. Timoteo cue diga ite. Naimie cominina coco illamona, Jesucristo dibeimo maijicabidicoco. Omoimo coco uaina oredicoco. Omoi creyentiai illaicominimo coco uaina ua oredicoco. ¿Nigacino? ¿Nie isoidomoi? Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Iaimaiai omoina uri jai itatate. Iena omoi uiñocana mai omoi jai.

Jusiñamuimo iobillacino fecade

³ Naga icaiño omoina cue comecia, Cristo rafuedo omoi jalla jira, Jusiñamuimo iobillacinona fecadicue. ⁴ Naga icaiño Jusiñamui diga cue ñaia, omoi facaina caimare jidicue, ⁵ Jesucristo rafuena cue llua cuena omoi canua jira. Nano bie rafuena omoi cacajamona, cuena canodomoi. Cuena nia canodomoi. ⁶ Jusiñamuidi omoi comeciaina jaie marena itataja facaiseconi mare rafuena tainede. Omoi comeciaino mare rafue illicinona tainede. Cristo Jesús dane billiruimo Jusiñamui bie rafuena fuidoite. Iese fuidollemo ocuiridicue. ⁷ Omoimo iese cue comecina cue facajia, omoina cue isiruilla jira, cuemona mare. Cárcelmo cue illamona, Jesucristo rafuena cue riiduanu, Jesucristo rafuedi uanaicino cue llua, Jusiñamui cuena canocabide. Iemona naimie cana duenaillana jai uiñotica. ⁸ Cuena omoina Cristo Jesús isiruitajamona, nana omoina isiruiticue. Jusiñamuidi uanaicinona cue llua uiñote. ⁹ Jiaie cominina eo isi-isiruicana omoi jaillena, Jusiñamuina raise omoi uiñollena, nie isoide rafue omoimo ia, abina raise omoi uiñollena, Jusiñamuimo jicabidicue. ¹⁰ Iese omoina jitaicue. Mare rafuedo omoi jaiacanana jitaicue. Jiairuido Cristo abido biite. Ie jira omoi comeciai jeanillena jitaicue, Jusiñamui jitailla isoi omoi comeciai marena illena. ¹¹ Jusiñamui jitailla isoi omoi illamona, mare rafuena jaca omoi finuana jitaicue. Jesucristona omoi hnuamona, naimie omoina iena finotarede. Iese omoi finocana omoi jaia, Jusiñamuina eo iobitaitomoi.

Cárcelmo Pablo illamona, diga comini Jesucristo rafuena cacadimaci

¹² Cue amatia, bie rafuena omoi uiñuana jitaicue. Cárcelmo cue illamona, diga comini Jesucristo rafuena cacadimaci. ¹³ Cai illaia jofomo itino cacadimaci. Nana bene itino jia cacadimaci. Jesucristo rafuena cue llua jira, cárcelmo iticue. Iena jai uiñotimaci. ¹⁴ Cárcelmo iticue; ia jaciruiñeno Cristo rafuena nia lloticue. Iemona diga creyentiai naimaci comeciaina ocuiñuana, Jusiñamui uaina jaciruiñeno marefodo birui cue isoi llotimaci. Navui jaciruitimaci.

¹⁵ Cuena uradoillamona, cue afemo iacanamona, damerie Cristo rafuena llofuetimaci. Jiaie llofueraini marecinona finuacanamona llofuetimaci. ¹⁶ Cuena naimaci isiruilla jira, llofuetimaci. Cristo rafuena cue riiduamona, cárcelmo cue illana uiñotimaci. ¹⁷ Cue afemo iacadino mare comeciainona llofueñedimaci. Iemona cuena duere finoacadimaci. ¹⁸ Iese itimaci; iadedi uradoillamona naimaci llofua, marecinona finuacanamona naimaci llofua, cuemona damamei iesede. Cristo rafuena llocana jaidimaci. Iena jai iobidicue. Nia iobiticue. ¹⁹ Cueri Jusiñamuimo omoi jiano, Jesucristo Joreño cuena canuano, nana cuemo ite rafuemonu jilloiticue. Iena cue uiñuamona,

nia iobitacue. Jesucristo Joreño ie Moo diga daje. ²⁰ Cue finolle rafuemonacue meiruiñellena eo jitaicue. Jaie cue finocabilla isoi, Cristona marefodo birui iobitaiacadue. Cue nia fioldaiñenia, naimiena iobitaiacadue. Cue fioldaillemona naimiena jia iobitaiacadue. Iemona jiaie creyentiaidi Jusiñamui iobillacinona fecaitimaci. ²¹ Nia cue fioldaiñenia, Cristo rafuena nia lloiticue. Mare; iadedi cue fioldai, naimie dine cue illena jia eo mare. ²² Nia cue fioldaiñenia, diga cominimo Cristo rafuena nia lloiticue. Ie jira nie isoide cue illana cue comeci niese rainide. ²³ Nia raise uiñoñedicue. Jiaicaiño fioldaiacaiñedicue. Jiaicaiño fioldaiacadue. Cue comeci Cristo dine jaiacade. Nainomo cue illena cuemonacue eo mare; ²⁴ iadedi omoina cue canollena, nia fioldaiacaiñedicue. Cue nia fioldaiñenia, omoina nia canoacadue. ²⁵ Cue comecina jai facajano, raite: “Nia fioldaiñeiticue. Omoi diga nia cue illana uiñoticue”. Cristona omoi inotacana omoi jaillana jitaicue. Omoi inuamona, caimare omoi illana jia jitaicue. ²⁶ Iemei omoi dine dane cue illa jira, cueri Cristomo iobillacinona eo fecaitomoi.

²⁷ Cue fioldai, cue fioldaiñenia, Cristo ie mare rafuedo omoi jai. Omoina cue cioia, omoina cue cioiñenia, mare rafuena omoi finuana fiolaiacadue. Cristo rafuena inocana omoi jaillana, omoi comecia i daje isoi lloillana, Cristo rafuena omoi riiduana fiolaiacadue. ²⁸ Omoi dibeimo inedinona omoi jaciñenana fiolaiacadue. Iese omoi ia, Jusiñamui omoi dibeimo inedino faifillana uiñotaite; iadedi naimiedi omoina omoi jilluana uiñotaite. Naimie diga omoi jaca illena, omoina jai jillotate. ²⁹ Jusiñamui Cristona omoi inollena omoina fetode; iadedi Cristori omoi duere sefuillena omoina jia fetode. ³⁰ Omoi nairaimo cue nano illa faise Cristona inoñedinomona duere sefuidue. Iena ciodomoi. Cárcelmo birui cue illamona, naimacimona iese nia birui duere sefuidue. Iena birui fiolaiodomoi. Naimacimona cue isoi birui jia duere sefuidomoi.

2

Jiaie creyentia diga raise omoi illacino

¹ Jiaie creyentia diga omoi marena illena, dajerie rafuena lloiacadue. Cristomo omoi duilla jira, coninina omoi comecia ocuiñotajamona, Cristo omoina isiruillana omoi uiñuamona, Jusiñamui Joreño nana omoina nabaitajamona, coninina omoi comecia eo duenaillacino illamona, ² cue comecina caimare itata. Omoi comecia i daje isoi lloillamona, coninina omoi isiruillamona, daje uaido omoi comecia lloillamona, cue comecina caimare itata. ³ Jaca buena finoño, jaimie afemo jamai omoi illena. Abina iedumona buena finoño. Abina iedoño jaimacimo comeciaina faca: “Naimaci cue baifemo faite”. ⁴ Omoi abimo ite rafuemo omoi comeciaina faca; iadedi jaimaci abimo ite rafuemo comeciaina jia faca. ⁵ Cristo Jesús illa isoi omoi illa. Ie rafuemo comecina janore facade; iadedi naimacina canollena, jiaie cominimo ite rafuemo naimie comecina eo facade. ⁶ Naimiedi jaca Jusiñamui; iadedi naimiedi Jusiñamui diga danomo jaca illana jitañede. Naimie comecina iemo facañede; ⁷ iadedi iena faionocaida, ie Moo ocuica rafuena finollena, imana naimie jaide. ⁸ Jamai bue isidimiena jaide; iadedi ie Moo uaina inote. Ie Moo jitailla jira, fioldate. Marañede rafue finodimie isoi, cruzmo fioldate. ⁹ Ie jira, naimiena iobitallena, Jusiñamui naimie ecimo naimiena abido ote. Nana jiaie mameci baifemo faite mamecina jitate. ¹⁰ Jesúsna nana comini sedallena, naimiemo iobillacinona naimaci fecallena, Jusiñamui naimiena iese iobitate. Jusiñamui jaienisa naimiemo iobillacinona fecaitimaci. Nana comini naimiemo iena fecaitimaci. Fioldaitino jillobillamona, naimiemo jia

fecaitimaci. ¹¹ Nana lloitimaci: “Jesucristodi cai Nama”. Iese naimaci llua jira, cai Moo Jusiñamuina iobitaitimaci.

Maraiñedino comeciaina lligaiñotomoi

¹² Cue isiruiga amatiaidomoi. Ie Moona Jesucristo ñnua jira, cue llua nia ñnocana omoi jai. Jaie omoi diga cue ia, Cristo rafuena raise ñnotomoi. Birui omoi diga ññedicue; iadedi Jusiñamuina omoi ñnua jira, naimie jitailla rafuena jaciruiocaida, finocana omoi jai. ¹³ Ie jitailla rafuena omoi finollena, Jusiñamui omoi comeciaina birui marena itatate. Naimie omoina iena finotaiacade. Naimie mare jitaillacinomona, omoina iena finotaite. ¹⁴ Nana omoi finolle rafuemo abi jafueoicaiñeno fino. Uai uaitañeno fino, ¹⁵ jiaie comini omoiri ñai raillanona, Jusiñamui uruiaina omoi illa jira, omoi comeciai jeanidemona marena omoi i. Maraiñede comini motomo itomoi. Naimaci comeciai jearede. Naimaci comeciaina lligaiñotomoi, naimacimo ite jeacinona uiñotallena. ¹⁶ Jesucristo rafuena llocana uitomoi. Iena naimaci ñnuamona, bie rafue Jusiñamui dine cominina jaca itatate. Cristo dane billirui omoiri cue iobiacana jira, omoi dine: “Tainona jaie lloticue” cue raillano, Jesucristo rafuena llocana nia omoi jai. ¹⁷ Jusiñamuina omoi ñnua jira, naimiemo ailluena ucubena caidiñeno fecadomoi. Ie baifemona cue fodaillana Jusiñamui jiai jitaia, iobiticue. Omoi diga jiai caimataiticue. ¹⁸ Ie muidona caimare iitomoi. Cue diga caimataitomoi.

Pablo Timoteona orede

¹⁹ Cai Nama Jesús jitaia, omoi dine Timoteona raire oretaiacadice. Cue dine abido naimie bia, omoi rafuena cue fidiano jiai iobiticue. ²⁰ Cue dine jiaino naimie isoi ññede. Dama naimie omoi ite rafuemo comecina facade. ²¹ Jiaino dani naimacimo ite rafuemo comeciaina facadimaci. Jesucristo rafuemo comeciaina facañedimaci. ²² Timoteodi mareuidimienaa uiñotomoi. Cue jito isoide diga, Cristo rafuena lloticoco. ²³ Cárcelmo cue illa rafuedi nia fuiñede. Iena cue uiñollemona, naimie omoi dine raire oretaiacadice. ²⁴ Cárcelmona cue jino jaillena cai Nama jitaia, omoi dine jiai raire jaiacadice.

Pablo Epafroditona abido orede

²⁵ Epafroditodi cue ama isoide. Danomo Cristo rafuena lloticoco. Danomo Cristo rafuena riidoticoco. Naimienaa oredomoi, cuena canollena. Naimienaa omoi dine abido oretaiacadice, ²⁶ omoi dine naimie illemo naimie comecina facaja jira. Naimie navui duillana omoi fidiã jira, naimie uri ññede. ²⁷ Navui niadedi fiadaicanamona jillode, Jusiñamui naimienaa duenalla jira. Naimie fodaillamona, eo cue duere sefuiñellena, Jusiñamui cuena jiai duenaite. ²⁸ Ie jira Epafroditona eo raire oretaiacadice, naimienaa omoi ciuanona omoi iobillena. Iemei jiai uri iiticue. ²⁹ Cai Nama mamecido naimienaa eo caimare feiño. Jiaie naimie isoidinona omoi dine ia, naimacina iobita. ³⁰ Cristo facaina navui naimie llofuiamona, omoi facaina cuena canollena, niadedi fiadaite. Omoi facaina naimie cuena canuano, cue dine omoi ññena jira, cue muidona niadedi naimie abina faifitate.

3

Moisés micori llogacinuaido jaidinomona abina rairui

¹ Cue amatiai, omoi nia lloticue. Cai Namamo omoi duilla muidona, iobi. Omoi bie rafuena dane cue cueia, cuemona sefuiñide. Iena dane omoi cacajamona, omoina canoite. ² Jearede rafue finode cominimona abina rairui. Jiconiaa isoidimaci. Jillobillena abi diana llofuetimaci; iadedi cuemonadedi jamai ebena tuquica isoidimaci. Naimaci abiaa detatatimaci; iadedi naimaci comeciai nia raise finoñnedimaci. ³ Cai abiaa detatajamona, cai

comeciai raise finobiñede. Cai comeciai raise finuamona, Jusiñamui Joreñodi caina Jusiñamuina raise sedatate. Cristo Jesúri iobidicai. Cai jillobillena, cai abiaina detatañedicai. ⁴ Buena cai finuamona cai illamona jillobidicaidena, cue jilluana raise uiñoticue. Cue cominimona jamai bue isoiñedicue. ⁵ Iena ja ñaiticue. Cue jeiciamona ocho digarui illamona, cue abina degacue. Cue eirue jitodi Israel micori. Benjamín isie imiedicue. Cue cominidi judíuai imacina jira, cue uruenamona judíuai uaido ñaiticue. Fariseo cue imiēna jira, Moisés micori llogacinuaido fainonocaiñeno iedo eo jaidicue. ⁶ Iena eo cue jitailla jira, Cristona ñnotinona duere finodicue. Nana Moisés micori llogacinuaido eo raise jaidicue. Iena raise finodicue. ⁷ Iese jaie iticue. Cue começi iena: “Mare” raite; iadedi Cristona jai cue ñnua jira, birui nana bie rafuedi cuemona ieñedicinuai. Naie isoide rafue cuemo illamona, cue jeacinomona jilloñedicue. ⁸ Dane lloticue: Cue Nama Cristo Jesúna cue uiñoiacana jira, jiaie rafue cuemona ieñedicino. Naimiēna cue uiñuacinodi nana jiaie rafue baifemo faite. Jeacuai isoi jai marañena jira, naimie muidona cue jaie illacinona jai sofecaidicue. Iena sofeticue, Cristo ñibeimo raise cue illena, ⁹ naimiēmo raise cue duillena. Moisés micori llogacinuaido cue jillamona marebicaiñedicue; iadedi Cristona cue ñnuamona marebicaidicue. Cristona cue ñnua muidona, Jusiñamui cuena jai marebicaitate. ¹⁰ Cristona raise uiñoiacadicue. Naimie fiodaite; ia iemona jillode. Naiemona cue começi marena illena, naimiēna jillotate uaina uiñoiacadicue. Naimie rafuena cue llumona, naimie isoi duere sefuiticue. Iemona ñibai fiodaiticue. ¹¹ Cue fiodaille mei, fiodaillamona naimie isoi cue jilloillemo ocuridicue. Ie jira naimiēna uiñocana jaiacadicue.

Pablo jitaillacino

¹² Jusiñamui jitailla isoi, nia raise marebicaiñedicue. Nia fiebidicue; iadedi nia jai jaicaidicue, iena illena. Iena cue illena, Cristo Jesús cuena jaie uaidote. ¹³ Cue amatiai, iena nia iñedicue; iadedi jaie cue finoca rafuemo começina facañedicue; iadedi cuemo nia suiñede rafuemo birui eo ocuridicue. ¹⁴ Cue risaillinomo iocire jaidicue, ibana cue feiñollena. Ieri Cristo Jesúdo Jusiñamui cuena uaidote, monamo cue illena. ¹⁵ Caìmona Cristo rafuena raise abina uiñocaidino, bie rafue diga cai comeciai lloicana mai cai jailli. Dajerie jiaiforie começina lloia, Jusiñamui naimacina uanaicinona raise uiñotaite; ¹⁶ iadedi caimo jai ite uiñuacinodo mai cai jailli.

Pablo illa isoi cai illa

¹⁷ Cue amatiai, Cristona cue ñnua isoi, naimie rafuedo cue jailla isoi, nana omoi jiai jai. Cai illa isoidinomo omoi eruai, naimaci isoi omoi illena. ¹⁸ Jaie omoimo llouidicue. Cue sunaillamona dane lloticue. Ailluena comini Cristo fiodailla rafuena birui jitañedimaci. ¹⁹ Ja muidomo faifitimaci. Naimaci Jusiñamuidi imaci guille, ñani guille ramo naimaci começiai facaja jira. Jearede rafue finuamona, meiruiñeno naie rafueri iobidimaci. Naimaci ecimo ite ramo começiaina facadimaci. Naimaci isoi cai iñena. ²⁰ Monamo ite Jusiñamuimo cai jainaiailla jira, monamona cai jilloitaraima abido dane billemo ocuridicai. Cai Nama Jesucristodi cai Jilloitaraima. ²¹ Naimie bia, cai fiodaille abina meidoite, naimie ebirede abì isoi cai illena. Nana ra naimie anamo itatate uaido caina iese meidoite.

4

¹ Ie jira Cristo rafuena ñnocana nia omoi jai. Cue amatiai, omoina isiruiticue. Omoina cioacadicue. Omoiri iobidicue. Cue llumona Cristona jaie ñnotomoi. Ie rafuedo omoi jailla jira, iobidicue. ² Evodia raillañaiñomo rafuena lloiacadicue. Síntique raillañaiñomo jiai lloiacadicue. Cai Namamo

iañuái duilla jira, iañuái comeci daje isoi lloillana jitaídícue. Coniño diga icirillana jitaíñédícue. ³ Cue mare nabai, omo jicanotícue, iañuáina canolena, coniño diga iañuái dane marena ñaillena. Cristo rafuena cue diga llotíiaíñuái. Clemente diga llotíiaíñuái. Cue diga llofueuidino diga llotíiaíñuái. Monamo ite rabenicomo nana naimaci mameciai jai cueba. Jusiñamui diga monamo jaca iite comini mameciai diese cueba.

Iobillacino, uri illacino diga

⁴ Cai Namamo omoi duilla jira, jaca iobi. Dane lloítícue: Iobi. ⁵ Omoi rininana nana comini uñuana jitaídícue. Cai Nama dane abido billirui iaírei ite. ⁶ Ie jira buemo omoi comeciaina facajanona, jaca llicidaíñeno. Naga omoi jitaillacino Jusiñamuimo llono. Naimiemo jica. Naimiemo omoi jia, naimiemo iobillacinona jiaí feca. ⁷ Iemei Jusiñamui omoi comeciaina uri itataite. Omoi comeciái facajacino baífemo omoiina uri itataite. Cristo Jesúsna omoi inuano, omoi comeciaina eenoite. ⁸ Cue amatiaí, ie muidomo daje rafuena nia lloítícue. Uanaicino comeciaina faca. Inogafuemo comeciaina faca. Mare rafuemo comeciaina faca. Ebirede jeanide rafuemo comeciaina faca. Iobillafuemo comeciaina faca. Bie isoide mare rafue ia, iemo comeciaina faca. Nana bie isoide rafuemo comeciaina faca. ⁹ Nana cuemona omoi fueoga rafuedo omoi jai. Nana cuemona omoi feiñoga rafuedo omoi jai. Nana cuemona omoi cacaja rafuedo omoi jai. Nana cue finoca rafuena omoi cúa rafuedo omoi jai. Iemei omoi comeciaina uri itatajanona, Jusiñamui omoi diga iite.

Filipomo ite comini Pablona eo canodimaci

¹⁰ Cai Namari iobidícue, diga irui illamona dane cuena omoi comeci jira. ¹¹ Cuemo comeciaina facadomoi; iadedi bu jaca binide, ucubena cue dine atillena. Bumo cue jitaillacinona lloñédícue. Janore ra cuemo ia, ailluena ra cuemo ia, caimare jai itícue. Cuemo ite ra diga caimare illana jai uñotícue. ¹² Duere cue illana uñotícue. Duenino cue illana jiaí uñotícue. Nie isoi cue ia, uri cue illana jai uñotícue. Cue monia, cue aimetaia, janore ra cuemo ia, ailluena ra cuemo ia, jaca uri itícue. ¹³ Nie isoide rafue cuemo ia, Cristo cue comecina ocuiñotaja jira, naga rafuena finocana jaitícue. ¹⁴ Cue duere sefuillamo cuena omoi duenaillamona, cuena omoi canua jira, cuemona mare. ¹⁵ Omoiimo Cristo rafuena nano cue llamona, cuena canodomoi. Macedoniamona cue jailla mei, jiaíe creyentiaí cuena canoñédimaci. Dani omoi cuena canodomoi. Iena uñotomoi. ¹⁶ Tesalónicamo nia cue ia, diga icaiño ucube cuemo oredomoi; ¹⁷ iadedi omoi ucubena nicidoñédícue; iadedi cuena omoi canuamona, Jusiñamuimona ibana omoi feiñuana jitaídícue. ¹⁸ Nana cue jitaille rana jai feiñotícue. Ailluena cuemo ite. Epafroditomona cuemo omoi oretaga rana feiñotícue. Jusiñamuimo fecadomoi isoide. Jusiñamui díbeimo cue maijia jira, mare rana finodomoi. Ie jira Jusiñamui iena gaíde, caimare soride rana cai gaía isoi. Naimie iena jiaí feiñote. ¹⁹ Naimiemo ailluena ite ramona cue Jusiñamui nana omoi jitaille rana fecaite, Cristo Jesúsna cai duilla jira. ²⁰ Cai Moo Jusiñamuimo iobillacino jaca cai fecacabillasa. Iena jitaídícue.

Fuiduacino

²¹ Cristo Jesús mamecido cue facaina nana creyentiaímo cue uaina llono. Cue diga amatiaí imaci uaina jiaí oredimaci. ²² Nana benomo ite creyentiaí imaci uaina oredimaci. Cai illaíma César jofomo maijidino imaci uaina ua oredimaci. ²³ Cai Nama Jesucristo omoi comeciaina jaca caimare itatajana jitaídícue. Mai. Pablodícue.

COLOSAMO ITE CRISTONA HNOTINOMO PABLO ORETAGA RABE

Colosamo ite creyentiaimo Pablo carta orede

¹⁻² Colosas railla nairaimo ite creyentiai, Pablodicue. ¿Nie isoidomoi? Bie carta omoi dine oredicue. Timoteo cue diga ite. Coco uaina oredicoco. Cristomo naimie jiai duilla jira, naimiedi cai amana eruaide. Jusiñamui jitailla jira, ie rafue llollena, Jesucristo oretagamiedicue. Naimiemo jai duidomoi. Naimiena raise ñinocana jaidomoi.

Naimaci facaina Pablo jide

³ Cai Nama Jesucristo Moodi Jusiñamui. Omoi facaina Jusiñamuimo coco jiaia, naimiemo iobillacinona jaca fecadicoco. ⁴ Jesucristona nia omoi ñnuana coco fidia jira, nana creyentiaina nia omoi isiruillana coco fidia jira, iobillacinona jaca fecadicoco. ⁵ Jusiñamui dine ico omoi illemo omoi ocurilla jira, iese icana jaidomoi. Jesucristo rafuena nano omoi cacajamona, Jusiñamui dine illemo ocuridomoi. Omoi jai cacaja rafuedi uanaicino. ⁶ Diga illanomo, diga comini iena jiai jai cacadimaci. Iena ñnuamona Cristo dibeimo naimaci comeciai jai meidoga. Iena ñnuamona marecinodo jai jaidimaci. Ie isoidomoi. Jusiñamui omoi na duenaillana jai uñnotomoi. Uanaicinona omoi raise uñnuamona, iedo jaidomoi. Ie marecinona finocana jaidomoi. ⁷ Epafra lluamona naie rafuena cacadomoi. Naimiena isiruiticai. Jesucristo dibeimo coco isoi, naimie jiai llofuiana majide. Omoi motomo cai ññena jira, Cristo dibeimo cai facaina naimie raise majiuide. ⁸ Naimiemona omoimo ite rafuena fididicoco. Jusiñamui Joreño omoi na canuamona, jiaie creyentiaina omoi isiruillana fididicoco.

⁹ Ie jirari omoi facaina jaca jidicoco. Omoi rafuena coco fidiamona, Jusiñamuimo omoi finolle rafuena omoi eo raise uñnollena jidicoco. Nana naimiemo ite abi uñnuacinona omoi eo raise uñnuana jitaidicoco. ¹⁰ Cai Nama: “Mare” omoi na raillana jitaidicoco. Naga mare rafue omoi finocana jaillana jitaidicoco. Jusiñamuina raise omoi uñnocana jaillana jitaidicoco. ¹¹ Nie isoide ramo omoi jiria, nana naimie siño ebirede uaido naimiedi omoi comeciaina ocuiñotajana jitaidicoco. Iocire omoi illana jitaidicoco. ¹² Caina ie cominina naimie jai itataja jira, nana ie comini diga naimie illanomo ico jaca iiticai. Ie muidona naimiemo iobillacinona omoi fecacabillasa. ¹³ Jeacino anamo navui cai illa jira, jitiredinomo iticai isoidicai. Jeacino anamona caina Jusiñamui jai jillotajamona, caina ie isiruiga Jito cominina itatate. ¹⁴ Naimie Jito muidona cai jeacinomona jillobidicai. Naimiedi cai jeacinona oni dotajamona, naiena jai feitate. Naiena ico abido llinofeite.

Cristo muidona Jusiñamui ricailifue anamo ññedicai

¹⁵ Jusiñamuina cionidicai; iadedi Cristomona naimiena uñnoticai. Jaca bue nia ññenia, Crsito nano jaca ite. ¹⁶ Cristo uaido Jusiñamui nana rana finode. Monamo ite rana finode. Eniruemo ite rana finode. Cai ciua rana finode. Cai cioñena rana finode. Cominina finode. Ie jaienisaina finode. Janabana finode. Dofina finode. Taifena finode. Cristo uaido nana rana finode. Cristona iobitallena, nana rana finode. ¹⁷ Nano dofoconi Cristo jaca ite. Naimie uaido naga ra marena icana jaide. ¹⁸ Naimiedi nana creyentiai imaci illaia. Fiodaitinomona naimie nano jillodimiena jira, cai fiodaia, ico jiai jilloiticai. Naimiedi naga ra baifemo faite. Naimiedi nana comini baifemo jiai faite. ¹⁹ Jusiñamui isoi naimie ite. Jusiñamui jitailla jira, Cristomo nana Jusiñamuimo ite siño uaidi ite. ²⁰ Cristo finoca rafue muidona, Jusiñamuidi

nana cominina naimie dibeimo itataiacade. Ua nana naimie dibeimo iñedinona naimie dibeimo itataiacade. Cruzmo Cristo fiodailla jira, Cristo diaillamona, Cristona cai ñnoia, Jusiñamui riicaillifue anamo jai iñedicaí. ²¹ Jusiñamui dibeimo navui iñedomoi. Naimiena nabaillana jitañedomoi. Omoi comeciainona naimiena enoidomoi. Maraiñedinona finouidomoi; ²² iadedi cruzmo naimie abi illanona, nainomo Cristo fiodailla jira, naimiedi naimie dibeimo omoína itatate. Jusiñamuimona mareuidinona omoi illena, omoimo nicino iñellena, Jusiñamui ñine ico omoi ia, naimie dibeimo omoína jai itatate. ²³ Naimiena raise ñnocana omoi jaiia, danomo abido omoi jaiñenia, iese iitomoi. Cristo rafuena navui cacadomoi. Ie jira Cristo ñine omoi illemo ocuridomoi. Diga comini naie rafuena jai cacadimaci. Naie rafuena llocana jaidicue.

Pablo Cristo rafuena llofuecabite

²⁴ Omoimo Cristo rafue cue llua muidona, duere sefuidicue; iadedi iocire nia iticue. Omoi creyentiaí facaina Cristo isoi duere sefuidicue. ²⁵ Jusiñamui cuena oretaja jira, naimie rafuena ailluena cominimo eo raise cue lollena, omoi creyentiaí facaina llofueticue. ²⁶ Cai jaiagai bie rafuena uiñoñedimaci; iadedi Jusiñamuina ñnotinodi iena birui uiñotimaci. ²⁷ Jusiñamui naimacina iena uiñotade. Naie rafuedi eo ebirede. Judíuainñedinodomoi; iadedi bie rafue omoimo jai duide. Omoi comeciaino Cristo illana jai uiñoticaí. Ie jira naimie ebirede illanomo ico omoi jaca illemo ocuridomoi. ²⁸ Cristo rafuena llofueticaí. Nana cominimo Cristo dibeimo naimaci iacanana lloticaí. Cristona naimaci eo raise ñnollena, Cristo isoi naimaci marebicaillena, naimaci abi uiñuana lloticaí. ²⁹ Ie jira bie rafuena llofuecabiticue. Nana Cristo cuemo iga uaido eo llofuecabiticue.

2

¹ Omoimo eo comecina facadicue. Iena omoi uiñuana jitaídicue. Laodicea railla nairaimo jiai eo comecina facadicue. Diga comini cuena nia cioiñedimaci. Naimacimo jiai eo comecina facadicue. ² Omoi comeciaina ocuiñotallena, iese omoimo comecina facadicue. Dani omoi isiruillamona, ni Jusiñamui rafuena omoi eo raise marena uiñollena, omoimo comecina facadicue. Naie rafuedi Cristona llote. ³ Cristodi nana rafuena uiñote. Eo abina uiñote. Naimie rafue raise cai uiñollena, naimie caina canocabide. ⁴ Naimaci ñaiamona omoína bu jifuei raillanona, buena omoimo lloticue. ⁵ Omoi ñine iñedicue; iadedi cue comecidi omoi ñine ite. Omoimo cue comecina facadicue. Danomo omoi marena illa jira, Cristona omoi raise ñnocana omoi jailla jira, iobidicue. ⁶ Cai Nama Jesucristona omoi ñnuamona, naimie lloga rafue finocana omoi jai. ⁷ Naimie dibeimo raise icana omoi jai. Naimiena ñnocana omoi jai. Omoi lloraini omoína llofuia isoi, naimiena ñnocana omoi jai. Jusiñamuimo iobillacino eo fecacana omoi jai.

Cristona cai ñnuano, cai illa rafue

⁸ Jiaie comini naimaci jamai comeciaino comeciaino comeciaino omoi jifuei railanona, abina omoi rairui. Uanañedinomono comeciaino jamai facadimaci. Naimaci einamacimona iena otimaci. Naie rafuedo omoi jaillana jitaídicue. Cristo rafuedo omoi jaillana jitaídicue.

⁹ Ero, Cristomo nana Jusiñamui uai ite. Eniruemo billanona, Cristo ñimana jaide. Naimiemona Jusiñamuina uiñoticaí. ¹⁰ Cristomo omoi jainaiailla jira, naimiemona nana omoi jitaillacinona oitomoi. Nana comini naimie anamo itimaci. Nana illaicomini naimie anamo itimaci. Taife naimie anamo ite. Janaba naimie anamo ite. ¹¹ Cristomo omoi duilla jira, omoi comeciaino ite jeacino anamona omoína naimie jillotate. Omoi abiaína detatajamona

naimie iena finoñede; iadedi omoi comeciaino ite jearede iuai meidua mona jillobidomoi. Naimie iena finode. ¹² Naimie dibeimo cai illamona, jai bautizagacai. Naimie dibeimo cai illamona, cai jeacino anamo jai iñedicaí. Cristo fiodaite; iadedi fiodaillamona Jusiñamui naimiena jillotate. Jusiñamuina omoi ñnua jira, jeacino anamo jai iñedomoi. Naie anamona Jusiñamui omoína jiaí jillotate. ¹³ Jeacino anamo jaie omoi illamona, naimiemona fiodaitino isoidomoi. Omoi maraiñede jitaillacino anamo jaie itomoi. Cristomo omoi jai duillamona, omoi jeacina oni dotajamona, naie anamona Jusiñamui omoína jai jillotate. Cristo dibeimo omoína itatate. ¹⁴ Moisés micori jaie llogacina jaie cai ñnoñena jira, Jusiñamui ricailifue anamo iticai; iadedi cruzmo Cristo fiodailla jira, naie llogacino anamo jai iñedicaí. Ie muidona Jusiñamui caino ibana oñeite. ¹⁵ Cruzmo Cristo fiodailla facaiseconi Taifedi anafefide. Janabadi anafefide. Dofidi anafefide. Dusisiñodi anafefide. Naimie siño rafuena finuamona, Cristo uai naimaci uai baifemo uailana uiñoticaí.

Cristomo ite rafuedo omoi jai

¹⁶ Cristo rafuedo omoi jailla jira, omoi guiga rana bu fimaia, naimaci ñaíamo cacarefiño. Judíuai einamací rafue dine omoi jaiñenia: “Omoi mareiñedomoi” bu raia, naimaci ñaíamo cacarefiño. ¹⁷ Naie isoide rafuedo jaie jaidicaí; iadedi iedo birui jaiñedicaí. Cristo rafuedo birui jaidicaí. ¹⁸ Dajerie llofueraini jaie rafuedo jaidimaci. “Abina iedoño” raitimaci. “Jusiñamui jaienisaína seda” raitimaci. Nicairillacinodo jaidimaci. Naimaci isoi omoi jaiñenia: “Maraiñedomoi” omoína naimaci raia, naimaci ñaíamo cacarefiño. Naimaci illa isoi iño. Naimaci llucino anamo iño. Naimaci llucinodo omoi jaia, omoi jitaillanomo Cristo dine riñeitomoi. Naimaci comeciái jearena jira, jamai buena uiñoñenano abina iedotimaci. ¹⁹ Cristo rafuedo jaiñedimaci. Cristomo cai duilla jira, naimie caina ocuicabide. Naimiemona cai illena Jusiñamui jitailla isoi, fueoticaí. Jusiñamui jitailla isoi, naimie dibeimo cai raise illena, naimiena cai raise ñnollena, naimiemona fueoticaí. Cristomo cai duilla jira, dani conina nabaidicaí. ²⁰ Cristo fiodaillamona, jaie rafue anamo jai iñedicaí. Naimiena ñnoñedino rafue anamo jai iñedicaí; iadedi naie rafuedo nia jaidomoi. Damierie llofuerainidi diga rana fimaidimaci. ²¹ “Biena jetaño. Biena guiño” raitimaci. ²² Ero, naie fimaica guille ra ite, cai guillena. Iena cai guilla mei, jai buena iñede. Naimaci fimaiduacino cominimona otimaci. Jusiñamuimona oñedimaci. ²³ Naie fimaiduacinodei eo abi uiñuacino isoide. Naiedo bu jaia: “Jusiñamuina eo raise sedadicaí” raitimaci. “Abi iedoñedicaí. Cai abina isiruiñedicaí” raitimaci; iadedi naie isoide llucinodo bu jaia, naimie comecimo ite jeacinomona jilloñede. Naimiedi jeacino finocana nia jaide.

3

¹ Jeacino anamo jaie itomoi. Fiodaillamona Cristo jillua jira, jeacino anamona jai jillobidomoi. Ie jira Cristomo ite rafuedo omoi jai. Monamo Jusiñamui ecimo Cristo ite. Jusiñamui naimieri iobilla jira, naimie ecimo ite. ² Cristomo ite rafuemo omoi comeciaina facacana jai. Bene ite maraiñede rafuemo omoi comeciaina facaño. ³ Bene ite maraiñede rafue anamo jai iñedomoi; iadedi Jusiñamui ecimo naimie jai illa jira, Cristomo omoi duilla jira, naimie finoacaga rafuena omoi finollena, omoína naimie canoite. ⁴ Cristomo jai duidomoi. Naimie abido bia, naimie bairenia, naimie cominina omoi illa jira, naimie diga jaca itomoi.

Omoi comeciaino ite jeacina fainonocai

⁵ Cristomo omoi jai duilla jira, omoi comeciaino ite jeacinona fañonocai. Omoi aiñede riño diga iñeno. Omoi iniñede iima diga iñeno. Jeare finoca rafuemo omoi comeciaina facañeno. Omoi maraiñede jitaillacinodo omoi jaiñeno. Rana nicidoñeno. Rana omoi nicidoia, Jusiñamuina raise sedañedomoi; iadedi naimie ifomo rana sedadomoi. ⁶ Naie isoidicinona comini finua jira, naimiena naimaci ñnoñena jira, Jusiñamuidi naimacina duere finoite. ⁷ Naie isoide rafuedo jai jaidomoi. ⁸ Nana bie isoide rafuedo jaiñeno. Iciriñeno. Omoi ecimo itinona jeare finoñeno. Jiaie cominina jeare ñaiñeno. Jearede rafuena ñaiñeno. ⁹ Tainona lloñeno. Omoi comeciaino ite jeacino anamo jai itomoi. Naicino anamo omoi jai iñena jira, naicinodo jaiñeno; ¹⁰ iadedi jiaie rafuedo birui jaidomoi. Bie rafue omoi comeciaina marena itatate. Omoi comeciaino bie rafue itatacana jaillamona, Jusiñamui rafuena uiñocana jaidomoi. Naimie isoi omoi illena, naimie omoi comeciaina iese itatate. ¹¹ Cristo rafuedo birui omoi jailla jira, Jusiñamuimona nana creyentiaidomoidi daje isoidomoi. Dajerie judíuai itinodomoi. Dajerie judíuaiñedinodomoi. Dajerie judíuai isoi abina detatatinodomoi. Dajerie abina detatañedinodomoi. Dajerie abina uiñotinodomoi. Dajerie abina uiñoñedinodomoi. Dajerie patrón anamo itinodomoi. Dajerie patrón anamo iñedinodomoi. Cominimona iese itomoi; iadedi Jusiñamuimona daje isoidomoi. Cristo dibeimo omoi illa jira, jai amatiana eruaidomoi. Cristomo omoi duillacino jiaie rafue baiñemo faite. ¹² Jusiñamui omoina fetode. Omoi comeciaina maretate. Omoina isiruite. Ie jira jiaie cominina duenai. Jiaie cominina cano. Abi iedoñeno. Abi biriñeno. Iciriñeno. ¹³ Dani omoi ibana oñeno; iadedi bu diga omoi icirillafue ia, naiena raise fino. Iena raise finuanona, abido ietañeno. Iena feita. Ie mei naimie diga marena ñaino. Ero, cai Nama omoi jeacinona oni dotade. Ie muidona omoi ecimo itino diga icirillafue omoi finoia, iena feita. ¹⁴ Coninina omoi isiruicana jai. Isiruillacino nana jiaie lluacino baiñemo faite. Coninina omoi isiruia, danomo marena iitomoi. ¹⁵ Jusiñamui omoina fetua jira, Cristomo daajena jai duidomoi. Cristo omoi comeciaina uri itatajamona, nana comini diga uri i. Omoi comeciaino uri illamona, Jusiñamuimo iobillacinona feca. ¹⁶ Cristo rafuena omoi eo ñnuana jitaidicue. Naie rafuena coninimo omoi llofue. Iena raise uiñollena, coninina omoi cano. Nie isoide Jusiñamui rafuena omoi roia, Jusiñamuimo iobillacinona fecajanona, nana omoi comeciainomona iocire rono. David micori cuega salmos omoi roia, Jusiñamui Joreño omoina birui cuetataga ruana omoi roia, omoi comeciainomona iocire rono. ¹⁷ Buena omoi lloia, buena omoi maijia, cai Namamo omoi comeciaina facajano, iena fino. Cai Nama muidona, cai Moo Jusiñamuimo iobillacinona jiaie feca.

Coniniri creyentia illa rafue

¹⁸ Inirediñaiñuai, omoimo rafuena lloiacadicue. Cai Namamo omoi jainaiñaiñai jira, naimie jitailla jira, omoi iniñaiñai anamo raise omoi i. Naimaci uaina raise ñno.

¹⁹ Airedino, omoimo jiaie lloiacadicue. Omoi ainiaina isirui. Naiñaiñuai diga iciricabiñeno. Naiñaiñuaiimo riire lloñeno.

²⁰ Uruiai, omoimo rafuena lloiacadicue. Nana omoi mootiai uaina ñno. Nana omoi eiñaiñai uaina ñno. Iena omoi ñnoia, cai Nama eo iobite.

²¹ Mootiai, omoi uruiaina jamai icineno. Naimacina omoi jamai icia, comecina facaitimaci: “¿Niese cai mootiai uaina raise ñnoiticai? Iena eo sefuiruiticai”. Ie muidona omoi uaina raise ñnoñeitimaci.

²² Patrones anamo itino, nana omoi patrones ocuica uaina ñno. Omoimo naimaci eruaiñenia, omoi patrones facaina raise maiji. Cai Namana omoi ñnuua jira, cai Namana raise omoi iobitaiacana jira, omoi patrones facaina

raise maiji. ²³ Buena omoi maijia, omoi comeciamaona maiji. Dani comini facaina maijiñedomoi; iadedi cai Nama facaina maijidomoi. Ie jira raise maiji. ²⁴ Naimie jai llua isoi, cai Namamona ibana ico feiñoitomoi. Cai Nama Cristo facaina omoi maijidomoi; ²⁵ iadedi Jusiñamui raise maijiñedinona duere finoite. Jusiñamuimona naga maijidimie ie maijia diese feiñoite.

4

¹ Patrones, omoimo lloiticue. Naimaci omoi anamo illa jira, omoi diga maijedinona raise iba. Naimacina jifueño. Omoi Nama monamo illamona, omoimo eruaide. Naimie anamo omoi illa jira, omoi anamo itinona marena raise fino.

² Jusiñamui diga ñaicana jai; iadedi omoi comeciaina facajanona omoi jii. Naimiemo iobillacinona feca. ³ Cristo rafuena llocana cue jailla jira, cárcelmo birui iticue; iadedi naie rafue nia lloiacadicue. Jusiñamui nana comini Cristo dibeimo jai jitaillana lloiacadicue. Ie jira cai facaina omoi jii. Jusiñamuidi comini comeciaina jetajana omoi jii. Naimaci comeciaina Jusiñamui jetajamona, naimacimo naie rafuena lloiacadicue. ⁴ Naimaci iena raise cacaillena, naie rafuena raise lloiacadicue. ⁵ Creyentiañedino motomo omoi ia, marena omoi i. Naimacimo Cristo rafuena llono. ⁶ Bu diga omoi ñaia, caimare ñaino. Nie isoide Cristo rafuena omoimo bu jicanoia, raise marena fairio.

Damierie ie uaina orede

⁷ Tíquicodi nana cuemo ite rafuena omoimo lloite. Naimiena isiruiticai. Naimiedi Cristona eo ñnote. Cristo rafuena eo raise llocabite. Cai Nama facaina cue diga eo maijide. ⁸ Cai illana omoi uiñollena, omoi dine naimiena oredicue. Omoi comeciaina ocuiñotaite. ⁹ Naimie diga Onésimo jiai oredicue. Naimiedi creyente. Cristo rafuedo raise jaide. Naimiena jiai isiruiticai. Naimiedi omoi comini imie. Nana bene jai suide rafuena omoimo lloitiamaiai. ¹⁰ Cárcelmo Aristarco cue diga ite. Omoimo ie uaina orede. Marcos ie uai jiai orede. Naimiedi Bernabé ama. Omoimo naimiena navui lloticue. Omoi dine naimie ria, naimiena feiño. ¹¹ Jesús ie uai jiai orede. Naimie mameci jiaicidi Justo. Judíuaimona dani naimaci cuena canode. “Naimaci jeacinona naimaci fañonocaillamona, Jusiñamui ie dibeimo cominina jai jitaide” naimaci llumona, cue comecina ocuiñotadimaci. ¹² Epafra ie uaina jiai orede. Naimie omoi comini imie. Jesucristo dibeimo naimie maijide. Jusiñamui diga naimie ñaia, omoi facaina jaca duere jicabide. Jusiñamui rafuedo raise omoi jaillena, ie omoimo raise itabillena, Jusiñamui jitaillacinona omoi raise finollena, omoi facaina jicabide. ¹³ Omoi facaina naimie eo maijide. Laodiceamo itino facaina eo maijide. Hierápolismo itino facaina jiai eo maijide. ¹⁴ Cai médico Lucas ie uaina jiai orede. Naimiena isiruiticai. Demas ie uaina jiai orede. ¹⁵ Laodiceamo ite creyentiaimo cue uaina cue oretajana llono. Ninfasmo cue uaina cue oretajana llono. Naiñaiño jofomo oficabide creyentiaimo cue uaina cue oretajana llono. ¹⁶ Bie cartana omoi facaja mei, Laodiceamo ite creyentiaina bie cartana facata. Naimacimo jiaie cartana jiai oredicue. Iena omoi jiai faca. ¹⁷ Arquipomo llono: “Cai Nama fetocamedio. Naimie rafuena llocana raise o jai” llono. ¹⁸ Cue uaina omoimo oredicue. Dama bie uaina cueticue; iadedi nana bie carta cuemona illana uiñotomoi. Cárcelmo cue illana cue facaina feitaño omoi jii. Jusiñamui omoina duenaioillasa. Mai. Cue cuega rafue jai fuite. Pablodicue.

TESALÓNICAMO ITE CRISTONA HNOTINOMO PABLO NANO ORETAGA RABE

Uaiduacino

¹ Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiai uaina orediaimaiai. Cai Moo Jusiñamuimo, cai Nama Jesucristomo jai jainaidomoi. Ie jira iaimaiai omoi duenaillana uiñocana omoi jaillana jitaidicai. Iaimaiai omoi uri itatajana omoi uiñocana jaillana jiai jitaidicai.

Tesalónicamo ite creyentiai Jusiñamui uaina raise #notimaci

² Jusiñamuimo cai jüia, naimiemo omoi facaina iobillana jaca fecacabidicai. Omoi facaina jicabidicai. ³ Cai Moo Jusiñamuimo cai jüia, omoina comeciticai. Jusiñamuina #notomoi. Naimiena isiruitomoi. Ie jira naimie facaina duere maijidomoi. Cai Nama Jesucristo billemo eo ocuridomoi. Iese omoina comeciticai. ⁴ Omoina naimie isiruillamona, Jusiñamui omoina fetuana uiñotocai. ⁵ Jamai cai uaido Cristo rafuena omoina llofueñedicai; ia siño uaido iena llofueticai. Jusiñamui Joreño uaido iena llofueticai. Naie rafuena #nuanona llofueticai. Omoi diga cai jaie ia, nie isoi cai illana raise uiñotomoi. ⁶ Cai illa isoi ificaidomoi. Cai Nama illa isoi ificaidomoi. Iemona duere sefuidomoi; ia Jusiñamui Joreño omoina iocire itatajamona, Jusiñamui uaina iocire feiñotomoi. ⁷ Ie jira nana Macedoniamos ite creyentiai omoimona fueotimaci. Nana Acayamos ite creyentiai omoimona jiai fueotimaci. ⁸ Omoimona Macedoniamos ite comini cai Nama uaina fididimaci. Acayamos ite comini jiai fididimaci. Ailluena nairaiai Jusiñamuina omoi #nuana jai fididimaci. Ie jira naimacimo Cristo rafuena omoi #nuana jai lloñedicai. ⁹⁻¹⁰ Omoi dine nano cai ria, caimare caina feiñotomoi. Cristo rafuena omoi cacajamona, jiraraina sedajana fainonocaida, cajede nanoca Jusiñamuina jai sedadomoi. Jusiñamui Jito abido billemo birui jiai ocuridomoi. Iese jiaie creyentiai omoina birui ñaicabitimaci. Cristo fiodalilamona Jusiñamui naimiena jaie jillotate. Naimiena cai #nuamona, Cristo Jusiñamui ricailifuemona caina jai jillobitade.

2

Pablo Tesalónicamo llofui rafue

¹ Cue nabaiñiai, omoi diga jaie cai ia, tainomo jaiñedicai. ² Omoi dine cai nia riñenia, Filipomo iticai. Nainomo itinodi caina jeare finodimaci. Iena jai uiñotomoi. Caina jeare finodimaci; ia cai comecina Jusiñamui ocuiñotajamona, Jusiñamui rafuena omoina llofueticai. Ailluena comini iena jitañedimaci; ia iena llofueticai. ³ Unaiñedinona jaca llofueñedicai. Jearedicinona jaca llofueñedicai. Jifuerillacinona jaca llofueñedicai; ⁴ iadedi Jusiñamui uiñoganodicai. Ie jira caina naimie oretajamona, ie rafuena llofueticai. Cominina iobitallena llofueñedicai; iadedi Jusiñamuina iobitallena llofueticai, Jusiñamui cai comecina raise uiñua jira. ⁵ Cai llofuiacino diga omoina bifueñedicai. Omoimona ucube ollena, iese llofueñedicai. ⁶ Cominimona iobillacinona jitañedicai. Omoimona jitañedicai. Jiainomona jiai jitañedicai; iadedi Cristo oretaganona cai illa jira, cai jitaia, omoimona iobillacinona jicaredicai. ⁷ Uruiaina raise sedaraño isoi, fecuise omoina llofueticai. ⁸ Jusiñamui rafuena omoi raise uiñollena, omoina cai eo isiruillamona, niadedi omoi facaina fiodaicadicai. ⁹ Omoi motomo cai ucube ollena, jiaie rana

maiñuidicai. Omoina cai duere finoñellena, nagarui iese maiñuidicai. Iena raise uiñotomoi. Iese Jusiñamui rafuena omoina llofueticai.

¹⁰ Omoi motomo cai illana raise uiñotomoi. Jusiñamui jitailla isoi, nainomoi iticai. Maraiñede rafuena finoñedicai. Mare rafuedo jaca jaidicai. Iena uiñotomoi. Jusiñamui iena jiai uiñote. ¹¹ Omoi uruiaí omoi llofua isoi, omoina llofueticai. Omoimo diga icaiño Jusiñamui rafuena llofueticai. ¹² Jusiñamui jitaillacinona omoi finollena, iena llofueuidicai. Monamo ie cominina sedajanomo omoi jaca illena, naimie omoina jai fetode. Nainomoi ie siño uai anamo jaca iitomoi.

¹³ Jusiñamuimo cai jiaa, omoi facaina iobillacinona fecacabidicai. Jusiñamui rafuena caimona omoi jaie cacajamona, iena raise feiñotomoi. Cominimona cai oga rafue isoi feiñoñedomoi; ia Jusiñamuimona cai oga rafuena feiñotomoi. Cai lloga rafue omoi comeciai iuai meidocana jaide. Ie jira Jusiñamuimo iobillacinona fecacabidicai. ¹⁴ Judeamo ite creyentiai isoi duere sefuidomoi. Omoi cominimona duere sefuidomoi. Naimaci judíuai cominimona duere sefuidimaci. ¹⁵ Judíuai comini cai Nama Jesúna jaie meinetimaci. Jusiñamui facaina lloraini micoraiña jiai jaie meinetimaci. Caina jiai birui duere finodimaci. Jusiñamuina iobitañedimaci. Jusiñamui rafue dibeimo jiai iñedimaci. ¹⁶ Judíuaiñedinomo Cristo rafuena cai lluaña jitañedimaci. Jusiñamui judíuaiñedinona jillotajana jitañedimaci. Iese jeacino finocana nia jaidimaci; ia ja muidomoi Jusiñamui ricailifue anamo jai itimaci.

Tesalónica comini dine Pablo abido jaiacade

¹⁷ Omoimona cai billa mei, nigarui illanona, omoina dane cioacadicai. Omoina cioiñedicai; iadedi omoimo comecina facadicai. Omoi dine eo jaiacadicai. ¹⁸ Ua eo jaiacadicue. Diga icaiño jaiacadicai; ia Taife cai jaillana jitañede. ¹⁹⁻²⁰ Caina omoi jaca iobitaja jira, omoina cioacadicai. Jesús abido bia, naie facaise omoiri eo iobiticaí. Iemo ocuridicai. Caina iocire itataitomoi. Omoi muidona iobiticaí.

3

¹ Cai comeci jarire illamona, Atenas railla nairaímo fiebidicoco; ² iadedi Timoteo omoi dine oredicoco. Naimiedi coco ama isoide. Cristo rafuena cai diga Jusiñamui facaina llofuecabite. Cristo rafuena omoi raise inotallena, omoi comeciaina ocuiñotallena, naimiena oretaticoco. ³ Duere sefuillamona bu bie uai sefuiruillana jitañedicai. Creyentena cai illamona, jaca duere cai sefuillana uiñotomoi. ⁴ Omoi motomo jaie cai ia, iena llofueticai. Omoi birui duere sefuillamona cai lluaña raise uiñotomoi. ⁵ Cue comeci jarire illamona, Cristona omoi inuana raise uiñoiacadicue. Omoina Taife ramo faicabillamona, tainomoi cai maiñiana jacinaiticai. Ie jira Timoteona oredicoco. ⁶ Omoimona Timoteo jai abido billamona, omoie mare rafuena cocomo llote. Cristona inocana jaidomoi naimie llote. Coninina isiruitomoi. Cocona caimare comecitomoi. Omoina coco cioacana isoi, cocona dane cioacadomoi naimie llote. ⁷ Birui duere sefuidicai; iadedi omoie rafuena cai cacajano, cai comeci marena ite. ⁸ Cristo rafuena inocana omoi jallana jai cai uiñuamona, cai comeci marena ite. ⁹ Omoiri eo caimare jai iticai. Ie jira Jusiñamuimo iobillacinona eo feaacadicai. ¹⁰ Omoina dane cai cioillena, naimiemo nagarui jidicai. Naimiena nia omoi raise inoñenia, omoina naimiena raise inotaacadicai. Ie jira omoina cioacadicai. ¹¹ Iese omoi facaina, cai Moo Jusiñamuimo, cai Nama Jesúmo jicabidicai. Omoi dine caina naimie oretajana jidicai. ¹² Cai Nama coninina isiruitacana omoi jaillana jitaídicaí. Caina omoi isiruilla isoi, nana jiañona omoi isiruillana jidicai. ¹³ Omoi comeciaina ocuiñollena, omoi comeciaina Jusiñamui jitailla isoi, marena

illena jiidicai. Nana ie comini diga cai Nama Jesús abido bia, Jusiñamui dine omoi ia, omoi comeciai marena illena jitaidicai. Iese omoi facaina jicabidicai.

4

Naimaci marena illena llofuet

¹ Jiaie rafuena lloiacadicue. Cai Nama Jesúmo omoi jai duilla jira, Jusiñamui jitailla isoi omoi illana jitaidicai. Iese birui itomoi; ia nagarui iese omoi illana jitaidicai. Ie jira cai llua isoi, omoi jai. ² Cai Nama Jesús jitailla jira, navui iena llofueticai. ³ Jusiñamui jitailla isoi omoi marena illena, omoi aiñede riño diga iñeno. ⁴ Nagamiai riñona ie aina otene, mare; ia maraiñede rafuena finoño. Nagamiai dajena daje riño uana Jusiñamui jitaide. Dañaiño diga iaiaiaia jionaillena jiai jitaide. ⁵ Naimiena ñoñedino isoi, omoi ai uana jitañede. Naiñaiñuai abina jamai cioillena riñona otimaci. ⁶ Jiaie creyentemo jeacinona finoño. Naimie aina jamai aifiedoño. Naie isoide rafuena bu finoia, cai Nama naimiena duere finoite. Iena navui omoimo lloticue.

⁷ Jearede rafuena cai finollena, Jusiñamuidi caina fetoñede; iadedi mare rafuena cai finollena caina fetode. ⁸ Bie llofuiacino nie creyente ñoñenia, cue llofuiacinona jamaide; ia Jusiñamui Joreño naimiemo illamona, Jusiñamui llofuiacinona jiai jamaide. ⁹ Jiaie creyentiaina omoi isiruillana omoimo eo lloñeiticue. Jusiñamui omoina coninina isiruillana jai uiñotade. ¹⁰ Nana Macedoniamos ite creyentiaina jai isiruitomoi; iade nia isiruicana omoi jai. ¹¹ Uri omoi i. Dani omoimo ite rafuena omoi uiuicai. Jiainomona ucubena jicañeno; ia omoi ucube ollena, omoi onolli diga rairuioicaiñeno omoi maiji. ¹² Ie mei omoi jitailla ra iite. Iemona Cristona ñoñedino omoina jiai mameriñeitimaci.

Jesucristo dane abido billena llote

¹³ Omoi raise uiñollena, daje rafuena lloiticue. Omoi creyentiamona dajerie jai fiodaitimaci. Jesúna ñoñedinomona bu fiodaia, fiodaillamona jilluamo naimaci ocuriñena jira, sunaitimaci; iadedi naimaci sunailla isoi, omoi illana jitañedeticue. Fiodaillamona jilluamo jai ocuridomoi. ¹⁴ Jesús fiodaillamona naimie jilluana ñoticaia. Ie jira Jesús abido billa facaise, jai fiodaite creyentiaina Jusiñamui jilloitajana jiai jai ñoticaia. ¹⁵ Cai Nama llofui isoi, bie rafuena lloiticue. Jesús abido bia, jai fiodaite creyentiaia, nia fiodañede creyentiaia diga, daacaiño naimie dine a jaiticaia. ¹⁶ Cai Nama Jesús abido bia, Jusiñamui dinena naimie billanona, caina jidaite. Ie jaienici caina uaidoite. Jusiñamui ie trompeta daacaiño jiai fiite. Jai fiodaitino nano jilloitimaci. ¹⁷ Iemei nia fiodañedinodi como jillodino diga uillie motomo naimiemo dafañillena, Jesús caina uite. Iemei naimie diga jaca iticaia. ¹⁸ Bie llofuiacino diga conini comeciaina omoi ocuiño.

5

¹ Bie rafue suilliruina uiñoñedicaia. Bie rafuena omoi jai uiñua jira, iena dane eo cueñeiticue. ² Cai Nama abido billana jai uiñotomoi. Fñredimie naiona ebena billa isoi, naimie abido biite. ³ “Uri iticaia. Marena iticaia” Cristona ñoñedino raia, naie facaise naimacimo duere sefuillifue suite. Urue riño jigicomos casilla isoi, ebena suite. Naiemona jilloñeitimaci. ⁴ Naie facaise sua, Cristo billena omoi jai uiñuamona, fñredimie naiona ebena billa isoi, jacinaiñeitomoi. Cristona ñoñedino isoi, iñedomoi. ⁵ Uanaicinona omoi jai uiñuamona, Cristo ie cominina jai jaidomoi. Jeacino anamo omoi jai iñena jira, Cristona ñoñedino dibeimo jai duiñedomoi. ⁶ Ie jira abina sedacana omoi jai. Abina rairuioicaida omoi jai. Jifaidino isoi ebena omoi jaiñeno. ⁷ Cristona ñoñedino abina sedacana jaiñedimaci. Rairuioicaida ebena

jaidimaci. ⁸ Cristo ie cominina jai cai illa jira, ebena cai jaiñena. Imaci abina ridollena, soldaduai jogobe icodi ite. Imaci ifogi icodi jiai ite. Ie isoide. Cai comeciaina eenollena, Cristona ñnocana mai cai jailli. Jiaino isiruicana mai cai jailli. Jusiñamui dine ico cai illemo ocuiricana mai cai jailli. ⁹ Caina duere finollena, Jusiñamui caina fetofede; iadedi cai Nama Jesucristo finoca rafue muidona, duere finollemona cai jilloillena, caina fetode. ¹⁰ Cristo cai facaina jai fiodaite. Ie jira birui cai fiodaia, naimie bille facaise nia fiodañedinona cai ie, naimie diga jaca iitica. ¹¹ Ie jira coninina ocuiñotacana omoi jai. Cristo ðibeimo coninina itatacana omoi jai. Iese birui jaidomoi; ia nia iese omoi jai.

Omoi creyentiaina llofueraini uaina ñno

¹² Cue amatiai, jiaie rafuena lloiticue. Omoi creyentiaina llofueraini uaina ñno. Cristo jitailla jira, omoi afemo itimaci. Cristo ðibeimo omoina raise itatallena, omoi facaina llofuetimaci. ¹³ Omoina naimaci canua jira, naimacina isiruillanona, naimaci uaina raise omoi ñno. Coniniri uri omoi i. ¹⁴ Omoi motomona maijacaiñedinona imaci maijillesa oculi. Duere sefuillamona jai comecina ocuiñonidinona comecina ocuiñota. Raise ñnollena, Cristona nia raise ñnoñedinona jiai cano. Fecuisse naimacina ui-uillanona, naimacina cano. ¹⁵ Omoina jaimie duere finoia, ðbana oñeno; iadedi naimiemo mare rafuena fino. Nana cominimo mare rafuena fino. ¹⁶ Nie isoide rafue omoimo ia, caimare omoi i. ¹⁷ Jusiñamuimo nagarui jii-jii. ¹⁸ Nie isoide rafue omoimo ia, Jsuiñemui jitailla jira, naimiemo iobillacinona feca. Jesucristomona Jusiñamui jitaillacinona jai uiñotica. ¹⁹ Jusiñamui Joreñaonajamañeno. ²⁰ Jusiñamui Joreño uaido lloraini llofuiana jamañeno; ²¹ iadedi Jusiñamui Joreño uaido naimaci llofuiana facaci. Mare rafuedo jaca omoi jai. ²² Nana marañede rafuemonona eneno oni omoi i. Naie isoide rafuena omoi abimo omoi oñeno. ²³ Ie jira Jusiñamuimo omoi facaina jiiiticue. Naimie omoina jai uri itatate. Naimie omoina nagarui marena itatacana jaillana jitaidicue. Iese omoi jaia, cai Nama Jesucristo dane abido bille facaise, naimie jitailla isoi, omoi comeciai marena iite. ²⁴ Jusiñamuidi ñnogamiena jira, iese omoina finoite.

²⁵ Cue amatiai, Jusiñamuimo cai facaina omoi jicabi. ²⁶ Cue facaido nana creyentiaina caimare uaido. ²⁷ Cai Namamo cai duilla jira, naimie jitailla jira, bie cartana nana creyentiai uicomo faca. ²⁸ Cai Nama Jesucristo omoina duenaillasa. Mai. Pablodicue.

TESALÓNICAMO ITE CRISTONA HNOTINOMO PABLO IE EDOMOMO ORETAGA RABE

Uaiduacino

¹⁻² Tesalónicamo ite creyentiaí, omoímo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiaí ite. Iaimaiaí uaina orediaímaiaí. Cai Moo Jusiñamuimo, cai Nama Jesucristomo jai jainaiáidomoi. Ie jira iaimaiaí omoi duenaillana uiñocana omoi jaillana jitaídicaí. Iaimaiaí omoi uri itatajana omoi uiñocana jaillana jiaí jitaídicaí.

Cristo dane abido bia, naimiena #noñedinona duere finoite

³ Jusiñamuimo cai jiaí, omoi facaina naimiemo iobillacinona fecacabidicaí. Cristona #nocana raise jaidomoi. Coniniri isiruicana raise jaidomoi. ⁴ Ie jira marena omoi illana jiaíe creyentiaí illanomo llocana uiticaí. Duere sefuidomoi; iadedi danomo abido jaiñedomoi. Cristona #nocana jaidomoi. Iena llocana uiticaí. ⁵ Jiaínomona birui duere sefuidomoi; ia #nocana jaidomoi. Iemona Jusiñamui omoi facaina illana uiñoticaí. Omoi duere sefuillamona, fueocana jaidomoi. Iemona naimie jitailla isoi, ja muidomo monamo ie cominina sedajanomo iitomoi.

⁶ Jusiñamui omoína duere finodinona ico duere finoite. Omoi facaina ibana oite. Iese naimie finoa, naimiemono mare. ⁷ Cai Nama Jesús abido bia, duere sefuillamona jilloiticaí. Monamona ie siño jaienisaí diga biite. Irai boua isoi ana biitimaci. ⁸ Jusiñamuina #noñedinona diese duere finoitimaci. Cai Nama Jesús rafuena naimaci #noñena jira, naimacina duere finoitimaci. ⁹ #noñena jira, jaca faifitimaci. Jaca legi cacaitimaci. Jusiñamui illanomo jaca iñeitimaci. Ie ebirede uaina uiñoñeitimaci. ¹⁰ Cristo bille facaise naimiemo iobillacinona fecaiticaí. Naimieri nana naimiena #notino rajicaitimaci. Omoímo cai lloga rafuena omoi jai #nua jira, iese iitomoi.

¹¹ Ie jira omoi facaina jicabidicaí. Naimie jitailla isoi, omoína naimie marena itatajana jidicaí. Omoína naimie fetuamona, ie uaido mare rafuena #nocana omoi jaillana jidicaí. Ie uaido naimiena #nocana omoi jaillana jidicaí. ¹² Iese omoi jaillemona, naimie abido bille facaise naimiena iobitaitomoi. Omoiri naimie jiaí iobite. Jusiñamui, cai Nama Jesucristo diga, caina duenaillamona iese iiticaí.

2

Jesucristo abido bille rafue

¹ Cai Nama Jesucristo abido billena lloiacadicue. Naimiemo ico cai dafaifillena jiaí lloiacadicue. ² “Cai Nama jai abido bite” raillana omoi cacaia, raire jarire iñeno. Rucaicueriñeno. “Jusiñamui Joreño iena cuemo jai llote” damie raia, iena #noñeno. Nie lloraíma iena lloia, iena #noñeno. “Pablomona cue feiñoga carta iena llote” damie raia, iena #noñeno. ³ Naie isoide rafue diga omoína jiaíno jifueiacania, iena #noñeno. Cai Nama nia biñena facaise, eo ailluena comini naimiena enoitimaci. Iemei Taife dinena damie biite. Ja muidomo naimie faifite; ⁴ iadedi nano jiaíe rafuena finoite. Taife dinena naimie billanona, jiraraí baifemo iacanite. Jerusalémo Jusiñamui jofomo illanona, “Jusiñamuidicue” raite. ⁵ Omoi dine navui cue ia, bie rafuena omoímo lloticue. ⁶ Jusiñamui Joreño naimie nia billena rairuillana jai uiñotomoi. Jusiñamui jitaillirui facaise naimie biite. ⁷ Taife maraiñede rafuena birui bainino finotate. Jusiñamui Joreño naimiena maraiñede rafuena birui marefodo

finuana rairuide. Jusiñamui Joreño naimie rairuiñena mei, ⁸ Taife dinena maraiñedimie biite; ia cai Nama Jesús abido ebire bia, firaiñuamona naimiena meineite. ⁹ Cai Nama Jesús nia abido biñenia, comini jifuellena, Taife uaido bie maraiñedimiedi diga siño rafuena finoite. ¹⁰ Comina eo maraiñedinodo jifueite. Naie comini ico faifitimaci. Jusiñamui ie uanaicinona naimaci ñnoñena jira, jilloiacaiñeitimaci. ¹¹ Ie jira Jusiñamui naimacina tainocinona ñnotaite. ¹² Jusiñamui ie uanaicinona naimaci ñnoñena jira, maraiñede rafuena naimaci ebiruilla jira, Jusiñamui naimacina duere finoite.

Jusiñamui omoina jai fetode

¹³ Jusiñamuina ñnoñedino isoi Jusiñamui omoina duere finoñeite. Naimie omoina jai fetua jira, naimiemo iobillacinona jaca fecacabidicai. Omoi jilloillena, nano dofoconi omoina fetode. Ie Joreño uaido naimie jitaillacinona omoi finollena, naimie uanaicinona omoi ñnuamona, omoina fetode. ¹⁴ Ie rafuena cai llumona, Jusiñamui omoina jai jillotate. Iemona cai Nama Jesucristo ebirede illanomo jaca iitomoi. ¹⁵ Ie jira, Cristona ñnocana omoi jai. Cai llogacinodo omoi jai. Iena caimona jai cacadomoi. Cai cartamona iena jiai cacadomoi. ¹⁶ Omoi facaina cai Nama Jesucristomo, cai Moo Jusiñamuimo, jicabidicai. Naimie caina isiruite. Cai comeciaina jaca ocuiñotade. Caina duenaillamona naimie lloga rafue suillemo raise ocuiridicai. ¹⁷ Naimie omoi comeciaina nia ocuiñotallena jidicai. Nie isoide rafuena omoi finoia, naie rafue omoi marena finollena jidicai. Buena omoi ñaia, omoi marena ñaillena jiai jidicai.

3

Cai facaina omoi jiana jitaidicai

¹ Daje rafue nia lloiacadicue. Cai facaina omoi jiana jitaidicai. Cai Nama rafue llocana jaillana jitaidicai. Omoi ñnua isoi, jiaño ñnuana jiai jitaidicai. ² Maraiñedinomona cai jillobillena, omoi jiana jitaidicai. Ailluena comini Cristona ñnoñedimaci; ³ ia cai Nama jaca ñnogamie. Omoi comeciaina ocuiñotaite. Maraiñedinomona omoina eenoite. ⁴ Cristomo cai duilla jira, cai llogacinona omoi jai ñnuana jai uiñotacai. Iena nia ñnoitomoi. ⁵ Cai Nama Jesús omoina Jusiñamui omoina isiruillana uiñotajana jitaidicue. Cristo duere sefuide; iadedi ie Moo jitailla rafuena sefuiruiñeno finocana jaide. Iese Jusiñamuimo omoi facaina jaiticue.

Maijuillasa

⁶ Cai Nama Jesucristo jitailla jira, jiaie rafuena nia lloiticue. Jiaie creyente maijiacaiñenia, naimie diga eo nabairiñeno. Iena navui omoimo lloticue; ia damerie iese ia, naimaci diga eo nabairiñeno. ⁷ Caimona fueo. Navui omoi motomo iticai; ia cai ucube ollena, jaca maijidicai. ⁸ Guillena ibaño guñedicai; ia nagarui eo maijidicai, omoina duere cai finoñellena. ⁹ Cristo facaina cai maijia jira, omoimona ra jamai cai jicallena, caimo uai ite; iadedi caimona omoi fueollena iese jicañedicai. Omoi ra ollena, omoi maijiana jitaidicai. ¹⁰ Navui omoi motomo cai illa facaise lloticai: “Bu maijiacaiñenia, guñena”. ¹¹ Omoi motomo damerie jai maijiñenana jai fididicai. Maijiñeno jai itimaci. ¹² Cai Nama Jesucristomo cai duilla jira, naie isoidinomo maijillena lloticai. Uainino maijiamona ucube naimaci uana jitaidicai. ¹³ Cue amatiai, nie isoide mare rafuena finollena sefuiruiñeno. ¹⁴ Cue jai cuega cartamo ite rafuena bu ñnoñenia, nana creyentaina naimiena uiñota. Naimie meidaillena, naimie diga nabairiñeno. ¹⁵ Naimiena enoiñeno; ia creyentena naimie nia illamona, naimiena fecuise llofue.

Fuiduacino

¹⁶ Cai Nama omoi jaca uri itatajana jitaidicai. Naimie omoi diga jaca iite. ¹⁷ Cuenanollena, naimiemo cue llua isoi, jaimie bie carta cueda; iadedi cue mameci buene dama cueticue. Nana cartamo iese cue mamecina cueticue. Pablodice. ¹⁸ Cai Nama Jesucristo nana omoina duenailasa. Mai. Macaibaite.

TIMOTEOMO PABLO NANO ORETAGA RABE

Pablo Timoteona uaiduacino

¹⁻² Timoteo, bie carta omo cueticue. ¿Nigacino? ¿Nie isoidio? Pablodícue. Cristo Jesús oretagamiedícue. Ie rafue lollena, naimie cuena orede Naimiena cue cioillena, naimie isoi cue illena, naimie abido billemo ocuridícue. Jusiñamui cuena jiaí orede. Naimiedi cai jilloitaraíma. Cue llofuiacínomona Cristona o raise inua jira, cue jito isoi cue mamecao. Cai Moo Jusiñamui, cai Nama Jesucristo diga, ona jai duenaite. Iena uñocana mai o jai. Ona jai uri itatatiamaiaí. Iena uñocana mai o jai.

Cristo rafuena tainona llofueraíni llofuiacínodo jaiñeno

³⁻⁴ Macedoniamó jaie jaidícuemo, Efesomó o fiebicaillena omo llotícue. Nainomó dajerie Cristo rafuena raise llofueñedímaci; iadedi jiaíforie llofuetímaci. Diga igaiaina faca-facadímaci. Imaci usumatiaí mamecido siadocabitímaci. Iemona conini uaina uaitasíde. Jusiñamui jitailla isoi comini marena illana llofueñedímaci. Jusiñamuina cai inuamona, marena itícaí. Iena llofueñedímaci. Ie jira naimaci uaina llicaita. ⁵ Jusiñamuina comini isiruillena, jiaíe cominina jiaí naimaci isiruillena, Jusiñamui uaina llofuetícaí. Naimaci comeciaí jeaninana jitaídicaí. Jusiñamuina raise naimaci inuana jiaí jitaídicaí. Ie jira Jusiñamui rafuena llofuecabitícaí. ⁶ Dajerie llofueraíni iese llofueñedímaci; iadedi jamai ñaitímaci. ⁷ Moisés micorí jaie llogacínuaído llofueiacadímaci; iadedi iena llofuiana uñoñedímaci. Naie llogacínuaína ua uñoñedímaci.

⁸ Iena raise llofuegana, Jusiñamuina uñoñedinona naimiena uñotallena, mare. Iena uñotícaí. ⁹⁻¹⁰ Moisés micorí llogacínuaídi mareuidinomo jainaiñede. Jainomó jainaiáide: Jusiñamui uaina inoñedinomo lloga uaina inorainidinomo, Jusiñamuina jitaíñedinomo, jeacino finorainimo, jeare ñaicabitinomo, Jusiñamuina enoidinomo, eina meinetinomo, moona meinetinomo, jiaíe cominina meinetinomo, añede riño diga itinomo, iniñede ima diga itíñaiñuaimo, daje isoide ima diga conini aifuedotinomo, comena fíidinomo, taino llorainimo, taino lluaña jifueridinomo, uanaí rafue facaisena iñedinomo. Nana Cristo rafue facaina iñedinomo Moisés micorí llogacínuaí ua jainaiáide; ¹¹ ia naie rafue cuemo jai jainaiñede. Ie mare rafuena cue lollena, Jusiñamui cuena jai orede. Maremiena Jusiñamui illamona, naimie rafue jiaí eo ebirede.

Jusiñamui caína duenaila jira, Pablodí iobide

¹² Cuena fetua jira, cai Nama Cristo Jesúri iobidícue. Naimiena cue inollena, naimie cuena uñuamona, cuena fetode, naimie rafue cue lollena. Iena lollena, cue comecina jiaí ocuiñotade. ¹³ Jaie naimiena jeare ñaitícue. Naimiena inotinona jiaí duere finodícue. Abina cue uñoñena jira, naie facaiseconí naimiena nia cue inoñena jira cuena duenailamona, naimie cuena fetode. ¹⁴ Cuena eo duenaite. Iemona naimiena inotícue. Naimiena jiaí isiruitícue.

¹⁵ Bie lluaí mare cue uñuamona, nana comini buena inuana jitaídícue. Marañedinona naimaci jeacínomona jilloitallena, eniruemo Jesucristo bite. Ero, nanoca jeacínona finoraímadícue; ¹⁶ iadedi Jesucristo cuena duenaite. Naimiena cue inuamo jaie fecuise ocuride. Nana jeacínona finorainimo fecuise ocuride, naimiena inollena. Naimiena cai inuamona, Jusiñamui diga jaca iitícaí. Cuena duenaila jira, biruimona naimiena inoitinodí naimie

naimacina duenaillana uiñoitimaci. ¹⁷ Jusiñamuidi nanocamie. Jaca fioldaiñeite. Naimiena cionidicai. Naimie damiede. Jiaiena iñede. Naimiena jacobicabillasa. Iena jitaidecue.

¹⁸ Ero, Timoteo, cue jito, omo rafue lloiacadicue. Nano o llofueraimana jaiacana facaise ailluena Cristo rafuena llofuerañidi ona jaie llotimaci: “Naimie raise marena llofueite” llotimaci. Iena comecianona, o comeci ocuiñocana o jai, Cristo rafuena riidocana o jaillena. ¹⁹ Cristona ñnocana o jai. O comecina marena finocana o jai. Dajerie naimaci comeciai iuaimo comeciaina facañedimaci. Ie jira Cristona jai ñnoñedimaci. ²⁰ Iese ite Himeleo. Alejandro jiai jai daje isoide. Jai ñnoñediaimaia. Ie mei iaimaiaina Taife anamo jai itabicaítaticue, duere sefuillena. Iaimaia fueollena, Jusiñamuina jeare ñaiñellena, iese itabicaítaticue.

2

Nana comini facaina jiiiticaí

¹ Diga rafue omo lloiticue; iadedi daje rafue motomo ite. Nanoca rafue. Iena omo lloiticue. Jusiñamui diga omoi ñaia, nana comini facaina jii. Naimaciri iobillacinona Jusiñamuimo feca. ² Uri cai illena, Jusiñamuina raise cai sedallena, Jusiñamui jitailla rafuena cai finollena, illaicomini facaina cai jii. ³ Iese cai jiiia, Jusiñamuimona mare. Naimiedi cai Jilloitaraima. ⁴ Naimiedi nana comini naimaci jeacinomona jilluana jitaide. Uanaicinona naimaci uiñuana jiai jitaide. ⁵ Nana nairaiaí imaci Jusiñamuidi jaca dajede. Comini diga Jusiñamui facaisena ñairaima jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaima jaca dajede. Naimiedi Cristo Jesús. Naimie imanana, comini facaisena ñairede. Ie muidona comini diga Jusiñamui jai nabairede. Jusiñamui diga comini jiai jai nabairedimaci. ⁶ Cai jeacinomona cai eneno illena, Jesucristo nana cai facaina jai fiodaite. Naimie jitailla facaiseconi Jusiñamuidi cominina bie rafuena jai uiñotade. ⁷ Bie rafue cue llollena, Jusiñamui cuena fetode. Judíuainedíno mo cue llollena, bie rafue naimaci ñnollena, uanaicinona naimaci uiñollena, cuena orede. Tainona lloñedicue.

⁸ Ie jira naga roracomo ite iñiaí, cai comini onolliaí a ñuitacabilla isoi, comeciaino jeacino iñenanomona, Jusiñamuimo jiiiana jitaidecue. Naimaci comeciaino icirillacino iñedemo, Jusiñamuimo jii. Naimaci comeciaino uaitajacino iñedemo, Jusiñamuimo jii. ⁹⁻¹⁰ Riñoniaimo jiai lloiticue. Roracomo omoi jaia, abi ieduamo comeciaina facañenamona, omoi ifotiena fino. Jamai ebinai raillano, abi ieduamona abina finora jitañeno. Jamai ebinai raillano, abi ieduamona eo raifide ñiroina jitañeno; iadedi mare rafuena omoi finuamona, ebinaitomoi. “Jusiñamuina ñnoticaí” omoi raillanona, naimie jitailla isoi, marena omoi finolle. ¹¹ Rollena comini ofia, ñaiñenanomona, uaitañenamona omoi fueo. ¹² Omoi ofia, omoi iñiaina llofuiana jitañedicue. Nainomo omoi ñaiñena. Iñiaí omoi anamo illana jitañedicue. Iese omoi riñoniaimo lloiacadicue. ¹³ Jusiñamui Adán micorina nano finua jira, iese lloticue. Adán micori finua mei, Eva micorina jiai finode. ¹⁴ Taifedi Adán micorina jifueñede; iadedi Eva micorina jifujete. Ie mei naie riño jeacinona finode. ¹⁵ Iemona jilloite; iadedi uruiaí jococana jaite. Riñoniaídi Jusiñamuina ñnoia, jiaie cominina isiruia, Jusiñamui jitailla rafuena finoia, ie abina eenoia, jilloitimaci.

3

Creyentiaina sedaraini illa rafue

¹ Bicinodi uanaicino. Creyentiaina llofueraimana bu jaiacania, naimie comecimo mare jitaillacino ite. ² Bie isoide llofueraimana jaiacadimiena jitaidicue. Naga comini naimie mare raillamie. Dañaiñona airedimie. Abi eenotimie. Ebena iñedimie. Inogamie. Jiaie comini naimie jofomo riadedi, raise nafuecabitimie. Jusiñamui uaina raise llofuecabitimie. ³ Jifairuiñedimie. Fuirirainidimie. Raire icirirainidimie. Ucubena nicidoñedimie. ⁴ Naimie cominina raise sedadimie. Naimie anamo naimaci illanona, naimie urui ai ie uaina raise inotadimie. Ie isoidimie llofueraimana jaillana jitaidicue. ⁵ Iese naimie iñenia, ie anamo itinona naimie raise sedañenia, ¿niese jiaie creyentiaina raise sedaite? ⁶ Como creyentena jaidimiena creyentiaina llofueraimana fetohenno, naie diga naimie abi iedoi raillano. Abi ieduamona, Taife isoi jecino finoite. ⁷ Llofueraimana jaiacadimiena creyenteñedino: “Mare” raiñenia, naimiena fetohenno. Iese naimiena raiñenia, naimie joreñona jeare ñaitimaci. Iemei Taife ramo jiaí faite, naimie abido danomo uaillena. Ie muidona naimie uaina jaca cacarefiñeitimaci.

Diáconuai illa rafue

⁸ Diáconuai creyentiaí llofueraíni isoi marena illa. Inouiganona illa. Jifairaieñena. Ucubena nicidoñena. ⁹ Naimacidi Cristona caí inua rafuena jeanide comeciaimona inua. ¹⁰ Bu omoi fetocania, naimacina nano facaci. Roracomo jiaie rana nano maijita. Iena raise finoa, diáconuaina jaite. ¹¹ Diáconuai ainiaí jiaí inogañaiñuaina illa. Jiaie comini joreñona ñaiñena. Jirorainina. Naga rafuena marena raise finua. ¹² Nana diáconuai aidi dañaiñoriede. Diáconuai urui ai naimaci uaina raise inua. Diáconuai imaci anamo itinona raise sedajana uiñua. ¹³ Diáconuai marena maijiia, comini naimacimo iobillacinona fecaitimaci. Cristo Jesúna inuano, naimiena marefodo jiaí lloitimaci.

Jusiñamuina inotino

¹⁴ Timoteo, raire o dine jaiacadicue; iadedi uicodo bie rafuena omo cueticue. ¹⁵ Are cue riñenia, dani omoi creyentiaí diese ofia, Jusiñamui ie cominina marena omoi illana omoi uiñollena, omo cueticue. Cajede Jusiñamuina jai sedadicaí. Uanaicinona riidoticaí. ¹⁶ Jusiñamui caína Cristona jai uiñotagafuedi jiaie rafue baifemo faite. Iena caí uiñuanona, raiticaí: Eniruemo Cristodi imana jai bairede. Jusiñamui Joreñodi caína naimie uai siñonana uiñotade. Jusiñamui jaienisaí naimiena jiaí ciodimaci. Jiaie nairaiaimo naimiena lloticaí. Iena cacajamona, ailluena cominidi diga nairaiaimona naimiena birui inotimaci. Monamo naimie abido jai jaide.

4

Jianodi jiaiforie rafuena lloitimaci

¹ Jusiñamui Joreño caímo raise llote: “Jesucristo nia abido biñena facaiseconi damerie creyentiaí Cristona fainonocaitimaci. Taife dibeimo ite lloraini llwana cacarefillamona, Janabamona ite llucinodo jaitimaci. Taifemona ite llucinodo jaitimaci”. ² Naie llorainidi: “Uanaicinona lloticaí” raitimaci; iadedi taino llocabiitimaci. Naimaci comeciaí jai tainomo iite. ³ Ima riño ie aina ollena rairuitimaci. Riño ima ie inina ollena rairuitimaci. Dajerie guille rana fimaidoitimaci. Jusiñamui iena fimaidoñede; ia creyentiaí uanaicinona uiñuanona, iobillanona guillena, naimiedi naga rana finode. ⁴ Nana Jusiñamui comuitaga guille radi mare. Iobillano iena caí feiñuanona, guiticaí. ⁵ Jusiñamui

lua jira, Jusiñamuimo cai jiiia, nana guille radi jai mare. Iemona maraiñede rafue jaca caimo comuiñeite.

Jesucristo rafuedo raise #nocana jai

⁶ Timoteo, cue lluaña creyentiaimo o lloia, Jesucristo dibeimo raise maijidio. Cristo uaina #nocana o jailla jira, mare llogacinodo o jailla jira, raise maijidio. ⁷ Jamai rafuemo, jamai #gaaimo o comecina facañeno; iadedi Jusiñamui jitailla rafuena finocana o jai. ⁸ Mairillena o abi llarocaiadedi, mare; iadedi Jusiñamui rafuena o facajia, eo mare. Abi llarocaja baifemo Jusiñamui uaidi eo faite. Jusiñamui rafuedi o comecina birui ocuiñotaite. Jusiñamui dine jiairuido o jaillena, o comecina marena jiai raise finotaite. ⁹ Bie lluacínodi uanaicino. Ie jira iena cai #nua. ¹⁰ Cai jillobillena, cajede Jusiñamuimo ocuridicai. Ie jira duere sefuillano maijidicai. Jeacinomona Jusiñamuidi nana cominina jillobitaacade. Naimiena #notinona jai jillotate.

¹¹ Nana creyentiaimo cue lluaña raise llofue. ¹² Naimacina o llofueia, coniruena nia o illamona: “O afemo iticai” naimaci raiadedi, damamai iese raitimaci. Mare illacínodo o jai. Ie mei iese raiñeitimaci. Marena o ñaiamona, marena o illamona, jiaie cominina o isiruillamona, Jusiñamuina o #nuamona, o jeanide rafuena o finoñenamona, naimacidi fueoitimaci. ¹³ O dine nia cue riñenia, creyentia ofia, Jusiñamuina ciegafuiaina ado faca. Iena llono. Iena llofue. ¹⁴ Creyentiaina llofueraini navui ofidemo, Jusiñamuimona o baitajacínona o feiñollena, naimaci onolliai o ifogimo jonetimaci onolliai o ifogimo jonetimaci. Naie facaiseconi Jusiñamui naimacina naicínona ona llotatate. Naicínona birui fañonocaiñeno. ¹⁵ Iena eo uiuicai, nana comini Cristona #nocana o jaillana uiñollena. ¹⁶ O comecina raise eeno. Marena raise llofue. Cristo uaina #nocana o jai. Iese o jaja, jeacino finuamona jilloitio. Iese ona cacadino jiai jilloitimaci.

5

Timoteo afemo itino diga ie illa rafue

¹⁻² Eimiiaina illamona, o afemo itinona riire llofueño; iadedi o moomo o lua isoi, naimacina fecuise llofue. O anafemo itinona o amatiaimo o lua isoi, llofue. O afemo itiañaiñuaina o eimo o lua isoi, llofue. O anafemo itiañaiñuaina o miriñotiaimo o lua isoi, llofue. Naiñaiñuaimo jeare comecina facañeno. ³ Naiñaiñuaina canollena, feciñuai comini iñenia, naiñaiñuaina cano. ⁴ Feciñomo urui ai, naimaci naiñaiñona canua, naiñaiño naimacimo duilla jira. Einamacina illamona, iemona naiñaiñodi #bana oite. Iese itena, Jusiñamuimona mare. ⁵ Feciñomo urui ai iñenia, da Jusiñamuimo naiñaiño ocuride, naimie naiñaiñona canollena. Jusiñamuimo nagarui jicabite. Bie isoide feciñuaina cano; ⁶ iadedi Jusiñamuimo duiñede rana ebiruiga feciñona canoño. Jusiñamui anamo naiñaiño jai raise iñenamona, Jusiñamuimona naiñaiñodi jai fiodaitiñaiño isoide. Fiodaite cominina jaca canoñedicai. ⁷ Ie jira creyentiaimo biena llono, feciñuaina jeare bu ñai raillanona.

⁸ Ie cominina canoñedimie Cristo uaina jai fañonocaide. Naimiedi Cristona #noñedimie baifemo eo jearedimie. ⁹ Creyentiaina sedarainina canolle feciñuai mameciaina o joneia, iese jone: Jai jionaidiñaiñuai diese mameci jone. Dajede inirediñaiñuai mamecina jone. ¹⁰ Mare rafue naiñaiñuai finocabilla jira, jiaie cominidi naiñaiñuaidi mareñaiñuai raillañaiñuai. Ie urui ai raise sedadiñaiñuai. Cominina nafuecabitiñaiñuai. Jiai creyentiaina abina iedoño canocabidiñaiñuai. Duidinona canocabidiñaiñuai. Diese mare rafuena finocabidiñaiñuai mameci jone. ¹¹ Feciñuai diese mameci o joneia, nia jionaiñede feciñuai mameciaina joneño. Naiñaiñuai nano

lloŧimaci: “Inina dane oñeŧicai. Da Cristona sedaiticai” lloŧimaci. Ie mei uri iñenanomona, iimana niciduamona, inina jŧaitimaci. Ie jira naiñaiñuai mameci joneñeno. ¹² Naiñaiñuai navui llucacina jai fañonocaila jira, jiaie comini naiñaiñuai joreñuaina ñaitimaci. ¹³ Naiñaiñuai diga jofomo macariruil-lamona, rairaiedimaci. Eo ñaillaredimaci. Naiñaiñuai ñaiñenacinuaido ñaitimaci. ¹⁴ Nia jionaiñede itiñaiñuai iese iñellena, naiñaiñuai inina dane uana jŧaidicue. Ie mei uruiarenitimaci. Naiñaiñuai jofona sedaitimaci. Ie mei budí naiñaiñuaina jeare ñaiñeite. ¹⁵ Cristona dajerie fañonocaida, Taife díbeimo jai jaidimaci. ¹⁶ Creyente cominimona feciño iade, da naimie naiñaiñona canua. Jiaie creyentiaimo naiñaiñona canolle rana jicañena. Ie muidona cominide feciñuaina canorenitimaci.

¹⁷ Creyentiaina llofueraini marena maijia, raise ibauiga. Naimaci lloia, naimaci jiaie llofueia, eo raise ibauiga. ¹⁸ Moisés micori jiaie ciegafuia iena llote: “Trigo oni juillena jurareta saisia, ie fuena maiñeno, ie guillena”. Guillamona ibana jai ote. Cristo jiaie llote: “Maijidimiedi ibauiga”. ¹⁹ Creyentiaie llofueraimana damie llogidoia, iena cacarefiñeno. Mena comini, nibai daje amani comini iese naimiena llogidoia, iemo cacarei. ²⁰ Creyentiaie llofueraimona bu jeacina finocabia, nana creyentiaie uicomo naimiemo riire llono, jiaie creyentiaie daje isoi iñellena. ²¹ Dacinodo naga jeacino finoraímamo llono. Nagamiemo riidoñeno llono. Fecuisse damiemo lloñeno, naimiedi o nabaina jira. Jusiñamui caina cide. Jesucristo caina cide. Jusiñamui fetoca jaienisaie caina jiaie ciodimaci. Ie jira dacinodo llono. ²² Jeacino naimiemo ia, naimie jeacino facaisena o iñellena, creyentiaie llofueraimana jaillena, buna raire fetoñeno. Jeacinomona oni eneno o i. ²³ Eo o duia, da jinuina jiroñeno. O duicabilla jira, janore vino jiro, o jebe manollena. ²⁴ Jeacino dajerie finoia, iena uiñoticaie, juez isoi Jusiñamui iena nia lloñenia. Jeacino jiaino finoia, iena uiñoñedicai; iadedi jiairuido Jusiñamui lloia, iena uiñoticaie. ²⁵ Ie isoide. Mare rafue bu finoia, iena uiñoticaie; iadedi birui iena caie uiñoñenia, jicarena finoñena jira, jiairuido iena uiñoticaie.

6

¹ Jusiñamuina inote maijirainidi naimaci patrones eo inua. Ie mei Jusiñamuina inoñedino Jusiñamuina jeare ñaiñeitimaci. Cai llofuiacinona jamaiñeitimaci. ² Jesucristona naimaci patrones inoia, maijiraini naimaci uaina jiaie inua. Naimaci comeciaie facañena: “Patrón creyentena illa jira, dani conima caie isiruilla jira, raise maijineiticaie”; ia: “Raise maijiticai” comeciaina facaja.

Uanañedicinona llucacino

³⁻⁴ Cai llogacinodi uanaicino. Cai Nama Jesucristona lloticaie. Bie llogacinomona naimie jŧaille isoi caie illanona, raise uiñoticaie. Jiaicinado bu llofueia, abi edote. Abi uiñoñede. Uai eo uaitaiacade. Ie meinoconi comini abina uradoidimaci. Daajena comeciaina lloñedimaci. Jiaie comini joreñona ñaitimaci. Cai fiñena bitimaci. ⁵ Uai uaitatimaci, naimaci comeciaie maraiñeno illa jira. Uanaicinona jai uiñoñedimaci. “Cristo uai llumona, ailluena ucubena oiticaie” raillanomo comeciaina facadimaci. “Iemona caimare iiticaie” raillanomo comeciaina facadimaci. ⁶ Ie iadedi iese iñede. Cristona eo raise caie inuamona, caimo diese ite ra diga caimare iticaie.

⁷ Cai jeicia, jaca buenidicaie. Cai fiodailla mei, caie rana uiñeiticaie. Cai radi benomo fiebicaite. ⁸ Ie jirari, caie guille ia, caie iniroi ia, caimare bene caie illa. ⁹ Eo ucuberedinona jaiacadinona Taife eo ramo faite. Taife uaina inuanona ucube ollena, ucuberedinona jaiacadinodi diga maraiñede

rafuena finodimaci. Ja muidomo imaci abi faifitimaci. ¹⁰ Ucubena ebiruilanona, ucuberedinona jaiacadino naga jeacinona finocabidimaci. Ucube olena, dajerie Cristona jai faimonocaidimaci. Ie muidona eo duere sefuidimaci.

Jusiñamui uaina #nocana jai

¹¹ Ero, Timoteo, odi Jusiñamui fetocamedio. Nana cue como lloga rafuemonona oni eneno o i. Mare rafuedo o jai. Jusiñamui jitailla rafuena finocana o jai. Jesucristona #nocana o jai. Jiaie cominina isirui. Mare rafue dibeimo o comecina jone. Ricinodo cominina llofueño. ¹² Jeacino dibeimo o ñellena, Jesucristona #nuanona, llocana o jai. Jaca itatajacinona marena raise #no. Jusiñamui ona fetode, o jaca illena. Navui diga cominimo Jesucristona o #nuana marefodo llotio. ¹³ Ie isoide Jesucristo. Poncio Pilato dine jai naimie itemo, marefodo: “Imedicue” llote. Jusiñamuidi nana rana cajetade. Naimie caina jaca cide. Jesucristo caina jiai jaca cide. Ie jira uanaicinona omo lloticue. ¹⁴ Cai Nama Jesucristo nia abido biñenia, nana omo cue llogacinuai #no. Jearede rafuena finoño, jiaie comininaie llogacinuaina uaitañellena. ¹⁵ Naimie jitaillirui Jusiñamuidi eniruemo Jesucristona dane oretaite. Jusiñamuidi maremie. Nanocamie. Cai nanoca cai moto illaima. Cai nanoca Nama. ¹⁶ Da jaca naimie fioidañeite. Eo isire lligaiñote ra dinomo naimie ite. Nainomo jaca bu iairei rinide. Bu naimiena jaca cionide. Naimiedi jaca siñonasa. Naimiemo iobillacinona jaca cai fecacabillasa. Iena jitaidicue.

¹⁷ Eo ucuberedinomo llono: “Abina iedoño. Ucubedi fuirede. Ie jira ucubena uamo ocuriño; iadedi Jusiñamuimo ocuri”. Cai comeciai jaisillena, naimiedi caino rana eo raise fecacabide. ¹⁸ Ucuberedinomo jiai llono: “Omoi ucube diga mare rafuena fino. Jiaie cominimo ucubena caidiño fecajana cano”. ¹⁹ Ie muidona iese naimaci finoa, monamo naimaci isiruga rana iite, jiairuido iena. Iese naimaci jai, jaca itatajacinona marena raise ua uiñoitimaci.

Fuiduacino

²⁰ Timoteo, cue omo llogacinona fañeno raise uiuicai. Jamai rafuemo cacarefiño. “Uanaicinona eo uiñotica” dajerie raitimaci; iadedi uiñoñedimaci. Naimaci ñañana cacarefiño. ²¹ Dajerie iena cacajano, Cristona nia uiñoñedimaci. Jusiñamui ona duenailasa. Jaca dinori omo rafuena lloticue. Mai. Pablocue.

TIMOTEOMO PABLO IE EMODOMO ORETAGA RABE

Uaiduacino

¹⁻² Timoteo, carta omo dane cueticue. ¿Nigacino? ¿Nie isoidio? Pablodicue. Jusiñamui cuena jitailla jira, Cristo Jesús oretagamiedicue. Cominimo jaca itatajacinona lollena, cuena oretate. Cristo Jesús cai ñnuamona, naimie diga jaca iiticaí. Cue isiruiga jito isoidio. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiamaiaí. Iena uiñocana mai o jai.

Jusiñamuimo iobillacinona fecade

³ Mare cue comecimona cue usumatiaí micoriaí isoi, Jusiñamuina sedadicue. Timoteo, nagarui Jusiñamuimo cue jiaí, o facaisena iobillacinona fecadicue. ⁴ Cue comeci caimareficaillena, ona eo cioacadicue. Navui cue o facadoia, o eiana comeciticue. ⁵ Cristo Jesús o ñnuana dane jiaí comeciticue. O usuño Loidadí ñnote. O ei Eunicedí jiaí ñnote. Ie mei ñnotio. Naimiena o ñnuana jai uiñoticue.

⁶ Ie jira o comecina dane ocuiño, Jusiñamui uai o llofuellena. Cue onollí o ifogimo navui joneticue, ona fetollena, naimie uaina o lollena. Jusiñamuimona o baitajacinona naie facaiseconi feiñotio. ⁷ Jusiñamuidí cominina o jaciruillana jitaíñede. Cai comeciaina ocuiñotajanona, caina jiaíe cominina isiruitallena, cai comeciaina eenotallena, ie Joreño caimo fecade. ⁸ Ie jira cai Nama rafuena o lluaña meiruiñeno. Cárcelmo cue illa jira, cuena jiaí meiruiñeno. Cristo Jesús rafue muidona duere sefuidicue. Naie rafue muidona duere o jiaí sefua, rairuioicaiñeno i. Jusiñamui o comecina ocuiñotaite. ⁹ Naimie isoi cai marena illena, caina fetuano, jeacinomona caina jillotate. Cai finoca rafue muidona caina jillotañede; iadedí naimie jitailla jira, caina jillotate. Enirue nia finoñena facaiseconi caina jaie duenaite. Cristo Jesús caina iena jai uiñotade. ¹⁰ Cai Jilloitaraímadí Cristo Jesús. Caimo Jesús jai bairia jira, Jusiñamui caina duenaillana jai uiñoticaí. Fiodaillamona naimie jai jillode. Iemona jiaí jilloiticaí. Naimie mare rafuemona naimie caina Jusiñamui díbeimo jaca illacinona jai uiñotade. ¹¹ Bie rafuena lollena, cuena fetode. Cuena oretaja jira, biena llofueticue. ¹² Ie jira duere sefuidicue; iadedí cue illana meiruiñedicue. Cue ñnogamiena cue uiñua jira, naimie bille dínorí naimiedí nana cuemo naimie jai iga rafuena cue llofuellena, cuena raise eenoite. ¹³ Cue llua isoi o i. Uanaicinona lloticue. Cristo Jesús ñnocana o jai. Jiaíe cominina isiruicana o jai, Cristo Jesús o jaínaiaílla jira. ¹⁴ Jusiñamui Joreño caimo illa jira, omo naimie lloga uanaicinona faínonocaiñeno uiuicaí. Uanaicinona o faínonocaiñellena, naimie ona canoite.

¹⁵ Diga Asiamo ite cominidí cuena faínonocaidímací. Naimacimona Figelo cuena faínonocaide. Hermógenes cuena jiaí faínonocaide. ¹⁶ Onesíforo daje isoíñede. Diga icaiño naimie cue comecina ocuiñotade. Cuena meiruiñede. Cai Namadí Onesíforo jofomo itino duenaillasa. ¹⁷ Romamo Onesíforo navui ria, cuena isire jenuano, cuena baite. ¹⁸ Efesomo jaie cue ia, naimie cuena jiaí canode. Iena raise uiñotio. Cai Nama ico abido bia, cai Namamona naimie iba feiñuana jitaídicue.

2

O maijia rafuena raise fuido

¹ Cuen a fainonocaidino isoi iñeno; iadedi cue jito, Cristo Jesús ona canuano, Cristo dibeimo o comecina ocuiñocana jai. ² Diga cominimo cue llua navui cacadio. O uaina ñnotinomo cue llua llo, iena jiaie cominina naimaci llofuellena. ³ Cristo Jesús rafue muidona duere o sefua, rairuioicaiñeno i. Cai Nama rafuena o riiduamona, naimie soldado isoidio. ⁴ Ie illaima uai naimie ñnoiacania, soldadodi soldadoñede rafuena maijiacaiñena. Ie illaima iobitallena, ie illaima ocuica rafuena finoacanite. Ie isoide. Da Cristo Jesús rafuena o fino, naimiena iobitallena. ⁵ Reglamientos llua isoi naimie raise jifanoñenia, jifanoraímadi bue isoide rana cioñede. Ie isoide. Ibana o feiñollena monamo o jiaia, Cristo Jesús lludo raise o jai. ⁶ Illimo duere maijiraímadi maijia jira, naiemona naie guiledi oga. Ie isoide. Duere o maiji, ibana feiñollena. ⁷ Cue llamo o comecina facacabi. Cai Nama ona canoite, iena uiñollena.

⁸ Jesucristo fiodaillamona jillode. Iena comeci. Naimie usumadi David micori. Jesucristona cue llua jira, ⁹ marañedimie isoi cárcolmo duere jai sefuidicue; iadedi Jesucristo rafue nia llocana jaide. ¹⁰ Ie jira Jusiñamui fetocano facaina duere sefuidicue, Cristo Jesúsna naimaci ñnuamona naimaci jilloillena, monamo naimaci jaca illena. ¹¹ Bie llucacínodi uanaicino: Naimie dibeimo cai jaillamona, naimie diga jaca iiticaí.

¹² Naimie muidona cai duere sefua, naimie diga iiticaí, ie cominina naimie sedalle facaiseconi.

Naimiena cai janoia, naimie caina jiaí janoite.

¹³ Naimie raise cai ñnoñenia, naimie uai meidoñena muidona, naimiedi nia ñnogamie.

Timoteo illa rafue

¹⁴ O cominimo biena dane llo, iena comecillena. Jusiñamui facaina naimacimo llo: Uaina jamai uaitañeno, mare rafuena naicinomona comuiñena jira, naicinona cacadino comeciaina maretañena jira. ¹⁵ Marena maiji, Jusiñamui ori iobillena. O meiruiñellena, naimie o maijia jibuia, marena maiji. Uanaicino o uiñuamona, naimie uaina marena raise llofue. ¹⁶ Jamai ñaiana cacarefiñeno. Comini jamai ñainoicaia, Jusiñamui jitailla rafuena finocana jaiñedimaci. ¹⁷ Diga rafue naiemona comuide. Mocolonaitate duico cai abimo illa isoi, naie rafue llocana jaide. Himeneo naie rafuedo jaide. Fileto dajedo jiaí jaide. ¹⁸ Uanaicinona fainonocaidiaímaiaí. Coco ñnua isoi, llofueñediaímaiaí. “Cai fiodaia, cai abi ico jilloñeite” llofuetiaímaiaí. “Cristona cai ñnua facaise jai jillodicaí. Cai fiodaia, cai joreño jaca iite” llofuetiaímaiaí; iadedi cai abi ico jillollena ñnoñediaímaiaí. ¹⁹ Ie ia Jusiñamui comini jaca ñnocana jaidimaci. Ie cominimo Moisés micori jaie llua mona, iaímaiaí finoca rafuena jiaí ñaite: “Jusiñamuidi ie cominina uiñote. ‘Jusiñamuina ñnoticue’ raitimiedi marañede rafuemona eneno illasa” llote. Ie jira iaímaiaímona eneno o i.

²⁰ Ero, ucuberedimie jofomo diga guillirue joneuilla ra jai ite. Eo jitairede rana jai ite. Janore jitairede rana jiaí jai ite. ²¹ Ie isoide. Jusiñamui dibeimo itinomona naga isoide comini ite; iadedi jeacinomona eneno bu ia, Jusiñamui naimiena fetoite, ie eo jitaile rafuena finollena. Jusiñamui dibeimo raise maijiite. ²² Ie jira conirueni comeciá jitailla marañede rafuemona eneno o i. Marena i, Jusiñamui jitailla isoi. Jesucristona ñnocana jai. Nana cominina isirui. Uri i. Mare comeciámona nana cai Namana sedadino diga iese i. ²³ Jamai ebena rafuemo iñeno. Naiemona icirillacínodi comuide. Iena uiñotio. ²⁴ Jusiñamui facaina llofueraímadi raire iciríñena. Nana cominina nabairilla. Marena fecuise llofuega. Riicaiñena. ²⁵ Naimie uaina

jitaiñedinona fecuise llofuega. Ie mei Jusiñamui naimaci comeciai iuaina nibai meidotaite, uanaicino dibeina uiñollena. ²⁶ Ie mei abi uiñuanona, Taife anamona jilloitimaci. Taifedi naimacina ie anamo jai itatate.

3

Jusiñamui dibeimo iñedinomona abina rairui

¹ Bie llucacino comecina raise faca. Jesucristo abido bille facaise iairei ia, creyentena illena eo sefuirenite. ² Naie facaiseconi comini dani imaci abina isiruitimaci. Ucubena ollena eo nicidoitimaci. Abina iedoitimaci. Abina biriitimaci. Jusiñamuina eo jeare ñaitimaci. Naimaci moo uaina, naimaci ei uaina iñoñeitimaci. Jiaie cominimo iobillacinona jaca fecañeitimaci. Jusiñamuina jaca jitaiñeitimaci. ³ Jiaie cominina duenaiñeitimaci. Comeciaina jaiarenitimaci. Jiaie comini joreñona eo jeare ñaitimaci. Naimaci comeciaina eenoñeitimaci. Ebe isoi naga rana duere finoitimaci. Mare rafuena jitaiñeitimaci. ⁴ Naimaci nabaiñiaina janoñeitimaci. Jiaie cominimo comeciaina facañeitimaci. Eo abina iedoitimaci. Naimaci comeciai jitailla rafuena finoacanitimaci. Jusiñamui rafuena isiruiñeitimaci. ⁵ “Jusiñamuina sedadicaï” raitimaci; iadedi Jusiñamui uaina jamaitimaci. Bie isoide comini diga nabairiñeno. ⁶ Naimacimona dajerie jiaie jofuemo macaritimaci, naie jofuemo ite riñoniaina jifuianona llofuellena. Diga jearede rafuena finuano, naie riñoniai ebena itimaci. Naimaci comeciai iuailai raire meidocana uitimaci. ⁷ Naga lloraïma lluomo naiñaiñuai cacareidimaci; iadedi uanaicinona jaca uiñoñedimaci. ⁸ Naimaci comeciai eo maraiñede. Jusiñamui uaina iñoñedimaci. Jannes, Mambres diga, Moisés micori lloga uai jaie uaitatïaïmaïaï. Ie isoi bie comini uanaicinona birui jiai jitaiñedimaci. ⁹ Nana comini naimaci rafue jamai ebe isoi finoca rafue uiñuamona, Jannes iaïmaïaï Mambres rafue jaie fuilla isoi, naimaci rafue raire fuite.

Timoteo uanaicinona iñuanona jailla

¹⁰ Timoteo, cuena uiñotio. Cue llofuiana uiñotio. Cue illana uiñotio. Cue jitailla rafuena uiñotio. Cristona cue iñuana uiñotio. Icirïñeno fecuise lloticue. Cominina isiruiticue. Duere cue sefua, cue comecina ocuiñoticue. Iena uiñotio. ¹¹ Antioquiïamo, Iconiomo, Listramo cuena duere finodimaci. Duere sefuidicue; iadedi nana naiemona cue Nama cuena jillobitade. ¹² Jusiñamui jitailla rafuena finuano, Cristo Jesús uaido jaidinodi duere sefuitimaci. ¹³ Ie facaiseconi maraiñedinodi maraiñede rafuena finocana jaitimaci. Jifueraini daje isoi jifuericana jaitimaci. Naimacidi abido naimacina jiai jifueitimaci. Iese jaitimaci; ¹⁴ iadedi cue llofuia uaido iñocana odi jai. Cuemona jai fueotio. O usuñomona jai fueotio. O eimona jai fueotio. Ie jira uanaicinona jaie iñotio. ¹⁵ O uruenamona Jusiñamuina mare ciegafuiaina cacadio. Naie ciegafuiaï cai jilluana caïmo llote. Cristo Jesúna cai iñuamona, jillobidicaï. Iena caïmo jai llote. ¹⁶ Comini nana naie ciegafuiaina cuetimaci; iadedi Jusiñamui jitailla isoi, naga cuetimie cuete. Ie jira nana naie ciegafuiaï Jusiñamuimona ite. Cominimona iñede. Ie jira naie ciegafuiaïmona uanaicinona uiñoticaï. Cai maraiñedinona caïmo llote. Cai comeciai marena illena, Jusiñamui jitailla isoi, caïmo llote. ¹⁷ Iese llote, naimiemo cai duillamona, nana Jusiñamui rafuena cai raise uiñollena. Raise uiñuamona, Jusiñamui rafuena raise llofuereniticaï. Naga Jusiñamui jitailla rafuena jiai raise finoreniticaï.

4

¹ Jiaïruido Cristo Jesúdi illaïmana eniruemo abido biite. Illaïma isoi ie cominina sedajite. Naimiena iñoñenamona nia cajedinona duere finoite. Jai

fiodaitinona jillotajanona, naimiena #noñenamona, naimacina duere finoite. Jusiñamuidi birui caina jaca ciode. Cristo Jesús birui caina jaca ciode. Iena cue uiñuamona, bie uai omo lloiticue. ² Naimiena #noñedinona Cristo duere finoñellena, naimie rafuena naimacimo jaca llono. Comini o dafaifia, comini ofia, comini o dine ria, naimacimo iena lloitiosa. Naimaci jitaia, llono. Jitaiñenia, jiai llono. Jeacinona bu finoia, naimacimo llono. Marena naimaci illena, naimacimo llono. Fecuisse jaca llofue. ³ Jiairuido dajerie uanaicinona jitaiñeitimaci. Jiaifuena jitaitimaci. Naimacimo dani naimaci cacaacana rafuena lollena, diga llofuerainina jenoitimaci. ⁴ Uanaicinona fainonocaida, #gajai icinuaido facajitimaci. ⁵ Timoteo, o comecina eeno. Duere o sefua, rairuioicaiñeno i. Jesucristo rafuena llocana o jai. O llofuiacinona marena fuido.

⁶ Jai iairei ite cue meinellirui. ⁷ Cai Nama rafuena llocana cue jaillano, iena marena jai riidotique. Cue illa dinori jai fuiacade. Cai Namana fainonocaiñedicue. ⁸ Cai Namamona marena cue illa jira, monamo ibana feiñoitique. Iemo jai ocuridique. Iena cai Nama cuejena eenote. Naimie abido billiruimo iena feiñoitique. Caina raise uiñuamona, dama cuemo fecaite; iadedi nana naimie abido billena jitaidinomo ibana jiai fecaite.

Pablo damieriena ñaia rafue

⁹ Timoteo, raire cue dine bi. ¹⁰ Biniemo ite rafuena Demasdi eo ebiruilla jira, Tesalónicamo naimie jaillano, cuena fainonocaide. Galaciamo Crescentedi jai jaide. Dalmaciamo Tito jai jaide. ¹¹ Dama Lucas cue diga ite. Marcos o diga ati. Cuena canollena, naimiena jitaidique. ¹² Efesomo Tíquicono oredique. ¹³ O bia, cue fiebide iniroina ati. Troasmo Carpio jofomo fiebide. Cue libros ati, cue rabiai diga. ¹⁴ Alejandro raillamie navui cuena jeare finode. Naimiedi lloeomona rana finoraima. Cai Nama naimiemo iba oite. ¹⁵ Naimiemona o abi rairui. Naimie cue llwana eo jitañede. Iena uaitate. ¹⁶ Illaicomini dine cue rafue nano cue riidoia, jaca buna cue facaina riidoñede. Nana cuena fainonocaidimaci. Jusiñamuidi naimacimo iba uana jitañedicue. ¹⁷ Cai Nama cue facaina ite. Cue comecina ocuiñotade, nana judíuainedinomo naimie uai raise cue lollena. Naimie muidona cue fodaisaillanomona jillobidique. ¹⁸ Cai Nama naga marañede rafuemona cuena eenoite, monamo ie cominina sedajanomo cue raise rillena. Iobillacino naimiemo jaca fecacabillasa. Iena jitaidique.

Fuiduacino

¹⁹ Diga cominimo cue uai oredique: Priscamo, Aquilamo, Onesíforo jofomo itinomo. ²⁰ Corintomo Erasto fiebide. Miletomo Trófimo duide fainonocaidique. ²¹ Rollime nia iñenia, cue dine bi. Diga comini omo naimaci uai oredimaci: Eubulo, Pudente, Lino, Claudia, ua nana creyentia.

²² Cai Nama o comeci ocuiñotajasa. Naimie nana omoina duenaillasa. Mai. Pablodique.

TITOMO PABLO ORETAGA RABE

Uaiduacino

¹ Tito, omo cartana oretaiacaducue. ¿Nigacino? ¿Nie isoidio? Pabloducue. Naimie cominina cue illamona, naimie jitailla rafuena cue finuamona, Jusiñamui anamo llofuecabitucue. Ie rafuena llofuellena, Jesucristo ie oretagamieducue. Jusiñamui fetocanona ñnotallena, naimacina uanaicinona uiñotallena, Jusiñamuina naimaci raise sedallena, cuena oretate. ² Naimie diga jaca cai illemo cai ocurilla jira, Jusiñamuina sedadicaí. Enirue nia iñena facaiseconi, Jusiñamuidi cai jaca illena jaie llote. Naimie taino jaca lloñede. ³ Iemei naimie jitaillarui caina ie rafuena jai uiñotade. Naie rafuena cue llollena, naimie cuena oretate. Naimiedi cai Jilloitaraima. ⁴ Tito, bie carta omo cueticue. Cue isoi o ñnua jira, cue jitona cue mamecao. Coco Moodi Jusiñamui. Coco Jilloitaraimadi Jesucristo. Iaimaiaí ona jai duenaitiaímaiaí. Iena uiñocana mai o jai. Ona uri jai itatatiaímaiaí. Iena uiñocana mai o jai.

Creyentiaina sedaraini illacinuai

⁵ Nainomo ite rafue o fuidollena, Creta railla uiasimo ona fañonocaiducue. Creyentiaina sedallena, naga nairai illanomo llofuerañina o fetuana navui omo llotucue. ⁶ Creyentiaina llofuerañina o fetoia, nagamie bie isoidimiena feto: Nana comini naimie mare raillamie. Dañaiñona airedimie. Nana naimie uruiaí creyentiaina itimie. Nana comini naimie uruiaí mare raillamie. Naimie uruiaí ie uaina ñnotimie. ⁷ Jusiñamui facaina naimie maijia jira, creyentiaí sedaraimadi maremiena illa. Abina iedoñena. Raire iciriñena. Jifairuiñena. Fuiriruiñena. Ucubena nicidoñena. ⁸ Ie jofomo cominina raise feiñua. Mare rafue icinona isiruilla. Ie comecina eenua. Marena illa. Jusiñamui jitailla rafuena finua. Ie abina eenua. ⁹ Naie uai raise llofuiamona comini comeciaina ocuiñotallena, naimie uaina uaitatinona llucaitallena, cai llofua isoi uanaicinona ñnocana naimie jailla.

¹⁰ Ie isoidinona feto, ailluena comini Cristo rafuena raise ñnoñena jira. Tainocinuaina ñaicabitimaci. Cominina jifuecabitimaci. Judíuai creyentiaimona diga comini iese itimaci. ¹¹ Ie jira naimacina llucaita. Naimacidi diga cominina uri itatañedimaci. Uanañedicinona llofuetimaci, ucube bifuiano ollena. ¹² Naimacimona comini rafuena lloraima navui raite: “Cai Creta cominidi jaca tainona llouidimaci. Naimaci comeciadi jico comeci isoide. Jearedimaci. Guillardimaci. Rairai edimaci” raite. ¹³ Naimiedi uanaicinona llote. Ie jira creyentiaimo riire llono, naimaci Jusiñamui uaina raise ñnollesa. ¹⁴ Judíuai ñgaiaina naimaci ñnoñellena, comini lletarafuena naimaci ñnoñellena, naimacimo riire llono. Damierie uanaicinona jitañedimaci. ¹⁵ Ero, mareuidinomona naga ra mare. Jusiñamuina ñnoñedinomona naga ra jearede. Naimaci comeciadi jai jearena jira, jearerie comeciaina facacabidimaci. ¹⁶ “Jusiñamuina uiñoticaí” raitimaci; iadedi Jusiñamuina uiñoñedimaci. Naimaci finoca rafuemonona iena uiñoticaí. Jusiñamui naimacina eo gaiñede. Buena ñnoñedimaci. Ie jira mare rafuena finuana uiñoñedimaci.

2

Creyentiaí marena illena, uanaicinona llofue

¹ Tito, Jusiñamuina ñnoñedino isoi iñeno. Odi uanaicino llofue, naimaci marena raise illana uiñollena. ² Uaicimaiaina llofue. Canamacina jiaí llofue: Jifaiñeno. ñnogamiena jai. Uairico isoi iñeno. Jusiñamui uaina raise ñno.

Omoi ecimo itinona isirui. Duere omoi sefuia, omoi comeciaina ocuiño. ³ Uaicinuaina llofue. Cañaiñuaina iese jiai llofue: Marena omoi i, Jusiñamui jitailla isoi. Jiaie comini joreñuaina ñaiñeno. Jifaiñeno. Mare rafuedo omoi jaillamona, omoi anafeiñaiñuiai mare rafuedo jaitimaci. ⁴ Naiñaiñuiai inina isiruillena, naiñaiñuiai uruiaina jiai isiruillena, ⁵ uairico isoi iñellena, jearede rafuena finoñellena, jofomo raise majillena, cominina duenaillena, naiñaiñuiai iniñiai uaina ñnollena, jiaie comini Jusiñamui uaina jamaiñellena, naie cañaiñuaimona fueoitimaci. ⁶ Einamacimo llono. Coniruenimo jiai llono: Ieñede ramo omoi comeciaina facañeno. Uairico isoi iñeno. ⁷ Tito, naga rafue o finua diese, mare rafuedo o jai. O llofua, uanaicinona llono. Jamai ebe isoi llofueño. ⁸ Marena llofue. Marena o llofua, ¿niese comini o uai uaitaitimaci? Uaitañeitimaci. Iemei o ðibeimo iñedino meidaitimaci, caimo jearede rafue iñenia. Ie jira cairi ñañeitimaci. ⁹ Patrón anamo itinomo iese llono: Omoi patrón uaina ñno. Naimie jitailla rafuena raise fino. Naimie uaina oñeno. ¹⁰ Rana fiñeno. Naimie raruiiai raise seda. Iese naimaci ia, naimaci raise majiia, naimaci patrón: “Jusiñamui uai mare” raite. Jusiñamuidi cai Jilloitaraima.

¹¹ Jusiñamui caina duenaillena jai cai uiñua jira, naicinona llofue. Naimiedi nana cominina jillotaicade. ¹² Naimie uai caimo llote: “Cue ðibeimo iñede rafuena eneno faionocai. Maraiñede rafuena jitañeno. Uairico isoi iñeno. Omoi ecimo itinomo, jiaie cominimo taino lloñeno. Naimaci rana fiñeno. Jusiñamui uaina ñnocana jai”. Iese cai illana Jusiñamui birui jitaide. ¹³ Jiai caimo llote: “Jesucristo abido billemo caimare ocuri. Naimiedi ebire biite. Ie uai siño. Naimiedi cai Jusiñamui. Jiai cai Jilloitaraima”. ¹⁴ Cairi naimiedi fodaite, cai jearedicinomona cai jilloillena. Naimie cominina cai illena, mare rafuena iocire cai finollena, cai comeciaina marena dote. ¹⁵ Naie rafuena llofue. Maraiñede rafue comini finoia, naimacimo llono. Illaima uai isoi llono. Cominidi o uaina jamaiñellena, raise llofue.

3

Creyentia illacinuai

¹ “Omoi illacomini uai anamo i” creyentiaimo dane llono. Omoi illacomini llucinona ñno. Mare majille ia, iena raise fino. ² Jiaie cominina jeare ñaiñeno. Fuirñeno. Fecuisse uiuicai. Nana comini ðiga marena ñaino. ³ Jiaie cai jiai ebe isoidicai. Jusiñamuina ñnoñedicai. Taife caina jifuate. Dani cai comeciiai jitaillacino railla isoi finouidicai. ðiga ie jearede rafuena finouidicai. Jiaie cominina jeare finouidicai. Marairainidicai. Abina uradoisoidicai. Cominidi caina enoisoidimaci. Coninina jiai enoisoidicai. ⁴ Ie ia Jusiñamuidi maremenana jai fididicai. Naimie caina isiruillana jiai fididicai. ⁵ Ie mei Jusiñamui caina jillotate. Mare rafuena cai finoñedicai; iadedi caina duenaillamona, caina jillotate. Cai jeacinona oni dotajanona, cai comeciaina dote. Ie jira naimie ðibeimo cai comeciaina dobaiñoticai. Jusiñamui Joreño cai comeciaina marena finode. ⁶ Ie Joreño caimo raise fecade, Jesucristo finua muidona. Jesucristo cai Jilloitaraima. ⁷ Ie jira naimiemona marebicaidicai. Caina duenaillamona, marebicaidicai. Caina ie cominina itatate. Iemona naimie ðiga jaca illemo ocuridicai.

⁸ Tito, cue llucinodi uanaicino. Jusiñamuina ñnotino marena majillena, cue llucinona llo-llocai. Cue llucinona mare. Ie jira nana cominidi iena cacacabillasa. ⁹ Ebena ñaiñeno. Omoi usumatiai mameciaina jamai siadiadoñeno. Moisés micori llogacinuaina uaitañeno. Naicino ðiga buena oñedicai, Jusiñamui jitaillacinona cai finollena. ¹⁰ Roracomo comini comeci

jiaifocaitatimie ia, naimiemo llono: “Iena finoñoeno”. Dacaiño o llumona naimie inoñoenia, dane llono. Ie mei inoñoenia, naimie diga omoi ñaiñoeno. Naimie diga omoi nabairiñoeno. ¹¹ Uanaicinodo naimie jai jaiacaiñede. Jeacinona jai finode. Naimie iena jai uiñote.

Fuiduacino

¹² Artemas o dine cue oretaia, Tíquico o dine cue oretaia, Nicópolis railla nairaimo are sedañoeno raire bi. Nainomo rollime facaiseconi cue começi illana jitaide. ¹³ Zenas railla abogado Apolos iaiaiaia diga cano, iaiaiaia oni jaiacana jira. Iaiaiaia jitaile rana feca. ¹⁴ Dueredino ia, naimacina canollena, creyentiaimo: “Marena maiji” jia llono. Naimaci jamai iñellena, iese llono.

¹⁵ Cue diga itino naimaci uaina omo oredimaci. Jesucristona cai inua jira, caina isiruitinomo cue uaina llono. Jusiñamui nana omoina duenaillana uiñocana omoi jaillana jitaidecue. Mai. Pablodiceue.

FILEMÓMO PABLO ORETAGA RABE

Filemómo Pablodi carta orede

¹ Filemón, bie carta o dine oredicue. ¿Nie isoidio? Pablodicue. Jesucristo rafue cue llumona, cárcelmo iticue. O dine cue uai oredicue. Timoteo cue diga ite. Ie uai jiai orede. Cai Moo Jusiñamui jai cai jainaiaila jira, naimiedi coco ama. Coco diga Cristo facaina o maijia jira, ona isiruiticoco. ² Coco uaina Apiamo jiai oredicoco. Cristo dibeimo naiñaiño illamona, naiñaiñodi coco miriño. Coco uaina Arquipomo jiai oredicoco. Naimiedi coco isoi Cristo rafuena llocana jaide. O jofomo rollena ofcabidinomo coco uaina jiai oredicoco. ³ Cai Moo Jusiñamui, cai Nama Jesucristo diga, omoina jai duenaite. Iena mai uiñocana omoi jai. Iaimai omoina uri jai itatate. Iena omoi uiñocana mai omoi jai.

Filemón Cristona #nocana jaide

⁴ Jusiñamui diga cue ñaia, o facaina cue jiaia, naimiemo iobillacinona fecadicue. Mare rafuena o finuana cue fidia jira, naimiemo iobillacinona fecadicue. ⁵ Cai Nama Jesúna #nocana o jaillana fididicue. Nana creyentiaina o isiruillana jiai fididicue. ⁶ Cristo dibeimo cai illa muidona, naimiemo diga marecinona feiñotica. Cristona o #nuamona, jiaie creyentiaina o nabaia, omona naie marecinona uiñoitimaci. Naga mare ra uiñocana naimiaci jaillana jitaidicue. ⁷ Cue ama, creyentiaina o isiruilla jira, iobidicue. O muidona creyentiai comeciai caimare uri illa jira, cue comeci iocire ite.

Onésimo facaina Pablo ñaite

⁸ Cue comeci iocire ite; iadedi daje rafuena o diga ñaiacadicue. Cristo uai cuemo illamona ñaiñeiticue; ⁹ iadedi conima coco isiruilla jira, o diga ñaiticue. Jai uaicimadicue. Jesucristo rafuena cue llua muidona, cárcelmona jai ñaiticue. ¹⁰ Onésimo facaina ñaiacadicue. Cárcelmo cue illa facaiseconi, cue muidona Cristona naimie #nua jira, naimie cue jirona jaide. ¹¹ Omo naimiedi marañede rafue navui finode. O mullaíma naimie illanona, raise maijñede. Bene aisiamona, Cristona naimie #note. Cuen a birui eo canode; iadedi birui o diga raise iacade. ¹² O dine naimiena abido oretaiticue. Dama naimiena oretañeiticue; iadedi naimiena cue eo isiruillamona cue comecina jiai oretaiticue. ¹³ O facaina naimie cuena birui canode. Cue diga naimie fiebillana jitaidicue; ¹⁴ iadedi: “Jee” o nia raiñena jira, iese fiñoiteiticue. Iena omo jicañeiticue. Omo cue jicanuamona buena o finuana jitañeiticue; iadedi dama o comeci jitailla jira, mare rafuena o finuana jitaidicue. ¹⁵⁻¹⁶ O anamo naimie nia ite; iadedi Cristona naimie jai #nua jira, naimie o isiruiga amana feiño. Naimiena isiruiticue. O dine naimie jaca abido illena, o dinena janorena facaise cue dine navui bite. Naimiedi o mullaíma; ia naimiedi jiai birui o ama. Naimiena isiruillanona feiño. ¹⁷ O nabaina iticuena cuena o feiñua isoi, naimiena feiño. ¹⁸ Naimie marañede rafuena omo navui finode. Omo naimie nia debia, cue facaina jone. ¹⁹ Iena ibaiticue. Bie carta dama cue cuiamona, naimie debiana cue ibajana uiñotio. Omo eo lloñeiticue; iadedi cue muidona Cristona o #nua jira, ailluena cuemo debedio. ²⁰ Cue ama, coco Nama Cristomo coco jainaiaila jira, cue jitailla rafuena fino. Ie mei cue comeci uri iite. ²¹ Cue jitailla rafue o finollena uiñotitico. Cue jitailla rafue baifemo o finollena uiñotitico. ²² Jiaie rafuena lloiacadicue. O jofomo daje cuarto cuejena fino. Cue facaina o jiaia, Jusiñamui jitaia, o dine jaiticue.

Damierie imaci uaina jia orede

²³ Omo Epafras ie uaina orede. Jesucristo rafue llua muidona, cárcelmo cue diga naimie ite. ²⁴ Marcos ie uaina orede. Aristarco ie uaina orede. Demas ie uaina orede. Lucas ie uaina orede. Cristo rafue naimaci lluanona, naimaci cue diga maijide. ²⁵ Cai Nama Jesucristo nana omoi creyentia comechiaina ocuiñotajamona omoina duenaillasa. Mai. Macaibaite. Pablodice.

HEBREOS COMINIMO ORETAGA RABE

Jesucristo rafuena jai cai cacajamona, Jusiñamuiña jai uiñoticaí

¹ Jusiñamuidi caina ie rafuena jai uiñotade. Iena omoimo ja lloiticue. Cai jaiagai micoriaimo Jusiñamuidi ie rafuena llote. Naimacimo ie rafuena llollena, jiaicaiño ie jaienisaína orede. Jiaicaiño nicai anado Jusiñamui ie rafuena llote. Iena llollena, jiaicaiño ie facaina lloraini micoriaína orede; ² iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uiñoticaí. Ie Jito uaido, mona diga, eniruena jaie finode. Ie Jito uaido nana rana jaie finode. Na comini diga jiai finode. Jusiñamuidi nana ra, nana comini diga ie Jito anamo ico illena jai llote. ³ Ie Jito uaido nana naie rana finocana uite. Naimie muidona Jusiñamui marena ebire-nana uiñoticaí. Jusiñamui marena naimie illa isoi, naimiemona Jusiñamuina uiñoticaí. Eniruemo billanona, cai comecimo ite jeacino facaina naimie fiodaite. Monamo abido jaillanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

Jusiñamui Jito Jusiñamui jaienisaí baífemo faíte

⁴ Jusiñamui Jitona naimie illamona, naimie illano Jusiñamui jaienisaí illano baífemo faíte. Ie illanomona naimie Jusiñamui jaienisaí baífemo faiana uiñoticaí. ⁵ Jusiñamuidi: “Cue Jitodio” Cristomo llote; iadedi ie jaienisaímo iese lloñede. Jiaicaiño llote: “Naimie Moodicue. Naimie cue Jito” llote. Ie jaienisaí ie Jito baífemo faíñena jira, ie jaienisaímo iena jaca lloñede. ⁶ Ie dajede Jito eniruemo oretaja facaiseconi Jusiñamui llote:

Nana cue jaienisaí naimiemo iobillacinona fecaja;

⁷ iadedi jiaie rafuedo ie jaienisaína ñaíte:

Cue ocuilla rafuena naimaci finollena, cue ocuilla diese naimacina oretacabiticue.

⁸ Ie Jitona ñaianona raite:

Cue isoi o illa jira, cominina o sedajafue jaca iite.

Eo marecinodo cominina jaca sedadio.

⁹ Mare rafue finuana jitaidio.

Maraiñedinona finuana jitaíñedio.

Ie jira ona caimare jai itataticue.

Monamo o abido billanona, cue jaienisaí baífemo ona caimare itataticue raite. ¹⁰ Jiaicaiño Jusiñamui ie Jitona raite:

Cue isoi o illa jira, o uai diga nanodofoconi eniruena jaie finodio.

Mona jiai finodio.

¹¹ Bie eniruedi mona diga ico fuite.

Eniroi fuilla isoi, iñeite;

iadedi odi jaca iitio.

¹² Eniruena mona diga meidotaitio;

iadedi odi jaca daje isoitio.

Jaca iitio

raite. ¹³ Ie Jitomo biena llote; ia ie jaienisaímona damiemo iese lloñede. Ie Jitomo llote:

Illaimana o illamona, cue nabei dine ana rai.

Nana o dibeimo iñedinona o anamo itataticue.

14 Ie jaienisaïmo iena lloñede; iadedi naimacina oretacabite, ie Jitona ñnotinona canollena. Ie jira nana naiemona, ie Jito ie jaienisaï baifemo faiana uiñoticaï.

2

Jusiñamui caina jillotaja rafuena cai jamaiñena

1 Jusiñamui Jito siño jitonana jira, naimie birui lloga rafuena eo raise cai cacajasa. Naiemona abido cai jaiñellena, naiena cai feitañellena, naiena eo raise cai ñnuasa. 2-3 Ero, Jusiñamui ie jaienisaïna jaie oretajanona, Moisés micorimo diga rafuena jaie llote. Naie lloga rafuena bu raise finoñenia, iena bu raise ñnoñenia, Jusiñamui naimiena eo duere finode. Jusiñamui jaienisaï lloga rafue mare; iadedi Cristo birui lloga rafue jaienisaï jaie lloga rafue baifemo faia jira, Cristo rafuena cai ñnoñenia, Jusiñamui caina duere finollemona ua jilloñeiticaï. Ero, naimie cai jeacinomona caina jillotaiacade. Naie rafuena cai jamaia, iena cai ñnoñenia, naimie caina duere finollemona ua jilloñeiticaï. Cai Nama Cristo naie rafuena jaie llote. Naimiena cacadinodi caimo iena jai llotimaci. Cristo rafuedi uanaicinona llotimaci. 4 Jusiñamui uai diga jiaiforiede siño rafuena naimaci finuamona, Cristo rafuedi uanaicinona uiñoticaï. Naimie jitailla diese naga creyentemo Jusiñamuidi ie uaina itatate. Naga creyente naimie dibeïmo raise maijillena, ie uaina itatate. Naga creyentemo naie uai illamona, Cristo rafuedi uanaicinona uiñoticaï. Ie jira naie rafuena cai ñnuasa.

Cai isoi illena, Jesucristo ñimana jaide

5 Jusiñamuidi ie jaienisaïna oretauide, ie jitailla rafuena naimaci finollena; iadedi naimaci anamo comini ñco illena jaca lloñede. Cristo anamo comini ñco illena llote. 6 Jusiñamuïmo David micori iena jaie llote:

Cai jamai bue isoidicaï; iadedi caimo comecina facadio.

Jamai cominidicaï; iadedi caina canodio.

7 Caina cominina o finua jira, o jaienisaï isoi ññedicaï.

Fiodañedimaci; iadedi nana enirue rana o finuanona, Adán micori anamo iena jaie o itataja jira, caina eo iobitadio.

8 Nana rana naimie anamo o itatajana jaie llotio.

Iese llote; iadedi nana naie lloga rafue nia suiñede, jeacinona Adán micori jaie finua jira. 9 Jesúsna dane lloiticue. Naimiena uiñoticaï. Eniruemo naimie jaie billamona, Jusiñamui ecimona naimie billa jira, Jusiñamui jaienisaï illa isoi, dallu naimie ññede. Comena jaide. Cai facaina duere sefuillanona, naimie fiodaite. Caina Jusiñamui dueruillanona, nana cai facaina Jesús fiodaite. Naimie fiodailla jira, ie abïmo naimiena Jusiñamui abido itatajamonona, Jusiñamui naimiena iobitade. 10 Jusiñamui nana rana finode. Nana cominina comuitate. Naimiena iobitallena, nana finode. Naimie jitailla jira, naimiemona marena jira, Jusiñamui ie Jitona orede. Cai facaina fiodaillena, ie Jitona orede. Cai jeacino facaina fiodaite. Ie Jito fiodaillamona, ailluena Jusiñamui cominina jaidicaï. Naimie illanomo ñco iiticaï. Naimie jitailla jira, ie Jito duere sefuillanona fiodaite. Duere sefuillana ie Jito jai uiñuamona, naimiena ñnotinodicaina jai raise canorede. 11 Naimie fiodaillamona marebicaidicaï. Naimie dibeïmo jai cai illa jira, daajena mooredicaï. Ie jira naimiedi: “Cue cominidomoi” caina meiruiñeno llote. 12 Jusiñamui facaina lloraini micoriai llogacinomona naie rafue uanaicinona uiñoticaï. Jesús ie ñco finolle rafuena jaie llotimaci:

Ie cominimo ie Moo rafuena lloite.

Ie comini diga naimie ofia, daajena Jusiñamuïmo roitimaci

jaie llotimaci. ¹³ Jesúsna dane ñaitimaci:
 Ie comini diga naimiedi Jusiñamuina ñnocana jaite.
 Jusiñamui cominina damierie jailla jira, naimacidi jiai naimie comini
 ñaitimaci. Naimaci ñaia isoi, Jusiñamui cominina birui jaidicai. ¹⁴ Jusiñamuina
 ñnotinodi cominina jira, cai isoi naimie illena, Jesúsdi comena jaide. Cai
 fiodailla isoi, naimie jiai fiodaite. Taife uaina cai ñnoia, jeacino finodicai.
 Iemona fiodaicana jaidicai. Jeacino anamona caina Jesús jai jillotaja jira,
 Jusiñamuimona Taife uai jai saide. Jusiñamui dibeimo iñenanomona jai jil-
 lodicai. ¹⁵ Jesús nia fiodañenia, nana cai illa dinori fiodaillana jaciruicana
 jaidicai. Jesús jai fiodailla jira, caina jaciruillacino anamona jillobitade.
¹⁶ Jeacino anamo naimaci iñena jira, Jusiñamui jaienisaimo ie comecina
 facañede; iadedi Abraham micori isoi ñnotinomo naimie comecina facade.
 Naimacina naimie jilloitallena, naimiedi comena jaide. ¹⁷ Comena naimie
 illena, Jusiñamui naimiena orede. Cai isoi naimie duere sefuillena, naimiena
 orede. Cai isoi ramo naimie Taife faimona, naimie fueollena, naimiena
 orede. Cai illana raise uiñote. Iemona caina dueruite. Jusiñamui jitaillacino
 finuana raise uiñote. Ie jira Jusiñamui diga cai facaina nanoca ñairaimana
 naimie raise jaide. Ie jira cai jeacina oni dotajana Jusiñamuimo jicanote.
¹⁸ Naimie duere sefuilla jira, naimie ramo Taife faia jira, cai ramo Taife faia
 isoi, naimie caina canorede. Taife uai naimie ñnoñena jira, caina canorede.
 Taife uaina cai finoñellena, cai comeciaina ocuiñotade.

3

Jesús Moisés micori baifemo faite

¹ Cue amatiai, jeacino anamo omoi jai iñena jira, ie dibeimo omoina
 Jesús jai fetua jira, naimie siño jitona jira, naimiemo omoi comeciaina faca.
 Naimiena ja ñaiticue. Ie rafuena lollena, Jusiñamui naimiena orede. Naimie
 lloga rafuena jai cai ñnuamona, naimiedi Jusiñamui diga cai facaina nanoca
 ñairaima. ² Ie Moo cominina naimie raise sedajanona, naimiedi ie Moo
 uaina ñnuanona, iena finode. Nana Israel cominina naimie sedajanona,
 Moisés micori Jusiñamui uaina ñnuanona, iena finode. ³ Jusiñamuimona
 Jesúsdi Moisés micori baifemo faite. Moisés micori mare; iadedi naimie caina
 jillotañede. Jesús caina jillotaja jira, Moisés micori baifemo Jesúsdi Jusiñamui
 iobide. Cai jillua jira, Jusiñamui cominina jaidicai. ⁴ Buena cai finuamona,
 naimie cominina jaiñedicai; iadedi naimie caina ie cominina dama itatarede.
⁵ Naimie facaina maijiano, Jusiñamui llua isoi, Moisés micoridi nana hebreos
 cominina raise sedade. Ie cominimo Moisés micori Jusiñamui naimiemo
 lloga uaina raise llote. Naimiemonona Jusiñamui ico lolle uaidi uanaicinona
 uiñoticai. ⁶ Jusiñamui facaina maijianona, Moisés micori ie cominina sedade;
 iadedi Cristodi Jusiñamui Jitona jira, naimie ie cominina sedade. Naimiena cai
 ñnocana jaia, naimiemo caimare cai ocuiria, Jusiñamui ua cominidicai.

Jusiñamuimona abido cai jaiñellena, bie rafuemonona cai fueua

⁷ Jusiñamui Joreño caimo birui lloia, iena cacarei. Ero, Jusiñamui jaie llua
 cuetatate:

⁸ Omoi jaiagai isoi iñeno.

Jofue iñenanomo omoi jaiagai ia, cue uaina ñnoñedimaci.

⁹ “Naimie uaina raise uiñoticai” raillanona, cuena facacabitimaci.

Cuarenta años cue siño finoca rana ciodimaci; iadedi jaca ñnoñedimaci.

¹⁰ Naimacimo lloticue: “Omoi diga iciriticue.

Cue dibeimo omoi illamo omoi comeciaina facañedomoi.

Cue lloga uaido jaiacañedomoi”.

¹¹ Omoï diga cue icirilla jira, nainomo uri illena, omoïmo cue lloga eniruemo jaca jaiñeitomoi.

¹² Cue amatiai, cai jaiagai rafuena cai uiñuamona, cai fueua. Unai Jusiñamuimona abido omoï jaiñellena, naimie jai lloga rafuena omoï ñnocana jai. Omoïmona bu raise ñnoiacañenia, naimiemo llono. ¹³ Jusiñamui rafuena omoï raise ñnollena, nagarui conini omoï comeciaina ocuiñota. Omoïmona jeacina ebiruiñellemona, jeacino anamo omoï ñnellesa, birui Jusiñamui rafuena raise ñno. Jeacino anamo omoï dane jaia, Jusiñamui rafuena ñnoñeitomoi. Iemona naimie ricailafue anamo dane iitomoi. ¹⁴ Cristomo cai duilla jira, naimie cana jaca canuanona, cai comeciaina marena caimare jaca itataite. Nana cai ille dinori naimiena cai nano ñnua isoi, cai ñnocana jaia, marena caimare iiticaï. ¹⁵ Ie jira naimiena ñno. Bie jaie cueda: Jusiñamui lloga uaina birui cacarei.

Jofue iñenanomo cai jaiagai ia, Jusiñamui uaina ñnoñedimaci cueda. Naimaci isoi iñeno.

¹⁶ Egiptomona Moisés micori anado jaidimaci. Diga icaiño Jusiñamui uaina cacadimaci; iadedi iena raise ñnoñedimaci. ¹⁷⁻¹⁸ Cuarenta años jofue iñenanomo itimaci; iadedi naimiena naimaci ñnoñena jira, Jusiñamui naimaci diga icirite. Naimiena ñnoñena jira, naimacimo Jusiñamui llote: “Omoïmo cue lloga eniruemo jaca jaiñeitomoi” llote. Ie jira jofue iñenanomo naimacimo Jusiñamui jai lloga eniruemo jaiñeno fioidimaci. ¹⁹ Jusiñamui uaina naimaci ñnoñena jira, naie Canaán railla eniruemo jaca jaiñedimaci. Naimaci comeciiai jaca uri illana uiñoñedimaci.

4

¹ Jusiñamui ñbeimo raise cai illamona, Jusiñamui cai comeciiai birui uri illana jitaide. Naimie lloga uai nia saiñede. Caimona damerie iese ñnellesa, cai jaiagai isoi cai ñnellena, abina rairuicana mai cai jailla. ² Jusiñamuidi comini comeciiai uri illana jitaide. Cai jaiagaimo iena llote. Diga icaiño naie mare rafuena cacadimaci; iadedi iena naimaci ñnoñena jira, iemona buena oñedimaci. ³ Jusiñamuidi cai comeciiai uri illana birui caimo jai llote. Cristo ie mare rafuena jai cacadicaï. Naimie uaina cai ñnua jira, cai comeciiai jai uri ite. Cai jaiagai comeciiai uri iñede. Moisés micori cuimona iena uiñoticaï. Cueda: Naimaci diga Jusiñamui icirilla jira, naimacimo lloga eniruemo jaiñedimaci Comeciiai uri illana jaca uiñoñedimaci

cueda. Jusiñamuidi nana comini comeciiai uri illana jitaide. Eniruena naimie finocamo, comini comeciiai uri illana jitaide. ⁴⁻⁹ Iena Moisés micori jaie cueda: Seis digarui raifi illanona, Jusiñamui nana rana finode.

Naimiemona nana naimie finoca ra mare.

Naimie comeci caimare uri illamona, siete iruimo jafaici ote

cueda. Jusiñamuidi nana comini comeciiai uri illana nia jitaide. Moisés micori facaise cai jaiagai comeciiai uri illana jitaide; iadedi naimiena naimaci ñnoñena jira, naimaci comeciiai jaca uri iñede. Moisés micori fioidilla mei, bie eniruemo Josué micori cai jaiagaina ifode; iadedi naimaci rilla mei, Jusiñamuina naimaci ñnoñena jira, naimaci comeciiai jaca uri iñede. Josué micori illa facaisemona diga años illanona, David micori comeciiai uri illana jiai llote:

Naimie uaina birui omoï cacaia, iena ñno

llote. Naiemona Jusiñamui cai comeciiai uri illana jitaillana uiñoticaï. Naimiena ñnotinodicaïmo naie rafue jai duide. ¹⁰ Jusiñamuina cai ñnuamona, cai comeciiai jai uri ite. Cai comeciiai uri illena, jaie rafuedo jaiñedicaï.

Naimiena cai #nuamona, naimie illanomo ico iiticaí. Nana naimie finoca rafuena naimie fuidua mei, nainomo uri iiticaí.

¹¹ Cai jaiagai #noñedimaci. Cai faifiñellena, naimaci isoi cai jaiñena; iadedi Jusiñamui uaina #nocana mai cai jailli. Jusiñamuina cai #nuamona, naimiedi cai comeciaí uri itatate. ¹² Naimiena cai #noñenia, naimie iena uiñote. Naimie jaca ite. Naimie siño. Ie jira naimie lloga uai jaca saiñede. Jaca siño. Cai comeciaino riire baite. Eo jairede lloebi bue isoide jaitaia, iena oni econuanona, nana nainomo fo ite rana bairetate. Ie isoide Jusiñamui lloga uai. Nana cai comeciaino iticinona riire bairetate. Nana cai comeciaina facajacinuaina riire bairetate. ¹³ Jusiñamuimona buna reirinide. Jusiñamui nana caina ciode. Nana cai finoca rafuena uiñote. Nana cai comeciaino iticinona uiñote. Ie jira naimie uaina #nocana mai cai jailli

Jesúdi cai facaina Jusiñamui diga nanoca ñairaíma

¹⁴ Jesúdi naie uaina cai #nuamo canoite, naimiedi cai facaina Jusiñamui diga nanoca ñairaímana jira. Ie Jito illamona, monamo Jusiñamui abimo birui naimie illamona, cai facaina Jusiñamui diga naimie ñaicabite. Ie jira naimiena #nocana jaiticaí. ¹⁵ Taife cai ramo faia, cai comeciaí raise cai ocuiñoñenia, Jesús caina canorede. Cai ramo faia isoi, Taife naimie naga isoide ramo faite; iadedi Taife uaina naimie #noñede. Iemona Taife ramo faiacinona #noñenana naimie uiñua jira, jeacinona oñede. Caina canorede. “Naimacina cano” ie Moomo llocabite. ¹⁶ Cai facaina ie Moo abimo naimie illa jira, cai comeciaina naimie ocuiñotaiacana jira, Jusiñamuina jaciruiñeno naimiemo cai jia. Naimie caina duenailamona, cai jeacinona feitaite. Cai comeciaina jiaí ocuiñotaite.

5

¹ Naga Jusiñamui diga ñairaíma comini facaina ñaia jira, caina naimie jai feiñua jira, Jusiñamui diga jaciruiñeno jai ñaiticaí. Moisés micorimo Jusiñamui jaie llua isoi, Aarón micorina Jusiñamui fetuanona, jeacino facaina comini Jusiñamuimo faga toiniaina fecauidimaci. Cominina Jusiñamui feiñollena, imaci ñairaíma Jusiñamui diga ñaite. ² Nana comini isoi naimiedi jeacino #nuamona, comini facaina Jusiñamui diga ñairaíma ñaiana raise uiñote. Jusiñamui dibeimo raise jaiñedinona fecuise canorede. ³ Comini facaina toiniaina fecauide; iadedi naimiemo jeacino illa jira, naimie facaina toiniaina jiaí fecauide.

⁴ Naimie jitailla jira, Jusiñamui diga ñairaímana buna jaiñede; iadedi naimiena Jusiñamui fetua jira, iena jaide. Jusiñamui Aarón micorina fetuana uiñoticaí. ⁵ Cristo jitailla jira, cai facaina Jusiñamui diga ñairaímana naimie jaiñede; iadedi naimiena Jusiñamui fetua jira, cai facaina ñairaímana jaide. Ie Jitona naimie illamona, Jusiñamui naimiena fetode. David micori jaie ciegafuiaimona iena uiñoticaí. David micori Jusiñamui llua jaie cuega: Cue Jitodio. Jai o Moodicue

cuega. ⁶ Ie Jitona jiaicaiño Jusiñamui ñaite:

Melquisedec micori isoi ona comini facaina cue diga ñairaímana jaca itataticue.

⁷ Eniruemo Cristo ia, iimana naimie jailla jira, duere sefuide. Naimie fiodaiacana iaírei ia, Jusiñamuimo eo jide. Naimie fiodaiñena Jusiñamui jillotarede; iadedi Jusiñamuimo ado llote: “Cuenallegi cacaitaño; iadedi cue comeci jitailla isoi finoñeno. O comeci jitailla isoi fino” llote. Jusiñamui uaina naimie raise #nua jira, Jusiñamui naimie jiana cacajano fairiote. ⁸ Naimiedi Jusiñamui Jito; iadedi Jusiñamui naimiena llegi cacatate. Iemona Jusiñamuina #nocana jaca jaillana naimie uiñote. ⁹ Naimiena ie Moo oretajanona, ie jitailla rafuena naimie raise marena fuidua jira, Jusiñamui ecimo naimaci jaca illena,

nana naimiena ñnotinona jillotaite. ¹⁰ Melquisedec micori isoi comini facaina ñairaimana jaca illena, Jusiñamuidi naimiena fetode. Melquisedec micori uai jaca saiñena jira, naimie ifomo illena, jiaimiena jaca fetofede. Ie isoi Jesús uai jaca saiñede.

Cristo ðibeimona abido danomo jaiñeno

¹¹ Bie isoide rafuena omoimo lloiacadicue. Bie rafue irirede; iadedi Cristo rafuena omoi raise cacaiñena jira, omoi comeciai iena raise jitaiñena jira, omoimo iena raise llonidicue. ¹² Cristo rafuena are omoi cacaja jira, iedo omoi raise jaidomoidena, llofueraimana jaidomoi; iadedi iedo nia raise omoi jaiñena jira, jiaimie omoina llofuiana nia jitaidomoi. Cristo ðibeimo omoina itatate rafuena nia jitaidomoi. Cristona nano omoi cacaja rafuena nia jitaidomoi. Cristo rafuena ñnocana nia raise jaiñedomoi. Eo janorede janosa monoi ijina jitaicabide. Einamacì isoi guillena nia jitañede. Janosa isoidomoi. Creyentena bu como jaia, Cristo rafuedo nia eo jaiñede. Iena eo uiñoñede. Monoi ijina jitaide isoide. Janosa monoi iji jirua mei, jiaie guille guillamona moonaitie. Cristo rafuena are cacadomoi; iadedi janosa isoi nia itomoi. Nia moonaiñedomoi isoidomoi. ¹³ Janosa monoi ijina nia jitailla jira, naimie nia moonaiñenana uiñoticaì. Naimie nia abina uiñoñede. Jusiñamui jitailla isoi marecinona finuana nia uiñoñede. ¹⁴ Guilledì moonaitimie ie. Ie isoide. Cristo rafuedo raise jaidimiedì Cristo rafuena uiñocana jaide. Iemona marecinona finollena, llofuiana uiñote. Maraiñedicinona finoñellena, llofuiana jiaì uiñote.

6

¹ Diga icaiño bie rafuena jai cacadomoi. Cristona nano cai cacaja rafuena raise cai ñnuamona, jiaie Cristo rafuena raise uiñocana mai cai jailla. Cai nano cacaja rafuena cai fueoiacana siadocabiñelli. Cristo ðibeimo caina itatañede rafuedo navui jaidicai; iadedi cai comeciai iuai birui jai meidoticaì. Cristo ðibeimo itatate rafuedo birui jaidicai. Jusiñamuina ñnuamona, naimie ðibeimo jaidicai. ² Cristo ðibeimo bautizajana jai uiñoticaì. Llofueraimana jaillena fetuana jai uiñoticaì. Creyentiaina naimacì sedallena, naimacìmo cai onollì jonianona, Jusiñamuimo cai jianona, naimacì fetuana jai uiñoticaì. Nana creyentiaì fodaillamona jilluana jai ñnoticaì. Jusiñamuidi naimiena ñnoñedinona ìco jaca duere finollena jai ñnoticaì. ³ Naie isoide rafue mare; iadedi iena cai raise ñnuamona, Jusiñamui jitailla jira, naimie caina canuamona, jiaie Cristo rafuena fueocana mai cai jailli. ⁴ Uanaicinona omoi comeciai uiñuamona, Cristona omoi ñnuamona, Jusiñamui Joreño omoimo illamona, ⁵ Jusiñamui uaina mare omoi uiñuamona, Cristo uai siñonana omoi uiñuamona, abido danomo omoi jaiñellena, abina rairuicana omoi jai. ⁶ Cristo ðibeimona omoimona bu sofetena, jiaimie naimiena jillotanide. Jeacinona finocana naimie jaia, Jusiñamui ie jeacino oni dotañeite. Cristona naimie jitaiñena jira, Cristo fodaillana jai jitañede. Cristona jeare jai finode. Cristo finoca rafuena jamaide. Cristona naimie jitaiñenia, ¿niese naimie jillobite? Jillobiñeite. Ie jira abido danomo omoi jaiñellena, abi rairuicana omoi jai. ⁷ Ero, iena jiaie rafuedo lloiticue. Jusiñamui noci deitacabilla jira, enirue naimie riaitacabilla jira, iemo riarà sicuanona, iena ie nama raitia, naiemona ie llisillana naimie uamona, Jusiñamui iobide; ⁸ iadedi naie eniruemona riarà sicoñenia, maraiñede. Monaigi cuiraiò diga naiemona dama sicoia, maraiñede. Jusiñamui nainomo noci deitate; iadedi naiemona llisillana onide. Naie enirue caimanide. Maraiñede. Ie nama iobiñena jira, iena fañonocaide. Naie enirue isoidomoi. Jusiñamuimona mare rafuena

cadomoi. Iena inocana omoi jaia, naimie omoina iobitaite. Iena omoi jitañenia, naimiemona duere sefuitomoi.

Jusiñamui llua jira, cai comeciai ocuiñocana jaidicai

⁹ Cue isiruigaomoi, abi rairuillicinona omoimo lloticai; iadedi cai llofuiacino omoimo duiñenamo cai comeciaina facañedicai. Cristona inocana omoi jaillamo cai comecina facadicai. ¹⁰ Jusiñamui omoina raise uiñote. Naimiena omoi isiruillamona, jiaie creyentiaina omoi isiruillamona, naimacina navui canodomoi. Naimacina nia canodomoi. Ie jira naimiemona duere sefuiñeitomoi. ¹¹ Omoi comeciainona jiaie creyentiaina omoi canua isoi, Cristo rafuedo nana omoi ille dinori inocana omoi iocire jaillana jitaidicai. Naimie diga ico jaca omoi ille jira, iese omoi jaillana jitaidicai. ¹² Cristo rafuedo omoi jaillamona omoi sefuiruiñenana jitañedicai. Jusiñamui lloga uaina inocana jaidino isoi, omoi jaillana jitaidicai. Naimiena naimaci inuamona, naimie lloga uai fecuise naimaci ocurillanona, naimie lloga uaina oitimaci. Naimaci isoi omoi jaia, naimie lloga uaina jiai oitomoi.

¹³ Ero, Jusiñamuidi Abraham micorimo lloga uaina uiñotomoi. Naimiedi Jusiñamuina jira, uanaicinona llote. Tainona lloñede. ¹⁴ Abraham micorimo llote: “Ona jaca canoiticue. O diga jaca iiticue. Cue llua jira, o jito comuite. O uruiaina eo jebuitaiticue” llote. ¹⁵ Abraham micori naimie lloga uaina inote. Iena suillemo fecuise ocuride. Ie jito Isaac micori, Jusiñamui llua isoi, comuide. ¹⁶ Uanaicino cai llocabillana jiaie comini uiñollena, Jusiñamui mamecina llinoticai. “Jusiñamui caina ciode” lloticai. “Uanaicinona cai lloñenia, Jusiñamui caina duere finoite” lloticai. Ie jira cai lloga uaina buna uaitañede. ¹⁷ Ie isoide. Jusiñamuidi ie finolle rafuena caimo jai llote. Naimie lloga uai meidonillana cai uiñuana naimie jitaide. ¹⁸ Naimiedi Jusiñamuina jira, ie uai naimie jai llua jira, naimie tainona llonillana uiñotocai. Ie jira naimie lloga uai naimie finuana uiñotocai. Naimiena cai inuamona, naimie anamo cai illa jira, caina naimie eenua jira, cai comeciai ocuiñocana jaidicai. Naimie illanomo ico cai jaca illemo ocuridicai. ¹⁹ Naie rafuena Jusiñamui llua jira, cai comeciai ocuiñocana jaidicai. Ie lloga uaina naimie finollemo inoticai. Monamo Jusiñamui illanomo ico cai illena eo raise uiñotocai. Nainomo fiebillena, barco ie lloelluna illemo dotaja isoi, cai comeciai naganomo inellena, Jesús caina eenote. ²⁰ Jesús nainomo jai illa jira, naimie muidona nainomo jiai iiticai. Cai facaina nainomo ie Moo diga ñaicabite. Cai facaina nanoca ñairaimana jaca ite. Melquisedec micori ñaia uai saiñena isoi, Jesús cai facaina ñaia uai jaca saiñeite.

7

Melquisedec micori illa isoi, Jusiñamui diga ñairaimana Jesús jaide

¹ Iena omoi raise uibiñollena, Melquisedec micori rafuena omoimo lloiticue. Naimie micoridi Salem railla nairai ie illaima. Naimiedi comini facaina cai Moo Jusiñamui diga ñairaima. Cinco illaimana Abraham micori anafetaja mei, ie jofomo Abraham micori abido billano, naisomo naimie dine Melquisedec micori bite. Abraham micorimo marecinona Melquisedec llote: “Birui Jusiñamui ona canode. Naimie ona jaca canollena uiñotocue” llote. ² Jusiñamui diga ñairaimana Melquisedec illa jira, naimiemo Abraham micori dajerie rana fecade. Naie cinco illaimana anafetitajanona, naimaci rana bairuanona, nana naie ramona, riai uaimona ie décima facaina rana Melquisedecmo fecade. Melquisedec micoridi Salem railla nairai illaima. Melquisedec mameci oni dobañuamona, “Cominina raise marena sedadimie” railla. Ie cominina raise sedajamona, ie comini uri illa jira, comini illano

Salem railla mamecina jonega. ³ Naimie moona, naimie eina, naimie cominina uiñoñedicaí. Naimie jeiciaruina uiñoñedicaí. Naimie fiodaillaruina uiñoñedicaí; iadedi Jusiñamui Jito isoi Jusiñamuimona naimie feiñoga uai saiñena jira, comini facaina Jusiñamui diga ñairaimana jaca jaide. Naimie ifomo jiaimie iñena jira, naimie ñairaimana nia ite isoide.

⁴ Ero, cai cominimona Abraham micori cai jaiagai baifemo faite; iadedi Melquisedec micori Abraham micori baifemo faite. Ie jira naimiemo ie décima facaina rana fecade. ⁵ Moisés micorimona Abraham micori uruiaí Jusiñamui lloga uaina cacadimaci. Naimacimo Jusiñamui ie sedaja jofu finuana llotte. Nainomo maijidinomo nainomo maijiana llotte. Abraham micori uruiaimona Leví railla nairaina fetode. Nainomo maijidino comini facaina Jusiñamui diga ñauidimaci. Jusiñamui ocuica rafue naimaci maijia jira, naimaci comini ramona décima facaina rana feiñoudimaci. ⁶ Melquisedec micorimo Abraham micoridi ie rana fecade; iadedi Melquisedec micori Abraham micori cominiñede. Leví railla nairai imieñede. Naisomo Abraham micori dine Melquisedec micori billanona, Abraham micorimo marecinona llotte: “Jusiñamui ona jaca canoite. O diga jaca iite” llotte. ⁷ Melquisedec micori Abraham micori baifemo faia jira, naie marecinona naimiemo llotte. ⁸ Ero, Melquisedec micorimo Abraham micori rana fecade; iadedi Melquisedec micori fiodaillaruina uiñoñedicaí. Naimie uai saiñena jira, jiaimie naimie ifomo jaca iñede. Comini facaina Jusiñamui diga ñairainimo naimaci ramona décima facaina cai judíuai cominidi fecauidimaci; ia naie ñairaini fiodaicana jaillana uiñoticaí. Naimaci uai sailla jira, jiaino naimaci ifomo meidoudimaci. ⁹⁻¹⁰ Leví micoridi Abraham jito. Leví micorimona Leví railla nairai comuide. Naimacidi Jusiñamui diga ñairainina jaidimaci. Cominimona décima facaina rana feiñoudimaci. Leví micori nia comuiñenia, Melquisedec micorimo Abraham micori décima facaina rana fecajamona, Abraham micori Leví ie usumana jira, Melquisedec micoridi Leví nairai baifemo faiana uiñoticaí. Melquisedec micoridi Jusiñamui diga ñairaini baifemo faiana uiñoticaí. Melquisedec isoi Cristo illa jira, Cristodi Leví baifemo faiana uiñoticaí. Cristodi nana naie ñairaini baifemo faiana jiaí uiñoticaí.

¹¹ Jusiñamui diga ñairaini finouilla rafuedo Jusiñamui jitailla isoi marebicaiñedicaí. Naimaci finouilla rafuedo cai jillobidicaidena, jiaie rafuena jitaíñedicaí. Naie rafuedo cai jillobiñena jira, Jusiñamuidi Cristona orede. Cai facaina Cristo ñairaimana jaillena, naimiena orede. Caina jillobitallena, naimiena orede, jiaie rafuedo cai jillobiñena jira. Jusiñamui Moisés micorimo jaie llua isoi, comini facaina nano ñairaimadi Aarón micori. Naimiedi Leví railla nairai imie. Naimie jitoniamona comini facaina ñairainina itimaci. Iena uiñotomoi. Aarón jitoniamona Cristo iñede. Aarón maijia rafuemo Cristo duiñede; iadedi Melquisedec rafuemo duide. ¹² Comini facaina ñairainina jaillana jai meidua jira, Jusiñamuidi naimaci rafuena jiaí meidote. ¹³ Iena lloiticue. Aaróndi Leví railla nairaimo duide. Dani Leví nairaidi comini facaina ñairainidimaci. Dani naimacidi comini facaina Jusiñamuimo rana fecauidimaci. Cristo naie nairaimo duiñede. ¹⁴ Cristo jiaie nairaimo duide. Judá nairaimo duide. Judá nairaimona Jusiñamui Jito comuillana uiñoticaí. Naie nairaimona comini facaina ñairaimana bu jaillana Moisés micori jaie jaca lloñede.

¹⁵ Cristo billa jira, Moisés micori lloga rafue meiduana uiñoticaí. Melquisedec micori illa isoi, comini facaina ñairaimana Cristo jaca iite. ¹⁶ Moisés micori lloga rafue isoi, Cristodi ñairaimana jaiñede; iadedi Jusiñamui uaido ñairaimana naimie jaide. ¹⁷ Jusiñamui lloga uaimona iena uiñoticaí. David micori naimiena jaie cuega:

Melquisedec micori illa isoi, odi comini facaina ñairaimana jaca iitio cueda. ¹⁸ Comini facaina ñairaimana jaillena Moisés micori jaie cueda. Naiemona jilluana comini oñena jira, naie uai jai saide. Naiedo jaillamona, naimaci jeacinomona jilloñedimaci. Naiedo jaillamona, naimaci comeciaina ocuiñotañedimaci. Naiedo jaillamona, naimaci Jusiñamuina nabaiñedimaci. ¹⁹ Naiedo jaillamona, Jusiñamui jitailla isoi marebicaiñedicaí. Iedo birui jaiñedicaí. Jiaie rafuemo birui ocuridicaí. Cristo finoca rafue muidona, Jusiñamuina cai nabaillamona, Jusiñamui diga birui ñairedicaí.

²⁰ Jusiñamui llua jira, Cristo cai facaina ñairaimana jaide. ²¹ Leví micori jitonaiñidi imaci jeiciamona, comini facaina ñairainina jaidimaci. Naga icaiño Jusiñamuidi naimacina ñairainina jaillana fetofede; iadedi ie lloga uaina jira, Cristo cai facaina ñairaimana jaide. David micori Jusiñamui llua jaie cueda: Cue jai llua jira, cue llua finoiticue.

Cristomo lloticue: “Comini facaina ñairaimana jaca iitio”

cueda. ²² Jesús ñairaimana jaca illa jira, naimie jailla rafue Moisés micori lloga rafue baifemo uaide. ²³ Moisés micori lloga rafue anamo ailluena ñairainidi itimaci. Naimaci fiodaicana jailla jira, ailluena ñairaini jitaide, fiodaitino ifomo meidollena. ²⁴ Naimie jaca illa jira, Cristo ñairaimana jaca iite. Naimie ifomo jaca buna meidoñeite. ²⁵ Naimie jaca illa jira, comini facaina Jusiñamui diga jaca ñaicabite. Ie jira Cristodi nana Jusiñamui dibeimo iacadinona, naimaci jeacinomona, ua jaca jillotarede. ²⁶ Caina canollena, naimie isoide nanoca ñairaimana jitaideicaí. Ie Moo isoi naimiedi mareuidimie. Naimiemo jeacino jaca iñede. Jeacino finouidino dibeimo naimie iñede. Jusiñamuidi ie ecimo naimiena itatate. Ie jira naimie caina canorede. ²⁷ Jusiñamuimo fecallena, naimaci jeacino facaina naimie iba oñellena, Moisés micori llua isoi, nanoca ñairainidi nagarui toiniaina fatimaci. Dani naimaci jeacino facaina nagarui iese finodimaci. Iemei comini facaina nagarui iese jiai finodimaci. Cristo naimaci isoñede. Naimie jitailla jira, comini jeacino facaina naimie fiodailla jira, comini facaina dacaiño fiodaite. Naimaci jeacino facaina naimie dane fiodañeite. ²⁸ Moisés micori facai ñairainidi jeacinona finocana jaidimaci. Fiodaicana jiai jaidimaci; iadedi jiaie rafue birui illa jira, ie uaido Jusiñamuidi ie Jitona ñairaimana jaillana jai fetode. Naimiedi jaca mareuidimie. Jeacino jaca finoñede.

8

Cristo muidona jiaie rafue birui ite

¹ Cristomo ite rafuena lloticue. Cai facaina ñairaimana birui naimie ite. Illaimana naimie illa jira, monamo Jusiñamui ecimo ite. ² Jusiñamui illanomo naimie illanona, nainomo cai facaina birui ñaicabite. Moisés micori facaise comini finoca jofomo Jusiñamui diga ñauidimaci; ia birui Jusiñamui finoca illanomo Cristo illamona, cai facaina ñaicabite. ³ Moisés micori naga ñairaima jeacino facaina Jusiñamuimo faga toiniaina fecauillena llote. Cristodi comini jeacino facaina toiniaina fecañede; iadedi naimie jitailla jira, cai jeacino facaina naimie dama fiodaite. ⁴ Moisés micori jaie llua isoi, benomo ite ñairaini faga toiniaina fecauilla jira, eniruemo Cristo nia ia, ñairaimana naimie jainide. ⁵ Comini facaina Jusiñamui diga ñaillena, Moisés micori facaise naie ñairaini Jusiñamui jofomo jaisoidimaci. Iemona Cristo monamo finocabilla rafuena uiñoticaí. Monamo cai facaina Jusiñamui diga Cristo birui ñaicabite. Iemo naimie comeciaina facajanona, Jusiñamui jofona Moisés micori jaie niacania, Jusiñamui naimiena llofuede: “Monamo iticue; ia cue jofu eniruemo jiai finoitomoi. Sinaí raila anedu navui o ia, ona llofueticue. Ona

cue llofuia isoi, cue jofona fino” llofuede. ⁶ Eniruemo Cristo birui iñenamona, monamo cai facaina Jusiñamui diga birui ñaicabite. Cristomona cai cacaja rafuedi Moisés micori facaise ñairainimona cai cacaja rafue baifemo faia jira, Cristodi Moisés micori facaise ñairaini baifemo faite. Cristomona cai cacaja rafuedi cai comeciai marena itatate. Ie jira, bie rafue jiaie rafue baifemo faite. ⁷ Moisés micori facaina rafuedo jaillamona, Jusiñamui jitailla isoi buna marebicaiñede. Ie jira Jusiñamui jiaie rafue illena llote.

⁸ Moisés micori lloga uaina cai jaiagai ñnoñena jira, Jusiñamui jai llote: Naie cominimo jiaie rafuena ico jiairuido lloiticue.

⁹ Naimaci jaiagaimo cue lloga rafuena jaie lloticue.

Naie facaiseconi Egiptomona naimacina canuanona, naimacina atidicue; iadedi Moisés micorimo cue lloga rafuedo jaiñedimaci.

Ie jira naimacina fainonocaidicue.

¹⁰ Naimacimo jiaie rafuena ico jiairuido lloiticue.

Iena naimaci uñuamona, cuena raise ñnoitimaci.

Naimaci Jusiñamuidicuenta jira, naimaci cuena sedaitimaci.

Cue anamo raise naimaci illa jira, cue comininitimaci.

¹¹ Nana naimaci cuena uñnoitimaci.

Ie jira naimacimo: “Cai Namana omoi ñno” buna niese lloñeite.

Jamai bue isoidinomona cuena ñnoitimaci.

Jamai bue isoiñedynomona cuena jia ñnoitimaci.

¹² Naimacina cue duenaillamona, naimaci jeacinona jaca feítaiticue

llote. ¹³ Jiaie rafuena Jusiñamui jai lluamona, Moisés micorimo lloga rafue jai saillana uñnoticai. Moisés micori lloga rafue caimo jai duiñede. Cristomona jiaie rafuena birui jai cacadica.

9

Hebreos comini Jusiñamui jofona eniruemo jaie nitimaci. Monamo Cristo birui illanona, Jusiñamui ecimo naimie ite

¹ Jusiñamuidi Moisés micorimo diga rafuena jaie llote. Naie rafuemona cai fueollena, iena lloiticue. Naimiena sedajana llote. Naimie sedalle jofo finuana jia ñlote. ² Jusiñamui llua isoi, hebreos comini naie jofona nitimaci. Jedaciede iniroimona finoca jofona nitimaci. Naie jofo jeraimo mena cuartos ite. Nano fo jailla cuartomo Jusiñamuina nagarui sedadimaci. Nainomo lamparin isoide ra ite. Siete diga naie boadi ite. Mesa jia ñite. Nainomo doce llomenico joide. ³ Mena cuartos illena iniroina sebiñoga. Naie baifemo iticuartodi Jusiñamui illano. ⁴ Naie iniroi facai oromona finoca mesa ite. Nainomo caimare soride rana jobaisoidimaci. Baifemo iticuartomo cajón ite. Ie emodo oro iena jonega. Cajón jeraimo oromona finoca nogo ite. Nainomo ite maná railla fariñana eruaide guille. Aarón micori jiguida nainomo jia ñite. Jusiñamui uaido naie jiguida dacaño llisilla jira, nainomo ite. Jusiñamui cuega nofici ibici jia ñite. ⁵ Cajón emodo ibaillabicidi ite. Ie emodomo nagafebei dine oromona finoca mena Jusiñamui jaienici joreño ite. Conimamo fo eruaide. Naie motomo Jusiñamui quenirena baireuide. Naie rafuena raise omoi jai uñua jira, iena omoimo are lloñeiticue.

⁶ Naie isoide rana finodimaci. Iemei Jusiñamui diga ñairainimona damierie nano fo jailla cuartomo nagarui jaidimaci. Moisés micori llua isoi, nainomo ite rafuena finollena, iedo jaidimaci. ⁷ Baifemo iticuartomo jaca jainidimaci. Nanoca ñairaima naga año nainomo darui dama jaide. Jurareta faja mei, fo jaillanona, diruena naie cajón ibaillabicimo llerede. Dama naimie jeacino facaina diruena nano llerede. Chivo fajanona, dane fo jaide, ie comini

jeacino facaina diruena llerellena. Iena finuamona, cominina duenaila-
mona, Jusiñamui naimaci jeacino facaina ibana oñede. ⁸ Jusiñamui Joreño
caina llofuiamona, biena birui uiñoticaí. Naie jofo nia ia, jamai comini fo
jainina jira, Jusiñamui diga, cominidi atona nabairinidimaci. ⁹ Bie rafuena
birui nia finodimaci. Moisés micori lloga uaido bu jaia, ie jeacino facaina
faga toiniaina Jusiñamuimo fecallena jobaide. Iena finocabidimaci; iadedi
Jusiñamui jitailla isoi, naiemona naimaci comeciaina raise finonidimaci.
¹⁰ Jusiñamuina naimaci raise sedallena, Moisés micoridi diga guille fimaide.
Jiruana jiaí fimaide. Naimaci abiaína finollena jiaí llote. Nie isoide guille,
nie isoide jirole, niese naimaci abiaí finollena, nana naie isoide rafuedo
jaidimaci. Cristo nia biñena facaiseconi iese jaidimaci, naimaci comeciaina
raise finobitallena; iadedi Cristo billamona, jiaíe rafue birui ite.

¹¹ Moisés micori finoca jofomo Jusiñamui dine Cristo jaiñede; iadedi
Jusiñamui abimo monamo Cristo jai jaide. Nainomo cai facaina Cristodi
ñairaimana jai jaide. Ie jira Jusiñamuina jai nabaidicaí. Cai comeciái
raise jai finobide. ¹² Naimie fiodailla mei, dane jilluanona, Jusiñamui dine
monamo naimie abide jaide. Toiniái diruena Moisés facaise ñairaini fe-
caja isoi, cai jeacino facaina Jusiñamuimo Cristo naga año fecañede; iadedi
dacaiño naimie fiodaillamona, naimie diruedo cai jeacino facaina caina
jillotate. ¹³ Maraiñede rafuena finoia, Moisés micori llogacino anamo itino
Jusiñamuina sedallena, naimie jofomo jainidimaci. Moisés micori jaie llua
isoi, toiniái diailla mei, jobaide toiniái ie jusefo oni faianona, Jusiñamui jofomo
jairedimaci. Nainomo naimiena sedallena, fo jairedimaci. Iemona Jusiñamui
naimacina duere finoñede. ¹⁴ Toiniaina fañeno Jusiñamuina birui sedadicaí.
Cristo fiodaiacana jira, naimie diaillamona, cai jeacino facaina Jusiñamui
caina duere finoñeite. Cristo comeci jitailla jira, Jusiñamui Joreño naimiena
oretaja jira, naimie fiodaite. Cristodi Jusiñamui Jitona jira, naimiemo jeacino
iñena jira, cai jeacino facaina naimie fiodaillamona, cai comeciaina raise
finobitade. ¹⁵ Cristo jai finoca rafue muidona, Cristo monamo jailla jira, jiaíe
rafue birui ite. Bie rafuedi comini Jusiñamui diga jaca illena llote. Nana
Jusiñamuina ñnotino ie. Moisés micori lloga uai anamo itinodi jeacinona
finocana jaidimaci. Naimaci jeacino facaina faga toiniaina Jusiñamuimo jaie
fecauidimaci; iadedi Cristo jai fiodailla jira, naimiena bu ñnoia, naimie
jeacino facaina Jusiñamui birui ibana oñeite. Nana Jusiñamuina ñnotinodi
naimie jai llua isoi, naimie diga jaca iitimaci.

¹⁶⁻¹⁸ Jusiñamui jofo jaie finua mei, Moisés micorimo Jusiñamui llote: “Cue
lloga rafuena raise finodomoí. Bie jofomo cuena sedallena, faga toiniái dirue
diga bie jofona llereca. Nana naiemo ite rana jiaí llereca. Iena o finuamona
iobiticue. Cue lloga uai finocana mai o jai” llote. Iese naie rafue jaie tainede.
Cristo fiodailla jira, Jusiñamuimona birui jiaíe rafue caimo ite. Cristo diailla
jira, Cristo fiodaillamona, bie rafue jai tainede. Bie rafuedo cai jaillamona,
cai jeacinomona jai jillobidicaí. ¹⁹ Ie cominimo nana naimiemo Jusiñamui
lloga rafuena Moisés micori llua mei, faga jurareta dirue diga, faga chivo
dirue diga, nana naie lloga rafue ciegabiaina llerede. Cominina jiaí llerede.
Naie dirue jinui diga nano faíte. Febecode ra jiaírede ñiroi diga maíga.
Iemei naie ra diga naie diruena llerede. ²⁰⁻²¹ Jusiñamui jofona dirue diga
llerede. Nana nainomo ite rana jiaí llerede. Llote: “Jusiñamui llua isoi, biena
finodicue. Naimie llua jira, bie dirue illa jira, naimie caina duere finoñeite”.
²² Moisés micorimo Jusiñamui llua isoi, raise finobillena, nana rana dirue diga
llerede. Toiniái fajamona, dirue illa jira, Jusiñamuidi jeacino facaina ibana
oñede; iadedi jeacino facaina iba oñellena, jiaíe rafuena Moisés micorimo

lloñede.

Cristo fiodailla jira, Jusiñamui cai jeacino oni dotade

²³ Jusiñamuidi Moisés micorimo toiniaina fajana jaie llote. Naie lluana finuamona, Jusiñamui iba oñede. Birui cai jeacino oni dotallena, Jusiñamuidi Cristo fiodaillana jitaide. Cristo fiodaillafue faga toiniái baifemo faia jira, monamo cai jaca illena, jeacino oni dotallena, Cristo fiodaite. ²⁴ Naimie fiodaillamona, cai facaina ñairaimana Cristo jaide. Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite. ²⁵ Dacaiño cai facaina monamo Jusiñamui dine naimie jaide. Moisés micori facaise nanoca ñairaima Cristo isoiñede. Naimie naga año Jusiñamui jofomo fo iticuartomo darui jaide. Naimie dirue uiñede; iadedi toiniaina fajanona, ie diruena uite. ²⁶ Cristo iese itena, nano facaisemona diga icaiño comini jeacino facaina naimie fiodaite. Iese iñena jira, eniruemo birui dacaiño naimie billanona, naimie jitailla jira, naimie dacaiño fiodaite. Jeacino anamo cai iñellena fiodaite. ²⁷ Nana dacaiño fiodaiticai. Iena uiñoticai. Fiodailla mei, Jusiñamui uicomo iiticai. Naimiena cai inoia, caina feiñoite. Naimiena inoñedinona duere finoite. ²⁸ Dacaiño Cristo jai fiodaillana uiñoticai. Comini jeacino facaina dacaiño jai fiodaite. Naimie dane bia, fiodaillena biñeite; iadedi dane bia, naimiedi ie billemo iocire ocuiritona monamo Jusiñamui illanomo uite.

10

¹ Moisés micori facaise naie ñairainidi Jusiñamuimo fecallena, toiniaina fajanona uisoidimaci; iadedi Jusiñamui jitailla isoi, naiemona marebicaiñedimaci; iadedi Moisés micori lloga uaimona jeacino cai finuana uiñoticai. Jusiñamui cai jeacino oni dotajana uiñoticai. Jusiñamui jaca mareuidimiena uiñoticai. Jusiñamuina nabaillena janore uiñoticai. Cristo jiaie rafue caimo jai iga. Naimie fiodailla jira, cai jeacino jai feide. Jusiñamuina raise nabairedicai. ² Naie faga toiniái Jusiñamuimo fecajamona comini marebicaidena, naiena fecarainidimaci. Naimaci jeacino dacaiño dotaiadedi, faga toiniaina dane fecañedimaci; iadedi naimacimo jeacino jaca illa jira, faga toiniaina fecauidimaci. ³ Naiena fecauillamona, jeacino finocana naimaci nia jaillana uiñotimaci. ⁴ Toiniái dirue illa jira, Jusiñamuidi comini jeacino jaca feitañede. Dama Jesús dirue illamona, Jusiñamuidi comini jeacino feitate. ⁵ Eniruemo jaie billanona, Jusiñamuimo iena Cristo llote:

Jeacino facaina toiniái fajana jai jitañedio.

Ie jira eniruemo comena jaillena, comini jeacino facaina cue fiodaillena, cuena oredio.

⁶ Jeacino facaina ailluena faga toiniaina jai jitañedio.

⁷ Iena cue uiñuamona, eniruemo cue billanona, o jitailla rafuena finoiticue.

O facaina lloraini micoriai iena jaie cuetimaci

llote. ⁸ Cristo lluana dane ñaiticue. Cristodi Jusiñamui Moisés micorimo llogacino ñaite. Jusiñamui jaie llua isoi, naimiemo cominidi jeacino facaina faga toiniaina jaie fecauidimaci. Iena Jusiñamui birui jai jitañede. ⁹ Cristodi: “Jusiñamui jitailla rafuena finuaibiticue” llamona, Moisés micorimo llogacino jai saillana uiñoticai. Jiaie rafue birui illana jai uiñoticai. ¹⁰ Jusiñamui jitailla jira, Jesucristona orede. Cai facaina naimie fiodaillena naimiena orede Jesucristo ie Moo jitaillacino finuamona, cai jeacino jai jaca jillobidicai. Jai marebicaidicai.

¹¹ Nana Moisés micori llogacino jaide ñairainidi nagarui comini jeacino facaina faga toiniaina Jusiñamuimo fecauidimaci; iadedi naie rafue naimaci

finuamona, Jusiñamui naimaci jeacinona feitañede; ¹² iadedi dacaiño Cristo fiodaillamona, Jusiñamuidi nana cai jeacinona faitate. Bene naimie finoacaga rafue fuilla jira, illaimana jira, Jesús Jusiñamui ecimo abido jaide. ¹³ Nana naimie dibeimo iñedinona naimie emodofillemo naimie birui ocuride. ¹⁴ Dacaiño Cristo fiodaillamona, naimiena cai inuamona, Jusiñamuimona jaca marebicaidicai. ¹⁵ Jusiñamui facaina lloraima micori ciegafuemonona Jusiñamui Joreño caina iena uiñotade. Naimie facaina lloraima micori Jusiñamui lluaña jaie iese cuega:

¹⁶ Hebreos cominimo jiaie rafue ico jiairuido lloiticue.

Cue rafuena naimaci uiñuamona, cuena raise inoitimaci.

¹⁷ Jiaie cuega:

Naimaci jeacino jaca faitaiticue.

¹⁸ Cristo jai fiodailla jira, jeacinona Jusiñamui jai faitaja jira, faga toiniana naimiemo fecajana dane jai jitaiñede.

Jusiñamuina cai nabaili

¹⁹ Cue amatiai, Jesús fiodailla jira, Jusiñamuina jaciruiñeno birui nabairedicai. Naimie cai Moo jai illanona, naimie diga meiruiñeno jaciruiñeno birui jiaie ñairedicai. ²⁰ Moisés micori facaise nanoca ñairaima fo iticuartomo jaillena, sebiñoga iniroi oni dibeimo jaidimaci. Iese Jusiñamui illanomo ridimaci. Jamai comini nainomo jainidimaci; iadedi Cristo jai fiodailla jira, Jusiñamuina atona birui nana nabairedicai. Naimie diga birui atona nana ñairedicai. ²¹ Cristona jai cai inua jira, cai facaina nanoca ñairaimana naimie illa jira, ²² cai mare comeciainona Jusiñamui diga birui cai ñaili. Naimiena eo cai inuamona, cai comeciai jeanillamona, naimie dibeimo cai bautizajamona, naimiena mai cai nabaili. ²³ Cristo caina jilluana inoticaie Monamo naimie diga cai illemo ocuridicai. Jusiñamui inogamiena jira, naie rafuena inocana mai cai jailli. ²⁴ Jiaie creyentiaimo cai comeciaina cai facaja. Conini cai isiruitacana cai jailli. Coninimo cai mare rafue finocana cai jailli. ²⁵ Rollena omoimona damerie oficabiñedimaci. Naimaci isoi omoi iñeno; iadedi Jusiñamuina sedallena oficabi. Abido omoi danomo jaiñellena, conini comeciaina ocuiñotallena, oficabi. Jesucristo abido billirui iarei illa jira, naimiena raise inollena, conini omoi comeciai ocuiñocana mai omoi jai.

²⁶ Cristo finoca rafuena bu uiñua mei, iena naimie inoñenia, jeacinona naimie finocana jailla jira, Jusiñamui naimie jeacinona feitañeite. Cristo fiodaillana bu jamaia, Jusiñamui ie jeacinona feitañeite; ²⁷ iadedi Jusiñamuidi naimiena duere finoite. Eo jacirede rafue anamo iite. Iraimo Jusiñamui nana naimie dibeimo iñedinona duere finoite. ²⁸ Moisés micori jaie cuega: “Jusiñamui llote: ‘Menaimie naimiena daje isoi lloillamona, Moisés micori llogacinona jamaidimiena dueruiñeno meinega’”. ²⁹ Iese duere sefuillana jaie llote; iadedi birui ite lloga rafue bu jitaiñenia, bai duere sefuite. Jusiñamui Jitona bu jitaiñenia, Jusiñamui birui lloga uaina bu jitaiñenia, Cristo fiodaillana bu jamaia, Jusiñamui Joreño jeare bu ñaia, Jusiñamuimona naimie eo duere sefuite. Cristo fiodaillamona, Jusiñamui naimiena inotimiena marebicaitarede. Jusiñamui Joreño naimiena duenaite; iadedi iena naimie jai jamaitaia, iena naimie jai jitaiñenia, Jusiñamui naimiena bai duere finoite. ³⁰ Ero, Jusiñamui jaie llote: “Maraiñedinona bu finoa, ibana oiticue. Cuena inoñedinona duere finoiticue” llote. ³¹ Jusiñamui duere finollicino anamo bu ia, eo jacirede rafue anamo jai ite. Naie duere finollicino anamo omoi iñellena, Jusiñamui lloga rafuena jamaiñeno.

³² Creyentiaina nano omoi jaillamo dane comeciaina faca. Creyentiañedinomona eo duere sefuidomoi; iadedi Cristona inocana

jaidomoi. ³³ Omoimona damierie marefomo navui duere sefuidomoi. Omoiri jaisitimaci. Omoina jifanododimaci. Omoina jeare finodimaci. Damieriena meinetimaci. ³⁴ Cárcelmo jonetinona duenaillamona, naimacina canocabidomoi. Cristomo omoi duilla jira, creyentiañedino omoi rana bairodimaci; iadedi omoi comeciai nia iocire itomoi. Omoi ramo omoi comeciaina eo facañedomoi; iadedi Cristomo jai omoi duilla jira, naimie omoi comeciaina jaca marebicaitaja jira, iemo omoi comeciaina facajamona, iocire itomoi. ³⁵ Jusiñamuimona iba ico omoi feiñua jira, Cristona nia ñnocana omoi jai. ³⁶ Jusiñamui jitaillacino omoi finollena, monamo jaca omoi illena, nie isoide ramo omoi jiria, Jusiñamuina nia ñnocana omoi jai. ³⁷ Jusiñamui buena lua jira, iese suite:

Cristo abido billirui iaiei illa jira, naimiena ñnocana omoi jai.

³⁸ Naimie nia abido biñenia, omoina cue jai marebicaitaja jira, cuena ñnocana mai omoi jailli;

iadedi cuena jitañedinori iobiñedicue.

³⁹ Naie isoidino jillobiñeitimaci. Naimaci isoi iñedicaí. Jusiñamuina ñnocana cai jaillamona, jaca jillobidicaí. Ie jira naimiena ñnocana mai cai jailli.

11

Jusiñamuina ñnocana jaidicaí

¹ Jusiñamuina cioiñedicaí; iadedi naimie illana ñnoticaí. Naimie lloga uaina ñnocana jaidicaí. Naimie lloga uai suillena ñnoticaí. Ie lloga uai suillemo ocuridicaí. ² Cai jaiagamona damierie iese ñnocana jailla jira, Jusiñamuimona marebicaidimaci. ³ Jusiñamui finoca rana birui ciodicaí; iadedi jaie nano dofoconi jaca buena iñede. Naie facaiseconi dama ie uaido Jusiñamuidi eniruena finode. Mona finode. Nana rana finode. Nana rana comuitate. Iena ñnoticaí.

⁴ Cai jaiagai rafuena ja lloiticue, naiemona cai fueollena. Abel micori Jusiñamuina jaie ñnuamona, naimiemo faga toica llaudana fecade. Ie feiñuamona, Jusiñamui naimieri iobide. Jusiñamuina ie ama Caín raise ñnoñena jira, naimie fecaca rari iobiñede. Iena feiñoñede. Abel micori Jusiñamuina ñnua jira, Jusiñamuimona naimie marebicaide. Abel micori jaie fiodaite; iadedi Jusiñamuina cai raise ñnollena, naimiemon nia fueoiticaí.

⁵ Enoc Jusiñamuina jaie ñnote. Naimiedi Jusiñamuina eo iobitate. Moisés micori ciegafuiaimona iena uiñoticaí. Jusiñamuina ñnuamona, Jusiñamuina eo iobitaja jira, naimie fiodaiñede; iadedi fiodaiñeno monamo Jusiñamui naimiena naimiena uite. ⁶ Jusiñamuina cai ñnoñenia, naimiena iobitañedicaí. Jusiñamuina cai nabaiacania, naimiena cai raise sedaacania, naimie illana ñnoticaí. Naimiena cai nabaiacania, cai jitaí raillano, caína canollena ñnoiticaí.

⁷ Noé micori Jusiñamuina jaie jiaí ñnote. Jusiñamui ico suille rafuena naimiemo llote. Enirue buillena llote. Iena ñnuanona, Noé micori aillue balsa emodomo jofona finode. Enirue buillamona ie comini diga jilloiacana jira, Jusiñamui lua isoi, balsana finode. Jusiñamui luana Noé micori ñnua jira, jillode. Noé micori Jusiñamui luana ñnote; iadedi naimie facaise ite comini ñnoñena jira, Jusiñamui riicaillafue anamo itimaci. Jusiñamuina naimie ñnua jira, Jusiñamui uruena naimie jailla jira, Jusiñamuimona Noé micori marebicaide.

⁸ Abraham micori Jusiñamuina jaie jiaí ñnote. Ie moo eniruemona naimie jaianillena Jusiñamui naimiemo llote. Are ite eniruemo naimie jaianillena llote. “Jiaie enirue omo iiticue” Jusiñamui llote. Abraham micori ñnote; iadedi ie jaillinona uiñoñede. ⁹ Jusiñamui lloga eniruemo Jusiñamuina ñnocana jaide.

Naie eniruemo ride; iadedi naie enirue naimiemo nia raise duiñede. Chivo itiraïmona niga iniroïmona sebiñoga jofomo naimie jaca ite. Ie jito, Isaac micori, naie isoide jofomo jiai ite. Isaac micori jito, Jacob micori, naie isoide jofomo jiai ite. Jusiñamuidi nana naimacimo daje isoide rafuena llote: “Bie enirue omoïmo iiticue” llote. ¹⁰ Abraham micori mare jofona finoñede, naie eniruemo naimie jaca iacaiñena jira; iadedi Jusiñamui diga monamo jaca illemo naimie ocuiride. Monamo Jusiñamui mare finolle illanomo ocuiride.

¹¹ Abraham micori aidi Sara micori. Jusiñamuina Sara micori ñnua jira, Jusiñamui naiñaiño abina mairitate. Naiñaiño eo jionaide; iadedi uruesite. Naiñaiño Jusiñamui llua isoi, naiñaiño uruesillana ñnote. ¹² Abraham micori jiai eo jionaide; iadedi jitona comuitate. Naimie jitomona naimie nairai eo jebuide. Facadonide ucuai isoi jebuidimaci. Facadonide conillie isoi jebuidimaci. Ailluena ucuai illa jira, naimaci facadonidicai. Ailluena conillie illa jira, iena facadonidicai. Ie isoide. Eo ailluena Abraham micori uruai illa jira, naimacina facadonidicai.

¹³ Abraham micori, Isaac micori, Jacob micori Jusiñamuina ñnocana jaidimaci. Nana naimacimo Jusiñamui lloga uaina suiñedemo fiodaitimaci. Nia fiodaiñena, Jusiñamui llogacinona cacadimaci. Iena ñnotimaci. Ie jira bie eniruemo naimaci jaca illemo comecina facañedimaci; ¹⁴ iadedi monamo jaca illemo comeciaina facadimaci. ¹⁵ Naimaci jaie billa eniruemo comeciaina naimaci facadena, nainomo abido jaidimaci; ¹⁶ iadedi jiaie illanomo comeciaina facadimaci. Jusiñamuina nabaillemo, monamo Jusiñamui diga jaca illemo comeciaina facadimaci. Naimiena naimaci ñnua jira: “Jusiñamuidi cai Moo” naimaci raia, Jusiñamui naimaciri meidaiñede. Ie jira monamo Jusiñamui naimaci illinona jai finode.

¹⁷⁻¹⁸ Jusiñamuina Abraham micori ñnua jira, ie jitona comuitate. Jusiñamui Abraham micorimo llote: “O jito Isaacmona o nairai eo jebuite” llote. Iemei Jusiñamui Abraham micorina facacite. Abraham micori naimiena ñnuana raise uiñollena, facacite. “O jitona fano” Abraham micorimo llote. Abraham micori Jusiñamuina ñnuanona, ie jito faiacade. ¹⁹ Ie jito fiodaillemona, Abraham micoridi Jusiñamui naimiena jilloitallena ñnote. Isaac micori fiodaiñede; iadedi fajamona jillode.

²⁰ Isaac micori Jusiñamuina jiai ñnote. Naimie fiodaiacania, Jusiñamui ie llogacino finollena ñnuamona, mena ie urue iaïmaïamo ie uaina fecade. Llote: “Jusiñamui llua isoi, jebuicana jaitomico”. ²¹ Jacob micori Jusiñamuina jiai ñnote. Naimie fiodaiacania, Jusiñamuimo jïanona, ie jiguidamo juita naidaidemo, José micori ie mena urue iaïmaïaïamo marecinona llote. Jusiñamui ie llogacino finollena ñnuanona, llote: “Jusiñamui llua isoi, jebuicana jaitomico. Naimie omicono canoite” llote. ²² José micori fiodaiacania, ie cominimo llote: “Jusiñamui omoïna canuano, Egiptomona ïco jiaïruido omoï jaillena ñnoticue. Omoï jaia, cue illaiciaina omoï diga uiño. Canaán railla eniruemo omoï ria, nainomo cue illaiciaina raino”.

²³ Moisés micori moo, ie ei diga Jusiñamuina jiai ñnotiaïmaïaï. Hebreos comini jebuiñellena, naie facaiseconi Egipto illaïma nana hebreos ñsaïaïna meiniana llote. Iaïmaïaï jito jeicia mei, iaïmaïaï uruena daje amani fivui reidïaïmaïaï. Jusiñamuina ñnuanona, naimie maresana eruaiïlla jira, jaciruiñeno naimiena jofomo fo reide. Illaïma lluamona Jusiñamui naimiena jillotajana ñnotiaïmaïaï. Ie jira Faraón jisa anamo comuide. Faraón di Egipto nairai illaïma. ²⁴ Moisés micori Jusiñamuina ñnote. Naimie eimienamona, naimiedi Faraón jisa ie jitona mamecïreacaiñede; ²⁵ iadedi naimiedi Jusiñamui naimiena ie cominina Egiptomona jillotajana ñnote. Jusiñamui naimie fetua

jira, ie comini dibeimo naimie iacade. Ie comini diga duere sefuiacade. Jusiñamuina ñnoñedino diga ie comeci jamai iobitaiacaiñede. ²⁶ Faraón jisa anamo naimie comuilla jira, naimiemo eo aillue rana ite; iadedi Egiptomo ite ebirede ramo ie comecina eo facañede. Jusiñamuimona iba naimie ico feiñoiacana jira, Jusiñamui Jito billemo ie comecina facajano, duere sefuide. ²⁷ Ie jira Egiptomona Moisés micori Faraóna jaciruiñeno oni jaide. Jusiñamui naimiena eenuana ñnote. Jusiñamuina cioiñede; iadedi Jusiñamui illana naimie ñnua jira, ñnocana jaide.

²⁸ Jusiñamui ie cominina jillotajana Moisés micori ñnua jira, Jusiñamui llua isoi, pascua railla rafuena finode. Ie cominimo toica llauda fallena llote. Ie dirue nase fuemo jidellena llote. Naie naio Jusiñamui jaienici nana nano doforanina meinesiñellena, Jusiñamui lluana finodimaci. ²⁹ Egiptomona naimaci billa mei, jiairede railla monailai ruica dine jaillena, Jusiñamuina ñnotimaci. Jusiñamui Moisés micorimo lluana naimaci ñnuamona, jinui motodo saferedifodo ruica jaidimaci; iadedi Egipto soldaduai daje isoi ruica jaiacadimacimo, nana corobaitimaci.

³⁰ Canaán railla eniruemo hebreos comini rilla mei, Jericó railla nairai dine ridimaci. Jusiñamuina ñnuanona, Jusiñamui llua isoi finodimaci. Siete digarui Jericó ecimo naimaci macarilla mei, Jusiñamui llua isoi, naie llaigafona ana bijide. Naie nairaina emodofidimaci. ³¹ Naie facaiseconi Jericómo Rahab micori fiodaiñede. Naiñaiñodi callirediñaiño. Nana Jericó comini Jusiñamuina ñnoñena jira, fiodaitimaci; iadedi jofue iñenanomo, nia Canaámo hebreos comini riñena facaise, Jusiñamui finoca rafuena naiñaiño fidiano, naiñaiño Jusiñamuina ñnote. Mena hebreos comini iaimaiana naiñaiño feiñua jira, Jericó nairaina emodofilla facaise naiñaiñoña meineñedimaci.

³² Diga jiaie comini Jusiñamuina ñnocana jaidimaci; iadedi nana naimaci finoca rafuena cue cuellena, abi juanide. Naimacimona damierie mameciaina jamai cueiticue: Gedeón micori, Barac micori, Sansón micori, Jefe micori, David micori, Samuel micori Jusiñamui facaina jaie llorainina jiai eo cueñeiticue. ³³ Jusiñamui naimacina canuamona, ñnotimaci. Ie jira damierie naimaci bacauaina emodofidimaci. Illaima isoi jiaino naimaci cominina raise marena sedadimaci. Jusiñamui llogacino suillana cioidimaci. Leones naimacina riiacanamona damierie jillode. ³⁴ Iraimo usillamona damierie jillodimaci. Lloebi diga meiniamona damierie jillodimaci. Jiaino jamai bue isoidino; iadedi jamai bue isoiñedimona jaidimaci. Jobaime raise finuamona, jiaino imaci bacauai soldaduaina judaisitade. ³⁵ Dañaiñorie riñoniaimona uruai fiodailla mei, fiodaillamona Jusiñamui damieriena jillotate. Illaicomini mona jiaino duere fiodaitimaci. Jusiñamuina fainonocaiacaiñena jira, naimacina meinetimaci. Naimaci fiodaiacania, monamo Jusiñamui diga ico jaca illena naimaci ñnua jira, Jusiñamuina fainonocaiñeno fiodaitimaci. ³⁶ Jiaino duere sefuidimaci. Naimaciri jaisitimaci. Naimacina jeare ñaitimaci. Rao diga naimacina duere fatimaci. Damieriena maianona, cárcelmo jonetimaci. ³⁷ Damierie nofici diga fairinuamona, meinetimaci. Damierie ramo faitimaci. Meinellena, naimacina serrucho diga denaisite. Damierie lloebi diga meinetimaci. Jiaino buenidimaci. Naimaci ñniroi jamai igoí ie. Dueredimaci. Naimaci ñniroi raise iñede. Aime guisoidimaci. Jiaie cominimona duere sefuisoidimaci. ³⁸ Jiaie cominimona jamai bue isoidimaci; iadedi Jusiñamuimona jamai bue isoiñedimaci. Damierie jofonidimaci. Ie jira jamai jai jaicaisoidimaci. Jofue iñenanomo jaidimaci. Eniruemo jamai bita ñnuidimaci. ³⁹ Jusiñamuina ñnocana jaidimaci. Naimaci finoca rafuemona Jusiñamui comini naimaci

illana uiñotícaí. Jusiñamuina ñnotimaci; iadedí nana naimacimo Jusiñamui lloga rafue naimaci illa facaise suiñede. ⁴⁰ Jusiñamui jitailla jira, naimaci illa facaise nana naimacimo lloga rafue suiñede; iadedí naimie jitailla jira, fiodaillena Cristona jai orede. Ie comínina birui cai jái jaillena, Cristona jai orede. Ie jira cai díga danomo monamo Jusiñamuina nabaitimaci. Nana naimie lloga rafue jaca suite.

12

Jesús finoca rafuemo cai comeciaina cai facalli

¹ Cai jaiagai Jusiñamuina ñnocana jaillana uiñotícaí. Ie jira caídí naimaci isoi, Jusiñamuina ñnocana birui mai cai jailli. Marena riire cai aisiacania, ailluena rana abiñedícaí. Ie isoide. Jeacínona cai finoñellena, naimiena raise cai ñnollena, jeacino finuacínona mai cai fainonocaili. Nie isoide rafue caimo ia, Jusiñamui jitaillacínona finocana mai duere cai jailli. ² Jesús finoca rafuemo cai comeciaina cai facalli. Cai jeacino facaina naimie fiodailla jira, cai comeciaina naimie ocuiñotajanona, Jesúsna ñnotícaí. Cruzmo maraiñedimie isoi fiodaite. Fiodaillamona jilluana naimie uiñuamona, naimie fiodaite. Ie Moo ecimo dane illena naimie uiñuamona, iocire fiodaite. Illaimana naimie illamona, ie Moo ecimo birui ite. Jesúsna cai comeciaina facajamona, caimare mai cai jailli. ³ Jusiñamui díbeimo iñedinomona Jesús eo duere sefuide. Ie isoi cai duere sefuia, Jesúsna cai comeciaina facajamona, cai comeciaina ocuiñotacana mai cai jailli. ⁴ Jusiñamui díbeimo iñedinomona duere sefuillamona, Jesús isoi duere nia sefuñedomoi. Omoína nia meineñedimaci. ⁵ Duere omoi sefuia, bie jaie cuegafuiaína feitaño. Naimie comínina omoi illamona, Jusiñamui llote:

Cue uruiaí, omoína cue duere finoia, cuena nia ñno.

Duere sefuillamona, cuena fainonocaiño.

⁶ Omoína cue isiruillamona, omoína duere finodicue.

Cue díbeimo omoína raise itatallena, omoína duere finodicue.

Nana cue comínina cue llofuecabillamona, naimacína duere finodicue

llote. ⁷ Naimie jitaillacínona cai finollena, caína duere finode. Ie uruiaína cai illamona, caína duere finode. Ero, nana ie uruiaína isiruillamona, naimaci ie jitaillacínona finollena, naga eniruemo ite moo ie uruiaína duere finocabide. Ie isoide Jusiñamui. Ie jitaillacínona cai finollena, caína duere finocabide. ⁸ Caína ñnotallena, Jusiñamui caína duere finoñenia, naimie cominiñedícaí. Naimiedí nana ie comínina duere finocabide. ⁹ Cai eniruemo ite cai mootiaí caína duere finoia, naimaci uaina ñnotícaí. Ie isoide. Cai Moo Jusiñamui caína isiruillamona, caína duere finoia, naimie uaina cai ñnua. Naimiena cai ñnuamona, monamo naimie díga ico jaca iitícaí. ¹⁰ Naimaci comeciái llua isoi, cai eniruemo ite mootiaí dallu caína duere finode. Cai Moo Jusiñamui caína llofuellena, caína duere finode. Naimie illa isoi, mare rafue díbeimo caína itataiacade. ¹¹ Jusiñamuimona duere cai sefuia, iena gaiñedícaí. Iena jitaíñedícaí; iadedí naiemona cai fueoia, jeacínona dane cai finoñellena, naimie jitailla isoi marecínona finocana jaitícaí.

Jusiñamui rafuena cai cacaia, iena cai aruiruiñena

¹² Nie isoide ramo caimo jiria: “Jusiñamui caína nibai canoñede” raitícaí. Iemona naimiena fainonocaiacadícaí; ia iemo cai comeciaina cai facañena. Jusiñamui rafuena cai sefuirua, duere cai sefuia, nie isoide rafue caimo ia, cai comeciaina ocuiñocana mai cai jailli. Jusiñamui caína canuamona, naimiena cai raise ñnuamona, cai comeciái ocuiñocana mai cai jailli. ¹³ Jáie rafuedo cai jaiñena; iadedí Cristo rafuedo raise ñnocana mai cai jailli. Iese cai jaia,

Cristo rafuedo naimaci jiaí raise jaillena, jiaíe creyentiaína canoíticai. ¹⁴ Nana comini diga uri omoi í. Jusiñamui jitailla isoi, marecinona fino. Iese bu iñenia, Jusiñamui jitailla isoi bu marebicaiñenia, Jusiñamui illanomo jaca iñeite. ¹⁵ Jusiñamui caina duenaillamona, nana cominina jillotaicade. Omoimona buna Jusiñamui duenaillacinona fañonocaillana jitaíñedicue. Omoimo iese sua, iemona conini gaiñenacino comuirede. Iena jitaíñedicue. Omoi comeciái daje isoi lloillana jitaídícue. ¹⁶ Jearede rafuena jaca finoño. Esaú micori jaie finoca rafuena uiñotomoi. Jusiñamui ie moo Isaac micorimo mare rafuena suillena llote. Esaú nano doforamiena illamona, ie moo fiódaille mei, Jusiñamui jai lloga rafue ie moo uai diga, ie moo ra diga, naimie feiñoiacade. Naimie moo nai fiódaiñena facaise dacaiño Esaú aimetailla jira, ie amamona guillena jicade. Iemei naie guille ifomo ie moomona feiñolle uaina ie amamo fecade. Naie facaise dama ie jitailla ramo comecina facade. ¹⁷ Ie amamo ie uaina fecaja mei, ie comeci íuai meidote. Naie uai naimiemo dane illana abido jitaide; iadedi ie moo ie amamo jai fecade. Esaú eo eede; iadedi ie moo ie uai naimiemo jai fecanide. Jusiñamui lloga rafuemo Esaú comecina facañede. Naimie isoi Jusiñamui rafuena omoi jamaiño.

¹⁸ Moisés micori facaise cai hebreos cominimo Jusiñamui ie rafuena jaie llote. Sinaí railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiaí jibicaide. Nainomo aifi eo ite. Eo boriuide. Eo gurude. ¹⁹⁻²⁰ Trompeta ficirenana cacadimaci. Iena ciuanona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toñiaí nainomo macaria, nofici diga fairinuamona, naimiena omoi meine” llote. Jusiñamui llua cacajamona, eo jaciruitimaci. Moisés micorimo: “Jusiñamui caimo nia llua jai jitaíñedicai” llotimaci. ²¹ Eo jacirede ra illa jira, nana comini diga Moisés jiaí jaciruite. ²² Sinaí anedumona lloga rafuedo birui jaiñedicai; iadedi jiaíe rafuedo birui jaidicai. Birui Jusiñamuina atona nabaidicai. Cai hebreos comini isoi, Sión railla anedumo Jerusalémo Jusiñamui jofomo naimiena nabaillena jaiñedicai. Monamo Jusiñamui ite; iadedi birui naimiena atona nabairedicai. Cai fiodaia, naimie dine jaiticai, naimie diga jaca cai illena. Nainomo ie jaienisaí naimiemo iobillacinona fecacabidimaci. ²³ Ailluena comini diga, Cristona birui ñnoticai. Nana caina Jusiñamui fetuanona, cai mameciaí monamo ite rabenicomo jai cueda. Jusiñamui nana comini comeciaina uiñote. Naimiena ñnotinomona ailluena jai fiódaitimaci; ia naimie ecimo naimaci joreñuai jiaí jai itimaci. ²⁴ Jesús fiódaila jira, Jusiñamuina nabairedicai. Naimie fiódaila jira, caimo jiaíe rafue birui ite. Naie rafuena cai ñnuamona, cai comeciái jai marena iticai. Jiaí cai jeacinona oni dotade. Iena jiaí jai feitate. Abel micori jaie fiodaia, naiemona Jusiñamui buna ie jeacinona feitañede; iadedi Jusiñamui Abel micori meinetimiemo ibana ote.

²⁵ Ero, Jusiñamui rafuena omoi cacaia, iena jamaiño. Iena aruiruiño. Moisés micori facaiseconi naie comini Jusiñamui lloga rafuena cacadimaci. Jiaíno iena jitaíñedicaci. Iena ñnoñedicaci. Ie jira Jusiñamui naimacina duere finode. Cristomona jiaíe rafue birui cacadicaí. Bie rafuedi Moisés lloga rafue baífemo faíte. Jusiñamui duere finollicinomona buna jillobinide. Cai duere sefuiñellena, Cristo rafuena cai ñnua. ²⁶ Moisés micorimo ie rafue llua facaise, Jusiñamui naie enruena niraídotade. Jusiñamui jiaíruido jiaí llote: “Enruena dane niraídotaiticue. Ucuaina, fivuina, jitoma diga, jiaí niraídotaiticue” llote. ²⁷ Naimie lloga uaimona enrue fuillena uiñoticaí. Monamo ite ra fuillena jiaí uiñoticaí. Nana naie rana naimie fuidoite; iadedi

naimiena cai inua jira, naimie caina fuidoñeite. Ico cai illinona jai finode. Iena naimie fuidoñeite. ²⁸ Illaimana naimie illamona, naimie caina sedaite. Ie jira naimiemo iobillacinona cai fecaja. Naimiena cai inuamona, naimiena cai raise sedajamona, naimiena cai iobitaja. ²⁹ Naimiena inoñedinona Jusiñamui eo duere finolle jira, naimiena jaciruillanona naimiena cai inua.

13

Jusiñamuina cai iobitaja

¹ Dani conini jiaie creyentiaina isiruicana omoi jai. ² Abraham micori Jusiñamui jaienisaina uiñoñoeno jaie nafuete. Jiaie illanomona jiaie creyentiaia, naimaci inillino inena jira, naimacina nafue. Jusiñamuimona ibana feiñoitomoí. ³ Cristo rafue muidona damerie creyentiaia cárcelmo itimaci. Nainomo omoi jiai itomoidena, naimacina feitañoeno. Naimacina isiruillamona cano. Damerie creyentiaia duere sefuia, naimacina jiai cano. Jiairuido naimaci isoi nibai duere sefuitomoí. ⁴ Airedimie jiaie riño diga illemo ie comecina facañena. Inirediñaiño jiaie ima diga illemo ie comecina facañena. Ie añede riño diga bu ia, ie iniñede ima diga bu ia, marañede. Iena finoñoeno. Iena bu finoia, ie jeacino Jusiñamuimo lloñenia, Jusiñamui naimiena duere finoite. Naiñaiñoena jiai duere finoite. ⁵ Ailluena ucube ollena, iemo nicíñoeno. Omoimo ite ra diga caimare i. Iena Jusiñamui facaina lloraima jaie cueda: “Jusiñamui llote: ‘Omoína jaca canoíticue. Omoína jaca fainonocaiñeíticue’ llote”. ⁶ Naiena cai uiñuamona, cai comeciaina ocuiñoíticai. Jaie cuedafue isoi lloíticai:

Cai Nama caina canoite.

Ie jira cai comeciaia jarire finoñeíticai.

Buena jaciruiñeíticai.

Jiaimie buena caina jaciruitanide.

⁷ Cristo rafuena omoimo navui lloganomo omoi comeciaina faca. Naimacimona Cristo rafuena nano cacadomoí. Cristo díbeimo naimaci illamo omoi comeciaina facajanona, naimaci isoi Jesucristona inocana mai omoi jai. ⁸ Naimie jaca inogamiena uiñotícaia. Naimie ie lloga uaina jaie jaca finode. Iena birui finode. Ico iena jaca finoite. Ie jira naimiena cai inua. ⁹ Cristo ieñede rafuedo jaiñoeno. Diga jiaie llofuiacino ite; iadedi iedo jaiñoeno. Jusiñamui caina canuamona, cai comeciaina birui ocuiñocana jaitícaia. Moisés micorimo lloga rafuedo navui jaidícaia. Diga ra fimaide; iadedi naiedo cai jaillamona, cai comeciaia raise illena, buena oñedícaia. ¹⁰ Cruzmo Cristo fodaillamona, cai jeacino facaina fodaite. Moisés micori lloga rafuedo nia jaidino Cristo rafuemo duiñedimaci. Naie comini facaina ñairaini Cristo rafuemo duiñedimaci. ¹¹ Moisés rafue llua isoi, nanoca ñairaima toinaiña faja mei, naie dirue dacaiño naga año fo iticuartomo uite; iadedi naie toi abi naimaci comini illanomona jino uite. Iena jai jitaiñena jira, nainomo iena jobaide. ¹² Ie isoide. Cristona comini jitaiñena jira, ie comini nairaimona jino uillanona, naimiena meinetimaci. Nainomo jeacino facaina fodaite, comini comeciaina raise finollena. ¹³ Ie jira Moisés micori lloga rafuena cai fainonocaida, dani Jesucristo rafuedo cai jailli. Naimiena jeare finodimaci. Caina jeare finoia, naimiena jaca inocana cai jailli. ¹⁴ Beno jaca cai illemo ocuiríñedícaia; iadedi monamo Jusiñamui diga cai jaca illemo ocuiridícaia. ¹⁵ Jesús finoca rafue muidona, Jusiñamuimo iobillacinona jaca cai fecaja. Jusiñamuina cai uiñuamona, naimiemo iobillacinona jaca cai fecaja. ¹⁶ Marecinona finocana mai cai jailli. Jiaie creyente jitai raillano, omoi raruiaimona naimiena omoi cano. Iena omoi finoia, Jusiñamui omoiri iobite.

¹⁷ Omoï llofueraïnî uaina ñno. Naimaci anamo raise omoï i. Cristo ðibeïmo omoïna raise itataiacadimaci. Iese naimaci finoacaiñenia, Jusiñamui naimacina duere finoite. Naimaci uaina omoï ñnoia, Cristo ðibeïmo caïmare maïjïitimaci. Naimaci uaina omoï ñnoñenia, sunaitimaci. Sunailla jira, naimaci llofuiacinomona buena oñeitomoi.

¹⁸ Jusiñamui diga omoï ñaïa, cai facaina omoï jïï. Jusiñamuïmona cai comeciïaï marena illana uiñoticaï. Naimie jitailla isoi, mare rafuena finocana jaïa-cadicaï. ¹⁹ Omoï ðine cue raïre illena cue facaina Jusiñamuïmo eo omoï jïï.

Naimaci marena jaca illana jitaide

²⁰ Jusiñamui coninî omoï comeciïaïna uri itatajana jitaïdicue. Cai Nama Jesús fodailla mei, Jusiñamui naimïena jai jillotate. Jusiñamui llua isoi, Jesús fodaite. Naimie fodailla jira, Jusiñamui cai jeacïnona feitate. Naimie fodailla jira, naimie anamo cai illamona, caina raise sedarede. ²¹ Jusiñamui ie jitaillacïno omoï finuana canoite. Cristona omoï ñnuana canoite. Mare rafuena omoï finuana canoite. Jesucristo uaido omoïna canoite, naimie jitaillacïnona omoï finollena, Jesucristomo iobillacïnona cai jaca fecajasa. Iena jitaïdicue.

²² Cue amatiaï, bie cartana caïmare feiño. Eo are rafuena cueñedicue. Janore cueticue. ²³ Cai ama Timoteo cárcelmona jai jino bite. Cue ðine naimie raïre bia, omoï ðine naimïena atitïcue. ²⁴ Nana omoï llofueraïnïmo cue uaina oredicue. Ua nana creyentiaïmo cue uaina oredicue. Italamona bitïno imaci uaina jïaï oredimaci. ²⁵ Jusiñamui omoïna jaca duenaïllana omoï uiñuana jitaïdicue. Mai. Macaïbaite.

SANTIAGO ORETAGA RABE

Uaiduacino

¹ Caĩmaci, omoĩmo cartana oredicue. Santiagodicue. Cue mameci jiaicidi Jacobo. ¿Nigacino? ¿Nie isoidomoi? Jusiñamui jitailla rafuena cue finuamona, bie rafuena llofuecabiticue. Cai Nama Jesucristo facaina jiaĩ llofuecabiticue. Cai doce nairaiaimo omoi duillamona, omoi jai judaisilla jira, omoĩmo cue uaina oredicue.

Ramo omoi jiriadedi, omoi comeciaina mairita

² Amatiai, diga ie ramo omoi jiriadedi, eo iobilla. ³ Ramo omoi jiriadedi, Jusiñamui uaina raise omoi ĩnuana uiñoitomoi. Iemona omoi comeciain mairillemona, ĩnocana omoi jaitomoi. Biena omoi uiñua jira, iobilla. ⁴ Mairicana omoi comeciain jaia, omoi comeciaini marebicaite. Marebicaillamona, omoi comeciaino buena fiebicaiñeite. Nana Jusiñamui llogacinuaina ja muidomo ĩnoitomoi; ⁵ iadedi omoĩmo rafue ia, niese nibaiana omoi uiñoñenia, Jusiñamuimo jica. Ie mei omoĩmo naimiedi abi uiñoracinona iite. Jusiñamuidi nana naimiemo llotinomo iena caidiñeno icabilla jira, omoĩmo iena jiaĩ iite; ⁶ iadedi omoi jicaia, uai ĩnuanona jica. Omoi comeciain ĩnoñenia, jicañeno. Comecina ĩnoñedimiedi aifi betaja jorai isoide. Naimie comeci naganomo ite. ⁷ Naimiedi Jusiñamuimona ra feiñollemono tainona sedaite. ⁸ Naie isoidimiedi nana naimie illa dinori ie comeci naganomo iite.

⁹ Naimie ramo jiriadedi, Jusiñamuimona naimie jamai bue isoĩñena jira, duerede creyente iobilla; ¹⁰ iadedi ramo jirillamona ie ucubena naimie faifia, Jusiñamuimona naimie ucubedi ieñena jira, ucuberede creyente iobilla. Safia isoi, naimie ico safenaite. ¹¹ Jitoma a ia, eo ecasillamona, safia safenaite. Lliride. Ie mei jai ebinide. Jai iñede. Ie isoi ucuberedimie safenaite, naimie maijianona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

Nana mare rafue Jusiñamuimona feiñoticaĩ

¹² Ramo jiritimiedi ie comeci mairia, caimare iite. Jai naimie facacifilla mei, naimie comeci mairilla mei, Jusiñamuidi naimiena caimare itataite. Jusiñamui jai llote: “Cuenta isiruitinona cue illanomo jaca itataiticue”. ¹³ O ramo bu faia, lloñeno: “Jusiñamuidi cuenta ramo faite”. Maraiñede rafue dibeimo naimie iñena jira, naimiedi buna ramo jaca faifede. ¹⁴ Cai comecimo naie jitaillacino illa jira, ramo faia uai ĩnoticaĩ. Naie faicaseconi caimona ebirena jirari, iena finoacadicaĩ. ¹⁵ Cai jitailla jira, jeacinona finodicaĩ. Jeacinona finocabillanona jaillano, faifiticaĩ. ¹⁶ Ero, cue isiruiga amatiai, Jusiñamui omoĩna ramo faitatañena jira, naimiemono da mare rafue billa jira, dani omoi abina jifueñeno. ¹⁷ Nana mare rafue cai Moomona feiñoticaĩ. Naimiedi monamo ite lligaiñoraniana jaie finode. Naie radi nagarui daje isoi lligaiñoñede; iadedi naimie daje isoĩñede. Naimie comeci jacanano danoconi nagarui ite. ¹⁸ Naimie jitailla jira, ie uai lluno, naimie caina ie uruiaina itatate. Ie uruiaimona nano doforanidicaĩ.

¿Nie isoide rafuena finoacadicaĩ?

¹⁹ Cue isiruiga amatiai, Jusiñamui rafuemo raise cacarei. Ie mei naie uaina uaitañeno. Jiaĩ raire iciriñeno. ²⁰ Icirillamona, Jusiñamuidi cai marena jitailla isoi, buna jaca marebicaiñede. ²¹ Ie jira nana maraiñedicinona oni faĩnonocai. Jusiñamui uai omoi comecimo fecuise abi iedoñeno nagarui feiñocana omoi

jai. Naimie ie uai omoi comecimo jai itatate, iduai eniruemo cai rilla isoi. Iduai sicuamona, llisilladi ite. Jusiñamui uai cai comeciaino itabillamona, caina jillotarede. ²² Cacajamona iena inocana jai. Cacajanona iena omoi inoñenia, dani abina jifuetomoi. ²³ Bu naie uaina cacajamona inoñenia, naimiedi acaranimoi eruaidimie isoide. ²⁴ Ie uiecona eruaide. Naimie jailla meinoconi, ie eruailla ie uiecona jai raire feitate. ²⁵ Jusiñamui llogacinona bu eo facajia, iena feitañede. Iena inote. Naie uaidi jearedicino ie finuamona naimiena marena itatate. Jusiñamui uaina naimie feitañena jira, iena inua jira, naimie comeci caimare ite.

²⁶ “Jusiñamuina sedadice” raillanona ie comecina facadimiedi jeare ñaia, marañeno ñaia, dama naimie abina jifue. Jusiñamuina taino sedade. ²⁷ Cai Moo Jusiñamuina bu marena raise sedaacania, diga rafuena finoite: Naimiedi moonidinona canoite. Feciñuaina canoite, imaci sure illa facaiseconi. Jeacinona jai finoacaiñeite. Jusiñamui dibeimo inedino isoi iacaiñeite. Jusiñamui naimie iese sedajia, Jusiñamuimona eo mare.

2

Nana cominimo comeciaina lloitaicadica

¹ Amatiai, cai Nama Jesucristo uai eo ebirede. Naimiena omoi inua jira, naimacimo daje isoi comeciai lloillamona, nana cominina daje isoi nafue. ² Ero, omoi roracomo mena ima bia, ¿nie imana nafueitomoi? Dame ucuberedimie. Naimiemo oro ie anillos ite. Eo mare iniroina jitade. ³ Ucuberedimie llotomoi: “Bai bene bancomo rai”. Dueredimie llotomoi: “Bai bene naidai. Raiacania, eniruemo rai”. ⁴ Iese omoi lloia, damiena jai raise nafuetomoi; ia damiena jai raise nafueñedomoi. Iaimaiai iniroimo omoi eruaillamona, nafuetomoi. Mare rafuemo comeciaina facañedomoi.

⁵ Cue isiruiga amatiai, cacarei. Jusiñamuidi dueredinona fetode. Cominimona dueredimaci; ia Jusiñamuimona duenidimaci, naimiena naimaci eo inua illa jira. Naimiena naimaci isiruilla jira, naimie cominina jai jaidimaci. Naie isoidinomo jai llote: “Omoimo cue illanona iticue”. ⁶ Ero, Jusiñamui dueredinona nafuete; iadedi dueredimiena jai nafueñedomoi. Dueredinomona duere sefuiñedomoi; ia dueredimiena jai duere finodomoi. Ucuberedinomona duere sefuicabidomoi; ia ucuberedimiena raise nafuetomoi. Maijitalena, juez dine ucuberedino omoina uitatatimaci, omoina llogidollena. Dueredino iese omoina finoñedimaci; ia ucuberedinodi iena finocabidimaci. ⁷ Cristomo omoi jainaiailamona, ucuberedino naimiena jeare jai ñaitimaci.

⁸ “Cristo llogacino finodica” raillanomo comeciaina facajamona ucuberedimiena omoi nafueia, cuemona mare. Cristo naiena iese caimo llote: “O jofo ecimo itinona isirui, dama o abina o isiruilla isoi”. Iese omoi ia, cuemona mare; ⁹ iadedi nana cominina daje isoi omoi nafueñenia, jeacinona jai finodomoi. Jai Jusiñamui llogacinona inoñedomoi. Jusiñamui llogacinomona jai marañeno itomoi. ¹⁰ Nana Jusiñamui llogacinuaimona daje llogacinona omoi inoñenia, Jusiñamuimona nana naie llogacinuaina jai inoñedomoi. ¹¹ Jusiñamui caimo jai llote: “O aiñede riño diga ineno. O iniñede ima diga ineno”. Jai llote: “Jaimiena meineño”. O aiñede riño diga inedio; iadedi jaimiena o meineia, nana Jusiñamui llogacinuai jai inoñedio. ¹² Jai ruidio Jusiñamuidi juez isoi omoimo lloite. Omoi comeciaino iticino diese omoimo lloite. Ie jira marena ñaino. Marena i. ¹³ Ero, omoimo naimie lloia, jai cominina omoi birui duenaiñenia, Jusiñamui naie facaise omoina duenaiñeite. Omoimo riire lloite. Omoina duere finoite; iadedi jai cominina

birui omoi duenaia, Jusiñamui naie facaise omoina jiai duenaite. Duere sefuillena omoimo lloñeite.

Jusiñamuina cai ñnuamona, diga rafuena cai finua

¹⁴ Amatiai, “Jusiñamuina ñnoticue” raitimiedi mare rafuena jaca finoñenia, ¿niese naie ñnoracinodi naimiena jillotaite? Jillotañeite. ¹⁵ Jiaie rafuedo iena lloiticue. Omoimona daje creyente ñiroinia, guille iñenia, ¹⁶ naie creyente omoi ñine bia, naimiemo omoi lloia: “Mai jai. Rosiruiñeno. Marena ailluena guiño”; ia naimiemo jaca buena omoi fecañenia, ¿bue ñellena iese naimiemo raitomoi? ¹⁷ Ero, Jusiñamui omoi ñnuamona mare rafuena omoi finoñenia, omoi ñnoracino ieñede. ¹⁸ Omoimona damie cuemo ñibai lloite: “Jusiñamuina raise ñnoticue”. Jiaimie cuemo ñibai lloite: “Mare rafuena finocabidicue”. Iaimaiamo lloiticue: “Jusiñamuina cai raise ñnoia, mare rafuena finocabiticai. Mare rafuena cai finuamona, Jusiñamuina cai raise ñnuana uiñoiticai”. ¹⁹ Dajede Jusiñamuidi illana ñnotio. Iena o ñnuano, mare; iadedi jananiai iena jiai ñnotimaci. Ie jira Jusiñamuina jaciruitimaci. ²⁰ “Jusiñamuina raise ñnoticue” ñibai nia raitio. Abina raise nia uiñoñedio. Mare rafue o jiai finoñenia, dama abi o ñnoracinodi ieñede. ²¹ ¿Niese Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitailla rafuena naimie finuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori. ²² Abraham micori ñnote. Mare rafuena jiai finode. Mare rafue naimie finuamona, naimie jai raise ñnote. ²³ Iemona Jusiñamui ie llogacino suide. Iena Moisés micori cuete: “Abraham micori Jusiñamuina ñnote. Ie jira Jusiñamuimona naimie marebicaide”. Jiai cuete: “Naimiedi Jusiñamui nabai”. ²⁴ Abraham micori rafuemona daje rafuena uiñoticai. Dama ie ñnoracino diga jaca bu marebicaiñede; iadedi Jusiñamuina ñnuano, mare rafuena finuano, marebicaide. ²⁵ Jiaie rafuedo iena lloiticue. Jai Rahab raillañaiño ite. Naiñaiño callirediñaiño. Mare rafuena finuano, naiñaiñodi Jusiñamuimona marebicaide. Naiñaiñodi ie jofomo Josué ie rafuena uiraimaiaina feiñote. Naiñaiño nairaidi iaimaiaina meinellena jenodimaci. Meineñellena, naiñaiño iaimaiaina reide. Ie mei iaimaiaina bainino oretate. Mare rafuena naiñaiño finuamona, Jusiñamuimona naiñaiño marebicaide. ²⁶ Ero, bumo ie joreño jai iñenia, cajeñede. Ie isoide. Mare rafue bu finoñenia, ie ñnoracinodi ieñede.

3

Cai fuaimona jeacinodi comuide

¹ Amatiai, omoimona diga comini creyentaina llofuerainina jaiñeno. Jusiñamuidi juez isoi ñco lloite. Llofueraini jiaie comini baifemo uiñuamona, Jusiñamui rafuena naimaci eo raise ñnoñenia, Jusiñamui naimacina jaiño baifemo duere finoite. Iese riire naimacimo lluaña jaciruillano, llofuerainina ailluena jaiñeno. ² Nana caidi diga maraiñede rafuena finocabidicai. Maraiñedicinona bu ñaiñenia, jai marebicaide. Naimie nana ie comeci narede. ³ Jiaie rafuedo iena lloiticue. Caballos cai jitailla rana finollena, imaci fuemo lloemamona finoca janorede rana joneticai. Ie mei nana caballo ie abina namatadicai. ⁴ Riire aifi aillue botena ñine uiacade; iadedi eo janorede quilla diga, ie jailla ñine piloto botena dataoicaide. ⁵ Ie isoide cai fuaia. Eo janorede; iadedi cai fuaimona diga rafuena comuide. Ero, eo janorede iraimona nana rasillaina bootate. ⁶ Cai fuaiaidi irai isoide. Caimo jeacinona eo finotate. Nana cai comeciaina jearetatate. Taifemona ie uai ote. Nana cai ille ñinori caina jearedicinona finotaiacade.

⁷ Nana rana toiredicai: ocainaia, sillinaia, ofomaia, eniruemo bicaidino, llicia. Nana toiredicai; ⁸ iadedi jaca bu ie fuena namatanide. Cai fuaia jaca eo maraiñede. Iemona eo maraiñede rafue icabite. ⁹ Cai fuaia diga cai Namamo, ua cai Moomo, marecinona llotica. Caina naimie finuamona Jusiñamuina eruaidicai; iadedi cai fuaia diga naimiena jeare jia ñaitica. ¹⁰ Cai fuedi dajede; iade marecinona ñaitica. Maraiñedicinona jia ñaitica. Amataia, iese cai ñaiñena. ¹¹ Ero, daje pozomona mare jinui, erirede jinui diga, oñedicai. ¹² Amataia, higuera railla riaramona aceitunadi comuiñede. Uvas railla riaramona higo railla riaradi jia comuiñede. Cuerede jinuiamona mare jinuiamona oñedicai. Cai fuaiaimona jeacino comuiñellena, cai fuaiaina cai namataja.

Ua abi uiñoracino

¹³ Omoimona, ¿bu ua abi uiñote? Naimie ua abi uiñoia, naimie marena illamona, iena uiñoitomo. Abi iedoño mare rafuena naimie finoia, naimie mo ua abi uiñoracino illana uiñoitomo; ¹⁴ iadedi naimie abi eo uradoia, dama naimie mo ite ramo comecina facaia, naimie abi uiñoracino diga naimie abina iedoña. Jai tainona llote. Naimie llua isoi iñede. ¹⁵ Naie isoide uiñoracindi Jusiñamuimona iñede. Bie enirue ie. Comini ie. Taife ie. ¹⁶ Comini abina uradoia, dani naimacimo ite ramo comeciaina naimaci facaia, comini uri iñedimaci. Diga maraiñede rafue naimacimo ite. ¹⁷ Jusiñamuimona ite ua abi uiñoracindi mare. Bumo ia, uri ite. Riinide. Comeci jinide. Jiaie cominina duenaite. Mare rafuena finocabide. Cominina raise nafuete. Abi tainona jifueñede. ¹⁸ Bu uri ia, jiaie cominina uri itatate. Ie jira naimie marena iite, Jusiñamui jitailla isoi.

4

¿Bue ñellena uri iñedicai?

¹ ¿Bue ñellena fuiriruidomo? ¿Bue ñellena iciriruidomo? Omoi comeciaino maraiñedicino illa muidona. Omoi comeciaino maraiño jitaillacino illa muidona. Naie jitaillacino omoi comeciaino namataacana muidona. ² Rana jitaidomo. Iena omoi feiñoña jira, naimaci rana fiillena, comena meinetomo. Eo uradoidomo. Omoi jitailla rana feiñoña jira, fuidomo. Omoi jitailla rana Jusiñamuimo omoi jicaña jira, iena feiñoñedomo. ³ Jiaicaiño Jusiñamuimo jicadomo; iadedi raise jicañedomo. Ie jira iena feiñoñedomo. Dani omoi jitailla ra feiñollena, omoi comeci jaisillena, jicadomo. ⁴ Jusiñamuina birui raise jitañedomo; ia naimie dibeimo iñedinona jai jitaidomo. Bie eniruemo ite rafuena omoi isiruillamona, Jusiñamuina jai raise nabaiñedomo. ¿Niese iena uiñoñedomo? Bu naie rafuena isiruiancaia, Jusiñamui dibeimo jai iacaiñede. ⁵ Jusiñamui cuetatagafuiaina raise facañedomo. Naiedi caino llote: “Jusiñamui omoimo jai fecaca Joreñodi omoi comecina eo raise namataacade”. ⁶ Caina eo duenailla jira, naimie dibeimo cai raise illena, Jusiñamuidi caina eo canoacade. Jusiñamui cuetatagafuiaia iena llote: “Jusiñamuidi abi iedotimiena canoñede; iadedi abi iedoñedimiena canode”. Naimie dibeimo iacaiñedimiena ñaite. Naimie dibeimo iacadimiena canuana jia ñaite.

⁷ Ie jira Jusiñamui anamo omoi i. Naimiena raise omoi ñno. Taife uaina jitañenanona, naimie uaina oni caiño. Ie mei omoimona naimie oni jaite. ⁸ Jusiñamuina nabaillena, naimie dine iaie omoi i. Ie mei naimie omoi dine iaie iite. Jeacinona finoraini, omoi comeci iuaillaina meido. Naganomo omoi comeciaina facañeno. Omoi comeciaina marena fino. ⁹ Maraiñede rafue omoi jai finuamona, omoi sunai. Jaisiño, ie ia omoi jeacino facaina omoi mai ee. Caimare iño; ia omoi jeacino facaina omoi mai sunai. ¹⁰ Jusiñamui dibeimo abina iedoño omoi i. Ie mei naimie omoi comeciaina iobitaite.

Jiaino jinafomo jeare ñaiñeno

¹¹ Amatiai, maraiñede rafuena naimaci finoiadedi, jiaino jinafomo jeare ñaiñeno. Creyente jinafomo bu jeare ñaia, creyentena bu jicoia, creyentena naimie isiruiñena jira, Jusiñamui uaina raise iñoñede. Jusiñamui uaina naimie iñoñenamona, Jusiñamui uaina jiaí jamaiñocaide. ¹² Jusiñamuidi maraiñede rafuena finodimiena duere finoite. Cai jeacinomona caina jillotarede. Cai jeacino facaina caina duere finorede. Ie jira jiaie creyentena jicoñeno.

Ico are caimo suite rafuena uiñoñedicaí

¹³ Jiaie rafuena lloiacadicue. Nibai llotomoi: “Birui jiaie nairaimo jaiticaí. Birui cai jaiñenia, ico are jaiticaí. Rana fecajamona ucube cai ollena, nainomo daje año iiticaí”. ¹⁴ Iese llotomoi; iadedi nie isoide rafue ico are illena uiñoñedomoi. Cai ille dinori uillie illa isoi iticaí. Dallu bene iticaí. Ie mei jai iñedicaí. ¹⁵ Ie muidona omoi llua: “Cai Nama jitaia, nia iiticaí. Cai Nama jitaia, nie isoide rafuena finoiticaí”. ¹⁶ Iena lloñedomoi; iadedi daní omoi comeciaina facajano llotomoi. Iemona eo abina iedotomoi. Abina ieduadi maraiñede. ¹⁷ Mare rafuena finuana uiñotimiedi mare rafuena finoñenia, jeacino jai finode.

5

Ucuberedinomo llucino

¹ Ucuberedino, daje rafuena omoimo jiaí lloiacadicue. Omoimo ramo jirite. Ja eo duere sefuitomoi. Ie jira cuiri-cuiri ee. ² Omoi raruiaí ja sabite. Omoi mare iniroi ja sabite, ibuisaí guilla jira. ³ Omoi ucube ja ieñeite. Ieñena jira, comini omoi faifillana uiñoitimaci. Abina faifitomoi, iraimo ra boa isoi. ⁴ Ero, ailluena ucube irairuillaí iena jai eenotomoi. Naie facaisedi jai ride. Omoi maijiraini maijiamona ucubedi omoimo nia ite. Omoi eniruemo maijidimaci; ia naimacina raise ibañedomoi. Jai eedimaci. Cai nanoca Nama iena cacade. ⁵ Omoi illa dinori ailluena raruiaí omoimo ite. Nana omoi comeciái jitailla rafuena finodomoí. Omoi comeci jitailla isoi itomoi. Naie iba ollirui jai ride. ⁶ Maredinona duere finodomoí. Nie isoide rafuena omoimo finoñedimaci. Abina riidoñedimaci; iadedi naimacina meinetomoi. Ie jira Jusiñamuimona ja duere sefuitomoi.

Cai Nama billemo fecuise omoi ocuiri

⁷ Amatiai, cai Nama billemo fecuise omoi ocuiri. Cominidi imaci illimona riará feiñuana sedadimaci. Noci deillemo fecuise ocuridimaci. Ie mei riará llisillana otimaci. ⁸ Ie isoi cai Nama billemo fecuise ocuiri. Omoi comeciái rucaicueriñeno, cai Nama bille iaie illa jira. ⁹ Duere omoi sefuia, Jusiñamui juez isoi omoimo lloi raillano, “Jiaie creyente muidona duere sefuidicue” raiñeno. Jusiñamui omoi illana raise uiñote. ¹⁰ Amatiai, Jusiñamuina lloraini micoriaimona cai fueua. Cai Nama dibeimo ñaitimaci. Duere sefuidimaci; iadedi eecuñedimaci. ¹¹ Naimaci Jusiñamuina fañonocaiñena jira: “Naimaci comeciáidi caimare itimaci” raiticaí. Job micorina jiaí comeciticaí. Naimie jaie ite. Naimie eeñeno duere sefuide. Duere sefuide; ia Jusiñamuina fañonocaiñede. Ie mei ja muidomo nie isoide cai Nama naimiena finuana uiñoticaí. Cai Namadi naimiena duenailla jira, naimiena raise canode. Caina jiaí duenaite. Ie jira caina jiaí canoite.

¹² Cue amatiai, nanoca rafuena nia lloiacadicue. Omoi lloga uai omoi finollena jiaie comini uiñollena, Jusiñamui mamecina llinotomoi. “Iena cai llinoia, cai lloga uaina cai finoñenia, Jusiñamui caina duere finoite” raitomoi. Omoi lloga uai omoi finollena, Jusiñamui mamecina jamai ebena llinoñeno. Monamo ite ra mamecina jamai ebena llinoñeno. Eniruemo ite ra mamecina

jamai ebena llinoñeno; iadedi nie isoide rafuena omoi llumona, uanaicinona jaca llono. Iese llono, Jusiñamui omoina duere fino raillano.

¹³ Omoimona duere sefuidimie ia, naimie Jusiñamuimo jicaja. Comeci caimare itimie ia, Jusiñamuimo iobillacinona rua. ¹⁴ Duidimie ia, naimaci naimieri Jusiñamuimo jillena, creyentiaina sedarainina uaidua. Naimacidi farena naimie abimo gia, cai Namamo jianona, naimie ie duicomona jilloillena. ¹⁵ Hinuano jia, jilloite. Cai Nama naimiena jillotaite. Naimie finoca jeacinona oni jiai dotajite. ¹⁶ Ie jira coninimo omoi marañedicinona llono. Ie mei Jusiñamuimo coninaina omoi jii, omoi duicomona omoi jilloillena. Jusiñamuimo marebicaidimie jia, diga rafuena finorede. ¹⁷ Elíana comecitomoi. Jaie ite; ia naimiedi cai isoide. Jusiñamuimo jide, noci deñellena. Ie mei daje amani fiemona abimo atomonado jaca deñede. ¹⁸ Ie mei dane jide, noci deillena. Ie jira noci deide. Ie mei riara dane sicode.

¹⁹ Amatiai, omoimona damiedi Jusiñamui ie uanaicino dibeimona jaia, dane Jusiñamui dibeimo naimiena bu itataia, eo mare. ²⁰ Iena bu finoia, naimiena ie uañedicinomona itatate. Faifillemona jai jillotate. Jusiñamuidi naimie jeacinuaina oni dotajamona, iemona jiai jillotate. Mai. Santiagodicue.

PEDRO NANO ORETAGA RABE

Tuude cominimo Pedrodi cartana cuete

¹ ¿Nigacino? ¿Nie isoidomoi? Bie carta omoimo oredicue. Pedrodicue. Jiaie comini motomo birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue. ² Naimie jitaillamona, cai Moo Jusiñamui omoina fetode. Naimie Joreñodi omoimo illamona, omoi comeciaina marebicaitate. Jesucristona omoi inollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenailana uiñocana mai omoi jai. Jusiñamui omoina uri itatajana uiñocana mai omoi jai.

Jesucristo diga jaca cai illemo ocuridicai

³ Naimiedi cai Nama Jesucristo ie Moo illanona, cai Moo Jusiñamuimo iobillacinona cai fecacabillesa. Naimie caina eo dueruillamona, naimiedi cai comeciaina raise finode. Fiodaillamona Jesucristo jillua jira, naimie diga jaca cai illena, inocana cai jaillemo jiai ocuridicai. ⁴ Omoi ocurillafuedi monamo ite. Faiñeitomoi; ia nainomo caimare marena jaca iitomoi. Jusiñamui iese omoina itataite. ⁵ Jusiñamuina omoi inua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uiñoitomoi. ⁶ Ieri iobidomoi; iadedi dallu diga rafuemona duere sefuidomoi.

⁷ Jiaie rafuedo iena lloiticue. Ero, ua oro raise omoi uiñollena, orona facacitomoi. Irai emodomo rainajamona, cocuillamona, gajamona, difai oro jai fiebide. Iena “Mare” llotomoi. Oro eo raifide; iadedi jaca ifede. Ie isoide. Cristona omoi ua inuana facacillena, diga rafuemona duere sefuidomoi. Inocana omoi jaillamona, Jesucristo abido bille facaiseconi Jusiñamuidi omoina: “Mare” lloite. Omoiri eo iobite. ⁸ Jesucristona jaca cioiñedomoi; iadedi naimiena jai isiruitomoi. Naimiena jaca cioiñedomoi; iadedi naimiena jai inotomoi. Ie jira eo iocire itomoi. ⁹ Cristona omoi inuamona, jeacinomona jai jillobidomoi. ¹⁰ Jusiñamui facaina lloraini micoriaidi Jusiñamui omoina jai duenailana jai llotimaci. Jusiñamui omoina jilluana jai llotimaci. Iena naimaci raise cacaiñenia, naiemo comeciaina facauidimaci. ¹¹ Cristo Joreño naimacina uiñotajamona, Cristona llotimaci. Cristo duere sefuillena llotimaci. Fiodaillamona naimie jilloillena jiai llotimaci. Monamo naimie abido jaillena llotimaci. Bumo iese ico suillena uiñoiacadimaci. Naie facaise illemo comeciaina jiai facadimaci. ¹² Jusiñamuidi naie rafue naimacimo duiñenana uiñotade. Naimacina naie rafue caimo duillana jiai uiñotade. Jusiñamui ie Joreñona monamona naimacimo oretajanona, ie uaido naimaci llumona, naimie facaina llorainimona bie mare rafuena birui jai cacadomoi. Jusiñamui jaienisai bie rafuena jiai raise uiñoiacadimaci; ia cai isoi iena uiñoñedimaci.

Naimie jitaillacinona cai fnollena, Jusiñamui caina fetode

¹³ Ie jira omoi comeciai raise marena fino. Ebena jaiñeno. Jesucristo abido bia, Jusiñamui omoina jai jilloitajana ua raise uiñoitomoi. Iemo iocire ocuri. ¹⁴ Jusiñamuina omoi nia uiñoñena facaise dani omoi comeciai jitaille rafuedo jaisoidomoi. Naimiena omoi jai inua jira, naimiena omoi nia uiñoñega facaise finoca rafuedo birui omoi jaiñeno. Mare uruiaci imaci moo uaina inotimaci. Jusiñamui uruiaina omoi jai illa jira, naimie uaina ino.

¹⁵ Jusiñamui ie uruiaina omoi illena, jai omoina fetode. Naimie mareuilla jira, marena omoi i. ¹⁶ Iena naimiedi jaie cuetatate: “Cue mareuidimiena isoi, marena omoi i”.

¹⁷ Cai Moona Jusiñamui illamona, naimiemo birui jidomoi; iadedi juez isoi nagamiemo ico Jusiñamui llua jira, nana omoi ille dinori jacirucana omoi jai. Nagamiena ie marañede finoca rafue diese duere finoite; ia marañede rafuena finoñedimiena duere finoñeite. ¹⁸ Omoi einamací rafuedo jaie jaisoidomoi. Naie rafue jamaifue. Naifuemona Jusiñamui omoina jai jillotate. Hatajamona omoi jeacinomona jillotañede. Ucubedi raire cueruide. Raire cueruide ra diga omoina jillotañede; ¹⁹ iadedi Cristo diruedo naimie daciaño fiodaillamona, omoina jaca jillotate. Cai comini imaci jeacino facaina mare toica llaudana fauidimaci; ia Cristomo jeacino iñena jira, cai jeacino facaina birui daciaño fiodaite. ²⁰ Caina jilloitallena, enirue nia iñena facaiseconi Jusiñamui Cristona jaie fetode. Naimiena omoi uifollena, birui bene eniruemo Jusiñamui naimiena oretate. ²¹ Cristo muidona Jusiñamuina inotomoi. Cristo fiodaite; ia iemona Jusiñamui naimiena jillotate. Ie mei monamo ie ecimo naimiena dane itatate. Ie jira Jusiñamuina inotomoi. Omoi fiodaia, dane jilloillemo jiai jai ocuridomoi. ²² Uanaicinona omoi inuamona, omoi comeciái jai jeanidimaci. Ie muidona jiaie creyentiaina isirucana omoi jai. Omoi comeciáimona conini omoi isirui. ²³ Jusiñamui cominina jai jaidomoi. Naimie uaido iese jaidomoi. Comini uaido iese jaiñedomoi. Naimie uai jaca fuiñeite. Jaca iite. Naie uaido naimie cominina jaca iiticaí.

²⁴ Jusiñamui facaina lloraima micori iena jaie cuete:

Nana cominidi raiticiaí isoidimaci.

Safia dallu ebirede; iadedi raiticiaí ie safia diga are iñede.

Ie isoide. Diga rafuena finuanona, dallu iticaí.

Are iñedicaí; ²⁵ iadedi Jusiñamui uai jaca ite

cuete. Naie uaidi mare rafue. Naie rafuena birui jai cacadomoi.

2

¹ Jusiñamui cominina cai illa jira, jiaie cominina gaiñenacinona faínonocai. Nana jifuiacinona faínonocai. Abina caitajacinona feita. Nana abi uradoillacinona feita. Jiaie comini joreñaña ñañeno. ² Ero, raise moonaillena, raise ecairellena, janosa monoi ijina jitaide. Ie isoide. Omoi comeciái raise marena illena, Jusiñamui rafuena jitaídomoi. ³ Cai Nama omoina duenaillana jai omoi uifnuamona, naimie uaina inocana jai.

Cristodi jofomo ite nanoca nofici isoide

⁴ Ie cominina raise omoi illena, Jusiñamui rafuena finocana jai. Naimie omoina jai fetode. Naimiemo omoi raise duillana jitaide. Iena omoi raise uifollena, jiaie rafuedo iena lloiticue. Naimiedi jofona niacade isoide. Noficimona niacade. Diga noficina jitaide. Naimie naie noficiaina jai fetode. Nanoca nofici diga naie jofo nillana tainede. Cristodi naie nanoca nofici isoide. Cai nairaí Cristona jaie jitaíñedimaci; iadedi Jusiñamuimona naimie maredimiena jira, Jusiñamui naimiena fetode. Caidi jiaie noficiái isoidicaí. Ie jofona nillena isoillena, Jusiñamui caina fetode. ⁵ Naimiena cai jai inua jira, naimie cominina jai jaidicaí. Naimie diga jai atona ñairedicaí. Naimie diga jiaie comini facaina jiai ñaicabiticaí. Naimiena cai raise sedallena, Jesucristo caina canuamona, Jusiñamui jitaillacinona finocana jaidicaí. ⁶ Jusiñamui facaina lloraima iena jaie cuega:

Ero, Jerusalémo cue jofona nillena, daje noficina fetoiticue.

Eo mare noficina fetoiticue. Cue Jitona ñaiticue.

Naimiena jai fetodicue. Naimiedi eo mare.

Naimiena inuamona, comini iobitimaci

cuega. ⁷ Naimiena omoi inoia, Jusiñamui omoina iobitaite. Naimiena omoi inoñenia, faifitomoi. Jusiñamui facaina lloraima micori iena jaie cuega:

Jofona finoraini jitaiñena noficidi nana naie jofomo ite noficiái baifemo jai faiga

cuega. Ie isoide. Cai nairai Cristona jitaiñede; iadedi Jusiñamui naimieri eo iobide. ⁸ Dane cuega:

Nine naimaci macaria, naie noficimona eicaitaillamona, uaitimaci

cuega. Cristona cuete. Cristo uaina naimaci inoñena jira, Jusiñamui lla isoi faifitimaci.

Pedro Jusiñamui fetocanona llofue

⁹ Jusiñamui jai fetocanodomoí. Naimiemo omoi jai duillamona, naimie diga atona ñairedomoí. Jusiñamui ua cominidomoí. Naimiena omoi nia inoñenia, jeacino anamo omoi illa jira, jitreñedino itomoí isoidomoí. Naiemona omoína jai jillobitade. Naimie anamo jai omoi illamona, useredino jai itomoí isoidomoí. Eo mare rafue omoimo naimie finua jira, iena llocana omoi jai. ¹⁰ Jaie Jusiñamui cominiñedomoí; iadedi birui Jusiñamui cominidomoí. Naimie omoína duenaillana jaie uiñoñedomoí. Birui iena uiñotomoí.

Pedro Jusiñamui jitaillacinona finocana cai jaillana llofue

¹¹ Cue isiruiganodomoí. Jusiñamui illanomo omoi birui jainaiaila jira, eniruemo jaca iñeitomoí. Eniruemo jaca omoi iñena jira, jeacina finocana jaiñeno. Jeacino omoi comeciaina namatacana jira, iena ebiruiñeno, naie anamo omoi i raillano. ¹² Jusiñamuina inoñedino motomo omoi illamona, mare rafuena finocana jai. Omoína birui jeare ñaitimaci; iadedi omoi marena illana naimaci uiñuamona, Jusiñamuina ico naimaci inoia, naimiemo iobillacinona fecaitimaci. ¹³ Cai Namamo omoi duilla jira, illaicomini anamo raise i. Riai diga omoi nanoca illaíma uaina ino. ¹⁴ Naimacina omoi illaicomini fetua jira, omoi gobernadores uaina ino. Maraiñede rafue omoi finoia, omoína duere finoitimaci; iadedi mare rafuena omoi finoia, omoi iobitimaci. ¹⁵ Jusiñamuidi mare rafuena omoi finuana jitaide. Iena omoi finua jira, omoína ebena ñaitino uaina llacaitaitomoí. ¹⁶ Jusiñamui anamo cai illamona: “Jiaie illaíma uaina inoñeiticai” raiñeiticai. Cai enirue illaíma uaina cai inoñenia, jeacina finodicai. Jusiñamui dibeimo cai illa jira, naimie jitaillacinona finocana cai jailli. ¹⁷ Nana cominimo marena fino. Nana creyentiaina isirui. Jusiñamuina jaciruoicaida ino. Riai diga omoi illaíma uaina ino.

Cristo duere sefuilla rafuemona fueoiticai

¹⁸ Patrón anamo damierie itomoí. Omoi patrón ocuica uaina inocana omoi jai. Omoi patrón marena fecuise ocuia, naimie uaina ino. Naimie raire iciria, naimie ocuica uaina jiai ino. ¹⁹ Maraiñede rafuena omoi finoñenia, omoi patrón omoína duere finoia, Jusiñamuimo omoi comeciaina facajanona, ibana oñeno. Ibana omoi oñenia, Jusiñamuimona mare. ²⁰ Maraiñede rafuena omoi finoia, omoi patrónona duere sefuitomoí; iadedi maraiñede rafuena omoi finoñenia, omoi patrón omoína duere finoia, ibana omoi oñenia, Jusiñamuimona mare. ²¹ Duere omoi sefuia, ibana oñeno. Iese omoi illena, Jusiñamui omoína fetode. Cristo cai facaina ibana oñeno duere sefuide. Naimie isoi cai illena, naimie isoi rafuena finocana cai jailli. ²² Naimiedi maraiñede rafuena jaca finoñede. Tainona jaca lloñede. ²³ Comini naimiena jeare ñaitimaci; iadedi naimiedi uai oñede. Naimie duere sefuide; iadedi:

“Omoina ico duere finoiticue” raiñede. Naimiedi Jusiñamui naimacina ico raise duere finollena uiñote. ²⁴ Cruzmo naimie fodaillamona jeacino anamo cai iñellena, cai jeacino facaina naimie fodaite. Jusiñamui jitailla isoi naimie fodaite. Naimie jai duere sefuilla jira, cai jeacinomona jai jillodicaí. ²⁵ Sedañega toica llaudaiaí isoi jaie ebena jaisoidicaí. Cai sedaraima anamo jai iticaí. Naimiedi cai comeciaina jai eenote.

3

Pedrodi inirediñaiñuaina, airedino diga llofuede

¹⁻² Inirediñaiñuai, omoimo jai lloiacadicue. Omoi iniñiaí uaina ñno. Nibai birui Cristo rafuena ñnoñedimaci; iadedi omoi marena illamona, Cristo ñibeimo naimacina itataitomoí. Jusiñamui uaina omoi ñnuamona, omoi marena illamona, damierie Cristona ñnoitimaci. ³ Dañaiñorie abina eo finocabidimaci, naiñaiñuaina jaie comini ebinaillena. Naiñaiñuai ifotiena eo finocabidimaci. Eo raifide rana jitacabidimaci. Eo ebirede raifide ñiroina jitacabidimaci. Naie isoide ra comeciaina marena itatañede; ia Jusiñamui jitaillacinodo jaillamona, comeci marena ite. Jaie comini omoina ebinai raillano, iese omoi iñeno; ⁴ iadedi jaie comini omoina ebinaillena, omoi comeciaina marena fino. Omoi iniñiaí uaina oñeno. Naimaci jitailla rafuena fino. Omoi comeciaina iese ia, Jusiñamuimona eo mare. ⁵ Cai jaiagai facaise Jusiñamuina ñnotiñaiñuai iese itimaci. Cue birui llofua isoi, naiñaiñuai abina jaie finodimaci. Naiñaiñuai iniñiaí uaina ñnotimaci. ⁶ Iese Sara micori ie ñni Abraham micori uaina ñnote. Ie anamo naiñaiño illa jira, ie ocuica uaina jaca ñnote. Mare rafuena finocana omoi jaia, buena omoi jaciruiñenia, naiñaiño isoi iitomoí. Iemona naiñaiño uruiaina jaitomoí isoitomoí.

⁷ Airedino, omoimo jai lloiacadicue. Omoi ainiaimo comeciaina faca. Cai isoi naiñaiñuai mañiñena jira, naiñaiñuaina isiruillamona, naiñaiñuaina marena raise seda. Jusiñamui omoina duenaillamona, naimie cominina jai jaidomoí. Omoina jai jillotate. Omoi ainiaina omoi raise sedañenia, Jusiñamuimo daajena raise jñnidomoiico.

Cristo ñibeimo cai illa rafue

⁸ Daje isoi comeciaina lloicana jai. Coninina duenai. Naga creyentena isirui. Jiañona cano. Abina iedoñeno. ⁹ Omoina jaie comini duere finoia, ñbana oñeno. Omoina naimaci jeare ñaia, ñbana oñeno; iadedi naimaciri marena ñaño. Mare rafuena cai finollena, Jusiñamui caina fetode. Iese cai jaia, Jusiñamui ñnena: “Mare” caina raite. ¹⁰ Jusiñamui facaina lloraima micori iena jaie cuela:

Marena uri jaca bu iacania, jeare ñaiñeno.

Tañona lloñeno.

¹¹ Jearede rafue finuana fañonocai. Mare rafuedo jai.

Omoi ecimo itino diga, uri icana omoi jai.

¹² Naimie jitailla rafue omoi finoia, Jusiñamui iena uiñuamona, omoina raise sedade.

Naimie diga omoi ñaia, iena cacade;

iadedi marañede rafue bu finoia, Jusiñamui naimie diga icirite.

¹³ Mare rafuena omoi finocana jaia: “Marañede rafuena naimaci finua jira, naimacina duere finoiticaí” rainidimaci; ¹⁴ ia mare rafuena omoi finuamona omoi duere sefuia, Jusiñamui omoina canoite. Omoina duere finodinona jaciruiñeno. Jarire iñeno; ¹⁵ ia omoi comeciaina jitaillamona Cristona seda. Naimiedi cai Nama. “¿Bue ñellena Cristona ñnotomoi?” omoimo bu jicanoia, uaina raise ono. Fecuisse icirñeno, uaina ono. ¹⁶ Mare rafuena finocana

jai. Omoina jiaino jeare ñaia, mare rafuena omoi finocabillamona meidaitimaci. Omoi marena illamona, tainona naimaci llwana bairenite. ¹⁷ Mare rafuena omoi finuamona, Jusiñamui jitaillamona omoi duere sefuia, dama iese duere sefuitomoi; ia marañede rafuena omoi finuamona omoi duere sefuia, omoi muidona. ¹⁸ Cristomo omoi comeciaina faca. Dacaiño cai jeacino facaina naimie fiodaite. Naimie mareuidimie; iadedi marañedino facaina fiodaite. Jusiñamui dibeimo caina itataiacade. Naimiena meinetimaci; iadedi naimie Joreño jaca ite. ¹⁹ Ie Joreñodo naimie jaillanona, jaie fiodaitino imaci joreñuai eenoranomo ie finoca rafuena lluaide. Naimaci nia fiodañenia, Jusiñamuina jaca ñinoñedimaci; ia Cristo ie finoca rafuena naimaci joreñuaimo lluaide. ²⁰ Jusiñamui rafuena jaie ñinoñedimaci. Noé micori facaise Jusiñamuidi naimaci naimiena ñnuamo fecuise ocuride. Jinuimona jillobillena, Noé micori ie balsana finode. Ocho digamie jillobidimaci. ²¹ Ie isoide. Omoi bautizaia: “Jusiñamui dibeimo jai iticai” llotomoi. “Jeacinomona jai jillobidicai” llotomoi. Omoi abimo ite jearenamona jillobiñedomoi; iadedi omoi comeciái jai marena ite. Fiodaillamona Jesucristo jillua muidona, jillobidicai. ²² Naimie jillua mei, monamo abido jai jaide. Jusiñamui ecimo naimie illamona, Jusiñamui uai naimiemo ite. Nana Jusiñamui jaienisai naimie anamo jai itimaci. Taifena Jesucristo anafefilla jira, Jesucristo anamo naimie ite; ia naimiena nia janafefitañede.

4

Jusiñamuimona cai feiñoga uai diga, naga jiaie creyentena cai canua

¹ Cai isoi naimie illamona, Cristo duere sefuide. Naimie duere sefuide; ia jeacina finoñede. Duere omoi sefuia, naimie illamo omoi comeciaina faca. ² Nana omoi ille dinori comini jitaillacinodo jaiñeno; iadedi Jusiñamui jitaillacinodo omoi jai. ³ Jusiñamuina uiñoñedino isoi jaie bie isoide rafuena finouidomoi: Omoi añede riñoniai diga isoidomoi. Omoi ñiñede ñiñiaí diga isoidomoi. Jearede rafuena ebiruitomoi. Jifairuidomoi. Jiruana ebiruitomoi. Jusiñamui rairuica jiraraina sedauidomoi. ⁴ Naie isoide rafuena omoi jai finoñenia, Jusiñamuina uiñoñedinodi omoi raijicaidimaci. Omoina jeare ñaitimaci. ⁵ Iese itimaci; iadedi Jusiñamui uicomo ico iitimaci. Naimacina duere finoite. Nia fiodañedinona duere finoite. Jai fiodaitinona jiaí duere finoite. ⁶ Naimaci nia fiodañena facaise, Jesucristo rafuena cacadimaci. Jeacino muidona nana fiodaitimaci; iadedi naimaci navui ñnoia, naimaci joreñuai, Jusiñamui isoi, jaca iitimaci.

⁷ Bie enirue raire fuite. Ie jira ebena jaiñeno. Comeciaina raise faca. Jusiñamuimo raise jillena, iese omoi jai. ⁸ Coninina isiruicana omoi jai. Omoi isiruillacino jiaie rafue baifemo faite. Jiaimie diga nicino ia, naimiena omoi isiruillemona, naicinona raire feitaítomoi. ⁹ Jiaie cominina jafueoicaída feiñoñeno; ia caimare feiño. ¹⁰ Creyentaina omoi jailla facaise Jusiñamuimona omoi uaina feiñotomoi. Naimie dibeimo omoi maijillena feiñotomoi. Nagamiemo daje isoide uai ñede. Omoi uai diga, naga jiaie creyentena cano. ¹¹ Cristo rafuena bu llofueia, Jusiñamui naimiemo llua isoi, naimie llofuia. Jiaie creyentena bu canoia, naimiena Jusiñamui canuamona, naimie canua. Jusiñamuina cai iobitallena, nana cai finua rafuemona Jesucristo mamecido iese cai jailla. Illaimana naimie illamona, caina jaca sedade. Naimiemo iobillacinona jaca cai fecacabillasa. Iena jitaídícue.

Cristo dibeimo cai illamona, duere sefuiticai

¹² Cue isiruiganodomoi. Eo duere omoi sefuia, raijicaiñeno. Creyentaina omoi jailla jira, duere sefuitomoi. Jusiñamuidi Cristona raise omoi ñnuana

facacite. ¹³ Cristo jai duere sefuide. Naimie isoi omoi duere sefuia, ieri iobi. Naimie dane bene bia, naimie bairiari eo iobitomo. ¹⁴ Creyentiaina omoi illamona, omoina bu jeare ñaia, caimare omoi i. Iemona Jusiñamui Joreño omoimo illana uiñoitomo. Naimie: “Mare” omoina raite. ¹⁵ Jai nodi cominina meinetimaci. Rana fiidimaci. Maraiñede rafuena finodimaci. Naimacimo duide rafuena abimo oñeno. Naie isoide rafuena bu finoia, duere sefuite. Iena omoi finoñeno. Naie isoide rafuena omoi finuamona omoi duere sefuillana jitañedice. ¹⁶ Creyentiaina omoi illamona omoi duere sefuia, ieri meiruiñeno; iadedi creyentiaina omoi illamona, iobillacinona Jusiñamui feca.

¹⁷ Jeacino facaina Jusiñamuidi comini birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina cai illamona, caina janore duere finoite; iadedi naimie cominiñedinona cai bai femo eo duere finoite. ¹⁸ Jusiñamui facaina lloraima micori iena jaie cuega: “Mareuidi nodi niadedi jillobiñedimacimo, ¿niese comeciaina jearedi nodi jillobitimaci? ¿Niese maraiñedinodi jillobitimaci? Nibai jaca jillobiñeitimaci” cuega. ¹⁹ Iena omoi uiñuamona, mare rafuedo jai. Jusiñamui jitaillamona duere omoi sefuia, mare rafuedo jai. Jusiñamui caimo finuana omoi uiñuamona, naimie anamo raise i. Naimie omoina raise eenoite. Ie lloga uaina jaca finoite.

5

Pedro creyentiaina nia llofuate

¹ Creyentiaina llofueraini, omoimo rafuena lloiacadicue. Cuedi jai llofueraimadicue. Cristo fi dallana cidicue. Naimie ebire abido bia, jaie creyentiaidiga iena cioiticue. Iese cue illamona, omoimo lloiacadicue. ² Omoi anamo ite creyentiaina raise seda. Naimacina raise llofue. Jai mie railla jira, llofueño; iadedi omoi jitailla jira, llofue. Rana ollena llofueño; iadedi iocire llofue. ³ Omoi anamo itinona riire llofueño; iadedi mare rafuedo omoi jaillamona, naimacina llofue. ⁴ Cai creyentiaina nanoca sedaraimadi Cristo. Naimie abido bia, naimiemona ibana feiñoitomo. Naimie diga jaca iitomo.

⁵ Conirueni, omoi llofueraini uaina raise ino. Coninimona abina iedoño. Jusiñamui facaina lloraima micori iese jaie cuega:

Bu abina iedoia, Jusiñamui mona maraiñede;
iadedi bu abi iedoñenia, Jusiñamui mona mare.

Jusiñamui naimiena duenaite

cuega. ⁶ Iese illa jira, cai Jusiñamui siñona jira, naimie anamo abina iedoño mai raise omoi i. Iemona naimie jitailliruido omoina iobitaite. ⁷ Nie isoide rafue ia, Jusiñamui omoina canocabillana omoi uiñuamona, omoi comeciaina jarire finoño. Naimie omoina eenoite.

⁸ Ebona jaiño. Jeacino finuamo abina rairui. Taife caina ramo faicabite. Janallari ie rille jenua isoi, Taife omoina jenocabide. Jeacino omoi finuana jitaide. ⁹ Naimie ra faia uaina inoño; ia Cristona inocana jai. Omoi duere sefuilla isoi, nana jaie creyentiaid duere sefuimidimaci. Iena omoi uiñuamona, omoi comeciaina ocuiñocana jai. ¹⁰ Cai Jusiñamui caina eo duenaite. Cristomo jai cai duilla jira, Jusiñamui illanomo ico jaca iitica. Dally birui duere cai sefuia, Jusiñamui cai comeciaina raise finoite. Cai comeciaina raise ocuiñotaite. ¹¹ Illaimana naimie illamona, caina jaca sedade. Naimiemo iobillacino cai fecacabillasa. Iena jitaidicue.

Naga creyentiaimo carta oria rafue

¹² Silvanona uñotomoi. Naimiena bie cartana cuetataticue. Cristomo naimie duilla jira, cue ama isoi naimie ite. Cuemona naimiedi raise ñnogamie. Omoi ñine oretallena, janorede cartana cuetataticue. Bie rafuena dane lloiacadicue: Bie rafuedi Jusiñamui ie. Naimie caina duenailana omoi uñuamona, bie rafuena ñnocana jai.

¹³ Babiloniamoi ite creyentiaia omoi ñine imaci uaina oredimaci. Naimacina Jusiñamui jai fetuamona, creyentiaina jaidimaci. Marcos ie uaina jiaia orede. Cristomo naimie jai duilla jira, naimie cue jitona eruaide. ¹⁴ Conini omoi isiruillamona, nana creyentiaina eo caimare uaido. Cristomo jai omoi duilla jira, naimie omoi comeciaina uri itatajana uñocana mai jai. Macaibaite. Pedrodicue.

IE EMODOMO PEDRO ORETAGA RABE

Pedro creyentiaimo carta orede

¹ ¿Nigacino? ¿Nie isoidomo? Bie carta omoimo oredicue. Simón Pedrodicue. Jesucristo díbeimo maijiamona, ie rafuena lloticue. Cuen a ore-tajamona, ie lloga uaina finodicue. Cai isoi jai ñnotomoi. Cai Jusiñamui marena illa jira, Jesucristo marena illa jira, Jesucristo omoína jillotaja jira, jai ñnotomoi. Jusiñamuimona cai isoi omoí illa jira, bie carta omoí dine oredicue. ² Jusiñamuina omoí uiñuamona, cai Nama Jesús omoí uiñuamona, iaímaiaí omoína duenaillana uiñocana jai. Iaímaiaí omoí uri itatajana uiñocana jai.

Creyentiaí marena illa rafue

³ Jesús siñona illamona, bene cai marena illena, naimiedi nana rafue caímo jai iga. Naimiena cai uiñocana jaillamona, caímo ite. Naimie uai ebirede. Naimie jaca mareuidimie. Naimie isoi cai illena, caína jai fetode. ⁴ Naimie iese illamona, eo mare rafuena caímo jai llote. Jiaie rafue baifemo faite. Bie rafue muidona jeacínomona jillobidicai. Cai comeciaí jaie jitailla jira, faíficana jaidicai; iadedi naimie rafuena cai ñnuamona, naimie illa isoi, icana jaidicai. ⁵ Jesucristona jai ñnotomoi. Naimiemo omoí duillamona, mare rafuena finocana jai. Jusiñamui jitaillacínona finocana jai. Iemona abina uiñocana jai. ⁶ Jearede rafue finocana jaiñeno; iadedi omoí comeciaina eeno. Iena ocuiñocana jai. Jusiñamuina sedacana jai. ⁷ Jiaie creyentiaína isiruicana jai. Nana comínina isiruicana jai. ⁸ Naie isoidicínona jitaídomoi. Iedo omoí raise jaia, cai Nama Jesucristona eo raise uiñocana jaitomoi; ⁹ iadedi iedo omoí jaiñenia, abina nia raise uiñoñedomoi. Omoí jeacínomona jai jilluana jiaí jai feítatomoi. Mare rafuena finocana jaillena, omoí jeacínomona jillobidomoi. Iena feitaño. ¹⁰ Cue amatiaí, naie isoidicínona finocana jai. Iemona Jusiñamui omoína fetuana raise uiñoítomoi. Abído danomo jiaí jaiñeítomoi. ¹¹ Iese omoí jaia, cai Jilloitaraimana naimie illamona, cai Nama Jesucristo ie illanomo omoína eo marena feiñoite. Nainomo naimie anamo jaca ítomoi.

¹² Ie jira bie isoide rafuena díga icaiño omoímo lloticue. Bie rafuena uiñotomoi. Bie rafue uanaicínona jai raise uiñocaidomoi. ¹³⁻¹⁴ Cai Nama Jesucristo cuemo jai llua jira, raíre cue fiodaillena uiñotícue. Nia cue fiodaiñenia, bie rafuena omoímo díga icaiño lloticue. Iese omoímo cue lloia, cuemona mare. ¹⁵ Bie rafue omoí raise nagarui uiñollena, omoína birui canoíticue. Cue fiodaille mei, nagarui bie rafuena omoí feitañenana jitaídícue. Ie muidona bie rafuena jai cuetícue.

Pedro Cristona ebirenana jaie cíode

¹⁶ Jamai rafue omoímo lloñedicai. Omoína jífueiacaiñedicai. Cai Nama Jesucristo siñonana lloticai. Naimie abído billena jiaí lloticai. Naimiena ebirenana jaie ciodicai. ¹⁷⁻¹⁸ Eníruemo naimie jaie ia, anedu muidomo naimie díga jaidicai. Jusiñamui nainomo jiaí illa jira, naie illano mare. Naie facaise Jusiñamui llua cacadícai. Jusiñamui naimiena iobitaiacade. Ebire llote: “Bimie cue isiruiga Jito. Naimieri iobidícue”. Iena jaie cai cíanona, birui naimie siñonana lloticai. ¹⁹ Naiemona Jusiñamui facaina jaie lloraíni micoriaí lloga rafue suillena jai raise uiñotícai. Naimaci lloga rafuemo omoí comeciaina faca. Lamparín jítiredínomo lligaiñua isoi, naie rafue cai comeciaina uanaicínona uiñotade. Monairaí cuduna cai cioia, iaírei monaille ua illana uiñotícai. Ie isoide. Cristo dane baíreia, iena raise uiñoítícai. Jusiñamui facaina lloraíni micoriaí rafuena cai uiñuamona, uanaicínona ua

uiñoticaí. ²⁰ Biena uiñoticaí. Dani comeciaimona Jusiñamui facaina lloraini micoriaídi naimaci lloga uaina llofueñeditimaci. ²¹ Dani naimaci comeciaí jamai facajamona naie rafuena oñeditimaci; iadedi Jusiñamui Joreño naimacimo illamona, naimacina iena uiñotajamona, Jusiñamui rafuena jino llotimaci.

2

Pedro tainona llofuerainina llote

¹ Cai jaiagai facaise tainona llofueraini itimaci. Birui ie isoide. Omoi motomo tainona llofueraini iitimaci. Jusiñamui rafuena raise llofueñeditimaci; iadedi naie rafuemonona omoína itataiacanitimaci. Naimaci facaina Jesucristo fiodaite; iadedi: “Jesucristo cai Nama” raiñeditimaci. Naimaci finolle rafue muidona, raire ebena faifitimaci. ² Naimaci jearede rafuedo ailluena comini jaitimaci. Naimaci muidona, ailluena comini Cristo rafuena jearuitimaci. Cristo rafue uanaicino; ia iese lloñeditimaci. ³ Ucube ollena, naimaci tainona llofuiacinodo omoína jifueiacanitimaci; iadedi Jusiñamui rícaillafue anamo jai itimaci. Jusiñamui naimacina ico duere finoite.

⁴ Naimie ecimo ite jaienisaímona damierie jeacino jaie finua jira, Jusiñamui naimacina jai oni dotade. Naimie rícaillafue anamo naimaci jai illamona, naimacimo ite uai jai iñede. Jitiredinomo jai itimaci. Naimacina duere finoite, nana comini Jusiñamui dne illirui ia. ⁵ Jusiñamui Noé micori facaise ite cominina jaie duere finode. Noé micori Jusiñamui ie mare rafuena naimacimo llote; iadedi Jusiñamuina ñnoiacaíñeditimaci. Eo noci deitajamona, enirue buillamona, Jusiñamui naimacina duere finode. Naiemona Noé micorina, ie siete comini diga, jillotate. ⁶ Sodoma railla nairai, Gomorra railla nairai diga, Jusiñamuidi bootate. Naimiena naimaci ñnoñena jira, naimacina fuidode. Naiemona naimiena ñnoñedinodi fueua. ⁷ Sodomamona Jusiñamui Lot micorina jillotate. Lot micori maremie. Eo jearede rafuena naie nairai finua jira, Lot micori comeci jarire ite. ⁸ Naimaci motomo naimie illamona, nagarui naimaci maraiñede rafue naimie cuamona, naimie comeci uri iñede. ⁹ Naimiena jaie ñnoñedinona Jusiñamui jai duere finode; iadedi Jusiñamui naimiena ñnotino ramo faíamona jilloitajana uiñote. Jusiñamui naimiena ñnoñedino naimie rícaillafue anamo illana jiaí uiñote. Ico naimacina duere finoite.

¹⁰ Jearede jitaillacino finocabidinona ua duere finoite. Jusiñamui uaina jamaidinona ua duere finoite. Bie tainona llofueraini marefodo llofuecabitimaci. Naimaci jitaillacinona llofuecabitimaci. Jusiñamui jaienisaína jaciruiñeno jeare ñaitimaci. ¹¹ Jusiñamui jaienisaí uai naimaci baífemo faíte; iadedi Jusiñamui illanomo naimaci illamona, bie tainona llofuerainina jeare ñaiñeditimaci. ¹² Ocainaiaí abina raise uiñoñena muidona, cai rillena naimacina faticaí. Bie tainona llofueraini ocainaiaí isoidimaci. Naimaci raise uiñoñega rafuena jeare ñaitimaci. Ocainaiaí faifilla isoi, faifitimaci. ¹³ Jiaie cominina naimaci duere finua dinori duere sefuitimaci. Birui ite rafuena nagarui ebiruitimaci. Danomo omoi guicabia, naimaci illa jira, raise nabairinidomoi. Jearedimaci. Jearede rafuena naimaci ebiruilla jira, raise conini diga nabairinidomoi. ¹⁴ Riñona naimaci cioia, naiñaiño diga eo iacadimaci. Jeacinona finocana jaicabidimaci. Cristona nia raise ñnoñedinona jeacinona finotaiacadimaci. Rana eo nicidotimaci. Jusiñamui naimacina duere finoite. Jaca faifitimaci. ¹⁵ Cristo rafuena faínonocaillanona, jiaie rafuedo birui jaidimaci. Balaam micori rafuedo jai jaidimaci. Balaam micori Beor micori jito. Ucube ollena, Balaam micori uanaicinona jaie lloiacaiñede; iadedi jiaie rafuena lollena, jiaie nairai dne jaide. ¹⁶ Naisona naimie jaidemo,

ie burra naimie diga ñaite. Jeacino naimie finoñellena, ie burra naimie diga ñaite. Uairico isoi Balaam micori jaiñellena, naimie diga ñaite. Birui bie tainona llofueraini, Balaam isoi, jiaie rafuedo jaidimaci.

¹⁷ Omoina canoñedimaci. Jinui iñena pozo isoidimaci. Naiemona buena oñedomoi. Monamo ite uillie isoidimaci. Riire aifi bia, naie uillie oni ñaitade. Bie tainona llofuerainimona buena oñedomoi. Naimaci comeciai daje isoi lloñedimaci. Jusiñamui naimacina ico duere finoite. Jusiñamui illanomo naimaci iñenano, jitiñedimaci jaca iitimaci. ¹⁸ Jamai ñaia diga abina iedotimaci. Uanaiñede rafuemonas, como Cristomo ñnotinona ramo faitimaci. “Jearede rafue finuana mare” raitimaci. ¹⁹ “Cai jitailla rafuena finoredicai” raitimaci. Iese raitimaci; iadedi jeacino anamo jai itimaci. Jeacino finocana naimaci jailla jira, ie anamo jai itimaci. ²⁰ Cai Nama Jesucristo. Naimiedi cai Jilloitaraima. Naimiena naimaci jiaie ñnuamona, marañedicino anamona jai jillodimaci; iadedi marañedicinona dane finocana jaidimacina, naie marañedicino anamo dane itimaci. Eo fodo jai jaidimaci. ²¹ Cristo rafuena jiaie uiñoñedimaci. Birui iena uiñotimaci; iadedi naie mare rafuedo raise jaiñedimaci. Iena fainonocaillamona, eo jai fodo jaidimaci. ²² Cai comini iena iese llocabitimaci; “Jico cicuia mei, ie cicuiana dane abido guite. Chanchona cai jocua mei, ie jearede illanomo raire abido jaicabide”. Cristo rafuemonas danomo abido jaidinodi daje isoidimaci.

3

Pedro cai Nama Cristo dane billena llofuite

¹ Cue isiruiganodomo. Navui jiaie carta omoimo oredicue. Birui dane cueticue. Bie rafuena jai uiñotomoi; iadedi iena omoi ua raise uiñollena, iena dane cueticue. Iemo omoi comeciai raise facajana jitaidicue. ² Jusiñamui facaina jiaie lloraini micoriai lloga rafuena jai uiñotomoi. Cai Nama caina oretajanona, ie lloga rafuena omoimo jai lloticai. Naimie muidona jillobidomo. Bie rafuemo omoi comeciai facajana jitaidicue. ³ Biemo nano omoi comeciaina faca. Cristo nia abido biñenia, Cristo rafuena uaitatino iitimaci. Naimaci jitailla rafuedo jaitimaci. ⁴ Jicanoitimaci: “¿Ñiese Cristo nia abido biñede? Enirue finua facaisemona nana ra daje isoi comucana jaide. Cai mootiai jai fodaicana jaidimaci. Cristo jaca biñeite”. ⁵ Iese raitimaci; iadedi iese iñede. Jiaie suide rafuemo comeciaina facaacañedimaci. Jusiñamui jiaie lluamona, ie uaido mona finode. Enirue jiaie finode. Jinuimona iena finuamona, jinuimona eniruedi bairede. ⁶ Jinui diga Jusiñamuidi Noé micori facaise cominina jiaie fuidode. ⁷ Jusiñamui mona, enirue diga, ico fuidollena jai llote. Mona, enirue diga, bootaite. Ie jitaillirui Jusiñamui naimiena ñnoñedinona iese duere finoite. Ie uai jai llote; ia nia suiñede.

⁸ Cue isiruiganodomo. Biena feitaño. Ie lloga uai jaca suite. Cai Nama-mona daruidi mil años isoide. Naimiemona mil añodi daruibicaide isoide. ⁹ Damierie comeciai facadimaci: “Are suiñena jira, cai Nama ie lloga uaina nibai finoñeite”. Iese cai Nama iñede; iadedi comini naimiena ñnuana fecuise sedade. Comini imaci uai meidollena sedade. Naimaci faifillana jitañede. Ie muidona nia abido biñede. Ie lloga uai nia suiñede. ¹⁰ Firiraima billa isoi, cai Nama ebena abido biite. Naimie bia, mona eo ficirenamona fuite. Jitoma, fivui diga, ucuaie diga, bootajamona, fuite. Enirue, nana benomo ite ra diga, bootaite. ¹¹ Bie rafue suillena uiñoticai. Naie cai uiñuamona, Jusiñamui jitailla rafue finocana cai jailla. Naimiena raise cai sedajasa. ¹² Naie facaise billemo iocire cai sedaja. Raire suillena, naimie jitailla rafuena raise fino. Naie facaise Jusiñamui mona bootajamona, iena fuidoite. Jitoma, fivui diga, ucuaie diga bootajamona iena fuidoite. ¹³ Naimie jai llua isoi, jiaie mona,

jiaie enirue diga illena sedadicaí. Nainomo Jusiñamui jitailla isoi marena jaca iiticaí. Nainomo mare rafue finocana jaiticaí.

¹⁴ Cue isiruiganodomoí. Bie rafue nia suiñena jira, naimie abido nia biñena jira, jeacino finoñeno i. Uri icana omoí i. Iese omoí ia, naimie abido bia, omoína: “Mare” raite. Omoiri iobite. ¹⁵ Raire abido cai Nama biñena, naimiedi comini naimiena ñnuamo ocuride. Iena uiñoticaí. Cai isiruiga ama Pablo, bie isoide rafue omoímo navui cuete. Cristo naimiena uiñotaga rafue diese cuete. ¹⁶ Nana naimie cartaiamo bie isoide rafuena cuete. Naimie cartaiamo diga rafue ite. Dajerie rafue irirede. Cristo rafuena raise uiñoñedino, Cristona raise ñnoñedino iena tainonana llofuecabitimaci; iadedi iemona faificana jaidimaci. Jiaie Cristona ciegafuiaína tainonana llofuecabitimaci.

¹⁷ Bie rafue birui uiñotomoí. Iena omoí uiñuamona, jearede rafue finocabidino rafuedo jaiñeno. Abido danomo omoí jaiñellena, iemona abina rairui. ¹⁸ Cai Nama cai duenaillana uiñocana jai. Naimiedi cai Jilloitaraima. Naimiena omoí uiñocana jaillamona, naimiena nabai. Naimiena birui cai iobitajasa. Naimiena ua jaca cai iobitajasa. Mai. Macaibaite. Pedrodicue.

JUAN NANO FUEÑE ORETAGA RABE

Jusiñamui diga cai jaca illena, Juan cuete

¹ Cue uruiaina omoi isoilla jira, omoimo cartana oredicue. ¿Nie isidomoi? Nano dofoconi itimiena lloiacadicue. Naimiedi Jesucristo. Jiaie llofueoicaigano diga, jaie cai motomo naimie illamona, naimie llofuiana cacadicaí. Naimiena ciodicaí. Naimiena jiaí jetadicaí. Caina Jusiñamuina uiñotade. Jusiñamui diga cai jaca illena, jiaí caina llofue. ² Jusiñamui dinena billanona, imana jaide. Naimiena jaie raise cai ciua jira, naimie rafuena birui omoimo lloiacadicue. Ie Moo diga nano jaca ite; ia cai dine naimie billamona, naimiena jai ciodicaí. ³ Cai ciua rafuena, cai cacaja rafuena, omoimo lloiticue. Jusiñamuina cai diga omoi nabaillena jitaidicue. Jusiñamui Jito Jesucristona, cai diga omoi nabaillena jiaí jitaidicue. ⁴ Omoi comeciaí caimareficaillena, omoimo bie rafuena cueticue.

Jusiñamuidi jaca mareuidimiena jira, useredimonio ite isoide

⁵ Jesucristomona cai cacaja rafuena omoimo ja lloiticue. Jusiñamuidi jaca mareuidimiena jira, useredimonio ite isoide. Naimie comecidí jaca jeanina jira, jitiredimonio iñede isoide. ⁶ “Jusiñamuina nabaidicaí” cai raia, iadedí jeacinona finocana cai jaia, tainona lloticaí. Uanaicínodo nia jaiñedicai. ⁷ Jusiñamui jeacino jaca finoñede. Naimie isoi jeacino finoñeno cai jaia, coninina nabaidicaí. Jesucristo fiodaillamona, naimie diaillamona, Jusiñamui cai jeacinona oni dotade. Iena feitate. ⁸ “Caimo jeacino jaca iñede” cai raia, daní cai abina jifueticaí. Uanaicínodo nia jaiñedicai. ⁹ Naimiemo cai finoca jeacino cai lloia, Jusiñamui cai jeacinona dotaite. Nana cai marañedicinona dotaite. Naimie ñnogamiena jira, naimie maremiena jira, iese finoite. ¹⁰ “Omoimo ite jeacino” Jusiñamui llote; iadedí: “Jeacino finocabiñedicai” cai raia, “Jusiñamui tainona llote” raiticaí. Iemona naimie uaina jai uaitaticaí.

2

Cai facaina riidotimiedi Cristo

¹ Cue uruiái isoi cue mamecaomoi. Jeacino finocana omoi jaiñellena, omoimo birui cueticue. Jeacinona omoi finuana jitaiñedicue; ia jeacino bu finoia, Jusiñamui naimie facaina riidotimie jai ite. Jesucristo maremiena jira, cai facaina caina riidoite. ² Cai jeacino facaina naimie fiodaite. Iemona Jusiñamui riicaillifue anamona jillobidicaí. Jesucristo cai facaina fiodaite; ia nana cominí facaina jiaí fiodaite. ³ Jusiñamui llogacinona cai ñnuamona, naimiena cai uiñuana jai uiñoticaí. ⁴ “Naimiena uiñoticue” raitimiedi ie llogacinuai ñnoñenia, naimiedi tainona lloraima. Uanaicínona uiñoñede; ⁵ ia Jusiñamui llogacinuaina ñnotimiedi Jusiñamuina eo isiruicana jaite. Naimiena cai isiruillamona, naimiena cai nabaillana jai uiñoticaí. ⁶ “Cristona nabaidicue” raitimiedi, Cristo isoi, mare rafuena finoite.

Cristo rafuedo jaidomoi

⁷ Cue isiruiganodomoi. Creyentiaína omoi jailla facaise bie rafuena cacadomoi. Ie jira jiaie rafuena birui omoimo cueñeticue; ⁸ ia naicínona abido dane lloiticue. Cristo iedo jaide. Iedo jiaí jai jaidomoi. Jeacino anamo omoi jaie illamona, jitiredimonio itomoi isidomoi; ia Cristo rafuena omoi jai uiñuamona, useredimonio jai itomoi isidomoi. ⁹ “Cristo rafuedo jaidicue”

raitimiedi jiaie creyentena enoia, Cristo rafuedo nia jaiñede. Jitiredinomo naimie nia ite isoide. ¹⁰ Jiaie creyentena bu isirua, Cristo rafuedo raise jaide. Iedo naimie jaia, jiaimiena jeacinona finotañeite; ¹¹ iadedi jiaie creyentena bu enoia, jitiredinomo nia ite isoide. Jeacino anamo nia ite. Uisnidimie ie jaillinona raise uiñoñena isoi, Jusiñamui dine rillena raise uiñoñede. Ie isoi abina uiñoñede.

¹² Cue uruiaí isoi cue mamecaomoi. Cristo muidona omoi jeacino Jusiñamui jai dotajamona, nana omoimo bie cartana cueticue.

¹³⁻¹⁴ Einamací, Jusiñamuina are omoi jai ñnuamona, omoimo bie cartana cueticue. Naimie nano dofoconi jaca ite. Conirueni, jeacinona finoñellena omoi comeciaina ocuiñuamona, Jusiñamui uai omoi comeciaino raise itabil-lamona, marañedimiena omoi jai anafetitaja jira, omoimo bie cartana cueticue. Naimiedi Taife. Uruiaí, Jusiñamui uaina omoi como ñnuamona, omoimo bie cartana cueticue. ¹⁵ Omoi ecimo marañede rafuena ebiruiñeno. Iena bu ebirua, cai Moo Jusiñamuina isiruiñede. ¹⁶ Cai comeciaino ite marañede jitaillacinodi Jusiñamui ieñede. Cai uisido ebire jaide rafuedi Jusiñamui ieñede. Raruiaí diga, abi ieducinodi Jusiñamui ieñede. ¹⁷ Jusiñamui ieñede rafue jaca fuite. Naie isoide rafuedo jaidinodi jiaí fafitimaci; iadedi Jusiñamui jitaillacinona finodimie Jusiñamui illanomo jaca iite.

Cristona abi caitadino rafue

¹⁸ Cue uruiaí isoidomoi. Jesucristo abido billirui iaiei jai ite. Nanoca Cristona abi caitadimie billena jai fididomoi. Ailluena Cristona abi caitadino birui jai bairedimaci. Iemona Jesucristo abido billirui iaiei illana jai uiñotomoi. ¹⁹ Cai creyentiaí motomo nano itimaci; ia Cristo díbeimo naimaci iñena jira, naimaci llofuiana cai nafueñena jira, cai motomo birui fiebiñedimaci. Caímona naimaci jailla jira, Cristomo naimaci duiñenana jai uiñoticaí. ²⁰ Jesucristomona Jusiñamui Joreña jai omoi feiñua jira, nana omoi Jusiñamui díbeimo ite rafuena jai uiñotomoi. ²¹ Ie jira uanaicinona bu llofueia, iena uiñotomoi. Uanañedicinona bu llofueia, iena jiaí uiñotomoi.

²² Tainona llofuerainina ja cueiticue. “Cristo cai jilloitaraimañede” llotinodi taino llofueraini. “Jusiñamuidi cai Mooñede” llotinodi taino llofueraini. “Jesúdi Jusiñamui Jitoñede” llotinodi taino llofueraini. ²³ Cristona ñnoñedinodi Jusiñamuina jiaí ñnoñedimaci. Cristona ñnotino Jusiñamuina jiaí ñnotimaci. Jusiñamui Joreño omoimo illamona, iena jai uiñotomoi. ²⁴ Ie jira creyentiaína omoi jailla facaise omoi cacaja rafuedo ñnocana nia omoi jai. Iedo omoi ñnocana jaia, Jusiñamui Jitona raise nabaitomoi. Jusiñamuina jiaí raise nabaitomoi. ²⁵ Jusiñamui caimo jai llua isoi, naimie diga jaca iiticaí. ²⁶ Omoína damierie jifueiacana jira, bie rafuena jai cueticue. ²⁷ Jusiñamui Joreña jai feiñotomoi. Omoína Jusiñamui rafuena naimie uiñotaja jira, jiaie rafuena llofuerainina jai jitaiñedomoi. Jusiñamui Joreño uanaicinona omoína uiñotacabide. Naimie omoína uiñotaja isoi, Cristona nabaicana omoi jai. ²⁸ Cristo ico abido biite. Omoi jacinaiñellena, naimiena omoi meiruiñellena, naimiena birui raise omoi nabai. ²⁹ Jusiñamui mareñena cai uiñuamona, nana mare rafuena finocabidino naimiemo duillana jiaí uiñoticaí.

3

Juandi Jusiñamui cominina llua rafue

¹ Jusiñamui caina isiruillamona, naimie cominina jai jaidicaí. Iemo omoi comeciaina facajana jitaídicue. Naimiena naimaci uiñoñena jira, Jusiñamuina ñnoñedino cai uiñooga rafuena jiaí raise uiñoñedimaci. ² Ero, birui Jusiñamui cominidicaí. Cristo dane bia, cai illena nia raise uiñoñedicaí; ia naimie illa isoi

cai ico illena jai uiñoticaí. Ico naimiena cai cioillemona, iena raise uiñoticaí. ³ Iemo cai ocuirillamona, naimie marena illa isoi, cai comeciaí marena itataja. ⁴ Jeacina finocana bu jaia, Jusiñamui llogacinuaina ñnoñede. Jusiñamui llogacinuaina bu ñnoñenia, jeacina jai finode. ⁵ Jusiñamui dinena Cristo billanona, imana jai jaide. Cai jeacina oni dotallena, enirumo naimiedi bite. Naimiemo jeacino jaca iñena jira, jeacino dibeimo naimie jaca iñede. ⁶ Naimiena nabaidimiedi jeacino finocana jaiñede. Jeacina finocana jaidimiedi Cristona nia raise cacaiñede. Naimiena nia raise uiñoñede. ⁷ Cue uruiaí isoidomoi. Cristo llua isoi tainona llofueraíni birui itimaci. Jeacino finuana rairuiñedimaci. Naimaci omoína jifueñellena, abina rairui. Jesucristo jaca maremie. Mare rafuena finocana cai jaia, naimie isoi mareniticaí; ⁸ ia jeacino finocana bu jaia, Taífemo duide. Nano dofomona Taífedi jeacino finocana jaide. Ie jira Jusiñamui Jito bite, Taife rafuena anafetal-lena. ⁹ Naimiemo Jusiñamui uai illamona, Jusiñamui cominina jaidimiedi jai jeacina finocana jaiñede. Jusiñamui cominina jaillamona, jeacino finocana naimie jainide. ¹⁰ Iemona Jusiñamui dibeimo itinona raise uiñoticaí. Taife dibeimo itinona jiaí raise uiñoticaí. Mare rafuena finocana jaiñedimie Jusiñamuimo duiñede. Jiaíe creyentena isiruiñedimie Jusiñamuimo jiaí duiñede.

Coninina cai isiruilla rafue

¹¹ Creyentiana omoi jailla facaise: “Coninina isirui” raillana cacadomoi. Jiaíe creyentiana nia omoi isiruiñenia, Jusiñamuimo nia duiñedomoi. ¹² Caín micorimona cai fueua. Naimie ie amana isiruiñena jira, Taife naimiena ramo faiamona, ie amana meinete. Ie ama Jusiñamui jitailla rafuena finouide; ia Caín micori Jusiñamui jitailla rafuena finoñede. Uradoillamona ie amana meinete. ¹³ Ie isoide. Jusiñamui jitailla rafuena birui cai finuamona, Jusiñamui dibeimo iñedinodi caina enoidimaci. Ieri jacinaiño. ¹⁴ Cristona nia cai ñnoñena facaise jeacino anamo cai illa jira, Jusiñamuimona fioidaitino isoidicaí. Jiaíe creyentena cai isiruia, Cristomo jai cai duillana jai uiñoticaí; ia jiaíe creyentena bu isiruiñenia, jeacino anamo naimie nia ite. ¹⁵ Jiaíe creyentena bu enoia, naimiemo ie meinelle uai jai ite. Naie isoidimie Jusiñamuimo nia duiñede. ¹⁶ Cristomona cai fueua. Naimie jitailla jira, cai facaina fioidaite. Iemona jiaíe creyentiana cai isiruillana uiñoticaí. Ie jira naimaci facaina naimaci ramo jiriñellena fioidaicanticaí. ¹⁷ Jiaíe creyentiana cai isiruillamona, naimacina canoíticaí. Omoimo ra ia, jiaíe creyentemo ra iñenia, naimiena omoi canoñenia, Jusiñamuina raise isiruiñedomoi. ¹⁸ Cue uruiaí isoidomoi. “Jamai uaido jiaíe creyentiana isiruiticaí” cai raiñena; iadedi cai finoca rafuemona naimacina cai canua.

Jusiñamuimo jaciruiño jiredicai

¹⁹ Jiaíe creyentiana isiruicana cai jaia, Jusiñamui cominina cai illana raise uiñoticaí. Jusiñamui muidona cai comeci uri ite. ²⁰ Cai comecimo iticinona uiñoticaí. Siñonamiena jira, Jusiñamui iena jiaí uiñote. ²¹ Cai comecimo jeacino iñenia, Jusiñamuimo jaciruiño jiredicai. ²² Naimie llogacina cai ñnoia, naimie jitaillacina cai finoia, naimiemo cai jcaca rafuena birui feiñoticaí. ²³ Naimie Jito Jesucristo cai ñnuana jitaide. Cristo llua isoi, coninina cai isiruillana jiaí jitaide. ²⁴ Naimie llogacinuaina cai ñnoia, naimiena nabaidicaí. Caina jiaí nabaide. Naimie Joreño caimo illamona, naimie caina nabaillana jai uiñoticaí.

4

Juan tainona llofueraíni llua rafue

1 Omoina isiruiticue. Naga llofueraima uaina ñnoñeno. Ailluena tainona llofueraini birui illa jira, Jusiñamuimona naimaci feiñoga uaina ñca naimacina facaci: 2 “Jusiñamui ñnena Jesucristo billanona, ñmana jaide” naimaci lloia, Jusiñamuimona naimaci uaina otimaci; 3 ia “Jusiñamui ñnena Jesucristo biñede” naimaci lloia, Jusiñamuimona naimaci uaina oñedimaci. Cristona abina caitadimimona naimaci uaina otimaci. Naimie billena jai fididomoi. Comini comeciaina feidocana birui jaidimaci. 4 Ero, Jusiñamuimo jai cai duillamona, Jusiñamui caimo ite. Taino llofueraini dibeimo omoi jaiñena jira, naimaci llofuiana oñedomoi. Naie taino llofueraimimo Taife ite; ia Jusiñamui Taife baifemo faite. 5 Naie tainona llofueraini Jusiñamuina ñnoñedinomo duidimaci. Naimaci ecimo ite rafuena llofuecabitimaci. Jusiñamuina ñnoñedino naimaci llofuiana ebiruitimaci. 6 Jusiñamuimo jai duidicai. Jusiñamuina ñnotino cai llofuiana cacaacadimaci; ia Jusiñamuina ñnoñedino cai llofuiana cacaacaiñedimaci. Iemona Jusiñamui uaina llofueraina uiñotica. Iemona tainona llofueraina jiai uiñotica.

Jusiñamui caina isiruilla rafue

7 Omoina isiruiticue. Coninina cai isiruilla. Jusiñamui caina isiruillamona, caina jainona isiruitade. Ie isoi isiruitinodi Jusiñamui comini. Jusiñamui rafuena uiñocana jaidimaci. 8 Jusiñamuimo cai duillamona, caina jainona naimie isiruitaja jira, jainona isiruiñedimiedi Jusiñamui rafuena nia uiñoñede. 9 Jusiñamui caina isiruillamona, ie dajede Jito eniruemo orede. Naimie fiodaillamona, Jusiñamui ñne jaca iitica. Ie finoca rafuemonona Jusiñamui caina isiruillana jai uiñotica. 10 Jusiñamuina cai isiruillana ñañedice; ia Jusiñamui caina isiruillana ñaiticue. Cai jeacino facaina fiodaillena, ie Jito eniruemo orede. Iemona cai jeacinona feitade. Iemona isiruillana raise uiñotica. 11 Caina Jusiñamui isiruilla isoi, coninina cai isiruilla. 12 Buna Jusiñamuina jaca cioñede; iadedi coninina cai isiruillamona, Jusiñamui caimo illana jai uiñotica. Naimiena isiruicana jiai jaidicai. 13 Naimie Joreño caimo itatajamona, naimiena cai nabaillana uiñotica. Caina naimie nabaillana jiai uiñotica. 14 Bie rafuena jiai uiñotica. Jusiñamui ie Jitona eniruemo jai orete. Naimiena ñnoñedinona jilloitallena, naimiena orete. Naimie Jitona ciodica. Ie jira iena birui llotica. 15 “Jusiñamui Jitodi Jesús” llotimiedi Jusiñamuina nabaide. Jusiñamui naimiena jiai nabaide. 16 Ie jira Jusiñamui caina isiruillana uiñotica. Caina jainona naimie isiruitade. Iedo cai jaillamona, caina nabaide. Naimiena jiai nabaidica. 17 Iemona Jusiñamuina isiruicana jaitica. Naimie uicomo ico nana cai ille facaise naimiena jaciruiñetica. Jusiñamui Jitona Cristo illanona, Jusiñamui cominina cai jiai illanona, naimiena birui jaciruiñedica. 18 Jusiñamuina cai isiruia, naimiena jaciruiñedica. Eo raise naimiena cai isiruia, ¿ñiese naimiena jaciruitica? Naimiena cai jaciruia, naimie caina duere finuana jaciruitica. Jusiñamuina jaciruitimiedi Jusiñamuina nia raise isiruiñede. 19 Nano Jusiñamui caina isiruilla jira, caidi naimiena isiruitica. 20 “Jusiñamuina isiruiticue” raitimiedi jiaie creyentena enoia, jai taino llote. Creyentena cide; ia naimiena isiruiñede. Jusiñamuina cioñede. ¿Ñiese ie cioñenamiena isiruite? 21 Jusiñamui iena caimo jai llote: “Cuenta isiruitimie jiaie creyentena jiai isiruite”. Ie jira coninina isirui.

5

Taife ie rafuena anafetitica

1 Jusiñamuimona Jesús billana cai ñnoia, Jesús cai Jilloitaramana cai ñnoia, Jusiñamui cominina jaidica. Jusiñamuina cai isiruia, nana naimie cominina

jiaí isiruiticai. ² Jusiñamuina cai raise isirua, naimie llogacinuaina cai ñnoia, naimie cominina jiaí isiruiticai. ³ Jusiñamuina cai isirua, naimie llogacinuaina jiaí jai ñnoticai. Naimie uai raise ñnuamona, iena finollena sefuiruiñedicai. ⁴ Jusiñamui dibeimo itinodi Taife ie rafuena anafetitacai. Cristona cai ñnuamona, Taife ie rafuena anafetitacai. ⁵ Jesúdi Jusiñamui Jitonana cai ñnuamona, Taife rafuena anafetitacai.

Jesucristodi Jusiñamui Jito

⁶ Jesucristona dane ñaiticue. Naimiedi Jusiñamui Jitona ñnoticai. Naimie bautizajamona, naimie fiodaillamona naimiedi Jusiñamui Jitonana uiñoticai. ⁷ Uanaicinona naimie uiñuamona, Jesucristo bautizaja facaise Jusiñamui Joreño caina iena jiaí uiñotade. ⁸ Jusiñamui Joreñomona, Jesús bautizajamona, Jesús fiodaillamona, Jesúdi Jusiñamui Jitonana raise uiñoticai. ⁹ Jesús bautizaja facaise “Jesúdi cue Jito” Jusiñamui caimo llote. Jesúna comini lloia, iena feiñoticai. Comini llua baifemo Jusiñamui llua faia jira, Jusiñamui llua jiaí ua feiñoticai. ¹⁰ Jesúdi Jusiñamui Jitonana cai ñnuamona, cai comeciaí daje isoi lloide; ia Jusiñamui ie Jitona llua ñnoñedinodi: “Jusiñamui taino llote” raitimaci. ¹¹ Biena ñaiticue. Jusiñamui naimie diga caina jaca itataiacade. Naimie Jitona cai ñnuamona, iese caina jai itatate. ¹² Jusiñamui Jitona ñnotino Jusiñamui diga jaca iitimaci; ia naimiena ñnoñedino Jusiñamui diga jaca iñeitimaci.

Jusiñamui caina raise uiñote

¹³ Jusiñamui diga ico omoi jaca illena omoi raise uiñollena, bie cartana jai cueticue. ¹⁴ Jusiñamuina cai ñnuamona, naimiena jai jaciruiñedicai. Naimiemo cai jiaí, naimie jitailla isoide rafuena cai jicaia, naimie caina cacajana raise uiñoticai. ¹⁵ Iese cai jiaí, naimie jaca fairuana jiaí uiñoticai. ¹⁶ Jiaíe creyente jeacino finuana omoi cioia, naimie facaina Jusiñamuimo jiaí. Iemona Jusiñamui dibeimo naimiena dane itataitomoi. Jusiñamui rafuena jamaidimie facaina omoi jiaí lloñedicue. Naimie faifcana jaiacade. ¹⁷ Jusiñamui llogacinona bu ñnoñenia, jeacino jai finode; ia naimie facaina omoi jiaí, Jusiñamui iena feitaite. Faifcana jaiacadimie facaina omoi jiaí lloñedicue. ¹⁸ Jusiñamui comini jeacinona finocana jaiñeditimaci. Naiemona Cristo caina eenote. Ie jira Taife caina duere finonide. ¹⁹ Jusiñamuimo jai duidicai. Naimie anamo jai iticai; ia naimiena ñnoñedino Taife anamo jai itimaci. ²⁰ Jusiñamui Jito jaie eniruemo billana uiñoticai. Iemona caina nanoca Jusiñamuina uiñotade. Naimiena cai ñnuamona, nanoca Jusiñamuimo jai duidicai. Jesucristomo jiaí jai duidicai. Ie jira Jusiñamui diga ico jaca iiticai. ²¹ Cue uruiaí isoidomoi. Daje rafuena nia lloiticue. Jiraraímona abina rairui. Jusiñamui ieñede rafuedo omoi jaiñeno. Mai. Juandicue.

JUAN IE EMODOMO ORETAGA RABE

Uanaicinona coninina cai isiruilla

¹ Juandicue. Creyentiaina sedaraimadicue. Ñoo, ¿nie isoidio? Cue uaina o dine oredicue. O uruiaimo cue uaina jiai oredicue. Jusiñamui ona jai fetuamona, Cristo ie uanaicinona cue uiñua jira, omoina isiruiticue. Nana naie uanaicinona uiñotinodi omoina isiruitimaci. ² Naie uanaicinona cai uiñua jira, omoina isiruiticai. Iena uiñocana jaca jaiticai. ³ Cai Moo Jusiñamui ie Jito Jesucristo diga, caina jaca duenaite. Iaimaiaí caina jaca uri itataite. Uanaicinona cai uiñuamona, iaimaiaina cai isiruillamona, iese iiticai.

⁴ Caimo cai Moo llua isoi, uanaicinodo o uruiaimona dajerie jailla jira, iobidicue. ⁵ Ñoo, daje rafue omo lloiacadicue. Bie rafuena navui uiñotio. Cristo rafuena nano cai ñnoia, bie rafuena uiñoticai. Coninina cai isiruillana ñaiticue. ⁶ Iena ñaiacadicue. Coninina cai isiruillanona, Jusiñamui llogacinona ñnocana jaidicai. Cristona nano omoi ñnoia, Jusiñamui llucacinona cacadomoi. Coninina cai isiruillana cacadomoi.

Diga taino lloraini ite

⁷ Diga taino lloraini illa jira, iena ñaiticue. Jesucristo monamona jai billanona, imana jaiñenana llofuecabitimaci. Bu iese llofueia, cominina jifueite. Naimiedi Cristona abi caitadimie. ⁸ Cristo rafuedo omoi jailla jira, Jusiñamuimona buena omoi faifñellena, omoi abina rairui. Jusiñamuimona ibana feiñoitomoi. ⁹ Cristo llogacinona bu fañonocaia, Cristo rafuedo bu jaiñenia, Jusiñamuina ua uiñoñede; iadedi Cristo rafuedo bu jaia, cai Moo Jusiñamuina uiñote. Ie Jitona jiai uiñote. ¹⁰ O jofomo Cristo rafuedo jaiñedimie bia, Cristo rafuena cue llofua isoi naimie llofueñenia, naimiena nafueño. “Jusiñamui ona canuamona, marena o jai” lloño. ¹¹ “Marena jai” o lloia, naimie marañede rafue facaina jai itio.

Rafuena nia lloiacade

¹² Diga rafue ite omoimo cuellena; iadedi aillue cartana cueñeiticue. Omoi dine raire cue illemo ocuiridicue. Danomo cai rillamona ñaiticai, cai comeciai caimarecaillena. ¹³ O dine o euiño uruiaidi imaci uaina oredimaci. Naiñaiñodi Jusiñamui fetocañaiño. Mai. Juandicue.

JUAN IE EMODOMO JIAIE ORETAGA RABE

Gayo mare rafue finocana jaide

¹ Juandicue. Creyentiaina sedaraimadicue. Gayo, bie carta o dine oredicue. ¿Nie isoidio? Cristo ie uanaicinona coco uñua jira, ona isiruiticue. ² Cue isiruigamiedio. Nana o finua rafue marena jaillana jitaicue. O ecairenana jia jitaicue. O comeci marena illana jai uñoticue. ³ Cue dine dajerie creyentia bite. Uanaicinodo omoi jaillana llote. Cristo rafuedo omoi jaillana llote. Ie jira iobidicue. ⁴ Uanaicinodo omoi jailla jira, eo iobidicue. Cue muidona Cristona omoi ñnua jira, cue uruiaidomoi isidomoi. Uanaicinodo omoi jailla jira, eo iobidicue. ⁵ Cue isiruigamiedio. Naga icaiño jiaie creyentiaina o canoia, eo mare. Nia o uñonega creyentia o illanomo ria, naimacina o canoia, ua eo mare. ⁶ Naie isoide creyentiaina o isiruillana jia fididicue. Rollena creyentia ofia, ona marena ñaitimaci. Naimaci jaillinomo naimaci jia, naimacina o canoia, Jusiñamui jitailla isoi, ua eo mare. ⁷ Naimie rafue llua muidona, jai macaritimaci. Jusiñamuina uñoneñednomona jaca buena feiñoñedimaci. ⁸ Creyentiaina cai illa jira, naimacina cai canua. Naimacina cai canua jira, uanaicinona llocana jaicai.

Diótrufes marañede

⁹ O dine ite creyentiaimo cartana jai oredicue. Diótrufesna janore ñaiacadicue. Naimiedi eo uicoidimie. Naimiedi cue uaina uñoiacañede. ¹⁰ O dine cue ria, naimie finoca rafuena omoimo lloiticue. Cuenajere ñaite. Jiaie illanomona bite creyentiaina feiñoiacañede. Naimaci feiñuana rairuide. Roracomo naimaci bia, naimacina jino dotade.

¹¹ Jeacino finoraini isoi omoi iñeno; iadedi marecinona finoraini isoi omoi i. Marecino finocabidimiedi Jusiñamui ie. Jeacino finocabidimiedi Jusiñamuina ua uñoneñede.

Demetrio marena ite

¹² Nana creyentiaidi Demetriona marena ñaitimaci. Uanaicinodo naimie jaide. Iese naimiena jia ñaiticai. Cai llucacodi uanaicinona uñotio.

Rafuena nia lloiacade

¹³ Diga rafuena cueiacadicue; iadedi cueñeiticue. ¹⁴ Raie ona cue cioillemo ocuridicue. Ie mei ñaiticoco. ¹⁵ Uri o i. Cue dine ite o nabaiñiaidi uaina omo oredimaci. O dine ite cue nabaiñiaimo cue uaina oredicue. Mai. Juandicue.

JUDAS ORETAGA RABE

Judadi Jusiñamui fetocanomo cartana orede

¹ Cue nabaiñiai, bie carta omoi dine oredicue. ¿Nie isoidomoi? Judadicue. Ie rafuena lollena, Jesucristo dibeimo jai maijadicue. Jacobo cue ama. Jusiñamui omoina jai fetuana cue uiñuamona, bie cartana oredicue. Cai Moo Jusiñamui omoina isiruute. Jeacinona omoi finoi raillano, Jesucristo omoina jai sedade. ² Jusiñamui omoina eo duenailana omoi uiñocana omoi jaillana jitaidicue. Naimie omoi comeciaina raise uri itatajana omoi uiñocana omoi jaillana jitaidicue. Naimie omoina eo isiruillana omoi uiñocana omoi jaillana jitaidicue.

Tainocinona llofueraini ite

³ Cue isiruigano, omoimo Jusiñamui caina jai jillotaja rafuena iocire cueiacadicue; iadedi jiaie rafue birui illa jira, omoimo cueticue. Jusiñamuimona cai feiñoga rafuena omoi eo riiduana jitaidicue. Naie rafuena Cristo oretaganomona cacadicaí. Naie rafuena meidonidicaí. Ieconi duide. Jusiñamui jiaie rafuena lloñeite. ⁴ Caimo ite rafuena omoi eo riiduana jitaidicue. Cai creyentiaí motomo dajerie tainocinona llofueraini illa jira, iena jitaidicue. Uanaicinona llofuecana naimaci illamo cai comeciaina facadicaí; iadedi Jusiñamui jitaillacinona finoñedimaci. “Jusiñamui caina duenailamona, jeacino finocana cai jaia, cai jeacinona oni dotaite” llofuecabitimaci. “Cai jeacino facaina caina duere finoñeite” llofuecabitimaci. “Jeacino finocana cai jaiacania, caimona mare” llofuecabitimaci. “Jesucristo cai Namana” llofueñedimaci. Naimie lloga rafuedo jaiacaiñedimaci.

“Naimaci isoidinona duere finoiticue” Jusiñamui jaie llote. Naimie duere sefuillacino anamo jai itimaci.

⁵ Iemona omoi raise fueollena, bie rafuemo omoi comeciaina faca. Bie rafuena navui llofueticaí. Iena raise cacadomoi; iadedi iena dane uibiño. Iena lloiticue. Ero, bie eniruemo naimaci billena, Egiptomona Jusiñamui cai jaiagaina bitatate. Naimiena naimaci ñnoñena jira, bie eniruemo riñedimaci; iadedi Jusiñamuidi jofue iñenanomo naimaci fiodaillena llote. Iemona naimaci fiodaitimaci. Ie isoide. Naimiena birui omoi ñnoñenia, omoina duere finoite. ⁶ Ero, bie rafuemona omoi fueua. Jusiñamui ecimo ite jaienisaimona dajerie imaci illanona jaie jitañedimaci. Naimie isoi iacadimaci. Naimaci illano naimie ecimo jaie itimaci. Naimaci jitailla rafuena naimaci finollena, naimie ecimo illana fainonocaidimaci. Iemona naimie naimacina jai oni dotade. Naimie illanomo dane iñeitimaci. Naimacimo ite uai jai iñede. Naimie riicaillafue anamo jai itimaci. Naimie dine nana comini illirui ia, naimacina duere finoite. Naimacimona omoi fueua. Jeacinona Jusiñamui dibeimo itino finoi, Jusiñamui naimacina duere finoite. ⁷ Ero, bie rafuemona omoi fueua. Sodoma railla nairai micoriaí marañedicinona jaie eo finouidimaci. Gomorra railla nairai micoriaí daje isoidimaci. Nainomo ianori ite nairai daje isoidimaci. Naimaci añede riñoniaí diga itimaci. Naiñaiñuai iniñede iñiaí diga itimaci. Coninina aifiedotimaci. Iemona Jusiñamui naimacina jaie duere finode. Nana naimaci illanona raise jaie jobaitate. Naimacimona omoi fueua. Jusiñamui nana jeacinona finodinona duere finoite.

⁸ Naie tainocinona llofueraini daje isoidimaci. Nicañillafuedo jaillamona, ebena jaidimaci. Naimaci abimo jearede rafuena finodimaci. Jusiñamui uaina jamaidimaci. Jusiñamui jaienisaina jeare ñaitimaci. ⁹ Miguelna

mamecirede jaienici isoi iñedimaci. Miguel Jusiñamui nanoca jaienici. Moisés micori fiodailla mei, Miguel Moisés micori abina raiacade. Taife diga Moisés micori abina uaitate. Taife Moisés micori abina bairoacade. Miguel iena jiai jitaide. Miguel Taife diga riire ñaite; iadedi Taifena jeare ñaiñede. Miguel ie comecina facañede: “Cuemo ite uai Taifena oni oretallena”; iadedi naimiemo llote: “Jusiñamui ona duere finoite”. ¹⁰ Naie taino llofueraini iese iñedimaci. Jusiñamui jaienisaina jeare ñaitimaci. Ocainai ai imaci comeciai uiñuacinodo jailla isoi, naie taino llofueraini imaci uiñoga rafuedo jaidimaci. Iemona ja muidomo faifitimaci. ¹¹ Caín micori isoi naimaci illa jira, Jusiñamui naimacina duere finoite. Jusiñamui jitailla rafuena Caín micori finoacaiñena jira, ie ama micori diga icirite. Icirillamona Caín micori ie ama micorina jaie meinete. Caín micori rafuedo naie taino llofueraini jaidimaci. Naimaci jitailla rafuena naimaci finua jira, Jusiñamui naimacina duere finoite. Balaam micori isoi naimaci illa jira, naimacina duere finoite. Ucube ollena, Balaam micori uanaicinona jaie lloñede; iadedi cai judíuai cominina jeacinona finotate. Ucube ollena, naie taino llofueraini Balaam micori rafuedo jaidimaci. Uanaicinona jaca llofueñedimaci. Coré micori isoi naimaci illa jira, Jusiñamui naimacina duere finoite. Moisés micori uaina Coré micori ñnoñena jira, Jusiñamui naimie micorina meinete. Jusiñamui uaina naie taino llofueraini ñnoiacañena jira, jiai faifitimaci. ¹² Dani omoi nabairillamona danomo omoi guia, naie taino llofueraini jiai bitimaci. Naimaci illa jira, raise nabairinidomoi. Meiruiñeno eo guitimaci. Dani naimaci comecimo ite jitaillacinona finodimaci. Omoina canoacaiñedimaci. Maraiñedimaci. Monamo jamai ite uillie isoidimaci. Aifi naie isoide uillie oni ñaitade. Ie mei noci deide. Noci deiñenia, enirue saferena jira, buena sicoñede. Maraiñede. Naie taino llofueraini maraiñedimaci. Naimacimo marecino iñena jira, llisiñede riara isoidimaci. Llisilla facaise riara llisiñenia, maraiñede. Riara llisiñenia, iena oni aiñodicai. Maraiñena jira, safenaite. Naimaci maraiñena jira, naie taino llofueraini jiai safenaitimaci. ¹³ Naie taino llofueraini jearede rana finocabidimaci. Eo bagode monailai isoidimaci. Monailai eo bagoia, monailai fuemo jearede rana oni ñaicosite. Ucuaina eruaillamona naiona cai macarillana uiñotica; iadedi ucudu ana feia, cai macarillana raise uiñoñedicai. Naie taino llofueraini ana fede ucudu isoidimaci. Comini uanaicinona uiñotañedimaci. Naimaci llofuiacinomona Jusiñamui jitailla rafuedo cai raise jaillana uiñoñedicai. Jusiñamui naimacina duere finoite. Naimie illanomo jaca iñeitimaci. Jitiredinomo jaca iitimaci.

¹⁴ Naimacina Enoc jaie llote. Adán micori facaisemona Enoc facaisemo Adán cominimona siete moodi comuide. Enoc llote: “Ero, cai Namadi ie ailluena jaienisai diga biite, ¹⁵ nana naimiena ñnoñedinona duere finollena. Naimie jitailla rafuena naimaci finoñena jira, maraiñedicinona naimaci finua jira, naimiena naimaci jeare riire ñaia jira, naimacina duere finoite” llote.

¹⁶ Naie taino llofuerainidi creyentiaina sedarainina uaitaside. Jusiñamuina jeare ñaoidimaci. Dani naimaci jitailla rafuena finouidimaci. Eo abina biruidimaci. Jiaie cominimona rana jamai feiñollena, nano naimacina iobitadimaci. Iobitajano, rana jamai jicadimaci. Naimaci isoi omoi iñeno.

Cristona ñnotinomo llucino

¹⁷ Cue isiruiga amatiai, cai Nama Jesucristo oretagano jai llogacinona omoi comeci. ¹⁸ Raitimaci: “Jesucristo nia abido biñena facaiseconi naimie uaina ñnoñedino jaca iitimaci. Naimaci jearede jitaillacinodo jaitimaci” raitimaci.

¹⁹ Naie taino llofueraini comini comeciai daje isoi lloillana itatañedimaci. Jusiñamui dibeimo iñede rafuena gaidimaci. Jusiñamui Joreño naimacimo iñede.

²⁰ Cue isiruigano, naimaci isoi omoi iñeno; iadedi Jusiñamui rafue ñnocana mai omoi jai. Naie rafuedi mare. Jusiñamui Joreño omoína canuacínodo Jusiñamuimo omoi jii. ²¹ Jusiñamui omoína isiruillacínona uiñocana omoi jai. Jusiñamui ecimo cai jaca illemo fecuise ocuiri. Caina cai Nama Jesucristo duenaila jira, naimie ecimo jaca iiticaí. ²² Diga comini naie taino llofueraini rafuedo jaidimaci. Iemona dajerie Jusiñamui uaina raise nia ñnoñedimaci. Naimacimo llono: “Mai ñno. ²³ Dajerie cominina Jusiñamui duere sefuillacínomona jillote”. Taino llofueraini rafuedo naimaci jailla jira, niadi faifitimaci. Naie rafuedo naimaci jailla jira, damierie jeacínona eo finodimaci. Jeacínona naimaci finua isoi omoi finoi raillanona, naimacina jaciruiocaida duenai.

Jusiñamuimo iobillacínona cai fecacabillasa

²⁴ Jusiñamuidi omoína jeacínona finoñenana itatarede. Naimie uicomo omoína ico itataite. Omoína jeacínona omoi jaca finoñedena nainomo itataite. Nainomo iocire iitomoi. ²⁵ Jusiñamuidi jaca dajede. Cai facaina cai Nama Jesucristo fiodaillamona, caina cai jeacínomona jai jillotate. Jusiñamuimo iobillacínona cai fecacabillasa. Naimiedi siño. Naimie uai ebirede. Nana radi naimie anamo ite. Naga rana naimie ocuillena, naimiemo siño uaidi ite. Jaie jaca iese naimiedi ite. Birui jaca iese naimie ite. Ico jaca iese naimie iite. Mai. Macaibaite. Judadícue.

JUAN ICO SUILLE RAFUENA CUIAFUE

Jesucristo ico suille rafue llwana cueticue

¹ Jesucristona cueticue. Juandicue. Jesucristo facaina maijicabidicue. Ie dibeimo itinomo iena Jesucristo llollena, Jusiñamui naimiena bie rafuena uiñotade. Jaiiruido ico ebena suille rafuena uiñotade. Cuen a iena uiñotallena, iena cuemo llollena, ie jaienici cue dine oretate. ² Jusiñamui cuena birui uiñotaga rafuena jai cueticue. Jesucristo cuemo birui lloga rafuena jai cueticue. Nana birui cue cúa rafuena jiai jai cueticue. ³ Bie ico suille rafuena ado facacabidinodi caimare iitimaci. Biena cacacabidino iena inuamona, caimare iitimaci. Bie rafue suillirui iairei illa jira, iemo raise cacarei.

Siete creyentiai illanuaimo bie carta oredicue

⁴ Asia railla eniruemo ite creyentiai, omoi dine cue uai oredicue. Siete illanomo omoi illamona, bie rafue omoi uiñuana jitaicue. Iena omoi uiñollena, biena cueticue. Jusiñamui ie Joreño diga, Jesucristo diga, omoina duenaicabide. Omoina uri itatacabite. Iena omoi uiñocana mai omoi jai. Jusiñamui jaie jaca ite. Birui naimie jaca ite. Ico jaca ite. Ie Joreño naimie abimo illamona, omoina bie rafuena raise cacataite. Iena inotaite. ⁵ Ie Moo uaina raise inuamona, eniruemo naimie illa facaise Jesucristo ie Moo rafuena raise atona llouide. Naimie fiodaite; iadedi naiemona jillode. Naimie dane fiodañena jira, nana illaicomini naimie anamo jai itimaci. Caina jaca isiruite. Naimie fiodaillamona caina cai jeacinomona jai jillobitade. ⁶ Naimie fiodaillamona naimie cominina jaidicai. Naimie anamo illaima isoi caina sedallena, caina itatate. Naimie cominina cai illa jira, naimie Moo Jusiñamui diga atona birui ñairedicai. Ie muidona naimie iobillacinona jaca cai fecacabillasa. Naimie caina sedajasa. Iena jitaicue.

⁷ Ero, eniruemo uillie motodo Jesucristo biite. Naimie bia, nana comini naimiena cioitimaci. Naimiena jaie meinete nairaidi naimiena cioitimaci. Duere sefuillana jacinaillamona nana comini eecuitimaci. Iese jaca suite.

⁸ Cai Nama Jusiñamui cuemo llote: “Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Birui iticue. Nana ra fuilla mei, jaca iticue. Siño jitodicue”.

Juan Cristona cide

⁹ Daajena Cristomo cai duilla jira, omoi amadicue isodicue. Cristomo cai duillamona, birui duere sefuidicai. Cominina ico naimie sedaia, nainomo iticai. Naimie cai comeciaina ocuiñotajamona iemo birui ocuiridicai. Jusiñamui uaina cue llua jira, Cristo rafuena cue llua jira, duere cue sefuillena, Patmos railla uiasimo birui iticue. Cárcelmo illa isoi duere sefuillena, illaicomini bene cuena birui oredimaci. ¹⁰ Jusiñamuina cue sedajamona, naimie Joreño cuena namatajamona, inñenamona nicairilla isoi cue jinafo dine damie ado llwana cacadicue. Trompeta isoi ie uaidi ficirede. ¹¹ Cuemo llote:

—O cioacalle rafuena cueno. O cacaacalle rafuena cueno. Ie mei bie siete illanuaimo iena oreta: Efesomo, Esmirnamo, Pérgamomo, Tiatiramo, Sardimo, Filadelfiamo, Laodiceamo. Diese illanuaimo oreta —llote.

¹² Cuemo llotimiena cue cioillena, jinafo dine erodaticue. Siete oromona finoca lamparíniai ciodicue. Naga lamparín ie oromona finoca rairacomo raide. ¹³ Naie lamparíniai motomo imana eruaidimiena ciodicue. Naimiedi Cristo. Areroina jitade. Oromona finoca cinturóna jitade. ¹⁴ Naimie ifotirai

userede iniroi isoi eo userede. Naimie uisi irai boa isoi eruaide. ¹⁵ Naimie eillidi bronze eo dua isoi quenirede. Naimie uai aillue ille tua isoi eo ficirede. ¹⁶ Ie nabeillimo siete ucuduna lliide. Naimie fuemo nagafebei eo jairede lloebi ite. Naimie uieco eo quenirede, jitoma eo lligaiñua isoi.

¹⁷ Naimiena cue ciuamona, naimie uicomo fiodaitimie isoi ana uaidicue; iadedi ie nabeilli diga cuena jetajamona raite:

—Cuena jaciruiñeno. Siño jitona cue illamona, jaie jaca iticue. Ico jaca iiticue. ¹⁸ Jaie fiodaiticue; iadedi naiemona jaie jillodicue. Jaca iiticue. Dane fiodaiñeiticue. Cue uai siñona jira, comini fiodailliruina lloticue. Cuena ñnoñedino fodailla mei, naimaci joreñuai illinona jiai lloticue. ¹⁹ O como ciua rafuena cueno. Omo cue ja lolle rafuena cueno. O ciolle rafuena jiai cueno. ²⁰ Ailluena rafue omo lloticue. Ona iena uiñotaiticue. Cue nabeillimo siete ucuduaina ciodio. Bie siete ucuduaidi bie siete creyentiai llofueraini isoide. Bie siete lamparinaidi bie siete illanomo ite creyentiai isoide. Bie creyentiaina ja ñaiacadicue —raite.

2

Cristo Efesomo ite creyentiaimo lloga rafue

¹ Cristo cuemo llote:

—Efesomo ite creyentiaimo llollena, nainomo ite llofueraimamo cue llwana cueno: “Cue nabeillimo siete ucuduai ite. Siete oromona finoca lamariniai motomo iticue. Omoina ñaiticue. Omoi llofueraima cue anamo ite. Omoi motomo cue illamona, cuena nabaidomoi. ² Omoi motomo cue illa jira, omoi illana raise uiñotocue. Omoi comeciai ocuiñocana iciriñeno itomoi. Maraiñedicinona finoraini diga nabairiñedomoi. Omoi motomo damierie ‘Cristo oretagacai’ raitinona facaciamona, naimaci tainona llorainina uiñotomoi. ³ Omoi comeciai ocuiñocana jaicabidomoi. Cue muidona duere sefuidomoi; iadedi iena sefuiruiñedomoi. Cuena ñnocana nia jaidomoi. ⁴ Iese itomoi; iadedi omoi abi rafue cuemona birui janore ite. Creyentiaina omoi nano jailla facaise cuena eo isiruitomoi; iadedi birui iese cuena isiruiñedomoi. ⁵ Iemo omoi comeciaina faca. Cue dibeimo dane raise i. Cuena omoi nano isiruilla facaiseconi omoi illa isoi, cue jitaillacinona birui omoi fino. Cue dibeimo omoi comeciai dane raise iñenia, omoina duere finoiticue. Iemona omoi lamparin oni uiticue. Omoi creyentiaina ñaiticue. Cue dibeimo raise omoi iñenia, jiairuido omoi illanomo creyentiai iñeitimaci. ⁶ Omoina marenona jiai lloticue. Nicolaitas railla comini finoca rafuena gaiñedomoi. Iena jiai gaiñedicue. Eo maraiñede rafuena finocana jaidimaci. ⁷ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua. Cuena raise ñnotinomo Jusiñamui illanomo ite riarana iiticue. Ie llillemona jaca iitimaci” cueno.

Cristo Esmirnamo ite creyentiaimo lloga rafue

⁸ Cristo cuemo llote:

—Esmirnamo ite creyentiaimo llollena, nainomo ite llofueraimamo cue llwana cueno: “Jaie jaca iticue. Eniruemo jaie cue ia, fiodaiticue; iadedi naiemona jai jillodicue. Jaca iiticue. ⁹ Cue cominina omoi illa jira, duere sefuidomoi. Omoi duerenana uiñotocue. Benomo dueredomoi; iadedi Jusiñamui mona duenidomoi. Naimie dine ico omoi ia, buerenitomoi. Damierie omoina jeare ñaiana uiñotocue. Naimacidi judíuai comini; iadedi cue dibeimo iñedimaci. Taife anamo itimaci. ¹⁰ Ico omoi duere sefuia, jaciruiñeno. Taife cárcelmo omoimona damieriena itataite. Abido danomo omoi jaillena, iese omoina duere finoite. Diez digarui duere sefuitomoi. Omoi ille dinori cuena ñnocana omoi jai. Duere sefuillamona bu fodaia, cue diga

jaca iite. ¹¹ Jusiñamui Joreñomona cue lloga rafue ite, omoï creyentiaï iena. Bie rafue bu cacajia, iena jiaï ñnua. Jusiñamuidi cuena raise ñnotinona naimaci jeacino facaina ibana oñeite. Iraimo faifiñeitimaci; ia Jusiñamui dine jaca iitimaci” cueno.

Cristo Pérgamomo ite creyentiaïmo lloga rafue

¹² Cristo cuemo llote:

—Pérgamomo ite creyentiaïmo llollena, nainomo ite llofueraïmamo cue llua cueno: “Nagafebei eo jairede lloebi cuemo ite. ¹³ Omoï illana uiñoticue. Taife anamo itinno motomo itomoi; iadedi cuena ñnocana nia jaidomoi. Omoïmona Antipas micorina navui meinetimaci. Naimie micoridi cue rafuena raise llofueuide. Naie facaise cuena faïnonocaiñedomoi; ¹⁴ iadedi cuemona janore rafue omoï diga birui ite. Omoïmona damieredi Balaam micorï llofuiacinodo jaidimaci. Balaam micorï Balac micorïmo jaie llua jira, omoï jaiagai jeacino finodimaci. Balac cominimo omoï jaiagai diga nabairillena llote. Ie jira omoï jaiagai jiraraimo fecaca guillena naimaci diga guitimaci. Iemei naimacimona ainiaina otimaci. Jusiñamuina ñnoñedinomona ainiaina otimaci. Naiemona jearede rafue comuide. Omoïmona birui damierie iese isoidimaci. Cuena ñnoñedinomona ainiaina otimaci. ¹⁵ Omoïmona damierie nicolaïtas railla llofuiacinodo jiaï jaidimaci. Naimaci llofuiacinodi uanañedicino. ¹⁶ Naie llofuiacinomona eneno mai omoï i. Iedo jaiñeno. Naie llofuiacinodo jaidinomo: ‘Omoï comeciaï iuai dane meido’ llono. Iena naimaci finoñenia, cue dibeimo naimaci raise iacaiñenia, cuemo ite lloebi diga cuena ñnoñedinona duere finoiticue. ¹⁷ Jusiñamui Joreñomona cue lloga rafue ite, omoï creyentiaï iena. Bie rafue bu cacajia, iena jiaï ñnua. Judïuai jaiagaimo maná railla guille cue illa isoi, cuena raise ñnotinomo monamo jai ite maná isoi iiticue. Biena ñaiticue. Imaci comeciaïna ocuiñotajacinona iiticue. Cue cominina naimaci illamona, naimacimo userede noficina jiaï iiticue. Nainomo mameci ite. Dani naiena feiñotino naie mamecina uiñoitimaci” cueno.

Cristo Tiatiramo ite creyentiaïmo lloga rafue

¹⁸ Cristo cuemo llote:

—Tiatiramo ite creyentiaïmo llollena, nainomo ite llofueraïmamo cue llua cueno: “Jusiñamui Jitona cue illanona, bie rafue omoïmo lloiacadicue. Cue uisi irai isoi boode. Cue eilli bronze eo dua isoi quenirede. ¹⁹ Omoï finoca rafuena uiñoticue. Jusiñamuina omoï isiruillana uiñoticue. Jiaïe cominina omoï isiruillana uiñoticue. Cuena omoï ñnuana uiñoticue. Jiaïe creyentiaïna omoï canocabillana uiñoticue. Duere sefuidomoi; iadedi omoï comeciaï ocuiñuana uiñoticue. Navui iese icana jaidomoi. Birui bai lliaï jaidomoi; ²⁰ iadedi cuemo omoï diga rafue ite. Omoï motomo marañede riño ite. Jezabelna ñaiticue. Naiñaiño omoï oni dotañena jira, cuemo omoï diga rafue ite. ‘Jusiñamui rafuena jino llua uai cuemo ite’ naiñaiño llote. Uanañedicinona llofuecabilla jira, omoïmona damierena jifujete. Jearede rafuena llofuecabite. Omoï aiñede riño diga illana llofujete. Omoï ñiñede iima diga illana llofujete. Jiraraimo fecaca guille guillena llofujete. Iena guilla jira, omoïmona damierie naie jiraraina sedade. Iese naiñaiño llofuecabite. ²¹ Naiñaiño comeci iuai meidollena are sedadicue; iadedi naiñaiño naie jearede rafuena faïnonocaiacaiñede. ²² Naiñaiño duere sefuillena, naiñaiño duitaiticue. Naimaci comeciaï iuai naimaci meidoñenia, naiñaiño llofuiacinodo jaidinona jiaï eo duere finoiticue. ²³ Naiñaiño dibeimo itinona meineiticue. Nana creyentiaïdi nana comini comeciaï iuaillaina cue uiñuana jiaï uiñoitimaci. Nana comini comeciaï facajacinona cue uiñuana jiaï uiñoitimaci. Ie jira omoï finolle rafue diese cuemona duere sefuitomoi.

²⁴ Jezabel llofuia cinodo jaiñe ñinomo ja lloiticue. Taife come uiñoñega rafuena uiñote. Iena nia uiñoñedomoi. Omoimo jiaie rafuena lloñeiticue; ²⁵ iadedi cue nia abido biñenia, cuemona omoi uiñoega rafuena ñnocana mai jai. ²⁶ Cue Moomona cue uaina feiñoticue. Cuena raise ñnuamona, abido cue bia, cue jitaillacinona finocabidinomo cue uaina iiticue. Naie facaise cue uai diga cue anamo ite nairaiaina raise sedaitimaci. ²⁷ Naimacina riire raise sedaitimaci, cue jitailla rafue naimaci finollena. Iena naimaci finoñenia, naimacina duere finoitimaci, lloedosi diga, nogo eo llailla isoi. ²⁸ Cuena ñnotinomo monairaicuduna jiai iiticue. ²⁹ Jusiñamui Joreñomona cue lloga rafue ite, omoi creyentia iena. Bie rafue bu cacajia, iena jiai ñnua” cueno.

3

Cristo Sardimo ite creyentiaimo lloga rafue

¹ Cristo cuemo llote:

—Sardimo ite creyentiaimo llollena, nainomo ite llofueraimamo cue llua cueno: “Jusiñamui Joreño cuemo ite. Naimie Joreño omoina canocabide. Omoina sedacabide. Siete ucuduai cuemo jiai ite. Omoi llofueraimana ñaiticue. Omoi finoca rafuena uiñoticue. ‘Cristona raise ñnoticaí’ raitomoi; iadedi omoi comeciaimona raise ññedomoi. ² Cue ñibeimo raise dane i. Cuena dane raise ñnocana jai. Cuena jai fañnonocaiacadomoi. Jusiñamui omoi finoca rafueri iobiñede. ³ Cue rafuena jai cacajamona, iena ñnotomoi. Iedo dane jai. Omoi comeciai iuaina dane meido. Cue ñibeimo dane raise omoi iacaiñenia, firiraima bainino billa isoi, omoina duere finollena, ebena biiticue. Omoi ñine cue billiruina uiñoñeitomoi. ⁴ Omoimona damierie jearede rafuena finocana jaiñe ñinomo. Jusiñamuiimona naimaci comeciai marena jira, cue ñine naimaci illena, userede ñniroina jitaimitimaci. ⁵ Cuena ñnocana jaidinodi userede ñniroina jitaimitimaci. Cuemo ite rabenicomona naimaci mameciaina doñeiticue. Cue illanomo jaca iitimaci. ‘Naimacidi cue comini’ cue Moomo lloiticue. Naimie jaienisaimo iena jiai lloiticue. ⁶ Jusiñamui Joreñomona cue lloga rafue ite, omoi creyentia iena. Bie rafue bu cacajia, iena jiai ñnua” cueno.

Cristo Filadelfiamo ite creyentiaimo lloga rafue

⁷ Cristo cuemo llote:

—Filadelfiamo ite creyentiaima llollena, nainomo ite llofueraimamo cue llua cueno: “Mareuidimiedicue. Uanaicinona jaca lloticue. David micori jitona cue illamona, illaimana cue illa jira, siño uai cuemo ite. Ie muidona cue jitailla diese cominina feiñoticue. Jusiñamui illanomo naimaci illena, naimacina feiñoticue. Cue jitailla diese cominina feiñoñedicue. ⁸ Omoi finoca rafuena uiñoticue. Omoina cue canua jira, jaca buna cue rafuena omoi llua itatanide. Jamai bue isoidomoi; iadedi cue rafuena ñnocana jaidomoi. Cuena janoñedomoi. ⁹ Omoi ñine damierie Taife anamo itimaci. Naimacidi judíuai; iadedi cue ñibeimo ññe ñinomo. Tainona llocabitimaci. Ero, omoi ñine naimacina cue bitatajamona, omoina cue isiruillana uiñoitimaci. Cue ñibeimo naimaci jailla mei, cuemo iobillacinona fecaitimaci. ¹⁰ Nana cuena ñnoñedinona ico eo duere finoiticue. Iemona cuena naimaci ñnoñenana uiñoiticue. Omoi duere sefuiñellena, naie facaisemona omoina jillotaiticue. ¹¹ Eniruemo ebena abido biiticue. Cuemona ibana omoi feiñoñeni raillano, cue ñibeimo ñnocana omoi jai. Cue ñibeimo raise omoi jaiñenia, cuemona jaiamie omoi facaina ibana feiñoite. ¹² Cuena raise ñnotino comeciaina ocuiñotaiticue. Cue illanomo jaca iitimaci. Cuemo naimaci duilla jira, cue jiaie mamecina naimaci abimo cueiticue. Jusiñamui mamecina naimaci abimo cueiticue. Jusiñamui illano mamecina naimaci abimo cueiticue.

Naimie illanodi comue Jerusaléna mameciredede. Naimiemona, monamona icoo ana biite. ¹³ Jusiñamui Joreñomona cue lloga rafue ite, omoi creyentiaí iena. Bie rafue bu cacajia, iena jiaí ñnua” cueno.

Cristo Laodiceamo ite creyentiaímo lloga rafue

¹⁴ Cristo cuemo llote:

—Laodiceamo ite creyentiaímo llollena, nainomo ite llofueraímamo cue llwana cueno: “Siño Jitodicue. Cue lloga uaina jaca finocabidicue. Ua-naicinona jaca llocabidicue. Cue uaido Jusiñamui nana finode. Nana comuitate. ¹⁵ Omoi finoca rafuena uiñotícue. Cue rafuedo jaillana nia faínonocaiñedomoi; ia cue rafuedo eo raise jaiñedomoi. Janore ñnocana jaidomoi. ¹⁶ Omoi finoca rafuena cue gaiñena jira, cuemona omoína oni dotaiticue. ¹⁷ ‘Ucuberedicai’ raitomoi. ‘Raruiaredicai. Nana cai jitailla ra caímo ite’ raitomoi. Cuemona iese iñedomoi. Cuemona dueredomoi; ia iena uiñoñedomoi. Cuemona caímare iñedomoi. Cuena omoi raise ñnoñena jira, uisínidino isoidomoi. Taimiedomoi isoidomoi. ¹⁸ Ie jira omoína dajerie rafuena llofueitícue. Cuemona omoi eo duerena jira, omoi comeciaí raise iñena jira, omoímo fiebidicinona cuemo jica. Cuemona ono. Omoi duenillena, cuemona eo mare oro isoide rana ono. Omoi taimieñelle isoíñellena, cuemona omoi meiruiñellena, userede iniroi isoide ra cuemona ono. Omoi uisína cioille isoillena, cuemona manue ono. Omoi comeciaina ñaiticue. Cuena raise omoi ñnoia, buena omoi comeciámo fiebiñeite. ¹⁹ Cue isiruigano cue díbeímo raise illena, naimacimo ríire llocabidicue. Cue uaina naimaci ñnollena, naimacina jiaí duere finocabidicue. Ie jira cue díbeímo raise omoi i. Jeacino omoímo ia, iena faínonocai. ²⁰ Ero, nase tutícue isoidicue. Bu cuena cacajia, cue fo billena cuena uaidoia, nasena bu econoia, fo jaiticue. Naimiena nabaillanona, naimie díga guitícue. Omoi comeciaina ñaiticue. Cue rafuena omoi cacaja mei, iena omoi ñnoia, cuena feiñoitomoi. Iemona conini nabaiticai. ²¹ Eníruemo cue Moo jitailla rafuena jaie cue fuidua mei, naimie ecímo abído jai itícue. Cueri naimie iobillamona, illaímana cue illamona, naimie ecímo jai itícue. Ie isoide. Cuena raise ñnotino monamo cue ecímo itataitícue. Cue comínina naimaci illa jira, naimacina iobitallena, cue ecímo naimacina nabaiticue. ²² Jusiñamui Joreñomona cue lloga rafue ite, omoi creyentiaí iena. Bie rafuena bu cacajia, iena jiaí ñnua” cueno.

4

Juan Jusiñamui illanomo cíua rafue

¹ Dallu illanona monamo cue eruaía, jiaíe rafuena cíodicue. Nainomo Jusiñamui illanomo econoga nasena cíodicue. Ailli cue díga ñaitimíedi cuena uaidote. Naimie uai trompeta isoí ficiredede. Llote:

—Monamo bi. Jiaíruído suille rafuena omo acataitícue.

² Jusiñamui Joreño anamo cue illamona, nicaírilla isoí Jusiñamui illanona cíodicue. Nainomo naimie ana raíllana cíodicue. ³ Naimie eo queniredede. Eo raífide ebiredede nofícina eruaíde. Jaspe raílla nofícina eruaíde. Jaspe enefebecodo cíode. Cornalina raílla nofícina eruaíde. Cornalina jiaírede. Naie illano ecímo ameona cíodicue. Ameo mocorena jira, esmeralde raílla nofícina eruaíde. ⁴ Naie illano ecímo veinticuatro raírabíci jiaí ite. Nainomo userede iniroína jítajanona veinticuatro einamací ana raídímaci. Naimaci ífogímo oromona finoca nuicirai ite. ⁵ Jusiñamui illanomona boricabide. Jiaí gurucabide. Bue isoí eo ficiredede. Naie illano uicomo siete reítirai boode. Naie reítiraídí Jusiñamui Joreño mamecído nainomo boode. ⁶ Jusiñamui illano uicomo vidriona eruaíde joraina cíodicue. Eo queniredede. Naimie illano

ecimo cuatro cajedino ite. Diga uisi naimaci uiecomo ite. Diga uisi naimaci emodomo ite. ⁷ Damie leónna eruaide. Jiaimie jurareta jirona eruaide. Jiaimie ie uieco come uiecona eruaide. Jiaimie feede majaiñona eruaide. ⁸ Nagamiimo seis iaico ite. Ailluena uisi naimaci iaicuaimo ite. Naimaci abimo uisi jiai eo ite. Nagarui iniñeno jaca llotimaci:

Mare, mare, mare.

Cai siño Nama Jusiñamuidi eo mareuidimie.

Jaie jaca ite. Birui ite. Ico jaca iite.

⁹ Naimaci iese llua jira, Jusiñamuina iobitadimaci. Naimiemo iobillacinona naimaci iese fecaia, ¹⁰ naie veinticuatro einamaci Jusiñamui uicomo ana bitadajanona, naimiemo iobillacinona jiai fecadimaci. Naimieri iobillanona, naimaci nuiciraina naimie dine faianona, ¹¹ rotimaci:

Cai Nama Jusiñamui, ona eo iobitaiacadica.

Odi mareuidio.

Nana rana comuitatio.

Nana cominina comuitatio.

O jitailla jira, naimaci itimaci.

Ie jira iobillacinona omo fecacabidica.

5

Juan Jusiñamui illanomo ferinoga rabe illana ciode

¹ Jusiñamui illanomo cue nia eruaia, naimie nabellimo ferinoga rabe illana ciodicue. Nagafebeimo cuega rafue jai ite. Siete nitaca ra illamona, naie rabe raise ibaibide. ² Jusiñamui ie nanoca jaienicí ado llua cacadicue. Naimie jicanote:

—¿Bumo ite uaidi nitaca rabe econollena, naie rabena facallena?

³ Monamo itinomona, enirue itinomona, jai fioidaitinomona, bumio ie uai iñede, naie rabe oni econollena. Naie rabe facanidimaci. ⁴ Jaca bumio naie uai iñena jira, eo eedicue. ⁵ Naie facaise naie veinticuatro einamacimona damie cuemo llote:

—Mai eeñeno. Judá nairai ie Leónna mameciredimiedi iena econorede. Naimiedi David micori comini imie. Ie dibeimo iñedinona jai emodofilla jira, naimiemo uai ite, naie siete nitaca rana oni suiñollena, naie rabena econollena.

⁶ Naie facaiseconi Toica Llaudana ciodicue. Jusiñamui illano uicomo naimie ite. Naie cuatro cajedino naimie ecimo ite. Naie veinticuatro einamaci naimie ecimo jiai itimaci. Faga llaudana eruaide; iadedi jai jilluamona naidaide. Naie Toica Llaudadi Cristo. Naie Llaudamo siete sigai ite. Siete uisi naimiemo jiai ite. Naie uisidi Jusiñamui Joreño mamecido ite. Nana cominina canollena, naimacimo Cristodi Jusiñamui Joreña jai orede. ⁷ Naie facaise Jusiñamui ie nabellimona naie rabena ote. ⁸ Iena naimie ua mei, naie cuatro cajedino, naie veinticuatro einamaci diga, naimiena sedallena, naimie uicomo ana bitadatimaci. Nagamiemo guitarrana eruaide arpa ite. Nagamiemo oromona finoca copa ite. Naga copamo caimare soride ra boode. Naie radi Jusiñamuimo comini jiacino mamecido ite. ⁹ Llaudana sedallena, naimaci arpas taillanona, comue ruana rotimaci:

O marena jira, o uai ite, naie rabe econollena.

Ie nitaca rana oni suiñoitio.

Jiaino jaie ona meinetimaci.

O fiodailla jira, o diaillamona, Jusiñamui dibeimo naga nairaimona cominina itatatio.

Naimaci jeacinomona jillotatio.

¹⁰ Naimacina jai fetodio.

O comini naimaci illamona, Jusiñamui diga atona ñaicabitimaci.
Naimie anamo jiairuido eniruemo ite cominina sedaitimaci.
Ie jira naie rabena oni suiñoreño.

¹¹ Iemei dane eruaillamona, naimie ecimo eo ailluena Jusiñamui jaienisaia ciodicue. Naie cuatro cajedino ecimo, naie veinticuatro einamací ecimo itimaci. Diga illa jira, facanide. ¹² Ado llotimaci:

Bie Toica Llauda isoidimie jaie fiodaite; ia jai jillode.

Naimie eo mareuidimiena jira, Jusiñamui ie uai naimiemo jai illamona,
Jusiñamui nana naimiemo jai illamona, Jusiñamui naimiena eo abina
uiñotajamona, naimiena jiai iobitaiacadicaí.

Naimiena cai ñnuanona, naimiemo iobillacinona fecaacadicaí.

¹³ Iie facaise nana comini, nana Jusiñamui comuitaga ra diga, llua ca-
cadicue. Monamo itino, enirue itino, jai fiodaitino, monaillaimo itino llua
cadicue. Llotimaci:

Jusiñamuina jaca cai iobicabillasa. Toica Llauda isoidimiena jaca cai iobica-
billasa. Iobillacinona jaca fecaacadicaí. Caina jaca sedallesa.

¹⁴ Naie cuatro cajedino raitimaci:

—Ie isoi jiai lloiacadicaí.

Ie facaise naie Llauda isoidimiena sedallena, naie veinticuatro einamací
ana bitadatimaci.

6

Juan siete nitaca ra oni suiñuana ciodicue

¹ Toica Llauda isoidimie iobillacinona naimaci fecaja mei, Llauda
isoidimie daje nitaca ra oni suiñuana ciodicue. Naie cuatro cajedinomona
damiedi gurua uai isoi llua cacadicue. Naimie llote:

—Mai bi.

² Naimie llua mei, userede caballo billana ciodicue. Caballo emodo
itimie sicuirá ite. Illaimana jira, naimie ifogimo nuicirai jide. Ie bacauai
anafellitallena, oni jaide.

³ Iemei Llauda isoidimie jaie nitaca ra oni suiñode. Suiñua mei, naie cuatro
cajedinomona jaimie llote:

—Mai bi.

⁴ Naimie llua mei, jiairede caballo billana ciodicue. Caballo emodo
itimie are lloebi illamona, Jusiñamui jitaila jira, caballo emodo itimie
eniruemo itinona uri itatañede. Naimaci uri iñena jira, conini icirilla jira,
conini meinetimaci.

⁵ Iemei Llauda isoidimie jaie nitaca ra oni suiñode. Suiñua mei, naie cuatro
cajedinomona jaimie llote:

—Mai bi.

Naimie llua mei, jitirede caballo billana ciodicue. Aime guille facaise illa
jira, caballo emodo itimie onollimo ra facaradi ite. ⁶ Naie cuatro cajedino
motomona damie llote:

—Guille raise iñena jira, comini aime guitimaci. Daje kilo trigo ie core darui
majia ua ucube diese raifide. Iemona llomenicono finoia, dacaiño guille raifi
ite. Tres kilos cebada ie core darui majia ua ucube diese raifide. Iena damie
oia, iemona llomenicono finoia, dacaiño amani guille raifi ite. Illimo riará
nia ite; ia iena iballena ucube baiñede. Ie muidona aime guitimaci —llote.

⁷ Iemei Llauda isoidimie jaie nitaca ra oni suiñode. Suiñua mei, naie cuatro
cajedinomona jaimie llote:

—Mai bi.

⁸ Naimie llua mei, lliaí usereide caballona ciodicue. Ie emodo itimie
mamecidi Fiodaitadimie. Jusiñamui uai naimiemo illa jira, naimie jailla mei,

ailluena fiodaitino itimaci. Jobairillemona, aime guillemona, duicomona, rñirede ocainaiamona fiodaitimaci. Atuedo meinetasiñeite; iadedi eo ailluena meinetasiite. Riai uaimona ie cuarta facaina comini fiodaitimaci.

⁹ Iemei Llauda isoidimie jiaie nitaca ra oni suiñode. Suiñua mei, Jusiñamuimo caimare soride boode rana jobaisoillanona ciodicue. Naie illano anamo comini joreñuaina ciodicue. Jusiñamui rafuena naimaci llua jira, “Jusiñamui cominidicai” naimaci llua jira, Jusiñamuina inoñedino naimacina meinetimaci. Jai fiodaillamona naimaci joreñuai Jusiñamui illanomo jai itimaci. ¹⁰ Jusiñamuimo ado llotimaci:

—Cai Nama, siño jitodio. Mareuidimiedio. O uaina jaca finodio. ¿Niruido caina meinetinona duere finoitio? ¿Niruido ibana oitio?

¹¹ Jusiñamui cominina illamona, naimacimo Jusiñamuidi userede areroina jitallena fecade. Llote:

—Janore jisa seda. Ibana nia oñeiticue. Cue dibeimo omo maijia isoi, cue cominina nia meineitimaci. Naimacina meinia mei, ibana oiticue.

¹² Iemei Llauda isoidimie jiaie nitaca ra oni suiñuana ciodicue. Suiñuana, aillue ñuisaño suide. Jitoma eo jitireficaide. Fivuidi diruena eruaide. Jiairede. ¹³ Rñirede aifi riarana ana llutaja isoi, monamona eniruemo ucuai llude. ¹⁴ Ferinoga rabe oni uilla isoi, mona iñebicaide. Naga anedu, naga uiasi diga jiai oni jaide. ¹⁵ Ie jira illaicomini, jamai bue isoiñedino, ucuberedino, patrón anamo itino, patrón anamo iñedino, ua nana comini jaciruillamona reiritimaci. Damierie nofici moto ifomo reiritimaci. Damierie anedu motomo reiritimaci. ¹⁶ Anedumo llotimaci. Noficimo llotimaci:

—Caina ibaillena, cai emodomo ana uai. Jusiñamui rñicaillafuemona caina reirita. Llauda isoidimie rñicaillafuemona caina reirita. ¹⁷ Iaimaiai rñicaillarui jai ite. Naiemona buna jillobinide —llotimaci.

7

Juan ailluena Israel comini Jusiñamui sello diga nitajana ciodicue

¹⁻² Naie facaise jiaie ico sülle rafuena ciodicue. Cuatro Jusiñamui jaienicina ciodicue. Damie jitoma billanomo ite. Jiaimie jitoma jaillanomo ite. Jiaie iaimaiai beicimo itiaimaiai. Aifi biñellena itimaci. Ie muidona monaillai dine aifi iñede. Aifi iñena jira, amenaiai nirariñede. Eniruena monaillai diga marañeno finollena naimacimo uai ite. Naie facaise jiaie jaienici jitoma billanomona billana ciodicue. Naimiedi cai cajede Jusiñamui ie sellona uite. Jiaie jaienisaimo ado llote:

³ —Eniruena aifi diga marañeno nia finoñeno. Monaillaina marañeno nia finoñeno. Amenaiaina marañeno nia finoñeno. Jusiñamui dibeimo itino uiecuai itofiai sello diga nia cai nitañenia, eniruena marañeno finoñeno.

⁴ Ailluena comini sello diga nitade. Ciento cuarenta y cuatro mil diese nitajana cacadicue. Nana naimaci Israel cominimona itimaci. ⁵ Judá micori cominimona doce mil ite. Rubén micori cominimona doce mil ite. Gad micori cominimona doce mil ite. ⁶ Aser micori cominimona doce mil ite. Neftalí micori cominimona doce mil ite. Manasés micori cominimona doce mil ite. ⁷ Simeón micori cominimona doce mil ite. Leví micori cominimona doce mil ite. Isacar micori cominimona doce mil ite. ⁸ Zabulón micori cominimona doce mil ite. José micori cominimona doce mil ite. Benjamín micori cominimona doce mil ite. Diese nitade.

Juan ailluena comini userede iniroina jítajana ciodicue

⁹ Naie facaise ailluena cominina ciodicue. Ailluena jira, naimacina facadonidicue. Naga nairaiamona itimaci. Naga jiaie ñaia uaido ñaitino itimaci. Jusiñamui uicomo itimaci. Toica Llauda isoidimie uicomo itimaci. Userede iniroina jítadimaci. Naimaci onollimo raforuai ite. ¹⁰ Ado llotimaci:

Bie Llauda isoidimie jaie fiodaillamona, cai jeacinomona Jusiñamui caina jai jillotate.

¹¹ Naie facaise nana Jusiñamui jaienisaí naimie ecimo naidailana ciodicue. Naie veinticuatro einamací ecimo, naie cuatro cajedino ecimo jiai naidaidimaci. Naie facaise Jusiñamui uicomo ana bitadajanona, naimiena sedadimaci. ¹² Raitimaci:

Bie comini isoi omo iobillacinona jiai fecaacadicaí.

Odi mareuidimiedio. Abina eo uinotio. Odi jaca siño jitodio.

Ie jira iese lloticaí.

Ona jaca cai iobitajasa.

¹³ Naie facaise naie veinticuatro einamacimona damie cuemo jicanote:

—¿Userede iniroina jitadinodi nimaci? ¿Ninena bitimaci?

¹⁴ Uai oticue:

—Uinonedicue. Cuemo llono.

Naimie uai ote:

—Bimacidi eo duere sefuilla facaise Jusiñamuina inonedino meinogano.

Naimaci iniroina jai jocoritimaci. Llauda isoidimie jaie fiodailla jira, naimie diruedo jocuamona, naimaci iniroi jai userede. Naimaci iniroina lloticue; ia naimaci comeciaina jiai ñaiticue. Llauda isoidimie fiodailla jira, naimaci comeciái jai jeanide. ¹⁵ Ie jira Jusiñamui uicomo itimaci. Nainomo naimiena jaca sedaitimaci. Naimiena jaca iobitaitimaci. Naimie ocuilla rafue jaca finoitimaci. Naimacina naimie raise nabaillamona, naimacina raise eenoite.

¹⁶ Dane duere sefuiñeitimaci. Nana naimaci jitailla ra naimacimo iite. Aime dane guiñeitimaci. Naimaci jiroacalle ra jaca iite. Eo ecasillamona dane duere sefuiñeitimaci. Iemona dane usitañeitimaci. ¹⁷ Jusiñamui illanomona Llauda isoidimie naimacina raise sedaja jira, raise marena iitimaci. Naimacina naimie raise sedajamona, jaca iitimaci. Jusiñamui naimacina raise duenaillamona, duere sefuillamona dane eeñeitimaci. Dane sunañeitimaci.

8

Juan Llauda isoidimie iraié nitaca ra oni suiñuana ciode

¹ Toica Llauda isoidimie iraié nitaca ra oni suiñuana, media hora monamo tii raiñoicaide. ² Iemei siete Jusiñamui jaienici naimie uicomo illana ciodicue. Nagamiemo daje trompetana fecade. ³ Naie facaise jiaie jaienici billanona, Jusiñamuimo caimare soride ra jobaisoillano ecimo naidaide. Naie jobaisoillanodi oromona finoca. Ie onollimo oromona finoca cucharón eruaide ra ite. Ailluena caimare soride ra naimie feiñua mei, iena jobaide. Ie facaise nana Jusiñamuina inotino jiacino Jusiñamuimo jaide. ⁴ Jobaillamona Jusiñamui uicomo a jaide. Nana Jusiñamuimo jiacino diga a jaide. ⁵ Naie facaise Jusiñamuimo jobaisoillanomona boode reici jaienici uanona, cucharóna eruaide ramo iena jonianona, enruemo iena ana dotade. Ie jira gurucabide. Bue isoi eo ficirede. Naganomo boricabide. Ñuisaño suide.

Juan trompetas fillana cacade

⁶ Iemei naie siete jaienici naimaci trompetas fillena llinote. ⁷ Damie ie trompetana fite. Filla jira, monamona janorede hiel, boode ra diga, dirue diga, enruemo uaide. Atuedo enrue boonede; ia ailluena boode. Riai uaimona ie tercera facaina boode. Nainomo nana amenaiaí boode. Nainomo nana raiticño boode.

⁸ Jiaie jaienici ie trompeta fite. Filla jira, Jusiñamui anedu isoide boode ra monaillaimo faite. ⁹ Iemona monaillai diruena jaide. Atuedo iese jaiñede; ia ailluena iese jaide. Riai uaimona ie tercera facaina diruena jaide. Ie muidona

ie tercera facaina lliciaí fiodaite. Nainomo ite botemona ie tercera facaina jiaí anabaite.

¹⁰ Jiaíe jaienici íe trompetana fite. Filla jira, monamona aillue boode ucudu eniruemo uaide. Iemona ie tercera facaina illeníaí, ie tercera facaina jorainíaí díga eríficaide. ¹¹ Ie muidona naie ucudu Ajenjona mameciredé. Ríaí uai oní dobaiñuamona “Eríredimíe”. Iemona jinuí eríficaide. Iena jiruamona, ailluena comíní fiodaitimaci.

¹² Jiaíe jaienici íe trompetana fite. Filla jira, jitoma, fívuí díga, ucuai díga, fuiride. Iemona aremona cuatro horas raise usenide. Naíona cuatro horas eo jitírede.

¹³ Iemei jaienici ado cuirioillana cacadicue. Monamo feianona llote:

—Eniruemo itíno ua eo duere ja sefuitimaci. Daje amani jaienici imaci trompetana nia fiñede. Iena naimaci fia, comíní eo duere sefuitimaci.

9

¹ Jiaíe jaienici íe trompeta fite. Filla jira, naie facaise monamona eniruemo damíe ucudu mamecído jai uaillana cidicue. Naimíemo Jusiñamuí daje llavena fecade. Enirue eo ana ite ifo nase íe. Nainomo Taife comíní, Janaba comíní díga itimaci. ² Llave díga naie ifo íe nasena econote. Ie facaise ifomona eo ailluena uillíe jino bite. Ie muidona jitoma raise bainide. Mona jitíreficaide. ³ Uilliemona fioduaina eruailanona, Taife comíní, Janaba comíní díga jino billanona, nana eniruemo bitimaci. Jusiñamuí llua jira, acaido isoi fioduai eruaidínodí maitimaci. ⁴ Raiticíño naimaci guillena, ibena naimaci guillena Jusiñamuí rairuide. Naimíe jitailla jira, naimíe sello díga nitañeganona duere finodímaci. ⁵ Jusiñamuí jitailla jira, cinco fívuí naimacina duere finoítimaci; ía comínina meineñeítimaci. Acaido isoi isire maitimaci. Eo isirenite. ⁶ Iese íco suia, eo duere comíní sefuilla jira, fiodaillana jitaitimaci. Naimaci abína meineacanitimaci. Fiodaiacanitimaci; ía fiodainítimaci.

⁷ Fioduaidí jobaíme díne jaide caballuaina eruaidímaci. Naimaci ífogímo oromona fínoca nuicirai eruáide radí ite. Naimaci uiecuai comínina eruaidímaci. ⁸ Naimaci ífotíe arena illanona, ríño ífotíena eruáide. Naimaci isiduai leones isiduaina eruáide. ⁹ Naimaci abíaímo íco isoi ra íte. Lloeomona fínoca rana eruáide. Naimaci feiamona, ailluena caballuaina jobairillanomo jaillena ríire sonode carretas isoi fíredímaci. ¹⁰ Naimaci omacai acaido isoide. Naie díga maillanona, cinco fívuí comínina duere finoítimaci. ¹¹ Naimaci illaímadí naie ana ifona sedadímíe. Judíuai uaimona naimíe mamecídí Abadón. Griego uaimona naimíe mamecídí Apolión. Oní dobaiñuamona naimíe mamecídí Comínina Fuidodímíe. ¹² Daje duere sefuilla rafue jai fuite. Mena nia suiñede.

¹³⁻¹⁴ Naie facaise jiaíe jaienici íe trompeta fite. Jusiñamuí uícomo íte caímare soride ra jobaisoillano íte. Oromona fínoca. Nainomo cuatro sigai íte. Nainomona jaienícímo damíe llote:

—Eufrates railla ílle fuedo cuatro maíga jaienícína suiño —llote. ¹⁵⁻¹⁶ Iena fínode. Naimaci anamo eo ailluena soldaduai íte. Doscientos millones soldaduai íllana fídídíe. Bie facaise, bie hora, biruí, bie fívuí, bie año, Jusiñamuí jitailla facaise ailluena comínina meinetimaci. Atuedo meineñedímaci. Ríaí uaimona íe tercera facaina meinetimaci. ¹⁷ Soldaduai caballos emodo ítimaci. Soldaduai jogobemo ra íte. Daje facaise eo jiaírede. Daje facaise mocrede. Daje facaise borarede. Caballos ífogíai leones ífogíaina eruáide. Naimaci fuemona boode radí, uillíe díga, azufre boa isoi jino bite. ¹⁸⁻¹⁹ Naimaci fuemona bite rado ailluena comínina meinetimaci. Ie tercera facaina meinetimaci. Caballos omacai jaiona

eruidimaci. Naimaci omacaimo jaiona eruaide ifogi itimaci. Ailluena cominina jiai duere finodimaci.

²⁰ Iese ie tercera facaina meinetimaci; ia fiebidino naimaci jeacinomona naimaci comeciai iuaina jaca meidoñedimaci. Taifena nia sedaacadimaci. Janabana nia sedaacadimaci. Oromona, platamona, broncemona, noficimona, amenamona finoca jiraraiaina nia sedaacadimaci. Naie isoide radi cajeñena jira, jaca cioñede. Naie isoide radi jamai rana jira, jiai jaca buena cacaiñede. Jaca macariñede. Cajeñede; ia iena sedacabidimaci. ²¹ Conini meinecabitimaci. Aimaniai dine jaicabidimaci. Naimaci aiñede riño, naimaci iniñede ima diga icabitimaci. Rana ficabidimaci. Jeacina finocana nia jaidimaci.

10

Juan Jusiñamui jaienici, econoga rabenico diga, billana ciodo

¹ Ie facaise Jusiñamui illanomona eniruemo jiaie jaienici billana ciodicue. Naimiemo Jusiñamui uai eo ite. Uillie motomo naimie ite. Naimie ifogi afemo ameo ite. Naimie uieco jitoma isoi quenirede. Naimie idai eo boode amena isoi eruaide. ² Naimie onollimo econoga rabenico ite. Eniruemo naimie ria, naimie nabei eilli monailai emodomo naidaide. Ie jarifebei eilli eniruemo naidaide. ³ León eo irilla isoi, ado llote. Naie facaise siete gurua ñaia isoidino uai cacadicue. ⁴ Naimaci llwana cacaja mei, iena cueiacadicue; iadedi monamona damie cuemo llote:

—Naie llwana lloñeno. Iena cueñeno.

⁵ Naie jaienici ie nabei onolli mona dine ñuitajanona, ⁶ Jusiñamuimo llote:

—Jaca itio. Monana nainomo ite ra diga finodio. Eniruena nainomo ite ra diga jiai finodio. Monailai nainomo ite ra diga jiai finodio. Cue baifemo o faia jira, uanaicinona cue llwana uiñotio. O lloga uaina jaca suite. ⁷ Iraie jaienici ie trompeta ja fiite. Filla mei, bie facaise Jusiñamui ie facaina lloraini micoriaimo jaie lloga rafue suite. Comini naie rafue jaie raise cacaiñedimaci; ia iena ja raise cacaitimaci —llote.

⁸ Monamona cuemo ailli llotimie dane llote:

—Jaienici onollimo econoga ite rabeniconalinuai.

⁹ Ie jira jaienici dine cue jaillanona:

—Iena cuemo ine —lloticue.

Uai ote:

—Iena ono. Iena mai guiño. Cifo isoi o fuemo iena cacaitio; iadedi o jebemo erirede ra isoi iena cacaitio.

¹⁰ Llinua mei, iena guiticue. Cifo isoi naimerede rana cacadicue; ia guilla mei, erirede ra isoi cue jebemo ite. ¹¹ Cuemo dane llote:

—Omo cue llole rafuena lloitio. Ailluena cominimo ico suille rafuena lloitio. Illaicominimo ico suille rafuena lloitio.

11

Juan menamie Jusiñamui rafuena llwana cacade

¹ Cuemo Jusiñamui radosina fecade. Jerusalémo ie jofona facallena, cuemo fecade. Llote:

—Mai jai. Cue jofomo niga metros ite facajai. Atona ruica jiai faca. Nainomo cuemo jobaisoillanona jiai faca. Niga comini naie jofomo ite jiai faca. ² Cue jofo ecimo ite taibirina facañeno. Naie illano judíuaiñedinomo jainaiade. Cue jitailla jira, Jerusaléna naimaci emodofillamona, daje amani años abimo atomonado iena duere finoitimaci. ³ Naie facaise menamiemo

cue uaina iiticue. Iaimaia cue lolle rafuena daje amani años abimo atomonado lloitiaiamaia. Comini comeci iuai meiduana iaimaia jitailla jira, sunaillamona, ebinide iniroina jitaitiaiamaia —llote.

⁴ Iaimaia mena olivos railla riar mamecido itiaiaia. Enirue Namana Jusiñamui illanona, naimie uicomo mena ite lamparin ie rairaco mamecido itiaiaia. ⁵ Iaimaia duere bu finoacania, naimiena meineitiaiaia. Iaimaia fuemona boode ra billanona, naimiena meinetiaiaia. Iaimaia duere finodino iese fiodaitimaci. ⁶ Iaimaia Jusiñamui rafue lolle facaiseconi noci deitañellena, iaimaiaimo Jusiñamui uai iite. Jinui diruena jaitallena iaimaiaimo uai iite. Iaimaia jitaicabilla facaise, diga isoide rafue finuamona cominina duere finoitiaiaia; ⁷ iadedi Jusiñamui rafue iaimaia illua mei, eo ana ite ifomona ocainana eruailanona, Taife jino biite. Jino billanona, iaimaia diga fuirite. Iaimaia anafefitaja mei, iaimaia meineite. ⁸ Raiafomo joneñeitimaci; iadedi iaimaia abi Jerusalén naisomo jamai fiebite. Jerusalén comini jearede rafue finua jira, Jusiñamui rafuena naimaci jitañena jira, Sodoma jaie ite nairai isoidimaci. Egipto jaie ite nairai jia isoidimaci. Jerusalémo Jesúna jaie jia meinetimaci. ⁹ Raiafomo iaimaia joniana rairuitimaci. Darui amani abi atomonado ailluena comini, naga nairaiaimona iaimaia jibuisaibitimaci. ¹⁰ Nana eniruemo ite comini iaimaia fodaillari iobitimaci. Iaimaiaimona comini duere sefuilla jira, iaimaia jai fodailla jira, iobitimaci. Rafuena finuanona, dani coninina rana fecaitimaci. ¹¹ Darui amani abi atomonado illanona, fodaillamona iaimaia Jusiñamui dane jillotaite. Ie muidona naidaitiaiaia. Nana iaimaia ciodino eo jacinaitimaci. ¹² Naie facaise monamona damie iaimaia uaiduana cacadiaiaia. Llote:

—Bene mai bi.

Iecon iaimaia enoidimacidi uillie motomo monamo iaimaia jaillana ciodimaci. ¹³ Naie facaise aillue ñuisaño suide. Ie jira janore facai Jerusalén goide. Ria uaimona ie décima facai goide. Naiemona siete mil comini fiodaitimaci. Fiodañedino jacinaillamona:

—Jusiñamuidi ua siño jito —lloitimaci. ¹⁴ Mena duere sefuilla facaise jai fuite. Nia daje suiñede; ia raire suite.

Juan irai trompeta fillana cacade

¹⁵ Naie facaise jiaie jaenicie ie trompetana fite. Monamo itino ado llotimaci: Jusiñamui, Cristo diga, illaia isoi, eniruemo ite cominina biruimona jaca sedaite.

Naie comini naimie anamo raise iitimaci.

¹⁶ Naie veinticuatro einamac Jusiñamui ecimo illanona, naimie uicomo ana bitadajanona naimiena sedadimaci. ¹⁷ Llotimaci:

Jusiñamui, cai Nama, omo iobillacinona fecaacacai.

Siño jitodio. O jitailla rafuena jaca finodio.

O uaido bie cominina jai sedadio.

¹⁸ Ona naimaci inoñenamona, o diga iciritimaci; iadedi naimacina emodofidio. Bie facaise jai fiodaitino jillotajamona, ona naimaci inoñena jira, naimacimona ja ibana oitio.

Jearede rafuena naimaci finua jira, naie facaise ona inoñedinona duere finoitio.

O dibeimo maijidino, o facaina lloraini, nana ona inotino omona ibana feiñoitimaci.

Nibai jamai bue isoidimaci.

Nibai jamai bue isoñedimaci; iadedi omona ibana feiñoitimaci.

¹⁹ Naie facaise monamo ite Jusiñamui sedajano nase econuana ciodicue. Naie fo ite cajóna ciodicue. Ieconí boricabide. Bue isoi eo ficirede. Gurucabide. Ñuisaño suide. Monamona noci deilla isoi, ailluena hielu ana llude.

12

Juan daje riñona, eo aillue jaio diga, ciode

¹ Naie facaise monamo daje riñona ciodicue. Naiñaiñona cue ciuamona, Jusiñamuidi eniruemo itinomo ico suille rafuena cue uinuana jitaide. Naiñaiño iniroidi jitoma isoi bairede. Naiñaiño eilli anamo fivui ite. Naiñaiño ifogimo nuicirai isoi doce ucuduai ite. ² Jai uruesite. Jocoacana jira, como isirede. ³ Ie facaise monamo jiaimiena ciodicue. Naimiedi Taife. Naimie illamona jiaie rafue suillena uñotucue. Naimiedi eo aillue jaiona eruaide. Jiairede. Siete ifogi naimiemo ite. Diez sigai naimiemo ite. Naga ifogimo nuicirai ite. Riái uaimona naimiedi dragón. ⁴ Naimie omacai diga ailluena ucuaina eniruemo ana butade. Riái uaimona ie tercera facaina butade. Ie uruena gutallena, riño uicomo naidaita naiñaiño jocollena sedade. ⁵ Naiñaiño iimana jocode; ia jaio naimiena gutañede. Nana nairaiái naimie anamo ico illanona, naimacina ie jitaillacinona finotajamona, naimacina eo riire sedaite. Naimacina naimie nia sedañenia, monamo Jusiñamui ie illanomo naimiena uite. Ie ecimo Jusiñamui naimiena itatate. ⁶ Iemei naie riño jofue iñenanomo raire jaide. Nainomo Jusiñamuidi ie illinona jai finode, naiñaiño ie. Daje amani años abimo atomonado naiñaiñona sedaite.

⁷ Naie facaise monamo Jusiñamui jaienisaídi jaiona eruaidimie diga fuiridimaci. Jaiona eruaidimie jaienisaí diga jiaí fuiridimaci. Jusiñamui jaienisaí illaíma mamecidi Miguel. ⁸ Naimaci dinena emodofidimaci. Jaio ie jaienisaí anafefilla jira, Jusiñamui illanomo naimaci illano jai iñede. ⁹ Eniruemo jaiona eruaidimie ie jaienisaí diga dotadimaci. Naie jaiodi Taife. Satanás. Jaiona Taife jaie jaillanona, eo ailluena cominina jai jifuate. ¹⁰ Monamo damie ado lluana jai cacadicue:

—Jusiñamui lloga uai jai suide. Ie cominina raise jillotate. Naimie uai eo siño. Ie uai Cristomo illanona, Cristodi cominina raise sedaite. Eniruemo Taifena jai dotaja jira, Jusiñamuina bu raise iñoñenia, jeacinona bu finoia, Jusiñamui uicomo birui naimie finocabilla isoi, Taife caina llogidoñeite. ¹¹ Toica Llauda isoidimie naimaciri fiodailla jira, naimie rafuena naimaci lluamona, Taifena emodofidimaci. Fiodaitimacina, naie rafuena llocana jaiacadimaci. ¹² Ie muidona iobi. Monamo omoi illanona, iobi; iadedi eniruemo bu ia, monaillaimo bu ia, eo duere sefuite. Eniruemo Taife jai illa jira, naimiemonu duere sefuitimaci. Naimie eo icirite. Nainomo naimie are iñellena uñote. Naimie icirillamona eniruemo itino eo duere sefuitimaci — lloite.

¹³ Eniruemo jaiona eruaidimie dotajamona, naiñaiñona duere finollena, naimiedi iimana jai jococa riñona racade. ¹⁴ Naimiemonu jilloillena, Jusiñamui mena iaico, majaiño iaico isoi, naiñaiñoite. Feianona, jofue iñenanomo daje amani años abimo atomonado illena nainomo jaide. Naiñaiñona Jusiñamui eenollena, nainomo jaide. ¹⁵ Ie facaise jaiona eruaidimie fuemona eo ailluena jinui bite. Ille isoi tote, naiñaiñona corobaitallena; ¹⁶ ia enirue bojuamona, nana jinui nainomo ana jaide. Enirue naiñaiñona canua jira, naiñaiño corobaiñede. ¹⁷⁻¹⁸ Naie facaise jaiona eruaidimie riño diga icirillamona, naiñaiño comini diga jobairiacade. Nana Jusiñamui llogacino iñotino diga, nana “Jesúmo duidicai” raitino diga, jobairiacade.

13

Juan mena riirede ocainana ciode

¹ Naie facaise monaillai fuemo cue naidaillanona, daje riirede ocaina monaillaimona billana ciodicue. Naimiemo diez sigai ite. Naga sigaimo nuicirai raide. Naimiemo siete ifogiai ite. Ie ifogiamo Jusiñamuina jeare ñaia mameci ite. ² Naie ocaina abi janallarina eruaide. Ie eilli oso eillina eruaide. Ie fue león fuena eruaide. Eniruemo itinona sedallena, naimiemo aillue jaiona eruaidimiedi ie siño uaina fecade. ³ Naimiemo ite ifogimona daje jai bofede. Fiodaitena eruaide; ia naiemona jai jillode. Naimieri rajicaillamona, nana eniruemo ite comini naimie dibeimo jaidimaci. ⁴ Ocainamo ie uaina aillue jaiona eruaidimie fecaja jira, jaiona sedajanona, iobillacinona naimiemo fecadimaci. Ocainana jiai sedajanona, iobillacinona fecadimaci. Raitimaci:

—Naimie siño jito. Naimiena buna emodofinide.

⁵ Naimiemo Taife uai illa jira, abina uradoillamona, Jusiñamuina eo jeare ñaite. Taife jitailla jira, cuarenta y dos fivui iese nana cominina sedade. ⁶ Jusiñamuina eo jeare ñaicabite. Naimie illanona eo jeare ñaicabite. Nana Jusiñamui ecimo itinona eo jeare ñaicabite. ⁷ Taife uai naimiemo illa jira, Cristona eniruemo ite inotino diga jobairite. Naimacina emodofide. Iemona nana comini naga nairaiaimona naimie anamo itimaci. ⁸ Nana Jusiñamui rabenicomu cueñega mameciai diese ocainana sedaitimaci. Jusiñamuidi naimaci mameciaina naimiemo ite rabenicomu eniruena nia finoñena facaise jaca cueñede; ia Toica Llauda isoidimie fiodailla jira, Jusiñamui naimiena inotino mameciaina naie rabenicomu jai cuete. Naimie illanomo jaca illena, naimaci mameciaina cuete.

⁹ Omoi jeforena jira, raise fueollena, bie rafuemo cacarei. ¹⁰ Duere sefuillena, naie facaise cárcelmo Cristona inotinona joneitimaci. Naimacina meinia mei, naimacina meinetino Jusiñamuiemona daje isoi ibana feiñoitimaci. Ie muidona Cristona inotino comeci ocuiñocaida inocana jailla.

¹¹ Naie facaise jiaie riirede ocaina eniruemona billana ciodicue. Toica Llauda isoi naimiemo mena sigai ite. Aillue jaio isoi ñaite. ¹² Monaillaimona bite ocaina uai eniruemona bite ocainamo jiai ite. Ie uai diga, nana cominina monaillaimona bite ocainana sedatate. ¹³ Eo siño rafuena finocabite. Comini cioillena, monamona eniruemo boode ra ana bitatate. ¹⁴ Siño rafuena finuamona, Taife jitailla jira, eniruemo itinona jifuate. Iena naimaci sedallena, cominina monaillaimona bite ocaina joreño finuana ocuide. Monaillaimona bite ocaina lloebi diga navui bofiamona jai jillode. ¹⁵ Joreño finua mei, eniruemona bite ocaina iena ñaitatate. Iena bu sedañenia, ocaina naimiena meiniana ocuide. ¹⁶ Nana cominimo naimie número cuetatañenia, ie uiecomo cuetatañenia, naimie mamecina cuetatañenia. Ie nabeillimo cuetatañenia, ie uiecomo cuetatañenia. Jamai bue isoidinomo cuetatañenia. Jamai bue isoinedino cuetatañenia. Ueberedino cuetatañenia. Ucubenedino cuetatañenia. Patrón anamo itinomo cuetatañenia. Patrón anamo inedino cuetatañenia. ¹⁷ Iese bum o inenia, rana ibanide. Rana fecanide. Bie mamecidi bie ocaina ie mameci. Mamecina cuetatañenia, naimie ie número cuetatañenia. ¹⁸ Iena raise cacaillena, iemo omoi comeci faca. Abina uinotimie bie número uinoite. Come mamecido iite. Bie número seiscentos sesenta y seis.

14

Juan 144,000 comini ruana cacade

¹ Naie facaise Jerusalémo Sion railla anedu muidomo Toica Llauda isoidimie naidaillana ciodicue. Naimie diga ciento cuarenta y cuatro mil comini itimaci. Naimaci uiecuai itofaimo naimie mameci, ie Moo mameci

diga, jai cueda. ² Monamona damie ñaiana cacadicue. Aillue ille surua isoi, eo ficirede. Eo gurua isoi jiai ficirede. Ailluena comini arpas tailla isoi, naimie ñaiana cacadicue. ³ Jusiñamui illanomo bie ciento cuarenta y cuatro mil comini comue ruana rotimaci. Naie cuatro cajedino nainomo ite. Naie veinticuatro einamací nainomo itimaci. Dani bie ciento cuarenta y cuatro mil comini bie comue ruana rotimaci. Jiaino iena fueonidimaci. Bie ciento cuarenta y cuatro mil comini eniruemona naimaci dibeimo inedinomona jai jillodimaci. ⁴ Bie ciento cuarenta y cuatro mil comini jearede rafuena ebiruinedimaci. Llauda isoidimie rafuena inocana jaidimaci. Llauda isoidimie fiodailla jira, eniruemo itinomona naimacidi nano jillodino Jusiñamui iena, Llauda isoidimie iena. ⁵ Cristo rafuedo jeacinona finocabiñeno raise jaidimaci.

Juan daje amani jaienici rafue lluaana cacade

⁶ Naie facaise mona motomo jaienici feiana ciodicue. Naga nairaimo, nana eniruemo itinomo mare rafuena lluaide. ⁷ Ado llote:

—Jusiñamuina inuanona naimiena seda. Naimiemo iobillacinona feca. Naimiemo inoñedinona ja duere finoite. Monana, enirue diga, monailla diga, ille diga, naimie finua jira, naimiena seda.

⁸ Jiaie jaienici billanona llote:

—Babilonia railla nairai illano eo aillue; iadedi ja ineite. Nainomo itino ja fuitimaci. Jeacinona nainomo itino eo finua jira, jiaie nairaiaina jeacinona jiai eo finotatimaci. Babiloniamo jai itino isoi, Jusiñamuimona duere sefuitimaci.

⁹ Naie facaise jiaie jaienici billanona, ado llote:

—Monaillaimona bite ocainana bu sedaia, ie joreña bu sedaia, ie uieco itofemo, ie onollimo ocaina cuetataga ra bumo ia, ¹⁰ Jusiñamui ricaillafuemona, naimacina duenaiñenamona, jaca eo duere sefuitimaci. Irai motomo jaca duere sefuitimaci. Azufre boa isoi irai boode. Jusiñamui jaienisaidi Llauda isoidimie diga, iena cioitimaci. ¹¹ Naie irai illano jaca bouamona, ie uillie jaca baireite. Nainomona naie duere sefuidino jaca jilloñeitimaci. Iese naimaci fiodañeno jaca duere sefuitimaci —llote.

¹² Bie rafue suille facaise Jusiñamui lloga uaina raise inuanona, Jesús dibeimo raise illanona, comeciai ocuñocana naimaci jaille.

¹³ Iemei monamona Jusiñamui Joreño llote:

—Biena cueno: “Biruimona Jesúsna inuamona, meineganodi caimare iitimaci. Jesús dibeimo naimaci illamona, navui duere sefuidimaci. Iemona uri iitimaci. Ieri Jusiñamuimona ibana feiñoitimaci”.

Juan Jusiñamui eniruemo itinona duere finua rafuena cacade

¹⁴ Naie facaise monamo cue eruaia, userede uilliena ciodicue. Uillie emodo Cristo raide. Imana eruaide. Naimie ifogimo oromona finoca nuicirai ite. Ie onollimo jairede lloebi ite. ¹⁵ Jusiñamuina sedajanomona jiaie jaienici billanona, Cristomo ado llote:

—O lloebi diga eniruemo ite riarana cota, iena ollena. Jai einaite —llote.

Iese llote; ia cominina duere finollena ñaite. Naimaci duere finua fa-caisena ñaite. ¹⁶ Jaienici llua isoi, ie lloebi diga Cristo cotade. Nana iena finode. Cominina duere finode. ¹⁷ Jusiñamuina sedajanomona naie facaise jiaie jaienici bite. Naimie onollimo jairede lloebi jiai ite. ¹⁸ Ieconí Jusiñamuimo jobaisoillanomona jiaie jaienici bite. Eniruemo boode ra dotaja uaidi naimiemo ite. Lloebiredimiemo ado llote:

—Jai einailla jira, naimacina o ollena, o lloebi diga illimo ite uvaiaina tino.

Iese llote; iadedi cominina duere finollena ñaite. ¹⁹⁻²⁰ Jaienici llua isoi, ie lloebi diga tinode. Uvas ua mei, Jerusalén ecimo iji ollena ifomo dotade. Naie

iji jino eo tote. Cominina ñaiticue. Jusiñamui riicaillafue anamo eo duere sefuitimaci. Eo diaitimaci. Trescientos kilómetros dirue enirue emododo toite. Caballo ifogí facaise a llerite.

15

Juan siete jaienisai cominina duere finoacana cide

¹ Naie facaise monamo jiaie rafuena ciodicue. Ieri eo raijicaidicue. Iena cue ciuamona, Jusiñamuidi eniruemo itinomo suille rafuena cue uifuanana jitaide. Siete jaienisaina ciodicue. Nagamie cominina duere finoacade. Naimaci finoacalle rafue diga, Jusiñamuidi cominina duere finuana fuite. Iemona ie riicaillifue saite.

² Aillue joraina eruaide rana jiai ciodicue. Quenirede. Uifinide. Boode ra diga tamiana eruaide. Jorai fuemo monaillaimona bite ocainana emodofidinona ciodicue. Ocaina joreño anamo jai iñedimaci. Ie cuetataga número anamo jai iñedimaci. Naimaci onollimo Jusiñamui arpas illanona, naimacina taillanona, ³ jai emodofilla jira, Moisés micorí ie ruana rotimaci. Moisés micorí Jusiñamui facaina jaie maijuide. Jeacinomona naimaci jiai jai jillua jira, Toica Llauda isoidimie ie ruana jiai rotimaci:

Eo siño ebirede rafuena finodio.

Jusiñamuina o illanona, jaca siño jitodio.

Mare rafuena jaca finocabidio. O lloga uai jaca finodio.

Naga nairai o anamo jai itimaci.

⁴ Cai Nama, nana comini ona jaciruillamona, ona ñnoitimaci.

O marena jira, omo iobillacinona fecaitimaci.

O duere finoca rafue muidona nana comini ona sedaitimaci.

⁵ Jusiñamuina sedajanomo dane eruaidicue. Ie fo iticuartomo ciodicue.

⁶ Naiemona siete jaienisai billana ciodicue. Nagamie cominina duere finoacade. Eo userede linomona finoca iniroina jitade. Oromona finoca cinturones naimaci jogobemo jitade. ⁷ Naie cuatro cajedinomona damie naga jaienicimo oromona finoca copana fecade. Copamo Jusiñamui eniruemo itinona eo duere finollicino ite isoide. Jusiñamui jaca illa jira, ie lloga uai suicana jaite. ⁸ Jusiñamui ebirede siño uai illamona, ie sedajanomo uillie eo illana ciodicue. Bie siete jaienisaimo ite rafue nia suiñena jira, Jusiñamuina sedajanomo buna fo jainide.

16

Juan eniruemo copas oni totajanona cide

¹ Ie sedajanomona Jusiñamui naie siete jaienisaimo ado llote:

—Cue riicaillafue omoi copamo illa jira, eniruemo itinona duere finollena, omoi copas oni tota.

² Daje jaienicí iena finode. Eniruemo ite cominina duere finode. Mon-
aillaimona bite ocaina cuetataganona jiai duere finode. Ocaina joreño
sedadinona duere finode. Naimaci abiaimo jodollaiaina comuitate. Iemona
duere sefuidimaci.

³ Iemei jiaie jaienicí ie copa oni totajamona, monaillaina duere finode.
Nana monaillaidi fiodaitino dirue isoi jaide. Eo jearedena eruaide. Nana
nainomo ite cajedino fiodaitimaci.

⁴ Iemei jiaie jaienicí ie copa oni totajamona, nana illiai, nana jorainiai diga,
duere finode. Diruena jaide.

⁵⁻⁶ Naie facaise nana jinuina sedacabide jaienicí llote:

—Jusiñamui, o jaca mareuidimedio. Ona ñnotinona eniruemo itino meinia
jira, o facaina llorainina naimaci meinia jira, naimacina o raise uifuanamona,

naimacina duere finodio. O cominina naimaci meiniamona, naimaci finua isoi, ibana oitio. O cominina naimaci meinia jira, diruena ja jiroitimaci.

⁷ Jusiñamuimo caimare soride ra jobaisoillanomona jiaie jaienici llote:

—Cai Nama Jusiñamui, ua siño jitodio. Naimaci finocabilla isoi naimacina jai duere finodio.

⁸ Naie facaise jiaie jaienici ie copa oni totajamona, jitomana duere finode. Eo lligaiñotajamona, eniruemo itino eo usidimaci. ⁹ Eo usidimaci; iadedi Jusiñamuina jeare nia ñaitimaci. Naimacina duere finollena, naimiemo uai illana uiñotimaci; ia naimie dibeimo naimaci comeciai iuaina meidoiacaiñedimaci. Jeacinona finuana fainonocaiacaiñedimaci. Naimiemo iobilacinona fecaacaiñedimaci.

¹⁰ Naie facaise jiaie jaienici ie copamona ie duere sefuillacinona monaillaimona bite ocaina sedajano dine totade. Ie muidona nana enirue jitrefficaiide. Eo duere sefuillamona, comini imaci ifena ainitimaci. ¹¹ Duere sefuillamona, Jusiñamuina jeare ñaitimaci. Naimaci abiaimo ite jodollaiiai isirede; iadedi naimaci comeciai iuaina meidoñedimaci. Jeacinona finuana fainonocaiñedimaci.

¹² Naie facaise jiaie jaienici ie copamona ie duere sefuillacinona Eufrates railla ille dine totade. Ie muidona naie aillue ille safenaite. Safenaillamona, jitoma billanomo ite nairaiiai illaicomini, imaci soldaduai diga, ruica dine raise birenitimaci.

¹³ Naie facaise aillue jaio fueмона, monaillaimona bite ocaina fueмона, naimie facaina lloraima fueмона, daje amani jananiai billana ciodicue. Nagamiemona daje janaba bite. Nai jananiai jerocina eruaide. ¹⁴ Taifemona bite. Siño rafuena finocabite. Nana illaicomini, imaci soldaduai diga uaidollena, naimacina oreite. Danomo ofillena illaicominina uaidoite. Jusiñamui diga jobairillena, danomo ofitimaci. Naimie diga jobairillamona, Jusiñamui ua siño jitona nana comini uiñoitimaci. ¹⁵⁻¹⁶ Armagedón railla illanomo ofitimaci. Naie illano mamecidi judiuai uai mameci. Ieconí cai Nama cuemo llote:

—Furiraima isoi ebena biiticue. Cue billemo ocuiridimie iocire iite. Cue billemo naimie ocuria, cue bia, naimie cue jitaillacinona finuamona, naimie meiruiñeite.

¹⁷ Naie facaise jiaie jaienici jafaici dine ie copamona ie duere sefuillacinona totade. Ieconí ie sedajanomona Jusiñamui llote:

—Bie duere sefuillicino diga, cominina cue duere finoacanacino ja fuite.

¹⁸ Ieconí boricabide. Bue isoi eo ficirede. Gurucabide. Eo aillue ñuisaño suide. Comini comuilla facaisemona iese ñuisaño jaca suiñede. ¹⁹ Iemona nanoca nairai illano daje amani facaina goide. Nana jiaie illanuai jiai goidimaci. Jusiñamuidi Babilonia railla nairaina raise uiñuamona, nana ie ricaillafuemona iena eo duere finode. ²⁰ Naie ñuisañomona naga uiasi jai cioiñena. Naga anedu jiai cioiñena. ²¹ Monamona noci deilla isoi, hieló jiai ana jurude. Naga hieló cuarenta kilos nibai merede. Cominimo baillanona, eo duere sefuidimaci. Eo duere sefuillamona, Jusiñamuina nia jeare ñaitimaci.

17

Juan eo marañede riñona duere sefuillana ciode

¹ Naie facaise naie siete copas diga ite jaienisaimona cue dine damie billanona cuemo llote:

—Cue diga bi. Eo marañede riño duere sefuillana omo acataiticue. Monailai emodomo naiñaiño jai raide isoide. Naiñaiñodi nanoca nairai illano mamecido ite. Nana illaicomini naie nairai anamo itimaci. ² Naiñaiño sedajamona, naiñaiño diga, illaicomini jearede rafuena finocabidimaci.

Naiñaiñoṇa nabaillamona, eniruemo ite comini jearede rafuena eo ebiritimaci —llote.

³ Nicañrilla isoi, jaienici cue joreñoṇa uillanona, jofue iñenanomo cue joreñoṇa uite. Eo jiairede riirede ocaina emodomo naie riño raillana ciodicue. Jusiñamuina eo jearede ñaiacino ocaina abimo eo ite. Ocainamo siete ifogiai ite. Diez sigai jiai ite. ⁴ Naie riño jiduirede iniroi, jiairede iniroi diga jitade. Eo raifide quenirede ra diga, naiñaiño abi eo finobide. Dajerie ra oromona finoca. Dajerie perlas railla ramona finoca. Ie diga ie abi eo finobide. Naiñaiño onollimo oromona finoca copana uite. Nainomo eo marañede jearede rafuena finocana uite isoide. ⁵ Jusiñamui naiñaiño finoca rafuena uiñotaiacana jira, naiñaiño uiecomo mameci jai cuetataga: “Nanoca Babilonia raillañaiñodice. Cuemona eo jearede rafue comucana jaicabide. Cue muidona comini jearede rafuena finocabide”. ⁶ Naiñaiñodi ailluena Jusiñamuimo duidinona, ailluena ua Jesúna inotinona meinetajana eo ebiruite. Naiñaiñoṇa cue cioia, eo rajicaidice. ⁷ Jaienici cuemo jicante:

—¿Bue ñe rajicaidice? Naiñaiñoṇa ite rafuena omo lloiticue. Naiñaiñodi ocaina emodomo raide. Naie ocaina rafuena jiai lloiticue. ⁸ Naie ocaina navui ite; ia birui jai iñede. Ico eniruemona, eo ana ite ifomona, dane biite; iadedi faifite. Ieri Jesucristona inoñedino rajicaitimaci. Jesucristona naimaci inoñena jira, monamo Jusiñamuidi ie rabenicomo enirue nia finoñena facaise naimaci mameciaina jaca cueñede. Naimie illanomo jaca iñeitimaci. ⁹ Ocaina rafuena omo ja lloiticue. Jusiñamui ona uiñotajanona iena cacaitio. Bie siete ifogidi siete anedu mamecido ite. Riño nainomo raide. ¹⁰ Ie siete ifogidi siete illaicomini mamecido ite. Naimacimona cinco illaicomini jai iñede. Damie cominina birui sedade. Jiaimie cominina nia sedañede. Cominina naimie sedaia, are naimacina sedañeite. Dallu sedaite.

¹¹ Ifomona bite ocainana dane lloiticue. Cominina jiai sedaite; ia bie siete illaicomini sedajacino dute. Cominina naimie sedaja mei, naimie faifite. ¹² Ie diez sigaidi diez illaicomini mamecido ite. Diez nairaina sedaitimaci; iadedi nia sedañeditimaci. Cominina dallu sedallena, ocainamona naimaci uaina feiñoitimaci. ¹³ Daje isoi comecina lloitimaci. Ocainana nabaitimaci. Naimie jitailla rafuena finuanona, naimie anamo iitimaci. ¹⁴ Toica Llauda isoidimie diga jobairitimaci; ia Llauda isoidimie ie comini diga emodofite. Llauda isoidimie nana illaicomini baifemo faia jira, nanoca imiena jira, naimacina emodofite. Ie cominina naimie fetode. Naimiena inotimaci. Jai emodofitimaci —llote.

¹⁵ Jaienici nia llote:

—Riño monaillai emodomo raillana ailli ciodio. Monaillaidi nana comini mamecido ite. Naga nairai mamecido ite. ¹⁶⁻¹⁷ Naie diez illaicominidi, ocaina diga riñoṇa enoitimaci. Naiñaiñoṇa duere finoitimaci. Jusiñamui jitailla jira, naimie jitailla rafue fuidollena, naimie lloga uai suillena, naimaci comecina daje isoi lloitaite. Ocaina anamo naimacina itataite. Riñoṇa iese fuidoitimaci. Naiñaiño iniroina oni dotatajanona, naiñaiño taiñaiñoṇa iite. Naiñaiñoṇa meineitimaci. Ie llicisina ritimaci. Ja muidomo iraimo naiñaiñoṇa dotaitimaci. Iese naiñaiñoṇa duere finuanona, naiñaiñoṇa fuidoitimaci. ¹⁸ Bie riñodi nanoca nairai illano mamecido ite. Naie nairai anamo nana eniruemo ite illaicomini iitimaci —llote.

18

Juan Babilonia railla nairai illano goilla rafuena ciodice

¹ Ie facaise monamona jiaie jaienici ana billana ciodicue. Naimie uai siño. Naimie uai siñoṇa jira, eniruena lligaiñote. ² Ado llote:

—Iena Jusiñamui duere finuamona, Babilonia nairai illano jai nana goide. Comini nainomo jai inedimaci. Nainomo Taife jaienisa birui itimaci. Jananiai nainomo birui itimaci. ³ Nia goiñenia, bie nairai jeacinona eo finuamona, nana nairai iena ebiruitimaci. Bie nairaina nabaillamona, nana illacomini jearede rafuena jiai finocabidimaci. Jearede rafuemonana nana rana fecaraini bie nairaimona ailluena ucubena ganacabidimaci —llote.

⁴ Naie facaise monamona damie llote:

—Cue comini, bie nairaimona birui mai eneno oni i. Jeacinona omoi finoi raillano, naie facaise omoi duere sefui raillano, birui eneno mai oni i. ⁵ Bie nairai jeacino eo finocana jaidimaci; iadedi iena Jusiñamui uinuamona, naimacina jai duere finoacade. ⁶ Jusiñamui, naimaci finua diese ibana ono. Naimacina ua eo duere fino. ⁷ Jeacino finuamona iobidimaci. Iemona abi iedotimaci. Jeacino finuana eo ebiruitimaci. “Illaicomini dicai. Nana cai jitailla ra caimo ite. Feciño isoi duere jaca sefuiñeiticai” comeciaina facadimaci; ⁸ iadedi cai Nama Jusiñamui naimacina ebena eo duere finoite. Duicomona, sure illamona, aime guillamona fiodaitimaci. Naimaci jofue booite. Jusiñamui siño jitona jira, naimacina raire fuidoite —llote.

⁹ Bouamona uillie naimaci cioia, sunaillamona, naie nairai diga nabairite illacomini eo eetimaci. ¹⁰ Duere sefuillena naimaci jaciruilla jira, aremona lloitimaci:

—Ero, Babilonia eo aillue nairai illano; iadedi duere finuamona ua raire fuite —lloitimaci.

¹¹ Naimaci rana naie nairai jai oñena jira, rana fecaraini eo sunaillamona eo eetimaci. ¹² Iese fecacabidimaci: oro, plata, abi finollena raifide ra, diga eo mare raifide iniroi, diga caimare soride rabiciai, elefante sigainiai, jofona nille ra, bronce, lloeona, mare nofici, ¹³ guille caimaretade ra, caimare soride ra, vino, guille ie aceite, mare harina, core, juraretaiai, toica llaudaiai, caballos, carretas, comini. Vendellena, cominina aticabidimaci. ¹⁴ Sure illamona lloitimaci:

—Caimona omoi comeciiai jitailla rana ja oñeitomoi. Omoi ebiruiga rana ja oñeitomoi.

¹⁵ Duere sefuillena naimaci jaciruilla jira, nainomona ucubena jai oñenamona, rana fecaraini aremona ado eo eetimaci. Sunaitimaci.

¹⁶ Lloitimaci:

—Naie nairai eo duere sefuidimaci. Nia duere sefuiñenia, eo mare rana, mare iniroi diga ebiruitimaci. Eo raifide abina finolle rana eo ebiruitimaci. Oromona finoca ra, perlamona finoca rana eo ebiruitimaci; ¹⁷ iadedi nana naie nairai, ie raifide ra diga, jai raire fuite —lloitimaci.

Nana botes imaci capitanes, nana botemo maijuidino diga, nainomo jaidino diga, botedo rana fecaraini diga, ¹⁸ aaremona uilliena ciuamona, naie nairai bouana fidiano, lloitimaci:

—Naie nairai nana jiai nairaiiai baifemo navui faite. Jiaie nairai ie isoi ebinide.

¹⁹ Sure illamona, naimaci ifogimo imuicina faianona, eetimaci. Lloitimaci:

—Bie nairai eo duere sefuide. Bie nairaimona boteredinodica navui ailluena ganadica. Bie nairai jai raire fuite.

²⁰ Naie facaise monamona damie llote:

—Monamo itino, naie nairai fuillari mai iobi. Jusiñamui cominina jai jaidomoi. Naimie facaina navui maijidoi. Naimie rafuena navui llofueuidomoi. Naie nairaimona duere sefuidomoi; iadedi omoi facaina Jusiñamui ibana jai ote.

²¹ Naie facaise jiaie jaienicimo siño uai illanona, eo aillue nofici llinuanona, monaillaimo iena faite. Llote:

—Bie nofici dane cai cioiñena isoi, Babilonia railla nairai dane iñeite. Jusiñamui iena eo riire fuidoite. ²² Nainomo buna dane roñeite. Buna guitarrana eruaide arpas jaca taiñeite. Buna firacaina jaca fiñeite. Buna trompetana jaca fiñeite. Nainomo buna rana jaca niñeite. Rana jaca finoñeite. Buna jaca doberiñeite. Llomenicono finollena, buna dane maijiñeite. ²³ Nainomo naiona lamparíniai dane booñeite. Rafue dane iñeite. Eo caimare iobitaja rafue dane iñeite. Iraisíñeitimaci. Saiñeitimaci. Naie nairai rana fecarainidi navui nanoca fecaraini. Naimacina Taife canua jira, ailluena nairaiaina navui jifuecabitimaci. ²⁴ Naie nairai ailluena Jusiñamuina inotina meinetimaci. Ailluena Jusiñamui facaina llorainina meinetimaci; iadedi naimacina Jusiñamui duere finua jira, ua eo mare —llote.

19

¹ Ie facaise monamo eo ailluena comini ado llua cacadicue. Jusiñamuimo llotimaci:

Ona cai iobitajasa. Caina jai jillotatio.

O uai ebirede. Odi siño jitodio.

² O anamo itinona raise uiñuamona, uanaicinona o uiñuamona, naimacina duere jai finodio.

Naie jearede rafuena finode riñona jai duere finodio.

Naie riño ailluena cominina jearede rafuena finotate.

Ailluena o facaina maijidinona jai meinetade;

iadedi iba jai otio.

³ Iemei dane llotimaci:

—Ona cai iobitajasa. Duere sefuillena, naie nairai jaca boode. Naimaci jaca duere sefuitimaci —llotimaci.

⁴ Naie veinticuatro einamaci, naie cuatro cajedino diga, Jusiñamui ecimo ana bitadajanona, naimiena sedadimaci. Llotimaci:

—Omoi llucino mare. Ie isoi jiai lloiacadica. Jusiñamuina cai iobitajasa.

⁵ Jusiñamui illanomona damie llote:

Nana cai Jusiñamuina facaina maijidino iobitajasa.

Nana naimiena inotino naimiena iobitajasa.

Jamai bue isoidino naimiena iobitajasa.

Jamai bue isoiñedino naimiena iobitajasa.

Juan Toica Llauda isoidimie aina ua rafuena cacade

⁶ Naie facaise monamo eo ailluena comini llua cacadicue. Ailluena jinui surua isoi ficirede. Eo gurucabilla isoi ficirede. Llotimaci:

Cai Nama Jusiñamuina cai iobitajasa.

Naimie siño jito. Nana cominina birui jai sedade.

⁷ Eo iobidica. Naimiemo iobillacinona eo cai fecajasa.

Llauda isoidimie ie aina ua rafue facaise jai suide.

Naiñaiño jai finobide.

⁸ Mare iniroi naiñaiño jai ite. Eo userede. Quenirede. Jeanide

llotimaci. Iese iniroina llotimaci; ia Cristo, ie comini diga, jaca illena ñaitimaci.

Ie ai diga, ini ie riño jaca caimare illa isoi, nana naimie comini diga, naimie caimare jaca iite. Naie mare iniroidi, Jusiñamui jitaillacinona finuamona, naimie inotino imaci mare finoca rafue isoide.

⁹ Jaienici cuemo llote:

—Biena cueno: “Llauda isoidimie aina ua rafue dine uaidoganodi caimare iitimaci”. —Iemei llote:

—Jusiñamui iena llua jira, uanaicinona omo lloticue.

¹⁰ Jaienici uicomo eillimo ana bitadaticue, naimiena sedallena; ia cuemo llote:

—Dama ite. Cuena sedaño; ia dama Jusiñamuina seda. Jesús ie dibeimo itinona uanaicinona jai uiñotade. Ie jira naga o diga naimiena inotino isoi, Jusiñamui facaina jiai maijidicue. Naga Jusiñamui facaina maijidimie Jusúna llocabite. Ie muidona dama Jusiñamuina seda.

Juan userede caballo emodomo itimiena ciod

¹¹ Naie facaise mona ecorillana ciodicue. Nainomo userede cabal-lona ciodicue. Naie emodomo itimieno mena mameci ite. Inogamiena mamecirede. Uanaicinona Llocabitimiena jiai mamecirede. Naimacina raise uiñuamona, naimie dibeimo inedinona duere finollena, naimaci diga jobairite.

¹² Naimie uisidi irai isoide. Illaimana jira, naimie ifogimo ailluena nuicirai ite. Naimiemo cuega mamecina buna uiñoñede. Dama naimie iena uiñote.

¹³ Naimie jitaca iniroi ie dibeimo inedino diruemo mutaca. Jusiñamuina naimie uiñotaja jira, Jusiñamui Uairedimiena mamecirede. Naimiedi Jesu-cristo. ¹⁴ Naimie jinafona soldaduai isoi Jusiñamui facaina itino monamona billana jiai ciodicue. Eo mare userede jeanide iniroina jitadimaci. Userede caballuai emodomo itimaci. ¹⁵ Eniruemo ite nairaiaina emodofillena, naimie fuemo jairede lloebi ite. Naimacina emodofilla mei, naimacina naimie jitaillacinona finotallena, naimacina eo riire sedaite. Jusiñamui siño jitona jira, naimie riicaillifue anamo itinona eo duere finoite. ¹⁶ Naimie iniroimo, naimie idaimo jai cuega: “Nanoca Illaima. Nanoca Nama”.

¹⁷ Naie facaise jaienici jitoma lligaiñuanomo ciodicue. Nana inoniaina uaidote:

—Llicisina mai riabi. Jusiñamuidi ailluena cominina ja meiniama rille eo iite. ¹⁸ Naimacina emodofillamona, ailluena llicisi ja iite. Ailluena cominina ja meineite. Illaicomini itimaci. Soldaduai illaicomini itimaci. Caballuai itimaci. Caballuai emodomo jaicabidino itimaci. Diga comini ite. Jamai bue isoidino itimaci. Jamai bue isoinedino itimaci. Patrones anamo itino itimaci. Patrones anamo inedino itimaci. Naimaci llicisi mai riabi —llote.

¹⁹ Naie facaise monaillaimona bite riirede ocainadi enirue illaicomini diga ofide. Naimaci soldaduai jiai ofidimaci. Userede caballo emodomo itimie diga, naimie dibeimo itino diga jobairiacadimaci. ²⁰ Userede caballo emodomo itimie ie dibeimo itino diga naimacina emodofide. Ocainana gaitadimaci. Naimie facaina tainona lloraimana jiai gaitadimaci. Naie lloraima ocaina uai diga cominina jifuecabite. Siño rafuena finuamona, ocaina cuetataga ra itinona, ie joreña sedadinona jifuecabite. Naie iaimaiaina gaitaja mei, eo boode iraimo iaimaiaina cajena dotadimaci. Azufre boa isoi irai boode. ²¹ Caballo emodomo itimiedi ie fuemo ite lloebi diga iaimaiai soldaduaia meinete. Jaienici llua isoi, inoniai naimaci llicisina ritimaci. Iemona eo monidimaci.

20

Juan mil años Taife maiana ciod

¹ Naie facaise monamona jaienici billana ciodicue. Eniruemo eo ana ite ifo llave naimiemo ite. Aillue lloeo ie onollimo ite. ² Aillue jaiona eruaidimiena gaitade. Naimiedi Taife. Riai uaimona Satanás. Jiaici dragón. Mil años iese illena lloeo diga naimiena maite. ³ Ana ite ifomo naimiena dotade. Llave diga ifona ibaide. Cominina ramo faiñellena, naimacina jeacinona finotañellena, naimie uaina itatañede. Mil años cominina jifuenide. Mil años fuilla mei, dallu naimiena jino oretaite, cominina ramo faillena.

⁴ Ie mei monamo diga jueces illanuaina ciodicue. Jusiñamui uai diga nainomo itinodi marañede rafue finodinomo jamai duere sefuillicinona lloitimaci. Ie facaise jai meineganona jiai ciodicue. Eo duere sefuilla facaise “Jesús cominidicai” naimaci llua jira, Jusiñamui uaina naimaci llua jira, naimaci ifogiaina jaitajanona, naimacina meineganodimaci. Monailaimona bite ocainana sedañedimaci. Ie joreña sedañedimaci. Ie cuetataga ra naimaci uiecomo, naimaci onollimo iñede. Navui fiodaitimaci; ia iemona bie facaise jai jillobitimaci. Imaci abiai diga Jusiñamui naimacina jillotaite. Cristo diga mil años eniruego itinona sedaitimaci. ⁵ Naimacidi nano jillodino. Naie mil años nia fuiñenia, jiaie jai fiodaitino nia jilloñeitimaci; ia mil años fuilla mei, jilloitimaci. ⁶ ¡Nano jillodino caimare marena iitimaci! Dane fiodañenamona Jusiñamui illanomo jaca iitimaci. Faifiñeitimaci. Comina sedajanona, comini Jusiñamuina raise uiñollena, comini Cristona raise uiñollena, naimacina canoitimaci. Cristo diga mil años naimacina sedaitimaci.

⁷ Bie mil años fuilla mei, Jusiñamuidi ana ite ifomona Taife jino oretaite. ⁸ Nana eniruego ite nairaiaina jifuiabite. Gog railla illaicomina, Magog railla nairaiai diga, jifueite. Naimaci nairaiaina ofitaite. Eo ailluena naimaci illa jira, conillena cai facadonina isoi, naimacina facadonidicue. Jusiñamuina inotino diga jobairillena, ofitimaci. ⁹ Danomo ofillanona, Jusiñamuina inotinona ciribitaitimaci. Jerusaléna, Jusiñamui isiruiga nairaia, ciribitaitimaci. Naie facaise monamona boode ra billanona, jobairiacadinona fuidoite. ¹⁰ Comina eo jifuecabite; ia ie facaise Jusiñamuidi Taifena eo boode iraimo dotaite. Azufre boa isoi irai boode. Nainomo monailaimona bite ocainana jai dotade. Naimie facaina tainona lloraima jai dotade. Nainomo ua jaca duere sefuitimaci

Juan aillue rairabicina ciode. Nainomona Jusiñamui duere finollicinona llua cacade

¹¹ Naie facaise aillue userede rairabicina ciodicue. Illaimana naimie illamona, nainomo Jusiñamuina jiai ciodicue. Naimie siño illamona, mona enirue diga jai iñede. ¹² Naie facaise Jusiñamui uiecomo nana fiodaitino naidailana ciodicue. Jamai bue isoiñedino itimaci. Jamai bue isoidino itimaci. Naimacimo juez isoi Jusiñamui lollena, itimaci. Ie rabenicuaimo naimaci jai finoca rafuena jibuide. Naimaci finoca rafue nainomo jai cuega. Iemei Jusiñamui jiaie rabenicono jibuide. Naimie diga jaca ille comini mameciai nainomo jai cuega. Naimaci mameciai nainomo iñenia, naimaci finoca rafue diese Jusiñamui naimacimo duere sefuillena llote. ¹³ Monailaimo ite corobaitino abiai, joreñuai diga, jilloitimaci. Raigano abiai joreñuai diga jilloitimaci. Naimaci finoca rafue diese Jusiñamui naimacimo duere finollena lloite. ¹⁴ Naimaci abiai naimaci joreñuai diga iraimo dotaite. Jaca faifitimaci. Naiemona jaca jilloñeitimaci. Jusiñamuimona eneno jaca itimaci. ¹⁵ Monamo ite rabenicomo cueñega comini mameciai diese itinona iraimo dotaite.

21

Juan comue monana, comue enirue diga ciode

¹ Birui ite mona, birui ite enirue diga jai iñede. Monailai jiai jai iñede. Iemei comue mona ciodicue. Comue enirue jiai ciodicue. ² Comue nairai illanona ciodicue. Comue Jerusaléna ciodicue. Jusiñamui illanomona, Jusiñamuimona bite. Naimiemona billa jira, naie nairai eo mare. Eo ebirede finobide riño ie inina ua facaise isoi, eo ebirede. ³ Jusiñamui illanomona damie ado llote:

—Comini motomo Jusiñamui illano jai ite. Naimaci diga naimie iite. Naimie comininitimaci. ⁴ Naimaci illanomo naimie iite. Naimacina naimie

nabaillamona, naimie jitailla jira, naimacina caimadoite. Dane eeñeitimaci. Fiodañeitimaci. Sunañeitimaci. Duere sefuiñeitimaci. Birui ite rafuemo comeciaina naimaci nainomo facañena jira, ie facaise sunañeitimaci —llote.

⁵ Jusiñamui llote:

—Ero, nana ra comuena birui finoiticue. Cue llucino uanaicinona jira, cue llucacinona cue finua jira, bie rafuena cueno.

⁶ Iemei cuemo llote:

—Bie rafue jai fuite. Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. Naimaci illena comini jinuina eo jiroacana isoi, cuena inotino comeci ai eo caimare itataiticue. Ibataño cue diga illena, naimacina jaca itataiticue. ⁷ Cuen a raise inotinona iese itataiticue. Jaca naimaci Jusiñamuniticue. Naimaci jaca cue comininitimaci. ⁸ Jiaño jaca eo boode iraimo jaca iitimaci. Azufre boa isoi irai booite. Naiemona jaca jilloñeitimaci. Cuemona eneno jaca iitimaci. Diese nainomo iitimaci: abido danomo jaidino, cuena raise inoñedino, jearede rafue finocabidino, cominina meinotino, añede riño diga icabitino, iniñede ima diga icabitino, añinai, jiraraina sedacabidino, tainona llocabitino —llote.

Juan comue Jerusaléna llote

⁹ Naie facaise naie siete jaienisaïmona damie cue dine bite. Naie jaienisaïimaci copamo cominina duere finollicinona navui ite isoide. Naimie cuemo llote:

—Cue diga mai bi. Ima ie aina jai ua isoi, Toïca Llauda isoidimie ie cominina jai ote. Ie ai isoidimaci. Llauda isoidimie jai oga comini illanona omo acataiticue.

¹⁰ Nicaïrilla isoi, Jusiñamui Joreño cue joreñoa eo a ite aillue anedumo uite. Nainomona, Jusiñamuïmona, monamona Jerusalén billana ciodicue. Jusiñamui iena jira, eo mare. ¹¹ Nainomo Jusiñamui illa jira, naie illano eo quenirede. Eo mare raifide nofici isoi quenirede. Jaspe railla noficina eruailla jira, enefebecodo ciode. ¹² Ie llaïgafo eo a ite. Eo jedaciede. Doce nasiaï ite. Naga nasemo daje jaienici ite. Israel micori uruiaï mameciaï naie nasiaïmo cueda. Doce uruiaï illa jira, naga naserie daje mameci cueda. ¹³ Jitoma bicabillano dine eruaïde llaïgafomo daje amani nase ite. Jitoma jaicabillano dine eruaïde llaïgafomo daje amani nase ite. Naga beici dine eruaïde llaïgafomo daje amani nase ite. ¹⁴ Naie llaïgafo anamo doce nofici ite. Nainomo Toïca Llauda isoidimie ie doce llofueoicaïgano mameciaï cueda.

¹⁵ Cue diga ñaite jaienicimo oromona ra facara ite. Naie nairaï facallena ite. Ie nase, ie llaïgafo diga, facallena ite. ¹⁶ Naie nairaina naimie facajamona, nagafebei daje isoi illana uiñoticue. Dos mil doscientos kilómetros nagafebei are ite. Dos mil doscientos kilómetros nagafebei a ite. ¹⁷ Ie llaïgafona jiaï facade. Sesenta y cuatro metros a ite. Comini facaja isoi, jaienici iena facade.

¹⁸ Ie llaïgafo jaspe railla noficimona finoca. Bie nairaï difai oromona finoca. Enefebecodo ciode. ¹⁹ Diga eo quenirede noficina eruaïde ra llaïgafomo ite noficimo jai nitade. Nano jaspe. Enefebecodo ciode. Iemei zafiro. Mocorede. Jiaïe ágata. Mocorede. Jiaïe esmeralda. Mocorede. ²⁰ Jiaïe ónice. Jiaïrede userede diga faiga. Jiaïe cornalina. Jiaïrede. Jiaïe crisólito. Orona eruaïde. Jiaïe berilo. Mocorede. Jiaïe topacio. Borarede. Jiaïe crisoprasa. Mocorede. Jiaïe jacinto. Jiduirede. Jiaïe amatista. Jiduirede. Naie llaïgafo anamo ite noficiï doce diga ite. ²¹ Ie doce nasiaïdi perlas. Userede. Naga nase daje perlamona finoca. Bie nairaï naisuaïdi difai oro. Enefebecodo ciode.

²² Bie illanomo Jusiñamuina sedajanona cioñedicue. Nana bie illanodi naimie sedajano. Cai Nama Jusiñamui, Toica Llauda isoidimie diga, nainomo illa jira, iaïmaiaï uicomo sedaiticai. ²³ Jusiñamui siñona jira, nainomo comini jitomana jitaiñeitimaci. Fivuna jitaiñeitimaci. Jusiñamui, Llauda isoidimie diga, iena lligaiñoite. ²⁴ Nana comini iaïmaiaïna nabaicana jaitimaci. Nana illaïcomini iaïmaiaï ðine billanona, iaïmaiaïmo iobillacino jaca fecaitimaci. ²⁵ Bie nairai nasiaï jaca ibaiñeite. Nainomo naionadi jaca iñeite. ²⁶ Iaïmaiaïmo iobillacinona fecallena, nana comini nainomo biitimaci. ²⁷ Nainomo jeacino jaca iñeite. Jearede rafue finodino nainomo biñeitimaci. Tainona lloraini biñeitimaci. Dani Llauda isoidimie mo ite rabenicomo cuega mameciaï itinodi nainomo biitimaci. Bie rabenicomo Jusiñamui illanomo jaca iitino mameciaï jai cuega.

22

¹ Naie facaise jaienici cuena daje ille acatate. Nainomo ite jinui jiruamona cominina jaca itataite. Uifinide. Jusiñamui, Llauda isoidimie diga, illanomona tote. ² Nanoca naiso motodo tote. Nagafebelle ðine jaca itataite amenaïaï ite. Naga fivui llisillamona, naga fivui llisilla ite. Ie ibiaï illamona, comini caïmare marena itimaci. ³ Jeacino nainomo iñena jira, Jusiñamui jaca buna duere finoñeite. Jusiñamui, Llauda isoidimie diga illamona, naimie comini naimiena jaca sedaitimaci. ⁴ Naimiena marefodo cioitimaci. Naimie mo naimaci duillamona, naimaci uiecuai itofaïmo naimie mameci cueite. ⁵ Nainomo naionadi iñeite. Lamparina jitaiñeitimaci. Jitomana jitaiñeitimaci. Cai Nama Jusiñamui naimacina lligaiñoite. Illaïcomini isoi jaca iitimaci.

Juan Jesucristo billirui iaïrei illana cacade

⁶ Jaienici cuemo llote:

—Bie lluacïnodi uanaicino. Naimie facaina llorainimo ie rafuena llollena, ie uaina itatate. Naimiena ñnotinona ico suille rafuena ja uiñotaiacade.

⁷ “Raire biiticue” Cristo llote.

Bie rabenicomo ite ico suille rafuena ñnotinodi caïmare iitimaci.

⁸ Juandicue. Bie rafuena cacadicue. Iena ciodicue. Iena cue cacaja mei, iena cue ciua mei, iena cuemo acataga jaienici uicomo ana bitadatïcue. Naimiena sedaacadïcue; ⁹ iadedi cuemo llote:

—Dama ite. Cuena sedaño. O diga, naimie facaina lloraini isoi, bie rabenicomo ite llogacïnona ñnotino isoi, naimie ðibeimo jiaï maijidicue. Dama Jusiñamuina seda. ¹⁰ Bie rafue suillirui iaïrei illa jira, iena jino llono. Iena uiñota. ¹¹ Bie rafuena bu ñnoñenia, naimie jitailla jira, marañede rafue naimie finoacania, iena nia finoite. Jearede rafue bu finoacania, iena nia finoite; ia bie rafuena naimie ñnoia, naimie jitailla jira, mare rafue naimie finoacania, mare rafuena finocana jailla. Jusiñamui jitaillacïnona bu finoacania, naimie jitaillacïnona nia finocana jailla.

¹² Jesucristo cuemo llote:

—Ero, raire biiticue. Naimie finoca rafue ðiese nagamiemo ibana fecaiticue. ¹³ Jaca bue nia iñenia, jaie jaca iticue. Nana rana finodïcue. Nana ra cue uaido icana jaide. Nana rana fuilla mei, jaca iitïcue. Jaca siño jitodïcue. ¹⁴ Naimaci ñniroina naimaci jocoia, caïmare iitimaci. Naimaci comecina ñaiticue. Ie jeacïnona oni dotacame jaca itataite amena llisillamona lliite. Cue cominina naimie illamona, Jusiñamui illanomo ie nasedo jaicabite; ¹⁵ ia naimacina jeacïnona naimaci faïnonocaiñenia, Jusiñamui illanomo marañede rafuena finocabidino, aïma ðine jaicabidino, aïñede riño diga icabitino, ñniñede ñima diga icabitino, cominina meinettino, jiraraina sedacabidino, tainona llocabitino ðuiñeitimaci. ¹⁶ Creyentiaïna bie rafuena

uiñotallena, cue jaienici o dine jai oretaticue. David micori ie jitodicue. Monairaicudu bairia isoi, Jusiñamui jitaillacinona cue finollena, baireitiecue —llote.

¹⁷ Bie facaise Jusiñamui Joreñodi, Cristo jai oga ai railla comini diga, naimiena nia ñnoñedinona uaidote:

—Bie rafuena mai cacarei. Iena mai ñno. Iena bu ñnoia, jiaimiemo iena lluai: Iena mai cacarei. Iena mai ñno.

Jiroacadimiemo llotiecue:

—Mai jiruaibi. Bie jinua raifiñede. Biena o jiroacania, jaca iitio. Iese llotiecue; ia ie comecina ñaitecue. Bie rafue ñnuana ñaitecue. ¹⁸ Bie ico suille rafue ite rabenicono bu facajia, naimiemo rafuena lloiacadicue. Bie rafue baifemo bu lloia, bie rafuena bu meidoia, bie rabenicomio ite duere finuacino isoi, Jusiñamui naimiena duere finoite. ¹⁹ Bie rafuena bu jamaia, Jusiñamui naimiena duere finoite. Jaca illena Jusiñamui ie mamecina ie rabenicono jaca cueñeite. Comue Jerusalémo jaca duiñeite. Naiena jai llotiecue.

²⁰ Cristo raite:

—Bie rafue jaca suite. Ua raire biitecue.

Iena raire suillena jiai jitaidecue. Cai Nama Jesús raire billena eo jitaidecue.

²¹ Naimie duenailacinona nana Jesucristona ñnotino uiñocana jaillana jitaidecue. Macaibaite. Juandiecue.